

Q. HORATII FLACCI

OPERA OMNIA.

RECOGNOVIT

ET COMMENTARIIS IN USUM SCHOLARUM

INSTRUXIT

GUIL. DILLENBURGER,

PHIL. DR. AA. LL. M.

#29306
187

EDITIO TERTIA.

BONNAE,

SUMPTIBUS ADOLPHI MARCI.

MDCCCLIV.

Printed in **Germany**

PA6393
A2
1854

405984
★ '31

1.20

THEODORO
BRUEGGEMANNO,

PHILOSOPHIAE DOCTORI, REGI BORUSSORUM POTENTISSIMO A CON-
SILIIS INTIMIS IN REBUS SACRIS AC SCHOLASTICIS, EQUI TI ORDINIS
AQUILAE RUBRAE SECUNDAE CLASSIS

VIRO DE SCHOLIS PER BORUSSIAM OPTIME MERITO

S.

PRAEFATIO.

Cum post gravissimos Peerlkampi in Horatii carmina impetus multi praecipue in Germania viri docti in Horatio et interpretando et defendendo acerrimo studio elaborassent de plurimisque vel totis carminibus vel singulis versibus rectius quam antea esset factum iudicassent, non potuit non videri optabile, ut tanti studii ac laboris fructus scholarum in usum colligerentur iuvenibusque antiquarum litterarum opibus ad humanitatem informandis carpendi percipiendique offerrentur. Quod munus cum ego susceperem, et aliorum virorum quorum auctoritatem maximi semper haberem voluntati cessi neque quantae ad eam rem honeste sustinendam superandae essent difficultates ullo unquam tempore ipse me celavi. Nunc cum in eo sim ut librum emittam, viam quam in conscribendis commentariis secutus sim breviter monstrandam mihi esse existimo. Etenim rectam illam quidem esse confido; ego autem utrum constantia et viribus satis munitus eam perfecerim an facultatibus destitutus illuc quo tenderem non pervenerim in occultosque tramites devius declinaverim, illi videbunt quibus de his rebus rectum erit et aequum iudicium. Atque in conscribendis commentariis, quibus adolescentibus maxime consultum volumus, id ante omnia cavendum est, ne diversa consilia confundentes modo altiora praebeamus, ad quae

iuvenilis animus non satis paratus accedat, modo viliora apponamus, quibus nihil ille alatur aut vires possit augere. Quare in edendis Horatii operibus eum mihi proponebam adolescentem, qui ad primam suae scholae classem bene munitus et paratus pervenisset, ad eiusque intelligentiam et scientiam omnem meam rem accommodare studebam. Aperiendus ei erat, quam id maxime fieri posset, poetae animus, via monstranda qua ad praestantiam rerum ac praeceptorum formaeque artificiosam venustatem intelligendam et aestimandam sensim perveniretur, ratio denique ostendenda qua cum sua aetate suisque aequalibus poeta olim coniungeretur, ne — id quod spe saepius nostra aetate factum est — pravum iudicium vel de carminibus vel de animo moribusque Horatii confirmaretur. Quo consilio vitam poetae praemisi ex poematis ipsis haustam neque maiorem quam quae facile ab adolescentibus legeretur et ita moderatam, ut quae certa essent et firma ab iis secernerentur, quae veri quidem similia multis viderentur, nunquam tamen penitus possent explorari. In constituendis poetae verbis eam mihi legem esse volui, ut antiquissimorum et optimorum codicum, imprimis Cruquianorum et Orellianorum, auctoritatem sequeretur neque ante aliorum et deteriorum lectiones reciperem quam illi aperte falsa praeberent, coniecturis emendandique periculis, quae in Horatium et olim fecerunt et nunc faciunt iniuria, prorsus abstinere. Praeter ipsa verba magna etiam cura adhibenda erat de verbis sententiisque inter se coniungendis interpungendisque; in qua re haud scio an quid peius possit institui quam si quis patriae linguae naturam sequens nostrorumque grammaticorum severis legibus obtemperans cohaerentia membra latini sermonis foede dissecare, alienas partes violenter coniungere non dubitet. Cuius quidem rei tristitia exem-

pla olim collegi in Quaestionibus meis Horatianis p. 115—119. Adiuvamur cum legimus sana interpungendi ratione, impedimur prava; atque audienda est illa vox Ciceronis de Orat. III, 46: »clausulas et interpuncta verborum animae interclusio et angustiae spiritus attulerunt.« Orthographiae melius me consulturum putabam, si vulgarem scribendorum vocabulorum rationem sequerer quam si Horatius ipse et aequales quomodo scripsissent anxie investigarem inque periculum a veris aberrandi inconsulto inciderem. Iam ut de commentariis dicam, ita rem institui, ut praemissa brevi metrorum expositione — in qua ordinem a *Schnitzio* olim in programme gymnasii Monasterii Eifflensis dilucide propositum meum feci — singulis carminibus argumenta praeponerem in iisque uberius quam id fieri solet in huius modi editionibus et tempora et loca describerem, de summa carminum sententia inquirerem, partes ostenderem, totam denique oeconomiam modo accurate exponerem modo cum totius operis angustum spatium brevitatis studium mihi imponeret, universe indicarem. In qua re hoc quoque secutus sum, ut consilio poetae explorato convenientiaque singularum carminum partium reperta malis quae hodie audimus de Horatii carminibus iudiciis occurrerem quantaque Venusinus poeta in expolientis carminibus usus esset cura et arte digito monstrarem. Magnus enim carminis conficiendi artifex fuit Horatius, quamquam omnia eius poemata pari laude digna esse quis sobrius dicat? Plurima in his rebus debeo doctissimis viris qui nuperrime de Horatio scripserunt, *Obbario*, *Orellio*, *Duentzero*, *Kirchnero*, *Luebker*, *Iacobsio*, *Grotensio*, *Frankio*, aliis; quorum nomina ne, ubicunque eorum doctrina et opibus usus essem, nominarem libri vetuit brevitatis ac tota ratio. In singulis locis et versibus explicandis hoc volui cavere ne

quid ex historia rerum gestarum, geographia, mythologia afferrem quod iam notum esse deberet adolescentibus ad primam gymnasii classem ascendentibus, ne quid expromerem quod aut artes grammaticae aut lexica latina, quibus uti solent discipuli, abunde praeberent, ne denique libros a notitia vel copia adolescentium alienos moleste et importune laudarem. Quapropter qui citandi essent aliorum scriptorum loci, si ex Virgilio essent desumpti vel ex Ovidii Metamorphoseon libris similibusque, numeros tantum indicavi; aliter totos locos apponendos curavi. Illud autem efficere tentavi, ut quam plurima apponerem quae accuratorem antiquorum morum ac vitae notitiam adiuvere aut poetarum latinorum praecipue Horatii usum scribendi possent illustrare. Neque omnino poteram criticis annotationibus abstinere; quae tamen res cum difficillima sit et magnam partem a iudicio discipulorum remota, ea potissimum eligenda constitui quae et adiuvantibus magistris possent ab adolescentibus intelligi et iuvenilem animum acuerent et corroborarent. Ad calcem libri indices adieci; in iisque congessi et ea nomina quae aut apud Horatium aut alia de causa essent memorabilia omissis iis quae semel fortasse exempli faciendi causa attulisset poeta, et eas res quae in annotationibus ad indicatos locos explicatae facile possent data aliqua occasione requiri.

Aquisgrani, Kal. Septembr. MDCCCXLIII.

PRAEFATIO

EDITIONIS II.

Cum abhinc quattuor annis Horatium scholarum in usum edere auderem, non licuit sperare, tam brevi tempore interposito fore ut novae editionis parandae munus mihi imponeretur. Nunc quod ita factum est, duabus maxime de causis gratissimum mihi est; primum enim ita intellexi, meam in interpretando hoc amabili poeta positam curam nec prorsus inanem fuisse nec elegantium iudicum cautorumque magistrorum approbatione carere; tum occasionem nactus sum perquam opportunam mutandi et corrigendi, ubicunque in interpretandis singulis carminibus locisve vel ipse meliora videbar reperisse vel aliorum argumentis cedere eram coactus. Universam libri naturam rationemque interpretandi non habui cur mutarem, nec saepe factum est, ut in versibus Horatii ipsis lectio in prima editione recepta nunc videretur posthabenda alteri. Quaecunque interea scripta sunt de Horatio, ea, siquidem ad manus meas oculosque perlata sunt, legi in meumque usum convertere studui; in eaque re multum me debere profiteor *Webero*, *Obbario* *), *Orellio*, *Duentzero*, aliis. *Kirchneri* autem *Novas Quaestiones Horatianas* et *Steineri* *Crucenacensis Commentationum Hora-*

*) Publice iudicium tulerunt de meo libro *Weberus* in *ephemeridibus Halensibus* a. 1844. Nov. No. 285 sqq., *Obbarius* in *Iahni Ann.* 1845. 7. XLIV. 3. p. 259 sqq., *Rauchensteinius* in *Mageri* libro, qui inscribitur *Revue* 1846. Ianuar. Februar.; quibus doctissimis viris et quod benevole de meo labore iudicarunt et quod non pauca indicarunt quae sequi deberem, maximas nunc ago gratias.

tianarum specimen secundum quod non ita mature accepi, ut possem iis uti, magnopere doleo. Ne tamen meus liber doctissimorum virorum iudicio et copia omnino careat, unum saltem locum nunc inde expromere iuvat. Ac primum dicendum est, etiam *Kirchnerum* ad eos accedere criticos, qui Horatii carmina iam ante scholiastarum aetatem passim interpolata esse censuerunt; in iisque locis numerat (p. 63) locos dudum a criticis damnatos: Carm. III, 4, 69—72; III, 11, 17—20; III, 17, 2—5; IV, 4, 18—22; IV, 8, 17; Epist. I, 1, 56; et addit ad hos locos Epod. 9, 35. 36, quos versus cum *Peerlkampio* pluribus de rationibus Horatianos non esse putat, Sat. II, 7, 63—65, quos versus cur pro spuriiis et suppositiciis habeat, suo se loco probaturum pollicetur. Deinde addit: »alios locos certe antiquissimos, qui in libris Mstis nonnullis etiam vetustioribus leguntur, scholiastae ignorant, ut paucissimis fortasse exemplis, quae ipsi non viderunt, propagatos. In his numeramus octo versus illos decimae satirae praepositos: *Lucili, quam sis mendosus — ut redeam illuc*, quos in Mss. haud paucis non tamen, fateor, vetustissimis, reperi-mus: et locum I. Sat. 6, 126 *fugio campum lusumque trigonem* *).« De versu autem et difficillimo et vexatissimo, Carm. IV, 8, 17, inter alia haec scripsit: »Sed propter impeditiorem in *Hermanniana* **) versuum transpositione verborum constructionem et lacunam, quae sic oritur, haud facile supplendam, convenit sub finem anni 1844

*) Hanc lectionem, olim a Cruquio e cod. Bland. 1, omnium antiquissimo vulgatam, post huius interitum pro deperdita habitam, a nonnullis tamen viris doctis cupide arreptam nunc se in Cod. Goth. 2, a repperisse ait *Kirchnerus* p. 23. Veram tamen lectionem *rabiosi tempora signi* tuetur etiam antiquissimus codex Barcellonensis, nuper ab *Hauthalio* diligenter descriptus (Ueber die älteste spanische Handschrift des Horaz und des Akron. Bonn. Habicht. 1847.), et Cod. Bruxell. X. saec., quem vidit *Schneidewinus*, cf. Philolog. Tom. 1. fasc. 1. p. 168.

**) Hermann. Epitom. doct. metr. §. 578. ed. II.

per litteras datas inter me summumque hunc criticum de faciliore hac transpositione: »*gaudes carminibus: carmina possumus* | *Donare et pretium dicere muneris* (sic Acr. Porph. *muneri* codd. nostri omnes) | *Per quae spiritus et vita redit bonis* | *Post mortem ducibus. Non celeres fugae* | *Reiectaeque retrorsum Hannibalis minae,* | *Non incisa notis marmora publicis* | *Eius, qui domita nomen ab Africa cett.*« Sic omnia bene se habent: »*carmina possumus donare, per quae spiritus et vita redit post mortem bonis ducibus* i. e. *per quae immortales sunt.* Sic pretium carminibus statim statuitur, et grata anaphora servatur: *Non celeres fugae — non marmora* etc. Levius quod existit hyperbaton constructionis, sententia interposita *et pretium dicere muneris*, facile defenditur similibus locis: I. Od. 1, 3—7. II. Sat. 2, 27—29. Aliam huius totius loci ex coniectura restitutionem idem vir excell. nobiscum per litteras subtilis doctrinae plenas communicavit, quam si per eum licuerit, data occasione vulgabimus.« Haec ille; ego vero, si licet contra tanta nomina meam interponere sententiam, ut nullam omnino apud Horatium interpolationem praeter octo illos versus decimae satirae praepositos agnosco, sic ne huic quidem subtilissimae transpositioni faveo cum iisque potius facio, qui, si quid non bene scriptum apud Horatium reperitur, culpam non grammaticis, non scribis, non ineptis miserisque monachis iniungunt, sed aut ipsi poetae — quem interdum etiam dormitasse cur non credamus? — aut nostrae parum rectae intelligentiae vel diverso de talibus rebus iudicio. Idem iudicare etiam *Steinerum* video p. 5. sq. 11. 12 sq.; quamquam quae idem vir doctissimus de explicando illo carmine magis artificiose quam veri similiter statuit, meam quidem approbationem non habent. Sic enim scripsit p. 9: »sententiarum nexus ostendit, verbis illis *celeris fugae* etc. non fugam ipsam sed fugam marmore expressam declarari.

Itaque illa aetate Scipionis *maioris* monumentum Romae fuisse statuo, in quo cives et ipsum spectabant duces egregium marmore effictum (v. 14) et res illius praeclaras sive marmore sive aereis columnis (cf. Lamprid. Alex. Sever. c. 28) repraesentatas: celeres Poenorum ex Italia fugas Hannibalisque nequidquam minitabundi atque Scipionis ultoris in Africam traiectionem (v. 16): incendia castrorum Hasdrubalis et Syphacis (Liv. 30, 5. 6. Flor. 2, 6), incendia navium Carthaginiensium (Liv. 30, 43), Scipionem domita apud Zama Africa in Italiam redeuntem. — Tali vero honore quis dignior Scipione? quem Ennius sic effatur: »Quantam statuam faciet populus Romanus, quantam columnam, quae res tuas gestas loquatur?« Horatii igitur aequales qui illa castrorum naviumque incendia marmore expressa vidissent, profecto cum hos versus legebant non poterant, ut nonnulli interpretes nostri, de incensa a Scipione minore Carthagine cogitare.« Quae interpretatio, artificiose ut dixi excogitata, ideo non poterit probari, quod nec statuae nec columnarum in ipso carmine ulla reperitur, ne minima quidem, significatio; immo totus locus de marmoribus et titulis primo ita est generalis, ut de omnibus magnis viris non possit non intelligi, deinde suo more poeta ad generalem sententiam illustrandam sensim ad exemplum delabitur; nec, puto, ipsi Romani statuam, quae Romae fuit*), hoc carmine descriptam et comparatam

*) Vide Liv. XXXVIII, 56: »alii Romae, alii Literni et mortuum et sepultum. Utrobique monumenta ostenduntur et statuae: nam et Literni monumentum monumentoque statua superimposita fuit, quam tempestate deiectam nuper vidimus ipsi; et Romae extra portam Capenam in Scipionum monumento tres statuae sunt, quarum duae Publii et Lucii Scipionum dicuntur esse, tertia poetae Quinti Ennii.« Ceterum de hoc carmine disputarunt etiam Gerberus in scriptione scholastica, Sondershusae 1842, Lachmannus in Schneidewini philologo, Tom. I, fasc. 1. p. 164 sqq., et contra hunc acutissime F. Ritterus, Bonnensis, ibid. fasc. 3. p. 581 sqq.

reperissent. Itaque ad eiusmodi fictionem non prius licebit confugere, quam quae in eo carmine insunt difficultates non poterunt superari ratione alia ac magis probabili.

Legi Meinekianae, qua carmina omnia, et quae monostropha et quae distropha ante habebantur, in strophas quaternorum versuum dividere iubemur, ne nunc quidem obsecutus sum. De qua lege quid sentirem, in *Horatianorum* particula altera, a. 1845 conscripta, p. 15 professus sum. Nunc video, ne *Steinerum* quidem ei legi favere; nec aliter *Gerberus* l. l. p. 10 sq. *Kirchneri* alia ratio est; is enim, cum antea, uti fatetur p. 64, hac potissimum dubitatione deterreretur, quae-
nam interna huius odarum in carmina tetraastropha divisionis quasi lex esse posset, cum externa certe norma non firmiter constituta appareret, iam causam sibi ac legem reperisse visus est. Statuit enim, *Horatium omnia sua carmina lyrica eo consilio composuisse eamque formam metricam iis induisse, ut ad lyram, si non omnia cantarentur, at certe cantari possent.* In qua re vir doctissimus mirifice deceptus est. Nam, ut paucis exemplis defungar, carmina quae κατὰ στίχον composita sunt, Carm. I, 1. III, 30. IV, 8, quis credat eo consilio ab Horatio composita esse, ut ad lyram possent cantari? Nam posse ea cāntari quis negabit, quoniam omnia, etiam quae sano sensu plane carent, cantari possunt? Sed admodum mira ea esset cantatio, si severo quis vultu istius modi carmina decantare vel ita recitare conaretur, ut lyra iis praeluderet et inter singulas strophas fidium cantus interponeret. Agedum, periculum fac et sume carmen trigesimum tertii libri, quod intactum reliquerunt et Hermannus et Kirchnerus; ibi tu interpone inter singulas strophas quas volunt, i. e. post v. 4. 8. 12, fidium cantus et videbis, quam violenter sententias disieceris quantanque pro-

vocaveris discrepantiam. De argumentis et rebus, quae musicae arti quam maxime possunt adversantur, nihil amplius dicam. Deinde quod alterum a Kirchnero additur argumentum, de innumeris locis, in quibus Horatius verbis utitur de lyra et cantu sumptis, ut Carm. IV, 9, 4. IV, 15, 2. I, 6, 19. I, 32, 1 sq. cet., ne hoc quidem quidquam valet. Partim enim posita sunt ea vocabula in carminibus, quorum argumenta ita sunt comparata, ut et possint cantari et fortasse etiam cantarentur, partim autem nihil significant aliud nisi carmina facere, carmina componere. Hae enim dictiones exortae sunt ex antiqua poeticae artis origine, nec tamen qui poetae iis utebantur, simul indicare voluerunt, ea ipsa carmina ad fidium cantus esse accommodanda. Quae cum ita sint, ne ea quidem placet ratio, qua Kirchnerus carmen III, 12 tetra-strophon fecit,

Miserarum est neque amori

Dare ludum neque dulci

Mala vino lavere aut exanimari metuentes

Patruae verbera linguae.

Nec me poenitet solitam huius carminis in strophas ternorum versuum dividendi rationem, multo suavio-rem et magis concinnam, servasse. Ceterum non possum facere, quin uno verbo dicam quam gratum mihi fuerit vidisse, etiam a Kirchnero p. 43 scholiastam illum, quem putabant, *Aemilium* prorsus fictum ac nullum esse probari. Idem iam ante sex annos evincere studui in *Horatianorum* partic. I. Aquisgrani conscripta p. 8; idem nuper ostendit *Hauthalius*, vir doctissimus, in Museo Rhenano a. 1846. p. 516 sqq.; hic quidem nova ratione; Kirchnerus in id ipsum incidit, quod ego iam tum proposui. Sed haec hactenus.

Embricae a. d. V. Kal. Nov. MDCCCXLVII.

PRAEFATIO

EDITIONIS III.

In emendandam novam editionem Horatii mei quantam per labores officiumque licuit curam impendi; rationem naturamque libri ne nunc quidem mutavi. Nam quamquam non defuerunt qui consulenti mihi persuadere vellent, ut commentario argumentisque singulorum carminum decurtatis vel mutilatis librum contraherem in angustumque deducerem, tamen metui, si illorum vocibus auscultarem, ne minuerem simul vel demerem potius si quid esset vel probabile vel peculiare. Scio quidem, inter magistros scholarum publicarum esse aliquos, qui editiones commentariis instructas a suis lectionibus prohibeant nudaque poetae verba discipulorum manibus tradant. Quorum studium voluntatemque tantum abest ut reprehendere audeam, ut magnopere laudem, siquidem in ipsis lectionibus id possint assequi, ut viva voce doctrinaeque cura et diligentia ea omnia, quae ad veram carminum intelligentiam necessaria sunt, adolescentulorum animis ipsi praebeant memoriaeque infigant. Illud tamen metuendum est, ne ista lectio iusto saepius aut

habeat aliquid vagum et incertum aut parvam tantum dulcissimi poetae partem comprehendat. Jis autem, qui commentarios ob eam causam prohibent, ne adolescentium celeritate acieque oculorum et calliditate ingeniorum inter docendum et explorandum quasi quaedam insidiae sibi struantur, optime olim *Frid. Jacobsius*, nuper *Krügerus* in praefat. edit. sermonum p. IV occurrit. Praeter ea cum ne summa quidem assiduitas vel magistrorum vel discipulorum eo possit pervenire, ut omnia legantur quae lectu dignissima sint, non potest fieri quin privatis studiis bona pars poematum relinquatur; quae si vult intelligi, adiumenta requirit non parca aut debilia, sed ad superandas difficultates et parata semper et firma. Deinde si licet sperare, fore ut iuventus tantopere blanditiis poetae capiatur, ut etiam relictis ludis et virili aetate ad eius lectionem sua sponte ac libenter recurrat, ubertas argumentorum annotationumque satis habere videtur non excusationis sed necessitatis.

Editiones commentationesque, quae interim prodierunt quaeque ad me pervenerunt, legi ex iisque quaecunque meis meliora videbantur in meum usum converti. Fructus autem quem inde cepi, minor fuit quam exspectaveram. *Nauckii* editio quod absoluto opere ad me perlata est, non fuit dolendum; *Kirchneri* autem novam satirarum editionem, quam scimus parari, quod non licuit opperiri, incommodum est; *Gryssarii* Vindobonensis editio nihil novi attulit, nisi quod egregia etiam poemata, ut Sat. II, 5 et Epist. I, 18 cum multis aliis a lectione adolescentium excludenda esse docemur; multo difficiliora recepta sunt. Ceterum cave credas, in illa editione ea poemata, quae non sunt relegata, intacta recepta esse aut non mutilata, ut nuper suspicatus est censor aliquis benevolus; ut exemplis utar, omissi sunt Sat. I, 4, 27. 113.

114, et Epist. I, 1, 20 sic sonat: *Ut nox longa quibus somnum aufert cura diesque.**)

Codicum scripturas scholiastasque denuo diligenter consului et examinavi; quo factum est, ut antiquissimorum librorum Mss., maxime Blandiniorum Cruquii, auctoritate lectiones in prima et altera editione receptas nunc cogerer mutare. Quod quam saepe necessarium visum sit ut intelligatur, locos ipsos nunc addam: Carm. I, 7, 17. I, 8, 2. I, 15, 22. I, 19, 2. I, 24, 13**). I, 25, 2. III, 4, 31. III, 15, 16. III, 20, 8. IV, 4, 73. C. S. 68. 71. 72. Sat. I, 3, 57. I, 4, 87. I, 6, 31. I, 7, 50. II, 1, 31. II, 2, 48. II, 2, 56. II, 2, 95. II, 3, 96. II, 3, 129. II, 3, 170. II, 3, 212. II, 3, 276. II, 4, 47. II, 6, 4. II, 6, 44. II, 6, 48. II, 8, 52. II, 8, 53. Epist. I, 1, 72. I, 2, 38. I, 3, 30. I, 13, 2. I, 15, 10. I, 16, 22. I, 18, 111. I, 19, 22. 23. II, 1, 69. II, 1, 85 (A. P. 161) II, 1, 167. II, I, 186. II, 2, 16. II, 2, 158. Orthographiam vulgarem et usitatam servavi, quoniam antiqua provocare vel incerta audere et periculosum est et iuventutis commodis adversarium. In qua re deterruit exemplum *Hauptii*, qui in editione apud Weidmannos (1851) Carm. I, 3, 37 *arduis* scripsit, IV, 3, 21 *tuist*, Epod. 15, 12 *virist*, Carm. IV, 3, 24 *tuumst*; contra Sat. I, 10, 24 *Falerni est*, Sat. II, 3, 232 *domi est*, A. P. 304 *tanti est*, ibid. 417 *relinqui est*, ibid. 386 *iudicium est* quamquam in cod. Bernensi antiquiss. ibi reperitur *iudiciumst*, v. 409 *quaesitum est*, ubi idem codex habet *quaesitumst*, et sic saepius. Deinde in eodem codice A. P. 353 scriptum

*) Juvat commemorare etiam editionem, quae hoc titulo ornata prodiit: »Horatii carmina quae exstant omnia. Juxta editiones Doering, Orellii et Lipsianam. Accurate recensita. Oxonii: J. Abrams. Londini: William Allan. 1849.« Quae cum nescio qualem textum praeberet, Horatii vitam et indicem metrorum ex mea editione clam sibi surripuit.

**) de hoc loco cf. Quaestiones meas Horatianas (Bonnae. Habicht. 1841.) p. 48 sqq.

reperitur *ergost*, et in cod. Blandin. antiquiss. Epist. I, 12, 24 d'est pro *deest*. Nec probatur illa scribendi ratio *Lachmanni* annotatione ad Lucret. p. 66: »Horatius in Carm. Saec. et in IV Carm. libro longas vocales non elisit: ergo in huius ecloga tertia scripsit *totum muneris hoc tuist*, non *tui est*. Et protulit eius modi non nulla Orellius e codice Bernensi antiquissimo, ut *quantost*, *tantist*, *ergost*, *quaesitumst*.« Non est veri simile, Horatium vel Romanos eius aetatis in exemplis poematum scribendi rationem modo hanc modo illam adhibuisse; et aliud est scribere, aliud pronuntiare.

Ceterum editionem meam aequitati iudicum benevolentiaeque commendo; inter novas aliorum editiones haec quoque quem ante occupavit locum, spero, tenebit.

Regimontii Borussorum a. d. XIII. Kal. Mai.
MDCCCLIV.

Q. HORATHI FLACCI VITA.

Q. Horatius Flaccus, cuius omnia quae cum aequalibus suis ipse communicare voluit poemata ad nos pervenerunt, L. Aurelio Cotta L. Manlio Torquato coss. a. d. VI. Id. Dec. anni DCLXXXIX p. u. c. natus est Venusiae, Romana colonia in Apulia sita. Et ipsi quidem poetae quaecunque de eius natura, moribus, omnis vitae condicionibus nobis innotuerunt ita debemus, ut vel tria quae habuit nomina ¹⁾, patriam urbem ²⁾, annum mensemque ³⁾ natalem in poematis deposita habeamus neque ad vitae narrationem quae Suetonii nomen fert saepe confugere aut debeamus aut possimus. Patre usus est libertino ⁴⁾, mater quae fuerit nescimus, cum nusquam eius ne nomen quidem nominetur; ut propter egregiam filii in patrem pietatem recte nobis videamur inde efficere, filio etiam infante morti eam succubuisse. Neque fratris aut sororis reperitur nomen, ut unus parentum filius fuisse videatur. Quare pater, qui „macro pauper agello“ (Sat. I, 6, 71. Carm. II, 20, 6.) *coactoris* ⁵⁾ exiguo munere fungebatur, cum quanto ingenio filius praeditus esset intellexisset neque melius se puero consulturum iudicaret, quam si bonis litteris erudiendum bonis magistris eum traderet, Venusinum ludum Flaviumque magistrum, quem „pueri magnis

1) Sat. II, 6, 37. Carm. IV, 6, 44. Epist. I, 14, 5. Sat. II, 1, 18. Epod. 15, 12.

2) Sat. II, 1, 34. 35. Carm. III, 4, 9—13. IV, 9, 2. III, 30, 10. Sat. I, 10, 30.

3) Carm. III, 21, 1. Epod. 13, 6. Epist. I, 20, 27.

4) Sat. I, 6, 6. 45. Epist. I, 20, 20. Horatius poeta cum se ipse *ingenuum* (Sat. I, 6, 8) appellaverit, dubium non

est, quin patri iam non servo sed manumisso natus sit. Unde patri *Horatii* nomen inditum sit, incertum est; fortasse propter tribum *Horatiam*, cui omnes Venusini erant adscripti; aut a domino nomen traxit.

5) Sat. I, 6, 86. *Coactores* pro publicanorum societatibus pecunias exigebant; argentariorum etiam mercenarii erant.

e centurionibus orti“ adibant, spreuit et vendito agello Romam demigravit ⁶⁾. Ibi filium ea ratione instituendum curavit, qua nobili loco nati pueri institui solebant; nam et servorum vestimentorumque apparatu ita eum instruxit, ut qui viderent puerum locupletis hominis filium deberent habere, et ipse, ne rustica morum integritas candidusque animi habitus urbana pravitae pessimisque exemplis ubique obviis sensim corrumpere-tur, „custos incorruptissimus omnes circum doctores aderat“. Itaque cum puer grammaticorum scholas ⁷⁾ frequentaret et utriusque linguae scriptores et poetas, ex quibus Homerus et Livius Andronicus nominantur (Epist. II, 1, 69. 2, 41.), legeret, pater ipse morum erat magister et diligentissimus et sapientissimus. Egregia enim neque satis laudanda libertini hominis fuit in filio educando sapientia, ut rudem eum humanitatisque expertem fuisse vix tibi persuaderi patiaris. Qui omne suum otium omnemque rem in erudiendo filio collocaret, qui optimus paedagogus ubique ipse adesset, qui quid malum quid bonum quid petendum quid fugiendum exemplorum magis ⁸⁾ auctoritate quam doctrinae fragilitate suaderet, qui veri boni pulcri naturalem sensum in dies aleret in perpetuumque firmaret, num potest cogitari eum ab elegantioribus litteris alienum prorsus fuisse? Atque etiamsi pater Graecus natione non fuit — id quod facile suspicaberis — puer tamen Horatius in paterna domo utraque lingua ⁹⁾ usus esse et a patre prima legendi scribendique elementa doctus iure videbitur. Praeter grammaticam aliis quoque artibus, quibus ingenui ¹⁰⁾ adolescentes imbuebantur, historiae philosophiae arti oratoriae, quamquam diserte eae non nominantur, haud dubie operam

6) Sat. I, 6, 72 sqq. Triplex in hac re mota est a viris doctis quaestio. Ac primum quidem quaeritur, quo anno Horatius puer Romam ductus videatur a patre: quod quidem quamquam certi in tam dubiis indiciis (Epist. II, 1, 70, II, 2, 41) nihil potest affirmari, probabile tamen est factum esse a. 700 vel 701, cum duodecimum aetatis annum ipse ageret. Deinde sunt qui agellum venditum a patre negent, inter bellorum civilium turbas proscriptionibus Horatio ereptum affirmant; dicit enim ipse post pugnam Philippensem se neque domum neque fundum in Italia habuisse (Epist.

II, 2, 50); sed errare ii videntur. Tum de hoc quoque, utrum pater Horatii coactoris munere Venusiae solum, an Romae solum, an Venusiae et Romae functus sit, certatur; tertium veri videtur simillimum.

7) Ex grammaticis unum nominat *Orbitium Pupillum* Beneventanum, Epist. II, 1, 71.

8) Sat. I, 6, 80 sqq.

9) Graecae linguae in Apulia et Lucania latissimus erat usus. Caesutini si bilingues (Sat. I, 10, 30), cur non etiam Venusini?

10) Sat. I, 6, 77.

dedit. Deinde nobilium iuvenum morem secutus, quo discendi sciendique studium melius pleniusque posset explorare, Athenas veterem Musarum sedem migravit, quo Theomnesti Academici Cratippi Peripatetici Philodemi Epicurei magna in philosophia nomina multos tum Romanos iuvenes trahebant ¹¹⁾). Quodsi quis talium rerum curiosus quaerat, quo maxime anno Athenas Horatius petiverit, respondendum est, neque ipsum poetam neque quemquam alium annum notasse, sed cum non possit dubitari, quin a. 710 quo Caesar interficeretur Athenis iam fuerit, deinde cum qui iuvenes eo irent annum fere vicesimum agerent, veri simile videri, factum illud esse a. u. c. 708 vel 709. Dura tamen tempora multo eum citius inde avocarunt, quam ipse optasset. Nam cum interea a. 710 C. Iulius Caesar a Bruto sociisque coniurationis interfectus esset, neque eo mortuo Romae quisquam esset qui diversos hominum animos aut pace conciliaret aut vi opprimeret, totum imperium Romanum subito iterum civilis belli incendio flagravat. Antonii potestati ac furori Roma et Italia cesserunt Brutus Cassiusque; Asiam Macedoniam Graeciam occuparunt, magnos exercitus pararunt. Brutus ipse mense Septembri a. 710. Athenas pervenit, quosque ibi invenit iuvenes a litteris in castra duxit. Horatius quoque, qui nobilium iuvenum amicitiam ingenii magnitudine animique praestantia interea sibi comparasset, patriae ac libertatis amore incensus ^{*)}), numquid restitui posset pristinae virtutis periculum facturum arma capit. Et Bruto duci tam acceptus erat, ut quamvis esset obscuro loco natus neque bellica laude insignis, tamen tribunus militum legioni praeponeretur ¹²⁾). Itaque anno 711 relictis Athenis in Asiam traiecissee videtur; nam ne hoc quidem pro certo potest affirmari. Sunt tamen loci, qui persuadeant, non in pugna solum ad Philippos pugnata a partibus eum stetisse Bruti, sed diutius in castris vixisse Asiamque vidisse ¹³⁾). Quodsi ita res se habet, Horatius cum exercitu in Europam reversus adversi proelii ac fugae particeps factus ¹⁴⁾) cum Messalla servari beneficio Caesaris Octaviani maluit quam

11) Epist. II, 2, 43 sqq.

*) Epist. II, 2, 47.

12) Sat. I, 6, 48. Epist. I, 20, 23. II, 2, 47.

13) Sat. I, 7 litem *Clazomenis* coram Bruti tribunali actam lepide et ita narrat, ut ipse audivisse eam videatur;

Epist. I, 11, 7 *Lebedum* ita describit, ut ipsum ibi fuisse iure existimes; deinde Carm. II, 6, 7. II, 7, 1 loci sunt, qui poetam diutius militasse cogant ut credamus.

14) Carm. II, 7. Epist. II, 2, 49.

dubiam spem armorum diutius tentare. Captum quidem a victoribus eum fuisse docet vita quaedam ex vetusto aliquo codice descripta, sed nihil est auctoritatis quod huic accedat. Iam vero cum usu doctus ipse per hos annos intellexisset, eorum qui ardentissimum patriae ac libertatis amorem prae se ferrent exiguum tantum partem innocentiam integritatemque animi conservasse, plurimos suam utilitatem patriae commodis, ubi occasio data esset, praetulisse, et si victores ex bello discessissent peiores etiā imperium Romanum dominos habiturum fuisse, tum non potuit dubitare, quin ab hac parte vera salus rebus Romanis non deberet exspectari. Quapropter veniam ultro oblatam tristi quidem animo accepit, partes reliquit, in Italiam rediit militiamque detrectavit. Natura enim imbellem ¹⁵⁾ ne tribunatus quidem et militaris honor tenere potuerunt; novam sibi summae laudis viam munivit. In hac re memorabilis est locus Carm. II, 7, 13:

Sed me per hostes Mercurius celer

Denso paventem sustulit aëre,

quo loco significat post magnam cladem relictis castris ad litoras se et carmina aufugisse; poetae enim Mercurii tutela gaudent, inde Mercurialium virorum ¹⁶⁾ nomine ornati. Eadem autem de causa III, 4, 26, quod ex clade et fuga incolumis evaserit, Musarum se gratiae debere ait. Incertum est, ex Macedonia utrum recta via Romam se contulerit an ad inferiorem Italiam appulerit Venusiamque ac natale solum post longam absentiam reviserit. Quibus persuasum est, proscriptione fundum paternum ei ereptum esse, iis hoc quoque, Venusiam prius eum venisse quam Romam, magis videtur probabile: scilicet ubi inventurum se speraret, unde vitam aleret. Sed supra iam indicavi, patrem ipsum videri vendidisse agellum. Praeterea pater mortuus erat, cognati Venusiae non erant, ipse puerulus Romam erat portatus; quid ergo prius ut in Lucaniam iret potuit eum commovere? Et tamen non defuerunt, qui coniectandi libidine vel eo perducerentur, ut, cum Horatius ipse dixisset ¹⁷⁾ ad Palinurum promontorium naufragio se prope demersum olim esse, factum id esse in hoc ex Graecia in Lucaniam reditu nihil dubitarent affirmare. Romae, si fides habenda vitae Sue-

15) Epod. 1, 16.

16) Carm. II, 17, 29.

17) Carm. III, 4, 28.

tonianae, scriptum quaestorium ¹⁸⁾ sibi comparavit i. e. emit; qua ipsa re iterum probatur, omnino opibus eum non caruisse. Nam quod Epist. II, 2, 49 dicit:

Unde simul primum me dimisere Philippi
Decisis humilem pennis inopemque paterni
Et laris et fundi, paupertas impulit audax
Ut versus facerem,

in eo magnopere cavendum est ne paupertatem ad inopiam augeas; qui locus ut difficillimus est intellectui, ita praemissa de Luculliano milite narratiuncula illustratur. Horatius enim cum non sine multo labore litterarum studiis potentium hominum existimationem et beatioris vitae spem adeptus esset, civilis belli adverso exitu ex curriculo quod inierat eiectum se vidit, neque habuit unde antea initam viam iterum tentaret aut opes aut voluntatem. Patrimonii quod reliquum erat ad honeste vivendum haudquaquam sufficebat; sed paupertas animum auxit et ita auxit, ut novam sibi laudis viam audacter aperiret. Ipse prope omnia amiserat; quid igitur homines, quales vulgo esse solent, eorumque de se suisque studiis iudicium curaret? Paupertas audaciam dedit, ut versus faceret i. e. ut satiras scriberet in iisque, quaecunque sibi suoque de rebus et humanis et civilibus iudicio ubique displicerent, irrideret ac vituperaret. Sic sensim quod opes praebere non potuerunt, ingenium praebuit; poetica facultas laudem et post laudem rem quoque ei paravit. Hanc inesse patet sententiam in loco, qui et vexatus est diversissime et gravis ad perspiciendas rationes poetae Romam reversi. Hoc tamen noli credere, iuvenem tam splendide a natura exornatum, quem tam aequales quam posteri primum inter omnes eius aetatis lyricos poetas postea colerent, antea nunquam quid ingenio valeret tentavisse; potius misera clades et acerba rerum vicissitudo tantum effecerunt, ut „cui arti animi causa pridem indulsit privatim, eam iam in

18) Fuerunt Romae scribae quaestorii, praetorii, aedilicii, tribunicii, pontificii, in decurias divisi. Ea autem munera venalia erant, quamquam legebantur etiam in decuriam. Cic. in Verr. II, 3, 79 „ordo scribarum honestus est; quis negat? est vero honestus, quod eorum hominum fidei tabulae publicae et pericula magistra-

tuum committuntur.“ Scribam aliquamdiu Horatium fuisse, etiam locus Sat. II, 6, 36 suadere videtur; sed non potest dici, quamdiu eo munere functus sit; quamquam probabile est, post contractam cum Maecenate familiaritatem scriptum ab eo abiectum et venditum esse.

re adversa maiore studio et impensiore opera palam exerceret¹⁹⁾. Nimirum non latina solum sed graeca etiam carmina composuerat; quamquam ab his abstinuit, quippe ne ligna in silvam ferre videretur²⁰⁾. Quae cum ita sint, haudquaquam potest negari, lyrica quoque carmina iam ab adolescente Horatio fuisse tentata atque in his ipsis quae nunc legimus carminibus inesse nonnulla, quae primis postquam in Italiam reversus est annis composita recte dicamus. Nam quid erat, quod quominus postea inter edenda carmina nonnulla etiam dudum composita in scriniisque servata reciperet eum impediret? Scilicet aliud est quaerere quo tempore singula carmina composuerit, aliud quando coniuncta ediderit. Nam quae carmina composita erant, ea statim cum amicis et aliis, quibus rectum de eiusmodi rebus iudicium esset, communicari, dein postea quae maxime placuissent in unum corpus coniuncta edi et divendi²¹⁾ solebant.

Iam vero cum a patre ita educatus esset Horatius, ut quid honestum esset quid turpe, vita magis et exemplis²²⁾ quam libris et doctrina cognosceret, deinde Athenis ita philosophos audisset, ut vellet „curvo dignoscere rectum“²³⁾, Romam reversus non potuit facere, quin pravas sui temporis cupiditates, corruptos hominum mores, inania civium studia ubicunque occurrerent animadverteret candidoque quo erat animo persequeretur. Nam ut iniquitate fortunae, qua quas merito concepisset spes irritas videret, paulum exacerbatum fuerit, hoc tamen tenendum est, acerbam sortis vicissitudinem aut suarum rerum desperationem praecipuas causas, quibus ad castigandos mores irridendamque stultitiam ageretur, non fuisse; sed proprio quodam veri et honesti amore, falsi et turpis odio seque ipsum in dies meliorem reddendi studio eum fuisse incitatum, ut „ridendo diceret verum“²⁴⁾. Quare primis annis Satiris scribendis et Iambis²⁵⁾ magnam operam dedit, iisque ut multorum quos veritate et ludibrio tetigisset invidiam²⁶⁾ et

19) *Franke* fast. Horat. p. 20.

20) Sat. I, 10, 30—35.

21) Fuerunt etiam tum quos nunc bibliopolas appellamus; in iisque nominantur fratres *Sosii* Epist. I, 20, 2. A. P. 345; sed pretium eos scriptoribus dedisse, eius rei apud antiquos vestigium non est.

22) Sat. I, 4, 105 sqq.

23) Epist. II, 2, 44.

24) Sat. I, 1, 24. I, 4, 134—139.

25) Iambi sunt, quos metri ratione habita *epodos* solemus appellare. Epist. II, 2, 59.

26) Sat. I, 3, 25. I, 4, 23 sq. 78 sq.

odium, ita optimi cuiusque existimationem et amorem sibi conciliavit. Contra adversarios suam agendi scribendique rationem ingeniose et liberaliter defendit, ipsaque hac defensione novas adeptus est satirarum occasiones. Cum optimis et poetis eius aetatis et artium fautoribus amicitiam contraxit; inter quos nominandi sunt Plotius Tucca, C. Valgius Rufus, Aristius Fuscus, fratres Visci, Bibulus, Varius, Virgilius²⁷⁾, Asinius Pollio, Messalla Corvinus, alii. Varius autem et Virgilius poetae, quorum iam tum nomina erant celebratissima, C. Cilnio Maecenati eum commendarunt. Qui vir, nobili loco natus, apud Caesarem Octavianum longe gratiosissimus, ad pacandam civitatem et ad bene administrandam rempublicam efficacissimus, litterarum bonarumque artium studiis deditissimus, cum primum quid in Horatio esset cognovit, tanto hunc honore cumulavit tamque teneris vinculis sibi devinxit, ut sensim exorta intima familiaritate neque ea unquam turbata usque ad mortem ambo coniuncti manerent. Iam quaeritur, quo primum anno Horatius a Maecenate acceptus videatur. Atque in hac quoque re invenienda ipse nos ducit. Sexta enim satira libri secundi recte iudicantibus a. 723 a. u. c. (aet. Hor. 34) scripta videtur; iam cum ibi v. 40 sqq. scriptum legamus:

Septimus octavo propior iam fugerit annus,

Ex quo Maecenas me coepit habere suorum

In numero,

efficitur²⁸⁾, exortam esse inter hos viros amicitiam a. u. c. 716 exeunte vel incipiente a. 717. Neque vero imprudens erat Maecenas, cum qui olim ab adversa parte Brutianorum stetisset poeta primum ad se adduceretur. Nam audi iterum Horatium Sat. I, 6, 54 sqq.:

Nulla etenim mihi te fors obtulit: optimus olim

Virgilius, post hunc Varius, dixere quid essem.

Ut veni coram, singultim pauca locutus,

Infans namque pudor prohibebat multa profari,

Non ego me claro natum patre, non ego circum

Me Satureiano vectari rura caballo,

Sed quod eram narro. Respondes ut tuus est mos

27) Sat. I. 10, 81 sqq. I, 9, 61.

28) In illis versibus difficile est ad intelligendum, quomodo errari potuerit. Ac fuerunt tamen, qui *septimum octavo*

propriorem annum nonum putarent. Est autem septimus nondum finitus, sed ad finem vergens, propior insequentis anni i. e. octavi initio.

Pauca, abeo, et *revocas nono post mense iubesque*
Esse in amicorum numero.

Quare primum commendatus est Maecenati exeunte a. u. c. 715 vel initio a. 716. Sed vide; non una sed iterata opus fuit commendatione; maximam tamen haud dubie excitavit gratiam ipsius praesentis modestia, quae quanta in hoc fuerit lege et admirare. Obtrectatorum tamen vile genus sua cupiditate occaecatum non vidit, quod aliud divitem ac nobilem cum obscuro atque paupere homine coniungere posset vinculum, nisi ut alter haberet qui se adularetur, alter qui sibi largiretur. Atque ea de Horatio opinio tam vulgata fuit, ut publice ab eiusmodi criminationibus se defendere necesse haberet. Quod quidem quemadmodum fecerit, quam Maecenatis gratia non sit usus ad colligendas opes, ad captandos honores, quanti tranquillitatem animi et otium vitae prae divitiis et honoribus habuerit, quo denique candore animi et sinceritate amoris amicum semper persecutus sit, haec omnia tu ipse videas ex his potissimum locis: Sat. I, 6, 92 sqq. I, 9, 43 sqq. II, 6, 41 sqq. Epist. I, 7, 34 sqq. Epod. 1, 5. Carm. IV, 11, 18 sq. II, 17. Verum enim vero qui si voluisset magnas etiam opes et a Maecenate et postea ab Augusto quoque accipere potuisset, quam parvo eum munere contentum et beatum vides! Is enim curas et molestias Urbis perosus, naturae eiusque amoenitatum amantissimus (Epist. II, 2, 77), rusticam vitam et solitudinem splendori et ambitioni urbanae in annos magis praeferens quid aliud ab opulentissimo amico accepit, nisi unam parvulamque villam, omnia vota satis superque ex-
plentem²⁹⁾? Villae autem tabulam ab ipso pictam habemus Epist. I, 16, 5 sqq. Sita erat in Sabinis haud procul Tibure Aquilonem versus; additus ager coniunctus erat ex quinque agricularum Sabinorum agris³⁰⁾, qui proscriptione et distributione agraria bello civili ad Maecenatem pervenerant, et satis magnus, ut praeter villicum octo³¹⁾ ibi servos Horatius habe-

29) Sat. II, 6, 1 sqq. Carm. III, 16, 37—44. Quo anno a Maecenate villam dono acceperit, non potest accurate dici. Hoc tamen certum videtur, factum id esse ante a. 721; nam cum Satiram II, 3 scriberet, villam Horatius iam habuit; cf. v. 5. 10; ea

autem satira scripta videtur ipsis Saturnalibus (mens. Decembr.) eius anni. Epod. I, 25. 31 ostendit, ante pugnam Actiacam (a. u. 724) villam ei datam esse.

30) Epist. I, 14, 2.

31) Sat. II, 7, 118.

ret. Vicina erant Varia oppidum ³²⁾, Mandela pagus ³³⁾, Vacunae antiquae Sabinorum deae fanum ³⁴⁾; propinqui montes Lucretilis et Ustica ³⁵⁾; vallis irrigabatur Digentia rivo ³⁶⁾, tota regio silvis et saxis egregie erat variata ³⁷⁾. Sed haec de villa. Redeamus ad Horatium. Cui Maecenatis familiaritas Augusti etiam favorem conciliavit; quem quidem multi etiam nunc in criminationem ei verterunt. Nam profecto, inquit, quae tandem ea fuit hominis constantia, qui quem iuvenis odisset, contra quem cum Bruto armatus stetisset, eundem vir factus coleret et divino prope honore veneraretur? Et tamen nihil in hac re inest neque proditionis neque assentationis. Etenim semper Horatius sibi fuit constans; vero et sincero patriae amore adolescens Brutum secutus est, eodem vir Augustum admiratus. Nam cum Caesare interfecto Athenis philosophiae deditus cum prisca libertate priscam etiam morum integritatem, in qua summam rei publicae salutem positam esse cerneret, restitutum iri calido animo speraret, deinde Brutum videret hominem integerrimum unoque et vero patriae amore ardentem, tum ne ipse quidem studium quo has partes amplectebatur simulavit. At vero ea exspectatione quantopere cum ab hac parte nihil prope nisi privati commodi aucupium regnare intellexisset, deceptus sit supra iam dictum est. Quid ergo? Bruto voluntaria morte oppresso libertatem populo Romano servari ea iam aetate non posse, bellis civilibus nihil esse perniciosius, fato ipso dominum imperio parari, nemini tum non fuit clarum, nisi qui nimia animi atrocitate ductus diis ipsis posse repugnari confideret. Sed non multi fuerunt Catones. Et bene quidem. Otium et pacem quam maxime petenda esse cum optimis quibusque Horatius existimavit. Inde primo iam post cladem Philippensem anno (713), cum bellum Perusinum immineret, conqueritur Epod. 16:

Altera iam teritur bellis civilibus aetas,

Suis et ipsa Roma viribus ruit.

et tertio anno post Epod. 7, 1:

Quo, quo scelesti ruitis? aut cur dexteris

Aptantur enses conditi?

32) Epist. I, 14, 3.

33) Epist. I, 18, 105.

34) Epist. I, 10, 49.

35) Carm. I, 17, 1—11. Ustica

autem vallis quoque nominabatur.

36) Epist. I, 18, 104.

37) Epist. I, 14, 19. Carm. I, 22,

9. De Bandusia fonte vide ad Carm.

III, 13, 1.

deinde v. 9 sqq.:

Sed ut secundum vota Parthorum sua

Urbs haec periret dextera.

Neque hic lupis mos nec fuit leonibus

Unquam nisi in dispar feris.

Furor ne caecus an rapit vis acrior?

An culpa?

Haec igitur iam tunc; Octavianum autem res in Italia tenentem quis non perspexit multo praestantiorē esse Antonio, qui Cleopatrae et luxuriae illecebris captus quidquid Romano nomine dignum videbatur amisit abiecit perdidit. Qui si victor ex instanti et inevitabili certamine prodiret, quid factum esset de Roma urbe, de toto imperio, de disciplina Romana? Quid quod Cleopatra et spadones, mollities et omnis Asiaticorum regnorum pestis Italiam et Urbem irruissent? Quid igitur mirum, quod Horatius sensim Octavianum unum haberet, qui honorem et dignitatem Romanam tutari et ab extrema perniciē servare et vellet et posset? Hanc spem expressam habemus Epod. 13, 7 sqq.:

Cetera mitte loqui: deus haec fortasse benigna

Reducet in sedem vice. Nunc et Achaemenio

Perfundi nardo iuvat et fide Cyllenea

Levare diris pectora sollicitudinibus,

et Carm. I, 9, 9 sqq.:

Permitte divis cetera, qui simul

Stravere ventos aequore fervido

Deproeliantes, nec etc.

Quid sit futurum cras, fuge quaerere ³⁸).

Quod cum ita esset, tamen in Octaviani se amicitiam insinuare nihil studuit; immo vero cum iam familiaris esset Maecenati atque huic quo in eum animo esset aperte ostenderet, ab Octaviani laudibus tantopere abstinuit, ut quotiescunque opportuna occasio eius praedicandi praeberetur, eam omittere mallēt quam assentari videri. In cuius rei testimonium duo afferō carmina, alterum ante pugnam Actiacam scriptum, alterum post pugnam, Epod. 1 et Carm. I, 37, in quibus si voluisset adulari, quid prohibuit quominus idem faceret, quod

38) Utrumque carmen anno fere 713 scriptum puto.

Virgilium ³⁹⁾ fecisse videmus? Quid quod postea, cum inter omnes potentissimus esset Octavianus, ad cuius arbitrium et nutum omnes se fingerent et accommodarent, eius consuetudinem non solum non quaesivit sed etiam recusavit? Nam sic legimus in Vita Suetoniana: „Augustus epistolarum quoque ei officium obtulit, ut hoc ad Maecenatem scripto significat: „*Ante ipse sufficebam scribendis epistolis amicorum; nunc occupatissimus et infirmus Horatium nostrum te cupio adducere. Veniet igitur ab ista parasitica mensa ad hanc regiam et nos in epistolis scribendis adiuvabit.*““ Ac ne recusanti quidem aut succensuit quidquam aut amicitiam suam ingerere desiit. Exstant epistolae, e quibus argumenti gratia pauca subieci: „*Sume tibi aliquid iuris apud me, tanquam si convictor mihi fueris: quoniam id usus mihi tecum esse volui, si per valetudinem tuam fieri potuisset.*““ Et rursus: „*Tui qualem habeam memoriam, poteris ex Septimio quoque nostro audire; nam incidit, ut illo coram fieret a me tui mentio. Neque enim si tu superbus amicitiam nostram sprevisi, ideo nos quoque ἀνθυπερφρονούμεν.*““ Quo factum est, ut Octavianus cum Sermonibus quibusdam lectis sui nullam mentionem iniectam reperisset, sic quereretur: „*Irasci me tibi scito, quod non in plerisque eiusmodi scriptis mecum potissimum loquaris. An vereris, ne apud posteros infame tibi sit, quod videaris familiaris nobis esse*“ ⁴⁰⁾? Iam quis est qui blandiatur? Imperator, opinor, non poeta; uterque tamen pari honore dignus. Et tamen apud nonnullos certe posteros infame fuit poetae, quod imperatori visus est familiaris esse. Quippe fuerunt quidem qui sic solerent clamare: qui mortalem hominem et eum quidem hominem qui patriam, cuius amorem fingeat, libertate privaverat, inter deos referre ⁴¹⁾ non dubitabat, eum tu adulatorem non esse defendis? Ego vero defendo. Et primum cur Caesarem laudaverit, ipse non celavit; nimirum Caesar orbi terrarum pacem reddidit ⁴²⁾; tum quod divino honore eum affecit, in eo noli oblivisci, alios fuisse

39) Virgil. Aen. VIII, 675 sqq.

40) Tamen Augusti iussu a. u. c. 737 carmen saeculare ad celebrandos ludos saeculares composuit, deinde eodem rogante quartum Carminum librum superioribus addidisse fertur. Sic legimus in eadem vita.

41) Carm. -I, 2, 45—52. I, 12,

49—52. III, 3, 11 sq. III, 4, 37 sqq.

III, 25, 4—7. IV, 2, 37—40. IV, 5, 33—36. III, 5, 2.

42) Carm. III, 14, 13—16. cf. III, 24, 25—30. IV, 5, 17 sqq. IV, 14, 37 sqq. IV, 15, 4 sqq. 17 sqq. C. S. 57 sqq.

antiquos mores, alios esse nostros. Antiquis omnia magna et praeclara ex ipsis diis ita nasci videbantur, ut medium nihil intercederet, neque erat insolitum ut vivis etiam hominibus bene de republica meritis arae ponerentur; quod factum scimus T. Quinctio Flaminio ⁴³⁾ apud Graecos a. 556 u. c., aliis non paucis. Sed haec hactenus; antequam tamen ad alia pergam, non possum facere, quin paucis moneam, quanti Horatius eo etiam tempore, quo Maecenatis et Octaviani gratia floreret, Brutum et alios quos olim socios habuisset aestimaverit; quam non sit veritus illorum temporum meminisse, quibus contra Octavianum pugnaret ⁴⁴⁾, et ita memoriam et odium fortassé adversarii renovare. En habes constantiam viri, sed sapientia temperatam!

Romae quomodo Horatius vixerit, ab omnibus curis et officiis liber et alienus, iucunde ipse descripsit Sat. I, 6, 110 sqq.; sed villa accepta Romae non semper mansit, effugit saepissime strepitum et clamorem Urbis, in ea re non constans sed ut animus suaderet agens ⁴⁵⁾. Solebat etiam, praecipue cum urgente calore solis febres urbem invaderent infirmisque Romae manere periculosum esset, ad mare descendere ⁴⁶⁾ et balneis uti. Unde elucet, tantam eum rem habuisse, quanta ad honeste vivendum sufficeret, nimirum homini paucis contento, opiparas dapes et magnifica aedificia unice contemnenti ⁴⁷⁾.

Ad quam excelsam de rerum vanitate sententiam elatus est Horatius philosophiae studio, in quam ita incubuit, ut non uni alterive disciplinae se addiceret, sed omnibus eandem curam navaret ex omnibusque quae utilissima viderentur et rectissima in vitae usum converteret. Merito eam optimam habuit philosophiam, quae ad bene et sapienter vivendum plurimum conferret, quaque homines facillime ad summum bonum perducerentur. Quod quidem Horatio visum est cerni in animi continentia et tranquillitate; qua efficitur, ut neque inani- bus curis aut formidinibus terreamur neque externis bonis iusto maius tribuamus pretium, ad omnes casus aequae parati. Prae-

43) Plut. Flamin. 16.

44) Carm. II, 7, 1. II, 1, 3 sq.
24. Epist. II, 2, 48. Carm. I, 12, 35 sqq.

45) Lege lepidam de hac re narrationem Sat. II, 7, 28 sqq. Epist. I,

8. Epist. I, 10, 6 sqq.

46) Epist. I, 7, 11. I, 15, 18.

47) Carm. I, 38. III, 16, 17—44. II, 15. I, 31, 15 sqq. Epist. I, 10, 39 sqq. I, 12, 5 sqq. I, 18, 104—112.

Sat. I, 1, 44 sqq.

clare de hac re disputantem invenies in Epist. I, 6⁴⁸). Cavendum esse docet, ne animus perturbationibus distrahatur; his culpam comitem esse; his abigi otium „non gemmis neque purpura venale nec auro“⁴⁹). Communem esse omni generi humano mortem; quare insani esse undique corradere et coacervare quae post mortem heredibus saepe ingratis relinquuntur⁵⁰), sapientis iis sapienter uti quae parata sint. Deorum potentiam esse colendam; a diis omne petendum esse principium, ad eosdem omnem exitum rerum referendum⁵¹). Quare quoties ex periculis ereptus est, id cura et providentia divina factum ostendit; veluti cum in Vulture, monte Apuliae, ludo somnoque oppressus humi cubaret divino auxilio tutus a viperarum et ursorum letifero morsu⁵²), vel cum in Sabina silva in devias regiones delato ingens lupus innoxius obviam iret⁵³), vel cum in agro suo Sabino cadente arbore paene opprimeretur⁵⁴); atque etiam quod incolumis ex caede Philippensi evasit, quod ex naufragio vitam servavit, grato animo deorum praesenti tutela factum esse profitetur⁵⁵). Sed sufficiant haec de pietate Horatii erga deos. De amicitia, quam Maecenati perpetuam servavit, iam dictum est; restat ut de alia animi affectione paucis dicatur, quae haud parvas ei criminationes creavit.

Non semel Horatius Musam suam iocosam appellat et amoribus deditam⁵⁶). Sed non defuerunt, qui veros poetae amores intelligendos esse paene ubique negarent neque in multis carminibus ad exemplaria graeca magnam partem expressis quidquam aliud viderent nisi lusus quosdam poeticos ab animo poetae alienissimos. Qui si satis recordarentur, qualis esset lyrica poesis, quamque indignum poeta vere lyrico, alienos sensus imitantem nihil prope ex suo animo aut vita haurire, longe aliter iudicarent. Antiquitas ad nostros mores non est revocanda; in qua honestum fuit, frequenti recordatione et imitatione bonorum scriptorum doctrinae elegantiam scientiaeque amplitudinem prae se ferre. Quamquam igitur negari non

48) Cf. Epist. I, 11, 22 sqq. Carm. II, 3, II, 10.

49) Carm. II, 16, 7.

50) Carm. II, 3, 17. II, 14, 21.

51) Carm. I, 34, 1 sqq. I, 35, 1 sqq. III, 6, 5 sqq. III, 4, 65 sqq.

52) Carm. III, 4, 9—20.

53) Carm. I, 22, 9 sqq.

54) Carm. II, 13. III, 4, 27. III, 8, 7.

55) III, 4, 25 sqq.

56) Carm. I, 6, 17. I, 19, 9 sqq. II, 12, 14 sqq. II, 1, 37 sqq. III, 3, 69. Epist. II, 2, 56.

potest, Horatio graecos saepe poetas exemplo fuisse, tamen ubi et qua ratione fuerint, quis nunc deperditis illis lyricis ubique dicat? Neque quidquam magis potest esse perversum, quam ubicunque duorum poetarum similes quaedam sententiae reperiantur, ibi alterum praeisse alterum imitatum esse confestim divinare. Sed cum dubia res sit, cavendum est, ne alia nomina vera habeamus, nisi quae et locorum et temporum et rerum coniuncta necessitate fictionem excludant. Accedit non omnino improbanda coniectura, posse etiam sub diversis nominibus unam personam latere; cum praesertim inveniantur quae a corporis vel animi facultatibus sumpta esse pateat, ut *Pyrrha*, *Glycera*, *Lalage*, *Neaera*. Virilia nomina in Carminibus, nisi quae virorum sunt gestarum rerum splendore nobilium, non latina esse solent sed graeca. Quod quidem factum putamus, ut graecum carminum genus in hac quoque re suam naturam teneret. Deinde a Romanis iuvenilia nomina, quae pueri ante quam togam virilem sumerent, puellae ante quam nubere habere solebant, diutius etiam, inter familiares maxime, servata esse probabile est. Ut exempla proponam, Augustus puer *Thurinus* solebat appellari, neque aliud est nomen imperatoris *Caligulae*, aut cognomen M' Curii *Dentati*, qui cum dentibus natus erat. Puellarum iuvenilia nomina saepe sumebantur a colore sive capilli sive oculorum, ut *Rufa*, *Rufilla*, *Rutila*, *Caesulla*, *Ravilla*. Eius modi igitur nomina, cum nescio quid poeticae naturae haberent, in Horatii carmina videntur esse recepta.

Talis igitur poeta fuit, quem Quintilianus instit. orat. X, 1, 96 fere solum ex lyricis latinis dignum habuit qui legeretur, quem sua vaticinatio immortalitatis non fefellit⁵⁷⁾; nam inter omnes quotquot in quibuscunque terris fuerunt lyrici nemo fuit qui hunc maiore honore et crebriore omnium lectione unquam superaverit. Decessit Horatius C. Marcio Censorino C. Asinio Gallo Coss., anno u. c. 746 (aetatis 57) a. d. V. Kal. Decembr., subita vi mortis oppressus „herede Augusto palam nuncupato, cum urgente vi valetudinis non sufficeret ad obsignandas testamenti tabulas. Humatus et conditus est extremis Esquiliis iuxta Maecenatis tumulum“⁵⁸⁾. Hic autem eodem anno supremum diem antea obierat, postquam quanti

57) Carm. II, 20, 17. III, 30, 7. 58) Vita Sueton. 20.

illum habuisset etiam testamento prodidit; in quo ad Augustum haec scripserat: „*Horatii Flacci ut mei esto memor.*“ Quos vita coniunxerat, ne mors quidem secernere voluit; hoc ita fore iam dudum poetae animus praesenserat, dixerat, sacramento firmaverat⁵⁹⁾. Quali is corpore animique temperamento fuerit, ipse tradit. Fuit enim statura brevis⁶⁰⁾, nigris oculis⁶¹⁾, nigris capillis⁶²⁾ sed praecanis⁶³⁾; iuvenili aetate cum bona valetudine usus esse videatur⁶⁴⁾, nisi quod interdum fortasse lippis oculis laboraret⁶⁵⁾, vir factus multo fuit infirmior⁶⁶⁾ et pinguis, ut ventriculo etiam premeretur⁶⁷⁾; ceterum adolescens calidus et postea quoque ad irascendum celer, sed ut esset placabilis⁶⁸⁾; in corporis cultu paulo negligentior⁶⁹⁾.

De temporibus, quibus Horatii opera edita esse videntur, multae a multis viris doctis institutae sunt quaestiones, et singularem librum Frankius conscripsit Berolini 1839, cui titulus *Fasti Horatiani*; qui cum omnino accurate et diligenter quaesiverit, inde „conspectum temporum, quibus Horatius opera scripsit et edidit“, (p. 80 sq.) transscribam:

1. *Sermonum liber I* ab anno u. c. 713 usque ad annum 720 compositus (41—34 a. Chr. n.; aetatis ann. 24—31) prodiit monobiblos a. 719 (35 a. Chr.; aetat. a. 30).
2. *Sermonum liber II* intra annos u. c. 719 et 724 (35—30 a. Chr.; aetatis ann. 30—35) scriptus publici iuris factus est anno u. c. 724.
3. *Epodon liber* ab anno u. c. 713 ad annum usque u. c. 724 (41—30 a. Chr. n.; aetat. ann. 24—35) confectus editus est anno u. c. 724 vel 725 (30 vel 29 a. Chr.; aetatis anno 35 vel 36).
4. *Carminum libri tres priores* intra annos u. c. 724 et 730 (30—24 a. Chr.; aetat. ann. 35—41) exarati fine anni u. c. 730 aut initio proximi coniunctim evulgati sunt⁷⁰⁾.

59) Carm. II, 17, 8—16.

60) Epist. I, 20, 24.

61) A. P. 37.

62) Epist. I, 7, 26.

63) Epist. I, 20, 24. Carm. III,

14. 25.

64) Epist. I, 7, 26.

65) Sat. I, 5, 30.

66) Epist. I, 7, 3 sqq. 25 sqq.

67) Epist. I, 4. 15. Idem probatur epistolae Augusti fragmento, in quo

haec sunt: „si tibi statura deest, corpusculum non deest.“

68) Carm. I, 16, 22 sqq. III, 14, 27. Epist. I, 20, 25.

69) Epist. I, 1, 94.

70) Non possum praeterire quin Frankium in his assentientem me habere negem. Concedo editos esse libros a. 730 vel 731; sed in iis carmina esse ante annum 724 confecta vehementer aio. Dicendum potius car-

5. *Epistolarum liber I* ab anno u. c. 730 usque ad VI. Id. Decembr. anni 734 (24—20 a. Chr.; aetat. ann. 41—45) perfectus exiit ante diem Horatii natalem anni u. c. 734 (20 a. Chr.).
6. *Carmen saeculare* anno u. c. 737 edolatum emissumque est (ann. 17 a. Chr.; aetat. anno 48).
7. *Carminum liber IV* intra annos u. c. 737 et 741 (17 a. Chr. — 13 a. Chr.; aetatis annos 48—52) confectus et anno 741 editus est ⁷¹⁾.
8. *Epistolarum liber II* primo iam edito et post carmen saeculare scriptus est, sed incertum quo anno.
9. De *artis poeticae* aetate nil constat.

minum libros tres scriptos intra annos 713 et 730 vel 731, coniunctim editos esse a. 730 vel 731.

71) Idem dicendum quod de tribus prioribus libris; in hoc quoque veri simile est inesse carmina dudum confecta et diu in scriniis servata. De

Epistolarum l. I. monendum est, probabilior fortasse aliorum esse sententiam, qua primus epist. liber anno demum 735 vel 736 editus esse dicitur. Cfr. Duentzer Kritik u. Erkl. T. III. p. 68 sq.

Tabula chronologica.

Anni u. c.	Anni aetat. Horat.	Consules.	Quid his annis gestum sit, indicatur.
689.	1.	L. Aurelius Cotta L. Manlius Torquatus.	Q. Horatius Flaccus nascitur.
701.	12.	Cn. Domitius Calvinus M. Valerius Messalla.	Hoc vel superiore anno Horatius Romam venisse videtur.
709.	20.	C. Iulius Caesar IV. dictator.	Horatius studiorum causa Athenas proficiscitur.
710.	21.	C. Iulius Caesar V. M. Antonius.	Idibus Martiis Caesar interficitur. Brutus et Cassius Roma relicta in Graeciam secedunt. Brutus Horatium Athenis in castra deducit.
711.	22.	C. Vibius Pansa A. Hir- tius. C. Iul. Caesar Octavianus Q. Pedius suffecti.	C. Caesar Octavianus M. Antonius M. Lepidus triumviri reipublicae constituendae in quinque annos instituuntur et provincias inter se distribuunt. Bellum inter hos et Brutum paratur. Horatius in castris Brutianis legioni tribunus militum praest. — Ovidius nascitur; non multo ante Propertius; Tibullus, ut videtur, iam a. 695.
712.	23.	M. Aemilius Lepidus II. L. Munatius Plan- cus.	Apud Philippos bis pugnatur. Cassius et Brutus ipsi manum sibi inferunt. — Tiberius Claudius Nero nascitur.
713.	24.	L. Antonius Pietas P. Servilius Vatia Isau- ricus II.	Horatius impunitate accepta Romam re- dit et ab armis discedit. Sunt qui in reditu ad Palinurum promontorium paene oppressum credant; sed nihil certi.
714.	25.	Cn. Domitius Calvinus C. Asinius Pollio. suf- fecti L. Cornelius Bal- bus P. Canidius.	Bellum Perusinum. Pax inter Octavia- num et Antonium Brundisii restituta.

Anni u. c.	Anni aetat. Horat.	Consules.	Quid his. annis gestum sit, indicatur.
715.	26.	L. Marcius Censorinus C. Calvisius Sabinus.	Asinius Pollio ab Antonio contra Par- thinos missus. Pollionis de iisdem triumphus. Horatius a Virgilio et Vario Maecenati commendatur.
716.	27.	Appius Claudius Pul- cher C. Norbanus Flac- cus.	Horatius in Maecenatis amicitiam rece- ptus.
717.	28.	M. Vipsanius Agrippa L. Caninius Gallus.	Horatius cum Maecenate Virgilio Vario aliis Brundisium profectus; iter de- scriptum Sat. I, 5.
718.	29.	L. Gellius Poplicola M. Cocceius Nerva.	Victo Sexto Pompeio Octavianus Romam reversus magnis honoribus excipitur.
719.	30.	L. Cornificius Sext. Pompeius fil.	Phraates, rex Parthorum, propter cru- delitatem regno eiicitur, quod ad Te- ridatem pervenit. — Horatius primum Satirarum librum edidisse videtur.
720.	31.	M. Antonius II. L. Scri- bonius Libo. suffecti L. Sempronius P. Aemi- lius Lepidus C. Mem- mius Picens M. Heren- nius.	
721.	32.	Caesar Octavianus II. L. Volcatius Tullus. suff. P. Autronius Lae- tus L. Flavius C. Fon- teius Capito. M' Acilius Aviola L. Vinicius L. Laronius.	Ante hunc annum Horatius villam Sa- binam dono accepit a Maecenate.
722.	33.	Cn. Domitius Ahenobar- bus C. Sosius, suff. L. Cornelius M. Valerius.	Munatius Plancus ab Antonio ad Cae- sarem transit. Magni apparatus belli.
723.	34.	Caes. Octavianus III. M. Valerius Messalla. suffecti M. Titius Cn. Pompeius.	Horatius Maecenati ad bellum ituro co- mitem se paratum ait Epod. 1. Pu- gna Actiaca a. d. IV. Non. Septembr. Ep. 9. Carm. I, 37.

Anni n. c.	Anni aetat. Horat.	Consules.	Quid his annis gestum sit, indicatur.
724.	35.	Caesar Octavianus IV. M. Licinius Crassus. suffecti C. Antistius Vetus M. Tullius Cicero L. Coelius Balbinus.	Aegyptus in provinciae formam redigitur. — Horatius alterum Satirarum librum edidisse videtur; eodem anno Epodorum libellum.
725.	36.	Caesar Octavianus V. Sextus Appuleius, suffecti P. Valerius Messalla C. Furnius C. Cluvius.	Iani templum clauditur.
726.	37.	Caesar Octavianus VI. M. Vipsanius Agrippa II.	Caesar Octavianus templum Apollinis Palatini dicavit; de qua re Horatii carmen est I, 31.
727.	38.	Caesar Octavianus Aug. VII. M. Vipsanius Agrippa III.	Caesar princeps dicitur et Augustus appellatur, postquam iterum de deponendo imperio cogitavit. Paratur expeditio contra Arabes. Huc spectat carmen I, 29.
728.	39.	Caesar Octavianus Aug. VIII. T. Statilius Taurus II.	Sext. Appuleius ex Hispania triumphat; sed Cantabri et Astures bellum renovant.
729.	40.	Caesar Octavianus Aug. IX. M. Iunius Silanus.	Augusti expeditio in Cantabros. Expeditio Aelii Galli in Arabes. Marcellus Iuliam in matrimonium ducit.
730.	41.	Caesar Octavianus Aug. X. C. Norbanus Flaccus.	Phraates pellit Teridatem, qui ad Augustum fugit. Augustus Cantabris victis Romam redit, Ianum iterum claudit. Hor. Carm. III, 14. Quintilius Horatii et Virgilii amicus moritur. Carm. I, 24. Horatius tres carminum libros hoc anno vel initio proximi edidisse videtur.
731.	42.	Caesar Octavianus Aug. XI. A. Terent. Varro Murena. suffecti L. Sestius Cn. Calpurnius Piso.	Marcellus, Iuliae coniux, moritur. Augustus Phraati filium reddit, Teridatem Romae retinet.

Anni u. c.	Anni aetat. Horat.	Consules.	Quid his annis gestum sit, indicatur.
732.	43.	M. Claudius Marcellus Aeserninus L. Arrun- tius.	Coniurant in Augustum Licinius Varro Murena et Fannius Caepio, fratres Proculeii et Terentiae uxoris Maece- natis (cf. Carm. II, 2). Augustus in Siciliam proficiscitur, inde in Asiam iter facturus.
733.	44.	M. Lollius Q. Aemi- lius Lepidus.	Augustus in Graeciam, hinc Samum iter facit; in insula Samo hiemat.
734.	45.	M. Appuleius P. Silius Nerva.	Augustus in Asia. Phraates perterritus signa olim Crasso erepta sua sponte re- mittit. Tigranes Armeniis rex redditur a Tiberio Nerone. Epist. I, 12. 18.
735.	46.	C. Sentius Saturninus Q. Lucretius Vespillo. suffecti M. Vinucius M. Vipsanius Agrippa.	Virgilius in Graeciam proficiscitur; mo- ritur Brundusii.
736.	47.	P. Corn. Lentulus Mar- cellinus Cn. Cornelius Lentulus.	Horatius hoc vel superiore anno librum I epist. emisisse videtur.
737.	48.	C. Furnius. C. Iunius Silanus.	Augustus ludos saeculares instituit. Ho- ratus eius iussu Carm. saeculare com- ponit. Huc spectat Carm. IV, 6.
738.	49.	L. Domitius Ahenobar- bus P. Cornelius Sci- pio. suffectus L. Ta- rius Rufus.	
739.	50.	M. Livius Drusus Libo L. Calpurnius Piso.	Raeti et Vindelici per Tiberium et Dru- sum subiguntur. Eo spectant Carm. IV, 4 et 14.
740.	51.	M. Licinius Crassus Cn. Cornelius Lentu- lus.	
741.	52.	Tib. Claudius Nero P. Quintilius Varus.	Augustus ex Gallia Romam redit. Ho- ratus Augusti rogatu quartum car- minum librum edit.

Anni u. c.	Anni aetat. Horat.	Consules.	Quid his annis gestum sit, indicatur.
742.	53.	M. Valerius Messalla P. Sulpicius Quirinus, suffecti C. Valgius Rufus C. Caninius Rebilus.	Agrippa moritur.
743.	54.	Q. Aelius Tubero. Pau- lus Fabius Maximus.	Ep. II, 2 scripta videtur.
744.	55.	Iulus Antonius Africa- nus Q. Fabius Maxi- mus.	Dacis, Getis, Germanis a Tiberio et Druso victis Ianus tertium clausus esse dicitur; sed incerta res. Dicunt epist. II, 1 scriptam esse hoc anno.
745.	56.	Nero Claudius Drusus Caesar T. Quintius Pennus Crispinus.	
746.	57.	C. Marcius Censorinus C. Asinius Gallus.	a. d. V. Kal. Dec. Horatius moritur; eodem anno Maecenas, sed ante Ho- ratium.

Index metrorum Horatianorum.

I. *Metra iambica*:

a) *μονόστιχον* s. *κατὰ στίχον*:

$\overline{\cup} \overline{\cup\cup} \cup \overline{\cup\cup}, \overline{\cup} \mid \overline{\cup\cup} \cup -, \overline{\cup} \overline{\cup\cup} \cup \overline{\cup}$

Trim. iamb. acat.

Epod. 17.

b) *δίστιχοφον*:

$\overline{\cup\cup} \overline{\cup\cup} \cup \overline{\cup\cup}, \overline{\cup} \mid \overline{\cup\cup} \cup \overline{\cup\cup}, \overline{\cup\cup} \overline{\cup\cup} \cup \cup$

Trim. iamb. acat.

$\overline{\cup} \overline{\cup\cup} \cup \overline{\cup\cup}, \overline{\cup} \angle \cup \cup$

Dimeter iamb. acatal.

Epod. 1—10. Anapaestum in trimetro bis posuit Epod.
2, 35; dactylum in primo pede Epod. 17, 12, tribrachyn

saepius. In dimetri dipodia secunda Horatius arsim solutam nunquam admisit. Dimeter bis dactylum habet in primo pede Epod. 3, 8. 5, 48, semel in secundo tribrachyn Epod. 2, 62; hiatus invenitur Epod. 5, 100.

II. *Systema ionicum a minori:*

υ υ ∟ —, υ υ ∟ —, υ υ ∟ —, υ υ ∟ —
υ υ ∟ —, υ υ ∟ —, υ υ ∟ —, υ υ ∟ —
υ υ ∟ —, υ υ ∟ —

Unum carmen Horatius hoc metro composuit III, 12; quod quidem quadraginta cum habeat ionicos, in quattuor strophas dividitur.

III. *Metra dactylica:*

a) ∟ υ υ, ∟ υ υ, ∟ | υ υ, ∟ υ υ, ∟ (υ), ∟ υ

Hexameter dactyl. catal. in disyllabum, κατὰ στίχον.
In omnibus et satiris et epistolis.

b) Alcmanium.

∟ υ υ, ∟ υ υ, ∟ | υ υ, ∟ υ υ, ∟ (υ), ∟ υ
∟ υ υ, ∟ υ υ, ∟ (υ), ∟ υ

Carm. I, 7. 28. Epod. 12. Spondeus in quinto pede hexametri reperitur I, 28, 21, in tertio tetrametri I, 28, 2. Hiatus admissus est in eiusdem carminis versu 24.

IV. *Metra Asclepiadea:*

a) κατὰ στίχον:

1) Asclepiadeum primum.

— υ | ∟ υ υ — || ∟ υ υ — | υ υ Vers. Asclep. minor.

Carm. I, 1. III, 30. IV, 8. Basim apud Horatium spondeus plerumque efficit. Diaeresis neglecta est IV, 8, 17.

2) Asclepiadeum secundum.

— — | ∟ υ υ — | ∟ υ υ — | ∟ υ υ — | υ υ Vers. Asclep. maior.

Carm. I, 11. 18. IV, 10. Diaeresis neglecta post alterum choriambum I, 18, 16.

b) δίστροφον, Asclepiadeum tertium.

— υ | ∟ υ υ — | υ υ Vers. Glyconeus.

— υ | ∟ υ υ — || ∟ υ υ — | υ υ Vers. Asclep. minor.

Carm. I, 3. 13. 19. 36. III, 9. 15. 19. 24. 25. 28. IV, 1. 3. Semel versus est hypermeter IV, 1, 35.

c) τετράστροφον:

1) *Asclepiadeum quartum.*

— ̣ | ̣ ̣ ̣ — || ̣ ̣ ̣ — | ̣ ̣ (ter) Asclep. minor.
— ̣ | ̣ ̣ ̣ — | ̣ ̣ Glyconeus.

Carm. I, 6. 15. 24. 33. II, 12. III, 10. 16. IV, 5. 12.
In Asclepiadeo semel diaeresis neglecta, II, 12, 25;
semel in pausa brevis est syllaba, III, 16, 26. In Gly-
coneo bis in basi reperitur trochaeus: I, 15, 24 et 36.

2) *Asclepiadeum quintum.*

— ̣ | ̣ ̣ ̣ — || ̣ ̣ ̣ — | ̣ ̣ (bis) Asclep. minor.
— ̣ | ̣ ̣ ̣ — | ̣ Pherecrateus.
— ̣ | ̣ ̣ ̣ — | ̣ ̣ Glyconeus.

Carm. I, 5. 14. 21. 23. III, 7. 13. IV, 13.

V. *Metrum Hipponacteum, δίστροφον.*

̣ ̣ — ̣, ̣ ̣ ̣ Dimet. troch. catal.
̣ ̣ ̣ ̣, ̣ | ̣ ̣ —, ̣ ̣ ̣ Trimet. iamb. catal.

Carm. II, 18. Cur hos versus catalecticos fecerit Hora-
tius, in promptu est; nimirum ne qui ab altero versu
ad alterum in recitando transiret, arsim cum arsi, thesim
cum thesi coniungere deberet.

VI. *Metra Pythiambica, δίστροφα:*

a) minus.

̣ ̣ ̣, ̣ ̣ ̣, ̣ | ̣ ̣, ̣ ̣ ̣, ̣ (̣), — ̣ Hex. heroic.
̣ ̣ ̣ ̣ —, ̣ ̣ ̣ ̣ Dimet. iamb. acatal.

Epod. 14 et 15. In dimetro dactylum habes Epod. 15, 24.

b) maius.

̣ ̣ ̣, ̣ ̣ ̣, ̣ | ̣ ̣, ̣ ̣ ̣, ̣ (̣), ̣ ̣ Hex. heroic.
̣ ̣ ̣ — ̣ | ̣ ̣ — ̣ ̣ ̣ ̣ Hexapodia iamb. acatal.

Epod. 16. Caesura post quintam syllabam hexapodiae
semel neglecta, v. 4. Hexapodia potius appellatur quam
trimeter iambicus, quia Horatius in hoc metro puris iam-
bis usus est.

VII. *Metra Archilochia, δίστροφα:*

a) primum.

̣ ̣ ̣, ̣ ̣ ̣, ̣ | ̣ ̣, ̣ ̣ ̣, — (̣), — ̣ Hex. heroic.
̣ ̣ ̣, ̣ ̣ ̣, ̣ Trim. dactyl. catal. in syllabam.

Carm. IV, 7.

b) secundum.

⏏ ⏏⏏, ⏏ ⏏⏏, ⏏ | ⏏⏏, ⏏ ⏏⏏, ⏏ ⏏⏏, ⏏ ⏏ Hex. heroic.

⏏ ⏏ ⏏ —, ⏏ ⏏ ⏏ ⏏ || ⏏ ⏏ ⏏ ⏏ ⏏ ⏏ Vers. iambeleg.

Epod. 13. Alter versus ex dimetro iambico acatalecto et trimetro dactylico catalectico in syllabam compositus asynartetus est; quare ab iambis ad dactylos transiri potest ut a pleno versu ad alterum; per syllabam ancipitem et hiatum. cf. Epod. 13, 10.

c) tertium.

⏏ ⏏ ⏏ —, ⏏ | ⏏ ⏏ —, ⏏ ⏏ ⏏ ⏏ Trimet. iamb. acatal.

⏏ ⏏ ⏏, ⏏ ⏏ ⏏, ⏏ || ⏏ ⏏ ⏏ —, ⏏ ⏏ ⏏ ⏏ Vers. elegiambus.

Epod. 11. Alter versus compositus ex trimetro dactylico catal. in syllabam et dimetro iamb. acatal.; hic quoque asynartetus est. cf. v. 6. 10. 14. 24. 26.

d) quartum.

⏏ ⏏⏏, ⏏ ⏏⏏, ⏏ ⏏⏏, ⏏ ⏏ ⏏, ⏏ ⏏ ⏏ ⏏ ⏏ V. Archiloch. mai.

⏏ ⏏ ⏏ —, ⏏ | ⏏ ⏏ —, ⏏ ⏏ ⏏ Trim. iamb. catal.

Cam. I, 4. Prior versus, quem Graeci poetae asynartetum fecerunt, apud Horatium bene coniunctus est; neque enim quarti dactyli locum creticus occupavit unquam neque hiatus reperitur; unde logaoedicus appellari possit quadruplex dactylicus tripliciter trochaicus acatalectus. Alii Alcmanium cum Ithyphallico coniunctum dicunt.

VIII. *Metra Sapphica*:

a) minus, τετράστροφον.

⏏ ⏏ — ⏏, ⏏ | ⏏ ⏏ —, ⏏ — ⏏ (ter) Sapphicus hendecasyllab.

— ⏏ ⏏ — ⏏

Adonius.

Carm. I, 2. 10. 12. 20. 22. 25. 30. 32. 38. II, 2. 4. 6. 8. 10. 16. III, 8. 11. 14. 18. 20. 22. 27. IV, 2. 6. 11. Carm. Saecul. — Prior compositus est ex trochaica dipodia, choriambo, iambica dipodia catalectica. Caesura est post arsim choriambi vel post sextam syllabam. Interdum versus hypermeter est, II, 2, 18. 16, 34. IV, 2, 22. 23. C. S. 47. Coniunguntur diviso vocabulo vel secundus versus cum tertio vel tertius cum quarto, I, 2, 19. 25, 11. II, 16, 7. Adonium non dactylicum sed choriambicum dicam, et quo similior sit Sapphico et quia Spondeus nunquam admittitur. Sapphicum autem ipsum logaoedicum non esse

probat insequens metrum, facili mutatione ex Sapphico hendecasyllabo constituendum. Nam

b) maius, *δίστροφον*

— — — — —

Versus Aristophanicus.

— — — — — V. Sapphicus mai.

ita facile efficitur, ut priorem accipias abiecta Sapphici hendecasyllabi dipodia trochaica, alterum addito altero etiam choriambos. Carm. I, 8. In Sapphico maiore caesura post quintam syllabam et diaeresis post primum choriambum ubique observatae sunt.

IX. *Metrum Alcaicum, τετράστροφον*:

— — — — —

(bis) Alcaicus hendecasyllabus.

— — — — —

Dimet. iamb. hypercatal.

— — — — — Logaoed. dupl. dactyl. duplic. troch. acat.

Carm. I, 9. 16. 17. 26. 27. 29. 31. 34. 35. 37. II, 1. 3. 5. 7. 9. 11. 13. 14. 15. 17. 19. 20. III, 1. 2. 3. 4. 5. 6. 17. 21. 23. 26. 29. IV, 4. 9. 14. 15. — Alcaicus hendecasyllabus compositus est ex monometro iambico hypercatalectico et versu logaoedico simpl. dactyl. duplic. troch. catalectico; ad quam versus compositionem tertius et quartus versus egregie accommodati sunt; etenim qua similitudine Alcaici prior pars iambica cum dimetro iambico, eadem altera Alcaici pars cum logaoedico coniungitur, ita ut Alcaici partes iteratas et auctas in reliquis habeamus. — Alcaicus raro incipit ab iambo, gravitatis causa; diaeresis ante ordinem logaoedicum quinquies neglecta est, I, 16, 21. I, 37, 5. I, 37, 14. II, 17, 21. IV, 14, 17; sed bis in vocabulo cum praepositione coniuncto. Deinde hiatus in diaeresi admissus est II, 20, 13, et syllaba brevis III, 5, 17. Etiam dimeter iambicus quo gravior fiat a spondeo solet incipere; hypermetri sunt II, 3, 27. III, 29, 35.

Restat, ut de lege quadam dicamus, quam ab Horatio observatam esse Meinekius primus animadvertit. Nam ea quoque carmina, quorum metra aut eundem versum perpetuo ordine repetunt (*κατὰ στίχον*) aut *δίστροφα* sunt, ita instituit Horatius, ut versuum numerus quaternorum versuum strophas

coniungi pateretur. Quare fuerunt, qui ea quoque metra in carminibus τετράστροφα haberent. Nam quod eandem legem in Epodis observatam non vident, id eam sententiam non solum non refellere, sed adiuvare etiam iis videtur. Quare cum unum sit carmen IV, 8, quod huic rationi adversetur, aut interpolatum illud esse putant aut mutilatum. Sed nonne Horatius quam sibi ipse imposuisset legem post tot annos relinquere potuit? Difficultates certe, quibus illud carmen laborat, ista ratione non pelluntur. De tota autem re compara quae in praefatione ad editionem alteram huius libri disputata sunt.

Q. HORATHI FLACCI

C A R M I N U M

LIBER PRIMUS.

CARMEN I.

Maecenas atavis edite regibus,
O et praesidium et dulce decus meum,

Carmen I.

Horatius Maecenati tres libros carminum edendos hoc carmine inscripsit, quo simul qui factum esset, ut ad poesim potissimum conversus alium vitae cursum non teneret, ostendere studuit. Diversa esse hominum ait ingenia, alios aliis studiis trahi. De qua diversitate tres quasi quaedam tabulae proponuntur, in quibus humanae naturae voluntatisque pugnancia exempla componuntur. Ac prima quidem ostendit homines, qui laudem publicam sectantur vel victoriis in ludis publicis reportandis (Graeci) vel aura populari captanda muneribusque gerendis (Romani), cum iisque coniungit alios cumulandis divitiis deditissimos (v. 3—10); altera componit agricolam patrio agro contentum cum nauta lucri faciendi cupiditate agitato (v. 11—18); tertia illustrat vitam hominum otiosorum naturae iucunditatibus fruientium ingenioque indulgentium, et alios comparat, qui quietam vitam spernentes bellorum et venationum motu ac varietate malunt delectari (v. 19—28). In quibus ordinandis tabulis hoc videmus secutum esse Horatium, ut cum a latifundiorum dominis ad agricolas parvis agris contentos, deinde a lucri cupido

nauta ad otiosum hominem transiret, hac ipsa tabularum quasi serie varietatem studiorum humani generis exprimeret. Iam vero se quoque habere dicit quo teneatur; poesim se adamasse ac tantopere eius voluptates percipere, ut relicta terra ad coelum prope evolasse sibi videatur. Quo dulcissimo sensu se deceptum non fore, si quae canere ausus sit, a Maecenate aliqua laude digna habeantur.

V. 1. *atavis regibus*] i. e. atavis s. maioribus, qui reges erant. Cf. Virgil. Aen. I, 273. Maecenas ortus fuit ex Cilniorum nobili genere propter opes et divitias olim Arretio expulso (Liv. X, 3), neque raro factum videtur, ut ex ea gente Etruscorum reges sive duces eligerentur. Hor. Carm. III, 29, 1. Sat. I, 6, 3. In tanta nobilitate generis maximam omnium admirationem movit, quod, cum plurimum apud Augustum valeret, equestrem ordinem egredi nunquam voluit; consulto igitur Horatius hac eum laude in fronte carminis ornavit. Deinde altero versu addit suam cum Maecenate necessitudinem; *praesidium*, quoniam Horatius Maecenatis tutela ab summis quibusque hominibus eius aetatis receptus est (Carm. II, 17, 4); *decus*, quoniam magno sibi esse honori vident, quod a

- Sunt quos curriculo pulverem Olympicum
Collegisse iuvat metaque fervidis
5 Evitata rotis palmaque nobilis
Terrarum dominos evehit ad deos;
Hunc, si mobilium turba Quiritium
Certat tergemini tollere honoribus;
Illum, si proprio condidit horreo
10 Quidquid de Libycis verritur areis.

tanto viro amaretur. Epist. I, 1, 103. 7, 12. — *sunt quos iuvat*] Indicativus modus apud verba *sunt qui* praeter hunc his locis: infra v. 19. I, 7, 5. Sat. I, 4, 24. II, 1, 1. II, 4, 47. Aliter Sat. I, 2, 28. I, 4, 74 sq. Coniunctivus tum legitur, cum non tam esse aliquid ostenditur quam quale quid sit describitur. In locis autem huic similibus *sunt quos* nihil est aliud nisi *aliquos*, quare infra facile subiungitur *hunc — illum*. — *curriculo*] i. e. curru. Sic apud Ovid. Trist. IV, 8, 36: „Nec procul a metis, quas paene tenere videbar, *Curriculo* gravis est facta ruina meo.“ — *pulv. Ol. colleg.*] i. e. ferri curru per stadium Olympicum; nam colligere est excitare, cogere (Sat. I, 4, 31). Perfectum *collegisse ἀγίσταος* positum esse dicunt, ut Carm. I, 34, 16. II, 12, 17. III, 2, 30. 4, 52. 11, 15. 20, 11. 23, 17. 19. 29, 16. 43; in quibus perfectum tempus aut absolutam aliquam rem aut unius rei repetitionem solet indicare. H. l. intelligitur vis perfecti ex verbo *iuvat*; etenim excitati et collecti pulveris recordatio grata est.

V. 4. *metaque ferv. evit. rotis*] In eo summa conspiciebatur aurigae ars, ut rapidissimo cursu quam proxime ad metam accederet, currum tamen non illideret. cf. A. P. 412. Hom. II. XXIII, 351 sqq. — *palma*] signum victoriae; Carm. IV, 2, 17. III, 20, 12. Ep. II, 1, 181. *Nobilis* ea appellatur, quia apud Graecos olympionicae divino prope honore digni habebantur: ideo dicit: *evehit ad deos* quasi sint facti *terrarum domini*. Luc. Anach. 10 „ὄρεῖς τὸν νικήσαντα ἰσόθεον νομιζόμενον.“ — *hunc — illum*] Hi accusativi apti sunt ex verbo *iuvat*; in qua verborum coniunctione non est quod offendas, cum alterum verbum *evehit* ipsum qua-

si subiectum sit primario *iuvat*. Neque est cur cum Bentleio scribendum esse putes *evehere*. — *mobilium*] cf. Epist. I, 19, 37. — *certat tollere*] Infinitivi cum aliis verbis coniuncti usus apud poetas frequentissimus; ac primum quidem verbis *velle, nolle, coepisse, desinere* similibus fortiora et elegantiora substituant; sic infra v. 21 *demere spernit*, v. 34 *refugit tendere*; cuius rei exempla sunt *odisse, parcere, differte, timere, metuere, fugere, furere, gestire, mittere, amare, quaerere, invidere*. Deinde solent duo verba coniungi, ut alterum alterius modum et rationem accuratius describat; sic h. l. *certat tollere* pro *certatim tollit*. Ex quo genere sunt verba *gaudere, laborare, trepidare, occipare, properare*. Tum infinitivi cum aliis verbis coniunguntur, cum significatur, quo consilio vel quem ad finem aliquid fiat: ubi prosa oratio vel particula *ut* utitur vel participio *inendus*. Sic *egit visere* Carm. I, 2, 7; *sumis celebrare*, I, 12, 2; *tradam portare*, I, 26, 2. Qua re hoc assecuti sunt poetae, ut cum oratio propius ad brevitatem graecae linguae accessisset, frequens usus particularum, quibus menti non nova quaedam notio suggeritur sed notiones inter se coniunguntur, minueretur. — *tergemini honoribus*] aedilitate curuli, praetura, consulatu. Tacit. Ann. I, 3 „Claudium Marcellum pontificatu et curuli aedilitate, M. Agrippam geminatis consulatibus extulit.“

V. 10. cf. Carm. III, 16, 26. Sat. II, 3, 87. Africa fertilitate nobilis erat. Speciem autem pro genere posuit Horatius ex more poetarum, qui quid velint certis rerum exemplis ostendere malunt quam universe docere; sic infra *trabe Cypria, Icaris fluctibus*,

- Gaudentem patrios findere sarculo
 Agros Attalicis condicionibus
 Nunquam demoveas, ut trabe Cypria
 Myrtoum pavidus nauta secet mare.
- 15 Luctantem Icaris fluctibus Africum
 Mercator metuens otium et oppidi
 Laudat rura sui; mox reficit rates
 Quassas indocilis pauperiem pati.
 Est qui nec veteris pocula Massici
- 20 Nec partem solido demere de die
 Spernit, nunc viridi membra sub arbuto
 Stratus nunc ad aquae lene caput sacrae.

Africum, veteris Massici, Marsus aper. Atque ea ipsa est causa, cur v. 11 non generale vocabulum *arare* legatur, sed *findere sarculo*, quibus verbis durissimi laboris accedit significatio. — *patrios*] a patre acceptos ob eamque rem cariores. — *Attalicis condicionibus*] Attali III Philometoris, qui a. u. 621 populum Romanum heredem instituit, magnae opes in proverbium abierant; vel quod Attalus II Philadelphus ingenti pretio artificia emere solebat. Carm. II, 18, 5. — *demoveas*] Alii *dimoveas*. Illud autem ideo praeferendum videtur, quod quae sequuntur verba finem habent quo *perducendus* est agricola. Hoc enim inest in particula *de*, quod non abducit solum sed etiam perducit ad alium locum aliamve rem. — *pavidus nauta*] pavidus est, quia, si perducitur, invitus perducitur et pericula maris perhorrescit. Nautae qui vere sunt non sunt timidi. — *secet*] Apud poetas via, mare, aer secari dicuntur ab euntibus, navigantibus, natantibus, volantibus. Virgil. Aen. VI, 899. Georg. I, 406. Ovid. Met. XI, 478. Hom. Od. III, 174. — *Africum*] cf. III, 29, 57. Senec. Qu. N. 5, 16: „Ab occidente hiberno Africa furibundus et ruens, apud graecos *ἄφρ* dicitur.“ — *otium*] In his verbis triplex oppositio est, inter otium et pericula (Carm. II, 16, 1 sqq.), inter navigationem et vitam rusticam, inter peregrinationem et domesticam habitationem. Otiosa igitur fuit coniectura *oppidi tuta sui* — *indocilis pau-*

periem pati] Brevitatem graeci sermonis in coniungendis adiectivis et infinitivis felicissime in suum usum verterunt poetae latini. Nam cum adiectivorum notio saepe ita vaga sit atque incerta, ut quo laudatae facultates referendae sint magnum cogitandi spatium relinquatur, accedant necesse est termini quidam, ad quos pergere illa aut quibus coerceri credantur. Qui quidem termini a poetis infinitivorum ope adduntur; prosae orationis scriptores aut *ad* aut *in* particula utuntur. Sic h. l. *indocilis pati* est pro *indocilis ad patiendum*, cf. Carm. I, 3, 25. I, 12, 11. I, 24, 17. I, 10, 7. I, 15, 18. III, 12, 11. I, 37, 26. Sat. I, 3, 24. I, 4, 3. 25. De re cf. III, 24, 40 sqq. In paupertate non inopia est, sed mediocritas vitae. Carm. I, 12, 43. Sat. I, 6, 71.

V. 19. *nec spernit*] Litotes figura, qua contrarium negando fortius affirmamus. Virgil. Aen. VII, 261. — *partem solid. dem. de die*] i. e. aliquam partem diei negotiis detractam otio dare et animo. Senec. Ep. 83: „hodiernus dies *solidus* est, nemo ex illo mihi quidquam eripuit.“ — *membra stratus*] Vide Zumpt. gr. lat. §. 458. — *lene caput*] i. e. leniter murmurantem fontem. — *sacrae*] „Cum numina fontes et aquas et mare aliasque res naturales habitare iisque praesse putarentur, inde plura epitheta, quae indicant sanctam deorum praesentiam, ut *fons sacer* apud Ovid. A. A. III, 688. Virg. Aen. VII, 83, *aqua sacra* ap. Hor. C.

- Multos castra iuvant et lituo tubae
 Permixtus sonitus bellaque matribus
 25 Detestata. Manet sub Iove frigido
 Venator tenerae coniugis immemor,
 Seu visa est catulis cerva fidelibus,
 Seu rupit teretes Marsus aper plagas.
 Me doctarum hederæ præmia frontium
 30 Dis miscent superis, me gelidum nemos
 Nympharumque leves cum Satyris chori
 Secernunt populo, si neque tibia
 Euterpe cohibet nec Polyhymnia
 Lesboum refugit tendere barbiton.
 35 Quodsi me lyricis vatibus inseris,
 Sublimi feriam sidera vertice.

I, 1, 22, ἄλλα δῖαν apud Homerum multis in locis et alia huius generis — explicanda sunt. — Iacob. Quaest. epic. p. 13 sq. — *lituo tubae*] Litui acutus est sonus, tubae gravis, lituus equitum est et incurvus, tuba vero peditum est et directa. — *detestata*] passive; sic Epod. 16, 8. *abominatus*. — *manet*] i. e. pernoctat. Sat. II, 2, 234. — *sub Iove*] cf. Carm. III, 10, 7. Epod. 13, 2. ὑπὸ Διός. Claudian. in Prob. et Olybr. cons. 36 „gelido sub Iove.“ — *catulis*] dativus pro praepos. *a* cum ablat.; is cum soleat coniungi cum perfectis passivis, tamen etiam apud praesentia tempora legitur. Epist. I, 19, 3. — *teretes plagas*] ex contortis funiculis factas. — *Marsus aper*] Marsicus, ut Carm. II, 20, 18. III, 14, 18. Epod. 5, 76. 17, 29. Compara *Bithynus* Carm. I, 35, 7. Epist. I, 6, 33. *Calaber* Carm. I, 33, 16. III, 16, 33. IV, 8, 20. Epod. I, 27. Epist. II, 2, 177. *Colchus* Carm. II, 13, 8. *Iberus* Carm. I, 29, 15. Sat. II, 8, 46. *Italus* Carm. II, 7, 4. 13, 18 cet. *Maurus* Carm. I, 22, 2. II, 6, 3. III, 10, 18. *Medus* Carm. I, 27, 5. II, 9, 21.

V. 29. *doctarum frontium*] Omnes docti dicuntur, qui litteras bene didicerunt aut amant; saepissime etiam poetae. Fuerunt qui vel contra codices mallent *Te*. Male; Maecenas enim

neque poeticam laudem neque philosophicam, quam pars eorum, falsa oppositionis specie seducti huic et loco et homini obtrudere conati sunt, unquam secutus est. — *hedera*] Epist. I, 3, 25. Virgil. Bucol. 7, 25. 8, 13. — V. 31. Comparari possunt Carm. II, 19, 1—4. et Epist. I, 19, 4. — *cum Satyris*] pro *et Satyrorum*. Sic saepissime apud Horatium *cum* praepositio usurpatur. Carm. I, 12, 44. 19, 15. 24, 4. III, 1, 36. 3, 24. 17, 16. 18, 12. 19, 20. 29, 3. — *si neque tibi*.] In quo loco bene animadvertenda condicionalis particula; haec enim dubitaenter et modeste proferri debebant in prologo, quo carmina Maecenati fautori et iudici traditurus erat. — *Euterpe*] haec tibia, Polyhymnia lyra canit; utraque adest lyrico poetae. — *Lesboum barbiton*] Graecis vocabulis ideo videtur usus esse, ut primum se „Aeolium carmen ad Italos deduxisse modos“ (III, 30, 13) ostenderet. Vide ad Carm. I, 32, 4. — *quodsi*] haud ita raro a poetis usurpatur haec particula; apud Horatium sexiesdecies reperitur. — *feriam sidera*] Aristaen. I, 11: Ἐδόκει τῇ κρηφῇ ψάειν τοῦ οὐρανοῦ. Sapph. fr. 9: Φαίνειν δὲ πόλον δοκεῖ μοι ὠρανῷ δυσπάχεα. Summum est quod mortales attingere possunt.

CARMEN II.

Iam satis terris nivis atque dirae
 Grandinis misit pater et rubente
 Dextera sacras iaculatus arces
 Terruit urbem,

5 Terruit gentes, grave ne rediret
 Saeculum Pyrrhae nova monstra questae,
 Omne cum Proteus pecus egit altos
 Visere montes,

Carmen II.

Describuntur ab initio carminis usque ad v. 24 portentosae tempestates et insoliti in natura rerum tumultus, deploratur ingens civium per bella civilia clades, ostenditur imperium Romanum ruinam minari. Ea autem ingens calamitas unde exorta est? Interfectus Caesar est, quem deorum ira ulciscitur; bella civilia et omnium rerum turbulenti motus divinitus missa sunt ad castigandam civitatis perversitatem. A tantis malis quis est qui miserum genus humanum liberabit? Humanae vires cum non sufficiant, deus aliquis nostrae calamitatis misertus ex coelo necesse est descendat. Num Apollo veniet augur? an Venus ipsa mater populi Romani, an Mars pater? Immo iam adest Mercurius Caesaris ultor sub-Octaviani latens persona. Is igitur diu inter nos utinam commoretur, quoniam solus est a quo imperii dignitas et nominis Romani gloria cum morum probitate et pietate possint restitui. Videmus ita dividi carmen, ut superior pars calamitatem describat (1—24), inferior expiatorem et quaerat et inveniat (25—52). De tempore quo sit carmen scriptum discordes sunt viri docti; id tamen certum videtur, non alia prodigia significari nisi quae caedem Caesaris consecuta sint; bella civilia siquidem composita tamen non omnino sepulta, rempublicam pacatam quidem sed nondum confirmatam videri, totum denique carmen ad Octavianum, Caesaris patris ultorum, (quo se illum nomine libenter ornasse scimus) celebrandum esse scriptum. Qua-

propter ante a. u. c. 727 compositum est; eo enim anno expiandi criminis iam non potuit mentio fieri, omnibus scilicet Caesaris interfectoribus extinctis; fortasse iam a. 725, cum Octaviani victoris reditus in urbem omnium desiderio expectaretur.

V. 1. Cum hac inundationum descriptione comparandi sunt Virgiliani versus Georg. I, 466—489. 498 sqq., in quibus mirum et verborum et sententiarum cum his Horatianis consensum deprehendes. — *dirae*] Sic appellantur omnia quae gravia et ingentia mala portendunt. Virg. Georg. I, 488. Hor. Epod. 5, 89. Animadvertendum tamen, hoc adiectivo hic non grandinem solum sed nivem quoque ornari. Quo ordine a prosae orationis consuetudine alieno poeta saepe disposuit verba, ut Carm. I, 5, 6. I, 31, 16. I, 34, 8. II, 19, 24. III, 11, 39. IV, 14, 4. II, 8, 3. III, 2, 16. — *pater*] Iuppiter. — *iaculatus*] cum accusativo rei quae feritur, ut Carm. III, 12, 11. — *arces*]. Capitolium et templa ibi posita. — *terrui ne*] Terrendi verbum cum habeat metuendi notionem (terrui ut metuerent ne) coniungi potuit cum *ne* particula. — *gentes*] Romano imperio subiectas; Romae enim urbis calamitates ab extremis etiam nationibus sentiuntur; vide Carm. II, 1, 31 sq. — *Pyrrhae*] vid. Ovid. Met. I, 260. — *Proteus*] De hoc deo marino Neptuni greges pascente vide Hom. Od. IV, 386 sqq. Virg. Georg. IV, 395 sqq. — *altos*] ex aquis cacumina tantum montium eminebant; quare phocae in iis ut in littore maris apicabantur. Cf. Ovid. Met. I, 296 sqq. — *egit vi-*

Piscium et summa genus hæsit ulmo,
 10 Nota quae sedes fuerat columbis,
 Et superiecto pavidæ natarunt
 Aequore damæ.

Vidimus flavum Tiberim retortis
 Littore Etrusco violenter undis
 15 Ire deiectum monumenta Regis
 Templaque Vestæ,

Iliae dum se nimium querenti
 Iactat ultorem, vagus et sinistra
 Labitur ripa Iove non probante u-
 20 xorius amnis,

Audiet cives acuisse ferrum,
 Quo graves Persæ melius perirent,

sere] vide ad I, 1, 8. — *piscium et*] Apud poetas etiam *et* particula enclitica est; ut infra 18. 39. I, 12, 11. 13, 6. 29, 14. 31, 10. 37, 8. II, 19, 10. 16. III, 4. 70. 24, 48. IV, 10, 4. 15, 2. 5. — *hæsit*] eleganter dictum; nam in arboribus, in quibus haerere solebant aves, iam pisces haeserunt, et ubi pisces fuerant iam natarunt damæ; omnis naturæ ordo inversus est. Sic Claudian. in Prob. et Olybr. cons. 169: „per flumina damæ errabunt.“ Aptum igitur oxymoron est *pisces haeserunt, damæ natarunt*.

V. 13. *vidimus*] Recte, etiamsi ipse Horatius Romæ tum non fuit. Vidisse se dicunt Romani quaecunque sua ætate facta sunt. — *flavum*] perpetuum Tiberis epitheton propter multitudinem arenæ quam ducit. Inde semper *flavus Tiberis*, non contrario ordine. Carm. I, 8, 8. II, 3, 18. — *Littore Etrusco*] pro littore maris Etrusci, in quod Tiberis effunditur. Hoc quoque monstrum est. Tiberis aquas in mare non effudit sed violenter retorsit, eo ipso consilio ut aucta aquarum vi sinistram ripam, in qua sita est Roma urbs, inundare urbemque impiam castigare posset. Perperam alii *littus Etruscum dexteram fluminis ripam esse* voluerunt, *littoris et ripæ* permutationem Virgilianis locis (Aen. III, 390. VIII, 83) probare conantes. Monstro-

sae inundationis et violentiæ fluminis recta interpretatione multo grandior evadit imago. — *monumenta Regis*] Regia Numæ Pompilii, simpliciter Regia appellata, tam exiguo spatio a templo Vestæ seiuncta erat, ut eius templi atrium prope videretur, et diceretur. Fuit autem sita ad Tiberim in ima parte fori. Regia et delubrum Vestæ imperatore Nerone incendio deleta sunt. Tacit. Ann. XV, 41. Monumenta nominabantur publica aedificia. — *Iliae*] Reæ Silviae; quæ quidem cum ab Amulio in Tiberim (vel Anienem) præcipitata esset, Fluvio nupsisse dicebatur. Cui de nece Caesaris nepotis querenti ut morem gereret Fluvius, totam urbem diruere voluisse dicitur. Quapropter aedem Vestæ petit, ut sacrum ignem, salutis urbis pignus, exstinguat. Quam iram Fluvii, coniugi nimis obtemperantis (*uxorius*), Iuppiter optimus maximus omni ira et studio maior non potuit non improbare; ipse terrere voluit, non delere.

V. 21. *Audiet*] Hoc quoque contra naturam est, quod intestinis bellis in semet ipsos Romani saeviunt. Fuit qui locum vituperaret ideo, quod, ut domestica bella recte et facile intelligerentur, scribendum fuisset *cives contra cives*. Quod quidem ut indignum est poeta ita supervacaneum gravi

Audiet pugnas vitio parentum
Rara iuventus.

25 Quem vocet divum populus ruentis
Imperi rebus? Prece qua fatigent
Virgines sanctae minus audientem
Carmina Vestam?

Cui dabit partes scelus expiandi
30 Iuppiter? Tandem venias precamur
Nube candentes humeros amictus
Augur Apollo;

Sive tu mavis, Erycina ridens,
Quam Iocus circum volat et Cupido,
35 Sive neglectum genus et nepotes
Respicis auctor,

Heu nimis longo satiate ludo,
Quem iuvat clamor galeaeque leves
Acer et Mauri peditis cruentum
40 Vultus in hostem;

civium et *Persarum* (Parthorum, hostium) oppositione. — *rara iuventus*] posterorum. — *ruentis*] Imaginem quam hoc verbum habet intelliges ex Carm. I, 35, 13 sq. — *imperi*] De hac genitivi forma cf. Carm. I, 4, 1. I, 6, 12. I, 12, 34. 35. III, 4, 65. Sat. I, 6, 9. 12. — *carmina*] preces. cf. Epist. II, 1, 134—138. — *minus audientem*] Nam ea quoque irata fuit; cur fuerit, ipsa dicit apud Ovidium Fast. III, 699 sqq.: „Ne dubita meminisse: meus fuit ille sacerdos, Sacrilegae telis me petiere manus. Ipsa virum rapui simulacraque nuda reliqui: Quae cecidit ferro, Caesaris umbra fuit.“ Caesar enim Pontifex Maximus erat. — *scelus*] τὸ ἄγος. — *candentes humeros*] ad significandam pulchritudinem Apollinis; praeterea Phoebus totus candens. Virg. Aen. VIII, 720. — *nube amictus*] Hom. II, V, 186. — *augur*] Carm. Saec. 61. Quo nomine intelligitur, cur Apollo primus vocetur. Is enim propter divinandi scientiam et quomodo dii lae-

si et quomodo placandi essent optime noverat; praeterea Romanis ut olim Troianis favebat. Deinde Octavianus Apollinis filius et haberi voluit et habebatur a nonnullis. — *sive*] i. e. vel si, ut Carm. I, 15, 25. I, 32, 7. III, 27, 61. — *Erycina*] ab Eryce, Siciliae monte, ubi Aeneas (Virg. Aen. V, 759 sq.) aedem Veneris exstruxerat. Quare ne hoc quidem nomine temere poeta usus videtur. — *ridens*] ut in hymn. homer. in Vener. 49 ἡδὺ γελοῖήσασα, φιλομειδὴς Ἀφροδίτη. — *circum*] Carm. II, 16, 33. Apud poetas praepositiones frequenter ponuntur, ut Carm. III, 3, 11. Virgil. Aen. I, 32. II, 792. — *respicis*] iuvandi gratia. Romae colebatur *Fortuna respiciens* ad opem ferendam, ut dicit Cicero de legib. II, 11. — *ludo*] bellico. — *Mauri peditis*] Mauri equo deiecti. Equites enim qui equos reliquerunt, *pedites* nonnunquam appellantur: Liv. VII, 8. Ovid. Met. XIV, 363. Similem quasi tabulam habemus

Sive mutata iuvenem figura
 Ales in terris imitaris almae
 Filius Maiæ patiens vocari
 Caesaris ultor.

45 Serus in coelum redeas diuque
 Laetus intersis populo Quirini,
 Neve te nostris vitiis iniquum
 Ocior aura

Tollat. Hic magnos potius triumphos,
 50 Hic ames dici pater atque princeps,
 Neu sinas Medos equitare inultos
 Te duce Caesar.

CARMEN III.

Sic te diva potens Cypri,
 Sic fratres Helenæ lucida sidera

Sat. II, 1; 15; nam Parthi quoque ut Mauri in equis prope vivebant. Quare erprobanda est coniectura *Marsi*.

V. 41. *iuvenem*] Caesarem Octavianum, qui natus est M. Tullio Ciccone M. Antonio Coss. a. d. IX. Kal. Octobr. Mercurius, nuntius deorum, latere dicitur sub persona Octaviani, ut hic quoque a diis missus esse videatur. Mercurius, quo legati muneribus et facilius et melius perfungeretur, dicendi et persuadendi facultate instructus erat; quæ virtutes cum hac ratione ad Octavianum quoque transferantur, hunc non crudelitate sed clementia homines reconciliaturum, deos placaturum esse indicatur. — *ales*] de talaribus et alis in petaso Mercurii. — *Caesaris ultor*] Quam bene hæc Octaviani animum expriment, ipsius ostendit oratio in senatu habita (a. u. 726), ap. Dion. Cass. 53, 4: *ἵνα — καταμάθῃτε τοῦθ' ὅτι οὐδ' ἂν ἀρχῆς ὀνναστίας τινὸς ἐπεθύμησα, ἀλλ' ὄντως τῷ τε πατρὶ δεινῶς σφαγέντι τιμωρῆσαι καὶ τῇ πόλιν ἐκ μεγάλων καὶ ἐπαλλήλων κακῶν ἐξελῆσθαι ἡθέλησα.* — *filius*] vide Zumpt. gr. lat. §. 50. — *serus*] adiectivum pro adver-

bio, ut Carm. I, 7, 17. I, 10, 3. I, 12, 57. Epod. 16, 51. Sat. I, 3, 117. I, 7, 27. II, 6, 100. Epist. I, 6, 20. A. P. 269. Saepissime illud fieri solet, cum quo tempore vel quoties quid accadat indicatur. — *Quirini*] Ovid. Fast. I, 69 „Dexter ades patribusque tuis populoque Quirini.“ Metam. XV, 572 „patriæ laetum populoque Quirini.“ ibid. 756 „Pontum populo adiecisse Quirini.“ — *triumphos*] Anno 725 a. d. VIII. VII. VI. Id. Sext. ter triumphavit Octavianus de Pannoniis, ex Macedonia et Actio, ex Aegypto de regina Cleopatra. Accusativus pendet ex verbo *ames*, non eliciendum ex universa sententia v. *agas*. Similis est duplex coniunctio unius verbi Carm. I, 1, 19. — *pater*] Nomine patris patriæ Augustus ornatus est a. u. e. 752 post mortem Horatii; *princeps* appellatus est a. 726. — *Medos*] Parthos, qui frequentes excursions fecerunt in Syriam; id quod significatur v. *equitare*.

Carmen III.

Horatio, cum amicissimum sibi Virgilium in Graeciam mari profectum audisset, omnia quæ navigantibus imminet pericula obversabantur; ideo

Ventorumque regat pater

Obstrictis aliis praeter Iapyga,

5 Navis, quae tibi creditum

Debes Virgilium finibus Atticis

Reddas incolumem precor

Et serves animae dimidium meae.

Illi robur et aes triplex

10 Circa pectus erat, qui fragilem truci

et felicissimis votis prosequitur navem qua ille vehebatur, et durissima castigatione reprehendit audaciam humani generis, qua quidquid a divina providentia cautum prohibitumque est contemnere et audere solent. Nam „nitimur in vetitum semper cupimusque negata.“ Sunt qui carmen scriptum putent a. u. 735, quo anno Virgilium Athenas profectum et praematura morte abreptum esse scripsit *Donatus*. Sed cum tres libri non post a. 731 editi esse videantur, nec cum interprete aliquo suspicari liceat, Virgilium tribus annis antequam moreretur ex Italia in Graeciam profectum ibique tres totos annos commoratum esse, iis accedendum est qui aliud, ante susceptum, iter significari putant.

V. 1. *sic*] Dissen. ad Tibull. T. II. p. 88: „Sensus formulae ubique hic est: sic, hac condicione opto tibi hoc illudve, ut dicas, facias; constructione vero omittitur particula *ut* et subiicitur quod expetitur absolute et sine ea hoc modo: Sic opto tibi illud, fac, dic cet.“ cf. Carm. I, 28, 25. Nec bene vidit qui nuper *sic* particulam ita est interpretatus, ut sit pro: „*rebus sic comparatis*, nachdem das so gekommen.“ Claudian. in Prob. et Olybr. cons. 161: „Non improba posco, Non insueta dabis; domus hoc de more requirit; adnue; *sic* nobis Scythicus famuletur Araxes, *Sic* Rhenus per utrumque latus Medisque subactis Nostra Semiramiae timeant insignia tures; *Sic* fluat attonitus Romana per oppida Ganges. — *potens* cum genitivo, cf. Carm. I, 5, 16. — *Cypri*] Carm. I, 30, 1. III, 26, 9. Invocatur Venus, quia *πορτία* est et *εὐπλοία*; unde *Venus marina* est Carm. III, 26, 5. IV, 11, 15. — *fratres Helenae*] Sunt *Gemini*, propitii navigantibus, quia per longas

noctes insigni lumine fulgent. cf. I, 12, 25 sqq. III, 29, 64. Alii de flammulis electricis accipiebant, post nimbos et procellas in summis navium malis elucescentibus. De quibus *Plinius H. N. II, 37*: „Antennis navigantium aliisque navium partibus ceu vocali quodam sono insistunt, ut volucres sedem ex sede mutantes; graves, cum solitariae venere, mergentesque navigia, geminae autem salutare et prosperi cursus praenuntiae.“ — *lucida sidera*] ut Carm. IV, 8, 31. — *Ventorum pater*] *Aeolus*. Virg. Aen. I, 52. — *Iapyga*] Reliqui venti adversi, *Iapyx* (*Favonius*) secundus ex Italia in Graeciam navigantibus. — *quae tibi creditum debes*] Consulto et artificiose posita sunt *finibus Atticis*, ut utrumque verbum *debes* et *reddas* attingant. Oratio inde efficitur concinnior, quam si molestum pronomen *his* interponeretur. Vult enim hoc: quae debes Virgilium finibus Atticis, reddas eum his. Quod genus appellant grammatici *σχήμα ἀπὸ κοινού*, quo, cum antiqui scriptores magis audientibus quam legentibus scriberent neque crebris commatis abuterentur, ita uti potuerunt, ut unum vocabulum cum duobus aliis ex diversis sententiae partibus sumptis coniungerent. Qua re non satis perspecta factum est, ut haerentes interpretes alii post *Virgilium* alii post *Atticis* interpunctione distinguarent. *Creditum*, *debes*, *reddas* vocabula sunt de pecunia in fenus data.

V. 8. *animae dimidium meae*] cf. Carm. II, 17, 5. Nam *φίλλα ἐστὶ μὲν ψυχῇ ἐν δνοῖν σώμασι*. — *robur et aes triplex*] Clypeus roboreus et lorica ex triplici aeris lamina confecta a pectore et animo humanos sensus prohibent. — *truci*] horribili aspectu. cf. Epod. 2, 5. Ceterum haec

Commisit pelago ratem

Primus nec timuit praecipitem Africum

- Decertantem Aquilonibus

Nec tristes Hyadas nec rabiem Noti,

15 Quo non arbiter Hadriae

Maior, tollere seu ponere vult freta.

Quem Mortis timuit gradum,

Qui siccis oculis monstra natantia,

Qui vidit mare turgidum et

20 Infames scopulos Acroceraunia?

Nequidquam deus abscidit

Prudens oceano dissociabili

Terras, si tamen impiae

vocabula *fragilem truci pelago ratem* Chiasmi ordine collocata sunt, quo fragilitate naviculae contra immanitatem maris posita humana audacia magis illustretur. — *decert. Aquil.*] Dativus pro cum praepos. et ablativo casu ad exemplum graeci verbi μάχεσθαι; sic Carm. I, 1, 15. II, 6, 15. Sat. I, 2, 73. — *tristes Hyadas*] Tristia sidera sunt, quia coelum occasu matutino et ortu vespertino contristare et tempestates afferre credebantur (Virg. Aen. X, 275); per prolepsin igitur sic appellantur; quo usu antiqui poetae efficacissimum nacti sunt subsidium gravitatis et brevitatis. Contrarium habes exemplum Carm. I, 7, 15, ubi *Notus albus* appellatur ab effectu, deinde Carm. III, 27, 19. III, 7, 1.

V. 15. *Notus*] etiam Auster, Carm. III, 3, 5. Certant venti de imperio maris; qui semper in aliquo mari flare solent, victores ex pugna discessisse videntur. Sic *Notus* in Adriatico, quod suo arbitrio (*arbiter*) tollit et ponit, aliis qui ibi saevire conati sunt quasi devictis. De grammatica ratione hoc dicendum est, cum *seu* (*sive*) ponatur pro *vel si* (vide ad I, 2, 33), facile particulam *si* reduci posse ad superius verbum *tollere*, ut hunc habeamus ordinem *si tollere vel si ponere vult*; condicionalem autem particulam in oratione etiam, non in versibus solum omitti notum est. — *Mortis gradum*]

Mortem h. l. δαίμονος personam induisse ipsum vocabulum *gradus* ostendit; neque ea res insolita est, nam idem factum est infra v. 33. I, 4, 13. Hom. II. XVII, 202. Male igitur alii *gradum ad mortem, viam ad Orcum* i. e. mortis genus. Quanto magis illa ratio decet poetam, qua Mors hostili gradu homines adoriri, homines autem fortes audacter resistere dicuntur. — *siccis oculis*] *Bentleius* qui nihil tam magnum aut mirabile putaret, cum siccis oculis vir fortis ea videret, quae vel timidissimi non aliter possent adspicere, quoniam in magno pavore praesentique consternatione nullus lacrimis locus esset, coniecit legendum esse *rectis oculis*. At non fortes, sed feroces et temerarii homines describuntur, quorum oculi rigidi sunt, exsiccati, lacrimis carentes. — *turgidum et*] Particula *et* generali notioni specialem addit; cuius usus alia exempla haec sunt: I, 4, 1. I, 8, 16. I, 17, 6. II, 1, 21, 14. I, 34, 13. II, 2, 21. II, 6, 21. II, 14, 26. III, 5, 34 sq. IV, 5, 30 sq. IV, 6, 15. IV, 7, 3. *Bentleius* et alii ex codd. *turbidum*, non bene; *turgidum* mare est πέλαγος οἰδματι θύον (Hesiod. Theog. 131), *turbidum* est aliquamdiu etiam post procellam. — *Acroceraunia*] propter altitudinem et fulminum ictus. — *dissociabili*] activa significatione, cf. *illacrimabilis* Carm. II, 14, 6; *penetrabilis* Ovid. Met. V, 67. Virg. Aen. X, 481. — *impiae transiliunt*]

Non tangenda rates transiliunt vada.

25 Audax omnia perpeti

Gens humana ruit per vetitum nefas;

Audax Iäpeti genus

Ignem fraude mala gentibus intulit.

Post ignem aetheria domo

30 Subductum macies et nova febrium

Terris incubuit cohors

Semotique prius tarda necessitas

Leti corripuit gradum.

Expertus vacuum Daedalus aëra

35 Pennis non homini datis;

Perrupit. Acheronta Herculeus labor.

Nil mortalibus ardui est:

Coelum ipsum petimus stultitia neque

In utroque verbo inest gravissima temeritatis humanae notatio; nam transilire quoque levitatis est et superbiae. — *audax perpeti*] vide ad I, 1, 18. — *vetitum nefas*] adiectivum non sine magna vi additum; egregie enim sic indicatur, non nescientes peccare homines, sed *ruere* eos per scelera, quae scelera esse sciant.

V. 27. *Iäpeti genus*] filius, Prometheus. Communis sententia, quae in his tribus exemplis humanae audaciae inest (Prometheus, Daedalus, Hercules), aperte proponitur ab Horatio Carm. III, 4, 65 sqq. Fabulae enim de Prometheo, Daedalo, Hercule humani generis certamen continent cum divina mente. — *fraude mala*] Non bene compararunt *dolum malum*, cum dolus etiam bonus esse possit, fraus non possit. In adi. *malus* inest perniciēs, quae ex fraude in mortales fluxit. — *macies et nova febrium cohors*] Ob Promethei furtum irati dii Pandoram miserunt cum febribus et morbis, quibus homines, qui antea diutius vivebant, citius iam auferebantur. — *vacuum aëra*] Eiusmodi epitheta, quae propria et perpetua appellantur, a natura rerum petita, exor-

nationis studio ab antiquis poetis adhibentur et vituperatione carent. Sic *aequor liquidum*, *aquae liquidae*, *agni lanigeri*, *aeriae aerae*, alia multa. — *perrupit*] Ultima syllaba arsi producit. Nec operam perdidisse videtur, qui docere studuit, syllabam *it* in hac forma antiquis temporibus longam fuisse suamque veterem naturam postea etiam saepe servasse; Virg. Georg. II, 211. Aen. VIII, 363. X, 67. Ovid. Met. IX, 612. Ceterum Horatius in epistolis, in Art. poet. et in IV. Carm. libro omnem hanc licentiam omisit. Non necessaria igitur erat coniectura *perrupitque*.

V. 36. *arduus*] cf. Sat. I, 2, 84. Liv. VII, 26 „cuius populi ea classis fuerit, nihil certi est.“ id. IX, 16 „nihil satis praeparati erat ad obsidionem tolerandam.“ XXXVI, 7. XXII, 40. 61. Alii ex codd. *arduum*. Est in fine versus positum emphasim habet. — *neque*] Haec particula in fine versuum etiam lyricorum collocata docet, quam arte veteres versus coniunxerint, quam non oculis sed auribus scripserint. Reliqua exempla apud Horatium sunt: Carm. I, 18, 3. III, 1, 25. 38. III, 29, 46. IV, 8, 20. —

Per nostrum patimur scelus

40 Iracunda Iovem ponere fulmina.

CARMEN IV.

Solvitur acris hiems grata vice veris et Favoni,

Trahuntque siccas machinae carinas;

Ac neque iam stabulis gaudet pecus aut arator igni,

Nec prata canis albicant pruinis.

5 Iam Cytherea choros ducit Venus imminente Luna,

ponere fulmina] Fulmina tela Iovis sunt. Ipsa autem fulmina *iracunda* appellantur ex enallage quadam adiectivi; quae ita debet esse comparata, ut ad utrumque nomen aequo iure adiectivum possit referri. cf. Carm. III, 21, 19.

Carmen IV.

Hiemis molestiis perlatis et homines et tota rerum natura ex longo quasi somno ingrataque inertia ad vitam et laetitiam redeunte vere revocantur. Cuius quidem amoenitatibus captus Horatius natura eiusque donis fruendum esse praecipit, cum praesertim homines non eadem vicissitudine utantur, sed angustiis aetatis circumscripti uno tantum vitae quasi vere gaudeant et certo senectutis adventu ad communem mortem spe citius abripiantur. In qua re tractanda Horatius hoc consilium secutus est: viginti versus carminis dividuntur in quinque partes quaternorum versuum; quarum prima et altera verno tempore redeuntem et ubique conspicuam vitam et vigorem describunt, tertia vero gaudendum ac fruendum iis quae denuo exoriantur praecipit, quarta et quinta cum reviviscente natura rerum comparant humanam condicionem. — Favonii ortum latini rustici assignabant circa Id. Febr. (Varr. R. R. I, 28. Colum. XI, 2, 15), quod eo primum tempore tellus moveri et plantae non paucae virere incipiebant; deinde Fauno (v. 11) sacrae erant Idus Febr., tum maria clausa

erant ex a. d. III. Id. Nov. usque ad a. d. VI. Id. Mart.; quas res cum coniunxeris cum iis quae leguntur vv. 3, 6, 10., carmen intelliges scriptum esse exeunte mense Martio vel ineunte Aprili. Iam si annum quaeras, nihil vides ex ipso carmine effici; nam quid inde lucramur, quod L. Sestium a. 731 ab Augusto consulem sibi suffectum esse scimus? Dio. C. LIII, 32: „Λούκιον ἀνδρ' ἐκ τοῦ Σήστιον ἀνθέλλετο (ὁ Ἀύγουστος) αἰεὶ τε τῷ Βρούτῳ συσπονδάσαντα καὶ ἐν πᾶσι τοῖς πολέμοις συστρατεύσαντα καὶ ἔτι καὶ τότε καὶ μνημονεύοντα αὐτοῦ καὶ εἰκονας ἔχοντα καὶ ἐπαίνους ποιοῦμενον· τὸ τε γὰρ φιλικὸν καὶ τὸ πιστὸν τοῦ ἀνδρός οὐ μόνον οὐκ ἐμίσησεν ἀλλὰ καὶ ἐτίμησε.

V. 1. *Solvitur hiems*] Virg. Georg. I, 44: „putris se gleba resolvit;“ *acris* autem hiems est, quia constringit, contrahit. Sic *acre acetum* Sat. II, 3, 116, *acria rapula* Sat. II, 8, 7. — *trahuntque*] Notandus iambus in prima sede. Per hiemem naves in littus *subductae* trabibus imponebantur, vere redeunte *deducebantur*; ea autem subductio et deductio machinis, quae *phalangae* dicebantur, fiebat. Caes. B. C. II, 10. Proprium igitur verbum *deducere* commutatum est ab Horatio cum verbo trahendi ad graecum *ἐλκεῖν* accommodato. — *neque — aut — nec*] Non tres sunt partes, sed duae; tertius enim versus animatam, quartus inanimatam habet naturam. — *Cytherea Venus*] ab insula Cythera dicta, quo Veneris cultus pervenit ab insula

Iunctaeque Nymphis Gratiae decentes

Alterno terram quatiant pede, dum graves Cyclopum
Vulcanus ardens urit officinas.

Nunc decet aut viridi nitidum caput impedire myrto

10 Aut flore, terrae quem ferunt solutae;

Nunc et in umbrosis Fauno decet immolare lucis,
Seu poscat agna sive malit haedo.

Pallida Mors aequo pulsat pede pauperum tabernas

Regumque turres. O beate Sesti,

15 Vitae summa brevis spem nos vetat inchoare longam.

Iam te premet nox fabulaeque Manes

Cypro. Venus autem vere incipiente ad terram descendit eamque vi sua fecundam reddit; sic apud Lucret. V, 735 sq.: „It ver et Venus et Veneris praenuntius ante Pinnatus graditur Zephyrus.“ — *Gratiae decentes*] comites Veneris, ut Carm. I, 30, 6. IV, 7, 5. Hesiod. Theog. 907: „Τρεῖς δὲ οἱ (Iovi) Εὐφροσύνη Χάριτας τέκε καλλιπαροῖους, Ωκεανοῦ κόρη, πολυήρατον εἶδος ἔχουσα, Ἀγλαΐην τε καὶ Εὐφροσύνην Θαλίην τ' ἐρατεινήν.“ — *alterno pede*] ad rhythmum pede feriente. — *Vulcanus ardens*] Iam verno tempore a Vulcano parantur fulmina, quae a love aestate mittantur. Ver enim breve est pelliturque instante ardore. Vulcanus dum candens ferrum procondit, ipse igne circumfusus ardere videtur. Sic supra I, 2, 2 rubens dextera Iovis. — *urit*] i. e. tantis flammis incendit, ut eas comburere videatur. Similis locus est Sat. I, 2, 114; ut haudquaquam necessarium sit cum Benteio ex paucis codd. scribere *visit*. Officinae Cyclopum montes sunt ignivomi.

V. 9. *nitidum*] unguentis; vide ad Carm. II, 3, 13. — *myrto*] Ea Veneri sacra habebatur (Virg. Bucol. 7, 62), eiusque usus frequens fuit in computationibus, quia semper viret. Carm. I, 38, 5. II, 7, 25. — *flore*] aut floribus, si qui iam inveniuntur. — *agna*] Duplex verbi *immolandi* est coniunctio, et *immolare alicui aliqua re*, ut hic et apud Cic. de legib. II, 12: „quibus hostiis immolandum cuique deo“, et *immolare alicui aliquam rem*,

ut Sat. II, 3, 164. — *pallida*] exsanguis; ipsa enim Mors naturam eorum induit quos abripuit. — *aequo pede*] De sententia cf. Carm. II, 3, 25. 14, 11. 18, 32. *Pulsando* indicat Mors se adesse. Sic Ovid. Heroid. 21, 46: „Persephone nostras pulsat acerba fores.“ Callim. hymn. Apoll. 3 „Καὶ δῆπον τὰ θύρετρα καλῶ ποδὶ Φοῖβος ἀράσσει.“ — *regum*] divitum, ut Sat. I, 2, 86. II, 2, 45. Carm. II, 14, 11. II, 18, 34. Epist. I, 10, 33. A. P. 434. — *beate Sesti*] Sestium alloquitur poeta nunc demum idoneum locum nactus, nam is quoque dives erat; divitiis eum recte usum esse epitheton videtur significare.

V. 15. *summa brevis*] cf. I, 11, 6. IV, 7, 17. — *iam*] mox; sic *iam* cum futuro Carm. II, 5, 10. 13. II, 15, 1. II, 20, 13. IV, 6, 41 de re suo tempore certe futura ideoque confidenter expectata vel expectanda. — *premet nox*] Ex verbo *premedi*, quod genere suo ad noctem quidem accommodatum est, latius aliquod facile invenitur, quod *Manibus* convenit, veluti *habebunt*. — *fabulaeque*] est nominativus pluralis. Significat autem illud vocabulum inanitatem inferorum; apud quos qui sunt, iam nihil sunt nisi fabula, corpore scilicet carentes. cf. Carm. IV, 7, 16. Pers. 5, 152: „cinis et Manes et fabula fies.“ Nam dubito, num tale quid subsit, quale est apud Iuvenal. Sat. 2, 149: „Esse aliquos Manes et subterranea regna, Et contum et stygio ranas in gurgite nigras, Atque una transire vadum tot milia cumba, Nec pueri

Et domus exilis Plutonia; quo simul mearis,

Nec regna vini sortiere talis

Nec tenerum Lycidan mirabere, quo calet iuventus

20

Nunc omnis et mox virgines tepebunt.

CARMEN V.

Quis multa gracilis te puer in rosa

Perfusus liquidis urget odoribus

Grato, Pyrrha, sub antro?

Cui flavam religas comam

5 Simplex munditiis? Heu quoties fidem

Mutatosque deos flebit et aspera

Nigris aequora ventis

Emirabitur insolens,

credunt, nisi qui nondum aere lavantur.“ — *domus exilis*] est egena et inops, sine suppellectile, ut Epist. I, 6, 45. Nihil, inquit, ibi reperiis quo gaudas: neque convivii neque amoribus indulgendi facultas erit aut locus commodus. — *simul*] i. e. simul ac, ut Carm. I, 9, 9. I, 12, 27. II, 8, 5. II, 16, 2. III, 4, 37. III, 12, 7. III, 27, 33. IV, 7, 10. — *regna vini*] In convivii Romani *συμπόσιον*, regem vel principem convivii, magistrum bibendi talorum sorte eligebant. cf. Carm. II, 7, 25. — *calet*] de amore cum ablativo, quoniam idem est quod incendi. Sic Carm. II, 4, 7. III, 9, 6. IV, 11, 33. — *tepebunt*] de incipiente amore. Senec. epist. 92: „Frigidum aliquid et calidum novimus; inter utrumque tepidum est.“ Lucret. II, 516 „Finit enim calor ac frigus mediique tepores Inter utrumque iacent.“ Colum. 8, 5 „Curandum erit, ut pulli tepide habeantur, nam nec calorem nec frigus sustinent.“ Non igitur significat timidorem magisque verecundum amorem virginum.

Carmen V.

Perfidus Pyrrhae amor comparatur cum fraudulento mari, quod cum tranquillum videatur, eos qui in litore versantur ad se quasi vocat trahitque, mox cum miseri se suaque eius fidei

commiserunt, motis fluctibus omnes avidè absorbet. Se ipsum fatetur Horatius eo naufragio prope exstinctum esse, neque tamen, ut sibi olim, ita aliis navigando salutem ut quaerant contingere. Pyrrha quae fuerit quærere non minus vanum est quam si quis annum quo potissimum carmen videatur scriptum esse velit investigare. *Πυρρὰ* enim graece *flava* est.

V. 1. *multa in rosa*] Singularis numerus in eiusmodi coniunctione usitatus: sic Cic. Tusc. III, 18, 43. V, 26, 73. de fin. II, 20, 65: „Potantem in rosa Thorium.“ Recte tamen h. l. non coronas rosaceas sed lectum rosis stratum intelligunt, ut Sen. Epist. 36, 9 *in rosa iacere*. — *urget*] vide ad Carm. II, 9, 9. — *flavam comam*] nam *πυρρὰ* est, et flavi capilli ab Italis propter raritatem pulchri habebantur. — *simplex munditiis*] sed animo dolosa. — *fidem mutatosque deos*] pro: mutata fidem mutatosque deos. cf. ad Carm. I, 2, 1. — *aspera*] quia excitata. — *nigris ventis*] nimbis coelum obducentibus. Epod. 10, 5. Virg. Georg. III, 278. Vide supra ad I, 3, 14.

V. 8. *emirabitur*] Sic in omnibus codicibus, sed vocabulum apud bonos scriptores alias non legitur, quare Bentleius malebat, ut *mirabitur*, alii *demirabitur*, ego olim *eluctabitur*; sed

- Qui nunc te fruitur credulus aurea,
 10 Qui semper vacuum, semper amabilem
 Sperat nescius auræ
 Fallacis. Miseri, quibus.
 Intentata nites! Me tabula sacer
 Votiva paries indicat uvida
 15 Suspendisse potenti
 Vestimenta maris deo.

CARMEN VI.

Scriberis Vario fortis et hostium
 Victor Maeonii carminis alite,

nihil mutandum. Est enim *mirari ad mortem*, quo summum significatur stuporis genus. Iam praeterea ἀπαξ λεγόμενα apud Horatium haec sunt: *irruptus* Carm. I, 13, 18; *allaborare* I, 38, 5; *tentator* III, 4, 71; *exsultim* III, 11, 10; *inaudax* III, 20, 3; *immetata* III, 24, 12; *Faustitas* IV, 5, 18; *beluosus* IV, 14, 47; *applorans* Epod. 11, 12; *inemori* Epod. 5, 34; *prodocere* Epist. I, 1, 55; *emetere* Epist. I, 6, 21; *laeve* Epist. I, 7, 52; *insolabiliter* Epist. I, 14, 8; *depugis* Sat. I, 2, 93; *vepallidus* ib. 129. — *insolens*] non assuetus tantae perfidiae ac tempestati. — *aurea*] iterum quia πνέουσα est, tum latius de tota formositate. — *vacuum*] ab aliis non occupatam, sibi uni deditam. — *aurae*] et de vento et de favore; utraque res mutabilis. De genitivo cf. Carm. III, 2, 17. — *tabula*] Solebant qui ex naufragio divina ope erepti erant in templis deorum marinorum tabulam votivam et vestimenta, quibus cum naufragium patèrentur erant induti, suspendere. cf. Sat. II, 1, 33. A. P. 20. Virg. Aen. XII, 766.

Carmen VI.

Generalis sententia, ex qua tota haec M. Vipsanii Agrippae laudatio ducitur, haec est: *non omnia possumus omnes vel sciendum, quid humeri ferant quid ferre recusent*. Est enim carmen ita institutum, ut poeta, cum magnis rebus gestis digne laudandis inferiorem

se diceret, praeclara Agrippae facinora cum antiquis apud Homerum viris fortibus comparata summa qua in lyrico carmine posset fieri laude tecte et artificiose exornaret. Eiusdem artis et simulationis alia exempla sunt Carm. II, 12. IV, 15. In qua re hunc ordinem nobis observare videmur: media strophæ principalem sententiam habet utrimque cineta duabus strophis, quarum quidem ut quarta alteri respondet, sic quinta contra primam posita quid inter epicum poetam discriminis intersit et Horatianam lyram iocose prope ostendit. — Non potest dici ad quem annum carmen referendum sit, quamquam illud veri simile est, haud ita multo post victoriam Actiacam optime laudes Agrippae victoris scribi potuisse; et certum videtur, carmen scriptum esse ante a. 727, quo Octavianus Augusti nomine ornatus est.

V. 1. *Vario*] L. Varius, poeta epicus et tragicus, natus circa a. u. c. 672, amicus fuit Virgilii et Horatii; carmina composuit de morte Caesaris et de laudibus Octaviani, deinde traegœdiam scripsit Thyesten; Augusto iubente Virgilii mortui (a. 735) Aeneidem cum Plotio Tucca emendavit; mortuus ipse videtur ante a. 744. Praeter paucos versus nihil ex eius carminibus nobis relictum est. — *Maeonii carminis*] Homerici, a patria Homeri Smyrna, Maeoniae s. Lydiae urbe. — *alite*] cyeno, i. e. poeta, cf. Carm. IV, 2, 25. Ablativus in omnibus codi-

Quam rem cunque ferox navibus aut equis
Miles te duce gesserit.

5 Nos, Agrippa, neque haec dicere nec gravem
Pelidae stomachum cedere nescii

Nec cursus duplicis per mare Ulixei
Nec saevam Pelopis domum

Conamur tenues grandia, dum pudor
10 Imbellisque lyrae Musa potens vetat
Laudes egregii Caesaris et tuas
Culpa deterere ingeni.

Quis Martem tunica tectum adamantina
Digne scripserit aut pulvere Troico
15 Nigrum Merionen aut ope Palladis
Tydiden superis parem?

cibus legitur. Cuius constructionis exempla non apud Horatium solum sed omnino rarissima sunt. Vide tamen Epist. I, 1, 94: „curatus inaequali tonsore“ et Sat. II, 1, 84: „laudatus Caesare.“ Quare non opus est coniectura *aliti*, ut dativum habeamus pro ablat. cum praepositione *ab*. — *quam rem cunque*] de tmesi cf. I, 7, 25. I, 9, 14. I, 16, 2. I, 27, 14, et Carm. I, 17, 10. I, 21, 6. I, 28, 25. Ceterum in his scriberis *quamcunque rem miles gesserit* attractionis quoddam liberius genus est, quod sic intelligas: *scriberis et scribetur*. — *gravem Pelidae stomachum*] Exprimunt haec verba argumentum Iliadis Homericæ: *μήνιν Πηληϊάδεω Ἀχιλῆος*; eodem modo *cursus duplicis Ulixei* Odysseam significant. *Gravis* stomachus est, ut apud Homerum *ὄλομένην ἡ μύρτι Ἀχαιοῖς ἄλγε' ἔθηκεν*. — *duplicis Ulixei*] *διπλοῦς*, subdolos, versutus, *πολύτροπος*. Catull. 68, 52: „nam mihi quam dederit *duplex Amathusia* curam scitis.“ Genitivi forma a nominativo *Ulixæus*, ut Epod. 17, 16. Dorienses pronuntiabant *Ὀλλίξης*, unde Cicero semper *Ulixes*. — *saevam Pelopis domum*] Spectant haec ad Varii Thyesten, cuius argumentum sumptum fuit ex funestissima illa Pelopidarum familia, quae tragicis poetis largam scribendi materiam praebebat. Perpetua

enim caede tota domus exstincta est: Pelops socerum interfecit Oenomaum, Atreus liberos Thyestae fratris, Aegisthus et Clytaemnestra Agamemnonem, Orestes denique Aegisthum et matrem Clytaemnestram. — *tenues*] cf. Carm. IV, 2, 27—32. IV, 15, 1—4. — *deterere*] translatum a metallis.

V. 13. Caesarem et Agrippam Martis et graecorum heroum aeternam gloriam attingere et aequiparare ostendit. Tria autem nomina posuit suo more; in quibus quod Merionen reperimus, id eum non offendet qui ex carmine I, 15 Horatium non summos solum heroas, sed etiam qui summis proximam virtutem probaverint, laudare viderit. cf. Hom. II. XIII, 159 sqq. 246 sqq. 528 sqq. 567 sqq. 650 sqq. V, 59 sqq. VIII, 264. — *tunic. tect. adamant.*] est *χάλκεος ἄρης* Hom. II. V, 704. 866. Compara Homericæ epitheta *χαλκοχίτων*, *χαλκοσθώραξ*. — *nigrum*] cf. Carm. II, 1, 22. — *Tydiden*] vide Hom. II. V, 846—887. 330—352. — *sectis in iuvenes unguibus*] Bentleii coniectura *strictis* facile caremus. Animadvertendum est oxymoron *sectis acrium*, quae verba haud temere alterum in initio alterum in fine versus posita sunt. Deinde festive haec non cruenta proelia contra veras caedes et pugnas ponuntur. Ordo verborum hic est *sectis unguibus acrium in iuvenes*; quat-

Nos convivia, nos proelia virginum
 Sectis in iuvenes unguibus acrium
 Cantamus vacui sive quid urimur,
 20 Non praeter solitum leves.

CARMEN VII.

Laudabunt alii claram Rhodon aut Mytilenen
 Aut Epheson bimariseve Corinthi
 Moenia vel Baccho Thebas vel Apolline Delphos
 Insignes aut Thessala Tempe.

5 Sunt quibus unum opus est intactae Palladis urbem
 Carmine perpetuo celebrare et

tuor enim vocabula, quorum bina coniungenda sunt, ita saepe Horatius disposuit, ut alterum par primum et tertium, alterum secundum et quartum locum versus obtineret. Versus ipse caesura in duas partes dividitur; alterum verborum par in fronte; alterum in fine partium versus collocatum. Quare nihil frequentius est in pentametris elegiacis. Alia exempla supra habes v. 7. 13. — *vacui*] liberi ab amore. Adiectivum ut participium positum est: *sive vacui sumus*; sic Carm. I, 32, 6. Sat. II, 5, 11. — *quid urimur*] Accusativus adverbialis ne a pedestri quidem oratione abhorret. — *non praeter sol. leves*] Quae levitas proxime pertinet ad amorem, transfertur autem ab amore ad rationem poeticam.

Carmen VII.

Dividitur hoc carmen in tres partes, quarum prima est usque ad v. 10, altera ad v. 21, tertia usque ad v. 32. Prima parte, quae est exordium, ostenditur alios alias magnis laudibus efferre regiones et urbes; quorum iudicii medio carmine opponitur ipsius Horatii amor solitudinis et rusticae vitae, quo ut amicus quoque capiatur et a negotiis et strepitu hominum ad otium et quietem leniter perducatur sapienter et amice optatur. Tertia deinde parte Teucri exemplo exulis do-

cetur, quocunque homines ferantur aut fato agitati aut voluntate ducti, si hilaritatem et continentiam animi servaverint, beatos eos fore et reperturos quae ad vere recteque vivendum requirantur. — L. Munatius Plancus, ad quem carmen scriptum est, Caesare, apud quem pugnaverat in Gallia et Africa, mortuo varius et inconstans primum Ciceronem, deinde Antonium, tum Octavianum secutus est. Ceterum Hieronymus Chronic. p. 155: „Munatius Plancus, Ciceronis discipulus, orator habetur insignis.“ Quo tempore h. c. scriptum sit, non possumus pro certo affirmare, nisi quod veri simile videtur, tum demum potuisse scribi, cum Munatius Antonium iam reliquisset; id quod factum est a. u. c. 722. Fuerunt autem qui v. 15 in duo carmina disiungendum putarent, parum intelligentes, neutra parte totum carmen absolvi.

V. 1. *claram Rhodon*] mercatura, artibus, eloquentiae studiis. — *Mytilenen*] quam Lesbi insulae urbem Cicer. de leg. agr. II, 16 „et natura et descriptione aedificiorum et pulchritudine imprimis nobilem“ vocat. — *carmine perpetuo*] Olea Minervae sacra fuit; ea enim dea culturam et plantationem eius arboris invenisse dicebatur; Athenis certe ea cultura et vetustissima et frequentissima fuit; vid. Herod. V, 82: „*Λέγεται δὲ καὶ ὧς*

Undique decerptam fronti praeponere olivam.

Plurimus in Iunonis honorem

Aptum dicet equis Argos ditiesque Mycenae.

10 Me nec tam patiens Lacedaemon

Nec tam Larissae percussit campus opimae,

Quam domus Albuneae resonantis

Et praeceps Anio ac Tiburni lucus et uda

Mobilibus pomaria rivis.

15 Albus ut obscuro deterget nubila coelo

Saepe Notus neque parturit imbres

ἐλαῖαι ἔσαν ἄλλοθι γῆς οὐδαμοῦ
κατ' ἐκείνον τὸν χρόνον ἢ Ἀθήνησι.

Fronti praeponere est caput redimire.

Quod aliud caput potest intelligi nisi ipsorum poetarum? Dicit igitur Horatius: „Nihil antiquius habent quam Minervam eiusque urbem celebrare; quare quidquid canunt, olivam i. e. laudem Minervae quaerunt in eaque celebranda suam sibi coronam simul inveniunt; nusquam ne in alienissimis quidem rebus abstinere a laude Athenarum.“ Iroñiae aliquid in his verbis inest. Alii carmen *perpetuum* epicum esse voluerunt, ut apud Ovid. Met. I, 4. — *et*] in fine versus collocata particula saepe apud Horatium etiam in lyricis: Carm. I, 3, 19. I, 7, 6. I, 9, 13. I, 35, 11. II, 6, 1. 2. II, 13, 23. II, 16, 47. al. cf. ad Carm. I, 3, 38. Habet autem haec particula h. l. facultatem quam dicimus consecutivam: *et inde*; cuius usus apud Horatium haec addo exempla: I, 16, 24. I, 17, 2. 27. I, 29, 2. I, 30, 2. H, 2, 11. 15. II, 3, 19. 27. II, 6, 18. II, 18, 24. III, 1, 1. III, 3, 35. 71. III, 6, 42. II, 11, 11. 51. III, 15, 6. IV, 7, 21. IV, 13, 10. — *Plurimus*] Singularis cum audacia quadam collocatus est: cum enim Romani dicerent *multus hostis, multus pedes, multa canis* (Hor. Ep. 2, 31), hoc quoque ausus est, ut adiectivum etiam substantivi auxilio destitutum eadem ratione inferret. Deinde ne hoc quidem *in honorem alicuius dicere* vulgare est, quamquam non sine exemplo, veluti Quintil. XI, 2, 12 *in honorem victoriae*. — *aptum equis ἐπιπορόφον, ἐπόροτον*, Homericum epitheton; sic *dites Mycenae* ex Hom. II,

VII, 180 βασιλῆα πολυχρόσοιο Μυκῆνης. — *patiens Lacedaemon*] propter morum disciplinam et severas Lycurgi leges. Horatius prisca tempora respexit, ut, cum sua aetate et equestris gloria Argivorum et divitiae Mycenarum et patientia Lacedaemoniorum iam diuturna oblivione premerentur, quam inanis tunc esset earum urbium nimia laudatio, ipsis epithetis dilucide ostenderet. — *Larissae*] Thesaliae urbis ager fertilissimus erat. Hom. II, II, 841 Λάρισσα ἐριβόλαξ. — *percussit*] graviter movit.

A. 12. *domus Albuneae*] Praestantiam et amoenitatem agri Tiburtini, in quo et Horatius saepe commorabatur et Munatius villam habuit (v. 21), non sine magno patriae terrae amore ita describit, ut omni ratione cum Graeciae nobilissimis et pulcherrimis locis certare Italiam posse demonstraret. Albunea est Sibylla, quae Tiburi ut dea colebatur; de cuius antro, per quod Anienis flumen ingenti strepitu perfunditur, Virgilium lege Aen. VII, 82 sqq. — *praeceps Anio*] Prope Tibur Anio de alta rupe deicitur. — *Tiburni*] qui filius s. nepos Amphiarai cum fratribus Catillo et Cora Tibur oppidum condidisse fertur, cf. Cam. I, 13, 2. Virgil. Aen. VII, 671. — *Albus Notus*] vide ad Carm. I, 3, 14; cf. Carm. III, 27, 19. In hoc versu adiectiva *albus obscuro* eo consilio iuxta collocata esse apparet, ut imago quae proponitur ipso verborum certamine clariore luce collustretur. — *deterget*] a *detergeo*, antiquiore verbi forma. — *neque part. imbres*] Apud Horatium ut apud alios poetas saepe

- Perpetuo, sic tu sapiens finire memento
 Tristitiam vitaeque labores
 Molli, Plance, mero, seu te fulgentia signis
 20 Castra tenent seu densa tenebit
 Tiburis umbra tui. Teucer Salamina patremque
 Cum fugeret, tamen uda Lyaeo
 Tempora populea fertur vinxisse corona
 Sic tristes affatus amicos:
 25 Quo nos cunque feret melior fortuna parente
 Ibimus; o socii comitesque:
 Nil desperandum Teucro duce et auspice Teucro;
 Certus enim promisit Apollo,
 Ambiguum tellure nova Salamina futuram.
 30 O fortes peioraque passi

fit, ut sententia quo gravius tangat animum audientium vel legentium non tota simul pronuntietur, sed aut in partes dissecetur aut varie ipsa proponatur. Hoc alterum amplificationis genus ita variatur, ut coniunctam habeamus modo affirmantem et negantem, modo propriam et tropicam enuntiationem. Prioris generis exemplum hoc est de quo nunc agitur, quocum conferas hos locos Carm. I, 3, 12. I, 8, 10. II, 9, 10. II, 10, 19. II, 14, 22. II, 16, 3. III, 6, 26. III, 9, 6. IV, 4, 31. Qua re fieri solet, ut sententiae saepe causales et consecutivae non iis, quibus in oratione utendum est particulis, adiciantur, sed his *et, que, nec, neque* simpliciter addantur.

V. 17. *sapiens*] vide ad I, 2, 45. — *molli mero*] Vinum vetustum molle, recens austerum est. Hoc tamen loco adi. *molli* per quandam prolepsin positum est, quoniam vini sapienti usu „mordaces diffugiunt sollicitudines.“ (Carm. I, 18, 4.) — *tenebit*] Praeterea quod ipsa eiusdem verbi repetitio gravis est (quae quidem gravitas locis quos verbum in versu occupavit etiam augetur), futurum tempus Munatio quid faciendum sit leniter suadet. — *Teucer*] Telamon Aiaci et Teucro filiis ad Troianum bellum proficiscentibus eam imposuit legem, ut

alter alterum tutaretur neve alter sine altero rediret. Ajax cum in certamine de armis Achillis Ulixi esset posthabitus, manum sibi ipse intulit; quare Teucer redux a patre non est acceptus. Quo facto is Salamine insula relicta Cyprum profectus alteram ibi urbem patriae cognominem condidit. — *Lyaeo*] Baccho, vino. Quod nomen cur in hac sententia aptissimum visum sit, facile intelligetur. — *uda*] sunt calida, exhilarata. — *populea*] Populus Herculi sacra est. Qui itinera faciebant, sacrificabant τῷ ἡγεμόνι Ἡρακλεῖ. Xen. An. VI, 3, 24.

V. 27. *Teucro duce*] Teuceri nomen post caesuram et in fine versus collocatum audientium legentiumve animos ad se convertit. Ceterum haec ex usu Romano ad Graecum hominem translata sunt. Cf. Liv. VI, 12, 6: „Camilli ductu atque auspicio accisae res erant“ et saepe. Poeta concretum quod vocant posuit pro abstracto nomine. — *peioraque passi*] cf. Cic. Tusc. V, 37, ubi huius Teuceri vocis mentio fit. Virg. Aen. I, 198. — *Ambiguum*] ut *falsus, simulatus* apud Virgilium Aen. III, 302. 349. Ambiguum erit, si quis in posterum Salaminis meminerit, utram velit indicare, in sinu Saronico an in insula Cypro.

Mecum saepe viri, nunc vino pellite curas;
Cras ingens iterabimus aequor.

CARMEN VIII.

Lydia, dic, per omnes
Te deos oro, Sybarin cur properas amando
Perdere? cur apricum
Oderit campum, patiens pulveris atque solis?
5 Cur neque militaris
Inter aequales equitat, Gallica nec lupatis
Temperat ora frenis?
Cur timet flavum Tiberim tangere? Cur olivum
Sanguine viperino
10 Cautius vitat neque iam livida gestat armis
Brachia, saepe disco,
Saepe trans finem iaculo nobilis expedito?
Quid latet, ut marinae
Filium dicunt Thetidis sub lacrimosa Troiae

Carmen VIII.

Castigatur iuvenis Romanus, quod Lydiae amore et illecebris tantopere se irretiri passus est, ut neglectis omnibus ingenuo adolescente dignis artibus et exercitationibus iam lateat apud mulierculam ipse effeminatus ac molli. Quam rem artificiose ita instituit Horatius, ut non ipsum iuvenem tangeret, sed continuis interrogationibus in Lydiam inveheretur; totum enim carmen interrogando conficitur. Incertum est, quae Lydia, quis Sybaris fuerit. Ipsa autem nomina molliem indicant. De tempore inane est aliquid suspicari.

V. 4. *campum*] Martium, solis aestui maxime expositum. — *patiens pulv.*] cum antea *patiens* pulveris et solis fuerit. Tum recensentur diversa gymniorum ludorum genera, quibus iuvenes

Romani in campo exercebantur. — *militaris*] more militari. — *lupatis frenis*] frenis asperimis: dicta autem lupata a lupinis dentibus, quos forma imitabantur. — *Gallica ora*] Gallicos equos feroces et celeres, quos multos ex Gallia petiisse Romanos constat. — *nec*] Haec quoque particula ut cognata et postponitur a poetis, cf. Carm. III, 18, 6. IV, 5, 14. — *olivum*] Luctaturi oleo ungebantur, ne facile teneri possent ab adversariis. — *livida armis brachia*] Ut crura compedibus, brachia catenis livescunt, sic armorum, disci et iaculi, gravi pondere brachia lividas maculas trahunt. — *Filium Thetidis*] Achillem, qui a matre, ne ad Troianum bellum profectus periret, in Scyrum insulam ad Lycomedem regem missus est, ubi inter filias regis muliebri veste tectus latuit, donec Ulixis dolo, captus virum se esse prodidit.

15 Funera, ne virilis

Cultus in caedem et Lycias proriperet catervas?

CARMEN IX.

Vides, ut alta stet nive candidum

Soracte nec iam sustineant onus

Silvae laborantes geluque

Flumina constiterint acuto.

5 Dissolve frigus ligna super foco

Large reponens, atque benignius

Ovid. Met. XIII, 163 sqq. — *Lycias catervas*] Lycii Troianorum socii fuerunt Sarpedone et Glaucō ducibus. Hom. II. II, 876. De particula *et* vide ad I, 3, 19.

Carmen IX.

Olim cum Horatius cum aliis aetate et animo coniunctis iuvenibus hilariter epularetur, forte factum esse videtur, ut gratae sodalium nugae et colloquia ad serias res, ad reipublicae tristēm condicionem et ad futurarum rerum miseram expectationem aberrarent. Quod cum aegre ferret Horatius, subito surgit et alloquitur thaliarchum i. e. magistrum coenae, ut quibus tunc maxime opus esset rebus maiorem curam adhiberet. Iam cum frigore omnia contracta rigerent, cumque convivae ita accumberent, ut ex triclinio Soracte montem in finibus Faliscorum nive et glacie tectum conspicerent: „vides, inquit, quando nunc frigore premamur; huic igitur rei ligno largius ad focum apposito consulas; vides etiam, quam nunc tristibus sententiis etiam animi adstringantur, quibus aequè providendum est vini copia liberaliter aucta. Reliqua omnia qualiacunque sunt nunc nos mittamus, fruamur quibus possumus frui, amoribus, saltationibus, lusi-
bus. Nam quae reliqua sunt etiamsi omnia ex voluntate non cedant, tamen res nostrae curae sunt diis, qui ut

tempestates sereno coelo mitigare solent, sic quibus nos movemur curis eas quoque delebunt.“ Aliis *Thaliarchus* est fictum nomen sodalis alicuius. Imitatus est Horatius *Alcaeum* (Schneidewin Del. p. 273): „Τει μὲν ὁ Ζεὺς, ἐκ δ' ὄρανῳ μέγας Χειμῶν, πεπύγασιν δ' ὕδατων ῥοαί. Κάββαλλε τὸν χειμῶν', ἐπὶ μὲν τιθεῖς Πῦρ, ἐν δὲ κίονας οἶνον ἀφειδέως Μελιχρόν, αὐτὰρ ἀμφὶ νόσση Μαλθακὸν ἀμφιτίθει] γνόφαλλον.“ — Totius carminis natura suadere videtur, ut carmen haud ita multo post proelium Philippense scriptum esse credamus, eodem fere tempore quo Epod. 13, quod carmen huic et re et verbis simillimum est.

V. 1. *stet*] Stare res apud poetas dicuntur, quae ita operta et oppleta sunt ut moveri iam non possint. cf. Virg. Aen. VI, 300. XII, 408; quod ad inanimatas quoque res hoc verbum transfertur, id noli mirari, quoniam poetis ubique motus est et vita. — Particula *ut* cum sequitur verbum *videndi*, similia, quae eius ope adiungitur sententia non pro obiecto est quod vocamus, sed describitur qua ratione fiat. Horatiana exempla alia sunt Carm. I, 14, 3. III, 10, 7. III, 4, 17. 42. III, 7, 13. — *laborantes*] cf. Carm. II, 9, 7. Hoc quoque ex studio poetarum inanimatis quoque rebus vitam et sensus tribuendi. — *reponens*] per

- Deprome quadrimum Sabina,
 O thaliarche, merum diota.
 Permite divis cetera, qui simul
 10 Stravere ventos aequore fervido
 Deproeliantes, nec cupressi
 Nec veteres agitantur orni.
 Quid sit futurum cras, fuge quaerere et
 Quem Fors dierum cunque dabit lucro
 15 Appone, nec dulces amores
 Sperne puer neque tu choreas,
 Donec virenti canities abest
 Morosa. Nunc et campus et areae
 Lenesque sub noctem susurri
 20 Composita repetantur hora,
 Nunc et latentis proditor intimo
 Gratus puellae risus ab angulò
 Pignusque dereptum lacertis
 Aut digito male pertinaci.

servos. — *deprome Sabina diota*] Diota vasculum est duas aures (*diota*) habens, utrimque ansatum, in quo vinum condebatur. Sabina autem appellatur propter vinum quod in ea conservatur Sabinum, non nobile quidem sed non vilissimum. — *simul*] vide ad Carm. I, 4, 17. — *stravere*] Ventos sternere poeticum est; in oratione dicimus *compescere*, *sedare*. — *fuge quaerere*] vide supra ad Carm. I, 1, 8. — *Fors*] Alii *sors*, sed *sors* eventus est, non ipsa vis fati. Catull. 64, 169 „saeva Fors etiam nostris invidit questibus aures.“ — *puer*] donec puer es; vide ad Carm. I, 6, 19. — *neque tu*] Pronomen *tu* in arsi positum auget adhortationis vim. cf. Epist. 1, 2, 63.

V. 18. *areae*] loca publica ad templa fere sita, in quibus conveniebat iuventus et deambulabat. — *repetantur*] iterum atque iterum quaerantur. — *nunc et latentis*] Describitur lusus amantium, quo puella in angulo aliquo domus latens velle quidem se fallere ama-

torem simulat, sed dulci risu ipsa curat, ut celeriter reperiat, deinde amator armillam vel anulum reluctanti quidem sed vinci cupienti aufert. In vv. 21. 22. animadvertendus est admirabilis verborum ordo, quo quae mixta et perturbata videntur, versuum tamen locis, in quibus quae coniungenda sunt verba collocata habemus, clarissima luce illustrantur. Nam trinorum parium nominum (*latentis puellae*, *proditor risus*, *intimo angulo*) tria superiora (*latentis proditor intimo*) eosdem locos obtinuerunt in v. 21, quos tria inferiora (*puellae*, *risus*, *angulo*) in v. 22 occuparunt; *latentis puellae* in arsis et caesuris, *proditor risus* in initiis sunt alterarum partium versuum, *intimo angulo* versus claudunt. Et sic quoque habes certum ordinem

1.	2.	3.	4.	5.	6.
lat.	prod.	int.	puell.	ris.	ang.

Cum qua re conferas adnot. ad Carm. III, 11, 26 sq. — *male*] non admodum.

CARMEN X.

Mercuri, facunde nepos Atlantis,
Qui feros cultus hominum recentum
Voce formasti catus et decorae

More palaestrae,

5 Te canam, magni Iovis et deorum
Nuntium curvaeque lyrae parentem,
Callidum quidquid placuit iocoso
Condere furto.

Te boves olim nisi reddidisses
10 Per dolum amotas puerum minaci
Voce dum terret, viduus pharetra
Risit Apollo.

Quin et Atridas duce te superbos
Illo dives Priamus relicto

Carmen X.

Hymnus est ad Mercurium, filium Iovis ex Maia Atlantis filia, qui cum ut graecus *Ἑρμῆς* deus esset rationis et eloquentiae, plurimum valuit et ad excolendum genus hominum et ad iungendos deos non solum inter se sed etiam cum hominibus. Nam de eloquentia sic Cicero de orat. I, 8: „Quae vis alia potuit aut dispersos homines unum in locum congregare aut a fera agrestique vita ad hunc humanum cultum civilemque deducere?“ Ea autem cultura hominum duplex est, animi et corporis; quare Mercurius non *λόγιος* solum sed etiam *ἀγώνιος* est. Deinde cum ad eloquentiam et persuadendi vim prudentia et calliditas facile accedant, fieri non potuit, quin hae quoque facultates in Mercurium transferrentur, unde et *pacifer* est, quoniam bellantium et rixantium animi eloquentiae potestate placantur et conciliantur, et *fur*, *ληϊστής* (h. Merc. 14) dicitur, quia in furtis quoque et iocis acumen maxime adiuvat. Ex hac autem Mercurii virtute intelliguntur tres strophae mediae. Tum idem deus lyram quoque invenisse dicitur, quia musica ars multum valet ad formandos hominum animos et eloquentia propinqua est

poesi. Denique Mercurius est, qui homines cum ipsa morte conciliat, ut animas ad inferos ducat et *ψυχοπομποῦ* vel *ψυχαγωγού* nomen acceperit. Qua quidem ratione perspicuum est, eloquentiae vi ac potestate omnia coniungi et placari, deos cum hominibus, homines cum inferis; quare in hac laudatione Mercurii insunt laudes eloquentiae. Tempus carminis incertum est.

V. 2. *recentum*] recens creatorum, qui fuerunt „mutum et turpe pecus“ Sat. I, 3, 100. — *decorae*] Nam ludis gymniciis corpora finguntur ad statum motumque decentiorem, politiore. — *callidum condere*] vide ad Carm. I, 1, 18. — *boves*] Apollini, qui ob confossos Cyclopes e coelo eiectus armenta Admeti, Phraeorum regis, pasceret, Mercurius puer clam boves abegisse dicitur et celasse. Quod furtum cum sensisset Apollo et puero nisi raptas reddidisset graves poenas minaretur, pharetra cum sagittis spoliatum se vidit. Inermis igitur factus non potuit non ridere. — *viduus*] poetice pro generali vocabulo *privatus*. — *Atridas*] Rem narrat Hom. II. XXIV, 336 sqq. — *superbos*] *μεγαθύμους, μεγαλήτορας*. — *Illo relicto*] Apud Horatium eius nominis duplex est forma

15 Thessalosque ignes et iniqua Troiae
Castra fefellit.

Tu pias laetis animas reponis
Sedibus virgaque levem coërces
Aurea turbam, superis deorum
20 Gratus et imis.

CARMEN XI.

Tu ne quaesieris, scire nefas, quem mihi, quem tibi
Finem di dederint, Leuconoë, nec Babylonios
Tentaris numeros. Ut melius, quidquid erit, pati!
Seu plures hiemes seu tribuit Iuppiter ultimam,

est et genus: nominativus *Illos* Carm. IV, 9, 18 feminini est generis, inde accusativus *Ilion*, id quod quamquam non ex Carm. III, 3, 37, tamen ex Epod. 14, 14 elucet; verum ablativus *Illo* cum neutrius generis sit praeter hunc locum etiam Carm. III, 19, 4. IV, 4, 53. Epod. 10, 13 (unde idem genus in quinto loco Carm. I, 15, 33 esse suspicaberis), a nominativo *Ilum* vel *Uion* (Carm. III, 3, 18 coll. 23) factus est. — *virga aurea*] ἑἰβδῶ χρυσείῃ. Hom. Od. XXIV, 1—5. — *levem turbam*] εἰδῶλα, non corpora. — *imis*] poetice pro *inferis*.

Carmen XI.

Cicero de divin. I, 1: „Chaldaei, inquit, diuturna observatione siderum scientiam putantur effecisse, ut praedici posset, quid cuique eventurum et quo quisque fato natus esset.“ Tacit. Hist. I, 22: „genus, inquit, hominum infidum, sperantibus fallax, quod in civitate postra et vetabitur semper et retinebitur.“ Cic. de divin. I, 19: „Contemnamus etiam *Babylontos* et eos qui e Caucaso coeli signa servantes *numeris* stellarum cursus et motus persequuntur.“ cf. Tuscul. disp. I, 40. Horatius quanto melius sit iis quae habeamus sapienter frui, quam inanibus doctrinis falli ac diuturnae vitae spem capere hoc parvo sed egregio

carmine Leuconoae suadere studet. De quo nomine si quae divinatio conceditur, facile opineris, consulto ita factum esse ab Horatio, ut quae clara mentis acie (λενωὸς νοῦς) praedita esset, eam imprimis non debere decipi falsis artibus ipso nomine demonstraret. Ad mulierem ideo scripsisse videtur, quia mulieres astrologis fuerunt deditissimae. De tempore unum hoc certum est, scripta esse haec hieme (v. 5).

V. 1. *scire nefas*] Cur nefas sit intelliges ex simillimo loco Carm. III, 29, 29 sqq. — *nec*] cf. ad III, 29, 6. — *quae nunc*] Nihil in hoc versu aliud quaerendum est nisi poetice aucta et amplificata notatio hiemis quae tunc erat. — *debilitat*] litus enim est „fluctifragum“ Lucret. I, 305. — *spatio brevi*] Intelliguntur haec ex simillimo loco Carm. I, 4, 15. — *vina liques*] De qua re Becker in Gallo T. II. p. 170 ed. I. „Gewöhnlich seihete man den Wein durch den saccus vinarius und das colum, eine Art Sieb oder Durchschlag von Metall mit feinen Löchern... Der saccus war ein leinener Filtrirsack, das schlechteste Mittel, da das Seihen durch Leinwand den besten Wein zur elenden vappa macht.“ cf. Hor. Sat. II, 4, 54. „Indessen wurde der saccus auch bei guten Weinen gebraucht. Man pflegte nämlich colum und saccus mit Schnee zu füllen

5 Quae nunc oppositis debilitat pumicibus mare
 Tyrrhenum, sapias, vina liques et spatio brevi
 Spem longam reseces. Dum loquimur, fugerit invida
 Aetas: carpe diem quam minimum credula postero.

CARMEN XII.

Quem virum aut herōa Iyra vel acri
 Tibia sumis celebrare, Clio?
 Quem deum? Cuius recinet iocosa

Nomen imago

5 Aut in umbrosis Heliconis oris
 Aut super Pindo gelidove in Haemo?

und darauf den Wein zu giessen, um ihn zu erfrischen.“ — *reseces*] cf. Cic. Tusc. IV, 26, 57: „Quod aiunt, nimia *reseccari* oportere, naturalia relinquere cet.“ — *carpe diem*] cf. Epist. I, 4, 13. Invida autem est aetas, quia vitae longiorem usum non concedit. In carpendo inest notio celeritatis. Martial. VII, 47, 11 „Vive velut raptō *fugitivaque* gaudia *carpe*.“

Carmen XII.

Est *ἐγκώμιον* Augusti Pindarico more compositum. Dividitur autem carmen in tres partes. Prima exordium est, ad exemplum Pindari accommodatum, per tres strophas continuatum. Altera pars novem strophas habet, in duas partes ipsa divisa; nam strophis 4. 5. 6. 7. 8 dii heroesque laudantur, quorum non potestas solum sed etiam beneficentia humano generi perspecta est. Deinde descenditur strophis 9. 10. 11. 12 ad duces et principes, atque celebratos potissimum eos reperies, qui aut gloria militari aut administrandae reipublicae scientia eminuerunt aut priscae virtutis Romanae, constantiae, paupertatis, simplicitatis exempla habebantur. Per quorum seriem poeta, postquam Marcellum quoque nominavit, in quo posita erat futurae aetatis spes et salus, pergit ad gentem Iuliam et tertiam partem carminis. Iam ad summum quasi fastigium quo voluit pervenit; adduntur

gravissimae preces pro salute Caesaris Augusti, qui qualis Iuppiter in coelo talis est in imperio Romano i. e. toto orbe terrarum, quem externos hostes, etiam remotissimos (Parthos, Indos) superaturum et internam pacem iustitia, aequitate castitateque conservaturum esse amantissimus quisque patriae sperabat. Sic haec quoque tertia pars tres strophas complectitur. Anno 730 a. u. c. carmen compositum esse verisimillimum videtur, quoniam Marcellus a. 731 adolescens mortuus est neque ante a. 729, quo anno Iuliam Augusti filiam XVII annos natus in matrimonium duxit, spem potuit excitare fore ut mortuo Augusto imperium acciperet suaeque dignitate angeret. Deinde initio a. 730 Augustus ex Gallia et Hispania, ubi gravi morbo paene oppressus erat, victis hostibus Romam rediit Ianique templum iterum clausit. Praeterea memorabilis in hac re locus est Dionis LIII, 28: „ἀφικόμενον δὲ ἐς τὴν Ρώμην ἄλλα τινὰ ἐπὶ τῇ σωτηρίᾳ καὶ ἐπὶ τῇ ἀνακομιδῇ αὐτοῦ ἐγένετο, τῷ τε Μαρκελλῷ βουλευεῖν τε ἐν τοῖς ἐστρατηγηκόσι καὶ τὴν ὑπατείαν δέκα θάττον ἔτεσιν ἤπερ ἐνενόμιστο αἰτῆσαι.“

V. 1. cf. Pind. Olymp. II, 1: „Ἀναξιοφόροι γαῖες ὕμνοι, τίνα θεὸν τίν' ἤρωα τίνα δ' ἄνδρα κελადήσομεν; — *iocosa imago*] est Echo; sic Carm. I, 20, 6—8. Romani enim proprio vocabulo carebant. — *Heliconis*] Triplex Musarum sedes; antiquissima

Unde vocalem temere insecutae

Orphea silvae

Arte materna rapidos morantem

10 Fluminum lapsus celeresque ventos,

Blandum et auritas fidibus canoris

Ducere quercus.

Quid prius dicam solitis parentis

Laudibus, qui res hominum ac deorum,

15 Qui mare ac terras variisque mundum

Temperat horis?

Unde nil maius generatur ipso

Nec viget quidquam simile aut secundum,

Proximos illi tamen occupavit

20 Pallas honores.

Proeliis audax neque te silebo

Liber et saevis inimica virgo

Beluis nec te metuende certa

Phoebe sagitta.

25 Dicam et Alciden puerosque Ledaë,

Hunc equis, illum superare pugnis

Thraciae mons Haemus. — *Orphea*] Nota est fabula de veterum vatum, Orphei et Amphionis, non in homines solum sed in bruta animalia, etiam in inanimatas res, potestate, quae summa hic describitur et inhibito fluminum et ventorum, quibus nihil est mobilius, motu et ductis secum quercubus, quibus nihil est durius neque quidquam firmiores in terra radices agit. — *quercus*] Species poetarum more subiungitur generi, ut Ep. I, 12, 7. Quod qui aegre ferrent, Horatium corrigere ausi sunt, ut *Sanadonius*, qui non *silvae*, sed *rupes*, Peerlkampius, qui *cautes* scribendum censuit. — *solitis parentis laudibus*] nam „a Iove principium“ (Virgil. Bucol. 3, 60) cum in omnibus rebus tum in carminibus. Ad ea quae insequuntur confer Carm. III, 4, 45 sqq. — *mundum*] coelum; ut haec tria, terra mare coelum, totam rerum naturam coniungant. — *horis*]

anni temporibus, ut A. P. 302. — *unde*] vide ad Carm. II, 12, 7. — *proximos*] Iuppiter ita maximus est, ut nullus deorum cum eo possit comparari, quamquam Minerva proximum quidem sed longo intervallo distantem locum obtinuit. Virgil. Aen. V, 320. Martial. XII, 8, 1: „Terrarum dea gentiumque Roma, Cui *par est nihil et nihil secundum*.“ De Minervae dignitate cf. Plat. Symp. 2. p. 617. C: „ἡ δὲ Ἀθηνᾶ φαίνεται τὸν πλησίον ἀεὶ τοῦ Διὸς τόπον ἔχουσα.“ — *proeliis audax*] cf. Carm. II, 19, 21 sqq. — *virgo*] Diana, quae cum fratre Apolline iniurias hominum ulciscitur et Romano populo, praecipue Iuliae genti, favet. cf. IV, 6. — *Alciden*] Est „vagus Hercules,“ qui orbem terrarum usque ad extremas oras pervagans noxias beluas et feros homines enecuit. — *Ledaë*] filii sunt Castor et Pollux. — *hunc equis illum*] cf. Hom.

Nobilem; quorum simul alba nautis
Stella refulsit,

Defluit saxis agitatus humor,
30 Concidunt venti fugiuntque nubes,
Et minax, quod sic voluere, ponto
Unda recumbit.

Romulum post hos prius, an quietum
Pompili regnum memorem, an superbos
35 Tarquini fascēs, dubito, an Catonis
Nobile letum.

Regulum et Scauros animaeque magnae
Prodigum Paulum superante Poeno
Gratus insigni referam Camena
40 Fabriciumque:

Hunc et incomptis Curium capillis
Utilem bello tulit et Camillum
Saeva paupertas et avitus apto
Cum lare fundus.

45 Crescit occulto velut arbor aevo

Il. III, 237. Hor. Sat. II, 1, 26. — *alba stella*] Vide ad Carm. I, 3, 2. — *quod sic*] Alii *di sic, nam sic*, ex corruptione codicum et glossematis. — *ponto recumbit*] Poeta hoc verbum ita cum dativo coniunxit, ut *incumbere* in pedestri oratione. cf. Virg. Georg. I, 401.

V. 33. De Romulo et Numa lege Livium I, 21 fin. — *Tarquini*] Est Tarquinius Superbus, de quo Cic. Phil. III, 4: „Quasi vero ille rem Romanam, a Romulo primum conditam, a Numa Pompilio legibus institutisque temperatam non omnium regum maxime auxerit et amplificaverit, qui ut Cato libertate, ita ipse regno dignissimus fuit.“ — *nobile letum*] Catonis Uticensis, cuius qui putet mentionem fieri non debuisse in carmine ad Augustum laudandum scripto, falsum is iudicium facit de Horatii ingenio ac moribus. Et cf. Cic. de off. I, 31. Facile igitur carebimus Bentleii coniectura *Anne*

Curti. — *Scauros*] Cicero pro Font. 7: „Equem hominem vidimus, equem vere commemorare possumus parem consilio, gravitate, constantia, ceteris virtutibus, honoris ingenii rerum gestarum ornamentis M. Aemilio Scauro fuisse?“ Is fuit consul a. u. c. 638, censor, princeps senatus; cuius filius quoque nobilis fuit in civitate. — *animae prodigum*] vide Zumpt. gr. lat. §. 437. — *insigni Camena*] quia insignem reddit et malum hominem et bonum. — *incomptis capillis*] Prisci Romani barbati erant et intonsi (cf. Carm. II, 15, 11); anno demum u. c. 454 coepti sunt tonderi et comi. Laudatur igitur simplicitas cultus cum severitate morum coniuncta. — *saeva paupertas*] dura, quae mollitiem et luxuriam excludit; de qua *saevi* adiect. significatione cf. Epist. I, 18, 13. 54. De re vide Carm. II, 15, 13 sqq.

V. 45. *occulto aevo*] sensim, ut incrementa temporis vix animadvertant-

Fama Marcelli; micat inter omnes

Iulium sidus velut inter ignes

Luna minores.

Gentis humanae pater atque custos,

50 Orte Saturno, tibi cura magni

Caesaris fatis data; tu secundo

Caesare regnes.

Ille seu Parthos Latio imminentes

Egerit iusto domitos triumpho,

55 Sive subiectos Orientis orae

Seras et Indos,

Te minor latum reget aequus orbem;

Tu gravi curru quatiens Olympum,

Tu parum castis inimica mittes

60 Fulmina lucis.

CARMEN XIII.

Cum tu, Lydia, Telephi

Cervicem roseam, cerea Telephi

tur. — *Marcelli*] Non intelligendus Marcellus victor apud Nolam, sed adolescens Marcellus, Augusti totiusque civitatis deliciae. Nam ea de arbore sensim crescente imago quid pertinet ad hominem dudum mortuum? Quae imago quam sit usitata apud antiquos, iam Homerus ostendit II. XVII, 53. XVIII, 56. 437. — *Iulium sidus*] tota gens Iulia, quamquam non potest negari C. Iulium Caesarem maxime illustrari; quo interfecto stella crinita per septem noctes conspiciebatur. Credebant Caesaris animam in coelum sic evolavisse. Virg. Bucol. 9, 47. Ovid. Met. XV, 845 sqq. — *Luna*] cf. Sapph. fragm. 3. Neue: „*Ἀστέρες μὲν ἀμφὶ καλὰν σελεύαν Ἄψ ἀποκρύπτοισι φαιρὸν εἶδος, Ὀππότε ἂν πλήθοισι μάλιστ᾽ ἀμύγη Γᾶν [ἐπὶ ἄσσαν]*.“ — *fatis*] Tacit. Agric. 13 „monstratus fatis Vespasianus“; pro *a fatis*. — *secundo Caesare regnes*] Ovid. Met. XV, 858. — *Latio*] imperio Romano.

— *subiectos Orientis orae*] in ultimis Orientis oris habitantes, ut Virg. Georg. III, 381. — *te minor*] cf. Carm. III, 5, 1 sqq. Ovid. Met. XV, 858 „Iuppiter arces Temperat aethereas et mundi regna triformis; Terra sub Augusto; pater est et rector uterque.“ — *latum*] Alii ex codd. *laetum*, minus recte, opinor. — *gravi curru*] eum tonat et fulminat.

Carmen XIII.

Caput huius carminis hoc est, in amore nihil maius esse fide et constantia. Cui quidem sententiae haec quasi fabula subiecta est. Amat poeta Lydiam, Lydia Telephum; quem cum illa semper in ore habeat nec desinat propter pulchritudinem laudare, poetae invidia et ira incenditur. Incertum est, quo sit tempore compositum carmen.

V. 1. *Telephi*] fictum est nomen; cuius quidem egregia iteratio imitatur

- Laudas brachia, vae meum
 Fervens difficili bile tumet iecur.
 5 Tum nec mens mihi nec color
 Certa sede manent, humor et in genas
 Furtim labitur arguens
 Quam lentis penitus macerer ignibus.
 Uror, seu tibi candidos
 10 Turparunt humeros immodicae mero
 Rixae, sive puer furens
 Impressit memorem dente labris notam.
 Non, si me satis audias,
 Speres perpetuum dulcia barbarea
 15 Laedentem oscula, quae Venus
 Quinta parte sui nectaris imbuit.
 Felices ter et amplius,
 Quos irrupta tenet copula nec malis
 Divulsus querimoniis
 20 Suprema citius solvet amor die.

CARMEN XIV.

O navis, referent in mare te novi
 Fluctus? O quid agis? Fortiter occupa

Lydiae frequentem eius nominis commemorationem. — *cerea brachia*] candida ut cera alba. — *iecur*] ex opinione veterum in iecore sunt cupiditates. cf. Sat. I, 9, 66. Carm. IV, 1, 12. — *nec mens nec color*] „cum nesciam quid potissimum faciam, fluctuatio mentis colore etiam proditur oris.“ — *manent*] Pluralis numerus auctoritate codicum probatur; sed vide Zumpt. gr. lat. §. 374. Quibus singularis *manet* placet, iis brevis syllaba caesurae vi excusanda est; cf. II, 13, 16. III, 16, 26. — *humor*] cf. Carm. IV, 1, 34. — *furtim*] ut neque ipse sciam neque possim retinere. — *lentis ignibus*] de occulta vi amoris paulatim sed certe conficientis. — *turparunt humeros*] Iracundus enim est Telephus. cf. Carm. I, 17, 25 sqq. — *quinta parte*

sui nectaris] Ibycus (Schneidewin. p. 127) mel *ἐννατον μέρος τῆς ἀμβροσίας* appellavit; itaque basia Lydiae duplam mellis dulcedinem continere videbantur. Schol. Pind. ad Pyth. θ, 116: „τὸ μέλι τῆς ἀθανασίας δέναντον μέρος ᾧ ἠθήσαν εἶναι.“ — *felices ter et amplius*] Sic graece *τρίς μάκαρες, τρίς ὀλβιοι* et apud alios poetas latinos *terque quaterque beatus*. — *irrupta*] vide ad Carm. I, 5, 8. — *suprema die*] Rarior constructio pro: citius quam suprema die.

Carmen XIV.

De hoc carmine memorabilis locus est Quintiliani inst. orat. VIII, 6, 44: „At ἀλληγορία, quam inversionem interpretantur, aliud verbis aliud sensu

Portum. Nonne vides, ut
Nudum remigio latus

5 Et malus celeri saucius Africo

Antennaeque gemant ac sine funibus

Vix durare carinae

Possint imperiosius

Aequor? Non tibi sunt integra lintea,

10 Non di, quos iterum pressa voces malo.

Quamvis Pontica pinus,

Silvae filia nobilis,

ostendit, etiam interdum contrarium. Prius ut: *O navis referent in mare te novi fluctus — portum*; totusque ille Horatii locus, quo navem pro republica, fluctuum tempestates pro bellis civilibus, portum pro pace atque concordia dicit. Quae carminis interpretatio ut verissima est, ita cavendum est ne ad singulas et minimas partes perducatur. Potuit enim Horatius ea reipublicae et navis comparatione, quae vix ulla magis fuit opportuna ac frequens, uti neque tamen comparationis locos omnes colligere aut anxie conservare. Quare hoc unum quaeritur, quemnam reipublicae incertum statum Horatius sic voluerit describere quove carmen anno scriptum arbitremur. Illud certum est, significari tempus aliquod, quo imperium Romanum superioribus bellis vehementer turbatum et prope disiectum, dein feliciter pacatum et servatum novis periculis audacter obiectum sit. Quare alii annum 714, quo Perusinum, alii probabilius 723, quo Actiacum bellum parabatur, indicari dixerunt. Et apertum quidem est cur respublica nuper taedio fuerit (vv. 17. 18) Horatio; scilicet ipse ante fuerat in exercitu Bruti neque vero quam speraverat salutem civitatis invenerat; deinde Romam reversus intelligere coeperat nullam salutis spem esse nisi in Octaviano. Tunc igitur desiit desperare, cum spe rediit desiderium, cum desiderio metus ne renovatis bellis quae restituta essent denuo dilaberentur.

V. 1. *referent fluctus*] Fuerunt qui interrogari haec negarent; sed praestat interrogatio, quae habet indignationem

ac metum. Observabatur fortasse Horatio Alcaeï carmen, cuius fragmentum est (Schneidewin. p. 266): „[Ορῆς] ἀσυννέτην (ἀσυννέτους εἶναι τοὺς πολίτας) καὶ τῶν ἀνέμων στάσιν. Τὸ μὲν γὰρ ἔνθεν κύμα κυλινδεται, τὸ δ' ἔνθεν ἄμμες δ' ἂν τὸ μέσσον Ναὶ φορήμεθα σὺν μελαίνῃ Χειμῶνι μοχθεύοντες μεγάλῳ κάλῳ. Περὶ μὲν γὰρ ἄντλος ἰσοπέδαν ἔχει, Λαίφος δὲ πᾶν ξάδηνλον ἤδη, Καὶ λακίδες μεγάλαι κατ' αὐτό. Χόλαισι δ' ἄγνωραι.“ — *nonne vides ut*] vide ad Carm. I, 9, 1. *Videre* verbum h. l. generalem *intelligendi*, *percipiendi* notionem accepisse ostendit insequens verbum *gemendi*; cuius rei alterum exemplum hoc est Virgilii Aen. IV, 490. — *gemant*] Coniunctivus et auctoritate codicum et necessitate loci praefereendus est alteri modo *gemunt* et *possunt*, quem in aliis libris MSS. inesse audimus. Nam qui in eiusmodi interrogationibus indicativus modus ponitur, non ex verbi praecedentis potestate pendet, sed sui quasi iuris est; id quod nisi in certa re, ubi oratoria quaedam vis quaeritur, non potest fieri; veluti Virg. Aen. II, 739 sq. Georg. I, 56. — *sine funibus*] Cuiusvis generis funes intelliguntur, veluti quibus antennae ad malos destinantur, quibus vela panduntur, alii. — *carinae*] de una etiam nave; id quod non magis est mirandum quam quae sunt similia Virg. Aen. VII, 364 *Troianas urbes*, Ovid. Met. XIII, 196 *Iliacas arces* de una urbe et arce.

V. 10. *di*] tutelares, quorum simulacra cum ara in puppi collocabantur. — *Pontica pinus*] Pontus regio

lactes et genus et nomen inutile;
 Nil pictis timidus navita puppibus
 15 Fidit. Tu nisi ventis
 Debes ludibrium cave.
 Nuper sollicitum quae mihi taedium,
 Nunc desiderium curaque non levis,
 Interfusa nitentes
 20 Vites aequora Cycladas.

CARMEN XV.

Pastor cum traheret per freta navibus
 Idaeis Helenen perfidus hospitam,

fuit feracissima earum arborum, quae resinosa aptissimae visae sunt ad aedificandas naves. Unde mox dicitur *silva nobilis*; sic enim verba coniungenda sunt, non *filia nobilis*. Mart. XIV, 90 de mensa „silvae filia Maurae.“ — *pictis puppibus*] Naves induci solebant variis coloribus. Sententia docet, externum splendorem nihil adiuvere ubi internae vires fractae sint. — *Tu nisi ventis*] In hac sententia interpungendum non est; nam *ludibrium* vocab. ita inter duo verba positum est, ut ex frequentissima constructione ἀπὸ κοινῶν utriusque obnoxium sit; nisi ventis ludibrium debes, cave ludibrium. *Debeamus* autem ea quae fati nobis destinata sunt. Ovid. Met. XV, 444. — *taedium*] Similiter Ovid. Met. I, 654: „Tu non inventa reperta Luctus eras levior.“ — *Cycladas*] Hae insulae propterea nominantur, quia mare Aegaeum procellosum est et periculosum; deinde hoc quoque fortasse accedit, quod inter occidentalem et orientalem partem imperii situm erat; ubi utriusque partis copias inter se congressuras esse sperari potuit. — *nitentes*] ob candida longeque conspicua marmora; cf. Carm. III, 28, 14.

Carmen XV.

Argumentum huius carminis sumptum est ex fabulis Graecis de bello Troiano. Nam Horatius, quem Graecis interis multam operam navasse scimus,

cum apud Homerum reperisset Protheum vaticinari Menelao (Odys. IV, 360 sqq.), illud exemplum bene se imitaturum fortasse speravit, cum Paridem, Helenae raptorem, et Nereum, deum marinum, simili consilio componeret. Nihil enim aliud in hoc carmine quaerendum est nisi fictio quaedam poetica et exercitatio ad exempla Graeca. Alii allegoriam de Antonio et Cleopatra vident et referunt carmen ad a. u. c. 723. Media huius quoque carminis strophæ summam rei ostendit. Nam „nihil, inquit Nereus, in pugna valet forma aut cantus, quibus in thalamis mulierculae, non in campis viri vincuntur. Peribis, et tamen sero peribis.“ Ceterum Porphyrio scholiastes adnotavit, imitatum esse Horatium Bacchylidis Graeci poetae carmen, in quo Cassandra exitum belli Troiani vaticinabatur. Iam cum ex paucis Bacchylidis quae nobis sunt reliquiis certum de ea re iudicium facere non possimus, quis epicæ res lyrica ratione describi posse negabit, cum praesertim nostros quoque poetas idem saepe facere videamus? Deinde si quod caput carminis quaeras quo animus etiam hominum tangatur, Schilleri verbis nostratis apposite dicas: Das ist der Fluch oder bösen That, dass sie fortzeugend Böses muss gebären.

V. 1. *traheret*] Egregie hoc verbum positum est ut graece ἔλκειν; nam

Ingrato celeres obruit otio
Ventos ut caneret fera

5 Nereus fata: Mala ducis avi domum,
Quam multo repetet Graecia milite
Coniurata tuas rumpere nuptias
Et regnum Priami vetus.

Heu heu quantus equis, quantus adest viris
20 Sudor; quanta moves funera Dardanae
Genti! Iam galeam Pallas et aegida
Currusque et rabiem parat.

Nequidquam Veneris praesidio ferox
Pectes caesariem grataque feminis
45 Imbelli cithara carmina divides;
Nequidquam thalamo graves
Hastas et calami spicula Cnosii

etiamsi Helena sponte sua Paridem secuta esse dicitur, blanditiis tamen et mala arte rapta est; quapropter in hoc verbo et in his *perfidus hospitam* consulto sic positus et inter se quasi certantibus crimen latet et origo omnium Troiani regni calamitatum. — *ingrato otio*] ipsis ventis. cf. Virg. Aen. I, 55. — *caneret*] Cum oracula et vaticinia versibus ederentur, *canere* verbum de his proprium est; cf. Epod. 13, 11. Sat. II, 5, 58. — *Nereus*] Non est mirandum, quod hic demum Nerei nomen collocatum est; primum quidem antiquis hominibus haec nominis collocatio, quoniam qua ratione nos sententias dividimus interpositis commatis non dividebant, multo fuit facilius; deinde „non inanis lusus poeticus hic est, sed qui attenderit, sentiet sic novam simul vim accedere secundo membro. Multis vero modis curant poetae in continuata constructione ne vigor orationis decrescat, sed alatur et augeatur scite.“ Dissen. ad Tibull. II, p. 14. Nereus et omnes marini dei vaticinandi potestatem habere dicebantur; vide Virgil. Georg. IV, 392 sq. — *avi*] per metonymiam pro *omine*, cum ab avibus omnia veteres peterent, cf. Carm. III, 3, 61. Epod. 10, 1. — *multo milite*] vide ad

Carm. I, 7, 8. — *coniurata*] De re vide Virg. Aen. IV, 425; de graeca huius verbi cum infinitivo coniunctione Virgil. Georg. I, 280; etiam Sallust. Cat. 52, 24. Liv. 22, 38.

V. 9. *Heu heu*] Vates cum mentis acie quae futura sint omnia videat, ipse dolore quodam tanquam praesentium rerum corripitur. Quo fit, ut in eiusmodi locis cum animi affectione etiam orationis vis crescat. Huc spectat ter positum vocabulum *quantus*. — *moves*] Funera moveri eodem modo dicuntur quo bella Carm. IV, 1, 2. — *Dardanae genti*] pro Dardaniae. cf. Carm. saec. 47. C. IV, 5, 1. — *aegida*] v. Hom. II. II, 446 sqq. Virg. Aen. II, 616. VIII, 435. H. l. est Minervae lorica; cf. Ovid. Met. VI, 78. — *rabiem*] Haec quoque inter arma est. Similiter Ovid. Met. XIII, 543: „seque armat et instruit ira.“ — *nequidquam*] cf. Hom. II. III, 54. — *pectes caesariem*] cf. Carm. IV, 9, 13 sqq. — *carmina divides*] modo huic modo illi canes. Dativus *feminis ἀνὸ νεοῖον* positus est ad *grata* et ad *divides*. Cf. Carm. I, 36, 6. Virgil. Aen. VIII, 20, — *thalamo hastas vitab.*] cf. Hom. II. III, 380—383. VI, 321 sqq. — *Cnosii*] Cnosus urbs Cretae insulae abundabat calamo, ex

Vitabis strepitumque et celerem sequi

Aiacem: tamen heu serus adulteros

20 Crines pulvere collines.

Non Laërtiaden, exitium tuae

Gentis, non Pylum Nestora respicis?

Urgent impavidi te Salaminius

Teucer et Sthenelus sciens

25 Pugnae, sive opus est imperitare equis

Non auriga piger. Merionen quoque

Nosces. Ecce furit te reperire atrox

Tydides melior patre;

Quem tu, cervus uti vallis in altera

30 Visum parte lupum graminis immemor,

Sublimi fugies mollis anhelitu,

Non hoc pollicitus tuae.

Iracunda diem proferet Ilio

Matronisque Phrygum classis Achillei;

quo factae sagittae; inde clarissimi sagittarii Cretenses. cf. Carm. IV, 9, 17. Hom. II. II, 646.

V. 18. *celerem sequi Aiacem*] non Telamonis, sed Oilei filium. cf. Hom. II. XIV, 520. IV, 285. VII, 164. XVII, 720. — *heu serus*] quae verba noli seiungere; nam dolendum fuit, quod non prius iam periit Paris. — *crines*] Haec praestat alteri codicum lectioni *cultus* vel propter locos Homericos, quos non dubium est quin Horatius secutus sit: II. III, 55. XVI, 795. cf. Virgil. Aen. XII, 99. — *gentis*] Ex maiore parte bonorum codicum nunc genitivum praetuli dativo *genti*, Benteium secutus; etenim ingrata esset repetitio ex versu 11. — *Teucer et*] Aliae lectiones *Teucer te*, *Teucergue et* natae videntur ex versus corrigendi nimio studio; verum etiamsi in basi glyconeorum versuum soleat apud Horatium esse spondeus, non videtur expellenda Graecorum consuetudo et trochaeus, quem h. l. et infra v. 36 admisisse Horatium videmus. — *sciens pugnae*] Hom. II. V, 549 „μάχης εὖ εἰδότε πάσης. Sthenelus, Capanei filius,

auriga Diomedis. — *sive*] vide ad Carm. I, 2, 33. — *Merionen*] vide ad I, 6, 13. — *furit reperire*] vide ad Carm. I, 1, 8. — *melior patre*] cf. Hom. II. IV, 405. — *cervus*] qui ut celeritate ita ignavia insignis est. — *sublimi anhelitu*] μετεώρῳ πνεύματι; nam qui celeritate fugae paene exhaustus est, is cum tantum temporis nactus est, ut paululum possit recreari, sublimi capite spiritum trahit; sic enim pulmones expanduntur facilius et reficiuntur. — *pollicitus*] Vide quid exprobet Helena Paridi apud Homerum II. III, 430 sqq. — *diem proferet*] diem interitus differet; αἵσιμον ἡμαρ, Hom. II. VIII, 72. In his non satis congruit Horatius cum Homero; apud quem ira Achillem non ultra diem decimum septimum a certamine avocet. In qua re intelligendum est, clarissimum hoc victoriae Graecorum impedimentum consulto ex omnibus, qualiacunque acciderunt, esse electum, deinde *certas hiemes* numerandas esse non ex eo tempore quo irasci coepit Achilles Agamemnoni, sed ex primo obsidionis et certaminis initio. — *ma-*

35 Post certas hiemes uret Achaicus
Ignis Iliacas domos.

CARMEN XVI.

O matre pulchra filia pulchrior,
Quem criminosis cunque voles modum
Pones iambis, sive flamma
Sive mari libet Hadriano.

5 Non Dindymene, non adytis quatit
Mentem sacerdotum incola Pythius,

tronisque] Toti generi ea species additur, quae calamitates maxime sensit. — *Iliacas]* alii *Pergameas*; vide supra ad v. 24.

Carmen XVI.

Inscribi solet huic carmini titulus *palinodia* i. e. carmen, quo quem ante laesimus reconciliare studemus. Sic Horatius revocat contumeliosos iambos, quos in puellam aliquam olim scripsit. Recte autem ut intelligatur carminis ratio, tenendum est non raro ita fieri, ut a speciali quadam re inchoentur carmina, ascendant ad generalem sententiam, exeant in eandem rem a qua sint profecta. Summa carminis haec est: „malignos versus ut deleas opto, qua tibi cunque ratione placebit, nam ira accensus eos composui, ut nunc cum mitiore animo sim eorum me poeniteat.“ Medium carmen excusationem habet; agitur enim strophis 2 et 3 de vehementia irae, qua animi hominum perturbantur. In quo loco hoc artificiosum est, quod ut in altera strophā quattuor exemplis ostenditur, ira ardentius inflammari hominum animos quam divino numine ac furore — quo tamen nihil magis videtur movere posse mortales —, ita in tertia quattuor externae potestatis rationes afferuntur, quae iidem irae ardore superantur. Ita factum est ut quater illatae particulae *non* respondere videamus quater positum alterum *nec*. Iam quarta et media strophā proponitur qui factum sit, ut ira tantopere homines movean-

tur; scilicet est ea penitus et a prima generis origine insita humano pectori. Cui quidem rei apposite adiunguntur magna quae illam cupiditatem sequuntur mala; quibus indicatis ultro quasi relabitur Horatius ad suam iram atque ad eam quam huius carminis scribendi habuit occasionem. Sic per orbem carmen quasi decurrit neque quidquam est quod aut deesse possit aut locum mutare. Hoc tamen vix est quod dicam, plena esse omnia ironiae, maxime conspicuae in nimia irae eiusque potestatis descriptione; aliis sincere ac vere scriptum carmen videtur. Tempus incertum est; quamquam probabilius est annum ponere u. c. 717. 718, quam 725 vel 727, qua aetate Horatii animus iam alienior erat a iambis et mordacibus carminibus.

V. 2. *criminosi iambis]* Quo genere Archilochus poeta ad alios castigandos primus usus esse dicitur; vide A. P. 79. — *modum pones]* Similiter Carm. III, 15, 2. I, 24, 1. — *Dindymene]* *Δινδυμήνη*, Cybele a Dindymis, monte Phrygiae, sic dicta, a Romanis magna mater deum, mater Idaea appellata. De adytis cf. Caes. b. c. III, 105. — *sacerdotum incola Pythius]* Genitivus *sacerdotum* communis est vocabulis *mentem et incola*. Divinum enim numen sacerdotum pectora quasi intrare ac furore implere veteres credebant. cf. Ovid. Met. II, 641 „Incaluitque deo, quem clauum pectore habebat,“ — *sic]* Haec particula eadem ratione qua superior *aeque* cum inferiore *ut* coniungenda est. — *Corybantes]* sa-

- Non Liber aequae, non acuta
 Sic geminant Corybantes aera,
 Tristes ut irae, quas neque Noricus
 10 Deterret ensis nec mare naufragum
 Nec saevus ignis nec tremendo
 Iuppiter ipse ruens tumultu.
 Fertur Prometheus addere principi
 Limo coactus particulam undique
 15 Desectam et insani leonis
 Vim stomacho apposuisse nostro.
 Irae Thyesten exitio gravi
 Stravere et altis urbibus ultimae
 Stetere causae, cur perirent
 20 Funditus imprimeretque muris
 Hostile aratrum exercitus insolens.
 Compesce mentem; me quoque pectoris
 Tentavit in dulci iuventa
 Fervor et in celeres iambos
 25 Misit furem. Nunc ego mitibus

cerdotes Cybeles, etiam Curetes appellati, qui in sacris aerea cymbala pulsantes animos furore quodam insano implebant. cf. Plat. Ion. p. 533 E. — *Noricus ensis*] ferrum Noricum, quod praestantissimum habebatur, pro quovis alio poetice positum. Epod. 17, 71. — *tremendo Iupp. ipse ruens tumultu*] i. e. ruina coeli; cf. Carm. III, 3, 7, 8; sed tota elocutio ut magnifica est ita superlative prope iocosa.

V. 13. *Prometheus*] Haec de particulis undique decerptis hominiquae additis fabula si non ab ipso Horatio excogitata est, tamen nunc apud nullum reperitur Graecum poetam. Lepida autem fabulae natura mirifice congruit cum totius carminis ironia et consilio. Prometheus enim cum hominem fingere vellet, limo, quae principalis pars hominis est, undecunque sumptam materiem addidit. Scilicet cum singulis partibus ad corpus formandum assumptis venerunt etiam cu-

piditates atque occuparunt sedes, in quibus habitare eas sentimus. Sic ira a leone desumpta stomachum (Carm. I, 6, 6) sedem accepit. — *et insani*] et pro *etiam*. — *Thyesten*] cf. Cic. Tusc. IV, 36, 77 et ad Carm. I, 6, 8. — *ultimae stetere causae*] Ultimae sunt ab ipsa re remotissimae, igitur primae; deinde *stare* dicuntur, quoniam immutatae manserunt. — *hostile aratrum*] Est symbolum eversivum, cum solum, in quo urbs stetit, aratur. Hieronym. in Zachar. c. 8: „Aratum templum Hierosolymitanum in ignominiam gentis oppressae.“ — *in dulci iuventa*] Adiectivum *dulcis* supervacaneum non est; nam cum habeat excusationem locus, eam hic significari iuventutem patet qua iuvenes omnia sibi licere putent suaeque indulgeant temeritati. Similiter Carm. I, 37, 11 *dulcis est fortuna*. — *celeris iambos*] Epitheton vituperationem addit; nam ea quoque cum celeritate con-

Mutare quaero tristia, dum mihi
 Fias recantatis amica
 Opprobriis animumque reddas.

CARMEN XVII.

Velox amoenum saepe Lucretilem
 Mutat Lycaeο Faunus et igneam
 Defendit aestatem capellis
 Usque meis pluviosque ventos.
 5 Impune tutum per nemus arbutos
 Quaerunt latentes et thyma deviae
 Olentis uxores mariti,
 Nec virides metuunt colubras
 Nec Martiales Haediliae lupos;
 10 Utcunque dulci, Tyndari, fistula
 Valles et Usticae cubantis
 Levia personuere saxa.

iuncta est, quoniam consilium desideratur. — *animumque reddas*] quo olim in me eras.

Carmen XVII.

Carmen quo Tyndaridem ut ad se in villam veniat invitat, aperte in duas et aequales partes dividitur. Nam postquam superiore parte totam villam omniaque sua in tutela esse deorum ostendit neque quidquam ibi esse docuit quod cicuribus animalibus noceat, facilis est ad Tyndaridem adhortatio, ut eodem veniat, ubi ne illi quidem pericula immineant a feris hominibus, ubi ab insidiis et dolis libera amoris vacare possit et carminibus. Ex septem/strophis media et quarta diversas partes coniungit et re et verbis. Vides enim iuxta ibi posita haec *me, hic, tibi*; loci significatio in media sede collocata Horatium connectit cum Tyndaride. De tempore nihil est quod suspiceris.

V. 1. *Velox Faunus*] Latini poetae, qui Latinorum priscorum deos et sacra cum Graecis solebant componere,

Latinum Faunum cum Graeco Pane componebant; quare cum hic ὄρεϊβάτης sit, ille apud Horatium *velox* est et in Arcadia Lycaeum, Pani sacrum montem, occupavit. — *Lucretilem*] Sabinorum montem; hodie *Monte Genaro*. — *mutat*] de cuius verbi diversa constructione vide Zumpt. gr. lat. §. 456. adnot. cf. Carm. II, 16, 19. — *defendit*] vide eund. l. l. §. 469. — *usque*] id. l. l. §. 286. — *impune tutum per nemus*] Benteius cum Lambini codd. *totum*, ne bis securitas grecis indicaretur. Sed *tutum* nemus est, in quo nihil est periculi, *impune* adverbio securitatis sensus exprimitur. — *arbutos*] cf. Virg. Georg. III, 300. — *Martiales*] Marti sacri sunt lupi. Virg. Aen. IX, 566. — *Haediliae*] Sic omnes fere libri MSS. *Haedilia* mons seu vallis fuisse videtur in vicinitate villae Sabinae. Quod cum nesciretur, interpretes *haeduleae* vel *hinnuleae* scripserunt coniecturis audacissimis nunc merito reiectis. — *Tyndari*] De forma vocativi vide Zumpt. gr. lat. §. 72. cf. Carm. IV, 3, 18. — *fistula*] Fauni. Is enim sive Pan fistulae inventor.

- Di me tuentur, dis pietas mea
 Et musa cordi est. Hic tibi copia
 15 Manabit ad plenum benigno
 Ruris honorum opulenta cornu.
 Hic in reducta valle Caniculae
 Vitabis aestus et fide Teïa
 Dices laborantes in uno
 20 Penelopen vitreamque Circen.
 Hic innocentis pocula Lesbii
 Duces sub umbra, nec Semeleïus
 Cum Marte confundet Thyoneus
 Proelia, nec metues protervum
 25 Suspecta Cyrum, ne male dispari
 Incontinentes iniiciat manus
 Et scindat haerentem coronam
 Crinibus immeritamque vestem.

Virg. Bucol. 2, 32. 8, 24. — *Usticae cubantis*] leviter declivis ad speciem cubantis hominis. Tenendum tamen, Usticam non montem solum sed vallem quoque esse; de qua re dictum est in Vita Horatii. — *hic*] Per anaphorā ter repetitum vocabulum; rectius quam quod alii voluerunt *hinc* ex plerisque codd., unde nescis quam bonam sententiam elicias. In divisionibus autem anaphora propriam sedem habet; etenim tria sunt quibus Tyndaris in Sabinō gaudebit. — *copia manabit... cornu*] Qua h. l. usus est Horatius abundantia, haudquaquam est vituperanda; deinde ordo verborum minus contortus est quam videtur esse. Omnia recte inter se excipiunt nisi quod verba *benigno cornu*, ut saepe fit, in extremis locis duorum versuum posita sunt. — *ad plenum*] abundanter. Virg. Georg. II, 244. — *benigno cornu*] De cornu copiae lege Ovid. Met. IX, 85—89; eodem respexit Horatius C. S. 59. Epist. I, 12, 28. — *ruris honorum*] qui sunt flores, fruges. cf. Sat. II, 5, 12. — *fide Teïa*] lyra Anacreontis Teii, cuius tota poesis fuit amatoria. — *vitreamque Circen*] splendidam in-

star vitri et formosam, sed quae cum splendore vitri fragilitatem coniungat. cf. Sat. II, 3, 222. Carm. III, 13, 1. Alii *vitream* dictam volunt Circen ab aquae colore caeruleo, *ὑαλίνῃ*, ut IV, 2, 3, quia Circe nymp̄ha erat marina aut certe insulam incolens. Ceterum Tyndaris psalteria ex omnibus quae sciebat carminibus hoc de Ulixē, Penelope et Circe, ab ipso fortasse Anacreonte sumptum, optime cecinisse videtur, ita ut specimen artis h. l. positum sit. — *Lesbii*] vini, quod innocens appellatur, quia mite est neque iis qui eo utuntur nocet. — *duces*] non „largius bibes“, sed „bibes cum voluptate.“ cf. Carm. IV, 12, 14. — *Semeleïus Thyoneus*] Semele etiam Thyone dicebatur; itaque duo *μητρωνυμικά* coniunxit. Quorum alterum *Thyoneus* non temere appositum est; nam Thyones nomen factum esse patet a verbo *θύειν*, furere. Significatur igitur furor, in quem qui vino nimis indulgent solent conici; unde incontinentes proelia miscent. — *male dispari*] Ne male adv. cum *iniiciat* verbo coniungas confer Sat. I, 3, 31. — *immeritamque*] cf. Sat. II, 3, 7.

CARMEN XVIII.

Nullam, Vare, sacra vite prius severis arborem

Circa mite solum Tiburis et moenia Catili:

Siccis omnia nam dura deus proposuit, neque

Mordaces aliter diffugiunt sollicitudines.

5 Quis post vina gravem militiam aut pauperiem crepat?

Quis non te potius, Bacche pater, teque, decens Venus?

At ne quis modici transiliat munera Liberi,

Centaurea monet cum Lapithis rixa super mero

Carmen XVIII.

Casu quodam servatum nobis est fragmentum Alcaei, cuius verba ab Horatio primo versu reddita esse apparet. Est enim hic versus (cf. Schneidewin. del. p. 277): Μηδὲν ἄλλο φρυγέσσης πρότερον δένδρεον ἀμπέλω. Ex quo et verborum et metri consensu recte tamen nihil concludas aliud nisi Horatium hunc Alcaei versum, quem ex frequenti lectione memoria teneret, ad suam rem adhibuisse. Quae res qualis fuerit si quaeras, suspiceris Varum villam aliquam Tiburtinam novis hortis ornare arboresque ibi serere in animo habuisse. Atque ea quidem occasione ita usus est Horatius, ut de contraria vi quam in animos hominum haberet vini usus lyrica ratione scriberet. Quare carminis argumentum his Theognidis versibus (v. 509 sq. edit. Bekker.) commode reddamus:

Οἶνος πινόμενος πονὸς κακὸν
ἣν δέ τις αὐτὸν
Πίνῃ ἐπισταμένως, οὐ κακὸν ἀλλ'
ἀγαθόν.

Quis Varus fuerit, dici non potest; suspicantur quidem eundem esse Quintilium, de quo carmen est I, 24. A. P. 438. Tempus definiri nequit.

V. 2. *moenia Catili*] vide ad Carm. I, 7, 13. In hoc nomine Horatius metri causa mediam syllabam corripuit. cf. Virg. Aen. VII, 670. — *siccis*] qui vino plane abstinent. — *nam*] Poetae in collocanda hac particula liberiores fuerunt. cf. Epod. 14, 6, 17, 45. Carm. IV, 14, 9. — *neque aliter*] Non recte faceret qui voc. *aliter* ad

proxime praecedentia referens intelligeret *nisi siccitate*. Nam quae latet in voc. *aliter* condicio, ea altius repetenda est: *quodsi vites non plantas, si vino non uteris*. Simillimus est locus Ciceronis de amic. 20 *aliter amicitiae* cet. — *crepat*] in ore habet, dictitat. cf. Sat. II, 3, 33. Epist. I, 7, 84. A. P. 247. — *decens Venus*] ipsa decens est, cum comites sint decentes Gratiae. Carm. I, 4, 6. — *At ne*] In bonis libris MSS. legitur *ac*, quam ineptam hic esse particulam intelliget qui perspexerit carminis compositionem. — *Liberi*] Quattuor in hoc uno carmine nomina sunt unius dei, Bacchus, Liber, Evius, Bassareus; quorum duo in superiore parte, quae est de commodis vini, mite et benignum numen, duo in inferiore, quae est de incommodis vini, ferum respiciunt et indomitum. *Evius* enim et *Bassareus* nomina sunt petita ex orgiis etysteriis Thraciis. *Evius* a clamore bacchantium *εὐοῖ, εὐάν*, *Bassareus* a voce Thracia *Βασσάρα*, *vulpes*, cuius pellibus Bacchae utebantur.

V. 8. *Centaurea*] vide Ovid. Met. XII, 219 sqq. Hom. Od. XXI, 295 sqq. — *super mero*] Ablativus cum hac praepositione cum non coniungatur nisi ita, ut aut locus aliquis altior vel superficies quaedam, in qua quid positum sit indicetur (Carm. I, 9, 5. III, 1, 17), aut ratio alicuius rei habeatur (Carm. III, 8, 17. IV, 2, 42. C. S. 18), Ovidendorpius corrigendum putavit *super merum*. Attamen dubitationem iniicit unus certe et simillimus locus Virgilii Aen. IX, 61 „*nocte super media*.“ — *Sithoniis*] Thraciae

- Debellata, monet Sithoniis non levis Evius,
 10 Cum fas atque nefas exiguo fine libidinum
 Discernunt avidi. Non ego te, candide Bassareu,
 Invitum quatiam nec variis obsita frondibus
 Sub divum rapiam. Saeva tene cum Berecynthio
 Cornu tympana, quae subsequitur caecus amor sui
 15 Et tollens vacuum plus nimio gloria verticem
 Arcanique fides prodiga perlucidior vitro.

CARMEN XIX.

Mater saeva Cupidinum

Thebanaeque iubet me Semelae puer

populo ad Salmydesum flumen habitanti, quibus cur Evius fuerit *non levis* intelliges ex Carm. I, 27, 1 sq. — *exiguo fine libidinum*] exiguo discrimine, quod inter honestum et turpe relinquunt ii qui libidine moventur. Noli coniungere *libidinum avidi*; nam *avidi* absolute positum, ut I, 28, 18. III, 4, 58. — *candide*] formose, ob perpetuam Bacchi iuventutem. Epod. 3, 9. Carm. I, 2, 31. Ovid. Fast. 3, 772: „candide Bacche . . ipse puer semper iuvenisque videris.“ — *invitum quatiam*] Sacra et mysteria Bacchi occultissima religione continebantur; itaque dicit poeta, se Bacchi donis non male usurum, neque quae deus celari voluerit in lucem producturum. In orgiis proprie thyrsi *quatiantur*. — *saeva*] propter terribilem sonum. — *Berecynthio*] Phrygio, a Phrygiae monte Berecyntho, ubi colebatur Cybele, de qua vide ad Carm. I, 16, 5. — *amor sui*] Tria nominantur vitia ebrietatem sequentia: pravus sui amor, iactantia, loquacitas. — *verticem*] pro capite; egregie hanc summam capitis partem posuit de studio hominum quo maiores videri cupiunt quam sunt. — *fides prodiga*] *fides* appellatur *prodiga*, ut non pauca latinae et graecae linguae vocabula quae mediae sunt significationis; ita *ingenium*, *aetas*, *vires*, *δύναμις*, alia. Notissimum exemplum est apud Cicer. Rosc. Am. 4, 9. —

Horatius ed. Dillenburger ed. III.

perlucidior] Caesurae in medio vocabulo alterum exemplum est Carm. II, 12, 25 *detorquet*; uterque tamen locus veniam habebit in particulis *per* et *de*. De sententia comparari potest Epod. 11, 13. Sat. I, 4, 89.

Carmen XIX.

Argumentum carminis facile perspicitur. Poeta, qui finitos esse amores speraverat, denuo Glycerae venustate capitur et ita capitur, ut iam nihil possit nisi amorem cogitare. Quare sacris placaturum se dicit Venerem, ne nimio in se irruat impetu. — *Glycerae* nomen fictum et graecum γλυκίστρα. Suspiciantur ex nominum simili forma *Glyceram* et *Lalagen* (I, 22, 10) eandem fuisse puellam quam *Cinaram*, de qua vide IV, 13, 21. Quod si verum est, iis potius credendum erit, qui hoc carmen anno 717 vel 718 scriptum dicunt, quam aliis, qui usque ad a. 729 vel 730 descendere maluerunt. Ita iubet iudicare iuvenilis fervor, quo repletum est carmen. Cf. Carm. I, 30.

V. 1. Idem versus in simili carmine IV, 1, 5. De verbis et sententia lege Carm. I, 33, 10—12. — *Semelae puer*] Bacchus saepe Veneris comes est. Etiam *Licentia*, ut apud Claudian. Nupt. Honor. 78: „nullo constricta Licentia nodo.“ De genitivo

Et lasciva Licentia

Finitis animum reddere amoribus.

5 Urit me Glyceræ nitor

Splendentis Pario marmore purius,

Urit grata protervitas

Et vultus nimium lubricus adspici.

In me tota ruens Venus

10 Cyprum deseruit nec patitur Scythas

Et versis animosum equis

Parthum dicere nec quæ nihil attinent.

Hic vivum mihi cespitem, hic

Verbenas, pueri, ponite thuraque

15 Bimi cum patera meri:

Mactata veniet lenior hostia.

CARMEN XX.

Vile potabis modicis Sabinum

Cantharis, Graeca quod ego ipse testa

Semelae Duentzerus sic: „Genitivo in *es* Horatius non utitur. cf. Carm. I, 3, 2.“ *Orellius* et plurima pars editorum *Semeles*, quamquam altera forma antiquissimis codicibus et Cruquii et ipsius Orellii et aliorum comprobatur. Certe *ἐὺφροντα*, quam post *Thebanæ* Orellius quaerebat, nulla est. — *nitor*] pulchritudo, venustas. Carm. III, 12, 6. — *Pario marmore*] vide ad Carm. II, 18, 3. — *lubricus*] lubrica proprie est via, in qua pedem non possumus sistere; quare Glyceræ oculi lubrici sunt, quibus adspiciendis periculum est ne quivis amore incendatur. — *Cyprum*] cf. Carm. I, 3, 1. — *Scythas*] Scythæ et Parthi, publica Romanorum cura, nihil movent hominem, qui nihil nisi amorem cogitat. Ceterum neque Scythæ neque Parthi ob singulare aliquod factum nominantur; omnino remoti sunt hostes, et magis etiam remoti sunt ab animo et cura invenis uni amoris dediti. — *versis animosum equis*] cf. Carm. II, 13, 17. — *cespitem*] ad exstruendam aram.

cf. Carm. III, 8, 4. — *verbenas*] herbas puras ex loco sacro collectas. Cf. Carm. IV, 11, 6 sqq. Virg. Aen. XII, 120. ad q. l. Servius: „Verbenas iam vocamus omnes frondes sacratas, ut est laurus, oliva vel myrtus.“ — *hostia*] Tacit. Hist. 2, 3: Paphiæ Veneri „hostiæ, ut quisque vovit, sed mares deliguntur. Sanguinem aræ offundere vetitum; precibus et igne puro altaria adolentur.“

Carmen XX.

Parvum hoc carmen videtur inscriptum olim fuisse tabellis, quibus Horatius amicum suum Maecenatem ad convivium invitaret. Totum autem iocosum est et familiare et spirat dulcissimam et intimam amicitiam. Nam quod propositurus Maecenati erat Horatius vinum, vile quidem fuit sed multis nominibus carum illi et acceptum. Et primum quidem Sabinum fuit, natum in villa a Maecenate olim dono data Horatio, deinde ab Horatio

Conditum levi, datus in theatro

Cum tibi plausus,

5 Care Maecenas eques, ut paterni

Fluminis ripae simul et iocosa

Redderet laudes tibi Vaticani

Montis imago.

Caecubum et prelo domitam Caleno

10 Tu bibes uvam: mea nec Falernae

ipso conditum, tum eo ipso tempore conditum, quo Maecenas in theatro publicum honoris ac dignitatis testimonium accepit. Haec autem laeta populi acclamatio si eadem est, cuius Carm. II, 17, 25 sq. mentio fit, ostendit simul quo anno ortum sit hoc carmen. Illam enim factam esse eodem anno constat, quo Horatius cadente arbore paene necatus est (vide ad Carmen II, 13). Vile autem vinum quod appellatur, haud dubie recens fuit, fortasse bimum vel trimum; quadrimum etiam Carm. I, 9, 7 bibitur; quamquam Italica vina, natura austera, vetustate debebant mollescere.

V. 1. *vile Sabinum*] Omne Sabinum vinum haud magni habitum est a Romanis, recens minimi. Unde Martialis, X, 49, 3: „Propinas modo conditum Sabinum, Et dicis mihi, Cotta: vis in auro? Quisquam plumbea vina vult in auro?“ — *modicis cantharis*] Canthari maius genus poculorum, quo in laetis occasionibus utebantur; quare iocosum est, quod dixit *modicis cantharis*; in qua coniunctione inest quoddam verborum certamen, non intellectum ab iis, qui vel de poculis cogitarent *non pretiosis* vel ab Horatii tenui domo omnem profusionem afuisse severo vultu docerent. — *graeca testa*] amphora graeco vino prius imbuta, quo melius fieret vinum Sabinum. — *levi*] Amphorae, argilla vel vitro factae, cortice clauderentur ac deinde gypsabantur, ne posset aer intrare. Inscribebatur nomen consulis, quo anno natum erat vinum; vitreis amphoris addebantur tesserae, pittacia consulum nominibus inscripta. — *care*] Sic in omnibus codicibus, nisi quod Bentleyus in uno invenit *clare*. Illud autem familiaritatem qua erat Hora-

tius cum Maecenate h. l. maxime decet. — *eques*] Equestri ordine quonatus erat contentus Maecenas non captavit maiores honores; quae modestia magnam gratiam ei apud populum paravit. cf. Carm. III, 16, 20. — *datus*] omisso v. est cf. Carm. I, 12, 7. II, 7, 11. Sat. I, 10, 33. — *paterni fluminis*] Tiberis, qui ab Etruria fluit. In quo fluminis epitheto blandum est indicium, patriam quoque Etruriam de virtute Maecenatis gavisam cum populo Romano coniunctum edidisse plausum; cum qua re consentit Vaticani montis ad dextram fluminis ripae siti commemoratio. Unde simul intelligitur tam laete acceptum esse Maecenatem in theatro Pompeii e regione Vaticani montis sito. *Vaticani* „nominis secundam syllabam Horatius corripuit, non, ut inepte dicit Orellius quod id a vaticiniis repeteret, sed quia vulgo ita dicebant: postea Martialis et Iuvenalis eandem syllabam extenderunt.“ Lachm. ad Lucret. p. 37. — *imago*] vide ad Carm. I, 12, 3. — *Caecubum*] Iam quattuor nobilissimi vini genera nominantur. *Cales*, Campaniae oppidum, hodie *Calvi*; *ager Falernus* ad radices Massici montis in Campania, *Formiae* Latii municipium in Auruncis prope Caietam, hodie *Mola di Gaëta*. — *tu bibes*] Hic futuri temporis usus non multum differt a coniunctivo quem dicunt potentialem; sic enim imprimis poetae indicant quae quominus possint fieri nihil est quod impediatur. Sic Carm. II, 12, 10. Abstinendum igitur a coniecturis *tum bibes, non bibes*. — *temperant*] Epod. 17, 80. Audacter hoc dictum est *colles temperant*, sed recte, quoniam *colles* vinum dare eodem iure dici possunt quo vites.

Temperant vites neque Formiani
Pocula colles.

CARMEN XXI.

Dianam tenerae dicite virgines,
Intonsum pueri dicite Cynthium
Latonamque supremo
Dilectam penitus Iovi.

5 Vos laetam fluviis et nemorum coma,
Quaecunque aut gelido prominet Algido
Nigris aut Erymanthi
Silvis aut viridis Cragi;

Carmen XXI.

Octavianus ab Actio victor reversus in honorem Apollinis, cui victoriam se debere putaret, ludos Actiacos primum a. 726 celebravit. Iam cum tota huius carminis ratio ad ludos in honorem Apollinis et Dianae habitos pertineat, ad indicendos et celebrandos eos ludos Horatium haec cecinisse credibile est. Cum qua re hoc egregie consentit, quod eodem anno Octavianus expeditiones parabat in Britannos et Arabes. Ita tamen carmen comparatum non est, ut credas chorum in ipsa ludorum sollenni pompa ita ceci-

nisse. Animadvertendum est, quanta arte Horatius et in componendis collocandisque deorum dearumque nominibus et laudibus et in aequalitate ac similitudine vocabulorum ipsorumque versuum versatus sit. Prima stropha totam quasi familiam coniungit (filiam, filium, matrem, patrem; hunc tamen, Iovem, non ipsum celebrat, sed in eo celebrationis causam invenit); deinde stropha secunda filiam laudat, tertia filium, eodem quo ante ordine, et quia de Apolline, qui vere est *Ἀεγληναιος*, plura est dicturus. Tum compara hos versus:

V. 1.	Dianam	tenerae	dicite	virgines
V. 2.	Intonsum	pueri	dicite	Cynthium
V. 3.	Latonamque	supremo		
V. 11.	Insignemque	pharetra		
V. 4.	Dilectam	penitus	Iovi	
V. 12.	Fraterna	que humerum	lyra	
V. 5.	Vos	laetam	fluviis	et nemorum coma
V. 13.	Hic	bellum	lacrimos	um hic miseram famem
V. 6.	Quaecunque	aut	gelido	prominet Algido
V. 14.	Pestemque	a	populo et	principe Caesare in
V. 5.	Vos	laetam	fluviis	
V. 9.	Vos	Tempe	totidem	

V. 1. *virgines*] Alloquitur Horatius choros puërorum et puellarum, laudes Apollinis et Dianae in ludis rite canentium. *Dianae* prima syllaba producta est, ut apud Virg. Aen. I, 499. —

intonsum] Epod. 15, 9. Tibull. I, 4, 37: „Solis aeterna est Phoebo Bacchoque iuventa: Nam decet intonsus crinis utrumque deum.“ — *Cynthium*] a Deli monte Cintho. — *nigris silvis*] cf.

Vos Tempe totidem tollite laudibus
 10 Natalemque mares Delon Apollinis,
 Insignemque pharetra
 Fraternaque humerum lyra.
 Hic bellum lacrimosum, hic miseram famem
 Pestemque a populo et principe Caesare in
 15 Persas atque Britannos
 Vestra motus aget prece.

CARMEN XXII.

Integer vitae scelerisque purus
 Non eget Mauris iaculis neque arcu

Carm. IV, 12, 11. IV, 4, 58. Nigrae silvae sunt, quarum arbores viridia quidem sed ad nigrum colorem vergentia habent folia; ut *ilex nigra*, *abies nigra* apud Virgil. Buc. 6, 54. Aen. VIII, 599. — *Cragi*] montis Lyciae, qui viridis appellatur propter arborum folia ex viridi ad flavum colorem vergentia, — *fraterna*] Mercurii, de quo vide Carm. I, 10, 6. *humerum* est accusativus graecus. — *hic bellum lacrimosum*] Sic apud Hom. Il. V, 737 „ἐς πόλεμον δακρύνοντα.“ Deinde „Quo spectaverit communis Apollinis et Dianae religio, id optime ex carmine saeculari cognosci potest. Nimirum cum soli et lunae, a quibus salubris aëris temperies adeoque tam agrorum fertilitas quam corporum sanitas pendet, divinam Apollinis et Dianae personam indueret antiquitas, habiti ii sunt dii salutare, publicae salutis auctores, σωτήρες, vel dii averrunci, ἀλεξίκακοι, ἀλεξίμορφοι, ἀποτροπαῖοι, qui famem, pestilentiam atque publicam calamitatem avertere possent; et hinc iidem sunt dii socii, πάρεδροι, σύνναοι, eiusdem religionis in eodem templo participes.“ Doering. — *a populo et principe*] Qui et particulam eicere voluerunt, ut sit: „propterea quod princeps est Caesar,“ non viderunt Horatium particulis *et* et *que* saepe toti rei partem aliquam egregiam addere; quo factum est ut Caesaris salus arctissime coniuncta sit cum uni-

versa populi salute. Vide ad Carm. I, 3, 19. Eadem fere res iam apud Homerum observatur Il. XIII, 1. — *in Persas atque Britannos*] cf. Carm. I, 2, 22. III, 27, 21—24. I, 35, 29.

Carmen XXII.

Horatius quid pietati in deos tribuat, manifestum est ex Carm. I, 17, 13. Idem hoc carmine probatur. Qui pii sunt, sunt innocentes a diisque coluntur. Quam deorum tutelam ut in illo carmine sic in hoc se ipsum expertum esse affirmat luculento exemplo. Sibi, pio vati et innocenti homini, nihil esse horribile aut pertimescendum; praesenti deorum auxilio fretum ubique se posse poesi et amori indulgere. Habemus igitur iterum perpetuam Horatii doctrinam de integritate morum ac veris vitae gaudiis. Compositio carminis simplicissima est; tres enim partes sunt ex binis strophis coniunctae; in ipsis partibus altera strophae priorem amplius illustrat, ita tamen ut in tertia parte, quo carmen rectius in finem excurrat, apodosis protasin sequatur. — Aristium Fuscum inter amicos Horatii non ultimum locum habuisse constat ex Sat. I, 9, 61. Epist. I, 10. Tempus quo carmen compositum sit definiri nequit; sed Sabinam villam iam acceperisse videtur Horatius. De Lalage vide ad Carm. I, 19.

V. 1. *Integer vitae*] Sat. II, 3, 220.

Nec venenatis grvida sagittis,

Fusce, pharetra,

5 Sive per Syrtes iter aestuosas

Sive facturus per inhospitalem

Caucasum vel quae loca fabulosus

Lambit Hydaspes.

Namque me silva lupus in Sabina,

10 Dum meam canto Lalagen et ultra

Terminum curis vagor expeditis,

Fugit inermem;

Quale portentum neque militaris

Daunias latis alit aesculetis,

15 Nec Iubae tellus generat leonum

Arida nutrix.

Pone me pigris ubi nulla campis

Arbor aestiva recreatur aura,

Virg. Aen. IX, 253. — *Mauris*] vide ad Carm. I, 1, 28. — *grvida*] plena. cf. Virg. Aen. VII, 507. — *Syrtes aestuosas*] cf. Carm. II, 6, 3 sqq. Sed explicatur etiam de ora Syrtibus adiacenti, arenosa et fervida; cf. Carm. II, 20, 15. Virg. Aen. V, 51; de qua Lucanus Phars. IX, 430: „At quaecunque vagam Syrtim complectitur ora Sub nimio projecta die, vicina perusti Aetheris, exurit messes et pulvere Bacchum Enecat, et nulla putris radice tenetur. Temperies vitalis abest et nulla sub illa Cura Iovis terra est: natura deside torpet Orbis et immotis annum non sentit arenis.“ — *inhospit. Caucasum*] Epod. 1, 12. — *fabulosus Hydaspes*] hodie *Behut*. India Romanis prope ignota, ut etiam Plinius H. N. VI, 17 scripserit: „Patefacta est (India) non modo Alexandri Magni armis regumque qui ei succedere, circumvectis etiam in Hyrcanum mare et Caspium Seleuco et Antiocho praefectoque classis eorum Patrocle; verum et aliis auctoribus graecis est. Non tamen deest diligentiae locus, adeo diversa et incredibilia traduntur.“

V. 11. *curis expeditis*] Alii ex codd. *expeditus*; sed homoeoteleuton facit

ut illud praeferendum videatur; nam utriusque scripturae sententia eodem redit. Homoeoteleuti exempla ubivis obvia, ut Carm. II, 12, 1. 16, 38. 17, 1, alia. — *quale portentum*] In his quae inest superlatio, eam apparet accommodatam esse ad sensus, quibus Horatius cum conspiceret lupum subito movebatur. — *Daunias*] Apulia. cf. Carm. IV, 14, 26. A graecis formis huic similibus in nominibus latinis, cum metri quaedam necessitas urgeret, non abhorruerunt latini poetae. — *Iubae*] A. u. c. 729 Iuba filius ab Augusto pro patrio regno et partem Gaetuliae accepit et universam Mauretania, quae Bocchi et Bogudis fuerat. Quare non male suspicati sunt, qui illo anno carmen scriptum esse putant. — *pigris campis*] Describitur his quatuor versibus frigida, duobus insequentibus torrida zona. cf. Carm. III, 3, 55. 24, 36. Deinde notandum est, ex more satis frequenti adiectiva *pigris, aestiva* in mediis, substantiva *campis, aura* posita esse in extremis versibus; qua re egregie perspicuitati elocutionis consultum videmus. — *malusque Iuppiter*] cf. Carm. I, 1, 25. — *urget*] vide ad Carm. II, 9, 9. — *dulce ri-*

Quod latus mundi nebulae malusque
 20 Iuppiter urget;
 Pone sub curru nimium propinqui
 Solis in terra domibus negata:
 Dulce ridentem Lalagen amabo,
 Dulce loquentem.

CARMEN XXIII.

Vitas hinnuleo me similis, Chloë,
 Quaerenti pavidam montibus aviis
 Matrem non sine vano
 Aurarum et siluae metu:

dentem] vide ad Carm. II, 12, 14. — *pone*] Notanda anaphora in primo verbo duarum stropharum, qua facile est sentire quam magna vis huic verbo accedat. Quare haud rarum hoc genus; nam compara Carm. I, 35, 5. 9. 17. 21; II, 6, 13 et 21; II, 16, 1 et 5; II, 19, 9 et 13; II, 20, 9 et 13; III, 3, 9 et 13; III, 4, 37 et 41; III, 9, 1. 5. 9 et 13. cet. — *dulce loquentem*] Iocose ratio habita est nominis Lalages (*Λαλαγή*), quae quod nomine pollicita est re comprobavit. Ceterum in vv. 23. 24 alterum est genus anaphorae, quo idem vocabulum legitur in prima sede duorum inter se excipientium versuum; cuius generis alia exempla haec appono: Carm. I, 28, 33 sq. I, 34, 9 sq. I, 36, 11 sq. II, 3, 5 sq. II, 6, 6 sq. II, 8, 21 sq. II, 16, 5 sq. III, 11, 30 sq. 37 sq. Iam ut hoc loco nunc defungar, tertium genus est cum idem vocabulum in prima quidem sede duorum versuum reperitur, sed qui tertio aliquo distinentur: Carm. II, 1, 17. 19. II, 3, 17. 19. III, 1, 45. 47. III, 19, 5. 7. III, 24, 33. 35. Tum quarto genere idem vocabulum in uno quidem versu reperitur sed in conspicuis locis, ut in initio et media arsi: Carm. II, 19, 17. III, 4, 45. (III, 10, 5). IV, 4, 30. IV, 7, 15. 23. Cum quo genere cognatum est hoc, cum quod in prima sede versus collocatum est vocabulum in medio altero versu iteratur: III, 3,

65 sq. Quinto genere idem vocabulum in pari sede eiusdem vel similis versus repetitur, ut III, 4, 53. 54. IV, 13, 10. 11. Denique varia genera anaphorae non raro ad augendam vim coniunguntur; quod quomodo fiat ex his vide locis III, 29, 17—21; III, 21, 13—17; IV, 13, 17—18. IV, 14, 41—52.

Carmen XXIII.

Ad graecum fortasse exemplum Chloën, timidam puellam et amori se subtrahentem, comparat cum hinnuleo matrem anxie sequenti et pericula undique timenti. Chloe (*χλόη*) nomen ab Horatio non fictum sed electum est, quoniam bene congruit cum natura et aetate puellae. De eadem C. III, 26 scriptum videtur. Tempus definiri nequit.

V. 1. *hinnuleo*] Cf. Anacreon fr. 49 Bergk: „*Ἀγανῶς οἶά τε νεβρὸν νεοθηλέα Γαλαθηνόν, ὅστ' ἐν ὕλης κροέσσης Ἀπολειφθεῖς ὑπὸ μητρὸς ἐπτοήθη.* — *siluae*] trisyllabum, ut Epod. 13, 2. Ep. I, 16, 51. — *veris inhorruit adventus foliis*] Non potest negari audacter ita dictum esse ab Horatio, nam non *adventus veris* proprie inhorrescit foliis, sed inhorrescunt folia adventu veris. Sic Plin. H. N. XVIII, 35 fin.: „*Trifolium quoque inhorrescere et folia contra tempestatem subrigere certum est.*“ Non male iam

5 Nam seu mobilibus veris inhorruit

Adventus foliis seu virides rubum

Dimovere lacertae,

Et corde et genibus tremit.

Atqui non ego te tigris ut aspera

10 Gaetulusve leo frangere persequor:

Tandem desine matrem

Tempestiva sequi viro.

CARMEN XXIV.

Quis desiderio sit pudor aut modus

Tam cari capitis? Praeceptum lugubres

Cantus, Melpomene, cui liquidam pater

Vocem cum cithara dedit.

comparatum est nostrum: „es rauscht der Frühling in den Blättern;“ nam adventus veris indicatur flatu Favonii, qui eius est comes. Carm. IV, 12, 1. Quare facile caremus coniectura Bentleii *vepris inhorruit ad ventum*. Cf. Claudian. in Prob. et Olybr. cons. 125 „inhorruit atrum maiestate nemus.“ — *virides lacertae*] Hoc quoque indicium veris, lacertas prodire ex latebris, in quas hieme se condidierint. cf. Virg. Buc. 2, 9. — *tremi*] hinnuleus. — *Gaetulus*] Africanus. *Γαιτοῦλος*. — *frangere persequor*] vide ad Carm. I, 1, 8. — *tempestiva viro*] nubilus. Virg. Aen. VII, 53.

Carmen XXIV.

Dulcissimum hoc de morte Quintilii ad Virgilium carmen absolutum omnino est ac perfectum; nam cum Horatii tristes querimoniae usque ad medium versum (v. 10) vehementer auctae ingens damnum, quod praestari non possit, et singulares virtutes defuncti amici dulcissimo moerore descripserint, tota altera pars superiori contraria est: luctum iustum sed irritum esse, calamitatem patienter ferendam. Qua quidem consolandi ratione quae

potest melior inveniri? Nam est consolatio ad eum, quocum Quintilius intima familiaritas coniunctus vixerat. Probat igitur Horatius Virgilii moerorem ac luctum ob ereptum amicum; imparem se profitetur qui satis digno *θρήνην* prosequi possit tam egregium hominem, tam dulcem amicum, vocat in auxilium Musam, prodit necopinatum suum etiam dolorem et concedit tamen neminem maiore iure lugere quam Virgilium. Sic postquam aditum sibi paravit ad animum contristati amici, „at, inquit, frustra conquereris, frustra reposcis quem semel eripuerunt dii; in vitam reducere non posses mortuum, etiam si Orpheo blandius caneres. Quare quid erit faciendum? Patientia levandum est quod nequit dolore restitui.“ Cum Quintilius a. 730 mortuum esse sciamus, carmen quo tempore scriptum sit liquet.

V. 1. *desiderio*] In dativo difficultas quaerenda non est; recte enim congruit cum maiore quam h. l. verbum *sit* habet vi ac potestate; deinde *pudor et modus* bene coniuncti sunt, nam ubi a nimio luctu pudor homines prohibet, modus simul querelis ponitur. Sic Martial. VIII, 3, 3: „Sit

5 Ergo Quintilium perpetuus sopor
Urget: cui Pudor et Iustitiae soror,
Incorrupta Fides nudaque Veritas
Quando ullum inveniet parem?

Multis ille bonis flebilis occidit;
10 Nulli flebilior quam tibi, Virgili.
Tu frustra pius heu non ita creditum
Pocis Quintilium deos.

Quid, si Threicio blandius Orpheo
Auditam moderere arboribus fidem?
15 Num vanae redeat sanguis imagini,
Quam virga semel horrida

Non lenis precibus fata recludere
Nigro compulerit Mercurius gregi?

pudor et finis“ et VIII, 64, 15: „Sit tandem pudor et modus rapinis.“ — *cari capitis*] Sic Schillerus noster: „Er zählt die Häupter seiner Lieben, Und sieh! ihm fehlt kein *theures Haupt*.“ — *ergo*] Significat haec particula subitam et vehementem admirationem, ad quam cum loci natura dolorem addat, efficitur ut necopinati doloris sensus exprimatur. — *urget*] vide ad Carm. II, 9, 9. cf. Virg. Aen. X, 745. — *Pudor*] cf. Carm. Saec. 58. Est autem ea virtus, qua ne quid mali committamus insito quodam nobis honestatis sensu prohibemur (Ehrgefühl). — *Iustitiae soror*] cf. Cic. de offic. II, 7. Iustitia et fides cognatione quadam copulatae sunt, ut altera non possit esse sine altera. — *nudaque Veritas*] simplex, aperta, quae neque ullum verborum ornamentum neque artificium neque fucum aliumve cultum desiderat. — *inveniet*] De singulari numero cf. Carm. I, 2. 38. 3, 3. 4, 16. 6, 10. — *Virgili*] vide Zumpt. gr. lat. §. 33. adnot.

V. 11. *frustra pius heu*] Noli intelligere pietatem in amicum; sed eadem est pietas quam in his invenimus locis: Carm. I, 17, 14. II, 14, 2. IV, 7, 24; quibuscumque conferas locum ex simili carmine Ovidii de morte Tibulli poetae, Am. III, 9, 37:

Vive pius, moriere pius, cole sacra,
colentem

Mors gravis a templis in cava
busta trahet.

Pii autem diis cari sunt et amici; pios igitur maior spes est moturos precibus deos; nam (Ovid. Met. VIII, 725) „Cura pii dis sunt et qui coluere coluntur.“ Et tamen quamquam pius est Virgilius, mortuum amicum non reducent dii in vitam; est igitur ille frustra pius, id quod magnopere est dolendum. Sic intelligitur *heu* particula, quam ne cum insequentibus vocabulis coniungas vetat ipsa versus caesura. — *non ita creditum*] Demonstrativum adverbium *ita* requirit relativam sententiam; *ut nunc factum est* i. e. ut tam mature eum tibi eriperent. — *Quid, si?*] Hanc optimorum et plurimorum codicum scripturam nunc ausus sum recipere; etenim nec vehementior sententia est nec potest esse crudeliter Virgilio illudentis, ut Orellio visum est. cf. Sat. II, 3, 159. Ep. I, 19, 12. Virg. Aen. IV, 311. Alii *Quodsi* et v. 15. *Non. — Orpheo*] cf. Carm. I, 12, 8. — *arboribus*] vide Zumpt. gr. lat. §. 419. — *Threicio*] Epod. 13, 3; est graeca forma *Θρηϊκος*. — *fidem*] Singularis apud poetas pro plurali satis frequens; cf. Carm. I, 17, 18. Epod. 13, 9. — *vanae ima-*

Durum: sed levius fit patientia

20 Quidquid corrigere est nefas.

CARMEN XXV.

Parcius iunctas quatiunt fenestras

Iactibus crebris iuvenes protervi

Nec tibi somnos adimunt, amatque

Ianua limen

5 Quae prius multum facilis movebat

Cardines. Audis minus et minus iam:

„Me tuo longas pereunte noctes,

„Lydia, dormis?“

Invicem moechos anus arrogantes

10 Flebis in solo levis angiportu

[*gini*] Animae mortuorum speciem quidem corporum referebant, ut oculis cernerentur; sed tactum effugiebant; inde *simulacra* sunt et εἰδωλα, et recte appellantur *vanae*. cf. Virg. Aen. VI, 292. — [*virga*] cf. C. I, 10, 18. — [*fata recludere*] Fata hominum certa sunt et immutabilia; inde *recludere* verbum ab Orci portis facile transfertur ad ipsa fata quae nulla vi nec hominum nec deorum solvantur. De infia. vide ad Carm. I, 1, 18. — [*semel*] ein für allemal, de iis rebus quae fieri non possunt nisi semel; cf. Cic. Deiot. 3, 9. Virg. Aen. XI, 418. — [*durum*] Vide quanta insit in hac brevitate vis dicendi; quanto hoc gravius quam illud, durum quidem hoc est, sed cet.

lapidum coniectione dici potest. — [*iunctas fenestras*] valvas fenestrarum oclusas. Becker. Gall. T. I. p. 100: „Die Fenster mögen in alter Zeit unverschlossene Oeffnungen gewesen sein, die höchstens durch Läden geschlossen wurden. In späterer Zeit bediente man sich besonders des lapis specularis (Frauenglas, Marienglas), der häufig erwähnt wird. Selbst Säulengänge verschloss man durch dergleichen Fenster. Die Frage, ob die Alten sich auch des Fensterglases bedient haben, ist früher gewöhnlich verneinend beantwortet worden. In neuerer Zeit ist man indessen darüber nicht in Zweifel und mehr als alle Belege aus späten Schriftstellern beweisen die in Pompeji gefundenen Glasscheiben und selbst Fenster.“ — [*multum facilis*] facillima; de quo usu voc. *multum* cf. Carm. III, 27, 47. Epod. 15, 11. 17, 20. Sat. I, 3, 57. II, 3, 147. Epist. I, 3, 15. Ianua vel porta *difficilis* appellatur ap. Ovid. Am. I, 6, 2: „Difficilem moto cardine pande forem.“ — [*Me tuo cet.*] Versus 7 et 8 ex carmine sunt παρακλαινσιδύνοφ, quale est Carm. III, 10. — [*longas noctes*] Epist. I, 1, 20. — [*invicem*] vicissim. Epod. 15, 24; eadem prope ratione Carm. III, 28, 9.

Carmen XXV.

Acerbum hoc est carmen et contumeliosum in Lydiam, olim formosam et durum, tunc senescentem et paene desertam; plenum est exprobrationis et maledictionis. Medius versus (10) huius quoque carminis caput et fastigium habet.

V. 1. [*parcius*] rarius. — [*iactibus*] Sic optimi codices prope omnes; quamquam *icitibus*, quod in reliquis est, de

Thracio bacchante magis sub inter-
lunia vento,

Cum tibi flagrans amor et libido,
Quae solet matres furiare equorum,
15 Saeviet circa iecur ulcerosum,
Non sine questu,

Laeta quod pubes hedera virente
Gaudeat pulla magis atque myrto,
Aridas frondes hiemis sodali
20 Dedicet Hebro.

CARMEN XXVI.

Musis amicus tristicium et metus
Tradam protervis in mare Creticum

— *levis*] contempta. — *magis*] vehementius quam solet alias. *Thracio bacchante* est ablativus absolutus. Bentleius malebat *bacchata*. — *Interlunia*] Eo tempore quo neque vetus neque nova luna conspicitur saevire dicebantur venti; nam hoc est *bacchari*, ut Ovid. Trist. I, 2, 29: „Boreas bacchatus ab Arcto;“ cf. Virg. Aen. IV, 666. — *furiare*] in furorem concitare. cf. Virg. Aen. II, 407. Georg. III, 266. — *iecur*] vide ad Carm. I, 13, 4. — *ulcerosum*] cf. Epist. I, 18, 72. Verum ut cum ulcere coniuncta est foeditas ac taedium, sic ulcerosum iecur non cupiditatem solum, quae est in *vulnerare*, *vulneratus*, significat, sed foedam ac nimiam cupiditatem. — *hedera virente*] hellgrüner Epheu. — *pull. myrt.*] dunkelgrüne Myrte, graulichgrüne Myrte (Göthe). cf. Carm. I, 21, 7. Deinde in comparatione alterum membrum mutatum est; nam cum simpliciter dicendum esset *quam aridis frondibus*, ad augendum ludibrium hanc partem nova instruxit sententia. cf. C. IV, 13, 9. De Hebro vide Carm. III, 25, 10. Epist. I, 3, 3.

Carmen XXVI.

„Musis, inquit, amicus et ab omnibus quibus nunc homines tenentur curis unice liber nihil moror ea quae aliena et remota sunt; quare praestat te laudare, dulcis amice, tibi que Musarum ope coronam nectere novoque carminum genere te celebrare.“ Est breve quidem, sed amabile carmen, quo etiam L. Aelius Lamia, qui tristiore ac severiore fuisse videtur ingenio (cf. III, 17), ad hilariorem vitae usum tecte evocatur. Tempus, quo scriptum sit, ex v. 5 intelligitur. Nam cum Phraates, rex Parthorum, patrem ipsum Orodem et omnes fratres interfecisset (a. u. 718), ex familia Arsacidarum adversarius exstitit Teridates. Hic tamen victus aufugit ad Octavianum, qui tum (a. u. 724) mortuo Antonio in Syria erat. Etiam Phraates legatos misit. Octavianus Teridati ut in Syria maneret permisit. Interea Phraates a populo pellitur, Teridates revocatur. Phraates Scytharum ope reducitur, Teridates confugit ad Augustum, quem in Hispania invenit (a. u. 729). Recte autem viris doctis

Portare ventis, quis sub Arcto
 Rex gelidae metuatur orae,
 5 Quid Teridaten terreat, unice
 Securus. O quae fontibus integris
 Gaudes, apricos necte flores,
 Necte meo Lamiae coronam,
 Pimplea dulcis. Nil sine te mei
 10 Prosunt honores: hunc fidibus novis,
 Hunc Lesbio sacrare plectro
 Teque tuasque decet sorores.

CARMEN XXVII.

Natis in usum laetitiae scyphis
 Pugnare Thracum est: tollite barbarum

visum est h. c. ad a. 725 referendum esse, cum praesertim simillima sententia sit in Virgilii Georgicis (II, 496) a. u. 724 editis.

V. 2. *protervis ventis*] quoniam omnia sibi obstantia quasi proterunt et ludibrio habent. Epod. 16, 22. — *mare Creticum*] ideo potissimum nominatur, quia maris medii ab Italia remotissima prope pars est. — *portare*] vide ad Carm. I, 1, 8. — *rex*] Scytharum, Dacorum, Sarmatarum, a quorum excursionibus et latrociniiis fines Romani imperii non erant tuti. cf. III, 8, 17. Alii *quis* pro *quibus* dictum volunt et significari putant Teridatem; non bene, ut nunc video. — *Teridaten*] Sic apud Dionem Cass. *Τηριδάτην*; apud Lucianum *Τιριδάταν*, ubi tamen editiones dissentiunt. — *Pimplea*] *Πίμπλεια* est mons Thraciae cum fonte Musis sacro. A quo nomine latinum fit adiectivum *Pimpleus*; ut apud Catull. 105, 1 „Pimpleum scandere montem.“ — *prosunt*] Sic plurimi codices, pauci *possunt*. Utrumque bene dicitur; sed praevallet codicum auctoritas. — *honores*] sunt carmina quibus honores tribuuntur. cf. Carm. IV, 9, 25—30. — *fidibus novis*] novo carmine, lyrico, nam plectrum Lesbium est. cf. Carm. III, 30, 13. —

sacrare] perpetuo honore extollere, ut Epist. II, 1, 49. „Versus parum concinne compositus (hunc Lesbio sacrare plectro) cui nullum alium similem reperias. Cultis Horatii auribus in quarta huius versiculi syllaba desinens vocabulum non satis faciebat nisi id monosyllabum esset. Vocabulum longius praeter *hunc Lesbio* inveni semel II, 3, 27.“ Lachmann. apud Frank. p. 239.

Carmen XXVII.

Ut nono carmine huius libri sic hoc quasi in medium convivium ab Horatio et amicis celebratum ducimur. Ibi fervidiore Falerno calidi facti sodales a iurgiis ad certamina prorumpunt; surgit Horatius, qui vehementiore vino abstinuerat (vide v. 9), revocatque sodales ad ordinem et amicitiam. Pugnare in conviviis et pocula in arma convertere barbarorum et ferorum hominum (v. 2. 5), non Romanorum et cultorum esse dicit, tum inde a tertia strophā, postquam duabus superioribus aures et animos omnium in se suaeque verba convertit, quo facilius convivae irae obliviscantur, subito aliam rem obicit rixae plane contrariam eamque ita instituit, ut per risum et iocum pace reconciliata ad hilarita-

Morem, verecundumque Bacchum
Sanguineis prohibete rixis.

5 Vino et lucernis Medus acinaces
Immane quantum discrepat; impium
Lenite clamorem, sodales,
Et cubito remanete presso.

Vultis severi me quoque sumere
10 Partem Falerni? Dicat Opuntiae
Frater Megillae, quo beatus
Vulnere, qua pereat sagitta.

Cessat voluntas? Non alia bibam
Mercede. Quae te cunque domat Venus,
15 Non erubescendis adurit

Ignibus ingenuoque semper
Amore peccas: quidquid habes, age,
Depone tutis auribus. Ah miser,
Quanta laborabas Charybdi,

20 Digne puer meliore flamma!

Quae saga, quis te solvere Thessalis
Magus venenis, quis poterit deus?

tem omnes leniter cogat. Tempus nequit defini; sed videtur eiusdem aetatis esse, cuius est C. I, 16.

V. 3. *verecundumque Bacchum*] cf. Carm. I, 18, 7. Epod. 11, 13. Hoc magis decet poetam, quam quod scribere voluit Cuninghamius *verecundique*. — *prohibete*] Ep. I, 1, 31. Cic. Manil. 7, 18. — *immane quantum*] ut *mirum quantum* (Liv. II, 1, 11) adverbii prope vice funguntur. Tacit. Hist. III, 62 „exercitus immane quantum animo exitium Valentis ut finem belli accepit.“ — *cubito presso*] impresso pulvillis substratis cubito sinistro. cf. Sat. II, 4, 39. — *severi Falerni*] Haec facile ut coniungantur, efficitur pari quem utrumque vocabulum habet versus loco. *Severum Falernum* idem est quod Sat. II, 4, 24 *forte* appellatur. — *Vultis*] Interrogando nihil efficitur aliud nisi vivida quaedam protasis. — *Opuntiae frater Megillae*] unus e convivis, cu-

ius nomini haec blanda et honorifica pulchrae sororis commemoratio substituitur. — *beatus vulnere*] Egregium oxymori exemplum; nam Venus „dulcem curis miscet amaritatem“ (Catull. 68, 18). — *sagitta*] cf. Carm. II, 8, 15. — *quae te cunque*] vide ad Carm. I, 6, 3. — *ah miser*] Audito tandem puellae nomine iocose exclamat, non esse mirandum, quod nomen illud pronuntiare cunctatus sit. Huc referendum est imperfectum *laborabas*. Sunt tamen qui cum Bentleio scribere malint *laboras in*. Alii imperfectum praetulerunt, sed interpretati sunt: laborabas et ego nesciebam. — *Charybdi*] Virg. Aen. III, 420. — *Thessalis venenis*] *θαλασσιόχους*, quibus Thessalia abundabat, unde Thessali noti venefici et magi. Epod. 5, 45. — *Chimaera*] Cuius amorem propter avaritiam cum Charybdi comparavit, eam Chimaeram appellat propter inconstantiam. Hom.

Vix illigatum te triformi
Pegasus expediet Chimaera.

CARMEN XXVIII.

Te maris et terrae numeroque carentis arenae
Mensorem cohibent, Archyta,

II, VI, 180. Hesiod. Theog. 325:
„Τὴν μὲν Πήγασος εἶλε καὶ ἐσθλὸς
Βέλλεροφόντης.“

Carmen XXVIII.

Nullum est inter Horatiana carmina quod interpretibus tantas quantas hoc molestias procreaverit. Quare diversissimae eorum sunt sententiae. Alii dialogum inter Archytam et nautam, alii *μονολόγιον* esse affirmant; neque qui alterutri sententiae addicti sunt inter se consentiunt. Et eorum qui dialogum scripsisse Horatium statuunt, alii nautae Matinum littus praetervehenti sex tantum versus, Archytae respondenti reliquos attribuunt, alii nautam viginti versus dicentem faciunt. Qui *μονολόγιον* invenerunt, miro sane acumine vel Horatii etiam viventis ab eodem Horatio fictam umbram in littore deambulantem ac declamantem audiebant, vel Archytae umbram primo secum severe philosophantem, deinde nautam casu praetervehentem precibus et minis sollicitantem fingeant, vel verba esse putabant alius peregrini nescimus cuius hominis naufragi primum ad Archytam, deinde ad nautam dicentis, vel alia non magis probabilia excogitabant. Utut est, hoc certum videbitur, voluisse Horatium describere et castigare ingentia studia hominum, quippe qui aut nimia earum rerum quae humanos sensus superant cura et cupiditate teneantur quaeque dii sibi servaverint ad terram quasi detrahere conentur, aut nihil nisi terram spectantes coelum ipsum et omnia maiora sublimioraque prae divitiis et lucro contemnunt. Utriusque studii inanitas Archytae, philosophi Pythagorei Tarentini, et nautae exemplis probatur. Ironia vere Horatiana per totum carmen manifesta est, neque minus mani-

festa oppositio inter duas personas (te vv. 1. 14. 23. 27. 28. 30. 31. 33. 36. me vv. 21. cf. 33). Quare optimum est iis accedere qui dialogum esse carmen existimarunt. Archytae naufragi corpus undis eiectum iacet in littore Apuliae; quo conspecto nauta praetervehens quid de Archytae studiis ac laboribus sentiat prodit; respondet umbra ad inhumatum corpus vagans, ostendens quam perniciose sit contraria cupiditas, qua nautae etiam ad negligendam pietatem ac religionem agantur. Nam hoc certum est, in omnibus prope verbis nautae contumeliam et irrisorem expressam esse. Praeterea Archytae corpus sepultum non est (vv. 23. 36); naufragus petit ut pulvere ter inecto corpus suum sepeliatur. Jam si quaeris, ubi Archytas incipiat loqui, primum indicium invenitur in v. 14 *iudice te*, quae Archytae esse non possunt, alterum v. 21 *me quoque*, quae nautae nequeunt tribui. Jam cum haec *me quoque* a versu 20 dividi non possint, consistendum nunc quoque mihi videtur in ea ratione, qua nautae sedecim primos versus dando esse ante aliquot annos tentavi demonstrare. Nam non videtur necessarium esse, ut versus 16 et 17 eidem personae tribuantur: „Omni- bus moriendi necessitas imposita est: (sed) varia sunt mortis genera.“ Ita sententias coniungendas esse non credo, ne *sed* v. 15 particulam eadem male sequatur. Verum incipit Archytas bene ab simili sententia sic: „Recte quidem omnibus moriendum esse ais, nam cet.“ — Quo tempore scriptum sit carmen, quis dicat? Suspiciantur tamen, scribendi huius carminis occasionem dedisse iter ab Horatio cum Maecenate Brundisium factum a. 717.

V. 1. *arenae mensorem*] Proverbii instar fuit *arenam numerare* vel *metiri*

Pulveris exigui prope littus parva Matinum
 Munera, nec quidquam tibi prodest
 5 Aërias tentasse domos animoque rotundum
 Percurrisse polum morituro.
 Occidit et Pelopis genitor conviva deorum
 Tithonusque remotus in auras
 Et Iovis arcanis Minos admissus habentque
 10 Tartara Panthoiden iterum Orco
 Demissum, quamvis clipeo Troiana refixo
 Tempora testatus nihil ultra
 Nervos atque cutem morti concesserat atrae,

de re infinita et difficillima, sed super-
 vacanea et ridicula. cf. Virgil. Georg.
 II, 104 sqq. Quare hoc *arenae* eodem
 consilio additum sentis, quo ea quae
 insequuntur *pulveris exiguo parva mu-*
nera contra ingentia studia, quibus
 Archytas, Pythagoreus philosophus,
 Platonis aequalis, mare et terram
 emensus esse dicitur, invidiose ponun-
 tur. Cfr. Cic. de off. I, 43, 10. Phi-
 losophus et geometra *animo* tantum
 omnes regiones non terrae solum sed
 aëris quoque percurrit et tentat, mer-
 cator terram solam et solidam, non
 aërem inanem neque solo animo sed
 corpore etiam. Is optime videtur vi-
 xisse, qui plurima sibi et suis com-
 moda paravit; honores et magna no-
 mina, qualia sunt Tantali, Tithoni,
 Minois, qui coelum captantes terram
 amiserunt, parvi sunt aestimanda;
 minoris etiam Pythagoras, qui cum
 animos hominum morti non succum-
 bere discipulis persuaderet, operam
 et oleum perdidit. Scilicet quantum-
 vis quondam se iam vixisse probaret,
 iterum mortuus nondum rediit in vi-
 tam. Sic Pythagorae et Archytae de
 migratione et immortalitate animarum
 tota doctrina huic est ludibrio. Inde
Panthoidis (v. 10) ironica compellatio;
 inde haec verba *nervos atque cutem*
 pro corpore posita, ex Pythagorae
 corpus prae animo contemnenti sen-
 tentia dicta; inde acerba et falsa lau-
 datio *iudice te non sordidus auctor*.
 Sordidi enim apud philosophos sunt
 homines qualis hic nauta, qui bonis
 litteris spretis solam utilitatem lauda-

bant (cf. Carm. II, 16, 15. Cic. de off.
 I, 42. II, 6). Pythagoras olim, quo
 Troianis iam temporibus se vixisse
 comprobaret, Euphorbum, Panthoi
 filium (Hom. II. XVI, 808), se fuisse
 affirmavit clipeumque, quo olim usus
 esset, inter multos alios in templo Iu-
 nonis haud procul Mycenis affixos
 ostendit; quo clipeo *refixo* i. e. de-
 tracto (Epist. I, 18, 56. Epod. 17, 5)
 Euphorbi nomen vere inventum tradi-
 tur. De qua re legatur Ovid. Met. XV,
 160 sqq. Iam apertum est, opinor,
 quid versus velint 2 et 3. Nam te,
 inquit nauta, qui totam terram mente
 complectebaris, nunc *cohibent parva*
munera pulveris exigui: i. e. tu nunc
 terrae exiguam partem, exiguum spa-
 tium occupas. Tum *cohibere* verbum
 quid sit, facile perspicies ex Carm.
 II, 20, 8. III, 4, 80. III, 14, 22. IV,
 6, 34; cum quibus si comparaveris
 II, 18, 38. II, 19, 19, illud idem
 esse videbis quod *coercere* i. e. pro-
 hibere ne quid ultra certum quendam
 terminum evagetur, progrediatur. Com-
 para haec Claudiani in Rufin. II, 451
 „Iacet en, qui possidet orbem, Exi-
 guae telluris inops, et pulvere raro
 Per partes tegitur, nusquam totiesque
 sepultus.“ — *Matinum*] a Matino Apu-
 liae promontorio. cf. Carm. IV, 2, 27.
 Epod. 16, 28. — *aërias domos*] cf.
 Carm. I, 3, 29. — *polum*] Per syne-
 dochon ponitur passim a poetis pro
 ipso coelo; III, 29, 43. Epod. 17, 77.
 Virg. Aen. V, 721.

V. 13. *concesserat*] Poetae non ab-
 horrent ab indicativo apud part. *quam-*

Iudice te non sordidus auctor

15 Naturae verique. Sed omnes una manet nox

Et calcanda semel via leti.

Dant alios Furiae torvo spectacula Marti,

Exitio est avidum mare nautis;

Mixta senum ac iuvenum densentur funera, nullum

20 Saeva caput Proserpina fugit.

Me quoque devexi rapidus comes Orionis

Illyricis Notus obruit undis.

At tu, nauta, vagae ne parce malignus arenae

Ossibus et capiti inhumato

25 Particulam dare. Sic, quodcunque minabitur Eurus

Fluctibus Hesperiiis, Venusinae

vis, cum praesertim non cogitata sed certa res significatur. Apud Horatium compara Epist. I, 14, 6. I, 17, 1. 22. A. P. 366. Carm. III, 7, 25. III, 10, 13; coniunctivus est Carm. IV, 2, 39. IV, 6, 6; ex quibus locis discrimen senties. — *Tartara*) non de damnatorum sede, sed de universo Orco. Fuit autem metrica ratio, quae poetas ut *Tartara* dicerent, non *Tartaros* permovit. — *iudice te*] Qui carmen prave intelligerent, scribendum putarunt *iudice me*. Pythagorae in magna Graecia tam celebratum erat nomen, ut quaedam eius doctrinae notitia ad eos quoque homines pervenire deberet qui expertes fuerunt artium et disciplinarum. — *calcanda semel via leti*] Etiam Livius XXXI, 18 „seque per omnes vias leti interficerent.“ Generalis sententia post prolata nonnulla eiusdem rei exempla desinendi aliquod indicium habet. cf. Carm. I, 17, 13. II, 3, 25. II, 10, 5. 21. II, 13, 19. III, 16, 17. III, 7, 19 cet. Versus 17—20 a superioribus diversam naturam pròdunt, quippe qui exclusa prope omni contumelia communem omnium mortalium condicionem describant, nisi quod v. 18 nautarum exemplum de industria sumptum apparet. — *avidum mare*] Altera lectio *avidis* prava est; epitheton illud maris ad metum nautae incutiendum aptissimum. cf. Carm. III, 29, 61. — *densentur*] Duplex forma est verbi, *densare* et *densere*; codices

plerumque fluctuant; *densare* tamen a Livio et Quintiliano, *densere* a Lucretio, Horatio, Tacito et serioribus usurpata videtur, a Virgilio utraque. — *nullum saeva caput Proserp. fug.*] Nullum caput tantum, nemo tam gravis fuit, quem Proserpina i. e. mors fugerit, timuerit, ad quem mors non accesserit. Sic Lucan. Phars. II, 75: „Mors ipsa refugit saepe virum (Marium).“ Proserpina enim ad moribundos accedit iisque cincinnum desecat; Virg. Aen. IV, 698.

V. 21. *devexi Orionis*] Occidit Orion V. Id. Novembr., quo tempore tempestates saevire solent; inde *Notus* rapidus illius comes dicitur, inde ipse Orion nautis infestus. Epod. 15, 7. Carm. III, 27, 17. — *parce*] vide ad Carm. I, 1, 8. — *capiti inhumato*] Ne hiaet oratio, duo critici scribere mauerunt *intumulato*, ut ap. Ovid. Her. 2, 136: „Occuramque oculis *intumulata* tuis.“ Alia exempla hiatus sed non omnino similia sunt Carm. II, 20, 13. III, 14, 11. Epod. 5, 100. 13, 3. Fuit autem vetus superstitio, animam corporis inhumati non posse Stygias aquas transire (cf. Virg. Aen. VI, 325 sqq. 365. 374. Achill. Tat. p. 116. Iacobs: „Λέγουσι δὲ τὰς ἐν ὕδατι ψυχὰς ἀνηρεμένας μηδὲ εἰς Αἶδον καταβαίνειν ὅλως, ἀλλ' αὐτοῦ περὶ τὸ ὕδωρ ἔχειν τὴν πλάνην.“) Quare sacris legibus vetitum erat, ne quis ignotum etiam corpus, in quod inci-

- Plectantur silvae te sospite, multaue merces,
 Unde potest; tibi defluat aequo
 Ab Iove Neptunoque sacri custode Tarenti.
 30 Negligis immeritis nocituram
 Postmodo te natis fraudem committere? Fors et
 Debita iura vicesque superbae
 Te maneant ipsum: precibus non linquar inultis
 Teque piacula nulla resolvent.
 35 Quamquam festinas, non est mora longa; licebit
 Iniecto ter pulvere curras.

CARMEN XXIX.

Icci, beatis nunc Arabum invides
 Gazis et acrem militiam paras

disset, insepultum relinqueret. Quod officium ut festinantes etiam possent praestare, ter glebam iniecisse sufficiebat. — sic] vide ad Carm. I, 3, 1. — quodeunque minabitur, plectantur] cf. Epist. I, 2, 14. — unde] vide ad Carm. II, 12, 7. — Neptuno] Fuit Archyta Tarentinus; in qua urbe Neptunus *πολιοῦχος* deus erat. — negligis committere] vide ad Carm. I, 27, 9. — te natis] Sic coniungendum est, non te committere. — fors et] fortasse etiam. Virg. Aen. XI, 50. — vicesque superbae] *ἀντίποινα*, talio. cf. Hom. Od. XI, 72 sq. — ter] Ternarius numerus sacer. Ep. I, 1, 37. Sat. II, 1, 7.

Carmen XXIX.

Aelius Gallus a. u. 730 ex Aegypto expeditionem in Arabiam felicem Augusti iussu fecit ex eaque summa quaeque expectaverunt Romani. Quid igitur mirum, quod magna Arabiae et eius divitiarum fama multos tum incendit iuvenes Romanos bellandi cupiditate opumque colligendam expectatione? Ex amicis Horatii Iccius quoque, qui usque ad id tempus in otio et mansuetioribus litteris vixerat, nomen professus est. Quare Horatius festivo hoc carmine amicum iocose deridet et mirabundus exclamat: ergo tu quoque militiam paras, tu quoque

otium et libros cum castris et gladio commutaturus es! Laedere Iccium Horatius noluit; acerbitalis in amicum nihil reperitur toto carmine, ioci et leporis omnia plena sunt. Verum etiamsi Iccium non accusat, accusat tamen ingentem suae aetatis cupiditatem bonorum; etenim ita saepe fit, ut quae in amicos ridendo et iocando dicamus iis alios tangi velimus. Ad eundem Iccium data est Epist. I, 12. Cum iam a. 727 expeditio pararetur, ad eum annum referendum esse carmen satis est probabile.

V. 1. — nunc] Quanta nunc subito exarsit ferocia; quanta audacia in te, qui adhuc fuisti placidus, tranquillus, innocens; tu igitur ex mitissimo philosopho acerrimus bellator factus Arabibus et Parthis, invictis gentibus, militiam paras et catenas; tu igitur alter Achilles ignoti cuiusdam principis filiam servam, filium pocillatorem reduces. Sic continuatur iocosa irrisio, amabilis superlatio. Post catenas interrogandi signum rectius ponitur: admirationi enim, non affirmationi hic locus est. Sic totum carmen ex interrogationibus compositum est ut Carm. I, 8. — Sabaeae] populus Arabiae felices, cuius caput Saba. — ex aula] regia; vide Liv. XLV, 6. — sagittas tendere] paulo audacius dictum; cum arcus proprie tendatur; a qua tamen

Non ante divictis Sabaeae
 Regibus horribilique Medo
 5 Nectis catenas? Quae tibi virginum
 Sponso necato barbara serviet?
 Puer quis ex aula capillis
 Ad cyathum statuetur unctis
 Doctus sagittas tendere Sericas
 10 Arcu paterno? Quis neget arduis
 Pronos relabi posse rivos
 Montibus et Tiberim reverti,
 Cum tu coëmptos undique nobilis
 Libros Panaeti Socraticam et domum
 15 Mutare loricis Hiberis
 Pollicitus meliora tendis?

CARMEN XXX.

O Venus, regina Cnidi Paphique,
 Sperne dilectam Cypron et vocantis

audacia ne epicus quidem Virgilius abhorruit Aen. V, 808. Seres autem ut omnes orientales gentes nobiles erant sagittarii. — *arcu paterno*] vide Carm. II, 13, 17.

V. 10. *arduus pronos*] Pronum cum sit quod per declive decurrit (Virg. Georg. I, 203), hac ipsa oxymori oppositione egregie ostenditur, nihil magis inter se contrarium esse quam *arduos montes* et *pronos rivos*. — *et Tiberim*] amplificatio per exemplum; vide ad Carm. I, 3, 19. — *coëmptos undique*] Significatur his verbis magnum quo olim Iccius ardebat studium philosophiae. Neque inconsulto Stoici Panaetii mentio facta est, quippe qui nihil expetendum docuerit nisi honestum; ut sic quoque mutatus Iccii animus prodatur. — *Panaeti*] vide ad Carm. I, 2, 26. Lachm. ad Lucret. p. 327: „Substantivorum Graecorum genitivos in vocalem *i* simplicem exeuntes nonnulli probarunt, ita tamen, si ante eam plures morae essent, non una

tantum. Horatius ad hunc modum dixit *Libros Panaeti* et *Dionysi filius* (Sat. I, 6, 38).“ De Panaetio Rhodio, Stoicorum principe, Scipioni Africano minori et Laelio familiarissimo vide Cicer. de off. III, 2. — *nobilis Panaeti*] Alii *nobiles*, in quod facile potuit aberrari, cum utrumque *nobilis* scriberetur. Verum Horatii consilium et manum videmus in verborum locis et ordine, quibus primum et tertium (*coëmptos — libros*), alterum et quartum vocabulum (*nobilis — Panaeti*) coniungenda esse ostenditur. — *Socraticam domum*] Socraticos philosophos, Platonem, Xenophontem, alios. De *et* particula enclitica vide ad Carm. I, 2, 9. — *Hiberis*] ex ferro optimo, Hispano, confectis. — *pollicitus meliora*] Haec quoque verbis severa, re iocosa sunt.

Carmen XXX.

Glycerae puellae Veneri sacra facient Horatius quasi optulatur; evo-

Thure te multo Glycerae decoram
Transfer in aedem.

5 Fervidus tecum puer et solutis
Gratiae zonis properentque Nymphae
Et parum comis sine te Iuventas
Mercuriusque.

CARMEN XXXI.

Quid dedicatum poscit Apollinem
Vates? quid orat de patera novum

eat deam ex solitis sedibus in aedem Glycerae; unde sequitur, ut ipsi Glycerae optet pulchritudinem eaque omnia quae pulchritudinem sequuntur, augment, conservant. — De Glycera vide ad Carm. I, 19, neque temere conicias, eodem fere quo illud tempore hoc quoque scriptum esse.

Cnidi] Pausan. Att. I, 1, 3: „Κνίδιοι τιμῶσιν Ἀφροδίτην μάλιστα.“ — *Paphi*] cf. Hom. Od. VIII, 362 sq. — *Thure*] Veneri enim non sanguine, sed floribus et thure sacrificabatur. cf. ad Carm. I, 19, 14. — *aedem*] Cui minus placet, *aedem* sing. num. pro tota domo accipi, id quod rarissime invenitur, is partem domus, ut atrium, intelligat; proprium Veneris sacrarium minus convenire videtur cum eiusmodi puellae condicione. — *decoram*] floribus. — *solutis zonis*] discinctae. cf. Carm. IV, 7, 5 sq. III, 19, 16 sq. — *properentque*] De transpositione particulae *que* vide ad Carm. II, 7, 25. — *Iuventas*] Haec iuventae dea Iovis et Iunonis filia dicitur, a Graecis Hebe appellata. cf. Carm. II, 11, 5. — *Mercuriusque*] Plutarch. Coniug. Praec. Prooem.: „οἱ παλαιοὶ τῇ Ἀφροδίτῃ τὸν Ἑρμῆν συγκαθίδρουναν, ὡς τῆς περὶ τὸν γάμον ἡδονῆς μάλιστα λόγον δεομένης, τὴν τε Πειθῶ καὶ τὰς Χάριτας, ἵνα πείθοντες διαπραττῶνται παρ’ ἀλλήλων ἃ βούλονται, μὴ μαχώμενοι μηδὲ φιλονεικοῦντες.“ Vide ad Carm. I, 10.

Carmen XXXI.

Caesar Octavianus cum victoria ad Actium promontorium reportata unus

imperium teneret maximeque id ageret, ut otium et rectum statum terris restitueret, non placandos solum animos esse vidit, sed quo certius licentiae et libidini obviam iretur, imbuedos etiam prisca pietate et timore deorum. Itaque templa antiquitate et incendiis collapsa renovavit et nova extruxit. Iam cum Apollinis templum in Palatio a. 726 dedicaretur, praeter publica vota multa a multis etiam privatis immodice et intemperanter dicta videntur. Quare Horatius quoque ad Apollinem quasi accedens hoc carmine quid ipse a deo petat ita exponit, ut de summis bonis deque iis quae sola recte sint expetenda quid sentiat diserte et simpliciter simul profiteatur. Summa igitur carminis sententia haec est: Non in magnis divitiis quaerendum est summum bonum, sed in sanitate corporis et animi, qua non concupiscimus plura sed fruimur iis quae adsunt. Iuv. Sat. X, 356: „Orandum est, ut sit mens sana in corpore sano.“

V. 1. *dedicatum Apollinem*] Latine non solum dicitur *aedem deo dedicare*, sed etiam *deum aede dedicare* vel absolute *deum dedicare*. Ovid. Fast. VI, 637: „Te quoque magnifica, Concordia, dedicat aede Livia.“ Liv. V, 52. — *novum liquorem*] Novum vinum solebant veteres adhibere in libationibus. cf. Carm. I, 19, 15. — *segetes feraces*] Significat *seges* terram segetibus accipiendis destinatam et aptam, ut Epist. II, 2, 161. Virg. Georg. I, 47. Cic. de senect. 15. Quare nihil est cur optimorum codicum auctoritate negle-

- Fundens liquorem? Non opimae
Sardiniae segetes feraces,
5 Non aestuosae grata Calabriae
Armenta, non aurum aut ebur Indicum,
Non rura quae Liris quieta
Mordet aqua taciturnus amnis.
Premant Calena falce quibus dedit
10 Fortuna vitem; dives et aureis
Mercator exsiccet culullis
Vina Syra reparata merce,
Dis carus ipsis, quippe ter et quater
Anno revisens aequor Atlanticum
15 Impune. Me pascunt olivae,
Me cichorea levesque malvae.
Frui paratis et valido mihi,
Latoë, dones et precor integra

cta cum aliis scribamus: *opimas* — *feracis*. — *opimae Sardiniae*] cf. Carm. I, 7, 11. II, 12, 22. — *Calabriae armenta*] cf. Carm. II, 6, 10. Epod. 1, 27. — *mordet*] Exquisita translatione flumina ripas *mordere*, *lambere*, *rodere*, *stringere*, *lavere*, *terere* dicuntur, quoniam aquis praeterlabentibus terrae aliquid semper demitur. cf. Carm. I, 22, 8. II, 3, 18. Virg. Aen. VIII, 63. — *taciturnus amnis*] Silius Ital. Pun. IV, 348: „Et Liris, qui forte quieto Dissimulat cursum ac nullo mutabilis imbri Perstringit tacitas gemmanti gurgite ripas.“

V. 9. *Premant vitem*] Commatis interpungendum in hac sententia non est; accusativus enim *vitem* non imagis *premant* verbum sequitur quam *dedit*. Sic cum scriberent veteres, exili et molesto pronomine *eam* abstinere potuerunt. Vide ad Carm. I, 3, 6. *Premere* autem vitem est putare vitem, nimiam pampinorum luxuriam falce putatoria compescere. cf. Virg. Georg. I, 157. Ovid. Met. XIV, 628. *Calena* adiectivum per enallagen satis frequentem a vite et vino ad falcem translatum est, ut Carm. I, 20, 9. III, 16,

34. — *dives et*] vide ad Carm. I, 2, 9. — *exsiccet*] ebibat. cf. Carm. I, 35, 27. Sat. II, 6, 68. — *culullis*] „Calices fictiles, quibus pontifices virginesque Vestales in sacris utebantur.“ Acro. Tum de divitum grandioribus poculis. cf. A. P. 434. — *Syra merce*] aromatatis, unguentis e Syria advectis. cf. Carm. II, 11, 16. II, 7, 8. III, 29, 60. — *reparata*] Sumptum hoc verbum ex sermone mercatorum merces pecuniae loco permutantium (umtauschen); rarissimum vocabulum. — *dis carus*] Argumentum hoc a consequentibus sumptum non per invidiam sed per gravem aliquam ironiam adiunctum est.

V. 15. *pascunt*] Indicativus optimorum codicum unice verus; qui in aliis est et codicibus et editionibus coniunctivus vel hac una ratione falsissimus est, quod preces mittere Horatius non hoc versu sed v. 17 incipit. His frugalitatem suae vitae cum divitum et mercatorum luxuria comparat. — *levesque malvae*] facile concoquendae. Epod. 2, 58. — *Latoë*] graece Ἀντῶς, Λατῶς. cf. Carm. I, 1, 34. — *et valido mihi*] Respondent inter se et

Cum mente nec turpem senectam
20 Degere nec cithara carentem.

CARMEN XXXII.

Poscimus. Si quid vacui sub umbra
Lusimus tecum, quod et hunc in annum
Vivat et plures, age dic Latinum
Barbite carmen,

5 Lesbio primum modulate civi,
Qui ferox bello tamen inter arma.

valido, et integra cum mente, utrumque tamen referendum ad infinitivum *frui*. Dativus *valido* per attractionem Graecis magis usitatam ab infinitivo relatus est ad pron. *mihī*. Duae igitur voti Horatiani partes sunt: *dones* precor et valido mihi et integra cum mente paratis *frui*, tum *dones degere* senectam nec turpem nec cithara carentem. Hunc ordinem verborum ipse Horatius indicavit artificiose positis particulis *et, et, nec, nec*. Male igitur etiam in bonis codd. vel *ac precor* vel *at precor*. — *cithara carentem*] cf. Theogn. 789 „Μη ποτέ μοι μελέδῃμα νεώτερον ἄλλο φανεῖν Ἀντ' ἀρετῆς σοφίης τ', ἀλλὰ τὸδ' αἶεν ἔχων Τερποῖμην φόρμιγγι καὶ ὄρχηθ' ὡς καὶ αἰοιδῇ, Καὶ μετὰ τῶν ἀγαθῶν ἐσθλὸν ἔχοιμι νόον.“

Carmen XXXII.

Cum magnum aliquid in republica accidisset, videtur Horatius ab amicis rogatus esse, ut carmine aliquo graviore illud quod dignum omnibus summo honore videretur ad aeternam memoriam consecraret. Ille autem qui magnis rebus digne canendis imparem se haberet (in quam rem bene comparatur Carm. I, 6), hoc parvo sed suavis- simo carmine respondit. Ostendit igitur, qualis sua sit poesis, qualis ipse poeta, quid sibi valeant carmina: lyrica se Graecorum poetarum genera ad Latinas litteras transferre, imitari se Alcaeum qui inter bella et negotia

et labores amorem cecinerit et vinum, sua omnia levia esse et ludicra, nondum se accedere ad serias res vel describendas vel docendas, poesim sibi esse comitem vitae et consolatricem in laboribus. Quas sententias cum composueris, contineri hoc carmine senties egregiam laudationem poesis lyricae; quae quo anno scripta sit non facile invenies. Oeconomia carminis haec est: prima strophā occasione canendi leviter significata genus poesis, altera et tertia argumenta, quarta laudationem habet finemque quem poeta sequatur ostendit. Ceterum hoc suave est, quod Horatius dum videtur parare tantum carmen, elegantissimum iam confecit.

V. 1. *Poscimus*] sc. carmen vel carmina. cf. Ovid. Fast. IV, 721: „Pallia poscor.“ Met. V, 333. IV, 274. Bentleius ex codd. *poscimus*. — *si quid lusimus*] *Si* particula in obtestationibus sollennis, ut Carm. III, 18, 5. C. S. 37. Sat. II, 6, 13. — *vacui*] otiosi, aliis rebus non occupati. cf. Virg. Georg. III, 3. — *sub umbra*] cf. Epist. II, 2, 77 sq. — *quod et hunc*] Haec noli producere ad *Latinum carmen*; simplicior ratio etiam verior. Arrogantiae criminatio nulla est. — *dic Latinum barbite carmen*] Consulto usus est Horatius graeco vocabulo *barbitos*; quo cum graeca suae poesis natura prodatur, certamen aliquod exoritur inter nomina *Latinum* et *barbite* et ipse Romanae fidicen lyrae (Carm. IV, 3, 23) ostenditur. Neque aliter

Sive iactatam religarat udo
Littore navim,

Liberum et Musas Veneremque et illi
10 Semper haerentem puerum canebat
Et Lycum nigris oculis nigroque
Crine decorum.

O decus Phoebi et dapibus supremi
Grata testudo Iovis, o laborum
15 Dulce lenimen, mihi cunque salve
Rite vocanti.

CARMEN XXXIII.

Albi, ne doleas plus nimio memor
Immitis Glyceræ neu miserabiles

positum est graecum vocabulum Carm. I, 1, 34. III, 26, 4. — *Lesbio civi*] Alcaeo, qui floruit circa a. 600 a. Chr. n. vide ad Carm. II, 13, 27. — *modulate*] passive dictum, ut contraria vox *immodulatus* A. P. 263, ex quo loco vides simul, modulari poetas proprie carmina, deinde etiam lyram; hoc est ita moderari lyram, ut sonos certis modis temperatos reddat. — *ferox bello*] Dimicavit Alcaeus contra Athenienses et patriae suae tyrannos, Myrsilum et Pittacum. De adiectivo *ferox* ad rationem participiorum posito vide ad Carm. I, 6, 19.

V. 10. *puerum*] cf. Carm. I, 30, 5. — *illi haerentem*] Triplici ratione *haerere* verbum coniungitur apud Horatium, vel cum dativo, Sat. I, 10, 49, vel cum ablativo et praepositione *in*, Sat. I, 3, 32 vel cum solo ablativo, Carm. I, 2, 9. Sat. II, 3, 205. — *Lycum*] pueri amati nomen; de re cf. Cic. Tusc. IV, 33. — *nigris oculis nigroque crine*] Antiquis niger oculorum et capillorum color pulchritudinem formae augere visus est; cf. Epist. I, 7, 26. A. P. 37. — *dapibus supr. Iovis*] vide Hom. II. I, 603. — *cun-*

que] H. I. cum non habeat relativum ad quod referatur, sententiae necessitate cum participio *vocanti* coniungitur. Significat autem aut *quoquo tempore* aut *omnino*. Scholiastae: *quotiescunque te vocavero*. Contra Lachmann. ad Lucret. p. 288: „*Cumque* nisi cum relativis coniunctum lingua Latina non agnoscit: neque Horatius potuit dicere *mihi cunque salve* (volunt enim hoc esse „salve quotiens te advoco“: at cur lyra alias ei non salveat?), sed scripsit *o laborum dulce lenimen me dicumque salve*.“ Bentleius *cuique*, Peerlkamp. *tuque*. Sed in his coniecturis non certior salus inest, quam in eius conatu, qui *mihi cunque* ausus est coniungere.

Carmen XXXIII.

Caput carminis, quo Albium Tibullum, dulcissimum elegiarum poetam, de perfidia Glyceræ Horatius consolatur, conspicitur vv. 10—12, quibus Veneris crudeli saepe ioco homines forma et animo diversos amoris vinculo coniungi ostenditur. Compositio carminis elegantissima est. Ex quat-

Decantes elegos, cur tibi iunior
Laesa praeniteat fide.

5 Insignem tenui fronte Lycorida
Cyri torret amor, Cyrus in asperam
Declinat Pholoën; sed prius Apulis
Iungentur capreae lupis,

Quam turpi Pholoë peccet adultero.
10 Sic visum Veneri, cui placet impares
Formas atque animos sub iuga aënea
Saevo mittere cum ioco.

Ipsum me melior cum peteret Venus
Grata detinuit compede Myrtale

tuor strophis prima Tibullum revocat a nimio luctu et querimonia de perfidia Glycerae; mediae et tribus inter se copulatis exemplis amore non semper gigni amorem demonstrant et continent universam illam de iocosa saevitia Veneris sententiam. cf. ad Carm. I, 28, 16. Quarta denique strophæ suam rem et condicionem admodum similem Horatius blande componit consolationisque causa tacite oblata initium cum fine egregie coniungit. — Albius Tibullus — nam praenomen ignoratur — nec quo anno natus sit constat nec quo mortuus; probabili tamen coniectura id effecerunt viri docti, ut ab anno 695 ad annum 736 u. c. vixisse eum credatur. Glycera autem quæ fuerit nescimus, quamquam multi fuerunt qui propter eandem syllabarum quantitatem Nemesim esse eam putarent, de qua ex Tibulli carminibus tria sunt in libro secundo, eleg. 3. 4. 6; alii negarunt. De anno huius carminis natali nihil potest certi affirmari, suspicantur tamen scriptum esse intra annos 728—730.

V. 1. *plus nimio*] Propter caesuram rectius hæc cum *memor* adi. coniunguntur quam cum verbo *doleas*. Tribus utitur Horatius formalis cum rem aliquam modum excedere indicat: *plus nimio* Carm. I, 18, 15. Epist. I, 10, 30; *plus aequo* Sat. I, 3, 52. Epist. I,

2, 29. I, 18, 10; *plus iusto* Carm. III, 7, 24. — *immitis Glycerae*] *Γλυκερά* a dulcedine dicta; adiectivo igitur *immitis* gratum aliquod oxymoron efficitur. — *cur*] idem fere in tali sententiarum coniunctione quod *propterea quod*. Similis particulae *cur* usus est apud verba *mirari*, *irasci*, similia, ut Epist. I, 8, 10, Cicer. ad Attic. III, 9: „quod me accusas, cur hunc meum casum tam graviter feram, debes ignorare.“ — *tenui fronte*] cf. Epist. I, 7, 26. Becker. Charicles T. II. p. 392: „Bei Weitem in den meisten Fällen sieht man das lange, reiche Haar weder geflochten noch in künstliche Locken gedreht, sondern, wenn nicht anderer Kopfschmuck hinzukömmt, nach hinten oder auch selbst über dem Scheitel in einen Bündel oder Knoten zusammengefasst und gebunden. Dabei reicht gewöhnlich das Haar tief über die Stirne herab, da ein schmaler Stirnbogen für schön galt.“ — *declinat*] a Lycoride ad Pholoën. vide ad Carm. I, 1, 13. — *capreae lupis*] *ἀδύνατον*; alia exempla Carm. I, 29, 10. Epod. 16, 27 sqq. — *peccet*] de amoribus; cf. Carm. I, 27, 17. Sat. I, 2, 63. — *iuga aënea*] firmissima. Carm. III, 9, 18. — *melior Venus*] cum ego ipse ab elegantiore et commodiore puella ultro peteret, Myrtalæ tamen iracundæ libenter serviebam. — *com-*

15 Libertina fretis acrior Hadriae
Curvantis Calabros sinus.

CARMEN XXXIV.

Parcus deorum cultor et infrequens
Insanientis dum sapientiae
Consultus erro, nunc retrorsum
Vela dare atque iterare cursus.

pede] cf. Carm. IV, 11, 24. — *Hadriae*] Carm. III, 9, 23.

Carmen XXXIV.

Horatius quamquam nulli philosophorum sectae omnino addictus erat (Epist. I, 1, 14), multa tamen ex Epicureorum disciplina, quae ad hilaritatem vitae maxime pertinerent, in suum sibi usum sumpserat. Inde illud est quod Sat. I, 5, 101 sqq. legitur; quibus versibus, scilicet ne deorum hilaris vita regendo et administrando mundo turbetur, omnis deorum de humano genere deque iis quae fieri videmus in rerum natura cura aut providentia tollitur. A qua sententia virili aetate reversus, cum divinam mentem et in rerum natura et in humani generis fatis conspicuam et apertam intellexisset, necessitatem publice etiam retractandae opinionis sibi impositam ratus hoc carmine professus est, providentiam divinam non demonstrari quidem placitis philosophicis sed manifestam esse omnibus, quibus mentis natura et acies libera sit ac non occaecata falsis humanae sapientiae doctrinis. Quare redire se ait ad primos sensus natura humano pectori insitos, relinquere se ieiunam ac frigidam sapientiam perverso acumine procreatam (stroph. 1); nam meliora doctum videre se divinam manum potentem ac valentem in rerum natura, omnia etiam quae maxime videantur aliena inter se coniungentem (str. 2. 3), agnoscere se deorum potestatem ac voluntatem in contrariis et inspera-

tis hominum fatis ac vicissitudinibus (str. 4). Poetam autem decet non abstractas quas vocant sententias proponere, sed exemplis propius animos hominum tangentibus et ex quotidiana vita petitis rem illustrare; sic intelligendus per purum tonans Diespiter, sic apex, regum in Asia ornamentum. Quo ornamento temporis simul notitiam adipiscimur; est enim veri simile, Teridatem significari a Phraate redeunte expulsum. Quod si recte intelligitur, liquet carmen scriptum esse eo tempore quo inter Teridatem et Phraatem bellum Romae quasi fabula fuit; cf. ad Carm. I, 26. II, 2. De qua levi Teridatis significatione non possum non apponere Buttmanni verba Mytholog. T. I. p. 321: „Mit einer Zeitungsnachricht, wenn ich so sagen darf, zur Bestätigung eines Gemeinplatzes, beschlösse sich eine erhabene Ode von nur sechzehn Zeilen nach meiner Empfindung schlecht. Aber in ausgesuchten Worten allgemein gelassen, entspricht der Gedanke der Würde des ganzen, während eine ernste Anspielung, so leicht angebracht, durch die Wahl eines einzigen Wortes, zu einer Zeit, wo jenes Ereigniss wahrscheinlich die allgemeine Aufmerksamkeit beschäftigte, nicht anders als einen höchst wohlgefälligen Eindruck machen konnte.“ Legatur *Lessingius* Opp. ed. Lachm. IV. p. 34.

V. 2. *Insanientis sapientiae*] Oxy-moron; simillimum praeter multa alia est Epist. I, 12, 19. — *consultus*] nove dictum, ut Colum. XI, 1, 12 „univer-

5 Cogor relictos: namque Diespiter,
 Igni corusco nubila dividens
 Plerumque, per purum tonantes
 Egit equos volucremque currum,

Quo bruta tellus et vaga flumina,
 10 Quo Styx et invisi horrida Taenari
 Sedes Atlanteusque finis
 Concutitur. Valet ima summis

Mutare et insignem attenuat deus
 Obscura promens; hinc apicem rapax
 15 Fortuna cum stridore acuto
 Sustulit, hic posuisse gaudet.

sae disciplinae consultus.“ — *cursus relictos*] Cum vulgo dicatur *relegere viam*, similia, Heinsius primus corrigendum putavit *relectos*; quem alii secuti sunt. Iam ex iis quae de universo carmine supra disputata sunt, iudicabis facile quid habendum videatur de hac quam dicunt emendatione. — *Diespiter*] Varro ling. lat. V, 66 Müll.: „Antiquius Iovis nomen; nam olim Diiovis et Diespiter dictus, id est dies (genit. antiq.) pater.“ — *per purum tonantes*] coelo sereno cum tonat, quae contraria sunt coniunguntur; quare inter prodigia habebatur. cf. Virg. Georg. I, 487 sq. Aen. VIII, 527 sqq. — *volucremque currum*] celerem, ut Virg. Aen. X, 440. De curru Iovis cf. Carm. I, 12, 58. — *bruta tellus*] Iovis magna potestas triplici ratione ostenditur, quod movet a) inanimatam naturam v. 9; b) inferos et imas regiones v. 10; c) extrema loca v. 11. Epitheta autem *bruta*, *vaga* eo consilio posita sunt, ut diversam harum rerum naturam illustrent; sentit vim Iovis terra immobilis, sentiunt etiam flumina perpetuo motu agitata. — *Taenari*] ubi antrum erat, per quod de-

scendi ad Orcum posse antiqua fama tradebat. cf. Virg. Georg. IV, 467. — *invisi horrida*] Adiectivorum hac collatione circa caesuram, qua utriusque sonus et vis augetur, horror Orci ad animos legentium et audientium propius accedit. — *valet*] h. v. cum infinitivo coniunctum a poetis transiit in prosam orationem post Augusti aetatem. Ceterum cf. Tacit. Hist. IV, 47: „documenta mutabilis Fortunae summaeque et ima miscentis.“ — *apicem*] cf. Carm. III, 21, 20. — *cum stridore acuto*] Fortuna enim alata est. cf. Carm. III, 29, 53. Semota imagine pertinent haec ad terrorem et tumultum, quem edere solent subitae rerum mutationes. Iam si quaeras qua tandem inter se ratione coniuncti sint Diespiter, deus, Fortuna: Diespiter est numen divinum rerum naturam administrans ex eaque intelligendum; deus v. 13 generalis et individua divina potestas, quae in Fortuna quid velit quid nolit declarat. — *sustulit*] vide ad Carm. I, 1, 4. — *gaudet*] quia arbitrio suo sic indulget. — *hic*] vide ad Epod. 2, 31.

CARMEN XXXV.

O diva, gratum quae regis Antium,
 Praesens vel imo tollere de gradu
 Mortale corpus vel superbos
 Vertere funeribus triumphos,
 5 Te pauper ambit sollicita prece
 Ruris colonus, te dominam aequoris,

Carmen XXXV.

In concipienda notione ac describenda potestate deorum non tota antiquitas unam eandemque rationem secuta est; eundem deum alium formarunt et cogitarunt Graeci, alium Romani, alium adeo aliae urbes. Ut Fortunam superiore carmine et III, 29, 49—54 Graecam magis, incertam et aliam habemus, sic hoc Fortunae Antiatias i. e. vere Latinae notio et imago Latinis coloribus describitur et celebratur. Haec enim Fortuna Antias non *Τύχη* est, non anceps dea, non arbitrio et libidine agit (cf. Carm. sup. v. 16), sed benigna est et benevola eademque potentissima. Quaecunque facit, quoscunque homines tollit aut deiecit, in iis necessitatem aliquam fixam et firmam sequitur, hominum bonis malisque facinoribus rerumque condicione sibi ipsi impositam. Cum benigna sit dea, in nummis Romanis altera manu gerit gubernaculum altera cornu Copiae (inde v. 5—8 ruris colonus et nauta); cum certas leges sequatur in distribuendis retrahendisque donis, apud Horatium (fortasse ex imagine quadam Antiana) *Necessitas* dea cum omni devinciendi et continendi apparatu eam praestitit (v. 17 sqq.), sequuntur Spes et Fides (v. 21 sq.). Hanc igitur Fortunam Horatius h. l. celebrat, occasionem fortasse nactus ab expeditionibus quas Octavianus a. 727 in Britanniam et Arabiam parabat (v. 29 sqq.). Rem sic instituit; prima enim strophæ „tu, inquit, Fortuna potentissima es; quare omnes mortales te timent, pauperes et divites, nationes et civitates, barbari et Romani, ne rerum statum quo recte sibi videntur gaudere subita vi evertas (str. 2. 3. 4). Sed tu non libidine res regis

hominum, sed sequeris immutabiles necessitatis et ipsarum rerum leges et eventus (str. 5); quamobrem Spes et Fides comitantur te et infelices, quorum domos Necessitate coacta moestu vultu et habitu relinquis (str. 6). Nam ab innocentibus perfidum solum vulgus et qui sua utilitate sola ducuntur cum tuis donis recedunt (str. 7). Tu igitur tutare Caesarem quaeque conatur adiuvare; hoc enim nobis erepto dilaberemur iterum discordia, cuius non dici potest quantopere nos poeniteat. Gladios nostros nostro cruore infectos et profanatos novis tu auspiciis consecra inque iustos hostes converte (str. 8. 9. 10).“ Illae expeditiones, primae quidem quae compositis bellis civilibus magnae parabantur, quid ad exstirpandam domesticorum motuum foedam memoriam valuérunt extrema pars carminis ostendit; quare iis potissimum ut adsit Fortuna Antias, ex intimo animo Horatius petit. Scriptum videtur carmen u. a. c. 727.

V. 2. *Praesens*] de diis usurpatum idem quod *potens* significat. Sic h. l. et Cicer. Tusc. I, 12, 28. Carm. III, 5, 2. Sat. II, 3, 68. Epist. II, 1, 134. — *ambit*] Ab ambitu candidatorum sensim h. v. in quacunque precandi et rogandi notionem dilatatum videtur. cf. Virg. Aen. IV, 283. VII, 333. — *ruris colonus*] Coloni, non quivis agricolae vel rustici, prae aliis inopes; aut enim partiarum erant aut mercede agros colebant. cf. Sat. II, 2, 115. Carm. II, 14, 12. — *Bithyna carina*] propter frequentem Romanorum in Bithynia mercaturam, cf. Carm. III, 7, 3. Similiter Carm. I, 1, 13. III, 6, 31. — *profugi*] Cur ita appellentur, discas ex Carm. III, 24, 9 sq. — *et*] vide ad Carm. I, 7, 6.

V. 14. *Stare*] de aedificiis exstru-

Quicumque Bithyna lacessit
Carpathium pelagus carina.

Te Dacus asper, te profugi Scythae
10 Urbesque gentesque et Latium ferox
Regumque matres barbarorum et
Purpurei metuunt tyranni,

Iniurioso ne pede proruas
Stantem columnam, neu populus frequens
15 Ad arma cessantes, ad arma
Concitet imperiumque frangat.

Te semper anteit saeva Necessitas
Clavos trabales et cuneos manu
Gestans aëna, nec severus
20 Uncus abest liquidumque plumbum.

Te Spes et albo rara Fides colit

ctis et perfectis, ut Ovid. Met. III, 131. XI, 205. Columna firmitatis signum est et dominationem firmissimam indicat. In antiquis monumentis Paci, Securitati, Felicitati columna additur. Iam quae insequuntur *neu pop. freq.* nihil novi addunt, sed Horatiano more eandem rem uberius collustrant. — *populus frequens*] non plurima pars populi, sed multitudo concitatorum hominum reliquos exagitantium ad armaque vocantium. Dein *ad arma* bis positum est in illustribus locis (i. e. in prima et extrema sede versus), ut repetitum ac terribilem clamorem ipsi ad tumultum quasi admissi audiamus. cf. Ovid. Met. XII, 241.

V. 17. *saeva*] Pro vulgata hac scriptura multi et antiquissimi codices praebent *serva*, quod cum et antiquissimorum codicum adnotationibus et scholiastarum auctoritate commendetur, fortasse praestat alteri. Ceterum Laminus: „intelligendum est, haec fuisse Antii in tabula depicta, quae nunc Horatius nobis pulcherrimis versibus expressa proponit.“ Fuit etiam, qui de pompa sollenni cogitaret, in qua statuae Necessitatis, Fortunae, Spei et Fidei portarentur, ita ut Fortunam Necessitas praeiret, Spes Fidesque seque-

rentur. — *clavos trabales*] Hi et reliqua, quae Necessitati tribuuntur, exprimunt firmitatem ac stabilitatem. cf. Carm. III, 24, 7. Nam in proverbium etiam transiit *clavo trabali figere aliquid*, quo certissimum aliquid esse indicaretur. cf. Cic. Verr. II, 5, 21: „Ut hoc beneficium, quemadmodum dicitur, clavo trabali figeret.“ In monumentis etiam *clavi* Fortunae Antii tribuuntur. Uncis autem ferreis (ideo severis) lapides firmissime continentur, praesertim cum *liquidum* iis *plumbum* circumfundatur. Multi hunc Horatii locum vituperarunt (veluti Lessingius Laocoon Opp. ed. Lachm. VI. p. 143) propter nimiam rerum attributarum copiam oculos magis quam aures moventium. Herder Krit. Wälder. Werke zur schön. Lit. u. Kunst. XIII. p. 139 sqq. Horatium non minus reprehendit. — *albo panno*] candoris et innocentiae signum. — *abnegat*] se. se, ut Ovid. A. A. I, 127: „Si qua repugnatat nimium comitemque negarat (se).“ Ceterum poeticum hoc vocabulum post Augusti demum aetatem ad prosam orationem transiit. cf. Ovid. ex Pont. I, 9, 15: „Adfuit ille mihi, cum pars me magna reliquit, Maxime, Fortunae nec fuit ille comes.“ Iuvenal. Sat.

Velata panno nec comitem abnegat,
 Utcunque mutata potentes
 Vestē domos inimica linquis.

25 At vulgus infidum et meretrix retro
 Periura cedit, diffugiunt cadis
 Cum faece siccatis amici
 Ferre iugum pariter dolosi.

Serves iturum Caesarem in ultimos
 30 Orbis Britannos et iuvenum recens
 Examen Eois timendum
 Partibus Oceanoque rubro.

Eheu cicatricum et scelēris pudet
 Fratrumque. Quid nos dura refugimus
 35 Aetas? quid intactum nefasti
 Liquimus? unde manum iuventus

Metu deorum continuit? quibus
 Pepercit aris? O utinam nova
 Incude diffingas retusum in
 40 Massagetis Arabasque ferrum!

CARMEN XXXVI.

Et thure et fidibus iuvat
 Placare et vituli sanguine debito

10, 73' „sed quid Turba Remi? sequitur Fortunam semper et odit Dam-natos.“ — *utcunque*] vide ad Carm. II, 17, 11. — *mutata veste*] mutare vestem; i. e. togam sordidam induere solebant Romani ad significandam aliquam calamitatem et luctum; unde *sorditati*/rei erant.

V. 25. Quod in superiore strophā tacite factum est, id his versibus aperte proditur: confudit enim Horatius ipsam deam cum statu hominis cum adversa fortuna conflictantis, qua re aliorum magnam laudem, aliorum gravem castigationem meruit. — *siccatis*] vide ad Carm. I, 31, 11. — *amici dolosi*] de quibus egregium graecum prover-

bium: „ξεί χότρα, ξή φίλῳ.“ — *quid nos*] gravis interrogationum cumulus; similiter in eadem re Carm. II, 1, 29 — 36. De re compara Carminis III, 6 primam et ultimam stropham. — *aetas*] Wex. ad Tacit. Agric. c. I „*aetas*, γενεά et poetis frequentatum nec Ciceroni inusitatum. Brut. 9, 36. de orat. I, 10, 40. 37, 171.“ — *diffin-gas*] aliter ac prius fuerat formes; rarissimum vocabulum. .cf. Carm. III, 29, 47. — *nova incude*] non ea qua olim ad bella civilia cusum erat.

Carmen XXXVI.

Celebrat Plotii Numidae post longam absentiam ex Hispania reditum. Plotii

- Custodes Numidae deos,
 Qui nunc Hesperia sospes ab ultima
 5 Caris multa sodalibus,
 Nulli plura tamen dividit oscula
 Quam dulci Lamiae, memor
 Actae non alio rege puertiae
 Mutataeque simul togae.
 10 Cressa ne careat pulchra dies nota,
 Neu promptae modus amphorae,
 Neu morem in Salium sit requies pedum,
 Neu multi Damalis meri
 Bassum Threïcia vincat amystide,
 15 Neu desint epulis rosae
 Neu vivax apium neu breve lilium.
 Omnes in Damalin putres

nomen reperitur in scholiis antiquis, quamquam libri fluctuant inter Plotium et Pomponium. Scriptum fortasse carmen est a. 730, siquidem cum Augusto, non ante Augustum, Numida ex Hispanico bello rediit. De Aelio Lamia vide ad Carm. I, 26; Damalis libertinae nomen. Similis argumenti est Carm. II, 7; simile etiam Carm. III, 14 de reverso Augusto; in hoc tamen diversus color, maior licentia, effrenatius gaudium.

V. 2. *placare*] Dii etiam si non sunt irati *placantur*, nimirum ne irascantur, si non persolvantur sacrificia debita. Carm. III, 23, 3. Sat. II, 3, 206. Epist. I, 16, 58. A. P. 210. — *Hesperia*] vide ad Carm. II, 1, 32. — *non alio rege*] Quid hoc sit, videbis ex Epist. I, 1, 59. — *puertiae*] De syncope vide ad Carm. II, 2, 2. — *mutat. sim. togae*] Cum essent aequales, eodem tempore togam virilem sumpserunt; quod post annum decimum quintum fieri solebat. — *Cressa nota*] i. e. alba, quia creta ex Cimolo, parva insula prope Cretam sita, Romam advehebatur. Solebant laetos dies albis, tristes nigris calculis notare; inde dicitur dies candidiore nota, meliore lapillo, candidissimo calculo, lactea gem-

ma, similia. — *promptae amphorae*] Carm. III, 21, 8. I, 37, 5. — *morem in Salium*] Salii Martis sacerdotes certis anni temporibus cum tripudiis et sollennibus saltibus carmina cantabant. cf. IV, 1, 28. Liv. I, 20. Tibure etiam Salii erant Herculis sacerdotes. cf. Virg. Aen. VIII, 285. *Salium* adiectivum esse videtur, non genit. plur. pro *Saliorum*; nominantur enim *Saliae* etiam virgines. — *multi Damalis meri*] Ex eiusmodi locis intelligitur, quam late patuerit genitivi, quem qualitatis grammatici vocant, apud Romanos usus, neque apud poetas solum sed etiam apud Ciceronem ad Fam. IX, 26: „homo non multi cibi sed multi ioci.“ Ovid. Met. XIV, 252. — *Bassum*] Quis fuerit Bassus nescimus; natura autem loci fert, ut eum in talibus computationibus modestum fuisse credamus et abstinenter. Nam hoc dicit Horatius: bibacissima Damalis ne vincat hodie Bassum i. e. Bassus alias temperantis- simus hodie communi laetitia motus plurimum bibit. — *amystide*] ἀμυστίς, συνεχρῆς πόσις, ἀπὸ τοῦ ἀμυστὶ πλύνειν. Thraeces autem homines vinolenti. cf. Carm. I, 27, 2. — *rosae*] vide ad Carm. II, 3, 13. In insequentibus autem *vivax* et *breve* adiectiva nihil volunt aliud nisi ut grata quae-

Deponent oculos, nec Damalis novo
Divelletur adultero

20 Lascivis hederis ambitiosior.

CARMEN XXXVII.

Nunc est bibendum, nunc pede libero

Pulsanda tellus, nunc Saliaribus

Ornare pulvinar deorum

Tempus erat dapibus, sodales.

5 Antehac nefas depromere Caecubum

dam florum oppositio efficiatur. — *putres*] molles. — *deponent*] in illa in-
tuenda immobiles manebunt. Unde
sumptum sit vocabulum, videbis ex
loco Ciceronis de off. III, 25, 6. 7. —
ambitiosior] Epod. 15, 5; vocabulum
h. l. primam amplectendi significatio-
nem retinuit.

Carmen XXXVII.

Cum u. a. c. 724 mense Septembri
a M. Tullio Cicerone, oratoris filio,
nuntius Romam perlatus esset de ca-
pta Alexandria deque voluntaria An-
tonii et Cleopatrae morte, Horatius
hoc carmine ad privatam et publicam
laetitiam Romanos evocavit. Exordium
carminis ab Alcaeo sumptum esse aperte
ostendit hoc de Myrsili, Lesbi tyranni,
morte fragmentum (p. 268 Schneide-
win.):

Νῦν χρόη μεθύσθην καὶ τινα
πρὸς βίαν
Πίνην, ἐπειδὴ κἀτθανε Μύρ-
σιλος.

Quod quidem exordium ita cohaeret
cum reliqua parte carminis, ut, gau-
dendum esse cum dictum sit, toto de-
inde carmine cur sit exponatur. Unde
miro modo factum est, ut transitione
ab exordio ad tractationem rei facta
uno tenore sententia ad finem de-
currat. Gaudendum igitur est, inquit,
privatum et publice, cum infestissima
Romano nomini adversaria mortem sibi
ipsa consiverit, exitium ac perniciem
minata imperio Romano, Caesaris ta-

men armis et fortuna devicta (stroph.
2, 3. 4). Quae quam magna fuerit
quamque timenda, morte etiam com-
probavit (str. 6. 7. 8). Ex quo vi-
des, duplicem esse laetitiae de Cleo-
patrae morte causam, alteram in odio
positam quo illa in Romanos fuërit
accensa, alteram in magnitudine animi,
quo nisi a maiore esset victa, satis-
facere ea potuisset odio. Sic ultro
efficitur Cleopatrae et Octaviani com-
paratio duabus imaginibus in medio
carmine (str. 5., nam prima strophæ
ab hac partitione separanda est) collo-
catis. Propter negligentiam caesurae
v. 5. 14 et synaloephen v. 5 inter
prima carmina hoc referendum esse
non pauci putant. Ego non consentio,
quamquam alia etiam insunt quae lau-
dem non mereantur; vide supra p. 6.
Cf. Epod. 9.

V. 1. *bibendum*] Potatio et saltatio
referendae sunt ad privatam laetitiam,
reliqua ad publicam. Ad supplicatio-
nes et lectisternia sodales evocare non
potuit privatus homo; quare non scri-
psit *tempus est*, sed *tempus erat*, qui-
bus verbis poeta publicam laetitiam
comprobat. — *Saliaribus*] Saliorum
dapes per sacros dies lautae esse so-
lebant, inde etiam quae aliae opiparae
erant Saliarum appellabantur. Similiter
Carm. II, 14, 28. — *Caecubum*] gene-
rosus vinum; ager est in Latio prope
Fundos ad viam Appiam. — *dementes*
ruinas] Enallage adiectivi neque ea
improbanda, nam quae parantur ruinae
a demente muliere, dementes poetica

Cellis avertis, dum Capitolio

Regina dementes ruinas

Funus et imperio parabat

Contaminato cum grege turpium

10 Morbo virorum, quidlibet impotens

Sperare fortunaque dulci

Ebria; sed minuit furorem

Vix una sospes navis ab ignibus,

Mentemque lymphatam Mareotico

15 Redegit in veros timores

Caesar ab Italia volentem

Remis adurgens, accipiter velut

Molles columbas aut leporem citus

Venator in campis nivalis

20 Haemoniae, daret ut catenis

Fatale monstrum; quae generosius

Perire quaerens nec muliebriter

Expavit ensem nec latentes

Classe cita reparavit oras;

ratione appellantur. — *funus et*] vide ad Carm. I, 2, 9. — *contaminato cum grege*] turba hominum impurorum, foedorum. Audacius dicta sunt haec et obscurius *turpium morbo virorum*; *morbus* est ipsa insana libido, qua animus simul et corpus corrumpitur et deformatur. Quare magna inest acerbitas in nomine *virorum*, cuius omnis vis ac dignitas epithetorum pravitate (*turp. morb.*) tollitur. cf. Tacit. Ann. XV, 37 „nisi paucos post dies uni ex illo contaminatorum grege denupsisset.“ Ceterum ingeniosa nuper proposita est coniectura *Verbo virorum*. — *impotens*] impotens est qui libidine et cupiditate captus sibi ipse temperare nequit. — *fortuna dulci*] vide ad Carm. I, 16, 23.

V. 13. *furorem*] intemperantiam et arrogantiam, qua quidlibet sperare ausa erat. — *lymphatam Mareotico*] Iterum obscurior locus. Lymphatus enim est *νυμφόληπτος*, cui a nym-

phis vel a quocunque deo subitus terror iniectus est. Quare apertum est, indicari subitam Cleopatrae ex pugna Actiaca fugam, in quam vano quodam pavore coniecta Antonio relicto Aegyptum petiit. *Mareotico* vino, quod dulce fuit et odoriferum, luxuriosae Antonii et Cleopatrae computationes significantur, quas ebrietas sequitur et „furiales somni et inquietas nocturna“, ut Plinius dicit H. N. XIV, 22. Vino igitur illa in vanum timorem homines coniciendi vis tribuitur. — *ab Italia volentem*] Id enim speraverat insana mulier, fore ut cum Antonio victore victam etiam Italiam suo arbitrio subiceret. — *accipiter velut*] Hom. II. XXII, 139. — *Haemoniae*] ab Haemone, antiquo rege, Thessali patre, Thessalia sic nominata.

V. 21. *fatale monstrum, quae*] Monstrum appellatur Cleopatra, ut apud Lucan. X, 59: „Dedecus Aegypti, Latii feralis Erinny.“ Constructio autem

25 Ausa et iacentem visere regiam
 Vultu sereno, fortis et asperas
 Tractare serpentes, ut atrum
 Corpore combiberet venenum,

Deliberata morte ferocior,

30 Saevis Liburnis scilicet invidens
 Privata deduci superbo
 Non humilis mulier triumpho.

CARMEN XXXVIII.

Persicos odi, puer, apparatus,
 Displicent nexae philyra coronae;

est πρὸς τὸ σημαίνονμενον, ut Cic. ad Fam. I, 9, 15 „illa furia muliebrium religionum, qui cet.“ — *ensem*] Plut. Anton. 79: „Θεασαμένη τὸν Προκλήϊον ὥρμησε μὲν αὐτὴν πατάξαι· προςδραμὼν δὲ ταχὺ αὐτὴν ἐκώλυνσεν.“ Sententia ipsa perspicua est; nam „Cleopatra, inquit, generosam mortem servituti ac dedecori praeferens neque ignavia, qua mulieres esse solent, quominus manum sibi inferret prohibita est, neque in remotas regiones fugiens vitam servare studuit et regnum. Etenim *latentes orae* sunt remotae, et *reparare oras* quid aliud esse potest nisi hoc quod Orellius vidit? „Alias sibi parare et assequi studuit regiones pro illis, quas amittendas Caesarique relinquendas esse videbat, i. e. pro Aegypto.“ Nihil igitur opus est coniecturis: *penetravit, peraravit, remeavit, recreavit*. Post *oras* non potest poni punctum, absolutae sententiae signum; nam quae insequuntur *ausa* et *fortis* gravem efficiunt antithesin. Per participia et adiectiva participiorum ratione collocata ad finem continuatur oratio. — *asperas*] quae bene non tractantur, quas tractare periculosum est. — cf. Carm. I, 23, 9. III, 2, 10. — *Liburnis*] Liburnae, parva et velocia navigia. cf. Epod. 1, 1. — *privata deduci*] Nominativus cum infin. ad graecum morem positus est, ubi utrumque verbum in-

videns et *deduci* in eadem persona coniunguntur. Dicitur autem Cleopatra saepe dixisse: οὐ θριαμβεύσομαι. — *privata*] regia dignitate amissa.

Carmen XXXVIII.

Ut totum genus lyricum sic habitum carminum a Graecis haud raro adoptavit Horatius; inde huius carminis forma. Nam frequenter lyriici graeci pocillatores etiam alloquebantur, quibus quid sentirent quidve vellent exprimerent. Ex quo genere Anacreontica sunt in Mehlhornii anthologia lyrica tertium p. 52. octavum p. 54: „Φέρε' ὕδωρ, φέρε' οἶνον, ὦ παῖ, Φέρε δ' ἀνθεμῶντας ἡμῖν Στεφάνους· ἔνεικον, ὥς μὴ Πρὸς Ἑρώτα πνικαλίξω.“ Caput autem huius carminis hoc est: ad hilaritatem non opus esse magno apparatu, in conviviis quoque simplicitatem se praeferre splendori. — De tempore quo videatur carmen scriptum esse nihil potest investigari, nisi quod *sera rosa* clare indicatur posterior pars aetatis, qua rosae florere iam desinunt.

V. 1. *Persicos apparatus*] De Persarum luxuria vide Corn. Nepot. Pausan. 3. Xenophon. Cyrop. VIII, 8, 15—19. Herod. IX, 82. Nomen *apparatus* praeter h. l. non facile apud ullum poetam reperietur. — *philyra*] Plin. H. N. XVI, 14: „Inter corticem

Mitte sectari, rosa quo locorum
Sera moretur.

5 Simplici myrto nihil allabores
Sedulus curo: neque te ministrum
Dedecet myrtus neque me sub arta
Vite bibentem.

ac lignum (tiliae arboris) tenues tunicae multiplici membranula, e quibus vincula tiliae vocantur, tenuissimae earum *philyrae*, coronarum lemniscis celebres.“ De his Becker Gall. T. II. p. 216: „An Denkmälern findet man häufig Kränze, wo Blatt über Blatt liegt oder Rose an Rose sitzt, und es ist wohl möglich, dass an solchen die Blätter oder Rosen auf ein Band oder einen Streifen Bast, *philyra*, geheftet waren: sie würden dann mit Recht *sutiles* heißen.“ Ovid. Fast. V, 335 sqq.: „Tempora sutilibus cinguntur to-

ta coronis Et latet iniecta splendida mensa rosa: Ebrius incinctis *philyra* conviva capillis Saltat.“ — *allabores*] vide ad Carm. I, 5, 8. — *sedulus*] coniungendum hoc cum *allabores*. Ceterum *Bentleius* e coniect. *sedulus cura*, ut *cura* sit imperativus; alii ex uno cod. *curae*, ut sit pro *in cura* s. *sedulo curans*; fuit etiam qui mallet scribere „*sedulus cur? o neque* etc.“ — *ministrum*] nam pocillatores quoque sertis redimiebantur. — *arta vite*] umbrosa, densa.

Q. HORATII FLACCI

C A R M I N U M

LIBER SECUNDUS.

CARMEN I.

Motum ex Metello consule civicum
Bellique causas et vitia et modos
Ludumque fortunae gravesque
Principum amicitias et arma

Carmen I.

C. Asinius Pollio a. u. c. 679 natus magnis ingenii animique virtutibus instructus civilibus bellis egregiam sibi belli pacisque gloriam paravit. Nam cum a. 714 consul esset creatus, pacem inter Antonium et Octavianum Brundisiam conciliavit, et insequenti anno victis Parthis, Illyrica gente, triumphum impetravit. Deinde bello abstulit omnemque laudem in litteris bonisque artibus quaesivit. Iam eloquentia civibus adfuit, civilium rerum peritia senatum adiuvit, tragoediis amicos delectavit. Primus Romae publicam bibliothecam et scriptorum privatas recitationes mutuaeque amicorum iudicia instituit. Iam scimus scripsisse Asinium historiarum bellorum civilium libros XVII; ac videtur partem eius operis amicis recitasse. Inter quos cum adesset Horatius praestantia operis tantopere motus est, ut suum et de opere et de viro iudicium hoc carmine proderet. — Quo anno scriptum sit

carmen, pro certo non potest affirmari; quamquam veri simillimum videtur, civilia bella composita quidem esse sed animis nondum reconciliatis ignem sub cineribus latuisse; itaque refertur ad a. u. c. 725.

V. 1. *Metello*] Q. Caecilio Metello Celere L. Afranio Coss. a. u. c. 694. — *civicum*] antiquior forma adiectivi et prope nobilior. cf. Carm. III, 24, 26. Epist. I, 3, 23. — *bellique*] Vv. 1—8 significantur origines rationesque bellorum civilium; particula *que* triplice tres efficiuntur partes, quae ipsae intercedentibus et particulis iterum dividuntur. Nam genitivus *belli* non ad causas magis quam ad *vitia et modos* referendus est, ut bellum unde ortum sit, quid sit in eo peccatum, et quomodo gestum versu secundo indicatum habeamus. Accedit *ludus Fortunae*, quo homines iactantur, neque sunt minoris momenti *principum amicitiae*, quae rempublicam quam iuvare debebant turbarent ideoque *graves* appellantur. —

5 Nondum expiatis uncta cruoribus,
 Periculosae plenum opus aleae,
 Tractas et incedis per ignes
 Suppositos cineri doloso.

Paulum severae Musa tragoediae
 10 Desit theatri: mox ubi publicas
 Res ordinaris, grande munus
 Cecropio repetes cothurno,

Insigne moestis praesidium reis
 Et consulenti, Pollio, curiae;

15 Cui laurus aeternos honores
 Dalmatico peperit triumpho.

Iam nunc minaci murmure cornuum
 Perstringis aures, iam litui strepunt,
 Iam fulgor armorum fugaces
 20 Terret equos equitumque vultus.

arma] Haec quoque principum sunt, ita ut foedera eorum et arma aequae perniciose fuisse dicantur. — *cruoribus*] plur. num. de magnitudine caedis. cf. Virg. Aen. IV, 687. — *aleae*] Animis nondum pacatis odium leviter tectum in scriptorem a partium studio non prorsus alienum facile incenditur. *per ignes*] Per cineres facile erumpit incendium et comburit eum qui nimia fiducia per eos procedit. Summa igitur cautione opus est.

V. 9. cf. Sat. I, 10, 42. Virg. Buc. 8, 10. — *publicas res*] cf. Cic. de orat. I, 11 „sine multa pertractatione omnium rerum publicarum.“ — *ordinare*] est temporum et causarum rationibus componere. — *Cecropio cothurno*] Cothurnus tragoedorum, soccus comoedorum. Tota autem res scenica apud Athenienses originem cepit et incrementa. — *insigne*] Aptissimo loco et quasi sponte sua ad reliquas Pollionis laudes fertur; sunt autem petitae ex eloquentia, prudentia civili, bellica virtute. — *consulenti*] absolute positum, deliberranti. Liv. XXI, 16. Virg. Aen. XI, 335. Senatorum est consulere; qui

optime suadet, is consulentibus praesidio est. — *moestis reis*] cf. Carm. IV, 1, 14. De dativo cf. Carm. I, 15, 21. — *Iam nunc*] Videtur Pollio ab initio operis descripsisse magnitudinem imperii Romani, splendidae Pompeii Caesarisque de exteris nationibus reportatas victorias, quibus totus orbis terrarum subiectus est praeter virtutem Romanam. Ea autem significatur atrocitate Catonis. Cuius nomine poetae animus facile fertur in Africam, cum praesertim maior quoque Cato Karthaginem delendam esse perpetuo olim censuisset. Verum aemula illa sublata ingentis imperii vires inter se discordes ad domestica bella ruebant. Haec igitur sunt, quae tribus strophis usque ad v. 28 exponuntur. Anaphora autem *iam nunc, iam, iam, iam* vegetam describendi rationem Pollionis collustrat ad magnamque expectationem movendam aptissima est. — *cornuum*] vide ad Carm. I, 1, 23. Pugnae interesse sibi videntur, qui Pollionem legentem audiunt. — *fugaces*] Equorum natura fugax est, neque ruerent ii in adversam aciem, nisi frenorum et calcarum vi pellerentur.

Audire magnos iam videor duces

Non indecoro pulvere sordidos

Et cuncta terrarum subacta

Praeter atrocem animum Catonis.

25 Iuno et deorum quisquis amicior

Afris inulta cesserat impotens

Tellure victorum nepotes

Rettulit inferias Iugurthae.

Quis non Latino sanguine pinguior

30 Campus sepulcris impia proelia

Testatur auditumque Medis

Hesperiae sonitum ruinae?

Qui gurges aut quae flumina lugubris

Ignara belli? quod mare Dauniae

V. 21. *Audire*] Non concionantes quidem, sed inter pugnandum clamantes, se suosque milites ad fortiter pugnandum stimulant, hostem provocantes. — *non indecoro*] vide ad Carm. I, 1, 19. — *cuncta terrarum*] cf. Carm. IV, 12, 19. Tacit. Hist. V, 10 „cuncta camporum.“ De re Vellei. II, 56 „Caesar omnium victor regressus in urbem quinque egit triumphos, Gallicum, Ponticum, Alexandrinum, Africum, Hispaniensem.“ Haec quoque bene referuntur ad verbum *audire*; nam victorias quoque legentem Pollionem poeta audit. Quare Bentleyi coniectura *videre* ut simplicissima ita maxime otiosa est. cf. Hom. Od. IX, 166: „ἐλεύσσομεν καπνὸν τ' ἀντῶν τε φθογγήν.“ Splendida autem ἀντίθεσις est inter terrarum orbem et unum Catonem. — *Iuno*] patrona Africae et Karthaginis, irata Romanis, Aeneae posteris. Carm. III, 3, 32. Virg. Aen. I, 15. — *Deorum quisquis*] Tenendum est cum regione vel gente victa etiam deos patrios quodam modo vinci; quare qui urbem aliquam oppugnabant, ii deos, ne cum his sibi res esset, evocare solebant; et dii urbes ad exitum destinatas relinquere dicebantur; Virgil. Aen. II, 351. De coniunctione hac *Iuno et quisquis* conferas Ovid. Met. I, 262. —

V. 29. Horatius unde originem publicae calamitatis duxerit, multis locis ostendit; ut Carm. I, 35, 33. III, 5, 7. III, 6, 7. 45. III, 24, 25 sqq. cet. Posterius luebant quae impie et iniuste maiores fecerant; atque etiam bellum Iugurthinum semina posuerat belli inter Marium et Sullam gesti. — In insequentibus duabus strophis animadvertite aequabilitatem membrorum; quae sunt quattuor, quorum primum et tertium negantem particulam (*quis non* — *quod non*), alterum et quartum verba habent negantia (*ignara* — *caret*). — *Hesperiae*] adiectivum est, non substantivum. Iuditum hoc nomen est et *Italiae*, Graecis occidentem versus sitae (Carm. III, 6, 8. IV, 5, 38. I, 28, 26) et *Hispaniae* etiam Italis occidentem versus sitae (Carm. I, 36, 4. IV, 15, 16. II, 17, 20). — *Medi*] Hi significant nihil aliud nisi remotissimam orientis regionem; quare ἀντίθεσιν noli praetermittere inter Medos et Hesperiam. — *Dauniae*] Latinae, συννεδοχικῶς. Carm. IV, 6, 27. Similis locus est Carm. III, 6, 34. II, 12, 2. Ceterum cf. Flor. IV, 2: „Commisum est bellum civile intra Italiam, inde se in Galliam Hispaniamque deflectit, reversumque ab occasu totis viribus in Epiro Thessaliaque consedit; hinc in Aegyptum subito transiit;

35 Non decoloravere caedes?

Quae caret ora cruore nostro?

Sed ne relictis, Musa procax, iocis

Ceae retractes munera neniae;

Mecum Dionaeo sub antro

40 Quaere modos levioire plectro.

CARMEN II.

Nullus argento color est avaris

Abdito terris, inimice lamnae

inde respexit Asiam; inde Africae incubuit; postremo in Hispaniam regnavit et ibi aliquando defecit."

V. 35. *decoloravere*] Seneca Quaest. Nat. II, 41: „Decoloratur id, cuius color vitiatur, non mutatur; coloratur id, cuius alia fit quam fuit facies.“ Ceterum praepositio *de* in compp. saepe intendit notionem, ut in *debachari* Carm. III, 3, 55; *desaevire* Epist. I, 3, 14; *decertare* Carm. I, 3, 13; *deproeliari* Carm. I, 9, 11; *delitigare* A. P. 94; *denarrare* Sat. II, 3, 315; *deperire* Epist. II, 1, 40; *deproperare* Carm. II, 7, 24; *depugnare* Epist. II, 1, 184. — *iocis*] Sic poetae poemata sua levioris generis saepe vocant, itaque rei nomen ad carmen transfertur. — Vehementia doloris cum longius abreptum se sentiat neque suum esse intellexerit tantas calamitates aut describere aut deflere, subito desinit. Musa est procax, quae aliena sibi arrogat; Horatii Musa iocosa est, cf. Carm. III, 3, 69. I, 6, 17. — *neniae*] Cic. de leg. II, 24: „Honoratorum virorum laudes in concione memorentur easque etiam cantu ad tibicinem prosequantur, cui nomen nenia.“ Cf. Carm. II, 20, 21. Deinde neniae appellantur cantus quibus nutrices infantes sopiunt (Epist. I, 1, 62. cf. Carm. III, 28, 16). Omnino sic appellantur carmina lugubria, qualia Simonides Ceo insula oriundus composuit. — *Dionaeo*] Dione, mater Veneris. Hom. II. V, 370. — *antro*] cf. Carm. III, 4, 40. III, 25, 4. II, 19, 1. Poetae Veneris antra in-

gressi non bella sed amores canunt. — *levioire plectro*] Argumenti levitas ad lyram transfertur et ad plectrum; scilicet in levi re graviter pulsare fides non decet. Contrarium est Carm. IV, 2, 33. cf. Ovid. Met. X, 150. 152. — *modos*] carmina, Weisen. Carm. II, 12, 4. 9, 9. III, 9, 10. 3, 72. IV, 6, 43.

Carmen II.

Cum divitiae ipsae non habeant cur expetantur, is summa laude dignus est qui bonis suis optime utitur neque summum bonum in magnitudine rerum ponendum esse putat. Nam cupiditas animi nullis finibus coercetur, et is vere rex est, is vere dives est qui sibi, non aliis imperat. — Scriptum est carmen ad C. Salustium Crispum, quem C. Salustius, Romanarum rerum scriptor, sororis nepotem in nomen adsciverat. Qui cum adolescentulus magnis divitiis non bene usus esset (Sat. I, 2, 48), virili aetate laudem sapientiae et liberalitatis coniungeret, aptissimus Horatio visus est, cuius nomine eiusmodi carmen ornaret; cum praesertim metalla aeris in Centronum Alpino tractu haberet. Adhortationis vel vituperationis in carmine nihil inest. Versibus 5 et 17 facile efficitur, ut compositum hoc credamus anno fere 730; Phraates enim restitutus est a. 730, et Proculeii fratres post a. 732, quo anno Fannii Caepionis et Licinii Murenae coniuratio contra Augustum

Crispe Salusti, nisi temperato
Splendeat usu.

5 Vivet extento Proculeius aevo,
Notus in fratres animi paterni;
Illum aget penna metuente solvi
Fama superstes.

Latius regnes avidum domando
10 Spiritum, quam si Libyam remotis
Gadibus iungas et uterque Poenus
Serviat uni.

detecta est (vide infra ad carmen X), commemorare Horatium vix decuit.

V. 1. *color*] Hic est qui allicit hominum animos; in metallis neque argento neque auro color est; ad lucem protractis cum colore et splendore pretium accrescit. Alii minus recte interpretati sunt de argento in terram defosso. — *avaris terris*] Metalla non sine magno labore aperiuntur; reluctatur quasi terra, unde *avara* appellatur. cf. Carm. III, 3, 49. — *laminae*] per syncopen pro *laminæ*; sic Carm. I, 36, 8 *puertiae*; IV, 13, 20 *surpue-rat*; Epod. 9, 1 *repostus*; Sat. I, 1, 49 *portarit*; I, 2, 113 *soldo*; I, 9, 7 *noris*; I, 3, 53 *caldu*. cf. Carm. II, 16, 3. Epist. I, 9, 6. 15, 36. Laminam autem cum contemptu dixit et opposuit argento facto. — *nisi*] Hypothesica haec enuntiatio coniungenda est cum vocativo: *qui es inimicus, nisi*. Simillimi loci Carm. II, 3, 4 sq. Sat. I, 2, 74. — *Proculeius*] C. Proculeius Varro Murena, eques Romanus, frater Terentiae Maecenatis, rarissimae pietatis erga fratres fuit, adeo ut bona sua cum illis, qui bello civili omnia amisissent, aequis partibus divideret. — *animi paterni*] In genitivo graeca ratione posito, ne latine dicenti languida aliqua opus esset praepositione; causa inest. Sic Carm. IV, 13, 21. — *extento aevo*] Aevum saepe apud Horatium id est temporis spatium, quod mortalibus datum est ad vivendum. Sic Carm. II, 9, 13. III, 11, 36. Epist. I, 20,

26. *Aevum extendere* est vitae annos augere, ut si quis vivat extento aevo, is etiam post mortem vivat. Ovid. Met. I, 662: „Sed nocet esse deos, praeclusaque ianua leti *Aeternum* nostros luctus *extendit in aevum*.“

V. 7. *metuente solvi*] Quanto sic nervosius dixit quam si voluisset *metuente ne solvatur!* Exempla vide haec: Carm. I, 8, 8. III, 11, 10. III, 24, 56. IV, 5, 20. Sat. I, 4, 23. Epist. I, 5, 2. I, 16, 60. I, 19, 27. II, 1, 114. — *domando spiritum*] Gerundium ideo non mutavit in passivam formam gerundivi, ne quid ponderis activum verbum amitteret. cf. Carm. I, 2, 29. Poetae quo clarius rem describebant, exemplis solent uti; atque id ita quoque fit, ut cum alteram partem sententiae simplicem omnique ornatu carentem posuerint, alteri exempla substituant; quod hic factum vides et Carm. II, 10, 5 sqq. Praeterea autem animadvertit amplificationem, *si Lib. remot. Gad. iungas et uterque Poen. serv. uni*; eadem res ex diversis partibus collustrata animum magis movet. In quo loco et part. consecutivam quam dicimus facultatem nacta est; quare prosa oratio sic: „si Lybiam remotis Gadibus iungas, ita ut Karthaginenses et Hispanienses Poeni tibi uni serviant.“ Karthago ditissima olim urbs fuit propter mercaturam, Africa ipsa feracissima frugum, deinde Hispania metallorum opibus celebrata; coniunctae avidissimi hominis animum ex-

Crescit indulgens sibi dirus hydrops
 Nec sitim pellit, nisi causa morbi
 15 Fugerit venis et aquosus albo
 Corpore languor.

Redditum Cyri solio Phraaten
 Dissidens plebi numero beatorum
 Eximit virtus populumque falsis
 20 Dedocet uti

Vocibus, regnum et diadema tutum
 Deferens uni propriamque laurum,
 Quisquis ingentes oculo irretorto
 Spectat acervos.

CARMEN III.

Aequam memento rebus in arduis
 Servare mentem, non secus in bonis

plere poterant. Itaque non est necessaria coniectura *uterque pontus* vel *uterque Phoebeus*.

V. 13. „Cupiditas enim in dies crescit neque unquam restinguitur, et, quod est turpissimum, quo ducit, id ne bonum quidem est vere.“ Sic cohaerent quae sequuntur. — *indulgens*] indulgendo; qui participii usus apud Graecos frequentissimus. De imagine lege Ovidii Fast. I, 215 sq.: „Sic quibus intumuit suffusa venter ab unda, Quo plus sunt potae, plus sitiuntur aquae.“ cf. Epist. II, 2, 147. — *venis*] de intima parte cuiusque rei. Cic. Catil. I, 13, 31. — *albo corpore*] adiectivum *πολληπιτικῶς* positum. — *Phraaten*] Vide ad Carm. I, 26. — *dissidens plebi*] Verba pugnandi, certandi, similia cur a poetis saepe cum dativo coniungantur (Carm. II, 6, 15. Sat. I, 2, 73. Ovid. Met. I, 19), intelligitur ex iis quae supra scripta sunt ad v. 6. cf. ad Carm. I, 3, 13. *vocibus*] quibus populus Phraaten et similes beatos praedicat. cf. Sat. I, 1, 65. — *proprium*] perpetuam. Sat.

II, 6, 5. Epist. I, 17, 5. II, 2, 172. — *laurum*] quoniam etiam de cupiditibus triumphatur. — *irretorto*] Sapiens divitias maximas placido animo praeterire et ita potest videre, ut ne oculum quidem retorqueat. cf. Cic. Cat. II, 1, 2. Plat. de legg. 9, 854. C „τὰς τῶν κακῶν ξυννοίας φεύγε ἀμεταστρεπτή.“ — *acervos*] auri. Sat. I, 1, 44.

Carmen III.

Cic. de off. I, 26 sic scripsit: „In rebus prosperis et ad voluntatem nostram fluentibus superbiam, fastidium arrogantiamque magno opere fugiamus; nam ut adversas res sic secundas immoderate ferre levitatis est: praeclaraque est aequabilitas in omni vita et idem semper vultus eademque frons, ut de Socrate, item de C. Laelio accepimus.“ Hanc doctrinam poetica ratione Horatius illustrat; non cedendum esse incertae fortunae, quae homines modo tollantur, modo deprimantur. Humano generi nihil certius

Ab insolenti temperatam
Laetitia, moriture Delli,

5 Seu moestus omni tempore vixeris,
Seu te in remoto gramine per dies
Festos reclinatum bearis
Interiore nota Falerni.

Quo pinus ingens albaque populus
10 Umbram hospitem consociare amant

esse morte; quare qui vita sapientissime fruatur eum saluti suae optime consulere; vitae autem sapientem usum nasci ex animi tranquillitate. Similes sunt loci I, 7, 17. II, 10, 21 sqq. II, 16, 25 sqq. Dividitur hoc carmen in duas partes; superior (v. 1—16) quid sit faciendum suadet, inferior (17—28) cur ita sit faciendum docet. Caput autem cernitur in scena quam exhibet media carminis strophæ. Dellius, cuius nomen v. 4 legimus, is videtur fuisse, qui cum a Dolabella ad Cassium, a Cassio ad Antonium, ab Antonio transiisset ad Caesarem (Vell. Pat. II, 84) a Messalla Corvino *desultor bellorum civilium* vocatus est. Is fortasse cum Horatio in Macedonia militavit, deinde in omnibus castris fortunæ favorem quaesivit. Videntur viri docti iure suspicari, hoc carmen ante a. 723, quo Dellius ad Octavianum transiit, non potuisse scribi; porro veri simile est post a. 725 finitis iam civilibus bellis esse compositum, cum Dellius quam quaesivisset fortunam nondum assecutus intemperantiam animi etiam aleret.

V. 1. *arduis*] periculosus. Carm. I, 3, 37. — *aequam*] Aequus est locus, in quo neque exstat quidquam neque recedit; sic animus aequus nunquam turbatus, semper idem, ad omnia paratus non committit, ut aliquando dicendum sit: non putaram (Cic. de off. I, 13). Hor. Carm. III, 29, 32. Epist. I, 17, 24. Cic. Rosc. Am. 50. — *non secus*] itidem. Carm. III, 25, 8. — *insolenti laetitia*] *πολλήπικῶς*. Carm. I, 16, 21. II, 4, 2. — *moriture*] cui moriendum est (I, 28, 6), sive moe-

stam sive hilarem vitam egeris. Vide ad II, 2, 2 sq. cf. Ovid. Trist. V, 5, 61: „Caesar dis *accessure*, sed olim Aequarint Pylios *cum tua fata dies*.“ — *Gramine*] Describitur convivium rusticum in remoto prato habitum; in quo pingendo diutius poeta commoratur, quo fortius ad hilaritatem vitae homines evocet. Ad totum locum cf. Epod. 2, 23 sqq. — *interiore nota Falerni*] Deteriora vina quae aetatem non ferebant, de cupa vel dolio potabantur; meliora in amphoras et lagenas diffundebantur; amphorae vitreae vel luteae cortice et pice clauderantur vel gypsabantur; inscribebantur nomina consulum, ut quibus annis vina nata essent posset videri; vitreis tesserae nominibus inscriptae addebantur. Tum amphorae in apotheca in summa parte aedium sita, ubi fumus colligebatur, collocari solebant, quo celerius vina mitescerent. Cellae autem vinariae in terram depressae erant et frigor causa, si fieri poterat, septentriones spectabant. Unde quae *nota* sit intelligitur; *interior* adi. ab amphora ad notam translatus significat vetustius vinum, quod ab ostio magis erat remotum. *Falernum* autem vinum generosissimum praeter Caecubum, Massicum, Setinum, cf. I, 20, 10. Carm. III, 8, 9 sqq. III, 21, 7. Tibull. II, 1, 27: „Nunc mihi *fumosos veteris* profert *Falernos Consulis*.“ — *bearis*] beatum feceris; Carm. IV, 8, 29. Epist. I, 18, 75. II, 2, 121.

V. 10. *amant*] Sic Graeci quoque *φιλοῦσι*, pro vulgato *solent*. Carm. III, 16, 10. Sat. I, 4, 87. I, 10, 60. II, 3, 20. — *Ramis? quid*] Sic in an-

Ramis? Quid obliquo laborat
Lympha fugax trepidare rivo?

Huc vina et unguenta et nimium breves
Flores amoenae ferre iube rosae,
15 Dum res et aetas et sororum
Fila trium patiuntur atra.

Cedes coëmpitis saltibus et domo
Villaque, flavus quam Tiberis lavit,
Cedes, et exstructis in altum
20 Divitiis potietur heres.

Divesne prisco natus ab Inacho,
Nil interest, an pauper et infima
De gente sub divo moreris,
Victima nil miserantis Orci.

25 Omnes eodem cogimur, omnium
Versatur urna serius ocius

tiquissimis codd., et recte quidem. Quo part. praecedens accipienda ut Epist. I, 5, 12, et bene Porphyrio ad v. 11: „subaudiendum: si ea (lympha) non utimur.“ cf. Ovidii Met. XIII, 516: „Quo ferrea resto, quidve moror? Quo me servas, annosa senectus?“ Cic. pro Sest. 13 „quid hoc homine facias? aut quo civem importunum, aut quo potius hostem tam sceleratum reserves?“ — *trepidare*] significat celerem aliquem motum, cuius non in terrore solum sed in aliis quibuscunque rebus inesse potest causa. Carm. II, 4, 23. IV, 11, 11. Epist. I, 10, 21. — *vina et unguenta*] In conviviis Romani coronis ornati erant et unguentis pretiosissimis uncti. Carm. II, 11, 13 sqq. III, 14, 17. — *Flores*] „Bei den Griechen wurden mannigfaltige Blumen zu Kränzen gewunden. Anders war es bei den Römern, welche ausser dem Grün der Blätter, namentlich vom Epheu, der Myrte, dem apium nur wenige Gartenblumen und hauptsächlich Veilchen und Rosen zu Kränzen gebrauchten.“ Becker Gallus T. II. p. 214. Luxuria autem eo processit, ut

nardinis etiam foliis uterentur. — *res*] vitae condicio, qua otio frui conceditur. — *aetas*] iuventus; nam morosa senectus haec spernit. Carm. I, 9, 17. — *Soror. fila*] Parcarum; quarum quae fuerit potestas, ex his vide locis: Carm. II, 6, 9. 16, 39. 17, 16. C. S. 25. Epod. 13, 15.

V. 17. Incipit altera pars carminis, cuius sunt tres partes: „relinquendae sunt divitiae studiose conquisitae (17—20); amittenda nobilitas, qua superbire solent (21—24); nam mors omnibus communis omnes pares reddet (25—28). Quod inde efficitur praeceptum, id facile intelligitur. cf. Carm. II, 16, 21. Epist. II, 2, 177. — *flavus Tiberis*] vide ad I, 2, 13. Villa ad aquam sita maiorem habet amoenitatem. — *lavit*] Hac forma *lavere* in lyricis ubique utitur Horatius: Carm. III, 12, 2. 7. 4, 61. IV, 6, 26. Epod. 16, 28. — *heres*] Carm. II, 14, 25. IV, 7, 19. Sat. II, 3, 145—151. Epist. II, 2, 190 sq. — *moreris*] Nam „commorandi natura deversorium nobis, non habitandi locum dedit. Cic. de senect. 23. cf. Ovid. Met. X, 32. —

Sors exitura et nos in aeternum
Exsilium impositura cumbae.

CARMEN IV.

Ne sit ancillae tibi amor pudori,
Xanthia Phoeu! Prius insolentem
Serva Briseis niveo colore
Movit Achillem;

5 Movit Aiace Telamone natum
Forma captivae dominum Tecmessae;
Arsit Atrides medio in triumpho
Virgine rapta,

Barbarae postquam cecidere turmae
10 Thessalo victore et ademptus Hector
Tradidit fessis leviora tolli
Pergama Graiis.

urna] Omnium hominum sortes in urnam coniectae ab Necessitate versantur; cuius exsilit sors, ei moriendum est. Carm. III, 1, 16. — *exsilium*] quoniam in terram, humani generis patriam, non conceditur reditus. — *cumbae*] Charontis.

Carmen IV.

Festive irridet Horatius amicum, quem graeco nomine Xanthiae Phocensis tegit, de amore ancillae. Festivitas ubique conspicua; grandia exempla Achillis, Aiace, Agamemnonis, regium quod fingitur genus, maligne laudata fides, integritas, lucri contemptio in hoc genere certe rarissima quid poeta voluerit aperte produnt. Scilicet una vera est pulchritudo, in extrema strophā laudata. Carmen scriptum est a. u. 729; id quod intelligitur ex v. 23 sq.

V. 2. *insolentem*] cf. A. P. 122. — *prius*] iam ante te; tu primus non es. — *Briseis*] Hom. II, II, 690. IX,

342. — *Tecnessa*] Teuthrantis, Phrygii regis, filia, ab Aiace capta; Soph. Ai. 210 παῖδα Φρυγίου Τελευτάντος eam vocat. — *arsit*] vide ad Carm. IV, 9, 13. — *virgine rapta*] Cassandra. Hom. Od. XI, 420. — *Thessalo victore*] non solus Achilles aut Neoptolemus; sed Thessali pro cunctis Graecis, quia nisi Thessalorum Achillis, Neoptolemi, Myrmidonum ope Troia non potuit capi. — *Hector*] Hom. II, XXII, 507. XXIV, 243. — V. 11. Duplex est antithesis *fessis leviora* et *Pergama Graiis*. — *Graiis*] de Graecis antiquis, praecipue heroica aetate, ut Epod. 10, 12. Ovid. Met. XIII, 281. 241. Corn. Nep. Hannib. 3; inde hoc nomine saepissime usus est Virgilius in Aeneide. Deinde *Graii* appellantur poetico nomine, cum antiqua eorum virtus, nobilitas, poesis praedicantur, ut Carm. II, 16, 38. IV, 8, 4. Epist. II, 1, 19. A. P. 323. In lyricis carminibus alterum nomen *Graeci* non reperitur, nisi quod adi. *Graecus* est Carm. I, 20, 2. III, 24, 57. —

Nescias an te generum beati
 Phyllidis flavae decorent parentes :
 15 Regium certe genus et penates
 Moeret iniquos.

Crede non illam tibi de scelesta
 Plebe dilectam, neque sic fidelem,
 Sic lucro aversam potuisse nasci
 20 Matre pudenda.

Brachia et vultum teretesque suras
 Integer laudo; fuge suspicari,
 Cuius octavum trepidavit aetas
 Claudere lustrum.

CARMEN V.

Nondum subacta ferre iugum valet
 Cervice, nondum munia comparis
 Aequare nec tauri ruentis
 In venerem tolerare pondus.
 5 Circa virentes est animus tuae
 Campus iuvencae nunc fluviis gravem
 Solantis aestum, nunc in udo
 Ludere cum vitulis salicto

nescias an] fortasse. Inclinat ad affirmationem. — *Phyllidis flavae*] Et nomen ipsum et ἐπιθετον iuventutem mulierculae indicant; flava est ut folia arborum recentia; sic Chloe flava est Carm. III, 9, 19, Ganymedes IV, 4, 4. Phyllis autem (φύλλον) idem significat quod Chloe (χλόη): prima ex cortice excrescentia folia. — *moeret regium genus*] quod sua servitute contaminatum sensit, non quod amisit. Nam genus amittere quis potest? — *integer*] amore non captus, cuius iudicium non est amore corruptum. cf. Carm. III, 7; 22. — *fuge suspicari*] vide ad Carm. I, 1, 8.

Carmen V.

Se ipsum consolatur de dura arrogantia puellae ardentem amatae sed fugientis: atque eo utitur consolationis genere quo vulpes in fabula. Quae cum altius pendentem uvam saliendo deripere non potuisset, tandem sibi ipsa persuasit immaturam eam esse necdum ad edendum satis mitem; dum maturescat, alias esse petendas. De Lalage vide ad Carm. I, 19.

V. 1—19. Metaphora sumpta a vacca nondum adulta, in antiquitate usitata, a nostris moribus aliena. cf. Carm. III, 11, 9 sq. — *comparis*] ad idem iugum victi, iugalis. cf. Carm. I, 33, 11. — *solantis*] levantis, ex-

Praegestientis. Tolle cupidinem
 10 Immitis uvae: iam tibi lividos
 Distinguet Auctumnus racemos
 Purpureo varius colore.
 Iam te sequetur: currit enim ferox
 Aetas et illi quos tibi dempserit
 15 Apponet annos: iam proterva
 Fronte petet Lalage maritum,
 Dilecta, quantum non Pholoë fugax,
 Non Chloris albo sic humero nitens,
 Ut pura nocturno renidet
 20 Luna mari, Cnidiusve Gyges,
 Quem si puellarum insereres choro,
 Mire sagaces falleret hospites
 Discrimen obscurum solutis
 Crinibus ambiguoque vultu.

CARMEN VI.

Septimi, Gades aditure mecum et
 Cantabrum indoctum iuga ferre nostra et

stinguentis. — V. 11. *Auctumnus*] hic personae formam induit, ut Epod. 2, 18; ineunte auctumno uvae, olim virides, variant, sensim transeunt in purpureum colorem, quod est maturitatis primum indicium. Cum uvis et fructibus etiam Auctumnus colorem quasi mutat, quare et ipse *varius purpureo colore* dicitur h. e. qui varius est transeundo a viridi colore in purpureum. cf. Ovid. Met. III, 482 sqq. — *lividos*] subnigros. — *ferox aetas*] tempus indomitum, quod tardari nequit. — *Pholoë*] idem nomen Carm. I, 33, 7. III, 15, 7; *fugax* eadem quae I, 33, 6 *aspera* — *Cnidiusve*] *Ve* particula Gyges quoque cum Lalage comparatur; nam sic inter se respondent: *quantum non — non — ve. — mire*] Adverbium coniunge cum *falleret*. — *solutis crinibus*] Alebant capillum pueri

ingenui, imprimis delicati. cf. Epod. 11, 28. — *ambiguo vultu*] cuius vultu non intelligitur, sitne puer an puella. Ovid. Met. IX, 711 sq.

Carmen VI.

Septimii nomen, quod in hoc carmine legitur, est etiam in epist. I, 9 et in fragmento epistolae Augusti ad Horatium datae. Vide Vit. Hor. p. 12. Viris doctis admodum probabile visum est tribus locis eundem hominem indicari. Quod cum libenter concedatur de Septimio Horatiano, dubitatio tamen restat de tertio illo in epistola Augusti; nisi forte credas [Augusti epistolam diu post Horatii nonam scriptam] esse. Sed admodum incerta res est, nisi quod ex fine carminis recte tibi videris concludere Septimium hunc

Barbaras Syrtes, ubi Maura semper

Aestuât unda: . .

5 Tibur Argeo positum colono

Sit meae sedes utinam senectae,

Sit modus lasso maris et viarum

Militaeque!

Unde si Parcae prohibent iniquae,

10 Dulce pellitis ovibus Galaesi

Flumen et regnata petam Laconi

Rura Phalanto.

Ille terrarum mihi praeter omnes

Angulus ridet, ubi non Hymetto

15 Mella decedunt viridique certat

Horatio multo fuisse iuniorem. De hoc carmine recte observatum est, secundo versu id spatium significari, quod est inter a. 728 et a. 734. Nam cum a. 725 Romani primum Cantabros vicissent, hi a. 728 iugum excutere studuissent et anno demum 734 devincerentur, Horatius certe *Cantabros indoctos iuga ferre Romana* ante a. 728 quo primum rebellarunt non potuit appellare. Compositum igitur videtur a. 729 v. 730; nam noli credere Horatium Sabinam villam nondum accepisse, id quod aliis placuit. Tiburis et Tarenti desiderium etiam exprimitur diu postquam Sabinam accepit. Carm. III, 4, 21 sqq. Epist. I, 7, 44.

V. 1. *aditure*] qui adire paratus es, qui mecum, si opus sit, libenti animo adeas. Tribus exemplis utitur poeta; Gadibus, qui extremus est Europae locus; Cantabro, quae natio est ferocissima (Carm. II, 11, 1. III, 8, 22. IV, 14, 41. Epist. I, 12, 26); Syrtibus propter tempestates et scopulos maxime periculosis. (Carm. I, 22, 5. Epod. 9, 31). — *Maura unda*] vide ad Carm. I, 1 28. — *Argeo*] graeca adiectivi forma, in lyricis saepius obvia; sic *Lesbous* Carm. I, 1, 34, *Daedaleus* II, 20, 13. Ceterum vide ad Carm. I, 7, 13. I, 18, 2. Virg. Aen. VII, 670 sqq. — *senectae*] Tertius casus est, non secundus. — *maris*] Tres genitivi *maris*, *viarum*, *militiae* ad no-

men *lasso* non magis referendi sunt quam ad alterum *modus*. cf. Epist. I, 11, 6. *Militia* autem mare et vias complectitur, quippe duplex est militia, maritima et terrestres. Sic Carm. I, 1, 23 *castra et tubae sonitus bellaeque*; ut a partibus ad totam rem ascendatur. — *Parcae iniquae*] vide ad Carm. II, 3, 15.

V. 10. *pellitis ovibus*] Oves Tarentinae, quarum alba lana erat pretiosissima, pellibus tegebantur, ne lana aut macularetur aut rubis spinisve discerperetur. — *regnata Laconi*] Ne a neutrorum quidem verborum formis passivis abstinent poetae. cf. Carm. III, 29, 27. *Phalantus* autem dux fuit Partheniarum. — *ridet*] placet. Eadem metaphora γελᾶν Graeci quoque de rebus inanimatis utuntur quasi vitam habentibus et faciem. Sic *renidere* II, 5, 19. II, 18, 2. Propter metrum *Axtius* scribendum putavit *ridens* sc. est. — *Hymetto*] Ex more antiquo pro *melli Hymettio*. Solent enim veteres, cum hominum vel rerum facultates virtutesve inter se componunt, alterius facultatem componere cum altero ipso homine vel re. Sic Cic. de orat. II, 1, 4: „nostrorum hominum prudentiam Graecis anteferre.“ Cf. Carm. I, 1, 23. III, 6, 46. Hom. II. XVII, 51; et infra *certat baca Venaefro*. — *decedunt*] Decedit is, qui primo loco quem adhuc obtinuit ab

Baca Venafro;

Ver ubi longum tepidasque praebet
Iuppiter brumas, et amicus Aulon
Fertili Baccho minimum Falernis

20 Invidet uvis.

Ille te mecum locus et beatæ
Postulant arces; ibi tu calentem
Debita sparges lacrima favillam
Vatis amici.

CARMEN VII.

O saepe mecum tempus in ultimum
Deducte Bruto militiae duce,

altero praestantiore victus cedit. .cf. Epist. II, 2, 213. — *Venafrum*] Minturnis et Fregellis et Liri fluvio vicinum; *viride* est totum Venafrum propter frequentia ibi oliveta. Venafrum oleum optimum erat. Plin. H. N. XV, 2. — *Iuppiter*] Carm. I, 12, 15.

V. 18. *amicus Aulon*] Aulon ex testimoniis Acronis scholiastæ, commentatoris Cruq. et Servii ad Virg. Aen. III, 553 *mons* fuit Calabriae. Contra *Orellius*: „Est recessus depressior regionis Tarentinae prope Saturnum, hodie *Melone*.“ — *Fertili Baccho*] Sic melius quam *fertilis Baccho*, quod pedestrem orationem sapit. Est autem dativus, non ablativus. cf. III, 16, 34. — *invidet*] Regio vita animique affectionibus carens poetice vitam accipit et cum vita studium et voluntatem. Sic Stat. Silv. II, 2, 5: „Prelis non invidet uva Falernis“; quem locum etiam propter *λιτότητα* compares. — *beatæ arces*] Adi. *beatæ* non ad arces solum sed ad *locum* quoque referendum. Vide ad Carm. I, 2, 1. *Locus* autem est ager Tarentinus; *arces* Aulonem montem significant. Sic *arx* vel *arces* de monte C. S. 65. Virg. Georg. II, 535. Ovid. Met. I, 467. — *vatis amici*] Tacit. dial. 9: „Quis Saleium nostrum, egregium poetam vel si hoc honorificentius est prae-

clarissimum *vatem*, deducit aut salutatur?“ Poeta artifex est, vates sacer et Musis amicus. cf. Carm. IV, 6, 44.

Carmen VII.

Pompeius Varus, olim Horatii commilito, quocum coniunctus et mala et bona communia habuerat, post cladem Philippensem aliam atque eam quam Horatius inierat viam ingressus cum Sexto Pompeio, ut veri simile est, bellum continuaverat. Hoc mortuo (a. 719) Antonium potius quam Octavianum secutus iterum adversam belli fortunam expertus esse videtur. Tum demum nescimus quo intercedente Romam reversus dulcissimum amicum Horatium recuperavit. Hic felici rei exitu laetatus amicitiae tenerrimos sensus hoc carmine prodit. Habet carmen septem strophas, ex quibus tres primæ amicorum in castris et bello coniunctam vitam et fortunam, media quarta post cladem seiunctionem et diversa itinera, reliquæ tres post seiunctionem alteram coniunctionem eiusque laetitiam mira arte et dulcedine describunt. Scriptum autem est non ante a. 724, quoniam et Pompeius *longa* militia fessus dicitur et Horatium Sabinam villam (v. 19) iam habuisse probabile est.

V. 1 sqq. *tempus in ultimum*] in

Quis te redonavit Quiritem
Dis patriis Italoque coelo,

5 Pompei meorum prime sodalium?
Cum quo morantem saepe diem mero
Fregi coronatus nitentes
Malobathro Syrio capillos.

Tecum Philippos et celerem fugam
10 Sensi relictā non bene parmula,
Cum fracta virtus et minaces
Turpe solum tetigere mento.

Sed me per hostes Mercurius celer

extremum periculum. Temporis nomen non dierum solum et annorum seriem, sed quaecunque diebus et annis aut agenda sunt hominibus aut patiēda comprehendit. cf. IV, 9, 36. Epist. II, 2, 46. Verbis quodam modo ludere videtur Horatius *deducte* — *duce*; deinde consulto dictum in *ultimum tempus*. Duxerat eos Brutus in condiciones remotas a patria et civitate; inde: quis te redonavit Quiritem? quae verba mirantis sunt de insperato amici reditu. — Quiritem] capite non iam deminutum; fuit autem triplex capitis deminutio. Singularis numerus nominis Quiritium non legitur nisi apud poetas. Apud Horatium vide Epist. I, 6, 7. — Pompei] duas tantum efficit syllabas per synaloephen. Sic Carm. I, 35, 17. 37, 5. Deinde vix est quod dicam *primum* sodalium eum esse quem maxime amaverit, non quocum a prima pueritia vixerit coniunctus. *Sodales* intelligendi ii sunt, quibuscum olim militavit. — Saepe] Inter itinera et praesidia haud raro militantibus accidere potuit, ut quid facerent nescientes quavis arte diem conficere starent. Ad vv. 7. 8 conferas Carm. II, 3, 13 et quae ad eum locum notata sunt. Nam Malobathrum Syrium i. e. Indicum (Carm. II, 11, 16. I, 31, 12) unguentum est ex cognomine frutice expressum.

V. 9. Siquidem conviviorum grata est memoria, non ingrata tamen est simul perpefforum malorum; quas contrarias res vide ut poeta diversis stro-

phis distraxerit. Sed pervenimus ad locum, in quo interpretando viri docti in alia omnia discesserunt. Pessima est eorum sententia, qui timiditatis et ignaviae turpen quādam confessionem in hoc loco odorati sunt. Quid enim? Si ea vera esset sententia, quomodo tandem idem Horatius Epist. I, 20, 23 eo progredi potuisset iactantiae et arrogantiae, ut primis se olim placuisse belli ducibus palam gloriaretur? Sed hoc dicit: „tu mihi comes eras apud Philippos, ibi tu mecum sensisti cladem et fugam“, quam Brutum ipsum, antequam mortem sibi daret, amicis vehementer suasisse scimus. Ceterum in hoc quoque loco festivitas quaedam bene notanda est, et iocosa comparatio Archilochi, Alcaei, Anacreontis, qui idem de se confiteri non dubitarunt. Docti Romani, qui hos versus legebant, ultro inciderunt in Graecorum poetarum similes locos. — Turpe solum tetigere mento] cum virtute iam nihil efficeretur et magna pars fortissimorum commilitonum in iisque Brutus interfecti essent in humumque prostrati minas et iram etiam vultu ostenderent. Turpe solum poetice dicitur, quoniam in eo macula cladis et turpitudinis concepta est. Ludibrio autem eos laedere, quibuscum ipse pugnaverat, ab Horatii animo alienum est.

V. 13. Mercurius] Se per hostes a Mercurio sublatum ait i. e. se abiecta spe arma posuisse et ad poesim confugisse, amicum in bellum esse relictum. Carm. III, 4, 26 salutem se Mu-

Denso paventem sustulit aëre;

15 Te rursus in bellum resorbens
Unda fretis tulit aestuosus.

Ergo obligatam redde Iovi dapem,
Longaque fessum militia latus
Depone sub lauru mea nec

20 Parce cadis tibi destinatis.

Oblivioso levia Massico
Ciboria exple, funde capacibus
Unguenta de conchis. Quis udo
Deproperare apio coronas

sarum tutelae debere dicit; Mercurius autem non minus custos est poetarum, Mercurialium virorum (Carm. II, 17, 29). — *paventem*] propter volatum per altas nubes, qui contra humanam naturam est. cf. IV, 4, 9. Praeterea notandum est fictionem hanc esse Homericam. II. III, 380. V, 23. 344. XX, 325. In sequentibus duobus versibus imago est a naufragio petita, ita tamen, ut tacite significetur Pompeium prope invitum ad continuandum bellum tractum fuisse. — *Ergo*] Sententia sic cohaeret: Ex quibus fluctibus cum tu quoque nunc ereptus sis, primum diis gratias redde debitas, deinde mecum vitae et amicitiae frui gaudiis. *Ergo* particula subito quodam et lyrico motu ad initium carminis quasi reducit amici animum. — *obligatam*] Qui ex magnis periculis deorum beneficio eripitur, is propter id ipsum, si quidem est grato animo, voti quasi reus est. cf. Carm. II, 8, 5. — *lauru*] Altera ablativi forma *lauro* apud Horatium est Carm. III, 30, 16. Ne hoc quidem sine *εὐχαις*; uterque in bello laurum i. e. gloriam sibi parare studuerat sed frustra. Horatius autem aliam in pace et otio litterarum studiis invenerat. — *nec parce*] vide ad Carm. I, 11, 2.

V. 21. *Oblivioso*] quod aegritudinum curarum malorum oblivionem affert et demissum animum erigit. — *levia*] non „in tuum honorem deterosa ac polita“, sed decet semper ciboria esse levia. — *Ciboria*] Poculi genus cuius superior pars lata, inferior angusta

erat, in modum fabae Aegyptiae, quae colocasia s. cyamus vocabatur. Fuit autem hoc genus capacius; et in tali convivio laetitia cernitur in abundantia quoque et vinorum et unguentorum; inde *conchae* quoque grandiores. Asyndeton *exple, funde* ad animum festinantis neque moram patientis accommodatum; huic rei congruum est subsequens verbum *deproperare*. Simplex verbum eadem significatione Carm. III, 24, 61. Epod. 12, 22. Epist. I, 3, 28. quod cum sua natura accusativum obiecti non patitur, tamen ad exemplum graeci verbi *σπεύδειν* ad festinandi notionem alteram agendi adsciscit. Festinationis vero notio addita particula *de* etiam augetur. — *udo*] Virg. Georg. IV, 121 „virides apio ripae“. Apio palustri in nectendis coronis saepissime utebantur. cf. Carm. I, 36, 16. IV, 11, 3. Inde apud Theocrit. 7, 68 „*πολυγνάμπτω τε σέλινο*“. — *curatve*] Particulae *que, ve, ne* saepe non ei vocabulo adhaerere videntur quod superioribus addendum est. Quod ne casu vel metri ratione factum credas, sic tibi persuade, poetas transposita particula et maiorem vim vel pondus aliquod addidisse ei vocabulo cui illa adhaeret, et speciem aliquam effecisse constructionis *ἀπὸ κοινοῦ*, nimirum ut unum vocabulum utrimque traheretur. Exempla sunt: Carm. I, 30, 6. II, 17, 16. II, 19, 32. Sat. I, 4, 115. II, 1, 68. I, 6, 43. 44. II, 3, 182. Sat. I, 8, 2. I, 2, 63. Carm. II, 7, 25. Epod. 2, 50. Sat. II, 3, 139. 180.

25 Curatve myrto? Quem Venus arbitrum
 Dicet bibendi? Non ego sanius
 Bacchabor Edonis: recepto
 Dulce mihi furere est amico.

CARMEN VIII.

Ulla si iuris tibi peierati
 Poena, Barine, nocuisset unquam,
 Dente si nigro fieres vel uno
 Turpior ungui,

5 Crederem. Sed tu simul obligasti
 Perfidum votis caput, enitescis

V. 25. *Venus*] iactus Venereus. Solebant veteres in lautis conviviis magistros s. reges bibendi creare talorum sorte. Talorum autem quattuor latera longiora punctis notata erant, ita ut unum latum unum haberet punctum, alterum huic oppositum sex puncta ostenderet, in reliquisque duobus tria essent et quattuor puncta. Ludebatur talis quattuor; Venus erat iactus, cum quattuor tali iacti quattuor diversos numeros, canis i. e. pessimus iactus, cum omnes unum punctum ostendebant. In reliquis iactibus valebat punctorum numerus. A talis differebant tesserae, quae sex numeros in sex lateribus habebant longitudine paribus. — *Edonis*] Thraciae populo; quorum exemplo utitur, quoniam Thraeces Bacchi sacris et orgiis dediti erant. Ad quam rem verbum *bacchari* accommodatum est.

Carmen VIII.

Festiva expostulatio cum Barine pulcherrima quidem sed nimis perfida puella. Quo anno hoc egregium carmen scriptum sit, dici non potest. Simillimum est carmen Ovidii Am. III, 3, 1:

Esse deos, i, crede; fidem iurata
 fefellit,

Et facies illi, quae fuit ante,
 manet.

Horatius ed. Dillenburger ed. III.

Quam longos habuit nondum periura
 capillos,

Tam longos, postquam numina
 lusit, habet etc.

Et v. 11. Scilicet aeterno falsum iurare puellis

Di quoque concedunt.

V. 1. In prima strophā vide quam artificiose verba collocata sint ad ostendendam impunitatem peierantis sed pulchrae puellae, quae ne minima quidem poena periurii a diis in alios homines severis afficitur. Nam non temere haec vocabula *ulla*, *unquam*, *dente*, *uno*, *ungui* in versuum terminis posita sunt; atque consilium poetae conspicuum est in verbo *crederem* in fronte strophae posito et totam apodosim efficiente. — *iuris peierati*] Audacius a poeta dictum pro *periurii*. — *uno turpior ungui*] *Uno* referendum etiam ad *dente*. Vide ad Carm. I, 2, 1. Intelligenda scabritia unguium, cuius medicamenta multa apud Plinium in Hist. Nat. reperiuntur. In qua retinendum est, haud parvam curam puellas in conservandis dentibus et unguibus posuisse; unde haec praecepta Ovidii A. A. III, 276: „Exiguo signet gestu quodcunque loquetur, Cui digiti pingues et scaber unguis erunt“; et v. 279: „Si niger aut ingens aut non erit ordine natus Dens tibi, ridendo maxima damna feres.“ — *obligasti*] vide ad Carm. II, 7, 17. Sen-

Pulchrior multo iuvenumque prodis
Publica cura.

Expedit matris cineres opertos
10 Fallere et toto taciturna noctis
Signa cum coelo gelidaque divos
Morte carentes.

Ridet hoc, inquam, Venus ipsa, rident
Simplices Nymphae ferus et Cupido
15 Semper ardentes acuens sagittas
Cote cruenta.

Adde quod pubes tibi crescit omnis,
Servitus crescit nova, nec priores
Impiae tectum dominae relinquunt
20 Saepe minati.

Te suis matres metuunt iuvenis,
Te senes parci miseraeque nuper
Virgines nuptae, tua ne retardet
Aura maritos.

tentia haec est: Tantum abest, ut perfidiae et periurii poenam luas, ut quo saepius peieraveris eo pulchrior evadas omniumque iuvenum animi invictis illecebris trahantur. Quare tibi non nocet peierasse, sed prodest fallere fidem cum iureiurando per mortuam matrem, per sidera nocturna, per ipsos deos; qui tantum abest ut tibi irascantur ut rideant de tuis periuriis. — Per suorum mortuorum cineres iurare haud insolitum apud antiquos fuit; Cicer. pro Quintio 31: „obsecravit per fratris sui mortui cinerem.“ Tibul. II, 6, 29: „per immatura tuae precor ossa sororis“; nocturnum coelum et sidera ab amantibus in testimonium vocabantur. — *gelidaque divos morte carentes*] θεοὺς ἀθανάτους, quorum potestate improbos aliquando castigari certissimum est.

V. 14. *Nymphae*] in comitatu Veneris. cf. Carm. I, 30, 6. Nymphae ideo *simplices* appellatae videntur, quod cum sua natura ab omni fraude alienae sint, in hac re sibi parum con-

stantes dominae crudelem naturam induunt. — *cruenta*] cos cruenta dicitur, quia sagittae cote acutae vulnera quasi et sanguinem edunt.

V. 17. „Sed non diis solis perfidia tua placet, sed etiam hominibus; quare turba amantium in dies tibi augetur.“ vv. 17—20 omnis amantium turba in duas partes dividitur, in eos qui nondum quam sit perfida sunt experti, et in eos qui quamquam illud sunt experti tamen non abstinere. — *servitus*] est quasi appositio v. *pubes*. Omnis pubes quae crescit in tuam servitute[m] crescit. — *iuvenis*] Inest in hoc verbo imago nobis inusitata, antiquis poetis ad rerum naturam propius accedentibus usitatissima. Inde etiam *aura*. Virg. Georg. III, 250. vide ad Carm. II, 5, 1. — *senes parci*] Scilicet hi timent ne filii nepotesve tibi dediti rem perdant. — *virgines*] Hoc et *puellarum* nomine eae quoque nominantur qui viro iam nupserunt. — *miserae*] *προληπτικῶς* positum adiectivum.

CARMEN IX.

Non semper imbres nubibus hispidos
 Manant in agros aut mare Caspium
 Vexant inaequales procellae
 Usque, nec Armeniis in oris,

5 Amice Valgi, stat glacies iners
 Menses per omnes aut Aquilonibus
 Querceta Gargani laborant
 Et folijs viduantur orni.

Carmen IX.

C. Valgius Rufus inter viros ea aetate ingenio doctrinaque eminentes non minima laude floruit (Horat. Sat. I, 10, 82. Tibull. IV, 1, 180: „Valgius, aeterno propior non alter Homero“); nam praeter rhetorica et grammatica studia et scripsit opus de usu herbarum ad Augustum, et tentavit elegias et epica carmina. Et vix dubitandum est, quin idem Valgius fuerit, qui a. 742 senex ad summum honorem consulatus pervenerit. Qui cum Myste, puero dilecto, mortuo nimio se traderet dolori neque quid amisisset lugubribus carminibus lugere unquam desineret, luctui quoque et dolori modum esse ponendum ab Horatio amice monetur. Id cur necessarium sit, docetur exemplis primum ex natura rerum, deinde ex mythis petitis; quorum auctoritas quo efficacior fiat, adiungitur adhortatio, ut aliud sibi Valgius canendi argumentum quaerat ad vitamque animum reducat. Quare caput carminis est in erigendo animo et compescendo dolore; non decere virum asperitate malorum omnino flecti, aequam mentem conservandam esse etiam in maxima calamitate. De tempore quo hoc carmen scriptum sit interpretes inter se non consentiunt; nam quamquam ex v. 19 intelligitur non ante annum 727 hoc componi potuisse, quoniam eo anno Octavianus Augusti nomine ornatus est, incertum relinquitur, quid *Niphates* significet, quid *Medum flumen*, quid *Geloni*. Quare alii usque ad a. 734 ascendunt, alii

veri similis annum 729 v. 730 designatum vident. Exitus carminis accommodatus est ad locum Virg. Georg. III, 31 sqq., quem Virgilius iam anno 724 scribere potuit.

V. 1. *hispidos*] *πολλήπιπικῶς*. Ceterum duabus primis strophis quattuor exempla continentur, quibus ostenditur, non semper naturam vexari tristitia temporum; illa autem aequabili particularum (*non — aut — nec — aut*) dispositione inter se coniunguntur; quartum tamen bipartitum est, quod ne in duo diversa distrahatur vetat particula *et* v. 8. — *mare Caspium*] de quo Pomponius Mela III, 5: „Mare Caspium omne atrox, saevum, sine portibus, procellis undique expositum.“ — *inaequales*] ob effectum dictae. — *stat*] vide Carm. I, 9, 1. — *Gargani*] montis Apuliae, silvis tecti. Epist. II, 1, 202. — *laborant*] Poetis tota natura vivit; quare arbores pati, sentire iis videntur; inde aptissima verba *laborant et viduantur*. — *urges*] quo verbo saepissime et libenter Horatius utitur, ut rem aliquam altera re propinqua vel teneri vel prope teneri indicet, sive moveri possunt res sive non possunt. Itaque *urgere* dicuntur adstantes, adhaerentes, tenentes, prementes, prope sedentes, persequentes, instantes, alii. cf. Sat. I, 3, 135. 69. A. P. 453. Carm. I, 24, 6. I, 15, 23. Epist. I, 14, 26. Carm. I, 5, 2. Sat. II, 6, 29. Carm. II, 10, 2. Quo fit ut de quacunque vi ex propinquo loco non corporibus solum sed animis etiam illata saepe usurpetur. — *flebitibus modis*] cf. ad Carm. II, 1, 40. Modi

Tu semper urges flebilibus modis
 10 Mysten ademptum, nec tibi Vespero
 Surgente decedunt amores
 Nec rapidum fugiente Solem.

At non ter aevo functus amabilem
 Ploravit omnes Antilochum senex
 15 Annos, nec impubem parentes
 Troilon aut Phrygiae sorores

Flevere semper. Desine mollium
 Tandem querelarum, et potius nova
 Cantemus Augusti tropaea
 20 Caesaris et rigidum Niphaten

Medumque flumen gentibus additum

non tam poetarum quam tibicinum et fidicinum sunt, sonos tamen ad carminum sensus temperantium. cf. Cic. Tusc. I, 44. — *Vespero*] „Stella Veneris *ἑσπερος* seu *φωσπερος* a Graecis, Lucifer a Latinis appellatur, cum solem antegreditur orientem; eadem *ἑσπερος*, id est vesperus, dicitur, cum solem occidentem subsequitur.“ Lambinus. Fuit quem offenderet quod Hesperus et Lucifer, quorum aspectus nisi longo interiecto temporis spatio cogitari non potest, unius eisdemque diei spatio apparere dicuntur. At non tenentur poetae certis immutabilibusque mathematicorum legibus; fulgida stella placuit; hoc satis excusat rationem, qua poeta ea usus est. Ceterum in uno antiquo codice legitur *rapido fugiente sole*.

V. 13. „At quam diversum est exemplum Nestoris aut Priami qui amatis filiis orbatu luctui non semper indulserunt, sed quantumvis senes animum tamen erexerunt ad vitamque et negotia redierunt. Quodsi senes tam firmi erant, quid tibi sit faciendum vides.“ — Hanc inter Valgium virili aetate florentem et inter senes imbecillos oppositionem etiam auget muliercularum mollium commemoratio; quam consulto interposuisse poetam inde perspicitur. — *Antilochum*] Odyss. III, 109 sqq. IV, 107. — *senex*] cf.

Hom. II. I, 250. Cic. Cat. mai. c. 10. — *Troilon*] cf. Virg. Aen. I, 474. — *Phrygiae*] Troianae, ut Cassandra, Polyxena, aliae. — *semper*] Hoc vocabulum, in quo omnis sententiae vis posita sit, illustrem locum et ipsius enuntiati et versus obtinuit; non aliter in initio coniunctae sunt particulae *at non*. — *mollium querelarum*] Genitivus positus est ad exemplum graecae linguae (cf. Hom. II. I, 210), cum latine dicatur desinere aliquam rem et aliqua re. Hor. Carm. II, 13, 38. II, 11, 5. Sat. II, 6, 84. Virg. Aen. X, 441. XI, 280. 126. — *cantemus*] Observanda est duplex verbi *cantandi* coniunctio; nam primum inde suspensus est accusativus (*tropaea* — *Niphaten*), deinde infinitivus (*Medum* — *volvere*, *Gelonos* — *equitare*). cf. v. ames C. I, 2, 49 sq. — *rigidum*] glacie adstrictum, nive tectum. Niphates mons est in Armenia, quamquam ex male intellecto loco Virgiliano a posterioribus poetis latinis flumen habitus est, veluti a Lucano, Silio Italico. Lucan. 3, 245: „volventem saxa Niphaten.“ Sil. Ital. 13, 775: „Pellaeo ponte Niphaten Adstrinxit.“ — *Medumque*] Flumina quoque et tota regio poetis sentire videntur quae accolae patiuntur; populi virtute fracta Medus quoque flumen, olim de accolarum fortitudine superbiens et magnifice

Victis minores volvere vertices
 Intraque praescriptum Gelonos
 Exiguus equitare campis.

CARMEN X.

Rectius vives, Licini, neque altum
 Semper urgendo neque dum procellas

fluens, animum reprimat et tristitiam minore aquarum copia quam volvit quasi prodat. — *Medum flumen*] Medus in Araxen influit prope Persepolin. Ceterum ipsum nomen pro adiectivo habitum. cf. Carm. IV, 4, 38. A. P. 18. Aliter II, 6, 10. Alii interpretantur de Euphrate, celebratissimo Medorum s. Parthorum fluvio. — *Gelonos*] Scythas, intra certos fines repressos. — *equitare*] cf. Carm. I, 2, 51; aptissimum verbum ad ferocissimam gentem quae equitatu maxime valuit. Cf. Epist. II, 1, 250 sqq.

Carmen X.

Argumentum huius carminis ex eo genere est quod frequentissimum est apud hunc poetam; agitur enim iterum de continentia animi, in qua quantam ille ingenii ubertatem probaverit iusta admiratione amplectimur. Graeci iam philosophi statuerunt *μηδὲν ἄγαν* vel *ὁ μέσος βίος βέλτιστος*; eandem doctrinam sic tractat Horatius, ut carmen aperiat viamque sibi muniat frequenti illa allegoria, qua humana vita cum navigatione comparatur; tum argumentum ponit v. 5 non nude aut exiliter, sed poetico ornatu quasi vestitum. Nam quod dicit, hoc est v. 5—8: „qui auream mediocritatem diligit, is liber est ab extremis vitis; vitiosa autem sunt et ea quae iusto sunt minora et ea quae modum excedunt.“ Illud cum per se pateat, hoc quod vitiosum esse non omnes intelligant tribus exemplis v. 9—12 illustratur. Iam versu 12 superior pars carminis, quod totum viginti quattuor habet versus, finem habet; altera pars, item duodecim versus complectens, de alia quidem

virtute agit sed ea cognata et quae radices quasi agat in mediocritate. Qui mediocri rerum condicione est contentus, is ad quaecunque fortunae vicissitudinem paratus est. Quae res sic illustratur. „Cui de praestantia mediocritatis persuasum est, is cum adversis rebus utitur, sperat secundas; cum secundis, metuit adversas, neque unquam subita rerum mutatione opprimatur, cum omnia in hac terra mutabilia esse sciat.“ Sed exemplo ex natura rerum sumpto ostenditur (vv. 15. 16), ne hominum quidem vitam continuis procellis agitari (v. 17); cuius doctrinae veritas egregie augetur vv. 18—20 altero Apollinis exemplo, qui interdum hilaris ac mitis non semper pestiferum arcum tendit. Extrema strophæ poeta redit ad primae inferioris partis strophæ sententiam, sed ita redit, ut imagine quoque navigationis iterata ad totius carminis initium per orbem reveniat. In carmine observa praecepta et exempla certo ordine inter se excipere; dicendi genus ad rem accommodatum, placidum et tranquillum. A. Terentius Varro Murena, etiam Licinius Murena dictus, filius fuisse videtur L. Licinii Murenæ, cuius causam Cicero egerat. Hic cum bellis civilibus paterna bona amisisset, summam fratris (vel fratris patruelis, ut alii putant) Proculæii (vide Carm. II, 2, 5) benevolentiam expertus est. Ab Augusto magni aestimatus Salassios in Alpibus habitantes superavit et a. 731 consul creatus est. Anno autem insequenti inita cum Fannio Caepione coniuratione capitis damnatus est. — Quo anno carmen scriptum sit dici nequit. Fluctuant interpretes inter a. 724. 728. 731.

Cautus horrescis nimium premendo

Littus iniquum.

5 Auream quisquis mediocritatem

Diligit, tutus caret obsoleti

Sordibus tecti, caret invidenda

Sobrius aula.

Saepius ventis agitur ingens

10 Pinus et celsae graviore casu

Decidunt turres feriuntque summos

Fulgura montes.

Sperat infestis, metuit secundis

Alteram sortem bene praeparatum

15 Pectus. Informes hiemes reducit

Iuppiter, idem

V. 1. *Rectius*] quam si contrariam rationem sequaris. — *nimum premendo*] Sic coniungenda esse vocabula caesura ostendit. — *iniquum*] propter vada et scopulos. — *tutus*] In hoc adiectivo et in altero *sobrius* summa sententiae vis posita est; nam hoc est, quod mediocritate paratur, et quod tuti sumus a molestiis inopiae et quod non superbum niumis fortunae beneficiis. cf. Carm. I, 37, 11. Praeterea nolim praetermittas artem in positione verbi *caret* conspicuam; deinde versus 6 et 7 miro modo ita compositos vides, ut iisdem locis collocata verba eundem ambitum habentia easdem efficiant caesuras. Omnia praeclarae huius strophae vocabula tanta arte disposita sunt, ut ne unum quidem sine communi omnium detrimento loco possit moveri. — *et celsae*] Notandus usus particularum; alterum exemplum *et* particula adiicitur, tertium non minus diversum particula *que*. Quod satis apud hunc poetam frequens est in rebus *tripartitis*, quem ipsum numerum in deliciis habuit Horatius. cf. Carm. I, 1, 23. I, 14, 4 sqq. I, 18, 14 sqq. I, 24, 6. I, 28, 1. I, 29, 1—5. I, 35, 33 sq. II, 2, 21 sq. II, 3, 17 sq. II, 6, 7 sq. II, 8, 9—12. II, 11, 14—17. II, 12, 5 sqq. II, 14, 3 sq. 17 sqq. II, 19, 25 sq. II, 20, 9—12. Non nomina

solum sed etiam sententiae hac ratione copulantur. Sic hoc loco et I, 29, 1—5 et II, 20, 9—12. Quare non est probanda altera lectio *excelsae*. Et cf. Claudian. in Rufin. I, 22: „Tolluntur in altum, ut lapsu graviore ruant.“ — *ingens*] cf. Carm. II, 3, 9. Ad totam sententiam compara Herod. VII, 10: „ὁρᾷς τὰ ὑπερέχοντα ζωᾷ ὥς κεραννοὶ ὁ θεὸς οὐδὲ ἐὰ φαντάζεσθαι, τὰ δὲ μικρὰ οὐδὲν μιν κνίξει· ὁρᾷς δὲ ὥς ἐς οὐκίματα τὰ μέγιστα αἰεὶ καὶ δένδρεα τὰ τοιαῦτα ἀποσκήπτει τὰ βέλεα· φιλέει γὰρ ὁ θεὸς τὰ ὑπερέχοντα πάντα κολοῦειν.“ Alii non bene pro *saepius* ex parva auctoritate praetulerunt *saevius*. — *fulgura*] „*Fulgur* proprie est splendor fulminis. Sed ex auctoritate codicum et Hieronymi quater sic afferentis v. *fulgura* retinendum: nam *fulgur* idem saepe notare ac *fulmen* apud Virgilium, Plinium, Tacitum cet. adeo notum est, ut exemplis id probare minime hic necesse sit.“ *Bentl.*

V. 13. Inde ab hoc loco usque ad finem oratio sententiarum plena et brevior et nervosior est quam in superiori parte. Quae simillima sunt et inter se proxima, ea ne minimo quidem externo vinculo vinciantur, immo vero brevitatis dicendi augetur figura asyndeti, quo bene usus est versu 13.

Summovet. Non, si male nunc, et olim
 Sic erit: quondam cithara tacentem
 Suscitât Musam neque semper arcum
 20 Tendit Apollo.

Rebus angustis animosus atque
 Fortis appare; sapienter idem
 Contrahes vento nimium secundo
 Turgida vela.

CARMEN XI.

Quid bellicosus Cantaber et Scythes,
 Hirpine Quinti, cogitet Hadria

— *informes*] Epitheta eiusmodi ex personificatione quam dicimus nascuntur. — *olim*] adverbium hoc cum factum sit ex pronomine *ollus* (= ille), diversum a praesenti tempus ostendit, nihil aliud. Inde triplex eius est usus; primum de infinito tempore quo quid factum est aut fieri solet usurpatur, ut frequenter reperitur in fabellis et exemplis: Hor. Carm. IV, 4, 5. Epod. 3, 1. Sat. I, 1, 25. II, 6, 79. Epist. I, 3, 18. I, 10, 42. II, 2, 197; deinde cum praesenti tempori aut praeteritum opponatur aut futurum, utrumque hoc adverbio indicatur; praeteritum saepissime: Carm. I, 10, 9. III, 11, 5. IV, 9, 9. Epod. 14, 7. Sat. I, 3, 35. 46. I, 4, 57 cet., futurum: praeter hunc de quo agitur locum Sat. I, 4, 137. I, 6, 85. II, 5, 27. — *quondam*] Adverbium hoc est adiectivi *quidam*; quo cum res significetur, quae qualis sit accurate non definitur, efficitur ut *quondam* adverbio non magis certum temporis momentum ostendatur. Quare eius usus non minus late patet quam *olim* adverbii; de infinito tempore, ut sit *interdum*: hoc nostro loco, tum Virg. Aen. II, 367. Georg. IV, 261; de futuro tempore: Hor. Sat. II, 2, 82. Virg. Aen. VI, 877; de praeterito saepissime. — *cithara*] Sic scribendum ex optimis codicibus, non *citharae*. cf. Carm. IV, 15, 1 sq. Gratissima haec est imago,

qua Apollo pulsa lyra Musam ad canendum excitat. Quam voluerit Horatius Musam, supervacaneum est quaerere; sed ne dubites, vide quid legatur A. P. 406. Ad rem legendus est Homerus, II. I, 43 sqq. et 601 sqq. — *atque*] Ne in ultimo loco versus posita particula offendaris, vide Carm. III, 11, 18. Epist. I, 18. 41. — *idem*] cf. supra v. 16. — *vento nimium secundo*] quoniam navicula eo potest agi, ubi vadis et scopulis circumdata et summis periculis opposita est. Haec autem velorum contrahendorum imago latinis poetis est usitatissima.

Carmen XI.

„Dum quae remota sunt spectas, cave ne proxima perdas; dum futura curas, ne praesenti vitae usu priveris; omnino noli quod tuum non est quaerendo haud necessarios tibi parare labores, immo quos tua tibi obiecit sors eos tu sapienter imminuere stude ac lenire.“ Medium carmen (vv. 11. 12) summam sententiam aperit. Ab initio quieto et tranquillo surgit sensim oratio usque ad medium carmen; inde interrogationes et omnis dicendi natura calidiorem animum produnt, qui non contentus quam vera sint illa praecepta intellexisse et proposuisse statim usum eorum et fructum cupidissime petit. Quis vero fuerit Quintius Hir-

Divisus obiecto, remittas

Quaerere nec trepides in usum

5 Poscentis aevi pauca. Fugit retro

Levis iuventas et decor arida

Pellente lascivos amores

Canitie facilemque somnum.

Non semper idem floribus est honor

10 Vernis neque uno Luna rubens nitet

Vultu: quid aeternis minorem

Consiliis animum fatigas?

Cur non sub alta vel platano vel hac

Pinu iacentes sic temere et rosa

15 Canos odorati capillos,

Dum licet, Assyriaque nardo

pinus nescimus; eundem hunc esse ad quem est Epistola I, 16 alii aiunt alii negant. Quo fere tempore carmen sit scriptum, eius vestigia latent in Cantabrorum et Scytharum commemoratione et canis Horatii capillis (cf. v. 15 et Vit. Hor. p. 15 not. 63); utraque res annos ostendit 728—730.

V. 1. *Cantaber et Scythes*] Cantabri occidenti, Scythae orienti soli subiecti, a media Italia longissime remoti. — *Hirpine Quinti*] inverso nominum ordine, ut Carm. II, 2, 3. — *Hadria divisus obiecto*] Haec ad Scythas solos sunt apta; quo tamen alterum mare obstare Cantabris haud difficulter intelligitur. — *remittas*] Compositum verbum pro simplici positum, ut aiunt; sed non temere id factum est. Sic enim quae animo fiunt oculis quasi subiiciuntur, et lumen aliquod accedit orationi. Inde frequens eius particulae *re* apud Horatium usus. — *nec trepides*] Carm. I, 9, 15. I, 11, 3. Cetera sic/inter se excipiunt: „nec trepides aevi pauca in usum poscentis.“ Nam quam alii voluerunt (Orellius) verborum compositionem „nec trepides in usum aevi pauca poscentis“, ea ut sine exemplo est, ita pedestrem orationem vehementer sapit. cf. ad Carm. II, 9, 17. Virg. Aen. XII, 589 „trepididae rerum.“ Sil. XII,

13 „trepidique salutis.“ — *aevi*] cf. ad Carm. II, 2, 5. — *levis*] Carm. I, 2, 38. Iuvenile corpus imprimis molle est ac tenerum, senile aridum et siccum; quae quam sint opposita, poeta artificiose indicavit altero epitheto in initio, altero in fine versus posito. — *facilemque somnum*] qui facile obrepit nec vigiliis interrumpitur. Sic Carm. III, 21, 4; quocum conferas Carm. II, 16, 15.

V. 9. Sed nihil est quod perpetuum sit aut vicissitudini non obiectum; quid tuus animus aeternitatem quaerit rerum, cui par esse nequit? — *rubens*] de splendore siderum, ut Propert. I, 10, 8: „Et mediis coelo Luna ruberet equis.“ — *Quid aeternis*] Constructio ἀπὸ κοινού, frequentissima apud Horatium; *aeternis consiliis fatigas* et *aet. cons. minorem*. — *vel hac*] prima quaque quae offertur, quam videre iam sibi videtur poeta. Platanus autem et pinus nominantur propter densam et amplam quae earum ramis diffunditur umbram. — *sic temere*] His verbis eadem negligentia exprimitur quae illo pronomine *hac*; ut fors tulerit, dum nil paramus, nil curamus; Graeci οὐτως. — *rosa*] sertis roseis. De singulari numero vide ad Carm. I, 5, 1. — *dum licet*] cf. Carm. II, 3, 15. — *Assyriaque nardo*] vide

Potamus uncti? Dissipat Evius
 Curas edaces. Quis puer ocius
 Restinguet ardentis Falerni
 20 Pocula praetereunte lympa?

Quis devium scortum eliciet domo
 Lyden? Eburna dic age cum lyra
 Maturet in comptum Lacae-nae
 More comas religata nodum.

CARMEN XII.

Nolis longa ferae bella Numantiae
 Nec durum Hannibalem nec Siculum mare

ad Carm. II, 7, 7, nam Assyria est Syria, unde Romam advehebantur aromata illa pretiosissima. De nardo locus est gravissimus apud Plinium H. N. XIII, 3: „Haec est materia luxuriae cunctis maxime supervacui. Margaritae enim gemmaeque ad heredem tamen transeunt, vestes prorogant tempus: unguenta illico exspirant ac suis moriuntur horis. Summa commendatio eorum, ut transeunte femina odor invitet etiam alii agentes. Exceduntque quadragenos denarios librae. Tanti emitur voluptas aliena.“

V. 17. *curas edaces*] Carm. I, 18, 4. — *puer*] servus, minister. — *restinguet*] temperabit; sed positum est verbum ad ardorem nobilissimi Falerni propius accedens. Cf. Iuven. 10, 27: „lato Setinum (vinum) ardebit in auro.“ — *devium*] habitans in devia domo, non vulgare. — *in comptum Lac.*] Ordo verborum est: comas religata in comptum nodum more Lacae-nae, i. e. capillis Lacae-narum more in simplicem nodum religatis. Non opus est ornare eam splendide capillos, sed veniat „simplex munditiis.“ Placet enim ipsa sine ornatu poetae et amico eius; uterque iam provectoris aetatis. cf. Carm. III, 14, 17—24. De graecarum mulierum ornatu capilli vide ad Carm. I, 33, 5.

Carmen XII.

Et re et consilio hoc carmen com-

parari potest cum sexto primi libri. Nam cum ostenditur, gravibus rebus, bellis et heroum praeclaris facinoribus non aptam esse lyram, Caesaris autem res gestas melius ab ipso Maecenate pedestri oratione describi posse quam a poeta tantae materiae haudquaquam pari, promittit Horatius sua carmina Maecenati non defutura, sed celebratura esse venustatem Licymniae et gratas rixas amantium. — Septem stropharum media (v. 13—17) quasi totius carminis fastigium est. In ceteris quoque strophis raram artem admiramur; nam cum bella militum et virtutes Caesaris in priore parte virtutibus Licymniae et bellis puellarum per chiasmi figuram opponantur, orbis quasi a bello ad bellum describitur; deinde uti a bellis per mythica facta ad Caesarem per tres strophas ascenditur, sic a Licymniae laudibus per mythicos Achaemenem et Mygdonem totidem descenditur ad muliebria bella. *Licymnia* Horatii amica, ut nonnullis placuit, esse non potest; obstat totius carminis ratio et natura; nec magis assentior aliis, qui libertam esse voluerunt a Maecenate amatam; obstat videtur et gravitas Maecenatis et festus dies Dianae (v. 20), a cuius choro prohibebantur libertae. Est igitur ipsa *Terentia*, Maecenatis uxor. Sed malim sponsam quam in matrimonium iam ductam. Nam a dignitate matronae abhorret ultima stropa. Cum veri-

Poeni purpureum sanguine mollibus
Aptari citharae modis

5 Nec saevos Lapithas et nimium mero
Hylaeum domitosque Herculeam manu
Telluris iuvenes, unde periculum
Fulgens contremuit domus

Saturni veteris; tuque pedestribus
10 Dices historiis proelia Caesaris,
Maecenas, melius ductaque per vias

simile sit, non diu ante a. 732 Terentiam Maecenati nupsisse, suspicor a. 730 vel 731 carmen scriptum esse; neque impedimento est nomen *Caesaris* (v. 10); nam etiam in carminibus post a. 727 scriptis, quo anno Octavianus *Augusti* nomen accepit, Caesaris nomen reperitur; cf. III, 14. IV, 2. IV, 5. IV, 15.

V. 2. *durum*] Sic in optimis, ut videtur, codicibus et editionibus; et recte quidem, nam durus Hannibal haudquam invenustam oppositionem efficit v. *mollibus*, sed exquisitam et gratam. Deinde *dirus*, quod hic quoque alii libri praebent, aliis locis magis aptum est quam huic, ut Carm. IV, 4, 42, ubi omnes Orelliani codices, in quibus hic est *durus*, alterum *dirus* concordantes tenent. Sequamur igitur codices tertio quoque loco, Carm. III, 6, 36 *dirum* lectionem sua auctoritate sustentantes. Neque huic rationi desunt veteres editiones. Hic (III, 6, 36) igitur est locus quem significasse videtur Quintil. VIII, 2, 9: „Quo nihil inveniri possit significantius; ut Horatius *acrem tibiam, Hannibalemque dirum*.“ — *Siculum mare etc.*] In his poeta significat Duilium eiusque victoriam navalem. Eadem tangitur Carm. III, 6, 34 iisdem prope verbis.

V. 5 sqq. *Lapithas*] cf. ad Carm. I, 18, 8 sq. Duo afferuntur exempla, Centauromachia et Gigantomachia; quae cum non opponantur inter se, nihil mutandum videtur. Alii contra codd. *domitosve*. De Hylaeo cf. Virg. Georg. II, 456. Ovid. Met. XII, 378. — *Herculeam manu*] Iuppiter enim ad cer-

tamen contra Gigantes Herculem socium sibi assumpsit. *Telluris iuvenes* graece sunt γηγενεῖς. — *unde*] De persona hoc dictum, ut graecum ὅθεν. Cuius rei exempla haec apud Horatium: Carm. I, 12, 17. I, 28, 28. III, 11, 38. Sat. I, 2, 58. 78. II, 6, 21. Deinde verba *unde periculum* ita dicta sunt, ut in pedestri oratione participium aliquod desideretur, veluti *motum*. Quamquam apud optimos etiam scriptores pedestres ea nominum per praepositiones coniunctio haud ita rara est ut vulgo creditur; nam dicitur latine: homo de plebe, bellum à Volscis, ex sermone rumor, versus de Philocteta; quae omnia huic Horatiano simillima sunt. — *contremuit*] verbum intransitivum cum accusativo coniunctum. Sic Virg. Aen. III, 648.

V. 9. *tuque*] Noli credere hanc particulam *que* alteri (v. 11) respondere. Habet enim haec opponendi facultatem post negans verbum et est utique referenda ad v. 1. *nolis*; quae re duplex oritur oppositio, inter Horatium Maecenatemque et inter carmina pedestremque orationem. Alia eius facultatis quam inesse dixi in particula *que* exempla vide haec: Carm. I, 2, 45. I, 27, 16. II, 20, 4. IV, 15, 25. — *pedestribus*] Inter scriptores qui supersunt Horatius primus hoc v. usus esse dicitur ad Graecorum imitationem, πρὸς λόγος. Ut haec ab Horatio ita scripta sunt, ut voluisse certe Maecenatem de Augusti rebus gestis scribere videas, ita aliunde satis probatur, Maecenatem etiam fecisse quod sibi proposuerit. — *ductaque*] *que* part. con-

Regum colla minacium.

Me dulces dominae Musa Licymniae
 Cantus, me voluit dicere lucidum
 15 Fulgentes oculos et bene mutuis
 Fidum pectus amoribus;

Quam nec ferre pedem dedecuit choris
 Nec certare ioco nec dare brachia
 Ludentem nitidis virginibus sacro
 20 Dianae celebris die.

Num tu quae tenuit dives Achaemenes
 Aut pinguis Phrygiae Mygdonias opes
 Permutare velis crine Licymniae,
 Plenas aut Arabum domos,
 25 Dum flagrantia detorquet ad oscula
 Cervicem, aut facili saevitia negat

ingit victorias et triumphos. — *per vias*] quas sequi solebat pompa triumphalis a Campo Martio per portam triumphalem et sacram viam ad aedem Iovis optimi maximi in Capitolio. cf. Carm. IV, 2, 35. Epod. 7, 7 sq. — *regum colla*] Pro regibus eam corporis partem bene posuit quae in hoc periculo praecipue agebatur; quippe colla captivorum ducum catenis onerata erant, mox secabantur vel laqueo frangebantur. — *minacium*] Hoc aptius ad rem quam quod in aliis legitur codicibus *minantium*. cf. IV, 3, 8. Epist. II, 1, 191.

V. 13. *Licymniae*] Poetae Latini cum vero nomini fictum subiicerent, eam legem observarunt, ut formam nominis quam accuratissime redderent syllabarum et numero et natura. — *lucidum fulgentes*] In eiusmodi elocutionibus (cf. Carm. I, 22, 23. II, 19, 6. III, 3, 17. III, 27, 67. Sat. I, 8, 41.) neutra adiectivorum genera usurpantur, si non solum qualis res sit indicandum est, sed exprimitur simul quid ipsa re quasi efficiatur. Sic h. l. oculi tantopere fulgent ut lucere videantur. — *bene*] i. e. plane. Sic Sat. I, 3, 61. Cic. Tusc. II, 19. — *dedecuit*] De perfecto vide ad Carm.

I, 1, 4. — *Dianae celebris die*] Dianae dies festus erat Idibus Augusti, quo die choros ducere non licuit nisi ingenuis virginibus. cf. ad Carm. IV, 6, 31

V. 21. *Achaemenes*] primus dicitur fuisse Persarum rex; unde Achaemenidarum gens originem duxit. — *Mygdonias*] Phrygia magna a Mygdone Mygdonia appellata est. cf. Hom. II, III, 185. Hor. Carm. III, 16, 41. — *permutare*] vide ad Carm. I, 17, 1. — *crine*] pro crinibus. In quibus cum haud exigua pars pulchritudinis cernatur, poetice omnis venustas corporis assumitur. — *Arabum*] cf. Carm. I, 29, 1. — *detorquet*] de caesura vide ad Carm. I, 18, 16. — *poscente magis*] In eo quidem conspicitur Licymniae facilis saevitia, quod oscula negat, quantumvis si sibi eripiantur maiorem etiam ex iis percipiat voluntatem quam sponsus, qui frustra poposcit. Scilicet ante negata sua sponte offert. Caesurae vis prohibet quominus — id quod alii fecerunt — *magis* a *poscente* separaretur et ad *gaudeat* pertrahatur. — *occupet*] Cum infinitivo hoc verbum coniunctum, ut Graecum *φθάρειν*. cf. Hor. Epist. I, 6, 32, I, 7, 66. Liv. I, 30. I, 14. Ceterum

Quae poscente magis gaudeat eripi,
Interdum rapere occupet?

CARMEN XIII.

Ille et nefasto te posuit die,
Quicumque primum, et sacrilega manu
Produxit, arbos, in nepotum
Perniciem opprobriumque pagi;

in asyndeto inest quaedam gradatio. Coniunctivus *occupet* optimorum codicum auctoritate et orationis concinnitate commendatur; alii *occupat* scripserunt ad particulam *dum* non sine molestia redeuntes.

Carmen XIII.

Olim cum Horatius in agro suo Sabino ambulet vel in prato sederet, cadente arbore paene oppressus est. Qua pietate erat, in hac etiam re non incertum casum sed divinam manum vidit; quare quid tunc sensisset praeclaro hoc carmine explicavit. Summa carminis sententia cernitur in praestantia poesis, quae, cum hominibus omnibus incerta fata immineant, id tamen habet consolationis, ut qui eam colant etiam apud inferos magna se fructuosos laude et veneratione sciant. Quod quomodo in duas partes dividatur, vides; alteram de caecis humani generis fati ab initio usque ad medium versum (v. 20), alteram de consolatione poeticae facultatis a medio usque ad ultimum versum descripsit Horatius. Utramque partem ex calamitate, qua paene est oppressus, ut ex communi quasi fonte ducit (v. 1. 21). — Ex reliquis locis, quibus periculi illius mentio fit, satis probabiliter intelligi potest, quoniam id anno factum videatur. cf. Carm. II, 17. III, 4. III, 8. Hoc enim carmine (III, 8) invitat Maecenatem ut ad se veniat Kalendis Martiis; quo ipso die anni superioris cadente arbore paene extinctus sit. Ex rerum autem quas ibi intexuit commemoratione concludi

posse videtur, scriptum illud esse a. 730. Nam primum Cantabri a. 728 et 729 devicti sunt, Augustus ex Hispania reversus a. 730 Iani templum clausit; deinde bella inter Phraatem et Teridatem bene commemorantur, quoniam a. 729 Teridates a Phraate pulsus ad Augustum in Hispaniam confugerat; tum Daci a. 725 et 726 ita erant victi, ut M. Crassus a. 726 de iis triumpharet; Scythae denique legatos ad Augustum in Hispaniam miserant a. 729, de qua re *Orosius* VI, 21: „hunc (Augustum) apud Hispaniam supplex cum gentilitio munere Eous Indus et Scythia Boreus oravit. Cantabrico bello per quinque annos acto totaque Hispania in aeternam pacem cum quadam respiratione lassitudinis reclinata ac reposita Caesar Romanam rediit.“ Cfr. Sueton. Aug. c. 21. Ita efficitur, ut C. III, 8 a. 730 scriptum credamus, hoc de quo nunc agitur a. 729 vel ipsis Kalendis Martiis vel paucis diebus post compositum esse, eodem anno Maecenatem aegrotasse (C. II, 17.). De Cantabris lege *Livium* I. 28, c. 12.

V. 1. Exsecratio arboris et eius qui eam plantavit per tres strophas continuatur; cuius demonstrativa pars ipsa tripartita tribus pronominiibus *ille* indicatur, relativa additur v. 10; quatuor singulae partes iterum in duas dividuntur; ut hunc habeamus ordinem verborum; *ille*, quicumque primum te posuit, *et nefasto die te posuit et sacrilega manu produxit*, *ille* tam nefarius haud dubie fuit, ut et parenti et hospiti, quibus sanctius nihil est, minus inferre non dubitaverit, etiam eo

5 Illum et parentis crediderim sui
 Fregisse cervicem et penetralia
 Sparsisse nocturno cruore
 Hospitis; ille venena Colcha

Et quidquid usquam concipitur nefas
 10 Tractavit, agro qui statuit meo
 Te, triste lignum, te caducum
 In domini caput immerentis.

Quid quisque vitet, nunquam homini satis
 Cautum est in horas: navita Bosporum
 15 Poenus perhorrescit neque ultra
 Caeca timet aliunde fata,

Miles sagittas et celerem fugam
 Parthi, catenas Parthus et Italum
 Robur; sed improvisa leti
 20 Vis rapuit rapietque gentes.

progressus est malitiae, ut *et venena* tractare *et* quaecunque nefanda sunt perpetrare ausus sit *ille*, qui *te*, triste lignum, quod casurum eras in domini caput immerentis, meo agro statuit. — *venena Colcha*] quibus usa olim est Medea venefica. Epod. 17, 35. — *caducum*] casurum. Virg. Aen. X, 622. Ovid. Met. IX, 651.

V. 13. Talia, inquit Horatius, cum facta sunt, docemur quam hominibus nihil sit certum, nihil securum; undique pericula imminet, et maxime unde non metuuntur. — *in horas*] Nam quaque hora unde periculum impendeat nesciunt. — *Bosporum*] aestuosum fretum Byzantium. cf. Carm. III, 4, 30. — *navita Poenus*] Phoenices significantur, non Karthaginienses; illi autem navigatione et mercatura nobiles. — *timet*] Ultima syllaba caesura et arsi producitur; quapropter opus non est coniecturis *timetque*, *timetve*, praesertim cum veri simile videatur, syllabas *at*, *et* in eiusmodi formis antiquis temporibus longas fuisse; cf. ad Carm. I, 3, 36; II, 6, 14, III, 16, 26. Sat. II, 2, 47. I, 5, 90. II, 3, 147. II, 1, 82. — *sagittas et celerem*

fugam] Parthi fugientes in insequentes hostes sagittas tendunt, fugientes magis metuuntur quam impetum facientes. cf. Virg. Georg. III, 31. Quare idem Horatius duobus nominibus quod Statius Silv. I, 4, 78 uno „arcuque horrenda fugaci Armenia.“ — *Italum robur*] Adiectivum Italum non minus ad catenas referendum; de qua re vide ad Carm. II, 6, 21. *robur* i. e. Romanos milites robustos et fortissimos. cf. Liv. IV, 46, 6: „duces legatique et quod circa signa *roboris* de exercitu fuit.“ Caes. b. c. III, 87, 5. Tacit. Hist. I, 87: „Addiderat plerosque e praetorianis, vires et *robur* exercitus.“ Liv. VII, 7: „octo cohortes, lecta *robora* virorum, scribuntur.“ Hi qui contra hostem *stant*, ponuntur contra *fugam* Parthorum. Alii minus recte carcerem roboreum (Sall. Cat. 55) his verbis significari voluerunt. — *rapuit rapietque*] cum fieri aliquid quovis et continuo tempore dicendum est, verbi tempora praeteritum vel praesens et futurum coniunguntur. Sic apud Horatium Carm. IV, 2, 38. Epist. I, 2, 43. Virg. Aen. VI, 617. Liv. XXV, 38. Plin. Epist. II, 1. „vivit vivet-

Quam paene furvae regna Proserpinae
 Et iudicantem vidimus Aeacum
 Sedesque discretas piorum et
 Aeoliis fidibus querentem

25 Sappho puellis de popularibus
 Et te sonantem plenius aureo,
 Alcaeae, plectro dura navis,
 Dura fugae mala, dura belli.

Utrumque sacro digna silentio
 30 Mirantur umbrae dicere; sed magis
 Pugnas et exactos tyrannos
 Densum humeris bibit aure vulgus.
 Quid mirum, ubi illis carminibus stupens
 Demittit atras belua centiceps
 35 Aures et intorti capillis
 Eumenidum recreantur angues?

Quin et Prometheus et Pelopis parens

que“, Vell. Patere. II, 66 „vivit vivet-
 que.“ Liv. IX, 19. Lucil. apud Quin-
 til. I, 6, 8 „fervit aqua et fervet; fervit
 nunc, fervet ad annum.“

V. 21. *furvae*] atrae; vocabulum il-
 lud antiquum et sublime. Apud infe-
 ros autem omnia atra. — *Proserpinae*] Prima syllaba h. v. ab aliis produci-
 tur. Cf. Carm. I, 28, 20. Sat. II, 5,
 110. — *Sappho*] Vulgaris accusativi
 forma. Fuit autem Sappho Lesbica,
 Aeolia. cf. Carm. IV, 9, 12. — *puel-
 lis*] quod amori suo nollent obtempe-
 rare. — *plenius*] ob maiorem rerum
 dignitatem et gravitatem Alcaeae; cf.
 Carm. I, 32, 5. — *plectro*] vide ad
 Carm. II, 1, 40. De Alcaeae Quinti-
 lianus X, 1, 63: „Alcaeus in parte
 operis *aureo plectro* merito donatur,
 qua tyrannos insectatus multum etiam
 moribus confert: in eloquendo quoque
 brevis et magnificus et diligens et ple-
 rumque Homero similis: sed in lusus
 et amores descendit, maioribus tamen
 aptior.“ Et ipsa Sappho apud Ovid.
 Heroid. 15, 29: „Nec plus Alcaeus,
 consors patriaeque lyraeque, Laudis

habet, quamvis grandius ille sonat.“
 — *sacro silentio*] Sacra silentio age-
 bantur; poetarum cantus eodem quo
 sacra silentio digni. In ceteris graece
 coniunge: mirantur dicere pro *admi-
 rantur cum dicant*. Brevitas in elo-
 quendo poetis aptior. — *bibit aure*]
 de cupiditate audiendi, ne quod ver-
 bum perdatur. Sic Ovid. Trist. III,
 5, 14: „auribus illa bibi.“

V. 33. *Quid mirum, ubi*] Umbras vir-
 tute poetarum delectari non est miran-
 dum, cum beluae ipsae carminum
 blanditiis mulceantur. — *demittit au-
 res*] Cerberus perpetua vigilantia au-
 res arrectas habet; carmina efficiunt
 ut quid sit suum paulisper oblitus au-
 res demittat. Sic quae angues in Eu-
 menidum capillis perpetuo motu agun-
 tur, ne unquam mala sceleratorum
 conscientia placetur, eae etiam dulce-
 dine cantus *recreantur* i. e. desistunt
 a movendo et stimulando; qua re in-
 dicatur, etiam malos paulisper crimi-
 num et poenarum oblivisci et recreari.
 Ceterum Cerberus vulgo triceps habe-
 tur, apud Hesiodum *πεντηκοντακέ-*

Dulci laborum decipitur sono,
 Nec curat Orion leones
 40 Aut timidos agitare lyncas.

CARMEN XIV.

Eheu fugaces, Postume, Postume,
 Labuntur anni nec pietas moram
 Rugis et instanti senectae
 Afferet indomitaeque morti;

5 Non, si trecentis quotquot eunt dies,
 Amice, places illacrimabilem

εἴη est. Simillimus locus est Hor. Carm. III, 11, 17—24. Sic haec cum insequenti Promethei et Tantalii exemplis facillime congruunt. — *laborum decipitur*] Graece haec coniuncta sunt ad similitudinem verborum obliviscendi et cessandi; ea enim inest huic verbo generalis notio: sua sponte oblivisci ut qui obliviscatur ipse vix sentiat. cf. ad Carm. II, 9, 17. — *Orion*] magnus dum vixit venator. Solent autem umbrae quae in vita erant studia apud inferos persequi. Sic Hom. Od. XI, 571. cf. Virg. Aen. VI, 651 sqq. Ovid. Met. IV, 445. Hor. Carm. III, 4, 71. — *angues, lyncas*] Solent haec nomina feminino genere usurpari; non dubium tamen quin Horatius masculinum posuerit, quod Priscianus diserte ex h. l. affert. Optimi etiam codices masculinum genus tuentur.

Carmen XIV.

Quis Postumus fuerit, ad quem hoc carmen Horatius scripsit, nescimus. Hoc autem tenendum est, neque illud nomen neque frequentem in carmine alteram personam impedire quominus communem locum ex Horatiana philosophia saepe celebratum hunc habeamus. Conqueritur poeta de brevitate vitae, de necessitate moriendi, de inanitate inferorum. Omnia tamen a solita animi hilaritate Horatii magnopere recedunt et tristitiam quandam sapiunt, quam semper ab animo suo excludere ne huic quidem contigit. — Media

strophæ huius quoque carminis ostendit caput rei, quod sic illustratum videbis: Neque innocentia vitae (1—4) neque sacrorum multitudine a communi humani generis sorte te vindicabis (4—12); nam aliqua ratione mors obunda est (13—16). Ad inferos detrudimur (17—20), relinquimus omnia quaecunque in hac terra cara habemus (21—24), iisque potentur post nostrum discessum heredes carissima nobis quaeque profundentes (25—28). — Quonam anno haec poeta scripserit dici nequit.

V. 1. Quo animo fuerit poeta cum haec scriberet, prima statim querula prodit vocula *eheu*; neque aliena ab hoc animo anadiplosis est *Postume, Postume*. — *labuntur*] ut ipsi vix sentiamus, imagine de labentibus aquis, quarum motum oculorum acie vix cernas, petita. Iisdem prope verbis Ovidius Fast. VI, 771: „Tempora labuntur tacitisque senescimus annis.“ — *rugis*] animadvertite tres partes particulis *et, que* coniunctas. — *quotquot eunt dies*] poetice pro *quotidie*. *Ire* autem de temporum aequabili motu frequens verbum. Carm. IV, 5, 7. Epist. II, 2, 55. — *trecentis*] Liv. XXII, 10 „bubus Iovi trecentis fieri votum est.“ — *illacrimabilem*] cf. Carm. II, 3, 24. — *ter amplum*] Ad comparisonem hoc epitheton factum; nam cum *ter amplus* Geryon dometur, quomodo nos effugiemus? Geryon, Chrysaoris et Calirrhoës filius, ingentis magnitudinis

Plutona tauris, qui ter amplum
 Geryonen Tityonque tristi
 Compescit unda, scilicet omnibus
 10 Quicunque terrae munere vescimur
 Enaviganda, sive reges
 Sive inopes erimus coloni.
 Frustrâ cruento Marte carebimus
 Fractisque rauci fluctibus Hadriae,
 15 Frustra per auctumnos nocentem
 Corporibus metuemus Austrum:
 Visendus ater flumine languido
 Cocytos errans et Danaï genus
 Infame damnatusque longi
 20 Sisypheus Aeolides laboris.
 Linquenda tellus et domus et placens
 Uxor, neque harum quas colis arborum
 Te praeter invisas cupressos
 Ulla brevem dominum sequetur.

monstrum, ab Hercule olim superatus; qui ut a Graecis *τρεῖς ἀνδρῶν*, *τριώματος* sic latine ab Horatio *ter amplus*, ab aliis *ter geminus*, *tricorpor*, *tripectorus* appellatur. — *Tityon*] vid. Hom. Od. XI, 576. cf. Virg. Aen. VI, 595. Is Terrae fuit filius. Hor. Carm. III, 4, 77. III, 11, 21. IV, 6, 2. — *terrae munere*] In hac mortalitatis significatione imitatus est poeta Homerum, quem vide Il. VI, 142. XIII, 322. Od. VIII, 222. Et Simonides ap. Schneidewin. del. p. 380: „ἐν γένεθι ὅσοι κατὰ τὸν αἰνόμεθα χθονός. — *enaviganda*] Hoc verbum cum proprie sit navigando exire, haud ita diversam h. l. sententiam habet: navigando traicere.

V. 13. Frustra homines consilio et prudentia mortem vitare student; ob-unda semel est. Illud autem studium duplex est, aut cum quae vitae subita parant pericula iis abstinemus (Mars — fluctus Hadriae), aut cum cavemus ne malo coelo et febribus sanitas corporis perdatur (v. 15. 16). Sic poeta coniunxit quaecunque extra nos posita

infestum impetum quasi faciunt in sanitatem et vitam; reliqua quae sunt in nobismet ipsis, quibus ipsi mortem acceleramus, non potuit commemorare; scilicet haec saepe sunt, propter quae illis frustra caremus. — *fractisque*] Scopulis franguntur fluctus, inde raucus fragor. Vide tamen quam egregie etiam verborum sonum ad rerum duritiem composuerit Horatius. — *corporibus*] Dativus obnoxius est potestati utriusque vicini verbi. — *flum. lang. errans*] languide fluens. Compara de Cocyto Virg. Georg. IV, 478. Aen. VI, 132. — *Danaï genus*] cf. Carm. III, 11, 22 sq. — *Sisypheus*] Hom. Od. XI, 592. — *damnatus longi laboris*] Qui genitivi casus natura quae sit perspexerit, eum haec non offendent. Nam *damnare* cum haud procul absit ab *aestimando*, nisi quod illud poenam, hoc pretium habet, nihil est quod quominus illud quoque genitivum quasi pretii adsciscat possit impedire.

V. 21. *Linquenda*] cf. Carm. II, 3, 17. — *cupressos*] quae *invisae*

25 Absumet heres Caecuba dignior
 Servata centum clavibus et mero
 Tinget pavimento superbo,
 Pontificum potiore coenis.

CARMEN XV.

Iam pauca aratro iugera regiae
 Moles relinquent, undique latius
 Extenta visentur Lucrino
 Stagna lacu platanusque caelebs

dicuntur quia *funebres* sunt, Epod. 5, 17, et *ferales*, Virg. Aen. VI, 216. Cupressus enim Plutoni sacra ante domum funestam, circa rogum, ad sepulcrum ponebatur. — *brevem*] cf. Carm. II, 3, 13. — *dignior*] sc. quam tu. Sed inest tristis quaedam et acerba ironia in hoc epitheto, cum ipse bene viderit, quo remedio haec vitae brevitatis optime possit sanari. — *superbo*] Sic ex optimis codicibus scribendum. Reliquae lectiones *superbum*, *superbus*, *superbis* merae sunt coniecturae eorum qui vino duplex epitheton (*superbo* — *potiore*) inviderent. Sed confer supra v. 18. Cocytum, tum lupam Carm. III, 27, 2. De tetra vini profusione in epulis heluonum cf. Cic. Philipp. II, 41: „natabant pavimenta vino, madebant parietes.“ Petron. 38: „plus vini sub mensam effundebatur, quam aliquis in cella habet.“ Vitruv. VII, 4, 5: „In convivii Graecorum hibernaculorum et quod poculis et pytismatis effunditur, simul cadit siccescitque.“ — *Pontificum pot. coenis*] potiore quam esse solet in lautis pontificum epulis; quae in proverbium videntur abiisse. Neque aliter positae sunt Carm. I, 37, 2 *Saliares dapes*.

Carmen XV.

Continet hoc carmen iudicium Horatii de nimia suae aetatis privata luxuria, publica parsimonia. Nam cum privati homines amplissima aedificia exstruerent, cum tam fastidiosi essent

Romani ut naturam locorum spernentes terram vellent ubi esset mare, mare ubi esset terra, cum tota Italia luxui et mollitiei serviret neque rari agri satis frumenti ederent, tum tanta eorundem hominum in publicis aedificiis erat parsimonia, ut deorum templa a maioribus magnifice erecta aut vetustate corruerent aut incendiis vastata iacerent. Sic iam Cicero pro Flacco 12: „Haec ratio ac magnitudo animi in maioribus nostris fuit, ut cum in privatis rebus suisque sumptibus minimo contenti tenuissimo cultu viverent, in imperio atque in publica dignitate omnia ad gloriam splendoremque revocarent.“ — De anno huius carminis natali consentiens prope virorum doctorum sententia est; a. 726 scriptum existimant, quoniam eo anno Octavianus censuram agens templa vetustate collapsa aut incendiis deleta refecit ac splendide ornavit; quam rem ultima strophæ ab Horatio putant tangi.

V. 2. *moles*] de magnis aedificiis; cf. Carm. III, 29, 10. — *regiae*] Regium quod regis, regale quod rege dignum est. Apud poetas tamen et eos scriptores qui post Augusti erant aetatem *regius* adiect. alterius locum occupavit. — *stagna*] ingentes piscinae, in quibus potuit navigari. — *platanus caelebs*] grata ea quidem, non utilis. Cur *caelebs* appelletur ulmorum ostendit oppositio; ulmi vitibus maritantur, non platani. Quas quam insane coluerint Romani, elucet exem-

- 5 Evincet ulmos. Tum violaria et
 Myrtus et omnis copia narium
 Spargent olivetis odorem
 Fertilibus domino priori;
 Tum spissa ramis laurea fervidos
 10 Excludet ictus. Non ita Romuli
 Praescriptum et intonsi Catonis
 Auspiciis veterumque norma.
 Privatus illis census erat brevis,
 Commune magnum; nulla decempedis
 15 Metata privatis opacam
 Porticus excipiebat Arcton,
 Nec fortuitum spernere cespitem
 Leges sinebant, oppida publico

plo Hortensii oratoris, qui platano quam in Tusculana villa posuerat vinum ipse suffudit. — *copia narium*] Est figura metonymiae, qua nares dicuntur earum rerum loco, quibus nares delectantur. Sic Aelian. V. H. III, 1: καὶ ἔστιν ὁ φθάλμιος πανήγυρις. — *olivetis*] Est ablativus loci: ubi olim oliveta erant, ibi nunc violaria sunt. Quintil. VIII, 3, 8: „An ego fundum cultiorem putem, in quo mihi quis ostenderit lilia et violas et anemonas, fontes surgentes, quam ubi plena messis aut graves fructu vites erunt? Sterilem platanum tonsasque myrtos quam maritam ulmum et uberes oleas praeoptaverim?“

V. 10. *ictus*] Adiectivo *fervidos* cautum satis est, ne quis *ictus*, qui solis sunt, perperam intelligeret et cum nonnullis codd. scribere vellet *aestus*. Stat. Silv. I, 2, 154 „Excludunt radios silvis demissa vetustis Frigora.“ Quibusdam lauri generibus opere topiario umbracula et tecta ambulacra formabantur; nam magna in formandis arboribus a naturaque revocandis ars fuit Romanorum. — *intonsi*] Catonis Censorini; anno demum 454 u. c. tonsores ex Sicilia Romam venerunt. — *auspiciis*] Auspicium summorum belli pacisque magistratuum ius fuit deos interrogandi; id quod antequam publice aliquid ageretur semper fiebat.

Quare qui auspicia habebant, in agendo praeibant suoque quasi exemplo reliquos trahebant. Inde factum ut *auspica* idem prope significarent quod exemplar, cuius vestigia premerentur.

V. 13. *census*] cf. Sat. II, 3, 324. Epist. I, 1, 43. I, 7, 56. — *commune*] ut graecum τὸ κοινόν; respública, aerarium. — *metata*] passive. cf. Sat. II, 2, 114. — *decempedis*] perticae X. pedum, quae *privatae* dicuntur, quod porticus non publicæ, sed a privatis hominibus exstruuntur. Nam privatis quoque domibus porticus addebantur, septentriones versus ad vitandos radios solis, meridiem versus ad minuenda frigora per hiemem et ad apricandum. — *fortuitum*] ubivis obvium. Notandum, eius vocabuli litteram i a poetis et produci et corripri, nisi forte in paucis locis, quibus i littera corripri videtur, per synaeresin trisyllabum est vocabulum. — *cespitem*] in quo prostrati cubarent homines. cf. Tibull. II, 5, 99, sq.: „At sibi quisque dapes et festas exstruet alte Cespitibus mensas cespitibusque torum“; alii minus recte de tuguriorum culminibus, ut apud Virg. Buc. I, 68. — *oppida*] aedificia publica, muros et quae statim nominantur deorum templa. — *novo saxo*] nimirum si collapsa essent.

Sumptu iubentes et deorum

20 Tempa novo decorare saxo.

CARMEN XVI.

Otium divos rogat in patenti

Prensus Aegaeo, simul atra nubes

Condidit lunam neque certa fulgent

Sidera nautis;

5 Otium bello furiosa Thrace,

Otium Medi pharetra decori,

Grosophe, non gemmis neque purpura ve-
nale neque auro.

Carmen XVI.

Omnes homines otium et securitatem vitae quaerunt, sed ubi non inveniunt, extra se ipsos (v. 1—7); verum autem otium neque summis honoribus neque divitiis paratur (7—12), sed mediocritate et moderatione animi a cupiditatibus vacui (13—16). Quare quid beatam vitam aliunde quaerimus, cum in nobismet ipsis posita sit (17—20)? Nam in animis nostris si quae insunt culpae et curae, eas ubique nobiscum feremus (21—24). Quamobrem cum ne summae quidem divitiae otium possint gignere, quid his curis laboramus? Cur non quae adsunt gaudia iis fruimur, quae mala, iis patientia et risu medicinam quandam adhibemus? Nam in vita hominum non omnia possunt ex voto cedere (25—29); sed alia aliis bona fato data sunt. Quod quam verum sit exemplis illustratur. Sic procedit sententiarum series; summam autem carminis sententiam invenies in medio versu. — Scriptum est carmen ad Pompeium Grosphum, equitem Romanum Siciliensem, de quo Epist. I, 12, 22. Quo anno haec Horatius scripserit nequit dici, nisi quod ex v. 37 intelligis habuisse poetam tum Sabinum praedium; itaque scriptum est post a. 722.

V. 1. *Otium*] Huius vocabuli notio cum latissima sit, quid singulis locis significet ex sententiarum omni et coniunctione et discrepantia quasi eruatur oportet. Nam cum eum vitae statum indicet, quo quid faciamus quid non faciamus in nostro omnino iudicio vel arbitrio positum est, quo nullis ne minimis quidem curis aut animi aut corporis vel trahimur ad certam rem vel distrahimur, contrarium hoc vocabulum est negotiis et privatis et publicis, bello, motibus et naturae et animi, curis, perturbationibus. Quo magno notionis ambitu quam mirifice in hoc carmine Horatius usus sit nolo praetermittatur. Homines, inquit, otium quaerunt externum, neque illud consequuntur, quia internum animi otium neque cognoverunt neque petunt, quia cupiditatibus agitantur neque ipsos se infestissimos sibi adversarios esse sentiunt. Sic sensim a corporis otio ad animi transitur v. 7. — *Aegaeo*] Poetarum more non universum mare nominavit, sed exemplum satis celebratum. cf. Carm. III, 29, 63. — *certa sidera*] nam „ducunt instabiles sidera certa rates“ Tibull. I, 9, 10. — *Thrace*] Cum primum exemplum nautarum satis explicaverit, tum demum homines otium petere a diis cum in periculis versentur (cf. Carm. I, 1, 16—18), alterum et tertium si-

Non enim gazae neque consularis
 10 Summovet lictor miseros tumultus
 Mentis et curas laqueata circum
 Tecta volantes.

Vivitur parvo bene, cui paternum
 Splendet in mensa tenui salinum
 15 Nec leves somnos timor aut cupido
 Sordidus aufert.

Quid brevi fortes iaculamur aevo
 Multa? Quid terras alio calentes
 Sole mutamus? Patriae quis exsul
 20 Se quoque fugit?

Scandit aeratas vitiosa naves
 Cura nec turmas equitum relinquit

mili ornatu facile carent. — *Medi]* Parthi. cf. Carm. I, 29, 4.

V. 9. *consularis lictor]* homines quidem obstantes a lictoribus summoventur, non curae in animo etiam consulis habitantes. — *laqueata tecta]* non totius domus, sed cubiculorum et tricliniorum; de quorum ornatu haec lege *Beckeri* (Gallus T. I. p. 98 sq.): „Die Decken (der Zimmer) wurden anfänglich nur durch über die Balken gelegte Bretter gebildet. Um ihnen indess ein zierlicheres Ansehen zu geben, machte man gleichsam einen Rost von Balken, so dass vertiefte Felder entstanden, lacus, lacunar, laquear. Diese Lacunarien erhielten mannigfachen Schmuck in Stucco, und wurden auch wie in Tempeln vergolddet und mit Elfenbein ausgelegt. Nachher verkleidete man auch die Felder, und malte die Decke.“ cf. Cic. de legg. II, 1: „Magnificasque villas et pavimenta marmorea et laqueata tecta contemno.“ — *Curas]* Theogn. 729. B. „Φροντίδες ἀνδρώπων ἔλαχον περὰ ποινῆς ἔχουσιν.“ — *circum]* Tmesis. — *Vivitur parvo bene, cui]* Ex dativo *cui* ad *vivitur* verbum eliciendum *ei*; deinde *cui* non magis ad *splendet* referendum quam ad *aufert*. Describitur autem is qui paucis quae habet est contentus. *Salino* enim et

tenui mensa ea significantur quae necessaria sunt remoto omni luxu apparatus et condimentorum. cf. Sat. I, 3, 13. Claudian. in Rufin. I, 215 „Vivitur exiguo melius.“ — *Splendet]* i. e. pretium habet; nam quod pretium habet quasi splendet, et quod splendet solet magni aestimari. cf. Carm. II, 2, 4. — *leves somnos]* vide ad Carm. II, 11, 8. — *timor aut cupido]* solent haec coniuncta esse cum magnis divitiis, timor ne auferantur opes, cupido vel cupiditas ut augeantur. — *Sordidus]* Cupido apud Horatium masculino semper genere: Carm. III, 16, 39. III, 24, 51. Sat. I, 1, 61. Epist. I, 1, 33. Ceterum vide ad Carm. I, 28. p. 79.

V. 17. *fortes]* i. e. omni virium contentione, qua ad colligendas res opus esse videtur, cum simus homines ὀλιγοχρόνιοι (brevi aevo). — *mutamus]* vide ad Carm. I, 17, 1. cf. II, 12, 23. III, 1, 47. Epod. 9, 28. Sat. II, 7, 109. Epist. I, 7, 36. — *patriae exsul]* Ovid. Met. IX, 409: „exsul mentisque domusque.“ cf. ibid. VI, 189; neque haec aliena sunt a vi et natura genitivi, praecipue graeci. — *se]* cum suis curis et cupiditatibus, quas secum habet ubique. Sic accedit insequens strophæ. — *aeratas naves]* Simillimus locus est Carm. III,

Ocior cervis et agente nimbos

Ocior Euro.

25 Laetus in praesens animus quod ultra est

Oderit curare et amara lento

Temperet risu: nihil est ab omni

Parte beatum.

Abstulit clarum cita mors Achillem,

30 Longa Tithonum minuit senectus,

Et mihi forsán, tibi quod negarit,

Porriget hora.

Te greges centum Siculaeque circum

Mugiunt vaccae; tibi tollit hinnitum

35 Apta quadrigis equa, te bis Afro

Murice tinctae

Vestiunt lanae; mihi parva rura et

Spiritum Graiae tenuem Camenae

Parca non mendax dedit et malignum

40 Spernere vulgus.

1, 37, sqq. cf. Sat. II, 7, 111—115. Epist. I, 11, 27. I, 14, 15 sq. — *quod ultra est*] i. e. ultra praesens, futurum. — *oderit*] vide ad Carm. I, 1, 8. — *lento*] quieto (gleichgültig); quo risu sapiens ostendit se rebus adversis non perturbari. Quare non bene alii praetulerunt *laeto*, Benteius *leni*. — *Achillem*] cui ancipite fato destinatum erat, ut vitam haberet aut brevem et nobilem aut longam et ignobilem; quare cum illam praetulisset, *μυρρίδαδιος* factus est (Hom. II. I, 352. IX, 410 sqq.). — *Tithono*] Laomedontis filio, cui precibus Aurorae coniugis Iuppiter motus longissimam vitam dedit; ad quam cum oblita esset Aurora ut perpetua iuventus adderetur, Tithonus crescentibus annis tantopere exaruit (v. 30 *minuit*), ut in cicadam tandem misericordia Iovis mutaretur. cf. I, 28, 8. Quae exempla aptissima sunt ad ostendendum, non omnibus data omnia, aliis alia esse negata. Ab exemplis interposita generali sententia ad amici suamque rem transit. — *te*] Anaphora *te, tibi, te*

praeclare facit, ut quam multa fato data sint Grospho videamus; ubi de se loquitur, semel *mihi* posuit. — *circum*] vide ad Carm. I, 2, 34. — *bis tinctae*] Becker Gall. T. II. p. 96: „Da die übrige Kleidung durchaus weiss sein musste, so liess man es wenigstens bei der lacerna (ein offener Mantel, der gewöhnlich wohl über der rechten Schulter durch eine fibula zusammengeheftet wurde) nicht an bunten Farben fehlen.“ ibid. p. 98: „Namentlich war auch hier der zweimal gefärbte Purpur, *δύσπαρος*, als besonders kostbar beliebt, wiewohl sein Geruch so wenig angenehm war, dass Martial. IV, 4 unter einer Menge von foedis odoribus auch nennt: quod bis murice vellus inquinatum.... Eine solche lacerna kam zuweilen, wie Martial. VIII, 10 erzählt, 10000 Sest. (2000 fr.).“ cf. Epod. 12, 21. Epist. II, 2, 181. — *tenuem*] subtilem et ingeniosum. cf. A. P. 46. — *malignum*] iniquum iis, qui aliqua laude excellunt. — *non mendax*] cf. Carm. Saec. 25.

CARMEN XVII.

Cur me querelis exanimas tuis?
 Nec dis amicum est nec mihi te prius
 Obire, Maecenas, mearum
 Grande decus columnenque rerum.
 5 Ah te meae si partem animae rapit
 Maturior vis, quid moror altera,
 Nec carus aequae nec superstes
 Integer? Ille dies utramque
 Ducet ruinam. Non ego perfidum
 10 Dixi sacramentum: ibimus, ibimus,
 Utcunque praecedes, supremum
 Carpere iter comites parati.
 Me nec Chimaerae spiritus igneae
 Nec si resurgat centimanus Gyas
 15 Divellet unquam: sic potenti
 Iustitiae placitumque Parcisi.

Carmen XVII.

Cum Maecenas perpetuis febribus laboraret — de qua re Plinius H. N. VII, 51: „Quibusdam perpetua febris est sicut C. Maecenati. Eidem triennio supremo nullo horae momento contigit somnus“ —, sensim tanta eius animum occupasse videtur tristitia, ut cum tunc ipsum ex gravi impetu convalesceret, restituta valetudine non iam gauderet, sed ne redeunti morbo mox succumberet continuo angore premeretur. Qua animi affectione quid tristius potuit esse optimo amico, Horatio? Quare hic dulcissimo hoc carmine illum admonet ne vitae spem abicere velit; utrique longiorem vitam divino consilio esse destinatum; cuius rei luculentum testimonium utrumque accepisse, alterum in salute ex morbo restituta, in capite a cadente arbore servato alterum. Quibus deorum beneficiis quid aliud ostendi nisi coniuncta esse utriusque fata? Anno videtur hoc carmen esse scriptum eodem quo huius libri 13, ad quod vide. Facile intelligitur, totum hoc tenerrimae ami-

citiae testimonium in duas dividi aequales partes, quarum quasi praenuntius est versus 2.

V. 1. *exanimas*] moerore afficis. Sat. I, 4, 127. Cic. pro Mil. c. 34, 93. — *decus columnenque*] eadem haec ornamenta quae Carm. I, 1, 2. — *partem animae*] cf. Carm. I, 3, 8, ubi vide. — *carus aequae*] atque nunc sum. Quo verbo quid sit quidve valeat totum se debere ait Maecenati. cf. Epist. I, 3, 29. Epod. 1, 5. — *ibimus, ibimus*] In reduplicatione (*ἀνὰ δίπλωσις*) mira quaedam vis inest affirmationis et veritatis. — *utcunque*] ad exemplum particulae ut haec quoque accepit temporis significationem: quando cunque. — *carpere*] Sat. I, 5, 95. Virg. Georg. III, 142. IV, 311. — *Chimaerae*] „Non est tanta vis, quae me possit separare a te.“ In quo loco ut summam vim poetice describeret, Chimaeram, ignivomum monstrum, et centimanum Gyan, Terrae et Coeli filium (Carm. I, 27, 24. III, 4, 69), intulit. cf. Virg. Aen. VI, 285. — *resurgat*] si fieri possit ut resurgat. Nam in Tartaro prostratus iacet. —

- Seu Libra seu me Scorprios adspicit
 Formidolosus, pars violentior
 Natalis horae, seu tyrannus
 20 Hesperiae Capricornus undae,
 Utrumque nostrum incredibili modo
 Consentit astrum. Te Iovis impio
 Tutela Saturno refulgens
 Eripuit volucrisque Fati
 25 Tardavit alas, cum populus frequens
 Laetum theatris ter crepuit sonum;
 Me truncus illapsus cerebro
 Sustulerat, nisi Faunus ictum
 Dextra levasset, Mercurialium
 30 Custos virorum. Reddere victimas

Iustitiae] *Δίκη*, Iovis et Themidis filiae. Quae quod Parcis additur, id ideo factum est, ut non solum fata id ita velle sed recte etiam velle ostendatur. Nam Iustitia Parcarum soror est. — *placitumque*] De part. *que* vide ad Carm. II, 7, 25. — *Seu Libra cet.*] Horatium quam non deditus sit mathematicorum ineptiis carmine I, 11 ostendit. Quare hic quoque bene constans: quaecumque est, inquit, genitura mea, quodcumque astrum natali mea hora regnavit, hoc certum est, consentire nostra sidera, i. e. natura et moribus nos arctissime esse coniunctos. Credebantur autem alia sidera prospera et salutaria (*ἀγαθοποιοὶ ἀστέρες*), alia noxia et infesta (*κακοποιοὶ ἀστέρες*); illorum coniuncta potestate horum inimica vis aut superabatur aut non superabatur; utrorumque temperata vi ratio genesis efficiebatur, cuius observatio a mathematicis institui et horoscopus dici solebat. Inde intelliguntur verba *adspicit* et *pars violent. nat. horae*. Nam etiamsi sidera inter se adspicere dicebantur, tamen non minus etiam adspiciebant nascentem hominem. Praesens tempus *adspicit* durantem etiam per vitam sideris potestatem exprimit. Libra, Iuppiter, Venus, Luna *ἀγαθοποιοὶ*, Scorpio, Capricornus, Saturnus, Mars *κακοποιοὶ* habebantur. In quam rem conferas

nostratis Schilleri tragoediam de Wallensteinii ducis morte I, 1.

V. 19. *tyrannus Hesp. undae*] Capricorni imperio subiecta erat omnis pars Europae occidentalis; quare in mari Hispanico tempestates movebat. — *Saturno*] Dativus coniungendus est et cum v. *refulgens* et cum v. *eripuit*. — *volucrisque Fati*] cf. Sat. II, 1, 58. — *ter crepuit sonum*] Quid his verbis significetur prope nescimus. Videtur tamen eadem esse res, quam supra iam Carm. I, 20, 4 sqq. indicatam legimus. — *Faunus*] Carm. III, 8, 7 Baccho se salutem debere ait; in quo tamen discrimine nolim offendas, nam Faunus agrestis deus poetam ruris amatorem (Epist. I, 10, 2) tutatus est. Praeterea *Faunus* Romanis idem fuit qui *Pan* Arcadum; itaque *Mercurii* filius est et *Mercurialium virorum* custos. De hypothetica quam dicunt forma cf. Carm. III, 16, 3 sqq. Cic. ad fam. XII, 10 „Praeclare viceramus, nisi fugientem Lepidus recepisset Antonium.“ — *Mercurialium*] poetarum, qui in Mercurii tutela sunt. cf. Carm. II, 7, 13. — *reddere victimas*] Iam cum benevolentiam deorum uterque expertus sit, imprimis gratias reddendas esse diis bonamque spem in posterum concipiendam. Quali tamen discrimine ipse a Maecenatis dignitate absit, votorum diversitate modeste et

Aedemque votivam memento:
Nos humilem feriemus agnam.

CARMEN XVIII.

Non ebur neque aureum
Mea renidet in domo lacunar,
Non trabes Hymettiae
Premunt columnas ultima recisas
5 Africa, neque Attali
Ignotus heres regiam occupavi,
Nec Laconicas mihi
Trahunt honestae purpuras clientae.

praeclare indicavit. Deinde cum voti etiam reus sit Maecenas, recte concludamus hand ita multo post restitutam valetudinem carmen scriptum esse.

Carmen XVIII.

In initio huius carminis eam invenimus sententiam, quae decimum sextum huius libri clausit. „Ego, inquit poeta, magnas quibus inhiare solent homines opes neque habeo neque peto, et tamen ob ingenii facultates animique pietatem magnorum et divitum hominum mihi conciliavi amicitiam; quos ut maiora mihi darent, si vellem, facile possem permovere. Sed nihil cupio, et si quaeris cur nihil cupiam: quia video non perpetuam esse hanc vitam (v. 15 sq.). Nam profecto stultissimi ii sunt, quos usque ad extremam vitae horam magna molientes videmus, suamque ut expleant cupiditatem crudeliter saevientes in egenos homines, suo arbitrio expositos (v. 28). Quia stultitia quae maior potest esse hominibus aequa lege mortis necessitati subiectis? Nam quis est sive prudentissimus (v. 35) sive ditissimus (v. 37), qui morti se possit subtrahere? Omnes moriemur; sed veniet mors avaris terrori, solatio pauperibus (v. 38—40).“ Fundamentum quo quasi nititur carmen sententia illa est frequens apud Horatium de certamine quod est inter magnitudinem consi-

liorum et vitae brevitate hominum. — Iam habuisse tum Horatium Sabina villam ex versu 14 certum est; incertum num eodem tempore hoc scriptum sit, quo libri III carmen 24, ante.

V. 1. *ebur*] De eburneis et aureis lacunaribus vide ad Carm. II, 16, 11. — *trabes Hymettiae*] sunt trabes i. e. epistylia ex marmore Hymettio facta. Hymettium ex candidis marmoribus praeter Pentelicum, Parium, Lunense (Italicum, *Cararischer*) pretiosissimum; varii coloris nobilissima erant Numidicum (quod Horatius verbis *col. ultima recisas Africa* significavit) flavum, hodie *giallo antico* nominatum (Epist. I, 10, 19), Phrygium, rubris maculis et venis mixtum, etiam appellatum Synnadicum et Mygdonicum, Laconicum vel Taenarium, viride; Carystium, viridibus maculis et venis mixtum. — *Attali*] vide ad Carm. I, 1, 12. Nihil dicit amplius poeta, nisi hoc: se non, quod multis aliis contigit, nescio qua arte vel casu magnas opes hereditate accepisse. — *Laconicas*] Purpurarum pretiosissima genera Tyria et Laconica. cf. Epist. I, 10, 26, supra p. 133. — *trahunt*] i. e. mihi clientium uxores lanam neque carpunt neque nent, cum non habeam clientes. Trahere autem in hac arte proprium verbum. — *honestae*] nobiles; quo epitheto patroni auctoritas augetur.

At fides et ingeni

10 Benigna vena est, pauperemque dives

Me petit: nihil supra

Deos lacezzo nec potentem amicum

Largiora flagito

Satis beatus unicis Sabinis.

15 Truditur dies die,

Novaeque pergunt interire lunae.

Tu secunda marmora

Locas sub ipsum funus et sepulcri

Immemor struis domos

20 Marisque Baiis obstrepentis urges

Summovere littora

Parum locuples continente ripa.

Quid, quod usque proximos

Revellis agri terminos et ultra

25 Limites clientium

Salis avarus? Pellitur paternos

In sinu ferens deos

Et uxor et vir sordidosque natos.

V. 9. *fides et ingeni vena*] Eadem poeta Carm. I, 17, 13 aliis verbis coniunxit. cf. A. P. 409. — *lacezzo*] Conciuntitatis causa huic etiam verbo duos accusativos addidit ad exemplum verbi *flagitandi*. — *potentem amicum*] Macenatem; sic suadet Sabini statim commemoratio. — *Sabinis*] praediis. — *Locas*] redemptoribus et operis ad exstruenda magnifica aedificia. — *sub ipsum funus*] i. e. paulo ante funus. cf. Carm. I, 9, 19. — *Baiis*] Baiae balneorum celebritate nobilissimae et coeli temperie amoenissimae, Epist. I, 1, 83; inde plurimae et pulcherrimae villae totum sinum Baianum cinxerunt, cum non aegroti solum sed omnes qui delicatam vitam quaererent huc solebant convenire. — *parum locuples cont. ripa*] Eo luxuriae pervenerant Romani, ut in terra navigare, in mari habitare vellent; de qua re conferas Carm. III, 1, 33. III, 24, 3. Stat. Silv. II, 2, 54 sqq.:

Mons erat hic, ubi plana vides; haec lustra fuerunt,
Quae nunc tecta subis; ubi nunc nemora ardua cernis,
Hic nec terra fuit; domuit possessor cet.

Quid, quod] Frequenti hac elocutione apud oratores maior aliqua res et gravior ad commovendos animos legentium addi solet. Quare h. l. poeta „non, inquit, mare solum et aquam loco moves, sed homines etiam inopes parva sede pellis;“ qua impudenti rapacitate quid est turpius? — *clientium*] Quod ne fieret cautum erat in XII tabulis, in quibus haec erant: „*patronus si clienti fraudem fecerit, sacer esto*;“ et in lege Numae „*qui terminom exarasit, ipse et boveis sacrei sunt*.“ Sed lege Sal. Iugurth. c. 41. — *Salis*] Habet h. v. significationem superbiae et arrogantiae.

V. 27. *deos sordidosque natos*] Nam nihil reliqui est praeter hos; deos pe-

- Nulla certior tamen
 30 Rapacis Orci fine destinata
 Aula divitem manet
 Herum. Quid ultra tendis? Aequa tellus
 Pauperi recluditur
 Regumque pueris, nec satellites Orci
 35 Callidum Promethea
 Revexit auro captus. Hic superbum
 Tantalum atque Tantali
 Genus coërcet, hic levare functum
 Pauperem laboribus
 40 Vocatus atque non vocatus audit.

CARMEN XIX.

Bacchum in remotis carmina rupibus
 Vidi docentem, credite posterì,

nates et lares relinquere pietas vetuit, natos natura. — *sordidos*] misere tectos vel vestitos. Martial. I, 49, 28: „focum infante cinctum sordido.“ — *Nulla certior cet.*] Ordo verborum hic est: Nulla tamen aula certior divitem herum manet fine destinata rapacis Orci.“ In quo loco *finis dest. rap. Orci* dictum est pro *fine quam rapax Orcus destinavit*; quod quidem ut bene diceretur effectit Orci nomen, qui et finem facit et ipse finis est. De feminino genere v. *finis* cf. Epod. 17, 36. Virg. Aen. II, 554 „Haec finis Priami fatorum.“ Alii ablativum *destinata* iungunt cum supplenda voce *aula*, non cum *fine*, ut sit: nulla aula certior manet herum aula destinata i. e. quam aula destinata fine Orci; quae constructio nimis artificiosa videtur. *Aula* autem est *domus Plutonia*. cf. Carm. I, 4, 17. — *aequa tellus*] cf. Carm. I, 4, 13. Epist. II, 2, 178. — *satellites Orci*] Charon. — *hic*] Orcus, non Charon. — *levare*] Infinitivum coniunge cum *vocatus* pro *ut leveat*; sed ille modus quo brevior eo est nervosior. — *audit*] Mira brevitate hoc quoque dictum; nam audire non vocatus non potest. Sed cum mors vo-

cata veniat et non vocata, ac semper miseriarum quies sit, zeugma hoc ausus est Horatius.

Carmen XIX.

Ex dithyramborum genere est hoc carmen, simile Carm. III, 25. Fingit autem poeta, cum forte in abditis silvis carmina meditans vagaretur, in Bacchum se eiusque turbam Nympharum et Satyrorum incidisse. Tum et horror et laetitia simul animum occupant; sentit homo ingentem vim numinis, quo pectus subito impletur. Divino furore percitus non potest facere quin sacros sensus animi profundat, quin dei, cuius numine plenus est, laudes alta voce canat. Quo furore divino factum est, ut quam apud Horatium ubique conspicuam habeamus certam carminis oeconomiam non reperiamus aliam, nisi quod a minore miraculo ad maiora adscendat totiusque rerum naturae victorem ac dominum Bacchum celebret, terram, homines, mare, gigantes, inferorum monstra huic uni parere clamet. De elocutione haec Ianius: „In tam excelsis sensibus elocutionis etiam qua illi

Nymphasque discentes et aures
Capripedum Satyrorum acutas.

5 Evoe recenti mens trepidat metu,
Plenoque Bacchi pectore turbidum
Laetatur. Evoe parce Liber,
Parce gravi metuende thyrsos.

Fas pervicaces est mihi Thyiadas
10 Vinique fontem lactis et uberes
Cantare rivos atque truncis
Lapsa cavis iterare mella;
Fas et beatæ coniugis additum
Stellis honorem tectaue Penthei

efferuntur summa et aptissima dignitas est. Est enim talis, quæ deceat furorem entusiasmi, ab uno sensu ad alterum, ut flamma per taedas, continuo ardore properantem, nulli diu immorantem.“ — Quo tempore scriptum sit carmen nihil est unde efficiatur.

V. 1. *Bacchum*] Is deus auctor est poesis furore plenæ (Epist. II, 2, 77 sq.); quare mysticos hymnos docere dicitur comites. — *in remotis rupibus*] Nam fugit urbes et vulgarium hominum coetus; inde græce *ὄρειος* appellatur. — *Nymphae et Satyri*] comites Bacchi, iique aptissimi. cf. Soph. Antig. 1128 sq. — *acutas*] Satyri pedibus erant caprinis et auribus acutis. Inde intelligitur acutas non esse arrectas aures; potius attentio animi et auscultatio inest in aurium præcipua commemoratione. — *Evœ*] *εὐοῖ*, bacchantium exclamatio, qua illico a deo correptum se indicat; deinde metu i. e. horrore impletur propter terribilem, lætitia propter benignam numinis maiestatem. — *recenti*] etiam tunc, cum ex silvis redux quæ viderit narrat. Immortalium præsentia mortalibus semper horribilis, cf. Virg. Aen. IV, 279. Hom. II. XX, 131. — *turbidum laetatur*] vide ad Carm. II, 12, 14. — *parce*] *Ἀναδίπλωσις* est enixe precantis; et precatur quidem, ne nimio furore, quem mortale pectus capere non possit, in insaniam bacchantium

agatur. — *thyrsos*] thyrsus hasta pampinis et hedera cincta.

V. 9. *Fas*] Quo nomine eum vulgo significetur quod iustum, pium, licitum est, hic indicatur poetam in se nunc necessitatem et facultatem sentire deum et sacra rite canendi. Sic apud Virgilium Aen. VII, 692. — *pervicaces*] cf. Carm. III, 3, 70. Bacchæ non desistunt ab exsultando et furendo; quæ furendi notio in Thyiadum nomine latet. Factum est enim illud a græco verbo *θύειν*, furere. — *Vinique fontem*] Ubicunque terra thyrsos pulsabatur a Baccho vel a bacchantibus mulieribus, vinum, lac, mella fluebant. Eurip. Bacch. 704; „*Θύρσων δέ τις λαβοῦσ' ἔπαισεν ἐς πέτρων, Ὅθεν δροσώδης ὕδατος ἐκπηδᾷ νότις. Ἄλλη δὲ νάρθηκ' ἐς πέδον καθήκε γῆς, Καὶ τῇδε κοήνην ἔξανηκ' οἶνον θεός. Ὅσαις δὲ λευκοῦ πάματος πόθος παρῆν, Ἀχροῖσι δακτύλοισι διαμῶσαι χθόνα Γάλακτος ἑσμονὸς εἶχον. ἐν δὲ κισσίων Θύρσων γλνκείαι μέλιτος ἔσταζον ῥοαί.*“ cf. Plat. Ion. p. 534 A. — *lactis et*] Et part. postposita. cf. ad Carm. I, 2, 9. Ceterum tria illa summae abundantiae et ubertatis terræ signa sunt. — *iterare*] nihil est nisi referre, narrare. Sic Plaut. Cas. V, 2, 5: „Operam date, dum mea facta iterō; est operæ auribus percipere.“

V. 13. *beatæ coniugis*] Ariadnae, Minois filiae, in coelum relatae. —

- 15 Disiecta non leni ruina
 Thracis et exitium Lycurgi.
 Tu flectis amnes, tu mare barbarum,
 Tu separatis uvidus in iugis
 Nodo coërces viperino
- 20 Bistonidum sine fraude crines.
 Tu, cum parentis regna per arduum
 Cohors Gigantum scanderet impia,
 Rhoetum retorsisti leonis
 Unguibus horribilique mala;
- 25 Quamquam choreis aptior et iocis
 Ludoque dictus non sat idoneus
 Pugnae ferebaris; sed idem
 Paris eras mediusque belli.

honorem] ornamentum, coronam inter stellas positam. Fuit autem corona aurea, opus Vulcani, a Baccho Ariadnae data. Ovid. Met. VIII, 176 sqq. Ovid. Her. 6, 115: „Bacchi coniux redimita corona Praeradiat stellis signa minora suis.“ — *Pentheï*] Ovid. Met. III, 512 sqq. 690. — *Lycurgi*] Hom. Il. VI, 130 sqq. Ab Homero diversa apud alios est fabula. Nam cum omnes per totum regnum vites excidi iussisset, a deo in furem coniectus filium Dryantem interfecisse sibique false crura amputavisse traditur. — *flectis amnes*] Hydaspem et Orontem fluvios thyrsu retro vertisse et sicco pede transisse Bacchus dicebatur. — *Mare barbarum*] Indicum est; ad quod ut *flectendi* verbum posset referri, debuit generalem *domandi* et *regendi* notionem accipere. — *uvidus*] Sic *vino madidus* et *madere* dicebant Romani. — *nodo coërcere*] cf. Carm. III, 14, 22; Ovid. Met. I, 477 „Vitta coërcerat positos sine lege capillos.“ — *Bistonidum*] Thraciarum mulierum; nam inter Thraciae gentes Bistones quoque nominantur; Thracia autem orgiorum et mysteriorum prima sedes. — *sine fraude*] impune. cf. Carm. Saec. 41. Qui serpentes tractat, eorum innocentiae fidem habet; quodsi morsu laeditur, fraudem sentit. Ceterum constat Bacchas tortis serpentibus ipsas sese cinxisse.

V. 21. *Gigantum*] Cum in campis Phlegraeis dii cum gigantibus ancipiti proelio diu certassent, ferunt Terram Iovi dixisse, gigantes non posse vinci, nisi a diis duo semidei certaminis socii essent arcessiti. Quare Baccho et Hercule in auxilium deorum vocatis gigantes victi sunt. De Hercule vide Carm. II, 12, 6. Bacchus in leonis formam mutatus fortiter pugnasse dicitur. cf. Carm. III, 4, 53. — *per arduum*] de ima terrae sede arduum coelum ascendere gigantes conabantur. — *Rhoetum*] unum ex gigantibus. — *horribilique*] vide ad Carm. I, 2, 1. — *choreis*] Cum tua natura mitior esset tuque aptior habereris iocis et choreis quam bello, illo tamen certamine utrique rei, et paci et bello, aequè aptum te praebuisti. — *mediusque*] De transposita quam dicunt particula *que* vide ad Carm. II, 7, 25. *Medius* autem *pacis et belli* appellatur deus sua natura neutri parti deditus, sed, ut tempus fert, modo bellicosus modo pacis amans. cf. Epist. I, 18, 9. Ceterum fuerunt, quibus tota haec strophæ aut ab Horatio abindicanda aut acriter reprehendenda videretur; aliis, ut fit, pulchra ac venusta visa est.

V. 29. Etiam inferos et inferorum monstra sibi subiecisse dicitur Bacchus, cum Semelen reducturus Orcum intrasset. — *aureo cornu*] Cornu anti-

Te vidit insons Cerberus aureo
 30 Cornu decorum leniter atterens
 Caudam et recedentis trilingui
 Ore pedes tetigitque crura.

CARMEN XX.

Non usitata nec tenui ferar
 Penna biformis per liquidum aethera
 Vates neque in terris morabor
 Longius invidiaque maior

quissimum roboris symbolum. Athen. II, 7: „Καὶ τὰν ὄν παρεικάζουσι τὸν Διόνυσον καὶ παρδάλει διὰ τὸ πρὸς βίαν τρέπεσθαι τοὺς ἐξοινωθέντας.“ Et conferas Carm. III, 21, 18. Hinc Bacchus Graecis est *χορσοκέρας*, *τανροκέρας*, *Ταῦρος*. Tibull. II, 1, 3 „Bacche, veni, dulcisque tuis e cornibus uva Pendeat.“ Propert. III (IV), 17, 19 „Quod superest vitae per te et tua cornua, vivam, Virtutisque tuae, Bacche, poeta ferar.“ — *leniter att. caud.*] leni caudae motu adulans. — *trilingui*] Audacter hoc dictum *ore trilingui*, cum tamen antiquis Cerberus aut *triceps* esset aut *centiceps*. cf. II, 13, 34. III, 11, 20. Fuerunt, qui in uno ore hic tres linguas reperirent; praestat tamen consistere in tricpite Cerbero, ut tria ora et tres linguas simul indicata habeamus. — *tetigitque*] vide supra ad v. 28.

Carmen XX.

Poetas non mori sed in cygnos mutatos ad coelum evolare vulgatum iam per Graecos fuit commentum. Atque eo in hoc carmine de se Horatius usus laudem suam poeticam perpetuam fore in omniumque gentium notitiam perventuram vaticinatur. Quae quidem vaticinatio quam eum non fefellit! Similis argumenti est carmen III, 30. In hoc tamen ut in carmine I, 1 ea maxime re gloriatur suumque ingenium ideo praedicare non dubitat, quod

Maecenati, vero artis iudici et fautori, quae fecerit carmina grata et accepta viderit. — In carmine nihil inest unde annum quo potissimum scriptum sit efficias. Oratio autem et sententiae per totum carmen poetica quadam audacia plenae singularem animi poetae altitudinem produnt; haud longe recedunt a superioris carminis elatiore genere. Non recte aliis in hoc carmine urbana quaedam iocatio et sermonis festivitas inesse visa est, nam „carmine iocoso hunc librum concludere non poterat, nisi si ineptus iure videri voluisset, neque vero metrum Alcaicum eiusmodi ioco satis convenit.“ Orellius. loci nihil video, sed iuvenilem quandam superlationem ac paene iactationem video, multum diversam a Carm. III, 30. — Caput carminis cernitur in summa poeticae artis laude ac praestantia, nam „coelo Musa beat“ (Carm. IV, 8, 28).

V. 2. *biformis*] simul cygnus et poeta. cf. Eurip. fragm. „Χορσσαι δὴ μοι πτέρυγες περὶ νῶτον Καὶ τὰ Σευρήνων ἑρπύοντα πέλδρα Ἀρμόζεται· βάσομαι ἔς αἰθέρα πολλὴν Ἀερόθεις, Ζηνὶ προσμύξων.“ — *liquidum*] non crassum ac densum, sed tenuem et clarum. poetae novae naturae magis accommodatum, quam terra. — *invidiaque maior*] cf. Carm. IV, 3, 16. Haec igitur et quae deinde sequuntur *paup. sang. parent.* ad invidiam spectant, quam amicitia Maecenatis poetae contraxit. cf. Sat. I, 6, 46. II, 6, 47 sqq. — *Non ego*] vi ἀναδιπλώ-

- 5 Urbes relinquam. Non ego pauperum
 Sanguis parentum, non ego, quem vocas,
 Dilecte Maecenas, obibo
 Nec Stygia cohibebor unda.
 Iam iam residunt cruribus asperae
 10 Pelles et album mutor in alitem
 Superne nascunturque leves
 Per digitos humerosque plumae.
 Iam Daedaleo ocior Icaro
 Visam gementis littora Bospori
 15 Syrtesque Gaetulas canorus
 Ales Hyperboreosque campos.
 Ne Colchus et qui dissimulat metum
 Marsae cohortis Dacus et ultimi

σεως clarius indicatur, quam sit vera sententia, se qui a Maecenate ametur non posse mori. — *quem vocas*] ad te, ut tecum sim, tecum habitem, tua amicitia fruar. cf. Carm. II, 18, 10. Inepta est aliorum coniunctio *quem vocas dilecte* (den Du Freund nennst), quamquam grammatica ratio non obstat, cf. Sat. II, 6, 20. Epist. I, 7, 37. I, 16, 59; sed versus obstat, et qui statim accedit alter vocativus, a quo voc. *dilecte* nisi violenter non poterit separari.

V. 9. *Iam iam*] Furore poetico eo fertur, ut iam nunc ipsum in cyenum mutationem sentire sibi videatur; inde haec a nostro pulchri sensu remotior singularum partium descriptio; quae in epica poesi Ovidii haud infrequens lyricum poetam minus decet. Instans tempus duplici particula *iam* exprimitur, ne minima quidem interponitur mora, cf. Epod. II, 68. — *residunt*] „Pellis aspera fit, residit; dum enim erura humana extenuantur, cyeni formam exilem induunt, necesse est ut cutis, quae mollibus ante ac succulentis partibus inducta fuerat, his evanescentibus *subsadat*, ossibus propius admoveatur, quaeque antea pleniore corpore extensa erat, nunc contrahatur, adeoque *aspera* i. e. rugosa evadat.“ Sic Mitscherlich. — *superne*] ultima syllaba correpta ad aliorum poetarum

exemplum. Quare Muretum, qui cum codd. aliquot scribere voluit *superna*, non est cur sequaris. — *leves*] non asperae. Saepissime ita vocabula disposuit Horatius in hoc metrorum genere, ut tertii versus extremum vocabulum quarti ultimum spectaret. Exempla omnibus locis frequentia. cf. infra v. 23. 24. II, 7, 27. 28. II, 14, 19. 20. III, 3, 59. 60. III, 4, 7, 8; ibid. 67. 68; 79. 80. III, 5, 39. 40. cet.

V. 13. *Daedaleo ocior Icaro*] Hiatus excusationem facile invenit in caesura. cf. Epod. 5, 100. Virg. Buc. 2, 24. Met. XI, 17. Non necessaria Bentleii coniectura *tutior*, quae alienam ab hoc loco notionem periculi adderet, cum nihil spectetur nisi celeritas faemae. Et Lachmannus ad Lucret. p. 161 certum esse affirmat, cum in fine vocabuli sit longa vocalis ante longam vocalem sive diphthongum, quibus in proxima dictione vocalis subiiciatur, syllabas vocabulorum contiguas nunquam commisceri. De graeca forma *Daedaleus* (*Δαίδαλειος*) vide ad Carm. II, 6, 5. — *gementis*] cf. Carm. II, 14, 14. Virg. Aen. V, 806. Iam notandum est, ut in hac strophā remotas et barbaras regiones, sic in insequenti nationes nominari ex diversis et contrariis coeli tractibus collectas. — *canorus ales*] cyenus canorus,

Noscent Geloni, me peritus
20 Discet Hiber Rhodanique potor.

Absint inani funere neniae

Luctusque turpes et querimoniae;

Compesce clamorem ac sepulcri

Mitte supervacuos honores.

olor mutus. cf. Carm. IV, 2, 25. IV, 3, 20. — *Marsae cohortis*] Marsi fortitudinis fama celebrati. — *peritus Hiber*] Adiectivum *πρόληπτικῶς* positum: „Hispanae quoque gentes aliquando carminibus meis delectabuntur.“ — *Rhodanique potor*] poetice pro Rhodani accola, Gallus. Sic *fluvium bibere* est ad fluvium habitare: Hom. II. II, 825. Hor. Carm. III, 10, 1. IV, 15, 21. — *inani funere*] quippe deest corpus sepeliendum. — *neniae*] vide ad Carm. II, 1, 31. — *luctus turpes*] imprimis *praeficarum*, quae sunt mulieres ad lamentandum mortuum conductae. Hae caneant neniam. cf. Art. poet. 431. — *supervacuos honores*] Solebant Romani mortuos, praesertim nobiles et in aliqua re claros, magna pompa efferre; utebantur omnes qui prosequerentur funus atra veste; habebatur in foro posito lecto laudatio funebri a propin-

quo aliquo, qui mortui publica et privata merita rite celebraret; aderant mimi, qui non solum tragicorum poetarum locos ad mortuum adhiberent et recitarent, sed — id quod vere mirandum — nugas etiam facerent, inter quos archimimus personam defuncti agebat; praeibant imagines maiorum i. e. homines qui personis et idoneis vestimentis maiorum figuras et corpora quantum fieri potuit reddebant (Epod. 8, 11); funus ipsum imponebatur lecto funebri saepe eburneo et aureis vestibus strato; portabatur lectus a proximis vel servis testamento manumissis; funus sequebantur heredes et proximi cum servis testamento manumissis et pileatis. — *supervacuos*] „Inter scriptores qui nobis supersunt hac forma primus usus est Horatius, Cicero semper praefert *supervacaneus*.“ Orellius.

Q. HORATH FLACCI
C A R M I N U M
LIBER TERTIUS.

CARMEN I.

Odi profanum vulgus et arceo;
Favete linguis: carmina non prius

Carmen I.

Prima strophæ huius carminis seriem quandam sex carminum aperit, quibus poeta quid de iis rebus, quæ suæ ætatis civibus divitiis, molliæ, luxuria, bellorum civilium depravatione corruptis maxime videantur conducere, sentiat, sublimi ratione præcipit. Quibus rebus cum nihil possit esse gravius, sacerdotem se esse dicit Musarum, qui sacra præcepta canat remotisque omnibus profanis vilisque mentis hominibus sacrum sibi colligat conventum, quem apertis auribus et animis bonas doctrinas accepturum speret. Consensum autem et audientiam apud inventutem præcipue invenire sibi videtur; inventus enim et potest corrigi et debet, siquidem ex tanta morum corruptione omniumque rerum depravatione salus potest exspectari. Prima illa strophæ ob insolitam sublimitatem magnamque quam excitat de canendis carminibus spem non potest esse unius carminis, neque unum se daturum promittit poeta carmen, sed plura *carmina* non prius audita. Hoc autem primo carmine seriem illam doctri-

narum inchoat proposita de restituenda in animis hominum continentia necessitas. In hac terra, inquit Horatius, omnia certis finibus continentur; homines quidem id student efficere, ut alter alterum aut divitiis aut gloria aut fama aut auctoritate superet; attamen ex utraque parte immutatis quasi quibusdam terminis circumscripti sunt: hinc eos coercet totius mundi dominus ac gubernator Iuppiter optimus maximus, illinc communis omnibus mortalibus moriendi sors omnes colligit. Iam vide, quam egregie hos quibus continentur hominum studia terminos in versibus etiam ad utramque partem poeta collocaverit (cf. v. 6 sq. et v. 14—16). Deinde transgreditur ad ea quæ inde efficiuntur. Manifestum est enim, ne summis quidem divitiis veram procreari felicitatem, quæ non potest reperiri nisi in animi continentia in eiusque comitibus, perpetua et immota tranquillitate et æquitate; cupiditate et aviditate nihil gigni nisi continuum timorem ac metum. Felix igitur is solus est, qui quantum hæc sint vera sibi persuasit ideoque iis rebus quæ benevolentia deorum ac-

Audita Musarum sacerdos

Virginibus puerisque canto.

5 Regum timendorum in proprios greges,

Reges in ipsos imperium est Iovis

Clari Giganteo triumpho,

Cuncta supercilio moventis.

Est ut viro vir latius ordinet

10 Arbusta sulcis, hic generosior

Descendat in campum petitor,

Moribus hic meliorque fama

Contendat, illi turba clientium

Sit maior: aequa lege Necessitas

15 Sortitur insignes et imos;

Omne capax movet urna nomen.

Destructus ensis cui super impia

cepit contentus non quaerit magnas opes earumque molestias. — Argumentum carminis clare propositum est in septima strophā; qua re novum etiam praebetur documentum sententiae, qua primam stropham cum sex carminibus coniungendam esse supra diximus. Resecta enim hac strophā undecim restant carminis, quarum quae argumentum habet media est. Quod ne casu factum credas, cogita quam saepe Horatius usus sit hoc componendorum carminum artificio.

V. 1. *profanum vulgus*] Profani sunt non initiati sacris; hic significantur omnes qui spreta vera sapientia vilibus artibus dediti sunt. — *favete linguis*] vel tacendo vel bona verba dicendo, ne quid in sacris habendis male fiat. Tibull. II, 2, 2 „quisquis ades, lingua, vir mulierque fave.“ cf. Virg. Aen. V, 71. VI, 258. — *virginibus puerisque*] Intellexerunt interpretes chorū, qui sacerdotem cingat laudesque deorum canat. Verum nihil hic est carminum a choro nescio quo canendorum; praestat igitur omnem hic videre iuventutem Romanam, quae ne in eandem perniciem, in quam patres decidissent, delaberetur quam maxime cavendum erat. — *greges*]

Reges enim sunt *ποιμένες λαῶν*. — *clari Giganteo triumpho*] Non est inane epitheton ornandi causa appositum; est potius in hoc loco commendatio aliqua principatus Augusti, qui eodem, quo Iuppiter in coelo regnat, iure victoriae devictis adversariis terrarum imperium tenet. Quod genus commendationis saepius reddit in his sex carminibus. — *supercilio*] cf. Hom. II, I, 528. — *est ut*] *ἔστιν ὅτι, ἔστιν ὅπως*; accidit ut, Epist. I, 12, 2. — *arbusta*] maxime vineta, etiamsi alia arboreta non excluduntur. Solebant autem vires seri in quincuncem, ut certo inter se ordine exciperent. Inde *ordinare*. — *generosior*] genere nobilior. — *campum*] Martium, ut Carm. I, 8, 3. I, 9, 18. Sat. I, 1, 91. II, 6, 49. Epist. I, 7, 59. I, 11, 4. A. P. 162. Quattuor hominum genera nominantur, primum qui magna habent latifundia, deinde qui excellunt generis nobilitate, tum qui homines novi suis meritis suaeque fama nituntur, denique qui multitudine clientium multum inter cives auctoritate valent. — *meliorque*] vide ad Carm. II, 7, 25. — *Necessitas*] cf. Carm. I, 35, 17. — *sortitur*] cf. Carm. II, 3, 26. — *destructus ensis*] Significatur nota illa apud Ciceronem Tusc.

Cervice pendet, non Siculae dapes
 Dulcem elaborabunt saporem,
 20 Non avium citharaeque cantus
 Somnum reducent. Somnus agrestium
 Lenis virorum non humiles domos
 Fastidit umbrosamque ripam
 Non Zephyris agitata Tempe.
 25 Desiderantem quod satis est neque
 Tumultuosum sollicitat mare,
 Nec saevus Arcturi cadentis
 Impetus aut orientis Haedi,
 Non verberatae grandine vineae
 30 Fundusque mendax arbore nunc aquas
 Culpante nunc torrentia agros
 Sidera nunc hiemes iniquas.
 Contracta pisces aequora sentiunt
 Iactis in altum molibus; huc frequens

V, 21 narratio de Dionysio et Damocle; inde etiam Siculae dapes, apud antiquos tam famosae ut in proverbium prope abirent. Plat. de Rep. 3. p. 404. D.: „Συρακοσίαν δὲ, ὃ φίλε, τράπεζαν καὶ Σινελικὴν ποικιλίαν ὄψων, ὥς ἔοικας, οὐκ ἀλνεῖς.“ — *avium*] Habebant enim Romani sua aviaria, Graeci ὄρνιθῶνας. Bene dicit *elaborabunt*; sic enim sentitur labor et opera, quam divites superando fastidio ciborum etiam delicatissimorum nequidquam impendunt. — *somnus*] Horatii consuetudo hunc esse ordinem docet: lenis somnus, agrestium virorum non fastidit humiles domos cet. Et enim somnus, quo recreari videmus agrestes homines, non fastidit parva eorum tuguria aut cespitem sub divo positum. Senec. de provid. 3: „(Maccenati) somnus per symphoniarum cantum ex longinquo lene resonantium quaeritur.“

V. 25. *desiderantem*] cf. Carm. III, 16, 42 sqq. Epist. I, 2, 46. I, 10, 44. — *Arcturi*] Indicantur tempestates Auctumni; tum enim occidebat Arcturus a. d. IV. Kal. Nov., oriebantur

Haedi prid. Non. Octobr. — *fundus*] Poetae agri quoque quasi vivunt; inde grata haec *προσωποποιία*, qua fundus sterilitatem excusaturus ne a mendaciis quidem abstinere nunc hinc nunc illinc causam repetens. Incerta fides agrorum indicatur particula *nunc* ter posita, nam omni prope tempore fundus habet quo excusetur. Epist. I, 7, 87. — *contracta*] cf. ad Carm. II, 15. II, 18, 20. Quidquid, inquit, isti conantur, quascunque etiam altissimas moles exstruunt, comitem habent perpetuam Curam; quam ne navibus quidem aut equorum celeritate possunt effugere, scilicet in animo ubique retentam. — *frequens*] Est adiectivum pro adverbio: *frequenter*; i. e. saepe venit redemptor demittitque caementa, ut contrahatur mare piscesque sentiant. Contrarium est *rarus* Carm. IV, 1, 34. cf. Sat. I, 6, 128. — *caementa*] dicta sunt a caedendo; lapides caesi, quibus opponuntur lapides quadrati. Intelliguntur structurae sub aqua faciendae. cf. Carm. III, 24, 3. — *redemptor*] ἐργολάβος, qui opus aliquod faciendum suo periculo certa quadam

- 35 Caementa demittit redemptor
 Cum famulis dominusque terrae
 Fastidiosus: sed Timor et Minae
 Scandunt eodem quo dominus neque
 Decedit aerata triremi et
- 40 Post equitem sedet atra Cura.
 Quodsi dolentem nec Phrygius lapis
 Nec purpurarum sidere clarior
 Delinit usus nec Falerna
 Vitis Achaemeniumque costum,
- 45 Cur invidendis postibus et novo
 Sublime ritu moliar atrium?
 Cur valle permutem Sabina
 Divitias operosiores?

mercede pacta conduxit. cfr. Epist. II, 2, 72. — *Timor*] Minae et Cura quasi personae sunt; id verba scandendi, decedendi, sedendi aperte ostendunt. — *aerata triremi*] Non necessario intelligenda est navis longa bellico usui destinata; sed quod aerata est triremis, id pertinaciam et fortitudinem Curae, qua divitis et iniusti hominis animus pungitur, vehementer auget. Complectitur Cura quodammodo Timorem et Minas; Timor enim ne quae iniuste et avaro correpta sunt bona subito aut abripiantur aut relinqui debeant, et Minae quibus improbi semper stimulantur internae Curae quasi parentes sunt. cf. Carm. II, 16, 21 sqq. — *atra Cura*] cf. Carm. III, 14, 13. IV, 11, 35. Atra dicitur propter tristes cogitationes et aerumnosas imagines quibus animos hominum sibi obnoxiorum implet. — *dolentem*] non corpore, sed animo. — *Phrygius lapis*] marmor Phrygium. Vide ad Carm. II, 18, 3. — *clarior*] adiectivum non cum genitivo coniunctum, sed cum nominativo, a quo ille pendet, ut III, 3, 61. Epod. 10, 12, 14. — *Achaemeniumque*] Bentleius mutandum putavit in *Achaemeniumve*, eumque multum novum aliquod deliciarum genus addi arbitrantur secuti sunt. Sed errarunt. Vina enim et unguenta in comissationibus semper erant coniuncta. Costum

fuit unguentum ex radicibus fruticis et Indici et Arabici et Syriaci; quod cum ex Arabia vel India per Parthos in Italiam transportaretur, Persicum sive ab antiquo Persarum rege, Achae-mene (Carm. II, 12, 21. Epod. 13, 8. Herod. VII, 11), Achaemenium appellatum est. Ceterum Plin. H. N. XIII, 1 „Persarum esse debet gentis unguentum. Primum, quod quidem inveniam, castris Darii regis expugnatis, in reliquo eius apparatu Alexander cepit serinium unguentorum. Postea voluptas eius a nostris quoque inter laudatissima atque etiam honestissima vitae bona admissa est.“ et ibid. c. 2 „regale unguentum appellatum, quoniam Parthorum regibus ita temperatur, constat myrobalano, *costo*, amomo cett... Quando id primum ad Romanos penetraverit, non facile dixerim. Certum est, Antiocho rege Asiae devictis, urbis a. 565 P. Licinium Cras-sum, L. Iulium Caesarem censores edixisse, ne quis venderet unguenta exotica; sic enim appellaverunt.“ — *invidendis*] cf. Carm. II, 10, 7. — *atrium*] Magna et splendida pars aedium, quae prope ad ianuam sita splendidis columnis parietibusque ornari solebat ad excipiendos clientes, qui ad salutandum patronum convenirent. Epist. I, 5, 31. — *permutem*] vide ad Carm. I, 17, 2.

CARMEN II.

Angustam amice pauperiem pati
 Robustus acri militia puer
 Condiscat et Parthos feroces
 Vexet eques metuendus hasta
 5 Vitamque sub divo et trepidis agat
 In rebus. Illum ex moenibus hosticis

Carmen II.

Quod ad superius carmen adnotatum est, arto quodam vinculo sex carmina coniuncta teneri, id ex hac quoque re incrementum veritatis capit, quod hoc alterum proprio quodam aditu non aperitur sed a primo statim versu doctrinas de recuperanda salute patriae producere pergit. Ex iis quae primo carmine proposita sunt de animi continentia facili progressionem efficitur, quae sit vera paupertas. Cui quidem restituendum esse honorem quo sit digna, nunc praecipitur; ea enim quasi quoddam remedium est luxuriae restituitque virtutes quae immoderato luxu perditae sunt. Paupertatis enim perpetuae comites sunt principales priscorum Romanorum facultates: fortitudo, quae civem horribilem reddit hostibus animoque auget ad mortem pro patria obeundam parato; civilis virtus, quae summa quaeque gignit virosque aeterno honore summaque veneratione dignos efficit; fides, quae maior non est auxiliatrix ad continendam et sustentandam inter homines societatem. Cui potissimum haec cecinerit Horatius, id hoc quoque carmine, v. 2. 15, aperte proditur.

V. 1. *angustam pauperiem*] Paupertas (cui altera forma *pauperies* versibus magis commoda substituta est) angusta est non quia molesta premit, sed quia ne homines in luxuriam excurrant prohibet. Significatur igitur hoc adiectivo vinculum, quo cum continentia paupertas coniungitur. Etenim qui animum suum ipse temperat, is pauper est; et qui pauper est, is non potest facere quin cupiditates animi reprimat, angustis finibus coercet. cf. Carm. III, 16, 39. — *amice*] liben-

ter, non aegre. Male ex codd. nonnulli vocativum sumpserunt *amici*; nempe amici ab his carminibus alienissimi sunt. Adhortatur hic poeta iuvenes, ut paupertatem non modo non contemnant sed etiam pro amica habeant. — *robustus*] pro participio hoc positum: robustus factus; quod ne durius esse putes, compara hos similes locos Epod. 1, 34. 16, 34. Liv. V, 2, 9 ubi ad verba *consules dictatoresve* eadem necessitate *facti* intelligendum est. — *Parthos*] invictos adeo et infestissimos nomini Romano. — *vitamque*] Particula *que* cum eas partes coniungat quae natura sua magis quam casu copulantur, h. l. eas partes militaris vitae adiungit, quibus iuvenes desiderata paupertate maxime assuescunt. Hae enim molestiae sunt quas habet militia, ut milites et sub divo omnibus commoditatibus carentes perdurare cogantur et in perpetuis periculis versentur. Unde videbis, particulam et v. 5 non posse cum Doeringio omitti. — *Illum*] h. e. talem iuvenem, qui ad hanc severam disciplinam sese formavit. Sapienter autem poeta gravitatem doctrinae mitigavit exempli et picturae vividissimis coloribus distinctae suavitate et gratia; quae ratio ut aptior est ad lyricum genus ita animos iuvenum spectaculum belli quasi spectantium tabula debuit allicere. Grata haec tabula ad exemplum Troiae a Graecis oppugnatae prope expressa est, cf. Hom. II. III, 154. XXII, 460 sqq.; efficax inspirantium mulierum descriptio ad incitandam aemulationem. — *hosticis*] hostilibus; poetica forma, ut civicus, genticius. — *suspiret*] Et in suspirandi verbo et in particula *heu* metuendi notio inest, unde insequens sen-

- Matrona bellantis tyranni
 Prospiciens et adulta virgo
 Suspiret, eheu, ne rudis agminum
 10 Sponsus lacesat regius asperum
 Tactu leonem, quem cruenta
 Per medias rapit ira caedes.
 Dulce et decorum est pro patria mori:
 Mors et fugacem persequitur virum
 15 Nec parcit imbellis iuventae
 Poplitibus timidoque tergo.
 Virtus repulsae nescia sordidae
 Intaminatis fulget honoribus
 Nec sumit aut ponit secures
 20 Arbitrio popularis aurae.
 Virtus recludens immeritis mori
 Coelum negata tentat iter via
 Coetusque vulgares et udam
 Spernit humum fugiente penna.
 25 Est et fideli tuta silentio

tentia ne particulae ope adhaeret. cf. Carm. I, 2, 5. — *agminum*] pugnandi inter acies. Agmina enim apud poetas talium rerum non anxios omnino exercitum saepe significant et aciem. cf. Carm. III, 8, 18. IV, 14, 29. Epod. 17, 9. Sat. II, 1, 14. Iniquum de verborum et rerum in hac imagine ordine iudicium est Klopstockii „über Sprache und Dichtkunst“ p. 259 sqq. 265. — *regius*] accipiendum de regis alicuius foederati filio, qui propter sponsam auxilio venit.

V. 13. *mori*] cf. Carm. IV, 9, 51 sq., et Tyrtaeus: „Τεθνάμεναι γὰρ καλὸν ἐπὶ προμάχοισι πεσόντα Ἄνδρ' ἀγαθὸν περὶ ἢ πατρίδι μαρναμένον.“ Cic. Phil. 14, 12: „O fortunata mors, quae naturae debita pro patria est potissimum reddita!“ — *timidoque tergo*] Male in bonis etiam codd. est *timidove*; non separandi sunt poplites a tergo sed coniungendi, ut ignavus miles in fuga totus conspicia-

tur. Vide etiam ad Carm. I, 2, 1. — *persequitur*] i. e. sequitur et consequitur, nam qui persequitur non desinit sequi. — *repulsae nescia*] quia qui virtute praestant neque honores petunt a populo neque aliam veram esse sciunt dignitatem nisi eam quam virtus ipsa tribuat. Qui sic sentiunt, iis honorem neque data munera augent neque negata minuunt. cf. Carm. II, 2, 17. IV, 9, 39 sqq. — *intaminatis*] Inane est corrigendi periculum eorum, qui in codd. scripserunt *incontaminatis*, ut versus 17 hypermeter esset. Illa enim forma, quae nunc hoc tantum loco Horatii reperitur, facta est ex obsoleto verbo *taminare* i. e. tangere. — *negata*] hominibus quales esse solent. — *udam humum*] nebulis et humido aëre tectam, contra quam cogitandus est perpetua serenitate nitens aether, quem ut dignum suo candore domicilium quaerit virtus. — *Est et*] Compara Simonidis hoc fra-

Mercēs: vetabo qui Cereris sacrum
 Vulgarit arcanæ sub isdem
 Sit trabibus fragilemve mecum
 Solvat phaselon; saepe Diespiter
 30 Neglectus incesto addidit integrum,
 Raro antecedentem scelestum
 Deseruit pede Poena claudō.

CARMEN III.

Iustum et tenacem propositi virum
 Non civium ardor prava iubentium,

gmentum "Ἔστι καὶ σιγᾶς ἀνύδνον
 γέρας (p. 398 Schneidew.), quod Augustum in ore habuisse narrat Plutarch. Apophth. Augusti 7 et Horatium voluisse exprimere credendum est; quamquam omnino in levissima saepe similitudine verborum imitationes investigare non magis iniquum est quam molestum. — *Cereris sacrum*] Fides in rebus sacris probata exemplo est, a quo facilis est conclusio et transitus ad praestandam in omnibus rebus incorruptam fidem. Sacra Cereris summa religione continebantur; quae qui vulgare auderet, linguae erat incontinentis ac nullius fidei. — *fragilemve*] Codd. praeter unum antiquissimum Bernensem omnes *fragilemque*; quod mutandum iam Bentleius bene vidit. Opponuntur enim inter se tectum et navis. Cfr. Callim. Cer. 117: „Ἀδάματες, μὴ τήνος εἶναι φίλος, ὃς σοὶ ἀπεχθής, εἴη, μὴδ' ὁμοτοίχος· ἐμοὶ κακογείτορες ἐχθροί.“ — *Diespiter*] vide ad Carm. I, 34, 5. — *incestum*] impium; sic *castus* i. q. pius C. S. 42. — *antecedentem*] ac propterea securum; nimirum poenam effugere posse sibi videtur. Poenam autem quasi deam esse, propter claudum pedem vix est quod dicam. Eurip. fragm. „ἡ Δίκη... σῖγα καὶ βραδέϊ ποδὶ Στείχονσα μάμφει τοὺς κακούς, ὅταν τύχη.“ Comparetur HomERICA descriptio Ἀτης II. XIX, 91 sqq. IX, 502 sqq.

Carmen III.

Ne huic quidem carmini proprius aditus paratur, sed subita quadam ratione, ut cum superioribus coniunctio appareat, quarta additur virtus constantiae. Ea enim, iustitiae comes, primum statim versibus quasi parens praedicatur invicti animi, qui ne summae quidem potestati — in qua significanda a minore hominum vi per naturalium rerum potestatem ad validissimam ipsius Iovis manum adscenditur — unquam cedit. Constantia virtus est qua qui omni tempore bene merere voluerunt de hominibus, magna sua facinora patrare, aeternam laudem sibi parare viamque ad coelum munire potuerunt. Quorum splendidum exemplum Romulus est, qui qua eminuit virtute invidiam et odium acerbissimi etiam adversarii superavit urbemque Romam condere ac firmare potuit. Iuno enim, non temere provocata sed nativa Romanorum adversaria, quae quidquid voluntate ac potestate potuit efficere in delendam urbem Troiam olim contulerat, quae cum suam maiestatem Minervaeque castitatem prae luxuria ac mollietate contemptam a Troianis vidisset totam sese stirpem eversum iuraverat, tamen Romuli insigni virtute commota quominus inter deos is recipiatur non amplius vult prohibere neque magis impedire, quominus

Non vultus instantis tyranni

Mente quatit solida neque Auster,

5 Dux inquieti turbidus Hadriae,

Nec fulminantis magna manus Iovis;

Si fractus illabatur orbis,

Impavidum ferient ruinae.

Troianorum posteri ex urbe sua Italiam, ex Italia totam terram subiiciant, dummodo ut imperii parens Romulus quo tendere debeant recte pernoscant neque perfidae Troiae et maiorum falsa vestigia sequantur. Inter Romam et Troiam mare saeviat necesse est, Troia ut renascatur nunquam potest concedi, h. e. cavendum est ne Roma exemplum Troiae sequatur, ne Roma altera quasi evadat Troia, ne Romani cives divitiarum blanditiis deleniti voluptatibusque capti divinam maiestatem et sapientiam spernant. Audacter poeta ipsam Iunonem ad deos de recipiendo in coelum Romulo dicentem fecit, sed non maiore audacia quam felicitate. Vides enim, quanta arte, praemissa generali quadam de constantia doctrina, quid inde commodi redundaverit et redundet in imperium Romanorum deam docentem induxerit; quam egregie ea deorum concio inventa sit, quo consilio Iunonis, non alius dei orationem retulerit. Nihil in hac oratione inest degressionis nescio cuius poeticae; latet ibi summa carminis, quam insolita quadam forma inclusam venuste poeta excusavit clausulae simul aptissimam rationem nactus. Admiranda etiam est admodum grata urbanitas, qua vv. 11. 12 Augustus magnorum virorum, quorum laboribus securitas et otium bonorum hominum ab insidiis et dolis malorum hominum et ferarum bestiarum vindicata olim esse traduntur, societati adscribitur cum Romuloque comparatur quasi alter parens imperii. cf. Epist. II, 1, 5 sqq. Si verum est quod dicunt, habuisse olim Iulium Caesarem sedis imperii Troiam transferendae consilium, fieri potuit ut inde poeta hanc carminis formam sumeret. Quid enim magis imperium perdere potuisset? Nec temeraria videbitur coniectura, in oratione Iunonis praevisse iam Ennium

in Annalibus, cuius quidem fragmenta non inepte sic coniunguntur: „Respondet Iuno Saturnia sancta dearum: — Romulus in coelo cum dis genitalibus aevum Degat.“ Summa igitur carminis cernitur in laude et gloria nominis Romani, in constantia tanquam in fundamento posita, per annorum seriem adaucta, ab Augusto ad summum fastigium elata.

V. 1. *tenacem*] Sic Caes. b. c. I, 83 „tenere uterque propositum videbatur.“ Et Ovid. Met. X, 405 „propositique tenax.“ Quid in simili re audere potuerit poeta, ostendit locus Epist. I, 13, 11. — *ardor*] de quavis cupiditate; nobilius certe vocabulum quam furor. Lucret. III, 252: „Sive voluptas est sive est contrarius ardor.“ — *iubentium*] Iubet populus, censet senatus. Notandus est additus accusativus obiecti. cf. Sat. II, 3, 141. II, 5, 70. Epist. II, 2, 63. Sall. Iug. 84, 1. — *instantis*] Qui ab altero nunquam recedit, sive ut ipse alteri iniuriam aliquam vel malum inferat, sive ut alterum ad ingratum aliquod opus perficiendum cogat, is instare alteri dicitur, ut Sat. I, 1, 115. Epist. I, 2, 71; absolute hic ponitur et Carm. II, 14, 3. — *mente quatit solida*] Haec quoque verborum coniunctio poetica et audacior est pro *mentem solidam alicuius quatere*. Ablativo autem poeta eam iusti et constantis hominis partem accuratius significat, qua ille illatam vim sentit. *Solida* mens opponitur quasi liquidae, fluctuanti menti eius, qui cum certam voluntatem non sequatur, omni externae potestati obnoxius est. — *dux*] cf. Carm. I, 3, 15. — *fulminantis*] Semel apud Horatium; poeticum vocabulum a seriis prosae orationis scriptoribus receptum. — *hac arte*] in prosa: hac via, hac ratione. cf. Sat. II, 5, 3; levis quaedam in hac voce significatio

Hac arte Pollux et vagus Hercules
 10 Enisus arces attigit igneas,
 Quos inter Augustus recumbens
 Purpureo bibit ore nectar.

Hac te merentem, Bacche pater, tuae
 Vexere tigres indocili iugum
 15 Collo trahentes; hac Quirinus
 Martis equis Acheronta fugit,

Gratum elocuta consiliantibus
 Iunone divis: Ilion, Ilion
 Fatalis incestusque iudex
 20 Et mulier peregrina vertit

inesse videtur Graecae ἀρετῆς. Est enim constantia, virtus. Suo more Horatius a generali sententia per mythica exempla ad suam rem leniter progreditur. In quibus exemplis memorabilis est quaedam poetae constantia; eadem enim reperies Carm. IV, 8, extr. et Epist. II, 1, 5. Neque magnus fuit numerus magnorum virorum, a quibus exempla peti potuerunt. — *enisus*] melius quam quod etiam est in codd. *innisus*; qui altiora petunt, enituntur. cf. Virg. Georg. II, 360. — *Quos inter*] Vocabulorum reversione praepositi nominis notionem et gravitatem auget, praepositioni quae coniungendis notionibus inserviens ipsa notione caret nimiam vim detrahit, orationem concinniorum gratioreque reddit, rhythum versuum adiuvat. cf. Epod. 2, 38. 7, 3. 12, 23. 16, 40. Sat. I, 1, 47. I, 3, 53. 60. 68. 100. Epist. II, 1, 43. — *recumbens*] cf. Epist. I, 5, 1. — *Purpureo ore*] vide ad Carm. IV, 1, 10. — *bibit*] Sic, ut videtur, plurimi codices; in aliis *bibet*. Dio C. 53, 16: „*Ἀργοναυτὸς ὡς καὶ πλεῖστον τι ἢ κατ' ἀνδράποπος ὧν ἐπεκλήθη*.“ Plin. H. N. VII, 45: „deus ille (Augustus) coelumque nescio adeptus magis an meritis.“ Veget. 2, 5: „Nam imperatori, cum Augusti nomen accepit, tanquam praesenti et corporali deo fidelis est praestanda devotio et impudendus pervigil famulatus.“ Cfr. Tacit. Ann. IV, 38; „Optimos quippe

mortalium altissima cupere. Sic Herculeum et Liberum apud Graecos, Quirinum apud nos deum numero additos; melius Augustum, qui speraverit.“ Et Augustus ipse ad Tiberium scripsit (Sueton. Aug. 71): „benignitas enim mea me ad coelestem gloriam efferet.“ Antiquis enim viventium hominum inter deos relatio indicium erat ingentis famae insolitaeque dignitatis. cf. Carm. III, 5, 2. IV, 5, 32. Epist. II, 1, 15. — *Bacche pater*] Epist. II, 1, 5. Pater appellatur, quia eius beneficio terrae insita est vitium procreandarum vis, hominesque ipsi vini cultura ad cultiorem vitam sensim perducebantur. Inde etiam tigres ab eo domabantur. Cic. de Fin. III, 20, 66: „hi, qui valent opibus atque id facere possunt, ut de Hercule et de Libero accepimus, ad servandum genus hominum natura incitantur.“ — *collo*] Singularis pro plurali apud poetas ponitur ad unitatis et concordiae notionem sustentandam. cf. Epod. 2, 64. — *Quirinus*] Lege Ovid. Met. XIV, 805 sqq. — *gratum*] accusativus obiecti est. vide ad Carm. II, 12, 14.

V. 18. *Ilion*] De genere nominis vide ad Carm. I, 10, 14. In conduplicatione (*ἀναδιπλωσι*) cohortandi et deterrendi vis inest. — *fatalis iudex*] De Paridis iudicio cf. Virg. Aen. I, 26. Hom. Il. XXIV, 28. Fatalis i. e. fato destinatus ad exitium Troiae ferendum, quia incestus est castaeque (v. 23)

- In pulverem, ex quo destituit deos
 Mercede pacta Laomedon, mihi
 Castaeque damnatum Minervae
 Cum populo et duce fraudulento.
- 23 Iam nec Lacaenae splendet adulterae
 Famosus hospes nec Priami domus
 Periura pugnaces Achivos
 Hectoreis opibus refringit,
 Nostrisque ductum seditionibus
- 30 Bellum resedit. Protinus et graves
 Iras et invisum nepotem,
 Troica quem peperit sacerdos,
 Marti redonabo; illum ego lucidas
 Inire sedes, discere nectaris
- 35 Sucus et adscribi quietis
 Ordinibus patiar deorum.
 Dum longus inter saeviat Ilion
 Romamque pontus, qualibet exsules
 In parte regnanto beati;

deae invisus. *Que* particula adduntur nonnunquam quae explicandi causa necessaria videntur. Sic infra v. 59. Carm. I, 7, 30. I, 36, 9. III, 5, 36. — *mulier peregrina*] Dea indignatione plena Helenam non nominat. cf. v. 32. — *vertit*] Paris absolvit perniciem Troiae iam destinatae, ex quo Laomedon deos fefellit. De fraude Laomedontis vide Hom. II. VII, 452 sq. XXI, 442 sqq. Apertum est, *fraudulentum ducem* v. 24 non esse innocentem Priamum, qui maiorum culpam luit, sed ipsum Laomedontem. — *mercede pacta*] est ablativus instrumenti. Similiter Liv. I, 51: „quod morando spem destituerit.“ — *adulterae*] genitivus est, non dativus. *Splendet* enim absolute positum est: floret, superbit. De re cf. Hom. II. III, 392. — *Hectoreis*] cf. Carm. I, 3, 36. Epist. I, 12, 20. Propert. III, 3, 44: „Teutonicas Roma refringat opes“, in quo loco idem est verbi *refringendi* poeticus usus, frangendo re-

primere. — *resedit*] Contrarium residere est surgendo. Ovid. Am. I, 1, 27: „Sex mihi surgat opus numeris, in quinque residat.“ — *redonabo*] h. v. non legitur nisi bis apud Horatium, sed diversa significatione: Carm. II, 7, 3 idem est quod reddere, hic impunitum aliquem mittere. Verum in hac quoque notione altera reddendi inclusa est, praesertim quia coniuncta est cum dativo *Marti*. Qui alicui aliquem eripuit, deinde incolumem reddit, is redonat. — *discere*] Sic multi codd.; vulgo *ducere*. Sed Martis filius qui admittitur ad convivium deorum, mortalis nectar nondum gustavit; satis est igitur *discere* eum sucos nectaris.

V. 37. *inter saeviat Ilion*] Nonnunquam poetae inter praepositionem eiusque casum verbum aliquod interponebant; hoc autem loco diaeresis seiuncta quae videntur vocabula tollit simul et coniungit. cf. III, 15, 5. 27, 51. Virg. Bucol. 6, 19. Aen. II, 278. — *exsules*] Romani. — *busto*] Priamus

- 40 Dum Priami Paridisque busto
 Insultet armentum et catulos ferae
 Celent inultae, stet Capitolium
 Fulgens triumphatisque possit
 Roma ferox dare iura Medis.
- 45 Horrenda late nomen in ultimas
 Extendat oras, qua medius liquor
 Secernit Europen ab Afro,
 Qua tumidus rigat arva Nilus.
 Aurum irrepertum et sic melius situm,
- 50 Cum terra celat, spernere fortior
 Quam cogere humanos in usus
 Omne sacrum rapiente dextra,
 Quicumque mundo terminus obstitit,
 Hunc tangat armis, visere gestiens,
- 55 Qua parte debacchentur ignes,
 Qua nebulae pluviique rores;
 Sed bellicosus fata Quiritibus
 Hac lege dico, ne nimium pii
 Rebusque fidentes avitae
- 60 Tecta velint reparare Troiae.
 Troiae renascens alite lugubri
 Fortuna tristi clade iterabitur,

caruit quidem busto, nam discerptus et dilaniatus in littore iacuit (Virg. Aen. II, 557); neque tamen vituperandus Horatius. Totus enim ager Troianus eius quoddam sepulcrum est. — *ferae*] cf. Epod. 16, 10. — *triumphatis*] Activa vis in hoc verbo non inest nisi apud poetas et qui eos imitabantur seriores scriptores. — *possit*] Locus in fine versus eximius tritissimo vocabulo suam vim restituit. — *horrenda late*] metrica vi haec coniunguntur. — *medius liquor*] medium mare, quod extremas occidenti soli subiectas regiones coniungit cum oriente. — *spernere fortior*] Adiectivum participii more positum (vide ad Carm. I, 6, 19) condicionem habet a Iunone po-

sitam, i. e. si maiorem ostendat fortitudinem in spernendo auro quam in cogendo. Quare verba *humanos in usus* non cum cogendi verbo sunt coniungenda sed cum *rapiente*; humani enim usus profani sunt et ponuntur contra sacrum. — *obstitit*] ἀορίστατος; qui a primis temporibus obstitit mundo i. e. ubi terrarum, et nunc quoque obstat, finem ponit. Quare datus *mundo* praestat genitivo *mundi* paucorum codicum. — *tangat*] rectius quam multorum codicum *tanget*: non vaticinatur Iuno, sed ut Romani eo perveniant concedit. Insequentibus verbis describuntur zona torrida et frigida. cf. Carm. I, 22, 17 sqq. — *rores*] apud poetas de quocunque liquore.

Ducente victrices catervas
Coniuge me Iovis et sorore.

65 Ter si resurgat murus aëneus
Auctore Phoebo, ter pereat meis
Excisus Argivis; ter uxor
Capta virum puerosque ploret.

Non hoc iocosae conveniet lyrae:

70 Quo, Musa, tendis? Desine pervicax
Referre sermones deorum et
Magna modis tenuare parvis.

CARMEN IV.

Descende coelo et dic age tibia
Regina longum Calliope melos,

V. 61. *renascens*] Si Troia renascitur, malis omnibus renascitur, quoniam Iunonis numen id fieri non patitur. cf. Carm. I, 15, 5. — *victrices*] quae semel iam vicerunt et iterum vincent. — *coniuge me*] Virg. Aen. I, 46. In utroque loco inde gloriam petit et superbiam, quod coniux simul est et soror Iovis; apud utrumque poetam vv. *coniux* et *soror* gravissima versuum loca occuparunt. cf. Hom. Il. IV, 59 sqq. XVI, 432. — *ter*] numerus poeticus, ut Virg. Georg. I, 281 sqq. IV, 384. Ovid. Met. X, 452. — *Argivis*] cf. Carm. I, 7, 8 sq. — *non hoc*] cf. Carm. II, 1, 37. Fluctuant codd. inter haec: *non hoc conveniet*, *non haec convenient*, *non haec conveniunt*. Futurum necessarium videtur; vetatur ne longius pergatur; unde haec *quo tendis?* Adhuc quae dicta sunt iustos fines non excesserunt. Singularis autem auctoritate optimorum codicum sustentatur. — *tenuare*] vocabulum poeticum; verba in syllabam *are* desinentia propter suavem et gravem sonum plerumque placuerunt poetis.

Carmen IV.

Discrepat hoc carmen a duobus superioribus eo, quod non caret introitu;

quo cum quintum et sextum destituta sint, tota haec series in duas aequales partes dividitur. Inter quas hoc maxime discriminis est, quod cum illa parte universae magis virtutes, quibus Romani nominis gloria innititur, ostenduntur et praedicantur, hac altera poeta docet, quid de necessitate principatus de Augustique praestantia sibi persuaserit. Cui rei brevi in tertio carmine Augusti commemoratione quasi via sternitur. Iam incipit poeta a sublimi invocatione Musae, cuius ope in tanta re quam maxime indigere se sentit. Quam sibi non defuturam bene scit; morem enim dii gerunt iis quibus favent. Quare ad ipsa sacra nemora, ad conventum Musarum admissus esse sibi videtur, et quemadmodum primo carmine Musarum se sacerdotem nominavit, hic cantum suum patriae amoris plenum commendat ut divina origine ortum. Musis enim tota poetae vita dedita fuit, quaecunque huic bona unquam evererunt illis debentur, pii igitur et sacri vatis carmina divinae voces sunt. Ut poetam sic omnes adjuvant Musae, a quibus coluntur; etiam Augustum, qui non militaribus solum virtutibus eminet sed deditus etiam est leni Musarum potestati, quibus quod imperium sapientia

Seu voce nunc mavis acuta

Seu fidibus citharaque Phoebi.

5 Auditis? an me ludit amabilis

Insania? Audire et videor pios

Errare per lucos, amoenae

Quos et aquae subeunt et aerae.

Me fabulosae Vulture in Apulo

10 Altricis extra limen Apuliae

Ludo fatigatumque somno

Fronde nova puerum palumbes

temperatum habet acceptum refert. Nulla enim vera potestas est sine sapientia; vis consilio non temperata in-visa diis est neque potest durare. Haec sententia uberius explicatur imagine pugnae, quam coelestis Iuppiter, in quo omnis sapientia est, cum Titanibus pugnavit, rudium et immoderatarum terrestri naturae virium exemplis. Quae cum ita sint, poeta perfecto hoc carmine pietatem celebrat erga deos cum eaque coniunctam sapientiam, iustam eam cuiusvis potestatis moderatricem. In qua re Horatius invocata Musa eo ferebatur, ut a suo exemplo ad Augusti maiorem auctoritatem, ab Augusto ad generalem et exemplorum simplicitate prope liberatam doctrinam sese tolleret; quae quidem ne philosophi magis quam poetae esse videretur, mythicis fabulis passim insertis prudenti consilio cautum est. Vix est quod moneamus, videri Horatium in describenda illa Iovis et Titanum pugna proxime attingere voluisse suam aetatem, qua factionum temeraria cupiditas omni utilitate, quae ex superiorum temporum fatali ratione potuisset capi, pertinaciter contempta cum principatu Augusti, divina prudentia Romanis imposito, impium certamen inire ausa est. De qua re cf. Ovid. Met. I, 200 sqq. Comparetur illud Schilleri: „Wo rohe Kräfte sinnlos walten, Da kann sich kein Gebild gestalten; Wo sich die Völker selbst befreien, Da kann die Wohlfahrt nicht gedeihn.“

V. 2. *longum*] maius, uberius, ad quod canendum longiore Musae praesentia opus est. Ad insequentes ver-

sus compara Carm. I, 1, 32—34, ubi eadem ratione diversa genera lyricae poesis tibia et lyra distinguuntur. — *Auditis*] Poeta ipse iam *ἔνθεος* est. Interrogat autem circumstantes, et eosdem quidem quos Carm. III, 1, 4 cogitaverat. — *amabilis insania*] Oxy-moron. Est furor poeticus, *ἐνθουσιασμός, μανία*. — *videor*] In prosa vulgo: *mihi videor*; ut Carm. II, 1, 21; sed sic etiam Cicero de amic. 12, 41. Divin. in Caecil. 14, 45. — *subeunt*] Latior huius verbi notio non magis auris apta est quam aquis; elegantius est enim quam intrare, nihil aliud. — *fabulosae*] Et strophae et rerum necessitate coniungenda sunt *fabulosae palumbes*, mirae, prodigiosae. Congruunt *me fabulosae* et *puerum palumbes*. — *in Apulo*] Vultur Apuliae mons erat supra Venusiam; parte tamen etiam in Lucaniam procurrebat. Deinde insolitum quidem, sed ferendum est, quod prima syllaba *Apuliae*, quam Horatius aliis locis produxit, v. 10 correpta est, cum v. 9. eadem littera producta sit. Nam praeterquam quod in nominibus propriis Latinis poetis magna admodum libertas fuit, apud unum Horatium triplex huius nominis metrum est: *Apulus* (—) Carm. I, 33, 7. III, 4, 9. 5, 9. 16, 26. IV, 14, 26. Epod. 2, 42. Sat. II, 1, 38; *Apulia* (—) Epod. 3, 16. Sat. I, 5, 77; *Apulia, Apulicus* (—) Carm. III, 4, 10. 24, 3. Ac ne nimis in ea re haereas, compara illud Homeri II, V, 31. 455: *Ἄρες, Ἄρες βοροτολογέ κτλ.* Et dubitatum est, num possit *Apulia*, quae terra est, *altrix* appellari; sed cf. Claudian. in Prob. et

- Texere, mirum quod foret omnibus,
 Quicunque celsae nidum Acherontiae
 15 Saltusque Bantinos et arvom
 Pingue tenent humilis Forenti,
 Ut tuto ab atris corpore viperis
 Dormirem et ursis, ut premerer sacra
 Lauroque collataque myrto,
 20 Non sine dis animosus infans.
 Vester, Camenae, vester in arduos
 Tollor Sabinos, seu mihi frigidum
 Praeneste seu Tibur supinum
 Seu liquidae placuere Baiiae.
 25 Vestris amicum fontibus et choris
 Non me Philippis versa acies retro,
 Devota non exstinxit arbos,
 Nec Sicala Palinurus unda.
 Utcunque mecum vos eritis, libens
 30 Insanientem navita Bosporum
 Tentabo et arentes arenas
 Littoris Assyrii viator.

Olybr. cons. 185 „ad loca *nutricis* iam non errantia *Deli*.“ — *fatigatumque*] Locum mutavit particula; vide ad Carm. II, 7, 25. Somnus autem somni cupiditas et desiderium est. — *puerum*] Similis est de Pindaro puero narratio, cui devio et somno oppresso apes mella in labra congessisse dicuntur. Poetarum vita tota Musis sacra est. — *nidum*] Cic. de orat. I, 44: „Ithacam illam in asperrimis saxulis tanquam nidulum affixam.“ Acherontia hodie *Acerenza*, Bantia *Banzi* s. *Vanzi*, Forentum *Forenza*. — *ut*] coniunge cum *mirum*. Epod. 16, 53. — *Lauroque*] In lauro et myrto vaticinatio quaedam inest de futura poesi Horatii Apollini et Veneri dicata. — *non sine dis*] Littotes fortior est quam simplex affirmatio; vide ad III, 26, 2. cf. Hom. II. V, 185.

V. 21. *Sabinos*] ubi erat Horatii villa. Deinde nominantur tria oppida a

Romanis vitandi caloris aestivi causa frequentata; inde epitheta etiam sumpta ab Horatio. Confer Epist. I, 2, 2. I, 15, 2. De Baiis vide ad Carm. II, 18, 20. Praeneste hodie est *Palustrina*. — *amicum*] cf. Carm. I, 26, 1. Sacer vates ubique et semper in Musarum tutela est, admittitur ad earum fontes et choros. De Philippensi clade vide Carm. II, 7, 13 sqq., de arbore nefasto die posita ideoque *devota* Carm. II, 13. II, 17, 27. — *Palinurus*] promontorium in ora Lucaniae prope Veliam situm, a Palinuro Aeneae gubernatore nominatum. Virg. Aen. VI, 338. — *utcunque*] vide ad Carm. II, 17, 11. — *insanientem*] Inanimata etiam natura poetarum excitationis animis vivere videtur; inde ei quoque quaedam quasi voluntas est et cupiditas. cf. Carm. III, 7, 6. De Bosporo vide ad Carm. II, 13, 14. Coniunxit autem Horatius his duabus

- Visam Britannos hospitibus feros
 Et laetum equino sanguine Concanum,
 35 Visam pharetratos Gelonos
 Et Scythicum inviolatus amnem.
 Vos Caesarem altum, militia simul
 Fessas cohortes abdidit oppidis,
 Finire quaerentem labores
 40 Pierio recreatis antro.
 Vos lene consilium et datis et dato
 Gaudetis, almae. Scimus ut impios
 Titanas immanemque turmam
 Fulmine sustulerit caduco,
 45 Qui terram inertem, qui mare temperat
 Ventosum et urbes regnaque tristia
 Divosque mortalesque turbas
 Imperio regit unus aequo.
 Magnum illa terrorem intulerat Iovi
 50 Fidens iuventus horrida brachiis

strophis omnes et maris et terrae terrores, omniaque apud barbaras et occidentis (Britanni, Concani i. e. Hispani) et orientis (Geloni, Scythae) nationes pericula. De Britannis Tacit. Ann. XIV, 30: „Cruore, inquit, captivo adolere aras et hominum fibris consulere deos fas habebant.“ — *arentes*] Sic ex bonis codd. scripsi propter gratam alliterationem; alii *urentes*; cf. Sil. Ital. VI, 140 „arentes arenas“, Ovid. Met. XV, 268: „humus aret arenis.“ — *equino sanguine*] Ut Concani sic Geloni lacte concreto aut farre sanguine equino mixto vescebantur. Virg. Georg. III, 461 sqq. — *Scythicum amnem*] Carm. IV, 15, 24. — *altum*] cf. Carm. I, 6, 11. Sat. II, 5, 62. Metro prohibemur, ne coniungamus *altum militia*. Caesaris animus altus est, quia maiorem etiam esse aliquam laudem quam bellicam intellexit. — *abdidit*] Sic maior pars antiquissimorum codicum, et dictum est de finiendis belli laboribus nec habet quidquam ignominiosi aut inhonesti, quod senserunt ii, qui ex aliis codd.

praetulerunt *addidit*, ut esset *addidit tanquam novos colonos*. Tertium quod legitur *reddidit* merum glossema est. — *consilium*] trisyllabum per *συνηγορήσειν*, ut Carm. III, 6, 6. Sat. I, 8, 43. II, 2, 21. II, 8, 1 coll. 75. Virg. Aen. II, 442. — *Scimus ut*] quare ratione; hoc enim differt *ut* part. ab infinitivo cum accusat., quod non tam dicitur scire aliquem factum esse aliquid, quam qua quid ratione factum sit a teste aliquo describitur. — *turmam*] C. S. 38. In compluribus codicibus *turbam*; confusa eadem vocabula sunt v. 47, ubi in nonnullis libris male *turmas*. — *caduco*] Prop. IV, 2, 53 „tela caduca.“ Magna vis est in hoc adiectivo; Titanes telis gravi manu Iovis fortiter demissis ad terram, unde coelum petere studebant, prostrati sunt. Iam vide num quid praestet Bentleyana coniectura *corusco*.

V. 45. *inertem*] Carm. I, 34, 9. Grato certamine inter se opponuntur immobilis terra et turbidum mare, deinde terra ab hominibus inculta (*urbes*) et inanis Orcus, tum beati quie-

Fratresque tendentes opaco
Pelion imposuisse Olympto.

Sed quid Typhoeus et validus Mimas,
Aut quid minaci Porphyrion statu,

55 Quid Rhoetus evulsisque truncis
Enceladus iaculator audax

Contra sonantem Palladis aegida
Possent ruentes? Hinc avidus stetit

Vulcanus, hinc matrona Iuno et
60 Nunquam humeris positurus arcum,

Qui rore puro Castaliae lavit
Crines solutos, qui Lyciae tenet

Dumeta natalemque silvam,
Delius et Patareus Apollo.

65 Vis consili expers mole ruit sua:
Vim temperatam di quoque provehunt

In maius; idem odere vires
Omne nefas animo moventes.

tique dii et discordes semper homines; iisdem autem partibus triplex imperium Iovis describitur. — *fidens brachiis*] Necessario haec coniunguntur ut apud Hom. II. XII, 135 „*χεῖρεςσι πεποιθότες*“; in brachiis enim corporum robur inest, quo contra Iovis mentem pugnare audebant. Potuerunt ii quidem aliquamdiu terrorem incutere (*horrida*), sed nihil efficere quod merneret. Sic cohaerent vv. 49—58. — *fratresque*] vide ad Carm. I, 3, 19. Intelligendi sunt fratres Aloidae, Otus et Ephialtes. cf. Virg. Georg. I, 280. Ovid. Met. I, 151 sqq. — *Typhoeus*] *Τυφωεύς*. Virg. Aen. IX, 713. Ovid. Met. V, 321 sq. III, 303. — *Mimas*] apud Hesiodum est Centaurus, apud Euripidem Gigas. — *Porphyrion*] *βασιλεύς Γυγάντων*. — *statu*] i. e. stabili gradu, ut apud Liv. XXX, 18 „statu movere hostem.“ — *Rhoetus*] cf. Carm. II, 19, 23. — *Enceladus*] cf. Virg. Aen. III, 578. — *sonantem*] Clipeus hasta percussus sonum hostibus terribilem edit. — *Palladis*] A Iovis parte stabant omnes dii deaeque; ex

quibus nominantur sapientia Minervae, officiosa sedulitas Vulcani (*avidus*), maiestas Iunonis, Apollinis sinceritas et veritas, qua quidquid impurum et improbum est indefessa fortitudine adoritur. Quas deorum facultates poeta rara epithetorum brevitate indicavit. — *Castaliae*] Limpidus fons est in ingo Parnasi, Apollini sacer. — *lavit*] vide ad Carm. II, 3, 18. — *mole sua*] quia nimia est et modum rectum egreditur, si non est temperata consilio. — *Testis*] Fuerunt quibus tota haec stropha spuria videretur; centimanum Gyam ex Carm. II, 17, 14 male repetitum, ipsam Gyae mentionem post absolutam Gigantum pugnam molestam et importunam, *sententiarum* vocabulum prosa magis quam poetica oratione dignum esse aiebant. Ex quibus causis quam imbecilla prima sit vix est quod dicatur; altera talis est ut non videas quo iure a prudenti iudice afferri potuerit. Scilicet eiecta hac stropha cum nova Gigantum commemoratione nonne in eandem cladem retrahitur quidquid usque ad finem

Testis mearum centimanus Gyas
 70 Sententiarum, notus et integrae
 Tentator Orion Dianae
 Virginea domitus sagitta.
 Iniecta monstris Terra dolet suis
 Moeretque partus fulmine luridum
 75 Missos ad Orcum: nec peredit
 Impositam celer ignis Aetnam,
 Incontinentis nec Tityi iecur
 Reliquit ales nequitiae additus
 Custos; amatorem trecentae
 80 Pirithoum cohibent catenae.

CARMEN V.

Coelo tonantem credidimus Iovem
 Regnare; praesens divus habebitur

carminis reliquum est? Subita profecto vi v. 73 Horatius *monstra Terrae* inferret post v. 68. Neque id quod volunt assequantur adversarii horum versuum; nam nonne restat in reliquis strophis invisae istae Gigantum commemoratio? Tum qui pluralem *sententiarum* concoquere non potuerunt unamque tantum sententiam propositam clamaverunt, iidem in aliis pluralibus minus religiosi bene intellexerunt quid gravitatis ita poetarum verbis accederet. Addidit aliquis, mirè dictum esse *notus, virginea* (pro *virginis*) adiectivum imbecillitate premi. At vero Orion propter id ipsum maxime notus fuit, quod Dianam tentavit, unde egregie *tentator* appellatur; deinde cur *virginea* minus probandum sit quam Carm. III, 3, 28 *Hectoreis* alia, difficile est ad intelligendum. Propert. II, 1, 67: „Dolia virgineis (*Danaïdum*) idem ille repleverit urnis.“ Lucan. Phars. V, 142 „Virginei patuere doli.“ — *Terra*] *Taïa*, mater Gigantum. — *luridum*] Qui color significetur, videbis ex Carm. IV, 13, 10. Epod. 17, 22. — *ignis*] Ne victus quidem Aetnaeque subiectus Typhoeus pugnare desinit; ignem evomit, sed

ne eius quidem celeritate quidquam efficiet. — *Tityi*] Hom. Od. XI, 575 —580. — *reliquit*] In bonis etiam libris MSS. *relinquit*. Utrumque eodem redit. Perfectum praestare videtur propter praecedens idem tempus *peredit*. Supplendum *adhuc*. — *Pirithous*] *Lapitharum* rex cum Theseo amico Proserpinam ex Orco rapere conatus a Plutone saxis alligatus est. cf. IV, 7, 27 sq. — *trecentae*] permultae; ut in prosa sexcenti. cf. II, 14, 5. Sat. I, 5, 12.

Carmen V.

Quod in praecedente carmine pugna Titanum et Gigantum indicatum est, id huius carminis stropharum quasi agmen ducit. Ut Iuppiter, totius mundi gubernator, in coelo regnat, sic Augustum rerum gestarum magnitudo terrarum dominum fecit. Ab eo igitur sperandum est fore ut Romana dignitas integra restituatur, ut quas morum depravatio Romano nomini inusserit maculas deleat, ut ea reducantur tempora, quibus bonorum laus et bona fama pluris habebantur quam corporis salus et vita. En habes sententiam,

Augustus adiectis Britannis
Imperio gravibusque Persis.

5 Milesne Crassi coniuge barbara

Turpis maritus vixit et hostium,

Pro curia inversique mores!

Consenuit socerorum in armis

Sub rege Medo Marsus et Apulus,

10 Anciliorum et nominis et togae

Oblitus aeternaeque Vestae

Incolumi Iove et urbe Roma?

Hoc caverat mens provida Reguli

quam duobus exemplis illustrandam Horatius sibi sumpsit; alterum est eorum militum, qui Crasso primum, deinde Antonio a Parthis victo capti adeo potuerunt oblivisci Romani nominis ac dignitatis, ut inter Parthos habitare, matrimonia inire, arma etiam contra patriam ferre non dedignantur. Alterum exemplum Reguli est; qui cum istis compositus quantus quantaque laude dignus eminet! Qui cum adversa fortuna a Poenis captus esset, indignum se habuit qui Romani civis nomine ornaretur, nec honestatem semel amissam ullis posse restitui artibus singulari iudicio iudicavit. Huius igitur tanti viri exemplum cum maiore ubertate exornaret, Horatius rectum quo tam multum ille valebat sensum eximie comprobavit. Sic enim sibi persuasit poeta, prisca illa tempora ut revocarentur unicuique quantum posset curandum esse; quam ob rem Augustum, qui ad restituendam imperii gloriam tenderet, magnopere praedicari ab omnibusque omni opera debere adjuvari. Nam haec extrema etiamsi a poeta diserte non adduntur, intelliguntur tamen ex ipso carminis initio. Hoc saepe secutus est consilium, ut in imagine aliqua consistens, quid vellet indicasse satis haberet, legentibus explorandum relinqueret.

V. 1. *tonantem*] *τεροπινέωννος*. Ovid. Fast. II, 130: „Hoc tu per terras, quod in aethere Iuppiter alto Nomen habes: hominum tu pater, ille deum.“ — *credidimus*] semper et cre-

didimus et credemus. — *praesens*] vide ad Carm. I, 35, 2. — *adiectis*] cum adiecerit; loquitur enim poeta de futura imperii spe. — *coniuge barbara*] *Iunge maritus coni. barb.*, ut Ovid. Her. 4, 134: „fratre marita soror.“ *Turpis* est, quia dedecuit cives peregrinam et hostis filiam in matrimonium ducere. cf. Caes. b. c. III, 110. — *vixit*] *Locus* quem occupavit verbum magnam ei tribuit vim. — *hostium*] *Iunge cum socerorum.* — *curia*] ubi senatus habebatur, in quo maiestas populi Romani est. Cic. pro Planc. 29 „stante urbe et curia.“ — *armis*] Sic omnes codd. praeter unum, in quo *arvis*, quod viri docti ex coniectura restituendum putaverant. At vero quod ii qui capti et in servitutem redacti erant dominorum agros colebant, non fuit dedecori, sed quod arma etiam hostilia in patriam ferebant. Cuius quidem rei exemplum tristissimum edidit Q. Labienus, qui a Bruto ad Parthos ut auxilia peteret missus post cladem Philippensem Parthorum dux fuit adversus Romanos a. u. c. 714. Dio C. 48, 24: „ὁὗτος ὁ Λαβιήνος ἐπεισε τὸν Πάρθον τοῖς Ῥωμαίοις ἐπιχειρῆσαι.“ Vellei. Patere. II, 78: „Labienus e Brutianis castris profectus ad Parthos, perducto eorum exercitu in Syriam interfectoque legato Antonii concusserat (provincias). — *Anciliorum et*] pro *ancilium*. Et in bonis codd. deest; sed praestat polysyndeton. Flor. IV, 11, 3: Antonius patriae, nominis, togae, fascium oblitus.“ — *Vestae*] Cic.

Dissentientis condicionibus

15 Foedis et exemplo trahentis

Perniciem veniens in aevum,

Si non periret immiserabilis

Captiva pubes. Signa ego Punicis

Affixa delubris et arma

20 Militibus sine caede, dixit,

Derepta vidi; vidi ego civium

Retorta tergo brachia libero

Portasque non clausas et arva

Marte coli populata nostro.

25 Auro repensus scilicet acrior

Miles redibit. Flagitio additis

Damnum: neque amissos colores

Lana refert medicata fuco,

Nec vera virtus, cum semel excidit,

30 Curat reponi deterioribus.

Si pugnat extricata densis

Cerva plagis, erit ille fortis

Qui perfidis se credidit hostibus,

Et Marte Poenos proteret altero

Cat. IV, 9, 18. — *Iove*] Capitolino. *Hoc caverat*] Observanda sententiarum iunctura: Illud ipsum erat, quod prohibere olim suo exemplo voluerat Regulus, et tamen factum est. — *trahentis*] Sic omnes codices; neque opus est coniectura *trahenti*. Nam *trahentis* est qui *traheret*, quod ex protasi *si non periret* intelligas. Cfr. graeca coniunctio apud Plat. Criton. p. 48. C. *Trahere* autem solitum est vocabulum de contagione. Sat. I, 2, 59. Ovid. Met. I, 190 sq. — *periret*] Antiquis temporibus in eiusmodi formis syllabas *et, at, it* Latini produxisse videntur, cuius rei vestigia satis frequentia remanserunt; cf. II, 13, 16. II, 6, 14. III, 16, 26. Sat. II, 2, 47. I, 5, 90. II, 3, 187. II, 1, 82. Ita nec Glareani coniectura *perirent*, nec Lachmanni *perires* opus est. — *immiserabilis*] miseratione indigna.

V. 18. *signa*] De rebus et verbis compara Carm. IV, 15, 6 sq. Epist. I, 18, 56. — *derepta*] Omnes fere codices *direpta*, male. — *portasque*] Karthaginis. — *populata*] *Populare* verbum non sine exemplo, ut Liv. III, 6. Virg. Georg. I, 185. Aen. I, 527. — *Flagitio*] Medium carmen ut saepissime fit summam totius sententiam habet. *Damnum* in malo magis exemplo cernendum est quam in impenso pretio. — *deterioribus*] dativus; nam reponere est reddere. Epist. I, 7, 39. Plin. Epist. VIII, 2, 6: „Cum reputarem quosdam ex debito aliquantum, quosdam aliquid, quosdam nihil reposuisse.“ — *si pugnat*] Si ordo rerum invertitur, fortes erunt qui semel capti honestatem amiserunt. — *perfidis credidit*] Egregie inter se opponuntur, ut Carm. III, 27, 25. — *Hic unde*] Sic plurimi codices et recte

- 35 Qui lora restrictis lacertis
Sensit iners timuitque mortem.
Hic unde vitam sumeret inscius
Pacem duello miscuit. O pudor!
O magna Karthago, probrosis
40 Altior Italiae ruinis!
Fertur pudicae coniugis osculum
Parvosque natos ut capitis minor
Ab se removisse et virilem
Torvus humi posuisse vultum,
45 Donec labantes consilio patres
Firmaret auctor nunquam alias dato
Interque moerentes amicos
Egregius properaret exsul.
Atqui sciebat quae sibi barbarus
50 Tortor pararet: non aliter tamen
Dimovit obstantes propinquos
Et populum reditus morantem,
Quam si clientum longa negotia
Diudicata lite relinqueret
55 Tendens Venafranos in agros
Aut Lacedaemonium Tarentum.

quidem legunt. *Hic* enim cum indignatione positum refertur ad eum militem quem ante descripsit. Is igitur qui capi se passus est, cum nimia cupiditate vitae conservandae occaecatus fortitudine recte eam servari non cogitaret, suam pacem fecit cum hoste. Ubi civitas bellum intulerit ibi singulis civibus non licere ait Regulus pacem componere. — *duello*] Antiquior forma egregia in ore antiqui Reguli. Sed reperitur eadem III, 14, 18. IV, 15, 8. Epist. I, 2, 7. II, 1, 254. II, 2, 98. Festus: „*Duellum* bellum, videlicet quod duabus partibus de victoria contententibus dimicatur.“ Sic *bis ex duis*, *bonus e duonus*. — *probrosis*] Probra cum dedecore sunt

coniuncta; quare quod imperium Romanum a Poenis victum ruinam minatur, eius rei culpa est in ignominiosa civium ignavia. Sibi ipsi irascitur Regulus.

V. 42. *capitis minor*] „Capite diminutus erat qui in hostium potestatem venit.“ Festus. cf. Liv. XXII, 60. Triplex erat capitis deminutio. — *Torvus*] cf. Ovid. Met. V, 92. Virg. Georg. III, 51. *ταυρηδὸν ὑποβλέπειν*. — *tortor*] cf. Cic. de off. I, 13. III, 27. — *reditus*] Plurali numero describitur, saepius Regulum populo prohibente reditum tentavisse. — *longa*] taedii plena. — *Venafranos*] in Campania sitos. — *Lacedaemonium*] Carm. II, 6, 11.

CARMEN VI.

Delicta maiorum immeritus lues,
 Romane, donec templa refeceris
 Aedesque labentes deorum et
 Foeda nigro simulacra fumo.
 5 Dis te minorem quod geris, imperas;

Carmen VI.

Argumentum huius carminis cum quinto cognatum est. Nam Augustus qui eo tenderet, ut Romanam dignitatem inter ipsos cives et apud exteras nationes restitueret, pravitatis et corruptionis qua laborabat respublica quasi radices evellere debebat. Diuturna civium discordia fundamenta communis salutis suffossa erant, priscus timor deorum sublatus, templa devastata vel neglecta, integritas domesticae vitae turpissimis flagitiis contaminata. Pietatem cum integritate restituendam censuit Augustus; inde eius in renovandis templis in corrigendisque moribus egregium studium. Quod quam rectum sit Horatius hoc carmine docet. Nam: „quia privati, inquit, commodi amor priscæ deorum religionis sedem occupavit, dii omnes calamitates in impiam Italiam miserunt; infestissimi hostes, Parthi, saepius victores impetus nostros malis ominibus illatos gravi clade reiecerunt et Romanus civis, Antonius, barbararum gentium copias (Dacos, Aethiopes) ut contra ipsam patriam duceret ab animo potuit impetrare. Deorum immortalium contemptionem secuta est turpitudine domestica, qua omnes, imprimis mulieres, polluti et corrupti sunt; mala enim semina malos edunt fructus. Quare ante omnia iuventuti consulendum est; reducenda in animos iuvenum priscæ pietas priscæ disciplinae severitate. Severitate et officio assuefacta fuit ea iuventus, qua quidquid ex rebus Romanis perpetua splendet gloria gestum est, qua Hannibal, Pyrrhus, Antiochus superati sunt. Nostra aetas deterior est; avi nostri perniciæ originem posuerunt, patres increpmenta attulerunt, quibus nos rursus improbitate ita praestamus, ut nisi nunc ipsum corrigimur a malaque qua

incedimus via deflectimus peiorem etiam simus relicturi progeniem.“ Vides igitur, in hoc quoque carmine efflagitare poetam, ut iuventus rectis et severis doctrinis imbuatur; aliam salutis viam esse nullam. — Restat, ut te tempore horum sex carminum pauca dicam. Quae cum cognatione consilii et loci inter se coniungantur, non possunt esse diversi temporis. Iam cum quartum et quintum ante a. 729 scripta esse non possint, omnia hoc anno iuniora esse nego. Nam ne in sexto quidem quidquam legitur, quod annum 726, quo anno Augustus templa reficere et mores corrigere incepit, aperte prodat aut tribus annis post scriptum esse nequeat.

V. 1. *templa refeceris*] cf. Carm. II, 15, 20. Sat. II, 2, 104. Fuit qui primo versu scribendum censeret *meritus*; perperam. Omnia flagitia et scelera superiorum temporum, quibus bella civilia gesta et templa collapsa sunt, luet haec aetas, etsi ipsa nihil commisit. Antithesis, quae est inter *delicta* et *immeritus*, egregia est et a poeta quaesita. Deinde coniectura *meritus* solita caesurae sedes mutatur. Ceterum cf. Sueton. Aug. 30: „Aedes sacras vetustate collapsas aut incendio absumptas refecit.“ — *Romane*] cf. Sat. I, 4, 85. Virg. Aen. VI, 852. Quintil. VIII, 6, 20: „Maxime autem in orando valebit numerorum illa libertas. Nam et Livius saepe sic dicit *Romanus proelio victor*, cum Romanos vicisse significat.“ Vis quaedam et gravitas inest in singulari omnes Romanos ad unum quasi corpus colligente. — *fumo*] et incendiis et incuria. Nam cum antiqua aedificia non haberent ea tectorum foramina quibus fumus apud nos colligitur et educitur, necessarium erat ut in templis etiam simulacra deorum lavarentur. — *te geris*] Sat. II, 5, 19. —

Hinc omne principium, huc refer exitum:

Di multa neglecti dederunt
Hesperiae mala luctuosae.

Iam bis Monaeses et Pacori manus
10 Non auspicatos contudit impetus
Nostros et adiecisse praedam
Torquibus exiguis renidet.

Paene occupatam seditionibus
Delevit urbem Dacus et Aethiops,
15 Hic classe formidatus, ille
Missilibus melior sagittis.

Fecunda culpa saecula nuptias
Primum inquinavere et genus et domos;
Hoc fonte derivata clades

20 In patriam populumque fluxit.

principium, huc] vide ad Carm. III, 4, 41. Zeugma in hoc loco non est; nam *princip.* nominativus est. Quod ut intelligas Cic. de off. III, 8, 36. de senect. 12, 39. Terent. Andr. I, 1, 99: „Hinc illae lacrimae.“ — *iam bis]* Non bis Monaeses et bis Pacorus; sed semel Monaeses a. 701 M. Crassi, et semel Pacorus, Orodis filius, a. 714 Didii s. Decidii Saxae exercitum vicit. Quod deinde a. 718 ipse Antonius a Parthis superatus est, id nescio qua verecundia prohibitus non commemoravit. Amicitia Iuli Antonii (Carm. IV, 2) certe eum non prohibuit, qui v. 14 satis perspicue Antonium notaret. Fortasse ne idem homo in duobus malis publicis conspiceretur voluit cavere. Ceterum incertum est, quis fuerit Monaeses. Suspiciantur eundem esse cum Surena illo, qui Crassum vicit; Monaesen illum dictum fuisse proprio nomine, Surenam ex Orientis more dignitatis vel magistratus nomen fuisse. Is autem Monaeses, qui apud Plutarchum Anton. c. 37. ἀνὴρ ἐπιφανὴς καὶ δυνατὸς appellatur et ad Antonium fugit, deinde a Phraate revocatus est, esse nequit; nam Surena ab Orode, Phraatis patre, interfectus est. — *non auspicatos]* De Crasso Vell. Pat. II, 46: Hunc profi-

ciscentem in Syriam diris cum omnibus tribuni plebis frustra retinere conati. Quorum execrationes si in ipsum tantummodo valuissent, utile imperatoris damnum salvo exercitu fuisset reipublicae.“ — *contudit]* Magnam h. v. significat cladem; compara eius usum Epod. 5, 98. Epist. II, 1, 10. I, 8, 5. Sat. II, 7, 16. Carm. IV, 3, 8. — *renidet]* ridet, gaudet. Ovid. Met. VIII, 197. Catull. 39, 1: „Egnatius quod candidos habet dentes, Renidet usquequaque.“ De coniunctione cf. Carm. I, 34, 16 et infr. v. 21. — *Dacus]* Hi ab Octaviano sprete ad Antonium inclinaverant. Virg. Aen. VIII, 704.

V. 17. *fecunda]* De genit. cf. Carm. IV, 4, 58. In reliquis locis apud Horatium genitivus non est additus, sed facile intelligitur; cf. Sat. II, 5, 31. II, 4, 44. II, 3, 287. Carm. III, 23, 6. Epist. I, 5, 19. — *genus]* liberos. — *domos]* rationes domesticas. — *in patriam populumque]* Bentleius, ne otiosa synonyma ingerere videretur Horatius, corrigendum putavit *inque patres populumque*, ut Virg. Aen. IV, 682. IX, 192. al. Sed non est tangenda antiqua formula: cf. Liv. V, 41. Sall. Cat. 52. Ovid. Met. XV, 572. Deinde apud Horatium *que* praepositioni non

- Motus doceri gaudet Ionicos
 Matura virgo et fingitur artibus;
 Iam nunc et incestos amores
 De tenero meditatur ungui;
 25 Mox iuniores quaerit adulteros
 Inter mariti vina neque eligit
 Cui donet impermissa raptim
 Gaudia luminibus remotis;
 Sed iussa coram non sine conscio
 30 Surgit marito, seu vocat institor
 Seu navis Hispanae magister,
 Dedecorum pretiosus emptor.
 Non his iuventus orta parentibus
 Infecit aequor sanguine Punico,
 35 Pyrrhumque et ingentem cecidit
 Antiochum Hannibalemque dirum;
 Sed rusticorum mascula militum
 Proles, Sabellis docta ligonibus
 Versare glebas et severae
 40 Matris ad arbitrium recisos
 Portare fustes, Sol ubi montium
 Mutaret umbras et iuga demeret
 Bobus fatigatis amicum
 Tempus agens abeunte curru.

adhaeret nisi Sat. I, 3, 141. — *Ionicos*] Iones mollitiae insignes, inde *Ιωνική ὄρχησις* lasciva saltatio. — *matura*] quam aetatem modestia et castitas maxime commendat. — *artibus*] Est ablativus. cf. Carm. IV, 13, 21. — *iam nunc*] cf. Epist. II, 1, 127. A. P. 43. Expectationem res praecurrit. — *ungui*] ἐξ ἀπαλῶν ὀνύχων, i. e. ex imis medullis, penitus, non: a prima pueritia. Plut. de educ. V. p. 3 ed. Did. ἀγαπῶσαι (sc. matres) ἐξ ὀνύχων τὰ τέκνα. Anthol. Pal. I. p. 119 „Τὴν δ' ἀπὸ τῆς Ἀσίης ὀρχηστρίδα, τὴν καιοτέχνους Σχημασιν ἐξ ἀπαλῶν κιννυμένην ὀνύ-

χων.“ Cic. ad Fam. I, 6, 2 „qui mihi a teneris, ut Graeci aiunt, unguiculis (i. e. intime) es cognitus.“ — *institor*] Epod. 17, 20; „Institores, quibus vestiarii dant vestes lintaeque circumferenda ac distrahenda.“ Gloss. — *navis Hispanae*] Plin. H. N. III, 3: Metallis plumbi, ferri, aeris, argenti, auri tota ferme Hispania scatet, ceterior et specularibus lapidibus, Baetica et minio. Sunt et marmorum lapicidinae.“ Inde in Hispaniam frequens mercatura, et Hispani mercatores divites. — *dedecorum*] Varia dedecoris genera. — *aequor*] Primo Punico bello. cf. Carm. II, 12, 3. —

45 Damnosa quid non imminuit dies?

Aetas parentum peior avis tulit

Nos nequiores mox duros

Progeniem vitiosorem.

CARMEN VII.

Quid fles, Asterie, quem tibi candidi

Primo restituent vere Favonii

Thyna merce beatum

Constantis iuvenem fide

5 Gygen? Ille Notis actus ad Oricum

Post insana Caprae sidera frigidas

Noctes non sine multis

Insomnis lacrimis agit.

Atqui sollicitae nuntius hospitae

dirum] vide ad Carm. II, 12, 2. — *Sabellis*] Quorum de severa disciplina vide Virg. Georg. II, 167. Aen. IX, 603 sqq. Ovid. Am. II, 4, 15 *rigidas* *Sabinas* vocat. Cic. pro Ligar. II, 32. — *iuga demeret*] Cum tota natura quiescit, cum etiam bobus iuga demuntur, severitas matrum iuvenes quieti se dare non sinit. — *agens*] adducens, ut Virg. Bucol. 8, 17. Observa oxymoron *agens abeunte curru*. — *aetas parentum*] Observa admirabili quodam artificio poetae quattuor aetates breviter trium versuum spatio coniungi. Gravissimum illud iudicium egregio modo carminum seriem claudit.

Carmen VII.

Asterien, quae de Gygis, amati iuvenis, longa absentia sollicita erat, consolatur Horatius: neminem in amore constantiorem Gyge esse neque apud eum quidquam valere malas Chloes hospitae artes et illecebras; contra ne ipsa Romae periculis undique cincta fidem frangat magis ait esse timendum; quare eam admonet ut ne aurem praebeat Enipei vicini nocturnis carminibus, ut domum clausam teneat, ut difficilis maneant, dum Gyges revertatur. Graeca nomina licet haud

dubie ficta sint, veros tamen et Romanos homines celare videntur; quamquam qui lateant investigare velle inane est studium et supervacaneum. Quo tempore compositum carmen sit nos latet.

V. 1. *quem tibi*] Relativa sententia ob eam causam praecedit ipsum nomen Gygis, quia consolandi rationes paucis verbis comprehensas continet. — *candidi Favonii*] cf. Carm. I, 7, 15. III, 27, 19. — *Thyna*] Thyni Thraeces erant, qui in Bithyniam emigrant, unde Plin. H. N. V, 32: „Tenebant omnem oram Thyni, interiora Bithyni.“ Utroque tamen nomine poetae certe sine ullo discrimine utebantur; Epist. I, 6, 33. Nobilis ea fuit regio propter multa et magna quae habuit emporia. — *fide*] Est genitivus, ut *acie* apud Caes. b. g. II, 23; dativus est Sat. I, 3, 95. — *Oricum*] urbs Epiri, nunc Orso vel *Erikho*, colonia Euboeae, cuius portus iam ab Herodoto IX, 93 commemoratus est. *insana Caprae sidera*] Capra quae olim Iovem nutriverat inter sidera relata locum in sinistro humero Aurigae habet; oriebatur autem una cum pluvialibus Haedis (cf. Carm. III, 1, 28) a. d. IV. Kal. Octobr., occidebat Kal. Ianuar. Sic indicatur pars auctumni

- 10 Suspirare Chloën et miseram tuis
 Dicens ignibus uri
 Tentat mille vafer modis.
 Ut Proetum mulier perfida credulum
 Falsis impulerit criminibus nimis
- 15 Casto Bellerophonti
 Maturare necem refert.
 Narrat paene datum Pelea Tartaro,
 Magnessam Hippolyten dum fugit abstinens;
 Et peccare docentes
- 20 Fallax historias movet.
 Frustra: nam scopulis surdior Icari
 Voces audit adhuc integer. At tibi
 Ne vicinus Enipeus
 Plus iusto placeat cave;
 25 Quamvis non alius flectere equum sciens
 Aequae conspicitur gramine Martio
 Nec quisquam citus aequae
 Tusco denatat alveo.

cum parte hiemis, bruma. *Insana* propter tempestates, quas in mari movet. Cf. ad Carm. III, 29, 19. Pluralis autem numerus *sidera* Capram ipsam comprehendit cum Haedis.

V. 10. *tuis ignibus*] cf. Carm. I, 27, 16. *Ignes ut amores* pro ipso adolescente, qui amatur. — *Proetum*] De hac fabula lege Hom. Il. VI, 155 sqq. — *impulerit maturare*] vide ad Carm. I, 1, 8; quamquam in epistolis, quarum oratio propior est ad vulgarem rationem, coniungitur etiam *impulit ut*, Epist. II, 2, 51 sq. — *Pelea*] Hippolyte Acasti Iolci regis coniux Peleum, quem diu ad amorem frustra tentasset, vim sibi inferre voluisse apud maritum criminata est. Qui hospitem in Peli montis solitudines abductum somnoque oppressum inter medios Centauros reliquit; neque eorum impetus Peleus nisi deorum misericordia adiutus sustinere potuit. — *movet*] In aliis bonis et antiquis codicibus *monet* legitur. Dicebant autem *cantus, preces,*

mentionem movere. cf. Virg. Aen. I, 262, VII, 641. Ovid. Met. XIV, 21. *Historiae* autem sunt *μῦθοι*. — *Icari*] non pro Icarii sc. maris; sed sunt ipsius Icarii scopuli; ceterum cf. Epod. 17, 54. Gratum est oxymoron *surdior audit*, cf. Euripidis Med. 28: ὥς δὲ πέτρος ἢ θαλάσσιος κλύδων ἀκούει; audit quidem, sed non movetur magis quam si non audivisset. Quare reiicienda est codicum non paucorum lectio *spernit*.

V. 25. *quamvis conspicitur*] vide ad Carm. I, 28, 13. — *flectere equum*] In delicata quae tum perdebantur Romani pueri (Carm. III, 24, 54 sqq.) vita magnum haud dubie fuit roboris argumentum in equitandi nandique artibus; quapropter in his saepius ad amorem puellarum excitandum gravis sane commendatio quaeritur, de qua compara sis Carm. I, 8, 6. III, 12, 7. Summa igitur Enipei laus ostenditur ab Horatio bis posito *aeque* adverbio in illustri loco, initium dico et finem

Prima nocte domum claude neque in vias
 30 Sub cantu querulae despice tibiae,
 Et te saepe vocanti
 Duram difficilis mane.

CARMEN VIII.

Martiis caelebs quid agam Kalendis,
 Quid velint flores et acerra thuris
 Plena, miraris, positusque carbo in
 Cespite vivo,

5 Docte sermones utriusque linguae:
 Voveram dulces epulas et album

versuum. — *Tusco*] cf. Carm. I, 2, 13. — *denata*] ἀπαξ λεγόμενον ut videtur; est autem ex superiore loco in inferiorem natum, quae quidem significatio praepositionis *de* mox redit in verbo *despice*; compara *delabi* Carm. III, 29, 35; *decidere* Epist. I, 14, 29; *decurrere* Carm. IV, 2, 5; *defluere* Carm. I, 12, 29. Epist. I, 2, 42; alia. — *neque despice*] vide ad Carm. I, 11, 2.

Carmen VIII.

Horatium a. 729 cadente subito arbore paene extinctum esse ad Carm. II, 13 expositum est. Quae quidem res tam admirabilis ei visa est, ut ob conservatam salutem gratum diis animum annuo sacrificio testari decerneret. Vocat igitur insequenti anno dulcissimum amicum, Maecenatem, ad epulas cum sacrificio hoc festo die celebrandas. Qui cum nesciret, quid hoc potissimum die, Matronalibus, caelebs Horatius coenam instituisset, domum intrans sacros ibi apparatus mirari se vulu exprimit. Iam hoc carmine cogitandum est excipere Horatium laete amicum quidque sit rei explicare. Dividitur carmen ex septem strophis compositum in duas partes, quarum prior tres strophas complectens festiva aliqua ratione admirationem habet Maecenatis Horatiique cur ea paraverit explicationem. Tum media strophæ invitatur Maecenas, ut adesse velit hilari quidem sed a ni-

mia laetitia alieno convivio; in quo loco grave est v. 13 vocabulum *amici*, quocum aliqua certe ratione coniungenda sunt ultima huius strophæ vocabula. Amicum posci ait ab amico, amicas etiam epulas fore; quare abiiciendas esse omnes alienas curas, etiam publicas, fruendum potius quae hora praebeat bonis, pellendam in laeta re severitatem. Haec extrema altera continentur carminis parte, composita item tribus strophis Maecenatem ita spectantibus, ut primae tres Horatium.

V. 1. *Martiis Kalendis*] Kal. Mart. celebrari solebant Matronalia in honorem Iunonis et in memoriam connubiorum Romulo regnante institutorum. Fuit etiam mos hoc die mulieres strenis donare. Martial. V, 84, 11: „Seis certe puto vestra iam venire Saturnalia, Martias Kalendas; Tuuc reddam tibi, Galla, quod dedisti.“ — *acerra*] arca thuraria. — *cespite*] cf. Carm. I, 19, 13 sqq. — *docte*] Admodum festiva alloquendi ratio: „quid mihi sit caelibis cum matronalibus, tu, quamquam peritissimus es rerum sacrarum et Latinarum et Graecarum, tota ista doctrina non assequeris.“ Sermones enim litterae ipsae sunt. cf. Cic. de off. I, 1, 1. Martial. X, 76, 6 „amicus Lingua doctus utraque.“ Suet. Claud. 42: „Cuidam barbaro Graece et Latine disserenti, Cum utroque, inquit, sermone nostro sis paratus.“ — *Libero*] vide ad Carm. II, 17, 28. Bac-

Libero caprum prope funeratus
Arboris ictu.

Hic dies anno redeunte festus
10 Corticem adstrictum pice demovebit
Amphorae fumum bibere institutae
Consule Tullo.

Sume, Maecenas, cyathos amici
Sospitis centum et vigiles lucernas
15 Perfer in lucem; procul omnis esto
Clamor et ira.

Mitte civiles super urbe curas:
Occidit Daci Cotisonis agmen,
Medus infestus sibi luctuosis
20 Dissidet armis,
Servit Hispanae vetus hostis orae
Cantaber sera domitus catena,
Iam Scythae laxo meditantur arcu
Cedere campis.

cho cur caprum immolaverit, vide ex Virgil. Georg. II, 380; et album quidem, quia superis diis albae, inferis nigrae hostiae mactabantur. — *funeratus*] Aliis scriptoribus *funerare* est *iusta mortuis persolvere*, Horatio *negare*. — *demovebit*] non *dimovebit*, quod in bonis etiam est codicibus. — *fumum bibere*] Colum. I, 6, 20: „Apothecae recte superponentur iis locis, unde plerumque fumus exoritur; quoniam vina celerius vetustescunt, quae fumi quodam tenore praecocem maturitatem trahunt.“ Apothecae igitur diversae erant a cella vinaria, quae ne vinum calore vitiaretur, in humum depressa fuit et septentriones versus sita. Amphorae autem vel vitro vel argilla confectae, ne aer accederet, gypsabantur vel oppicabantur. — *Consule Tullo*] Rectius videtur intelligi L. Volcatius Tullus, qui cum Caesare Octaviano consul erat a. u. c. 721, quo anno Horatius Sabinam villam a Maecenate acceperat, ita ut vetustissimum vinum videatur promere, quod in suo agro natum erat. Alii refe-

runt ad eum Tullum, qui anno ante natum Horatium (a. u. 688) consul erat.

V. 13. *cyathos amici sospitis*] qui propter salutem amici servatam ebibantur. cf. Carm. III, 19, 9 sq.; in qua re his verbis Romani utebantur: *bene te vel bene tibi*. Centum autem numerus hic est infinitus. — *Daci Cotisonis*] de hoc reliquisque rebus ad Romanam historiam pertinentibus vide ad Carm. II, 13. *Cotiso rex Dacorum* fuit. — *infestus sibi luctuosis*] En iterum exemplum constructionis *ἀπὸ νοι-voῦ* quae solet vocari. Est enim *Medus sibi* infestus armis *sibi* luctuosis. Nam quod alii voluerunt *Medus infestus Romanis*, id cum ab hoc certe loco alienum videatur, tum vix ex adiectivo absolute posito intelligitur. Praeterea ne cum Heinsio et Bentleio *infestis* — *luctuosus* scribas vetat homoeoteleuton a poetis latinis magnopere adamatum. — *Cantaber*] cf. Carm. II, 6, 2. IV, 14, 41. Ep. I, 12, 26. — *Scythae*] cf. Carm. II, 9, 23 sq. — *privatus*] Cum *privatus* sis. Non tam indicatur Mæ-

25 Negligens ne qua populus laboret
 Parce privatus nimium cavere;
 Dona praesentis cape laetus horae,
 Linque severa.

CARMEN IX.

Donec gratus eram tibi
 Nec quisquam potior brachia candidae
 Cervici iuvenis dabat:
 Persarum vigui rege beatior.
 5 Donec non alia magis
 Arsisti neque erat Lydia post Chloën,
 Multi Lydia nominis:
 Romana vigui clarior Ilia.

cenati publico munere non fungenti mittendas esse publicas curas, quam velle Horatium, ut amicus totus sit apud se, ut nihil cogitet nisi mutuam qua gaudebant amicitiam. Praefectus urbi Maecenas non fuit, neque tunc neque ante. Nam ne eo quidem tempore, quo Octavianus ad bellum Actiacum profectus erat, Maecenatem vere praefectum urbi fuisse bene vidit Hockius (Römische Geschichte) T. I. p. 312. — *cape*] Codices etiam *raper* praebent, quod cur non sit recipiendum, invenes cum non cupiditatem, sed usum praesentis laetitiae suaderi intellexeris. — *horae*] Alii *horae* et vel *ac*; utrumque falsum. Asyndeton optimis codicibus probatur.

Carmen IX.

Dramaticum et amoebaeum hoc carmen inter amatoria fere dulcissimum in tres aequales partes facile dividi perspicuum est. Ac prima quidem pars (str. 1. 2) irae qua Horatius et Lydia distrahuntur originem ostendit, altera (str. 3. 4), qua quid rixam amantium secutum sit ostenditur, apposite transitur ad reconciliationem gratiae et amoris; quae cum tertiam efficiat partem, totum carmen ita comparatum est, ut quam verum sit Terentianum illud: „amantium irae amoris redintegratio“ venuste demonstre-

tur. Nam hoc proprium est etiam primae et alteri parti, ut per zelotypiam et iram amoris tamen vis quasi perluceat. Deinde quam sit suave, quod quidquid ab Horatio Lydiae obiiciatur perfidiae et invidiae, id statim ab hac superetur et acute augeatur, non est quod uberius exponatur. Quo anno scriptum sit carmen quis dicat?

V. 3. *dabat*] Simplex verbum compositi *circumdare* loco positum esse ex dativo intelligitur *cervici*; de quo nomine Quintilianus dicit VIII, 3, 35: „*Cervicem* videtur Hortensius primus dixisse: nam veteres pluraliter appellant“, cui addendum tamen, veteres poetas singularem sic ponere iam ausos esse. — *alia arsisisti*] cf. Carm. IV, 9, 13. Epod. 14, 9, unde quid de altera lectione *aliam* iudicandum sit facile videbis. Orta ea est ex geminatione sequentis litterae. — *multi Lydia nominis*] De genitivo vide ad Carm. I, 36, 13. cf. Sat. I, 1, 33. Artificiosa stropharum similitudo cogit, ut septimum versum cum protasi coniungamus; sententia est: „donec non aliam magis amabas nec Lydiam Chloae posthabebas, Lydia contra multi apud te erat nominis, tamdiu clarior i. e. nobilior mihi visa sum Ilia, nobilissima inter omnes Romanas mulieres.“ Fuit autem Lydia liberta. De Ilia cf. Virg. Aen. I, 273.

- Me nunc Thressa Chloë regit
 10 Dulces docta modos et citharae sciens,
 Pro qua non metuam mori,
 Si parcent animae fata superstiti.
 Me torret face mutua
 Thurini Calais filius Ornyti,
 15 Pro quo bis patiar mori,
 Si parcent puero fata superstiti.
 Quid, si prisca redit Venus
 Diductosque iugo cogit aëneo,
 Si flava excutitur Chloë
 20 Reiectaeque patet ianua Lydiae?
 Quamquam sidere pulchrior
 Ille est, tu levior cortice et improbo
 Iracundior Hadria,
 Tecum vivere amem, tecum obeam libens.

CARMEN X.

Extremum Tanain si biberes, Lyce,
 Saevo nupta viro, me tamen asperas
 Porrectum ante fores obiicere incolis
 Plorares Aquilonibus.

V. 12. *animae*] dulce hoc amicitiae vel amoris nomen; veluti Cic. Fam. XIV, 14: „Vos, meae carissimae animae, quam saepissime ad me scribite“; neque nos aliter Germani „mein Leben.“ — *iugo aëneo*] In adiectivo posita vis est et firmitas redintegrati amoris. cf. Carm. I, 33, 11. In sequentibus verbis Chloë excutitur non domo sed pectore, deinde *reiectae Lydiae* dativus est, non genitivus. — *improbo*] Quidquid modum excedit, improbum est poetis. cf. Virg. Georg. I, 146. 388. — *iracundior*] Talem se ipse describit Horatius Epist. I, 20, 25.

Carmen X.

Unum hoc exemplum est Horatianum ex carminum genere, quod *παρὰ*

κλυσίδιον nominatur; quo poetae amatores imitantur prima nocte ad ianuam difficilium puellarum stantes miserisque vel precibus vel minis gratiam muliercularum moventes. Cuius quidem generis mentio iniecta est Carm. I, 25, 7 sq. III, 7, 30 sqq.

V. 1. *Extremum Tanain*] Etiam si barbara esses a mitiorique sensu aliena, me saevo frigori oppositum exciperes. De verbo *bibendi* vide ad Carm. II, 20, 20. — *asperas fores*] cf. Epod. 11, 22. — *incolis Aquilonibus*] Aquilones quoniam in gelida Scythia flare solent, egregie eius regionis incolae appellantur. Non multum diversus locus est Carm. I, 16, 6. — *nemus*] est viridarium in domus impluvio plantatum, non, quod olim visum est,

- 5 Audis quo strepitu ianua, quo nemus
 Inter pulchra satum tecta remugiat
 Ventis, et positas ut glaciet nives
 Puro numine Iuppiter?
 Ingratam Veneri pone superbiam,
 10 Ne currente retro funis eat rota:
 Non te Penelopen difficilem procis
 Tyrrhenus genuit parens.
 O quamvis neque te munera nec preces
 Nec tinctus viola pallor amantium,
 15 Nec vir Pieria pellice saucius
 Curvat, supplicibus tuis
 Parcas nec rigida mollior aesculo
 Nec Mauris animum mitior anguib.
 Non hoc semper erit liminis aut aquae
 20 Coelestis patiens latus.

solarium, de quo Seneca Contr. exc. V, 5: „Alunt in summis culminibus mentita nemora et navigabilium piscinarum freta“ et idem Epist. 122, 8: „Non vivunt contra naturam qui pomaria in summis turribus serunt? quorum silvae in tectis domorum ac fastigiis nutant?“ De viridario cf. Ep. I, 10, 22. — *ventis*] ablativus est causae. — *glaciet*] Ad hoc verbum cum alterum quod praecedit *audis* omnino aptum non videatur, zeugma in hoc loco inesse putant eliciendumque ex *audis* accommodatius verbum *sentis*, quamquam nivem in glaciem converti etiam auditur, veluti vestigiis praetereuntium. Nec bene excogitarunt verbum *sentis*, quoniam Lyce bene munita sedebat a frigore et nive.

V. 10. Proverbium hoc difficile ad interpretandum; optima tamen ea videtur esse ratio, quae ab hominibus molem aliquam machinae rota instructae ope in sublime trahentibus petita est. Iis enim funis saepe vel machinae manubrium e manibus elabatur; quo facto retro currente rota retro it funis deciditque trahenda moles. Si-

militer Lucian. Dial. Meretr. 3, extr.: „Ὡς δὲ πᾶν χαλεπὴ αἰὲ τῷ ἀνθρώπῳ γεγένησθαι, καὶ ὅρα μὴ κατὰ τὴν παροιμίαν ἀποξέξωμεν πᾶν τέλνασαι τὸ καλῶδιον.“ Retro ad verbum positum est ἀπὸ κοινοῦ, neque recipiendus alter verborum ordo: *ne currente rota funis eat retro* Bentleio aliisque probatus. — *Tyrrhenus pater*] Extenuat originem Lyces, ne cur superbiat causam habere sibi ea videatur. — *quamvis*] vide ad Carm. I, 28, 13. — *tinctus viola pallor*] Tibull. I, 8, 52: „Sed nimius luto corpora tingit amor.“ Virg. Bucol. 2, 47: „Pallentes violas“; nam violarum genus etiam luteum est. — *vir*] maritus. — *saucius*] amore. — *curvat*] sensu figurato: *flectere, movere ad misericordiam*; qui praeter h. l. non videtur reperiri. — *Mauris*] vide ad Carm. I, 1, 28. De anguib. cf. Sallust. Iug. 89, 5. — *hoc latus*] Pronomen vere demonstrativum est, neque aliter Graeci οὗτος usurpant. Sat. I, 9, 47. Deinde cf. Carm. II, 7, 18. — *Coelestis aquae*] cf. Epist. II, 1, 135.

CARMEN XI.

Mercuri, nam te docilis magistro
 Movit Amphion lapides canendo,
 Tuque testudo resonare septem
 Callida nervis,

5 Nec loquax olim neque grata, nunc et
 Divitum mensis et amica templis,
 Dic modos, Lyde quibus obstinatas
 Applicet aures,

Quae velut latis equa trima campis,
 10 Ludit exsultim metuitque tangi
 Nuptiarum expers et adhuc protervo
 Cruda marito.

Tu potes tigres comitesque silvas

Carmen XI.

Precibus Horatius convertitur ad Mercurium et lyram, ut carmen sibi velint dare quo Lyden timidam et amatam puellam sibi possit conciliare (str. 1—3); nam magnam esse carminum potestatem etiam in feras bestias, in inanimatam naturam, in ipsos adeo inferos (cf. Carm. II, 13. — str. 4—6). Ex inferis postremum locum consulto occuparunt Danaï filiae, quarum exemplo quam gravi poena luere tur male redditus et deceptus amor doceretur. Quod quidem Lyden spectare versu 25 clare ostenditur; neque temere fecit Horatius, quod in Danaïdum fabula diutius moratus rem suam videtur relinquere. Etenim in hac fabula nihil velim aliud videas nisi argumentum carminis, quod ad flectendam Lyden poeta a deo postulat. Quod si perspexeris, simul etiam cur carmen ad Lyden postea non revertatur videbis. Neque minus planum est, quid causae fuerit cur haec de Danaïdibus pars — id enim artificium frequens est Horatii — per septem extendere tur strophas; quarum prima ut media est totius carminis, ita summam habet sententiam. Quid quod inde hoc quoque intelligitur, quintam stropham (v.

17—20) non debere ut spuriam eiici? id quod multi iique praestantissimi Horatii interpretes facere non dubitarunt. Eiice hanc stropham, et vide ubi sit aequabilitas partium. Verumtamen si quid ibi est ineptum vel vituperandum, Horatius vituperandus est, non emendandus. Qui hoc certe optime instituisse videtur, quod carmini finem imposuit oratione Hypermnestrae suam salutem amoris et fidei longe posthabentis. Id enim Lyde quoque ut faciat studiose suadet. Nescimus quo tempore carmen scriptum sit.

V. 1. *nam*] Exemplo, quod huius particulae vinculo adiungitur, causa cur Mercurius invocetur probatur. cf. infra v. 30. Epod. 17, 45. Virg. Aen. I, 65. Sic saepe apud Graecos γὰρ particula. — *Amphion*] cf. Art. poet. 394 sqq. — *testudo*] cf. Hom. hymn. in Mercur. v. 47 sqq. — *resonare callida*] vide ad Carm. I, 1, 18. — *loquax*] olim antequam nervis instructa esset neque canora neque grata hominibus, nunc ubique accepta, et divitibus hominibus et ipsis diis. cf. Carm. I, 32, 13. Hom. Od. VIII, 99. De septem nervis vide Hom. hymn. in Merc. 51. — *exsultim*] vide ad Carm. I, 5, 8. — *cruda*] proprie de fructibus. cf. Carm. II, 5, 10. — *comitesque sil-*

- Ducere et rivos celeres morari;
 15 Cessit immanis tibi blandienti
 Ianitor aulae,
 Cerberus, quamvis furiale centum
 Muniant angues caput eius atque
 Spiritus teter saniesque manet
 20 Ore trilingui.
 Quin et Ixion Tityosque vultu
 Risit invito, stetit urna paulum
 Sicca, dum grato Danai puellas
 Carmine mulces.
 25 Audiat Lyde scelus atque notas
 Virginum poenas et inane lymphae
 Dolium fundo pereuntis imo
 Seraque fata,

vas ducere] In quo loco *comites* vocabulum cum non magis ad silvas (cf. Carm. I, 12, 7 sqq.) pertineat quam ad tigres, medium locum obtinuit instructumque est particula *que*; quae qua ratione soleat transponi vide ad Carm. II, 7, 25. — *Ianitor aulae*] Cerberus cessisse dicitur Orpheo Eurydicen uxorem ex inferis repetenti; immanis enim aula est inferorum. — *caput eius atque*] Supra iam dictum est, multos et magnos fuisse criticos qui totam stropham ut Horatio indignam eiiciendam denserent exilitate pronominis *eius* et inepta quam dicunt Cerberi descriptione moti. Fuerunt etiam qui Cerberi minus gratam descriptionem ferentes v. 18 emendare mallent coniectura, veluti *exeatque vel aestus atque*, vel *effluatque*, vel *emictetque* cet. Quibus hoc respondendum est, *eius* pronomen graviore sono efferendum neque tam exile esse neque tam rarum apud poetas lyricos quam iis visum sit: cf. Carm. IV, 8, 18. Tibull. I, 6, 25, Propert. IV, 2, 35. IV, 6, 67; deinde *atque* in fine versus positum esse etiam Carm. II, 10, 21 neque id mirandum esse, cum particula *et*, multo debilior, saepissime in fine posita (vide ad Carm. I, 7, 6), quo inter se vinculo contineantur an-

tiqui versus, demonstret. De tota autem stropha quid videatur iudicandum esse supra iam indicavi. Voluit fortasse Horatius Cerberi exemplo ostendere, quam nihil sit satis munitum a potestate poesis, ne teterrimum quidem et a venustate alienissimum monstrum. — *ore trilingui*] cf. Carm. II, 19, 31 sq.

V. 21. *Tityosque*] vide ad Carm. II, 14, 8. III, 4, 77. — *inane lymph. dol.*] Tria etiam substantiva cum suis adiectivis ita Horatius disposuit, ut non casum neque metri solam necessitatem sed consilium et artem sequeretur; id quod ex hoc schemate spero intelliges:

inane lymphae dolium fundo pereuntis imo
 1 2 3 4 5 6

Cum qua re conferas adn. ad Carm. I, 9, 21 sq. — *inane lymphae*] Genitivus cum hoc nomine eodem iure coniunctus quo cum *plenus*. cf. Cic. de orat. I, 9, 37: „Omnia nonne plena consiliorum, inania verborum videmus?“ — *potuere*] ab animo impe- trare. Epist. I, 5, 1. Noli praeter- mittere egregiam formam versuum 30 et 31, nam non solum vocabula in-

Quae manent culpas etiam sub Orco.

30 Impiae — nam quid potuere maius? —

Impiae sponso potuere duro

Perdere ferro.

Una de multis face nuptiali

Digna periurum fuit in parentem

35 Splendide mendax et in omne virgo

Nobilis aevum;

Surge, quae dixit iuveni marito,

Surge, ne longus tibi somnus unde

Non times detur; socerum et scelestas

40 Falle sorores,

Quae velut nactae vitulos leaenae

Singulos eheu lacerant; ego illis

Mollior nec te feriam neque intra

Claustra tenebo.

45 Me pater saevis oneret catenis,

Quod viro clemens misero peperci;

Me vel extremos Numidarum in agros

Classe releget:

I pedes quo te rapiunt et aurae,

50 Dum favet nox et Venus; i secundo

Omne et nostri memorem sepulcro

Scalpe querelam.

piae, *potuere* eundem in utroque locum occuparunt, sed *sponso* optime respondet et re et loco interroganti pronomini *quid*, et *duro* vocabulum egregie refertur ad *maius*. — *splendide mendax*] Oxymoron; ut Cic. Mil. 27 *gloriose mentiri*, Tacit. Hist. 4, 50 *egregium mendacium*. — *iuveni marito*] Lynceo. — *oneret catenis*] Quod postea factum fabula tradit, unde Hypermnestra apud Ovidium Heroid. 14, 3 ipsa queritur: „Clausula domo teneor gravibusque coercita vinclis.“ Pausan. 2, 19: „τὴν Ὑπερμνήστραν ὑπήγαγεν ὁ Δαναὸς εἰς δικαστήριον, τοῦ τε Ἀνγκέως οὐκ ἀνένδυνον αὐτῷ σωτηρίαν ἡγούμενος, καὶ ὅτι τοῦ τολμή-

ματος οὐ μεταχοῦσα ταῖς ἀδελφαῖς καὶ τῷ βουλευσάντι τὸ ὄνειδος ἠΰξῃσε· κριθεῖσα δὲ ἐν τοῖς Ἀργείοις ἀποφύγει τε καὶ Ἀφροδίτην ἐπὶ τῷδε ἀνέσθηκε νικηφόρον.“ — *aurae*] venti. cf. Epod. 16, 21. — *scalpe*] Alii ex codd. *sculpe*; quae vocabula saepissime confunduntur; *sculpere* tamen latinum quidem sed rarissimum est vocabulum. cf. Sat. II, 3, 22. Apud Ovidium Heroid. 14, 128 ipsa Hypermnestra hoc sibi epitaphium proponit:

„Exsul Hypermnestra pretium pietatis iniquum

Quam mortem fratri depulit, ipsa tulit.“

CARMEN XII.

Miserarum est neque amorī dare ludum neque dulci
Mala vino lavere aut exanimari metuentes

Patruae verbera linguae.

Tibi qualum Cythereae puer ales, tibi telas
5 Operosaeque Minervae studium aufert, Neobule,
Liparaei nitor Hebri,

Simul unctos Tiberinis humeros lavit in undis,
Eques ipso melior Bellerophonte, neque pugno
Neque segni pede victus,

10 Catus idem per apertum fugientes agitato
Grege cervos iaculari et celer arto latitantem
Fruticeto excipere aprum.

Carmen XII.

Horatius qui ultimo huius libri carmine Graecorum lyricos modos ad Latinos se primum transtulisse gloria-
tur, imitando carmine Alcaei, cuius primus versus servatus nobis est (p. 181 Schneidew.):

Ἐμὲ δειλὸν, ἔμὲ πασᾶν κακοτά-
των πεδέχουσιν,

hoc quoque difficiliter metrum tentavit. Nam aliud consilium in componendo hoc carmine non videtur esse secutus; quare cum aliis hunc quoque *μονόλογον* Neobules recte nobis videmur habere neque ob stare putamus, quod v. 4 Neobule alterius utitur personae forma; nam in *μονολόγοις* et nostris poetis et latinis altera persona satis est usitata. Ex qua carminis origine factum esse credimus, quod graecos mores (cf. v. 2 *mala vino lavere*, id quod abhorret ab Romana severitate) et Romana loca mixta habeamus. Neobules autem et Liparaei nomina, ut Carm. I, 11 Leuconoes, metri ratione habita ficta sunt. Tempus definiri nequit.

amori dare ludum] Sic Cic. pro

Coelio 12: „Datur concessu omnium huic aliquis ludus aetati.“ — *patruae*] patruus patre durior et severior, inde in proverbium patruorum severitas abiit; cf. Sat. II, 3, 88. Cic. pro Coel. 11: „Qui in reliqua vita miles esset, fuit in hac causa pertristis quidam patruus, censor, magister.“ — *lavere*] vide ad Carm. II, 3, 18. — *operosae*] graece *ἐργάνη*, quia praeest muliebribus operibus. — *Liparaei Hebri*] Bene notatum est, fictis etiam nominibus ad certam aliquam personam lectoris menti demonstrandam patriae nomina addi solere. — *eques*] vide ad Carm. III, 7, 25. — *Bellerophonte*] Ultima syllaba producit a graeca forma *Βελλεροφόντης*. — *catus*] vide ad Carm. I, 10, 3. — *arto*] Sic in bonis codd.; praeferenda lectio et quia *arto* facilius abiit in *alto* scribarum vel incuria vel insectia, et quia *artum* i. e. spissum contrarium est praecedentis v. *apertum*. — cf. Hom. Od. 19, 439. — *excipere*] ut *δέχεσθαι* venatorum proprium est. Senec. de Provid. 5: „nobis interdum voluptati est, si adolescens constantis animi feram venabulo exceptit.“

CARMEN XIII.

O fons Bandusiae, splendidior vitro,
 Dulci digne mero, non sine floribus
 Cras donaberis haedo,
 Cui frons turgida cornibus

5 Primis et venerem et proelia destinat;
 Frustra: nam gelidos inficiet tibi
 Rubro sanguine rivos.
 Lascivi suboles gregis.

Te flagrantis atrox hora Caniculae

Carmen XIII.

Bandusinum fontem aliquem VI milia passuum a Venusia situm fuisse cum pateat ex mediae aetatis (anni 1103) documentis, exstiterunt qui hoc carmen ab Horatio iter cum Maecenate in inferiorem Italiam faciente natalemque agrum revisente scriptum esse putarent. In qua tamen re haec oritur quaestio, num probabile videatur, Horatium puerum fontem a Venusia tanto spatio remotum tantopere adamasse, ut cum multis annis post Venusiae paucos certe dies moraretur, eum tum quoque quaereret proprioque carmine celebraret. Quod quidem ego non dubito negare. Deinde sacrificium quod promittitur ut alienum videtur ab homine iter faciente, ita cum frigore, cum pecore, cum bove et aratro ostendit Horatium non peregrinantem sed domi suae habitantem, non in alieno sed in suo agro viventem suisque rebus gaudentem. Quare sic sentio, in Sabino suo Horatium fontem Bandusinum cecinisse ibique vel eiusdem nominis fontem invenisse vel nomen a primis annis in deliciis habitum fonticulo cuidam, fortasse Digentiae, memoriae causa indidisse. Huic igitur Sabino fonti, cuius amoenitatibus saepe delectabatur, Horatius sacrificium insequenti die mactandum atque aeternam nominis nobilitatem promittit. Videntur igitur haec scripta esse die ante Fontanalia, quae erant Fontibus dicata III. Id. Octobr.,

quo die et coronae in fontes coniici et putei coronari solebant. Nam quod tertia stropha *aestas* indicatur ac describitur, id nihil impedit, quominus auctumno carmen scriptum putemus. Aestate maxime sentitur, quam gratus sit fons ille frigidus; inde igitur eius quasi virtus sumitur.

V. 1. *vitro*] cf. Carm. IV, 2, 3. Virg. Aen. VII, 759. Insequenti versu duae res significantur, vini libatio et florum sparsio; neque dicit Horatius fontis aquam dignam esse quae in poculis mero admisceatur floribusque coronetur. — *frons turg. corn.*] in qua prima cornua turgescere incipiunt. Ceterum noli mirari, cur longius immoratus sit poeta in describenda haedi natura; grata est enim in componendis eiusmodi imaginibus Horatii quaedam ubertas, cuius alia et simillima sunt exempla Carm. III, 22, 7. IV, 2, 55 sqq. — *Frustra*] Noli coniungere hoc adverbium cum praecedente verbo *destinat*; omnem huic vim cum sua quadam solitudine eriperes. Simillimus locus est Carm. III, 7, 21; Sat. II, 7, 115. — *gelidos rivos*] Quod gelida est aqua, fonti laudi est; deinde *ruber sanguis* quia calidus est contra gelidam aquam consulto ponitur. — *atrox*] ferventissima; similiter Carm. III, 29, 18 *Procyon furit* et *Leo vesanus* dicitur. — *nobilium fontium*] Vere est genitivus partitivus. — *ilicem*] Ilex haud dubie collective posita est; antrumi enim ex quo prosilire fons dicitur ilicibus te-

10 Nescit tangere, tu frigus amabile

Fessis vomere tauris

Praebes et pecori vago.

Fies nobilium tu quoque fontium,

Me dicente cavis impositam ilicem

15 Saxis, unde loquaces

Lymphae desiliunt tuae.

CARMEN XIV.

Herculis ritu modo dictus, o plebs,

Morte venalem petiisse laurum

Caesar Hispana repetit penates

Victor ab ora.

5 Unico gaudens mulier marito

ctum et a radiis solis defensum est. — *Lymphae*] Alia est lectio *Nymphae*, sed prava, nam „a poetis *lympas* dici, cum aquam ipsam vel humorem et undam intelligant, *nympham* vero, cum vel omnino fontem vel eius praesidem deam velint, aquae naturam non respicientes“ docet Hand. ad Gronovii Diatr. in Stat. T. I. p. 179.

Carmen XIV.

Augustus, qui iam ab anno 727 Roma abfuerat, cum bello Cantabrico a. 729 suscepto et praeter opinionem celeriter confecto tandem a. 730 Tarracone, ubi morbo retentus erat, in urbem redire diceretur, magna omnium qui pacem et securitatem amarent gaudio expectatus et exceptus est. Quo laeto die quid sentiret optaretque hoc carmine Horatius quoque expressit. Simile igitur hoc est secundo carmini libri IV. Nam hoc verissimum est, quidquid alii contra dicunt, scripta haec aut vere esse aut fingi ipso quo Augustus rediret die; sic persuadent et sacrificium, ad quod faciendum vocat poeta v. 6, et versus 11 sq., 13 sq., imprimis v. 17 sqq. Grave initium est *Herculis ritu*, quod quidem

ut profectum est ex comparatione Hispanicae expeditionis, ita eam laudem prodit, quam ad exemplum Herculis ex restituto per totum orbem recto rerum ordine Augustus sibi paravit. Pacato igitur omni imperio cum ad suos militibus redire iam liceret, mulieres imprimis ad festum diem redeuntis Augusti celebrandum evocantur, praesertim cum moribus civium correctis recuperatam dignitatem ipsae imprimis Augusto deberent. Sic per communem omnium laetitiā Horatius ad suam pergit, sed interposita quarta strophā, quae sive numerum stropharum respicit sive summam sententiam quaeris media est et utramque partem coniungit.

V. 1. *modo*] Nam spe citius bellum compositum est. — *plebs*] Ne cum aliis hoc nomine offendaris, cogita Horatii aetate plebem abiecta omni contumptione quidquid Romae esset dignitatis et honorum sibi sumpsisse. Deinde nullo prorsus discrimine *plebs* et *populus* usurpantur Carm. II, 2, 18 sq. — *morte venalem*] Qui laurum petit, mortem subire paratus est. — *unico*] amato, caro, ut Carm. II, 18, 14. Sic Plautus Capt. I, 2, 47: „Tibi ille unicu'st, mihi etiam unico magis

Prodeat iustis operata divis
Et soror clari ducis et decorae
Supplice vitta

Virginum matres iuvenumque nuper
10 Sospitum. Vos, o pueri et puellae,
Iam virum expertae male ominatis
Parcite verbis.

unicus.“ Catull. 71 (73), 6: „Me unum atque unicum amicum habuit.“ — *mulier*] Livia. — *operata*] ἀορίστως pro praesente, ut Sil. Ital. II, 674: „Tartareo est operata Iovi poenasque ministrat.“ cf. Virg. Georg. I, 339. Utrumque dicitur, *operari* absolute et *operari sacris*; nam „operari est omnino rei divinae operam dare, observare ritus religiosos festi, observare ipsum diem sacrum sacrificando, precando, convivando, omnino feriando et intermisso vulgari opere.“ Dissen. ad Tibull. T. II. p. 211. Fluctuant tamen libri MSS. inter *sacris* et *divis*; quae verba ut per se aequo iure ponuntur ita adiectivo apposito *iustis* haud facile diiudicantur. *Sacra* enim recte *iusta* i. e. rite inita et curata (Liv. I, 31) appellantur, neque minus *divi iusti*, quos veteres Scholiastae bene interpretati sunt: „qui Caesari victoriam et reditum merenti dederunt.“ Ovid. Heroid. 6, 152: „*Iustus* adest votis Iuppiter ipse meis“ i. e. propitius. Tamen ut *divis* ab Horatio scriptum esse credam, et scholiastarum auctoritate adducor et quia *sacris* facile ex margine, quo interpretandae et explendae sententiae causa appositum fuit, inter Horatii verba potuit subreperere. Ea ipsa res, quod purissimae latinitatis est *operari sacris*, occasionem haud dubie praebuit, cur quod deesse videretur *sacris* margini adscriberetur. — *soror*] Octavia. — *supplice vitta*] vittae enim virgis involutae supplicantium erant. cf. Virg. Aen. VII, 237.

V. 9. *virginum*] Quae virgines appellantur (cf. Carm. II, 8, 23), uxores sunt iuvenum ex Cantabrico bello feliciter redeuntium, *sospitum*; quod adiectivum non minus de virginibus dictum est, quoniam in maritorum

salute etiam uxorum salus continetur. Iam pervenimus ad difficillimum carminis locum. Etenim haec tria quae-runtur; primum quos esse credamus *pueros et puellas*, deinde quo modo intelligenda videantur verba *virum expertae* (sic enim habent codd.; *virum expertes* e coniectura est Cuninghamii); tum cum non concordantes sint codices de verbis *male ominatis* vel *male nominatis*, utrum rectum et Horatianum habeamus quaeque sit eorum verborum vera interpretatio. Iam si Horatianos locos, in quibus pueri et puellae coniuncti vel appellantur vel memorantur, inter se comparaveris (Carm. III, 1, 4. IV, 1, 25. Sat. I, 1, 85. II, 3, 130), universam iuventutem Romanam indicari videbis, neque credendum est aliam huius loci esse rationem. Deinde cum per grammaticas rationes *expertae* participium etiam ad pueros referre liceat, ea videtur praestare interpretatio, qua *virum* Augustum esse (cf. Carm. III, 16, 14) atque insignem eius laudari virtutem suadetur. Quae virtus qualis sit intelligenda cum quae-ritur, utramque et quae foris in subiugandis hostibus et quae domi in continendis moribus restituendaque fide et securitate probata sit censemus celebrari. Atque quoniam altera quoque, domestica virtus, ab hoc loco non est aliena, eamque muliebris sexus maxime expertus est, causam nobis invenisse videmur, cur *expertae* quam *expertae* poeta maluerit scribere. Iam particula cum *parcite* verbo coniungatur necesse est. *Verbis* autem *male ominatis* *parcere* nihil est aliud nisi *linguis favere* et malis ominibus abstinere. De hiatu autem compara Carm. I, 28, 24. II, 20, 13. Epod. 5, 100. 13, 3. Sat. I, 9, 38; et ut verba *male ominatis* unam notionem, ita coa-

Hic dies vere mihi festus atras
 Eximet curas; ego nec tumultum
 15 Nec mori per vim metuam tenente
 Caesare terras.

I, pete unguentum, puer, et coronas
 Et cadum Marsi memorem duelli,
 Spartacum si qua potuit vagantem
 20 Fallere testa.

Dic et argutae properet Neerae
 Murreum nodo cohibere crinem;
 Si per invisum mora ianitorem
 Fiet, abito:

25 Lenit albescens animos capillus
 Litium et rixae cupidos protervae;

lescentia unum quasi vocabulum efficiunt; ut *male dicere*, *bene dicere* et *maledicere*, *maledictio*. Unde nihil est cur cum multis codicibus *nominatis* scribamus.

V. 13. Proponit Horatius hac stropha causas, quibus ipse quoque permotus hunc diem celebrandum sibi existimet. Tanto enim homine, quantus est Augustus, imperium tenente pax omnibus civibus et vitae securitas certa est. — *atras curas*] cf. Carm. III, 1, 40. IV, 11, 35. — *tumultum*] Cic. Philipp. VIII, 1: „Potest esse bellum sine tumultu, tumultus esse sine bello non potest. Quid est enim aliud tumultus nisi perturbatio tanta, ut maior timor oriatur? unde etiam nomen ductum est tumultus. Itaque maiores nostri tumultum Italicum, quod erat domesticus, tumultum Gallicum, quod erat Italiae finitimus, praeterea nullum nominabant. Gravius autem tumultum esse quam bellum, hinc intelligi licet, quod bello vacationes valent, tumultu non valent.“ — *per vim*] Significat intestinas turbas. cf. Carm. IV, 15, 18. — *unguentum*] vide ad Carm. II, 3, 13 sqq. — *Marsi duelli*] Egregie vetustatem vini Horatius indicat nomine infelicissimi et crudelissimi belli Italici, quo simul compara-

tionem eorum temporum cum sua pacatissima aetate in legentium animis moveat. — *duelli*] vide ad Carm. III, 5, 38. — *si qua*] si qua ratione, quo casu. Virg. Aen. I, 18. — *Spartacum*] cf. Epod. 16, 5. — *argutae*] Argutum omnino id appellatur quod sensus et animum vehementer tangit; hinc de gravibus ponitur sonis sive gratis sive ingratiss. cf. Carm. IV, 6, 25. Epist. II, 2, 90. — *properet*] cf. Carm. II, 11, 22 sq. — *murreum crinem*] h. e. murra madentem. Virg. Aen. XII, 100. Ovid. Met. III, 553. — *ianitorem*] Servi, quibus tradita erat custodia ianuae, ostiarii sive ianitores, pro sua animi natura aut in cella erant ostiaria aut catenis etiam alligati. Sic Ovid. Am. I, 6, 1:

Ianitor indignum dura religate catena,

Difficilem moto cardine pande forem.

Invisus autem ianitor iis est quos non admittit virgaque qua solebat esse armatus repellit. — *albescens*] nam fuit Horatius praecanus. Epist. I, 20, 24. — *iuventa*] vigor iuvenilis, non iuventus. Fuit autem L. Munatius Plancus cum M. Aemilio Lepido consul anni 712. — *ferrem*] non pro *tulissem*; sed thesis, condicio inest paulo tectior in

Non ego hoc ferrem calidus iuventa
 Consule Planco.

CARMEN XV.

Uxor pauperis Ibyci,
 Tandem nequitiae fige modum tuae
 Famosisque laboribus:
 Maturo propior desine funeri
 5 Inter ludere virgines
 Et stellis nebulam spargere candidis.
 Non si quid Pholoën satis
 Et te, Chlorig, decet: filia rectius
 Expugnat iuvenum domos,
 10 Pulso Thyias uti concita tympano.
 Illam cogit amor Nothi
 Lascivae similem ludere capreae:
 Te lanae prope nobilem
 Tonsae Luceriam, non citharae decent

adiectivo *calidus iuventa*: non ego hoc ferrem, si essem calidus iuventa. Insignis est huius loci brevis. Ablativum enim absolutum quem vocant *Cons. Pl.* artissime coniungas cum *iuventa* i. e. iuventa qua vigui Consule Planco.

Carmen XV.

Castigatur anus libidinosa, quae cum iuventutis ac venustatis nihil praeter nomen (Chloris) retinuerit, tamen cum proterva filia amores magis exercere studet quam lanificium, quod pauperis hominis uxorem ad sustentandum mariti laborem maxime decet. Sic intelligitur primus versus, utique componendus cum extremis versibus. Nomina patet esse ficta, etiamsi corrupti eius aetatis mores magnam haud dubie talium muliercularum copiam protulerunt. Coniuncta eadem nomina Carm. II, 5, 17 sq., sed aliam Chloridem

certe esse primo obtutu intelligitur. Pholoë etiam est I, 33, 7. Cf. Carm. I, 25. IV, 13. Quo tempore carmen compositum sit, ignoramus.

V. 3. *famosis laboribus*] Consulto ut videtur infamis quaestus *labor* appellatur, quo provocetur honestorum laborum (*lanificii*) oppositio. — *ludere*] Publ. Syrus 49: „Anus cum ludit, morti delicias facit.“ — *stellis*] Est amplificatio superioris sententiae per similitudinem et metaphoram; cuius rei multo frequentior est usus apud Tibullum et similes poetas. — *Thyias*] vide ad Carm. II, 19, 9. — *Luceriam*] Apuliae oppidum, lanae praestantia nobile. — *flos purp. rosae*] cf. Carm. IV, 10, 4. — *vetulam*] Cum indignatione dictum est: cum vetula sis. Quam olim praetuli bonorum codicum lectionem *vetula*, eam nunc relinquentem duxi. Otiosa enim esset vini vetustas, cum Chloridem nec vetustum nec recens vinum deceat.

15 Nec flos purpureus rosae
Nec poti vetulam faece tenus cadi.

CARMEN XVI.

Inclusam Danaën turris aënea
Robustaeque fores et vigilum canum
Tristes excubiae munierant satis
Nocturnis ab adulteris,

5 Si non Acrisium virginis abditae
Custodem pavidum Iuppiter et Venus

Carmen XVI.

Argumentum carminis cernitur in laude aureae mediocritatis, versu 21 simplicissime proposita; qui versus cum insequentibus, quibus quid illud de mediocritate iudicium ad ipsius Horatii res valeat exhibetur, mediam et summam sententiam et stropharum numero et sententiarum gravitate efficit. Nascitur exordium poetica potestatis auri descriptione a Danaë Acrisii filia petita; fabulam sequitur (vv. 9. 10) ipsa de auro sententia neque tamen generali quadam ratione expressa, sed duobus quibus nimia illa potestas probatur modis illustrata. Suo deinde more Horatius tria addit exempla, unum ex fabulis primorum temporum, alterum ex Graecorum rebus gestis, tertium a Romanis suae aetatis sumptum; et tertium quidem non nominibus insignitum sed indiciis satis tum accuratis quodam modo tectum (v. 15. 16). Adhuc cum ad mores et animos hominum quid divitiae valeant nondum sit expositum, quinta strophæ et quid mali secum habeat nimia auri cupiditas ostenditur et ad ipsius poetae conditionem transitus paratur. Quæ parte absoluta cum ad fastigium quasi carminis perventum est, in altera parte accipimus ingenuam et amabilem Horatii de suis studiis suæque animi temperantia confessionem. Clauditur denique carmen iterum posita generali sententia, sed nova forma et quæ cum brevitate gravitatem mire

coniungat; sic ad finem optime decurrit neque quidquam est quod demivelis aut, nisi egregie coniuncta dilacerare placeat aut mutilare, demere possis. Ceterum quod de suis rebus ita scripsit, in eo neque ingratum neque arroganter in Maecenatem animum prodidit; immo vero qualis ab amicis optime perspiciebatur, talis etiam ut ab aliis agnosceretur et hoc carmine voluit efficere et aliis de eadem re sed diversa ratione conscriptis. cf. Sat. I, 6. II, 6. Epist. I, 19. coll. I, 1. I, 7. Quando hæc composuerit Flaccus quis dicat, cum nihil ex ipso carmine invenias nisi iam accepisse eum Sabinam villam? Fuerunt tamen, qui a. 726 compositum carmen suspicarentur, ac putarent, eo tempore factum esse ut Horatius frustra ab Octaviano in regiam ad scribendas epistolas vocaretur. Quæ suspitione nihil potest esse magis incertum.

V. 1. Acrisius Argivorum rex cum oraculum accepisset interfectum se iri a puero, quem Danaë filia peperisset, filiam ne omnino pareret in aeneam turrim inclusit. Sed Iuppiter in auream pluviam mutatus ad virginem pervenit. Ovid. Met. IV, 611. Hom. II. XIV, 319 sqq. Quam fabulam quomodo interpretatus sit Horatius, ut aurum ad pessima quæque aditum parere ostenderet, manifestum est. — *munierant*] De indicativo modo cf. Carm. II, 17, 27. — *Munire*] verbum poetica quadam libertate cum *ab* part. coniungi-

Risissent: fore enim tutum iter et patens
 Converso in pretium deo.

Aurum per medios ire satellites
 10 Et perrumpere amat saxa potentius
 Ictu fulmineo: concidit auguris
 Argivi domus ob lucrum

Demersa exitio; diffidit urbium
 Portas vir Macedo et subruit aemulos
 15 Reges muneribus; munera navium
 Saevos illaqueant duces.

Crescentem sequitur cura pecuniam
 Maiorumque fames. Iure perhorruī
 Late conspicuum tollere verticem,
 20 Maecenas, equitum decus.

Quanto quisque sibi plura negaverit,
 Ab dis plura feret: nil cupientium

tur, quia quod munitur simul ab inimico aliquo impetu defenditur. — *fore*] Potuit infinitivus poni, quia in *ridendi* verbi notione inest simul altera dicendi sciendique. — *pretium*] Hoc vocabulum quamvis aurum significet, non abiecit suam naturam; fuit enim aurum pretium etiam, quo corruptis custodibus deus admissus est. — *satellites*] tyrannorum. — *perrumpere saxa*] saxis nihil durius est, fulmine nihil violentius. Quanta igitur auri vis, si utrumque superat! — *potentius*] Positivus est Art. poet. 40, serioribus scriptoribus usitator. — *amat*] vide ad Carm. II, 3, 10. — *auguris*] Amphiarī, qui cum fatum quod sibi instaret, si cum Polydice Thebas aggrediretur, bene sciret atque iturum se constanter negaret, tandem Eriphylae a Polydice aureo monili corruptae precibus et adhortationibus cessit in mortemque abiit. cf. Hom. Od. XI, 325. Filius Alcmaeon patrem ulturns matrem occidit, ipse ob idem monile a fratribus uxoris necatus est.

V. 13. *diffidit*] Egrege hoc de nimia auri potentia. Sic Cicero de di-

vin. I, 13 *saxo diffisso*. — *vir Macedo*] Philippus, Alexandri pater, de quo Cicero ad Att. I, 16: „Omnia castella expugnari posse dicebat, in quae modo asellus auro onustus posset ascendere.“ — *subruit*] Proprie de arboribus, quarum radices, et de muris, quorum fundamenta cuniculo subruuntur; sic eximia h. l. oritur imago regum firmiter stare se credentium, clam vero subrutorum. — *munera*] conduplicatio ad variam vim auri ostendendam aptissima figura. — *navium duces*] Menodorus s. Menas Cn. Pompeii libertus, S. Pompeii dux classis, auro captus ad Octavianum descivit, dein hoc relicto ad Pompeium rediit, tum iterum corruptus ad alterum defecit. — *cura*] ne perdamur; *fames*, ut augeantur divitiae. — *perhorruī*] vide ad Carm. I, 1, 8. — *equitum decus*] Recte ii videbant qui quaesitam hanc compellationem dicebant. Etiam Maecenas poterat esse maior quam volebat cf. ad I, 1, 1.

V. 21. *plura*] Sententia plana: summas esse in continentia animi divitias. Sed vide artificiosam *plura* vocabuli

Nudus castra peto et transfuga divitum
Partes linquere gestio,

25 Contemptae dominus splendidior rei
Quam si quidquid arat impiger Apulus
Occultare meis dicerer horreis
Magnas inter opes inops.

Purae rivus aquae silvaeque iugerum
30 Paucorum et segetis certa fides meae
Fulgentem imperio fertilis Africae
Fallit sorte beator.

Quamquam nec Calabriae mella ferunt apes,
Nec Laestrygonia Bacchus in amphora
35 Languescit mihi nec pingua Gallicis
Crescunt vellera pascuis,
Importuna tamen pauperies abest,

positionem, bis arsim choriambi tenentis maximeque animum tangentis. — *nudus castra*] Castrorum imago non rara de sectis philosophorum; cui imagini *nudus* voc. bene accommodatum est; quippe nihil se armorum, i. e. artium quibus parentur opes, secum se ferre ait. Etiam in amplificatione *et transfuga gestio* metaphora continuatur. — *splendidior*] Saepe sic adiectivum a Romanis participio verbi *esse* carentibus participii instar usurpatur. Graeci addunt ὄν. — *contemptae*] nimirum ab aliis. — *arat*] cf. ad Carm. III, 5, 17. Alii versui supervacaneam medelam adhibentes scripserunt *non piger* pro *impiger*. — *inter opes inops*] Splendida haec sententia ne quid amittat gravitatis unius versus spatium non egreditur. Similis verborum oppositio frequentissima, ut Cic. Tusc. III, 19, 44. — *horreis*] cf. Carm. I, 1, 9.

V. 29. *certa fides*] Hoc non ita dixit, tanquam sui agri semper certa esset fides, verum inest hypothetica potius sententia: „si agellus non premiatur sterilitate.“ Ceterum cf. Carm. III, 1, 30. Reliqua pars huius strophae multis ac variis interpretationibus tentata est. Simplicissima tamen verissima. *Sors* enim ea est, quam mo-

dica bona, qualia modo sunt descripta, solent praebere; cuius quidem significationis apud Horatium ubique inveniuntur exempla. Neque alterum, in quo haerebant, insolens est: *fallit beator fulgentem*; *fallere* enim verbum cum participio non minus recte coniungi quam graecum λανθάνειν, intelligitur ex Epist. I, 17, 10; participii autem loco *beator* est, ut supra *splendidior*; accusativum deinde ab eodem verbo cum participio coniuncto non esse alienum Virgilianus locus demonstrat Aen. VII, 350 sq. cf. Liv. VIII, 20, 5. Stat. Silv. I, 2, 10 „et medias fallit permixta sorores.“ Iam cum *beatum* id quoque sit quod beat, felices reddit homines (cf. Epist. I, 10, 14. Carm. I, 29, 1. II, 6, 21), hanc habebis sententiam: „agellus meus sorte quam praebet beatorem me reddit, quam capere potest is qui maxima habet et fertilissima latifundia.“

V. 33. *Calabrae*] De praestantia Calabri mellis vide Carm. II, 6, 14. — *Laestrygonia*] Adiectivum quo vinum significatur, ad vas, in quo inest, translatum, ut Carm. I, 9, 7. Nam intelligendum vinum Formianum, quod est inter nobilissima (Carm. I, 20, 11); etenim ad Formias olim Laestrygonas habitasse ferebantur, de quibus Hom.

Nec, si plura velim, tu dare deneges.

Contracto melius parva cupidine

40 Vectigalia porrigam,

Quam si Mygdoniis regnum Alyattei

Campis continuem. Multa petentibus

Desunt multa: bene est cui deus obtulit

Parca quod satis est manu.

CARMEN XVII.

Aeli vetusto nobilis ab Lamo,

Quando et priores hinc Lamias ferunt

Od. X, 82. Ovid. Met. XIV, 233. Cic. Att. II, 13: „Si vero in hanc *τηλέπυλον* veneris *Δαιστρυγονίην* — *Formias* dico etc.“ — *Gallicis*] nam in cisalpina Gallia optima tum erant oves. — *cupidine*] vide ad Carm. II, 16, 15. cf. Stob. S. 39: „*Επίκουρος* ἐρωτηθεὶς, πῶς ἂν τις πλουτίσειεν, οὐ τοῖς οὐσι προστιθείς, ἔφη, τῆς δὲ χρείας τὰ πολλὰ περικείμενων.“ — *vectigalia*] primum publici erant reditus, deinde etiam privati; sic h. l. et Sat. II, 2, 100. Cic. de off. II, 25. — *porrigam*] extendam. Cf. Senec. Ep. 89: „quousque fines possessionum propagabitis? quousque arationes vestras *porrigetis*?“ — *Mygdoniis*] vide ad Carm. II, 12, 22. — *Alyattei*] De hac genitivi forma nominis *Alyattes* cf. Carm. I, 6, 7. Fuit autem Alyattes Croesi pater. — *bene est*] cf. Sat. II, 2, 106. Epist. I, 1, 89. Alpheus in Anthol. Pal. II, p. 39: „Οὐ στέργω βαθυλήτους ἀρούρας, Οὐκ ὄλβον πολυχρυσόν, οἷα Γύγης. Αὐτάχρους ἔραμαι βίον, Μανρῖνε. Τὸ μὴ θ' ἐν γὰρ ἄγαν ἄγαν με τέρεται.“

Carmen XVII.

Parvum hoc carmen ne prave aestimetur, considerandum est totum esse iocose scriptum neque videri Horatium quod schedulae ad amicum missae olim inscripsisset aliam ob causam libris edendis inseruisse, nisi ut Lamiae amicitiae pignus alterum etiam

consecraret. Nam ut ii non recte videntur iudicasse qui Horatio indignum hoc putarent eique abrogare conarentur, sic cavendum est ne iusto maior huic carmini honor tribuatur. Misit enim, ut videtur, Horatius hanc schedulam Lamiae ob natalem altero die celebrandum gratulaturus. Quod ut amice et cum quadam protervitate faceret, pleno ore et magnifice exorditur, laudat magnopere nobilitatem eius et genus atque ita se gerit, ut nihil nisi gravissima vota subsequi posses putes. Iam quid sequitur? Levicula ad tristiores (vide ad I, 26) amicum admonitio, ut cum timendum sit ne crastinus dies tristi coelo obscuretur, quantum possit festum cum famulis domi celebret, tempestatem vitet, eum curet. En carmen, quod si non grave et sublime, si multiplici artificio non limatum, si orationis luminibus non exornatum est, tamen non caret venustate et gratia. Neque sunt ii probandi qui versus 2—4 eiiciendos censebant; nam et quae in iis menda vel vitia inesse dicuntur, iusta interpretatione recta videbuntur neque perturbanda est haud fortuita carminis aequalitas.

V. 1. *vetusto*] Quam vani olim fuerint Romani in investiganda et arroganda antiqua gentis origine, ostenditur etiam Ciceronum exemplo, qui Plutarcho (vit. Cicer. I) teste genus duxerunt a Tullo Attio, quem *βασιλεύσαντα* dicit *ἐν Οὐολούσκοις*, Aurelio

Denominates et nepotum

Per memores genus omne fastos,

5 Auctore ab illo ducis originem,

Qui Formiarum moenia dicitur

Princeps et innantem Maricae

Littoribus tenuisse Lirim

Late tyrannus: cras foliis nemus

10 Multis et alga littus inutili

Demissa tempestas ab Euro

Sternet, aquae nisi fallit augur

Annosa cornix. Dum potes, aridum

Compone lignum; cras Genium mero

15 Curabis et porco bimestri

Cum famulis operum solutis.

Victore (c. 81) auctore a Tito Tatío rege. Ipse M. Cicero iocose, ut videtur, Tusc. I, 16, 38: „meo regnante gentili“ i. e. Servio Tullio. Neque credendum est, Lamiam ipsum gentem ad fabulosum regem Laestrygonum, Neptuni filium, voluisse ducere; intelligamus potius innocentem Horatii familiariumque iocum. — *quando*] quoniam. Sat. II, 5, 9. II, 7, 5. Deinde *priores* Lamiae i. e. pristini, primi opponuntur eorum nepotibus usque ad eos qui tunc vivebant. — *memores fastos*] Carm. IV, 14, 4. Sunt autem annales libri aut quos Lamiae vere continuarunt aut iocose ficti. — *auctore ab illo*] Sic revertitur ad primum versum copulaturque interrupta sententia; quare omnium codicum scriptura *ducis* cur cedere debeat Heinsii coniecturae *ducit*, non liquet. — *Maricae*] deae littoris Minturnensium. Luc. Phars. I, 423: „et umbrosae Liris per regna Maricae.“ Claudian. in Prob. et Olybr. cons. 259: „flavaeque terens querceta Maricae Liris.“ — *late tyrannus*] Superlatio iocosa. De adverbii cum substantivo coniunctione cf. Carm. IV, 6, 3. Virg. Aen. I, 21. Ovid. Her. 17, 57: „Phrygiae late primordia gentis.“

V. 9. *nemus*] non arbores, sed solum nemoris. cf. Carm. III, 18, 14. — *alga inutili*] Epitheton positum ex more antiquo non ad loci sed ad rei naturam accommodatum. cf. Sat. II, 5, 8. — *aquae*] pluviae, vide ad Carm. III, 10, 19. — *Genium curabis*] Dicebant antiqui cutem curare, corpus curare; iam cum Genio immolaretur die festo natali simulque corpus lautis epulis curaretur, lepide ausus est Horatius Genium curare (cf. Sat. II, 5, 38. Epist. I, 4, 15. Liv. hist. XXXVI, 18, 1), id quod potuit facilius, cum *genio indulgere*, quod fuit usitatum, non differat a corporis curatione. cf. A. P. 210. Qua ratione qui verba intellexerit, is profecto non perturbabitur religione veterum natali die a caede ac sanguine manum abstinendi. Qui Genio porcum non mactabant, sibi tamen non dubitarunt. cf. Tibull. I, 7, 49: „genium ludo geniumque choreis Concelebra.“ — *operum solutis*] De genitivo cf. *iniuriarum absolvere*, *timoris absolvere*, similia; sic ipse Cicero pro Sext. c. 7 *legum solvere* (coll. Hor. Sat. II, 6, 68) Plant. Rud. I, 4, 27 „ut me omnium iam laborum levas.“

CARMEN XVIII.

Faune, Nympharum fugientum amator,
 Per meos fines et aprica rura
 Lenis incedas abeasque parvis
 Aequus alumnis,

5 Si tener pleno cadit haedus anno,
 Larga nec desunt Veneris sodali
 Vina craterae, vetus ara multo
 Fumat odore.

Ludit herboso pecus omne campo,
 10 Cum tibi Nonae redeunt Decembres;
 Festus in pratis vacat otioso
 Cum bove pagus;

Inter audaces lupus errat agnos;
 Spargit agrestes tibi silva frondes;
 15 Gaudet invisam pepulisse fossor
 Ter pede terram.

Carmen XVIII.

Faunum, in cuius tutela erant pecora (vide Carm. I, 17), precatur ut vitulis, haedis, agris huius anni propitius esse velit. Faunalia bis per annum, Idibus Februar. et Non. Decembribus, celebrabantur. Incertum est, quo anno carmen scriptum sit; sed in Sabina villa compositum esse et per aetatem, patet. cfr. Ovid. Fast. II, 193 „Idibus (Febr.) agrestis fumant altaria Fauni.“

lenis] propitius. — *alumnis*] de vitulis, non de vernis. cf. Carm. III, 23, 7. — *si*] cf. Carm. I, 32, 1. — *pleno anno*] ad finem vergente. — *cadit*] Etiam *cadet* in codice; qui sic scripsit, erravit sed locum recte in-

tellexit, nam celeritate mentis quae futura sunt praesentia esse videntur. — *craterae*] Duplex est forma: crater, cratera. cf. Sat. II, 4, 80. — *vetus ara*] In vetustate dignitas est. — *herboso campo*] Sub miti Italiae coelo tum etiam virent campi. — *audaces*] dei praesentia agni tuti sunt atque audaces, lupus contra mitis atque innocens. Sic augetur perfectae tranquillitatis descriptio. — *fossor*] agricola, imprimis vinitor, quem Acro intellexit. cf. Virg. Georg. II, 264. — *pepulisse*] ἀποτίσας; vide ad I, 1, 4. — *ter*] Ternarius numerus referendus ad saltationis rhythmum anapaesticum. Ovid. A. A. I, 112 „aequatam ter pede pulsat humum.“ infr. IV, 1, 28. —

CARMEN XIX.

Quantum distet ab Inacho

Codrus pro patria non timidus mori

Narras et genus Aeaci

Et pugnata sacro bella sub Ilio;

5 Quo Chium pretio cadum

Mercemur, quis aquam temperet ignibus,

Quo praebente domum et quota

Pelignis caream frigoribus taces.

Da lunae propere novae,

10 Da noctis mediae, da, puer, auguris

Murenæ: tribus aut novem

Miscentur cyathis pocula commodis.

Carmen XIX.

Egregium hoc carmen, cuius virtutes non ab omnibus satis sunt perspectae, simile est Carm. I, 9. Scenam enim, qua provocatum quasi carmen fingatur, hanc esse credimus. Frigido, tristi et hiemali vespere Horatius inter complures amicos nescio ubi sedet; confabulantur, bibunt; tamen et confabulatio et potatio non minore permittitur quam quo aura contrahitur frigore. Languor ad summum iam fastigium elatus est ieiuna historicarum et mythologicarum rerum enumeratione, qua unus reliquos paene videtur enecare. Tum Horatius internis et externis frigoribus cruciatus, animum ut effundat in hoc carmen quasi erumpit, quo iustum convivium parari iubet symbolis; nam calorem desiderat et vigorem. Sic nisi fallor omnes carminis partes placide conveniunt; primum qui loquitur interrumpitur et vituperatur, cum prisco Inacho eum Codro et Troianis misso rectius indicet, qua ratione tempestatis tristitia graeci vini calore mitigetur etc.; deinde excitantur amici, ut velocius bibant, cuius rei exemplar praeit poeta uno quasi spiritu ter ut sibi vinum infundatur poscens (v. 9. 10), tandem in furorem se agens (v. 18). Vocantur tibiae et lyra, iubentur rosae, evocatur clamor, arcessuntur amicae. Si Murena, qui commemoratur, is est,

qui cum Fannio Caepione conspiravit in Augustum, manifestum est scriptum esse carmen ante a. 732. Si quid tamen licet in hac re divinare, propter juvenilem carminis ardorem iis potius accedo, qui ante a. 723 scriptum suspicantur, quam qui compositionis tempus in a. 729 vel 730 differunt. Auguratus certe Murenæ impedimento non est, quoniam ea aetate etiam iuvenes ad hoc sacerdotium perveniebant.

V. 5. *Chium*] Nobilissima graeca sive transmarina vina haec erant: Thasium, Chium, Lesbium, Sicyonium, Cyprium, Clazomenium. — *aquam temperet ignibus*] h. e. quis balneum calidum parabit? eo enim ante coenam antiqui utebantur. Intelligenda est symbola, in qua alius aliam partem coenae et comissionis praebebat. — *Pelignis*] Peligni in montibus habitabant. Est igitur frigus, quale apud Pelignos esse solet. — *lunae novae*] Fuerunt igitur Kalendae. De genitivo vide ad Carm. III, 8, 13. — *noctis mediae*] quia in mediam noctem convivium vult produci. — *auguris Murenæ*] De Murena vide ad Carm. II, 2, 5 et ad Carm. II, 10. Qui cum eo tempore augur factus et inter convivas esset, non alienum fuit bibere in eius honorem. — *commodis*] plenius, integris; ut Plaut. Asin. III, 3, 134: „Quid ego aliud exoptem am-

- Qui Musas amat impares,
 Ternos ter cyathos attonitus petet
 15 Vates; tres prohibet supra
 Rixarum metuens tangere Gratia
 Nudis iuncta sororibus.
 Insanire iuvat: cur Berecynthiae
 Cessant flamina tibiae?
 20 Cur pendet tacita fistula cum lyra?
 Parcentes ego dexteras
 Odi: sparge rosas; audiat invidus
 Dementem strepitum Lycus
 Et vicina seni non habilis Lyco.
 25 Spissa te nitidum coma,
 Puro te similem, Telephe, Vespero
 Tempestiva petit Rhode;
 Me lentus Glycerae torret amor meae.

CARMEN XX.

Non vides quanto moveas periclo,
 Pyrrhe, Gaetulae catulos leaenae?

plus nisi illud, cuius inopia est? Vingtis argenti commodas minas." id Rud. V, 2, 31: „Talentum argenti commodum magnum inerat in crumena." Duodecim autem cyathi efficiebant sextarium. — *tribus aut novem*] Numeri quid velint ex quattuor insequentibus versibus invenies, per ordinem Chiasmi cum hoc loco coniunctis. Dicit enim hoc: aut novem cyathis vini tres addantur aquae, quae mixtura poetis grata et ipsi Horatio —, aut tribus vini novem aquae, quae ratio decentioribus potoribus gratior erit. Coniunge igitur *supra tres*; vide ad Carm. III, 3, 11. — *insanire iuvat*] cf. Carm. II, 7, 28. IV, 12, 28. — *Berecynthiae*] vide ad Carm. I, 18, 13. et cf. IV, 1, 22 sqq. De tibia compara Aristot. Polit. I, 8, 6: „ὅν ἐστιν ὁ αὐλὸς ἡθικὸν ἀλλὰ μᾶλλον ὀργαστικόν." — *rosas*] hibernas, quae in

Italia facillime arte coli poterant. — cf. Plin. N. H. XXI, 4 „(rosa) Karthagine Hispaniae hieme tota praecox." — *non habilis*] propter diversam aetatem. *Lyci* nomen bis positum est contumeliae causa, ut Carm. IV, 13, 1. 2. Non minus bene vv. 25. 26 *te* pronomen in eadem arsi bis collocatum et ponitur contra insequens *me* et quas virtutes Telephus habeat clarius indicat. Nam in spissis capillis merito magna pars pulchritudinis cernebatur. — *tempestiva*] cf. Carm. I, 23, 12. — *lentus*] ut Carm. I, 13, 8, i. e. amor qui lente absumit; in torrendo enim ignis notio est. — De Glycera cfr. I, 19.

Carmen XX.

Cum Nearchus, puer delicatus, eodem tempore et a Pyrrho iuvene et a puella peteretur, ipse autem neutrius

Dura post paulo fugies inaudax
Proelia raptor,

5 Cum per obstantes iuvenum catervas
Ibit insignem repetens Nearchum:
Grande certamen, tibi praeda cedat,
Maior an illa.

Interim, dum tu celeres sagittas
10 Promis, haec dentes acuit timendos,
Arbiter pugnae posuisse nudo

amori se dederet, Horatius eam rem per se iocosam et rivalium inanibus amoris excitandi contentionibus ridiculam derisui ut praeberet aequalibus, severo vultu, gravibus verbis, magnificis comparationibus, omni denique orationis apparatu auctam et amplificatam enarravit. Haec unice vera interpretandi carminis ratio videtur, quae cum nondum esset intellecta, non est mirum quod exstitit vir doctus, qui obscurum carmen et Horatio vix dignum haberet. Oeconomia simplex, ordo clarus, rerum verborumve certamen nullum.

V. 1. *periculo*] vide ad Carm. II, 2, 2. — *Gaetulae*] vide ad Carm. I, 23, 10. Plana erit sententia considerantibus, quam saepe Horatius comparandam rem cum re quacum comparatur ita confundat, ut singulae partes in unum quasi corpus coalescant. Tertium quod vocant comparationis cernitur in ira, qua ut leaena catulos sic puella Nearchum abductum repetere dicitur. In vv. 3. 4 noli negligere artificiosam vocabulorum dispositionem, qua libera antiquarum linguarum natura duplicem simul antithesin potuit efficere; *dura* — *inaudax*, *inaudax* — *raptor*, quae altera oxymori grata imagine etiam augetur. De v. *inaudax* vide ad Carm. I, 5, 8. Huc accedit, quod communi bonorum scriptorum usu tabulam inchoatam in singulas etiam partes persequitur; inde iuvenum (venatorum) catervae, inde postea sagittae et dentes. Dentes acuerе aprorum magis est quam leonum (Hom. II. XI,

416); quamquam ne haec quidem translatio exemplo caret. — *insignem*] pulchritudine eminentem. — *grande certamen*] Hi duo versus non Nearchum sed totam sententiam praecedentem explicant; hoc enim liberiore appositionis genere saepe utuntur latini scriptores; quod genus ut perspiciant discipuli videantque quomodo inter se differant non rara exempla, hos addo locos: Cic. Tusc. I, 26. 43. Liv. XXI, 5. Virg. Aen. VI, 223. VIII, 683. Hor. epist. I, 18, 49. Sat. I, 4, 110. *Praeda* ipse Nearchus; cf. Ovid. Am. I, 2, 19 „tua sum nova praeda, Cupido.“ — *illa*] Sic nunc ex emendatione Peerlkampi et Hauptii contra omnes codices scribere ausus sum. Nam ex eo, quod in MSS. reperitur *illi* nemo tolerabilem sententiam adhuc elicit. cf. Ep. I, 10, 35.

V. 11. *arbiter pugnae*] cf. Ovid. Heroid. 9, 12 „sub pede colla tenet.“ Propert. I, 1, 4 „Et caput impositis pressit Amor pedibus.“ Est Nearchus, qui plane incuriosus certaminis adstat. Haec autem pueri negligentia et superbia lepida quadam gravitate descripta egregiam oculis proponit tabulam pictore non indignam. Etenim *palmam sub pede ponere* superbi est, cum victoria etiam certantes contemnentis, *humerum vento recreare* negligentis, aliud agentis. Fingendus autem puer est nudus; id quod praeter nudum pedem etiam humerus demonstrat. Nuditas autem index pulchritudinis et ex palaestra petita, unde scena sumpta videtur. — *Fertur*] Oblique et su-

Sub pede palmam

Fertur et leni recreare vento

Sparsum odoratis humerum capillis,

15 Qualis aut Nireus fuit aut aquosa

Raptus ab Ida.

CARMEN XXI.

O nata mecum consule Manlio,

Seu tu querelas sive geris iocos

Seu rixam et insanos amores

Seu facilem, pia testa, somnum,

5 Quocunque lectum nomine Massicum

perbe hoc in Pyrrham: dum vos pugnam paratis, is dicitur quantopere vos despiciat manifesto indicio aperuisse. — *Nireus*] Epod. 15, 22. Hom. Il. II, 673. — *raptus ab Ida*] Ganymedes. — *aquosa*] Ex Homero sumptum epitheton: *πιδήεσσα, πολυπίδαξ*.

Carmen XXI.

Cum M. Valerius Messalla Corvinus (natus a. u. c. 685, mortuus 757) non minore pacis quam belli laude insignis Horatio ad coenam se venturum olim promississet, optimum sibi quod in fumario servaretur vinum promendum esse hic vidit. Quod dum facit, animi sui sensus ita prodit, ut ad ipsum vinum conversus primum aperiat, quanti Mesallam habeat, deinde vini beneficam vim omnibus hominum et temporibus et condicionibus conspicuam celebret, denique ad coenam quam est insititurus reversus generosis amphorae donis quamdiu possint fructuros se esse polliceatur. Idem prope argumentum subiectum est Epistolae quintae libri I, quae partim ad illustrandas huius carminis nonnullas sententias partim ad discrimen quod intercedit inter lyricum genus et epistolam perspicendum ab legentibus velim comparetur. Neque alienum est carmen

I, 18. Scena ea est, ut poetam non domi sedentem ac meditantem, sed in ipso amicorum conventu subito ad canendum incitatum videas; eam enim Horatius prae se fert speciem et ostendit versu 7 *Corvino iubente*; quae verba ut coenam iam paratam, praesentes convivas, Messallam etiam fortasse *συμποσίαρχον* meliora vina clamantem audiamus haud dubia vi cogunt.

V. 1. Ne vetustatem vini admireris cf. Petron. Sat. 34: „statim allatae sunt amphorae vitreae diligenter gypsatae, quarum in cervicibus pittacia erant affixa cum hoc titulo FALER-
NVM OPIMIANVM ANNORVM CENTVM.“ — *Seu tu*] Ex diversis haec sumpta sunt bibentium ingeniis et moribus; in aliis alia vis vini est; ipsum autem vinum innocens est et pium. Sic *pia testa* vocativus non est separandus a praecedentibus sententiis *seu* — *sive*; cum quibus ita coniungendus est, ut Carm. II, 2, 2 cum particula *nisi*; ubi vide quae comparaverim. Ad v. 1 cf. Epod. 13, 6. Tibull. II, 1, 27: „Nunc mihi fumosos *veteris* proferte Falernos *Consulis* et Chio solvite vincla cado.“ Et cf. Eueni eleg. 2 (Schneidewin. del. p. 134): „*Βάγχον μέτρον ἄριστον ὃ μὴ πολὺ μὴδ' ἐλάχιστον*“ Ἔστι γὰρ ἡ λύπης αἴτιος ἡ μανίης.“ — *quocunque lectum nomine*]

Servas, moveri digna bono die,

Descende Corvino iubente

Promere languidiora vina.

Non ille, quamquam Socraticis madet

10 Sermonibus, te negliget horridus:

Narratur et prisci Catonis

Saepe mero caluisse virtus.

Tu lene tormentum ingenio admoves

Plerumque duro; tu sapientium

15 Curas et arcanum iocoso

Consilium retegis Lyaeo;

Tu spem reducis mentibus anxiis

Viresque et addis cornua pauperi

Post te neque iratos trementi

20 Regum apices neque militum arma.

Léguntur uvae; igitur etiam vinum legitur. Fingit autem Horatius, vinum iam cum legeretur, quippe quod videretur generosum esse, a vineae domino ad certum quendam finem et usum olim esse destinatum. Attamen quamquam optimum est Massicum, non poterit meliore die promi aut digniori homini apponi, quam hoc die, quo Messallae apponetur. — *Descende*] ex fumario. Cum hoc imperativo coniunge *promere*, non cum *iubente*. — *languidiora*] cf. Carm. III, 16, 34 sq. — *madet*] imbutus est. Verum egregie significatur vinum ipsum, quo qui satis biberunt madere dicuntur; ut prope iocose dictum sit: „quamquam philosophia madet, vino tamen non minus niadebit.“ — *prisci Catonis*] cf. Epist. II, 2, 117. Sat. II, 1, 72. Cato autem Censorinus est, non Uticensis; Senec. de Tranquill. I, 15 „Cato vino laxabat animum curis publicis fatigatum.“

V. 12. *lene tormentum*] Elegans oxymorum, ut Bacchyl. fragm. 26 *γλυκὴν ἀνάγκην*; huius enim tormenti vis, quamquam ne sentitur quidem, tanta est, ut dura plerumque ingenia mitescant. Nam de vena poetica aut ingenio oratoris non bene alii cogitarunt. — *Curas*] Sapientium curae quae de-

beant intelligi, ipse Horatius additis verbis *arcanum consilium* per amplificationem explanat. *Sapientes* enim non sunt philosophi, sed quicumque contracta fronte ac severo vultu gravia semper alere videntur consilia; quae ne imprudenter prodant anxii student cavere. Quorum quidem severitati quam belle opponatur *iocosus Lyaeus*, magis senties cum dativum *Lyaeo* esse credis quam cum ablativum. Ad totum locum compara Ovid. A. A. I, 237 sqq.: „Vina parant animos faciuntque caloribus aptos: Cura fugit multo diluiturque mero. Tunc veniunt risus, tunc pauper cornua sumit, Tunc dolor et curae rugaque frontis abit, Tunc aperit mentes aevo rarissima nostro Simplicitas artes exequiente deo.“ — *cornua*] Virium et confidentiae signum a tauris sumptum; sic Graeci *κέρατ' ἔχειν*. — *sapientium*] In lyricis Horatius genitivum eiusmodi verborum in *ium* formavit. cf. Epod. 1, 20. Carm. III, 24, 21; in satiris altera forma in *um* exeunte metri causa usus est: Sat. II, 3, 296. Sed cf. Carm. III, 18, 1. III, 27, 10. — *post te*] cf. Carm. I, 18, 5. — *iratos*] enallage adiectivi, non vitiosa, quoniam apex insigne est maiestatis ac potentiae, ab quam ad ipsis regibus

Te Liber et si laeta aderit Venus
 Segnesque nodum solvere Gratiae
 Vivaque producent lucernae,
 Dum rediens fugat astra Phoebus.

CARMEN XXII.

Montium custos nemorumque, Virgo,
 Quae laborantes utero puellas
 Ter vocata audis adimisque leto,
 Diva triformis,
 5 Imminens villae tua pinus esto,
 Quam per exactos ego laetus annos
 Verris obliquum meditantis ictum
 Sanguine donem.

recte ira transfertur. — *laeta*] propitia, ut Claudian. Epist. 2, 58: „Saltem absens, regina fave reditusque secundos Annue *sidereo laeta supercilio*.“ — *segnesque nod. solv.*] decentes, ut Carm. I, 4, 6. — *vivae lucernae*] In epulis et comissationibus non potuit desiderari lucernarum splendor, ad augendam laetitiam utique necessarius. Quare magna etiam in his fuit antiquorum hominum luxuria; reperiuntur enim aureae lucernae, argenteae, vitreae, marmoreae, omnes summa arte et elegantia elaboratae. Quid igitur mirum, quod lucernae quoque cum Libero et decenti Venere coenam *producere* dicuntur? Quamquam vere *amphora* produci dicitur; haec autem coenae vinum ministrat, ita ut cum amphora etiam coena producat. cf. Carm. I, 27, 5. III, 8, 14.

Carmen XXII.

Parvum hoc carmen nihil est aliud nisi inscriptio tabulae, qua pinus villae imminens Dianae consecratur anniversariumque sacrificium votetur. Quoniam id a poeta consilio sit factum, primus docet versus, scilicet ut Dianae tutelae silvam suam rite commendaret. In qua re nolo offenderis aditis aliis quoque clementiae et pote-

statis eius deae indiciis. Nimirum qui precibus adibant deos, ii multiplicis eorum potestatis memores non temere praedicabant numina. De qua re recordare, qua ratione apud Homerum (II. I, 37 sqq.) Chryseus sacerdos Apollinem appellaverit. Ne huius quidem carminis annus natalis explorari potest, nisi forte tum maxime scriptum putas, cum poeta a Maecenate villam Sabinam dono accepisset.

V. 1. *Montium*] cf. Carm. I, 21, 5. — *Virgo*] perpetua est haec laus virginis. cf. Carm. I, 12, 22. — *laborantes utero*] parturientes. — *puellas*] vide ad Carm. III, 14, 10. — *ter*] ternarius numerus in sacris frequens. cf. Carm. I, 28, 36. — *triformis*] *τρίμορφος*; est enim in terra Diana, in coelo Luna, in inferis Hecate. cf. Virg. Aen. IV, 511. — *per exactos annos*] quotiescunque annus exactus erit, quottannis. Similiter Carm. III, 18, 5. — *verris*] Non dissimilis hostiae descriptio III, 13, 4 sqq. IV, 2, 55 sqq. Apri venatoribus ictum oblique inferunt; inde etiam Ovid. Her. 4, 104: „nec *obliquo dente* timendus aper.“ id. Met. VIII, 344: „obliquo latrantes dissipat ictu.“ Cui autem apro dentes eminere incipiunt, is ictum quasi meditatur.

CARMEN XXIII.

Coelo supinas si tuleris manus
 Nascente luna, rustica Phidyle,
 Si thure placaris et horna
 Fruge Lares avidaque porca,
 5 Nec pestilentem sentiet Africum
 Fecunda vitis nec sterilem seges
 Robiginem aut dulces alumni
 Pomifero grave tempus anno.
 Nam quae nivali pascitur Algidio
 10 Devota quercus inter et ilices,
 Aut crescit Albanis in herbis
 Victima pontificum secures

Carmen XXIII.

Deos non magnitudinem sacrificiorum spectare, sed pietatem et voluntatem immolantium docet Horatius rusticam Phidylem, tristem eam quidem ac timentem, ne exiguis suis sacrificiis deorum favorem et benevolentiam sibi suisque agris et pecoribus conciliare non contingat. De simplici carminis oeconomia vix quidquam dicendum est. Phidyle autem — fictum haud dubie nomen neque ab argumento alienum, *Φειδύλη* a *φείδεσθαι* — neque villica est Horatii neque certa quaedam rustica mulier. In communi omnium rerum magnificentia ne in sacris quidem antiqua simplicitas retinebatur; quare cum rustici homines cum in omnibus rebus tum in sacris integritatem morum, ut fit, servarent, non potuit credo Horatius cuiquam rectius dare suam doctrinam quam rusticæ mulieri, quippe quæ magnis divitum hominum victimis conspectis pro sua animi simplicitate in eam sententiam incidere potuit, quasi dii gratiam ex magnitudine hostiarum metiri ac distribuere solerent. Villicam Horatii hanc non esse, vel unus demonstrat Catonis de Re Rust. 143 locus: „Villica rem divinam ne faciat iniussu domini aut dominae. Scito dominum pro tota familia rem divinam facere.“

De anno quo sic scripserit poeta ne coniecturam quidem facere licet.

V. 1. *Coelo supinas*] Similis Virgillii locus Aen. III, 176. — *nascente luna*] „Solent rusticae mulieres in initio primæ lunæ ad coelum effundere preces.“ Acro. Religiosi homines mens cuiusque Kalendis sacrificabant. — *placaris*] Vocalis *i* in terminationibus *is, imus, itis* antiquitus longa fuit; cf. Ovid. Met. VI, 357 „vitam dederitis in unda“; ibid. X, 560 „forsitan audieris aliquam.“ infr. IV, 7, 20. *Placare* autem, ut apud Ovid. Met. VII, 251. XII, 150, est propitium aliquem reddere, gratiam alicuius petere. — *horna*] spicis hornotinis. Forma *hornus* poetarum est. — *avidaque porca*] cf. Sat. II, 3, 165. — *robiginem*] Cur ea sit sterilis discere ex Virg. Georg. I, 150. — *alumni*] vituli, haedi, agni. cf. III, 18, 4. Bis tribus utitur exemplis: thure, fruge, porca; dein vitis, seges, pecora; ex consuetudine Horatii. — *grave tempus*] auctumnus. Sat. II, 6, 19. Iuven. 4, 56: „Iam letifero cedente pruinis Auctumno.“ — *nivali*] Carm. I, 21, 6. — *devota*] Animalia enim statim post partum designabantur alia ad greges et labores alia ad aras. Sic Virg. Georg. III, 157—165. In Algidio monte quercubus tecto porci, in herbosis Albanis pascuis boves sacri pasti ac saginati videntur.

- Cervice tinget: te nihil attinet
 Tentare multa caede bidentium
 15 Parvos coronantem marino
 Rore deos fragilique myrto.
 Immunis aram si tetigit manus,
 Non sumptuosa blandior hostia
 Mollivit aversos Penates
 20 Farre pio et saliente mica.

CARMEN XXIV.

Intactis opulentior

Thesauris Arabum et divitis Indiae

V. 14. *tentare*] lacessere, sollicitare. — *parvos deos*] Larium simulacra vel aenea vel lignea admodum parva esse solebant; quae tanquam epulatura sertis florum et fruticum bene olentium redimiebantur. Quod cum pia Phidyle non negligat, *coronantem* partic. rectius intellegitur *quae coronas* s. *cum coronas*, quam quod alii voluerunt *dummodo coronas*. Accusativus *deos* pendet ex utroque verbo, *tentare* et *coronantem*. — *bidentium*] „Ambidens sive bidens ovis appellabatur, quae superioribus et inferioribus est dentibus.“ Fest. p. 5. — *immunis*] sc. scelerum. — *hostia*] Vocabulorum constructio haec est: „Immunis manus si tetigit aram, mollivit aversos Penates farre pio et saliente mica, non blandior (futura) sumptuosa hostia (ablat.)“ Nam *sumptuosa* nominativus esse non potest, quia apud Horatium ubicunque syllaba per se brevis in caesura producit, in consonantem, non in vocalem exit. Nec producit syllaba *sa* positione litterarum *bl* apud Horatium; cf. Carm. III, 4, 49. A. P. 395. Carm. III, 6, 19. III, 1, 13. III, 11, 9. cfr. Carm. I, 3, 36. I, 15, 36. III, 5, 17. Ad sententiam cf. Eurip. apud Orionem Schneidew. p. 55: „Εὖ ἴσθ' ὅτ' ἄν τις εὐσεβῶν θύει θεοῖς, Κἄν μυχὰ θύῃ, τυγχάνει σωτηρίας.“ Denique perfecta etiam *tetigit*, *mollivit* (sic enim scri-

bendum, non *mollibit*, quod quamquam ex plurimis codicibus petitur, tamen ortum est ex male intellecto loco) inter se aptissime respondent. — *farre pio*] Poetica circumlocutio molae salisae. „Est autem *far pium* quod religioso animo offertur, et *sal* (mica) *saliens* est micans in igne, quae res boni ominis.“ Dissen. ad Tibull. III, 4, 10 p. 346. Plin. N. H. in praef. „Mala salsa litant, qui non habent thura.“ Tibull. IV, 1, 14 „parvae coelestes placavit mica, nec illis Semper inaurato taurus cadit hostia cornu.“

Carmen XXIV.

Accedit hoc carmen iis, in quibus in corruptos suae aetatis mores eorumque originem, nimias privatorum hominum divitias, invectus est Horatius. Epod. 16. Carm. II, 15. Divitiae et luxuria cum perpetuo exagitent homines neque unquam ipsae ad aliquem finem perveniant, beatos reddere non possunt (v. 9); quare multo feliciores sunt ii qui simplicitati naturae propiores neque delicias vitae neque quae inde proveniunt mala cognoverunt (v. 24). Iam cum Romani semel ab ista via abducti in summam rerum pervertitatem ceciderint, viro maxime opus est, qui refrenata licentia restitutoque recto rerum ordine optime et immor-

Caementis licet occupes

Tyrrhenum omne tuis et mare Apulicum,

5 Si figit adamantinos

Summis verticibus dira Necessitas

Clavos, non animum metu,

Non mortis laqueis expedit caput.

Campestres melius Scythae,

10 Quorum plaustra vagas rite trahunt domos,

Vivunt et rigidi Getae,

Immetata quibus iugera liberas

taliter mereatur de universae civitatis salute (v. 32). Haec superior pars carminis, aequabiliter et apte divisa. Altera non minor tota consumitur accurata magis et copiosa explicatione extremae prioris partis sententiae, additis simul remediis etiam desperatissimis coercendae libidinis avertendaeque perniciiei. Duplici autem via, simul ineunda, eo posse perveniri ait, minuendis privatorum hominum divitiis ac meliore in pueris educandis ratione. Extremum denique carmen non sine arte eo unde exierat redit. — Non male suspicati sunt interpretes, compositum esse carmen anno fere 725 vel 726; quo tempore Augustus de emendandis moribus cogitavit. Primus statim versus ante a. 730 scriptum esse docet et recens est v. 25 sqq. bellorum civilium memoria.

V. 1. *Intactis*] a Romanis. De Arabia et India ignotis prope summarum divitiarum sedibus vide Carm. I, 29, 1. Epist. I, 6, 6. De caementis vide ad Carm. III, 1, 35, de prima syllaba nominis *Apulicum* ad III, 4, 9. 10. Ceterum Lachmannus, cum in quattuor bonis codicibus scriptum sit *mare publicum*, ausus est locum sic mutare: *Terrenum omne tuis et mare publicum*, et comparavit Liv. XXIII, 19 „quidquid herbidi terreni extra murum erat.“ Sententia esset haec, mare debere ita ut sit manere neque privatum fieri aedificationibus; ut apud Ovid. Met. II, 35 „lux immensi publica mundi,“ et VI, 351, ubi aquae *publica munera* sunt, quia „usus communis aquarum est.“ Non bene. — *adamantinos clavos*] Verbum *figere* cum Romanis ex

proverbio in memoriam vocaret *clavos trabales*, de quibus vide ad Carm. I, 35, 18, summi vertices qui essent putandi incertum non reliquit. Sunt enim fastigia aedium, non quos alii satis mire voluerunt vertices hominum aut divitiarum. Neque melior est interpretatio eorum, qui *summis verticibus* dativum esse putantes clavorum capita explicant. *Summi vertices aedium* facile intelliguntur ex praecedentibus versibus; nam cur caementa a divitiis in mare demittuntur, nisi ut in aggere *aedes* et turres extruantur? In toto autem loco amara inest ironia. Sententia igitur haec est; licet omnium tu mortalium ditissimus utrumque mare villis tuis aggeribusque expleas, tamen cum Necessitas, Fatum, cui omnes sunt subiecti, in altum iam exstructis molibus clavos suos infigit tibi quae ipsi finem instare clamant, frustra dives es neque caput tuum ex mortis vinculis divitiae liberabunt. cf. Carm. III, 1, 14 sq. De producta posteriore verbi *figit* syllaba vide ad III, 5, 17. Supervacanea igitur videtur transpositio, quam *Axtius* suasit: „si summis adamantinos Figit verticibus.“ — *campestres*] *νομάδες*. Et cf. Aesch. Prom. 709: „*Σκύθας δ' ἀφίξει νομάδας, οὗ πλεντὰς στέγας Πεδάρσιοι ναίουσ' ἐπ' εὐνύκλοις ὄχοις*.“ Sallust. fr. p. 258. Gerl. „Scythae Nomades, quibus plaustra sedes sunt.“ — *rite*] A sacris h. v. ad rectum ordinem, inde ad vulgarem usum, ad solitam agendi rationem descendit. Sic apud Virgilium Aen. IX, 352. — *immetata*] Aureae hoc aetatis est, quod agri limitibus et terminis

- Fruges et Cererem ferunt
 Nec cultura placet longior annua
 15 Defunctumque laboribus
 Aequali recreat sorte vicarius.
 Illic matre carentibus
 Privignis mulier temperat innocens
 Nec dotata regit virum
 20 Coniux nec nitido fidit adultero;
 Dos est magna parentium
 Virtus et metuens alterius viri
 Certo foedere castitas;
 Et peccare nefas aut pretium est mori.
 25 O quisquis volet impias
 Caedes et rabiem tollere civicam,
 Si quaeret pater urbium
 Subscribi statuis, indomitam audeat
 Refrenare licentiam,
 30 Clarus postgenitis: quatenus — heu nefas! —
 Virtutem incolumem odimus,
 Sublatam ex oculis quaerimus invidi.

nondum sunt signati. Virg. Georg. I, 126. Ovid. Met. I, 135. — *Fruges et Cererem*] *ἐν δῖα δροῖν*. — Ad insequentes versus lege quae apud Caesarem B. G. IV, 1 sunt de Suevorum simili vita.

V. 18. *temperat*] temperamus alicui vel ab aliquo, quem neque iniuste quid facere iubemus neque malo conamur afficere. Sic saepe apud Ciceronem, alios. — *dotata*] Plaut. Men. V, 2, 16: „Ita istae solent, quae viros subservire sibi postulant *dote fretae*.“ — *dos est*] Repete *illic*. Bene haec sententia explicatur h. l. Plauti Amphitr. II, 2, 207: „Non ego illam dotem mi esse ducō, quae dos dicitur; Sed pudicitiam et pudorem et sedatam cupidinem, Deum metum, parentum amorem et cognatum concordiam.“ — *parentium*] vide ad Carm. III, 21, 14. — *metuens alterius viri*] cf. Carm. III, 19, 16. Ceterum *virtus et castitas* altera alteram illustrat: *ἐν δῖα δροῖν*.

— *Et peccare*] Haec ne cum iis quae proxime praecedunt arte coniungas, vetat grammatica ratio; quare hic quoque repete *illic* ex v. 17. Deinde pre-mendum est vocabulum *nefas*, ut Carm. IV, 5, 22; *aut* particula duarum rerum, quae solae fieri cogitarive possunt, alteram addit, quae, si non sit quod superiore loco positum est, necessario debeat esse: widrigenfalls, alioquin, ut apud Virgilium Aen. X, 630. — *pretium*] vocabulum medium, h. l. de poena. — *quisquis*] si quis; omnes qui. Quare noli cum Bentleio iteratum interrogans pronomen *quis*, *quis* praeferre. — *pater urbium*] i. e. restitutor, ut apud Cic. ad Quint. fr. I, 1, 31 *parens Asiae*, et Tacit. Ann. XI, 25 „ob ea Vipstanus consul retulit, *patrem senatus* appellandum esse Claudium.“ Sententia generalis est, sed tecte monstratur Augustus, qui anno demum 752 *patris patriae* nomen assumpsit. *Urbes* tamen ut Carm.

- Quid tristes querimoniae,
 Si non supplicio culpa reciditur;
 35 Quid leges sine moribus
 Vanae proficiunt, si neque fervidis
 Pars inclusa caloribus
 Mundi nec Boreae finitimum latus
 Durataeque solo nives
 40 Mercatorem abigunt, horrida callidi
 Vincunt aequora navitae,
 Magnum pauperies opprobrium iubet
 Quidvis et facere et pati
 Virtutisque viam deserit arduae?
 45 Vel nos in Capitolium,
 Quo clamor vocat et turba faventium,
 Vel nos in mare proximum
 Gemmas et lapides aurum et inutile,
 Summi materiem mali,
 50 Mittamus, scelerum si bene poenitet.
 Eradenda cupidinis
 Pravi sunt elementa et tenerae nimis
 Mentis asperioribus
 Formandae studiis. Nescit equo rudis
 55 Haerere ingenuus puer
 Venarique timet, ludere doctior

I, 35, 10 contra gentes, rudes eas atque incultas, ponuntur, sic cum omnibus suis vitae hominum ornamentis hic cogitantur. — *clarus postgenitis*] quoniam virtutem aequales invidia, veneratione posterius persequuntur. cf. Epist. II, 1, 10 sqq. Quare *invidi* non ad *quaerimus* magis quam ad *odimus* referendum est.

V. 36. *Si neque*] Condicionalis sententia triplex est; eaque continuanda usque ad v. 44. Ad sententiam conferas Taciti vocem Germ. 19: „Bonae leges minus valent quam boni mores.“ — *magnum*] Repetendum ex praecedentibus si. Cfr. Eurip. El. 374: „ἔχει νόσον Πενία, διδάσκει δ' ἄν-

δρα τῇ χρεῖα κακόν.“ Hor. Sat. II, 3, 91. — *virtutis arduae*] ex imagine antiquis satis usurpata; nimirum in arduo monte arcem ea tenere fingebatur. Nobis via certe ad virtutem ardua est. — *clamor et turba*] ἐν διαθροῖν. Sumpta haec ex pompa triumphali, qua qui suas divitias in communem usum conferre parati sunt, inter laetas populi acclamationes ducuntur in Capitolium. — *gemmas, lapides*] gemmae anaglyphae et ectypae; lapides sunt uniones. Ovid. Med. fac. 20 sq.: „Conspiciam gemmis vultis habere manum, Induitis collo lapides oriente paratos.“ — *equo haerere*] non „firmiter insidere“, sed „in equo se

Seu Graeco iubeas trocho
 Seu malis vetita legibus alea,
 Cum periura patris fides
 60 Consortem socium fallat et hospitem
 Indignoque pecuniam
 Heredi properet. Scilicet improbae
 Crescunt divitiae; tamen
 Curtae nescio quid semper abest rei.

CARMEN XXV.

Quo me, Bacche, rapis tui
 Plenum? quae nemora aut quos agor in specus

continere, non deiici. Sic etiam Cic. pro Deiot. 10. — *seu iubeas*] Horatius etsi cum *seu* — *seu* vel *sive* — *sive* particulis indicativum modum, ut vulgo fit, coniunxit, tamen a coniunctivo non potuit abstinere, cum res diceret non quae essent sed quae possent esse. Sic Carm. I, 4, 12. I, 12, 53—55. — *trochus*] rota ferrea cum anulis crepitantibus, quam pueri virga ferrea circumagebant; ludus graece *κρηλασία* dictus. Graecus dicitur non sine contemptione peregrini moris. — *vetita legib. alea*] cf. Cic. Philipp. II, 23. — *Consortem socium*] Consortes sunt quibus eadem sors; inde et cognati, quia sors etiam patrimonium, et qui lucri faciendi causa sortes composuerunt. Hi consortes socii. — *properet*] transitive, ut Epist. I, 2, 61; est enim omni opera et quam citissime parare. — *improbae*] ingentes. Virg. Aen. XII, 687. — *curtae*] ex opinione cupidorum hominum. Solon II, 71 (Schneidew. Del. p. 27): „Πλούτων δ' οὐδὲν τέμας πεφασμένον ἀνδράσι κείται. Οἱ γὰρ νῦν ἡμέων πλείστον ἔχουσι βίον, Διπλάσιον σπένδουσι. τίς ἂν κορέσειεν ἅπαντας;“ Carm. III, 16, 42. — *nescio quid*] graviter et ironice dictum; deest enim animi temperantia, otium. cf. Carm. II, 16, 7.

Carmen XXV.

Non tam dithyrambus est, ut carm. II, 19, sed dithyrambica i. e. sublimi

ratione tentata Augusti imperatoris laudatio. Cuius res gestas, divinas magis quam humanas, merito celebraturus poeta tanta admiratione ac paene furore correptum se sensit, ut Bacchi numine impletus ex vulgari hominum coetu in sacras regiones Baccharumque societatem ablatus esse sibi videretur. Quae fictio poetico ornatu nudata hoc dicit, cum Augusti ingentia facinora humanas facultates excedere divinaque mente procreata videantur, eum etiam poetam qui merito illa canere velit divina ope quam maxime adiutum et instructum esse debere; etenim deum, qui Baccharum feros animos flectere, corporibus insolitum robur dare possit, imbecillum etiam hominem ad coelestem cantum extollere. Verum — sic clauditur carmen — periculosum simul et blandum est dei numini tradi; periculosum, quia non omnibus contigit eam viam impune persequi; dulce, quia iste furor a deo venit, qui vini beneficio mortale genus hominum auxit. Sic infirmitatis accedit libera confessio, frequens illa quidem apud Horatium. — Scriptum putant anno 725 vel 726, quo omnes Augusti merita ac facinora stupentes tantum hominem inter deos prope referebant. Cf. Carm. III, 3, 11. Quamquam *Weberus* maiore, ut videtur, veritatis specie suspicatus est, accepto nuncio de victa Cleopatra captaque Alexandria Horatium ad tantam Octaviani laudationem elatum esse,

Velox mente nova? Quibus

Antris egregii Caesaris audiar

5 Aeternum meditans decus

Stellis inserere et consilio Iovis?

Dicam insigne recens adhuc

Indictum ore alio. Non secus in iugis

Exsomnia stupet Evias,

10 Hebrum prospiciens et nive candidam

Thracen ac pede barbaro

Lustratam Rhodopen, ut mihi devio

Ripas et vacuum nemus

Mirari libet. O Naiadum potens

15 Baccharumque valentium

Proceras manibus vertere fraxinos,

Nil parvum aut humili modo,

Nil mortale loquar. Dulce periculum est,

V. 2. *quae nemora*] De praepos. in huc quoque referenda cf. Catull. 31 (33), 5 „cur non exilium malasque in oras itis?“ Ovid. Met. VII, 708. Virg. Aen. VI, 692. *Specus* autem et antrum hoc inter se differunt, quod specus dicitur de solitudine ac vastitate loci, antrum de divino poetarum deversorio. — *quibus antris*] non est dativus, sed ablativus loci. — *egregii*] cf. Carm. I, 6, 11. — *meditans*] meditatatur poeta, qui quas celebraturus est res iis totus tenetur; iam cum divina in pectore poetarum vis saepe efficiat, ut simul atque oriantur cogitationes etiam proferantur, *meditari* ipsum *canere* potest significare. Sueton. Aug. c. 85: „Exstat alter aequae modicus *epigrammatum* (liber), quae fere tempore balnei *meditabatur*.“ — *indictum*] cf. Epist. I, 19, 32. Ut *indictum* est quod ante nunquam dictum est, ita *recens* quod nunquam ante auditum. — *exsomnia*] Baccha non somno est expergefata, sed insomnia, perpetua vigilia agitata; scilicet deus somnum eam capere non patitur. Quod ne credas praepositione *ex* vetari, compara *excors* Epist. I, 2, 25; *exlex* A. P. 224; *exsanguis* Epist. I, 19, 18; *exsors* A. P. 305; *exspes* Epod.

16, 37. A. P. 20. Bacchae autem non alia mente sacras Thraciae regiones, dei vestigiis refertas stupent, atque ea qua poeta ab iis rebus quas solet canere distractus (*devius*) grandia admiratur atque excelsa ad canendum nunc sibi proposita facinora. Sic intelliguntur *ripae et vacuum nemus*, quae hoc tantum volunt, ut sacras regiones vel sublimes et adhuc poetae intentatas res apta allegoria illustrent. — *prospiciens*] nocte hiemali clarissimo lumine lunae illustrata. De hieme cfr. Ovid. Fast. I, 393: „Festa corymbiferi celebrabas Graecia Bacchi, Tertia quae solito tempore bruma refert.“

V. 12. *ut*] coniunge cum *non secus*. cf. Carm. I, 16, 7 sqq. Cic. Brut. 50, 188 *perinde* — *ut*, quae species quaedam est constructionis ad sensum quae vocatur. Nimirum *non secus, perinde, non aliter* (Ovid. Met. IX, 642) idem significant quod *ita*, cui relativa respondet particula *ut*. — *manibus vertere*] Exemplum ad ostendendam ingentem vim qua deus solet implere; ab hoc ad poetarum Baccho plenorum magnificentiam non longa est concludendi via. — *mortale*] i. e. nihil quod homines sua vi canere possunt. —

O Lenaeae, sequi deum

20 Cingentem viridi tempora pampino.

CARMEN XXVI.

Vixi puellis nuper idoneus

Et militavi non sine gloria;

Nunc arma defunctumque bello

Barbiton hic paries habebit,

5 Laevum marinae qui Veneris latus

Custodit. Hic, hic ponite lucida

Funalia et vectes et arcus

Oppositis foribus minaces.

O quae beatam diva tenes Cyprum et

10 Memphin carentem Sithonia nive,

dulce periculum] oxymoron. — *Lenaeae*] Hoc nomen cum pampino ostendit deum vini. cf. Carm. IV, 8, 33. Nomen factum est ἀληνός, quod Baccho sacrum est torcular.

Carmen XXVI.

Poeta Chloae amore captus sed non auditus tanta aegrimonia et tristitia obruitur, ut amoribus non iam idoneum se sentiens queratur: „Fuit olim cum in amore felix essem; nunc secus est. Ut miles militiae laboribus ferendis impar arma mea Veneri suspendam. Nam quid prosunt? Chloe precibus meis aures dare recusat. Sed verus et spretus amor inultus non erit; tu, dea, arrogantem castigabis.“ Hoc extremum ita intelligendum non est, ut suo amore velit capi Chloen, sed ut iure quodam talionis par pari referatur. Forma autem carminis tota est dramatica; poeta in aede (vide v. 4) Veneris secum loquitur, sed clara voce; deinde ministros arma portantes deponere iubet, tum ad deam conversus vindictam rogat. De tempore carminis admodum lubrica est coniectura.

V. 2. *militavi*] Haud rara apud poetas amantium cum militantibus comparatio: Carm. IV, 1, 16. Ovid. Am. I, 9, 1: „Militat omnis amans et ha-

bet sua castra Capido.“ — *non sine*] Litotes ab Horatio saepe usurpata, ut Carm. I, 23, 3. III, 4, 20. III, 29, 38. — *arma*] Quae qualia fuerint ostendunt versus 6 et 7. Sed barbitos quoque inter arma est; de particula *que* vide ad Carm. I, 21, 14. — *laevum*] Cicer. — divin. II, 39, 82: „Nobis sinistra videntur, Graiis et barbaris dextra, meliora.“ — *marinae*] *πρωτίας, πελαγίας*. Carm. IV, 11, 15. Ovid. Fast. IV, 62: „a spumis est dea dicta maris.“ — *custodit*] eleganter dictum pro eo quod vulgo dicebant *latus tegere*, ut Sat. II, 5, 18. — *funalia*] Haec cum reliquis arma sunt protervorum iuvenum nocturno tempore cum funalibus per plateas circumvagantium portasque libertinarum statim non apertas vectibus effringentium. cf. Sat. I, 4, 51. Ne *arcus* quidem tentandi sunt coniecturis ut Benteiaua *vectes securesque*, Cuninghamiana *vectes et harpas*. Furibundi prope adulescentes quid non potuerunt corripere? scilicet ut ianitores terrerent, ut ait vetus glossa. Nam in versu 8 ad vectes magis quam ad funalia et arcus referendo haerendum non est anxie. — *Cyprum*] vide Carm. I, 3, 1. — *Memphin carentem Sith. nive*] Egregie hoc dictum; etenim frigus ut in rerum natura, sic in hominum pectoribus

Regina, sublimi flagello
Tange Chloën semel arrogantem.

CARMEN XXVII.

Impios parrae recinentis omen
Ducat et praegnans canis aut ab agro
Rava decurrens lupa Lanuvino
Fetaque vulpes;

5 Rumpat et serpens iter institutum,

odiosum est Veneri; habent igitur haec verba causam, cur fore speret ut Venus frigidam, amoris caloribus non imbutam Chloën velit castigare. De templo autem Veneris in Aegypti hac nobilissima urbe vide Herod. II, 112; de Sithoniis ad Carm. I, 18, 9.

Carmen XXVII.

Galatea nescio qua ratione cum Horatio coniuncta — id quod probatur versu 14 — quam adhuc habuit sedem ac simul poetam relictura est. A quo consilio ille cum frustra, ut videtur, advocare eam tentaverit, ne omnino faciat iter persuadere iam non studet negatque se propterea eam malis prosequi omnibus, quibus neminem nisi malum et impium hominem plecti velit; immo praesentiam ei ac tutelam deorum se exoptare. Hoc unum se velle, ne procelloso hoc auctumni tempore iter instituat. Etenim tempestates non timere temerarium esse; temeritate autem pericula gigni et poenitentiae dolores. Qam quidem sententiam Horatius nudam sic et frigidam proponere noluit in eiusque locum substituit Europae exemplum et fabulam. Continuatur autem per triginta fere versus poenitentia Europae de levitate sua ac temeritate, ut luce clarius sit, non aliter atque in Carm. III, 3 et 11 huius carminis summam sententiam in ipsa fabula esse quaerendam quaeque praecedant reliqua rerum tantum occasionem explicare. Deinde sententia illa, qua scire dicimus homines quid relinquunt, quid

sint inventuri nescire, egregium locum in initio fabulae nacta est mirifice inter se oppositis strophis octava et nona. Iam qui singulas fabulae partes cum Galatea vellet comparare, is magnopere erraret; quoniam in eiusmodi rebus ita fere fit, ut exemplorum et comparisonum vis universa spectetur, non omnium rerum aut partium opportunitas. Ex quibus ut unum proponam, exitus de magno quo digna Europa habita dicitur honore nihil accommodatus est ad Galateam, nisi forte credis, hoc secutum esse poetam, ut levitatem et imprudentiam non posse corrigi diceret nisi intercedentibus deorum numinibus; id quod de suis rebus Galatae non licuit expectare. Ceterum nescimus neque quae fuerit Galatea neque quo anno carmen scriptum sit.

V. 3. *rava*] „Ravi coloris appellantur qui sunt inter flavos et caesios“ Festus p. 135. — *Lanuvino*] Lanuvium, Latii oppidum, haud longe a via Appia situm; sic breviter significantur qui iter faciunt in Campaniam et Brundisium. — *rumpat et*] In paucis codd. *rumpit* legitur a Benteio, aliis receptum. Alterum rectius; quod neque dicit quidquam aliud nisi per obliquam viam celeriter labi, et sustentatur gravi ac plena versus secundi alliteratione: *ducat et* — *rumpat et*; qualem vehementer adamarunt poetae latini. — *mannos*] animal ex equo et asina natum, maximae celeritatis, quare ad rhedas trahendas frequenter adhibitum. cf. Epod. 4, 14. Epist. I, 7,

Si per obliquum similis sagittae
Terruit mannos: ego cui timebo,
Providus auspex,

Antequam stantes repetat paludes
10 Imbrium divina avis imminentum,
Oscinem corvum prece suscitabo
Solis ab ortu.

Sis licet felix ubicunque mavis,
Et memor nostri, Galatea, vivas,
15 Teque nec laevus vetet ire picus
Nec vaga cornix.

Sed vides quanto trepidet tumultu
Pronus Orion. Ego quid sit ater
Hadriae novi sinus et quid albus
20 Peccet Iapyx.

Hostium uxores puerique caecos
Sentiant motus orientis Austri et
Aequoris nigri fremitum et trementes
Verbere ripas.

77. — *cui timebo*] Sic recte, cf. Sat. II, 1, 23. Ovid. Am. II, 11, 9: „Quid tibi, me miserum, Euros Zephyrosque timebo?“ In multis libris MSS. *quid*; quod vocabulum ex mala pronuntiatione insequentem litteram *t* iterantium scribarum (cuit timebo) ortum creavit tertiam lectionem *cur*. Qui *quid* receperunt, iis imposita erat necessitas interrogandi signum post voc. *auspex* ponendi; quo misere perit sententia. — *repetat paludes*] Indicium hoc appropinquantis tempestatis; iam viles cur providum se auspicem dixerit. *Stantes* autem ex illo genere est epithetorum quae ornantia dicuntur. De *auspice* vide ad Carm. I, 7, 27. Et cf. Sabin. epist. 1, 93: „Tiresias laeti *providus* augur.“ — *divina avis*] quia vaticinatur, ut A. P. 218. Sat. I, 6, 114. 9, 30. — *oscinem*] *Oscines* aves, quae cantu, *praepetes*, quae volatu augurium faciunt. — *ab ortu*] Qui augurium capiebant Romani, ad meridiem conversi solis ortum ad sinistram,

occasum ad dextram habebant; inde sinistra fausta, dextra mala auguria. Graeci contra.

V. 15. *laevus picus*] mali ominis est, ut sententia ostendit; cur sit, cum laeva s. sinistra fausta habeantur, non satis patet. Conferas tamen Ovid. Ib. 128: „et a laeva moesta volavit avis.“ *Vetet* ex optimis codicibus; alterum *vetat* pravum esse in promptu est. — *pronus Orion*] Vergebat tunc Orion ad occasum a. d. V. Id. Novembr. — *ater*] fuestus. Poeta ipse expertus est, quam sit periculosum iter per mare Adriaticum, cum olim ex Graecia in Italiam rediret. — *albus Iapyx*] vide ad Carm. I, 3, 4 et 14. — *hostium*] Ad hanc hostium execrationem lege Carm. I, 21, 13 sqq. — *caecos*] qui quasi non vident, in quae nos coniciant pericula. cf. Virg. Aen. III, 200. — *verbere*] Singularis numeri huius nominis primus, tertius, quartus casus omnino non inveniuntur, reliqui admodum raro; genitivus est apud

25 Sic et Europe niveum doloso

Credidit tauro latus et scatentem

Beluis pontum mediasque fraudes

Palluit audax.

Nuper in pratis studiosa florum et

30 Debitae Nymphis opifex coronae

Nocte sublustri nihil astra praeter

Vidit et undas.

Quae simul centum tetigit potentem

Oppidis Creten: Pater, o relictum

35 Filiae nomen pietasque, dixit,

Victa furore!

Unde quo veni? Levis una mors est

Virginum culpa. Vigilansne ploro

Turpe commissum an vitiis carentem

40 Ludit imago

Vana, quae porta fugiens eburna

Somnium ducit? Meliusne fluctus

Ire per longos fuit an recentes

Carpere flores?

Ovid. Met., XIV, 821. Sed cf. Epod. 10, 3. — *Europe*] Hom. Il. XIV, 321. — *latus*] poetice pro corpore, per synecdochen; ut Carm. II, 7, 18. — *medias fraudes*] pericula ac monstra, quae in medio mari sunt, ab iis qui in litore stant non cernuntur aut sentiuntur. Et cfr. Mosch. 2, 127: „*Ἡ δ' ὅτε δὴ γαίης ἀπὸ πατρίδος ἦεν ἀνευθεν, φαίνεται δ' οὐτ' ἀκτὴ τις ἀλλόφθορος οὐτ' ὅρος αἰπύ, Ἄλλ' ἄηρ μὲν ὑπερθεν, ἔνερθε δὲ πόντος ἀπείρων κτλ.*“ Tum egregium est *palluit audax*, quippe quo subita et magna animi Europae mutatio mirum in modum non exprimitur sed pingitur. Inde consulto *palluit* cum accusativo, ut Epist. I, 3, 10. — *debitae*] ex voto.

V. 33. Iam incipit magnifica de Europae moerore expositio, in qua si quaeras quid illa tandem commiserit, cur summo se supplicio dignam accu-

set, ipsa adest Europa quae respondeat v. 34 sqq. Nam dum per mare vehitur, ne verba quidem prae terrore potuit invenire; in terram exposita a tauroque destituta primum patris male deserti meminit seque quod levitate seducta filiae nomen prodiderit pietatemque furore i. e. temeritate vinci passa sit graviter accusat. Neque quidquam *culpa* est aliud et *turpe commissum* nisi hoc, quod insano amore eo pervenit, ut quem carissimum habuit patrem relinqueret. cf. v. 42–44. 49. — *furore*] ut apud Catull. 64, 197 „amenti caeca furore“ Ariadne, cuius querelae simillimae sunt. — *unde quo*] Coniunctae ad graecum modum duae interrogationes. cf. Carm. III, 19, 6 sq. Virg. Aen. X, 670. — *vitiis*] Unum quidem intelligit vitium, sed pluralis numerus augeat rem, ut saepe apud poetas. — *porta eburna*] Hom. Od. XIX, 562. Virg. Aen. VI, 804. Altera

45 Si quis infamem mihi nunc iuvenum
Dedat iratae, lacerare ferro et
Frangere enitar modo multum amati
Cornua monstri.

Impudens liqui patrios Penates,
50 Impudens Orcum moror. O deorum
Si quis haec audis, utinam inter errem
Nuda leones!

Antequam turpis macies decentes
Occupet malas teneraeque sucus
55 Defluat praedae, speciosa quaero
Pascere tigres.

Vilis Europe, pater urget absens:
Quid mori cessas? Potes hac ab orno
Pendulum zona bene te secuta

60 Laedere collum;
Sive te rupes et acuta leto
Saxa delectant, age te procellae
Crede veloci, nisi herile mavis
Carpere pensum

adiectivi forma *eburneus* neque Horatius usus est neque Virgilius. — *fugiens*] Fugere apud poetas est rapide abire, exire. — *cornua monstri*] In aliis et codd. et editt. *tauri*, ex aperta interpretatione orta lectio.

V. 49. Venusti versus gravi oppositione: nam quae id impudenter fecit, quod patriam domum temerario amore inducta reliquit, ea etiam auget impudentiam, quod luce et coelo frui audet poenamque quodam modo detrectat. — *audis*] Brevitatem quae inest in hac pronominis *quis* cum altera persona coniunctione nostra lingua non assequitur. Omnes enim deos simul sic alloquitur; cognatum illud Virgilianum (Aen. IV, 625): „*Exoriare aliquis nostris ex ossibus ultor, Qui face Dardanio ferroque sequare colonos.*“ — *nuda*] propria significatione. Sequentem stropham fuerunt qui abesse mallent propter ingratam quam

habet imaginem et pulchritudinis ineptam laudem. In qua re si quid peccatum est, id Horatio potius dandum est quam scribae nescio cuius fraudi et versus faciendi studio. — *urget absens*] Hoc quoque oxymoron, nam proprie praesentia sola urgent; vide ad Carm. II, 9, 9. — *pendulum*] „Horatius figuram Europae quasi moribundae et ab arbore pendens exquisitiore modo depinxit, collum ipsum, cui in tali morte maximae erant partes, dicens *pendulum*. Verbo *laedere*, quod Ianius h. l. audacius et doctius collocatum esse censet, comparemus Soph. Antig. 54 *πλεταίσιν ἀπράναισιν λαβᾶται βίον.*“ Iacob. Quaest. epic. p. 106. Inde iudica de eo quod in codd. etiam reperitur *secuta e* — *Lidere*. Ceterum hoc genus mortis vulgare in heroinis, ut in Iocasta, Phaedra. — *bene*] opportune. — *sive*] vide ad Carm. I, 2, 33. Acerbum hoc est et

65 Regius sanguis dominaeque tradi
 Barbarae pellex. Aderat querenti
 Perfidum ridens Venus et remisso
 Filius arcu.

Mox, ubi lusit satis: Abstineto,
 70 Dixit, irarum calidaeque rixae,
 Cum tibi invisus laceranda reddet
 Cornua taurus.

Uxor invicti Iovis esse nescis.
 Mitte singultus, bene ferre magnam
 75 Disce fortunam; tua sectus orbis
 Nomina ducet.

CARMEN XXVIII.

Festo quid potius die
 Neptuni faciam? Prome reconditum
 Lyde strenua Caecubum
 Munitaeque adhibe vim sapientiae.

indignabundum mortis arbitrium; scilicet filiae, quae libere patrem reliquit, libere etiam mortis genus constitutum est. Sic intelligitur verbum *delectant* prope malignum, sic etiam saxa *acuta leto* i. e. ad mortem dandam natura instituta, a quibus qui desiliunt procella etiam acti celeriores mortem inveniunt. Praeterea grave etiam est, quod *regius sanguis* appellatur, cui quid tristius potuit accidere quam in servitutem dari? — *remisso*] quia opus suum iam perfecit. — *lusit*] ludere aliquem est ludibrio habere, irridere. — *irarum*] cf. Carm. II, 9, 17. IV, 9, 37. — *invisus*] Repetit Venus per iocum et irrisiōnem ipsius Europae verba paulum mutata, V. 45 sqq. — *nomina*] poetice de uno homine, ut Carm. IV, 2, 6.

Carmen XXVIII.

Neptunalibus (a. d. X. Kal. Aug.) poeta cum psaltriam Lyden apud se habeat, nescire se ait quid melius

faciat quam vino et cantu Genio indulgere. Sic carmen dividitur in duas partes; primum vinum promere iubet Lyden (v. 1—8), deinde canere (9—16). Carmine amoebaeo Horatius Neptunum celebrabit, deinde Lyde Latonam et Dianam, tum coniunctis vocibus — id quod ex plurali numero v. 9 recte videtur concludi — Venerem et Noctem. Temporis notationem carmen non habet. Neptunalia frondeis casis, quas *umbras* vocabant, in ripa Tiberis exstructis et tauro immolato celebrabantur.

V. 2. *faciam*] Bentl. *facias* ex coni. propter insequens *promere*. Sed nihil opus emendatione; est enim ὕστερον πρότερον, vel, si mavis, aperit. Horatius quae tacitus ante meditatus sit de ratione, qua Neptunalia velit celebrare. — *reconditum*] vetustum, molle; cf. Carm. II, 3, 8. — *strenua*] Adiectivum pro adverbio. cf. ad Carm. I, 2, 45. Epist. I, 2, 70. — *munitae sapientiae*] Quae sit munita sapientia patebit ex Carm. III, 21, 14, ubi vide.

5 Inclinare meridiem

Sentis ac, veluti stet volucris dies,
 Parcis deripere horreo
 Cessantem Bibuli consulis amphoram.
 Nos cantabimus invicem

10 Neptunum et virides Nereidum comas;
 Te curva recines lyra
 Latonam et celeris spicula Cynthiae;
 Summo carmine quae Cnidon
 Fulgentesque tenet Cycladas et Paphon
 15 Iunctis visit oloribus
 Dicetur, merita Nox quoque nenia.

CARMEN XXIX.

Tyrrhena regum progenies, tibi
 Non ante verso lene merum cado

— *inclinare*] ad vespeream vergere; proprie de sole, ut Iuven. III, 316 *Sol inclinat*. Pronomen *se* apud Livium quoque saepius omisum. — *ac*] I. H. Vossius emendandum putavit *at*; sed coniunctivae particulae adversante saepe facultate instructae sunt: *ac tamen*; exempla ne apud Ciceronem quidem desunt. — *veluti*] pro *velut si*, ut Ovid. Met. IV, 596. *Stare* autem verbum admodum frequens est de rebus immotis ac durantibus; sic h. l. oppositum est superiori verbo *inclinare*. — *parcis*] vide ad Carm. I, 1, 8. — *Bibuli*] M. Calpurnius Bibulus cum C. Iulio Caesare consul fuit a. u. c. 695. Sed iocose hoc nomen lectum; videlicet *bibere* gestienti vinum *Bibuli* consulis haud dubie gratissimum est. — *virides*] a colore aquae marinae. cf. Ovid. Trist. I, 2, 59 „viridesque dei quibus aequora curae.“ — *recines*] canendo respondebis, ut Carm. I, 12, 3. Versum decimum secundum accurate vides accommodatum esse decimo. — *Summo carmine*] *Summus* quamquam contrarius sua natura est *imo*, ut Epist. I, 1, 54, a loco tamen id vocabulum etiam ad tempus transfertur,

ut contrarius sit *primus*, ut Epist. I, 1, 1; confer illud Lucani II, 211: „In fluvium *primi* cecidere, in corpora *summi*.“ — *Cnidon*] cf. Carm. I, 30, 1. — *oloribus*] De curru Veneris vide Ovid. Met. X, 717. — *nenia*] vide ad Carm. II, 1, 38. Ceterum cum Benteleio colon posui post v. 12 et comma post *dicetur*; dura enim est constructio aliorum, qui post *Cynthiae* commate posito dici volunt: „recines summo carmine eam deam, quae Cnidon etc.; dicetur merita Nox cet.“

Carmen XXIX.

Externam scribendi carminis occasionem praebuit Maecenas invitatus, ut ex urbe ad poetam rusticatum veniret. Quod cur libenter ac benigne facere debeat Maecenas, causae propositae sunt v. 13—24; etenim divitiibus vices saepe iucundae sunt et frugalitas pauperum optimum praebet remedium taedii et curarum; deinde instat (v. 17) aestas, quam in urbe paene intolerabilem Romani saepenumero ruri, maxime in montibus, transigere solebant. „Verum, inquit, tu

Cum flore, Maecenas, rosarum et
Pressa tuis balanus capillis

5 Iam dudum apud me est. Eripe te morae
Nec semper udum Tibur et Aesulae
Declive contempleris arvum et

quidem, Maecenas, tui vix iuris es; civiles curae, publica salus animum tuum undique captum habent, sed recordare (v. 29) futurarum rerum condiciones divina prudentia praeclusas esse humano intellectui, hominesque decere quae sint parata iis sapienter frui, bene scientes quidquid sit futurum id fluminis ritu fluere, modo placidum ac quietum modo turbidum ac violentum. Quare cum quietis rebus nimiae curae sint inanes, turbidis impares, nemo rectius vivit eo (v. 41), cui vespera cum venerit dicere liceat: hic meus fuit dies; qualiscunque crastinus erit, quibus bonis fructus sum ne deus quidem ea mihi auferet. Sic qui cogitat, verum is habet otium, non quaerendum illud quidem in tentanda fortuna, qua nihil est mobilius aut magis incertum. Quam ob rem (v. 49) quae benigna offert dona grato animo accipiantur; quae adversa auferunt libenter reddantur ab eo qui quae vera sit dignitas, vera virtus, verae opes sapienter sibi persuasit. Inde (v. 57) nascitur animi securitas ab omnibus externis et curis et periculis; quae si minantur, recti conscientia deorumque tutela omnia summoventur. "Tale igitur carminis est argumentum; quo tres efficiuntur partes. Ac prima quidem sex strophas complexa invitationem habet cum generalibus causis, quibus ut veniat Maecenati suadetur; altera quattuor stropharum Maecenatis res et condiciones describit transiitque sensim parat ad tertiam sex strophas continentem, qua quid cogitet Horatius de vitae rationibus vicibusque libere ac diserte exhibetur. In qua partium distributione hoc quoque egregium est, quod qui totius carminis medii sunt versus (29—34) iidem principalem totius doctrinae originem ac quasi fontem ostendunt. Quapropter recte iudicaverunt qui hoc multis nominibus laudandum carmen inter praestantissima referrent

Horatius ed. Dillenburger ed. III.

Venusini poetae. Quod quo anno scriptum sit certum non est; sed cum Maecenas aedes suas in Esquilis iam habeat exstructas (v. 10), Horatium etiam in Sabina villa habitare ex initio perspicuum sit, praeterea versu 28 Teridatis et Phraatis Parthicorum discordia tangatur, veri simillimum est ortum esse carmen non ante annum 729. Simile est pluribus de causis carmen III, 8.

V. 1. *Tyrrhena*] cfr. Carm. I, 1, 1. — *non ante verso*] usque adhuc recondito, nondum tacto, id quod honorificum est Maecenati. cf. III, 21, 6. — *lene*] vetustate delinitum; recentia enim vina acerba sunt. — *balanus*] hyperanthera semidecandra; arbor Troglodytis, Thebaidi et Arabiae communis (Plin. N. H. XII, 21); nux posita pro oleo inde presso. — *nec semper*] Sic boni codd.; alii *ne*; illud tamen rectius, quia et ingratum est asyndeton neque obstat *nec* particula cum imperativo coniuncta. cf. Carm. I, 9, 15. I, 11, 2. III, 7, 29. Neque rectum videtur, quod Peerlkampius Batavus affirmavit, *contemplari* neminem posse nisi praesentem, non remotum. An vero *astra* cum *contemplamur*, non sumus remoti ab iis? Sic autem Romani dicebant. Immo in contemplando non tam praesentia inest hominum quam attentio animi et oculorum. Quae verbi significatio huic quoque loco bene convenit. Nam quid prohibet, quominus Maecenatem fingamus in turri sedentem fixis in circumiacentem regionem oculis, desiderio otiosae rusticationis plenum, sed nimis curis Romae retentum? Dubitantem igitur et desiderantem stimulat Horatius, ut morae tandem finem faciat fastidiique plenam urbem animi relaxandi causa relinquat. Sic intelligitur etiam vocabulum *semper*. — *Telegoni*] Hic Ulixis et Circes filius patrem, quem ut quaereret missus erat, inscius necavit in Italiamque delatus

Telegoni iuga paricidae.

Fastidiosam desere copiam et

10 Molem propinquam nubibus arduis;

Omitte mirari beatae

Fumum et opes strepitumque Romae.

Plerumque gratae divitibus vices

Mundaeque parvo sub lare pauperum

15 Coenae sine aulaeis et ostro

Sollicitam explicuere frontem.

Iam clarus occultum Andromedae pater

Ostendit ignem; iam Procyon furit

Et stella vesani Leonis

20 Sole dies referente siccos;

Iam pastor umbras cum grege languido

Rivumque fessus quaerit et horridi

Dumeta Silvani, caretque

Ripa vagis taciturna ventis.

25 Tu civitatem quis deceat status

Curas et Urbi sollicitus times

Quid Seres et regnata Cyro

Bactra parent Tanaisque discors.

Tusculum condidit. Aesula inter Praeneste et Tibur sita est. *Udum* Tibur (cf. Carm. I, 7, 13) cum montibus eius regionis aestate amoenus locus. — *molem*] vide Epod. 9, 3. — *omitte*] Burmannus *o mitte* scribendum censuit, nimirum ne a iambo procederet versus; sed conferas Carm. I, 17, 7 *olentis*; I, 29, 7 *puer quis*; I, 37, 15 *redegit*, al. — *mirari*] cum levi ironia dictum. — *strepitum*] cf. Epist. II, 2, 70 sqq. — *aulaeis et ostro*] „Consuetudo apud antiquos fuit, ut aulaea sub cameras tenderent, ut si quid pulveris caderet ab ipsis exciperetur.“ Schol. ad Sat. II, 8, 54. Ostrum significat peristromata purpurea lectorum tricliniarum. — *explicuere*] Sic proprie positum; etiam Sat. II, 2, 125. Ceterum vide ad Carm. I, 1, 4.

V. 17. *Andromedae pater*] Cephei

ortus tunc fuisse dicitur a. d. VII. Id. Iul., Procyonis (Antecanis) ipsis Idibus Iulii; Leonem sol intrabat a. d. XIII. Kal. Aug. Sic tribus stellis, ut solet Horatius, fervidissima pars aestatis indicatur. Vocabula *furit* et *vesani* propria sunt de diebus canicularibus. — *horridi Silvani*] Silvanus nemorum et arborum deus naturam silvarum ipse induit; nam „horrida siccae Silva comae“, ut est apud Iuvenalem IX, 12. — *Urbi*] Nimis acuti fuerunt qui ex hoc loco Maecenatem tum praefectum Urbi fuisse coniecerunt. Scilicet perpetuam Maecenas habuit Urbis, imperii sedis, curam; nec unquam vere fuit praefectus urbi. — *Seres*] Lassen Ind. Alterthumsk. I. p. 320 „Seren ist kein geographischer, sondern ein merkantilischer Name; die Voelker nannten sich selbst so nicht, sondern hiessen so

- Prudens futuri temporis exitum
 30 Caliginosa nocte premit deus,
 Ridetque si mortalis ultra
 Fas trepidat. Quod adest memento
 Componere aequus: cetera fluminis
 Ritu feruntur, nunc medio alveo
 35 Cum pace delabentis Etruscum
 In mare nunc lapides adesos
 Stirpesque raptas et pecus et domos
 Volventis una non sine montium
 Clamore vicinaeque silvae,
 40 Cum fera diluvies quietos
 Irritat amnes. Ille potens sui
 Laetusque deget, cui licet in diem
 Dixisse vixi: cras vel atra
 Nube polum pater occupato,
 45 Vel sole puro; non tamen irritum
 Quodcunque retro est efficiet neque
 Diffinget infectumque reddet
 Quod fugiens semel hora vexit.
 Fortuna saevo laeta negotio et
 50 Ludum insolentem ludere pertinax
 Transmutat incertos honores
 Nunc mihi, nunc alii benigna.

wegen ihrer Hauptwaare, der Seide.“
 — *regnata*] vide ad Carm. II, 6, 11.
 — *Tanais*] fluvii nomen pro accolis;
 similiter Carm. II, 9, 21. cfr. Carm.
 III, 8, 19. Bactriana, olim pars regni
 Persici, Augusti aetate partim Parthis
 partim Scythis subiecta erat. Haec
 igitur et Tanais Parthos significant et
 Scythas. Inest autem in hoc loco in-
 nocens ironia, qua nimia cura rerum
 publicarum reicitur. — *trepidat*] Soph.
 fragm. 515. D.: „*Θνητὴν δὲ φρεσὶν*
χωρὴ θνητὰ φρονεῖν, τοῦτο κατε-
δότας, ὥς οὐκ ἔστιν Πλὴν Διὸς
οὐδὲις τῶν μελλόντων Ταμίας, ὃ τι
χωρὴ τετελέσθαι.“ — *componere*] Per

metaphoram sic dicitur de rebus ad
 usum recte ordinandis, ut proprie cri-
 nes componere, togam componere. —
alveo] Sic optimi et antiquissimi co-
 dices; *aequore* ex docta fortasse inter-
 pretatione a nonnullis scribis receptum.
 Ceterum *aequor* de flumine optime di-
 citur, ut apud Catull. 11, 11 „Gallicum
 Rhenum, *horribile aequor*.“ — *Etru-*
scum] versus hypermeter. — *non sine*]
 vide ad Carm. III, 26, 2. — *amnes*]
 Sunt minora flumina quae influunt in
 Tiberim, a quo sumptam esse compa-
 rationem ostendit mare Etruscum. —
in diem] quotidie, ut Liv. XXII, 39.
 XXXI, 29. Frequentius tamen *in dies*.

Laudo manentem; si celeres quatit
 Pennas, resigno quae dedit et mea
 55 Virtute me involvo probamque
 Pauperiem sine dote quaero.
 Non est meum, si mugiat Africis
 Malus procellis, ad miseris preces
 Decurrere et votis pacisci,
 60 Ne Cypriae Tyriaeque merces
 Addant avaro divitias mari;
 Tunc me biremis praesidio scaphae
 Tutum per Aegaeos tumultus
 Aura feret geminusque Pollux.

CARMEN XXX.

Exegi monumentum aere perennius
 Regalique situ pyramidum altius,

— *atra nube*] Metaphora intelligitur ex Carm. II, 10, 15. — *diffinget*] vide ad Carm. I, 35, 39. — *vexit*] *avexit*, *abstulit*; altera explicatio *attulit*, *dedit*, nec bene congruit cum *fugiens* et *semel* atque efficeret ineptum oxymoron.

V. 51. *incertos honores*] De sententia confer Carm. I, 34, 14 sqq. — *resigno*] „Resignare antiqui dicebant pro rescribere.“ Festus p. 137. Rescribere autem quid sit vides ex h. l. Cicer. Att. XVI, 2; „Qui de residuis CCCC. HS. CC praesentia solverimus, reliqua rescribamus“ (per attributionem solvere, durch Anweisung bezahlen). Inde idem quod solvere. Sat. II, 3, 76. — *Africis*] cf. Carm. I, 1, 15. 14, 5. — *pacisci*] Senec. Qu. Nat. 4, 7: „negant posse fieri, ut cum grandine aliquis paciscatur et tempestates munusculis redimat.“ — *biremis scaphae*] quae duos non ordines remorum sed remos habet, ut ab uno homine gubernetur. Est igitur „duorum scalmorum navicula“ Cic. de orat. I, 38, 174. Etenim suis viribus fretum deorum tutela adiuvabit. Fiduciam Horatii futurum *feret* melius exprimit quam quod alii voluerunt

ferat. — *geminusque Pollux*] vide ad Carm. I, 3, 2 et I, 12, 25 sqq.

Carmen XXX.

Incertum est, utrum Horatius tres simul ediderit libros an duos primum, deinde tertium separatim. Hanc sententiam qui tuerentur, praesidium quaerunt ex Carm. II, 20 neque illud quidem satis firmum. Nam si illud carmen ad claudendos primum et secundum libros scripsisset, inopis sane ingenii fuisset tertio separatim aliquot annis post edendo libro simillimum adiciere epilogum. Utut est, hoc certum manebit, de quo nunc disputamus carmen absoluto iam tertio libro comitem esse annexum. Argumentum simplicissimum est: edidisse se dicit magnum monumentum quod nomen suum perpetuo sit celebraturum; meritam inde se gloriam petere neque arrogantiae aut vanitatis crimen subire. Qua de carminibus opinione nihil magis fuisse solitum apud antiquos poetas haec demonstrant argumenta: *Ennius* apud Cicer. Tusc. I, 15:

Nemo me lacrumis decoret nec
 funera fletu

Quod non imber edax, non Aquilo impotens

Possit diruere aut innumerabilis

5 Annorum series et fuga temporum.

Non omnis moriar multaque pars mei

Vitabit Libitinam: usque ego postera

Crescam laude recens, dum Capitolium

Faxit. Cur? volito vivo' per ora
virum.

Virgilius Georg. III, 8 sq.:

Tentanda via est, qua me quoque
possim

Tollere humo victorque virum voli-
tare per ora.

Propertius III, 1, 35:

Meque inter seros laudabit Roma
nepotes.

et *ibid.* v. 56 sqq.:

Carmina erunt formae tot monu-
menta tuae;

Nam neque *Pyramidum* sumptus ad
sidera ducti

Nec Iovis Elei coelum imitata
domus

Nec Mausolei dives fortuna se-
pulchri

Mortis ab extrema condicione va-
cant:

Aut illis *flamma* aut *imber* subducet
honores

Annorum aut ictu pondera victa
ruent.

At non ingenio quaesitum nomen
ab aevo

Excidet, ingenio stat sine morte
decus.

Ovidius Amor. III, 15, 7 sq.:

Mantua Virgilio gaudet, Verona
Catullo:

Pelignae dicar gloria gentis ego.
ibid. v. 19 sq.:

Imbelles elegi, genialis Musa, va-
lete,

Post mea mansurum fata super-
stes opus!

A. A. III, 339 sq.:

Forsitan et nostrum nomen misce-
bitur istis,

Nec mea Lethaeis scripta dabun-
tur aquis.

Met. XV, 871 sqq.:

Iamque *opus exegi*, quod nec Iovis
ira nec ignes

Nec poterit *ferrum* nec *edax* abo-
lere *vetustas*.

Cum volet, illa dies, quae nil nisi
corporis huius

Ius habet, incerti spatium mihi fi-
niat aevi:

Parte tamen *meliore* mei *super alta*
perennis

Astra ferar nomenque erit indelebile
nostrum;

Quaque patet domitis Romana poten-
tia terris,

Ore legar populi, perque omnia sae-
cula fama,

Si quid habent veri vatum praesagia,
vivam.

Martialis X, 2, 7 sqq.;

Pigra per hunc fugies ingratae flu-
mina Lethes

Et *meliore* tui parte *superstes*
eris.

Marmora Messallae findit caprificus
et audax

Dimidios Crispi mulio ridet equos.
At chartis nec furta nocent nec sae-
cula prosunt;

*Solaeque non norunt haec monu-
menta mori*.

In quibus locis vides non pauca ad
exemplum Horatii scripta esse.

V. 2. *situ*] mole. Comparari potest
adiectivi *situs* usus apud Tacitum Ann.
III, 38: „Philippopolim a Macedone
Philippo *sitam* (i. e. conditam) circum-
sidunt“, alias. — *impotens*] sibi non
temperans, vehementer furens. *Epod.*
16, 62. — *temporum*] *Simonid.* ap.
Schneidew. Del. p. 404: „*χρόνος*
ὀξύς ὀδόντας πάντα καταψήχει καὶ
τὰ βεβαίωτατα.“ — *Libitinam*] Venus
Libitina, dea funerum; in cuius aede
erant libitinarii, quibus qui mortui es-
sent ex lege nuntiabatur, eadem ratione
qua recens nati in templo Iunonis Lu-
cinae nominabantur. Inde *Livius* XL,
19: „Pestilentia in urbe tanta fuit, ut
Libitina vix sufficeret.“ cf. *Sat.* II,
6, 19. *Epist.* II, 1, 49. — *dum Ca-*
pitolium] in perpetuum; aeterna enim
Roma habebatur. cf. *Virg.* Aen. IX,

Scandet cum tacita virgine pontifex.

10 Dicar, qua violens obstrepit Aufidus

Et qua pauper aquae Daunus agrestium

Regnavit populorum, ex humili potens

Princeps Aeolium carmen ad Italos

Deduxisse modos. Sume superbiam

15 Quaesitam meritis et mihi Delphica

Lauro cinge volens, Melpomene, comam.

446. Dio Cass. Excerpt. Vatic. p. 154: „Σιβύλλης χρησμός ἐφάσκετο Καπιτώλιον κεφάλαιον ἔσεσθαι τῆς οἰκουμένης μέχρι τῆς τοῦ κόσμου καταλύσεως.“ — *tacita*] Silentium in sacris observabatur. Vestales virgines indicant *aeternam Vestam*; cf. Carm. III, 5, 11. Varro L. L. 5. p. 19. Müll.: „Sacra via, quae pertinet in arcem, qua sacra quotquot mensibus feruntur in arcem.“

V. 10. *qua violens*] ut Sat. I, 1, 58. Carm. IV, 9, 2. Noli tamen haec cum *dicar* artius coniungere; nam nomen Horatii et gloria tam angustis finibus non est circumscribenda. Potius originem poetae et natale solum significant. — *Daunus*] Epod. 3, 16. Ovid. Met. XIV, 510: „Iapygis arida Dauni Arva.“ De Dauno rege, Diomedis socero, Turni patre cf. Virg. Aen. X, 616. Ovid. Met. XIV, 458 sqq. — *populorum*] Genitivus ad graeci verbi βασιλεύειν usum hic positus exemplo

apud latinos videtur carere; unde iam in codd. emendare conabantur *regnator*. — *ex humili*] cf. Carm. II, 20, 5. Sat. I, 6, 45 sq. Epist. I, 20, 20. — *Aeolium carmen*] Hanc sibi laudem tribuit Horatius, transtulisse se lyricam poesim ex Graecia in Italiam, auxisse Italicos modos novo genere. Modi enim nihil sunt aliud nisi carminum et versuum genera, ut apud Ovidium Trist. II, 220: „*Imparibus legeres carmina facta modis*.“ ibid. III, 14, 47: „Threicio Scythicoque fere circumsonor ore Et videor Geticis scribere posse modis.“ cf. Hor. Epist. I, 3, 13. I, 19, 27. Aeolia appellantur lyrica carmina ab Alcaeo et Sapphone, Lesbo insula ortis. — *Delphica*] cf. Carm. IV, 2, 9. — *volens*] Solenne vocabulum in precibus. Liv. VII, 26, 4: „Si divus, si diva esset, qui sibi praepetem misisset, *volens propitiusque* adesset.“

Q. HORATHII FLACCI C A R M I N U M

LIBER QUARTUS.

C A R M E N I.

Intermissa, Venus, diu

Rursus bella moves? Parce, precor precor.

Non sum qualis eram bonae

Sub regno Cinarae. Desine, dulcium

5 Mater saeva Cupidinum,

Carmen I.

Scimus ex Suetoniana Horatii vita, quartum carminum librum Augusti rogatu ab Horatio superioribus tribus additum esse. Ad quam rem cum comparaveris locum Sueton. Aug. c. 89: „Componi tamen aliquid de se nisi et serio et *a praestantissimis* offende-
batur“, videbis quanti Augustus Horatium aestimaverit. Et veri simillimum est quod a scholiastis traditur, propter ea carmina in quibus Augusti eiusque privignorum laudes canantur, totum librum emissum esse ab Horatio. Qui cum lyricam suam poesim parvam et amatoriam esse saepenumero olim pronuntiasset, non potuit facere quin libro adderet amatoriam etiam carmina, sive recentia sive ex copia superioris temporis desumpta. Itaque hoc carmen, quod circa a. 739 scriptum est, eo consilio primum libri locum accepit, ut prologi quasi muovere fun-

geretur et quid lectores deberent expectare profiteretur. Dicit autem poeta, se quinquagesimum fere annum agentem ac senescentem non iam aptum esse amoribus Venerisque militiam cedere iunioribus; et tamen eo ipso tempore, quo Veneris potestatem deprecatur, novis se amoribus captum sentit. Argumentum igitur carminis cernitur in certamine, quod est inter aetatem et amoris potestatem. Amor ipse fictus est; versus 5 consulto ex Carm. I, 19 repetitus, ut aliud tempus, amoribus aptum, indicetur.

V. 1. *intermissa bella*] Compara Carm. I, 19. III, 26. — *bonae Cinarae*] De Cinara olim ab Horatio vere amata vide ad IV, 13, 21. Bonam appellat diu mortuam, ut Lucret. III, 1037: „Lumina suis oculis etiam bonus Ancu' reliquit.“ — *circa lustra decem*] Horatius decem lustra implevit a. d. VI. Id. Decembr. a. 739; *circa*

- Circa lustra decem flectere mollibus
 Iam durum imperiis; abi
 Quo blandae iuvenum te revocant preces.
 Tempestivius in domum
 10 Pauli purpureis ales oloribus
 Comissabere Maximi,
 Si torrere iecur quaeris idoneum:
 Namque et nobilis et decens
 Et pro sollicitis non tacitus reis
 15 Et centum puer artium
 Late signa feret militiae tuae,
 Et quandoque potentior
 Largi muneribus riserit aemuli,
 Albanos prope te lacus
 20 Ponet marmoream sub trabe citrea.
 Illic plurima naribus

voc. incertum relinquit, utrum hoc ipso anno an paulo ante vel post scriptum sit carmen. — *flectere*] metaphorā sumpta ab equis (cf. Carm. III, 7, 25); inde etiam adiectiva *mollis* et *durus*. — *te revocant*] Ingeniosa quidem sed non necessaria coniectura Peerlkampii est *rite vocant*, nam *revocant* non est iterum vocant, sed „a me ad se vocant.“ Sat. II, 3, 264. — *tempestivius*] magis opportune, ut Ovid. Trist. IV, 10, 81: „Felices ambo tempestiveque sepultos.“ — *in domum*] Boni etiam codices *in domo*; rectius tamen illud propter motum qui inest in comissatione. — *Pauli*] Videtur esse Paulus Fabius Maximus cos. a. u. 743. Quem ne mireris versu 15 *puerum* nominari, cogita hunc valde gratiosum fuisse apud Augustum neque iam observatas esse leges annales: Alii, ut Orellius et Walckenaerius, eius filium significari putant, ad quem dulcissimae Ovidii epistolae ex Ponto scriptae sunt; secundum Walckenaerium hic puer a. 739 vigesimum fere annum agebat. — *purp. al. oloribus*] Ipsa Venus siquidem alata non est, vehitur tamen alitibus. *Purpureum* autem non rubicundum est sed nitidum ac splendens; ita etiam *nivem*

purpuream dicere potuerunt latini poetae. — *iecur*] Apud antiquos iecur omnium cupiditatum sedes est, etiam amoris. Epist. I, 18, 72. — *torrere*] Suspensum hoc verbum est et ex verbo *quaeris* et ex adi. *idoneum*: si quaeris torrere iecur, quod idoneum sit ad torrendum.

V. 13. *decens*] formosus, ut III, 27, 53. Ad ea quae sequuntur compara Carm. II, 1, 13. — *centum artium*] cf. Cic. Rose. Am. 41, 120. Ovid. Rem. Am. 713: „Nec solam faciem, mores quoque confer et artes.“ — *militiae tuae*] vide ad Carm. III, 26, 2. — *quandoque*] quādoquēque, ut Carm. IV, 2, 34. A. P. 359. — *Largi*] In aliis *largis*; verum rectius largus habetur aemulus, quippe qui liberalitate sua puellarum animos flectere studeat. Sic venuste contra Pauli multas artes una aemuli divitiarum copia ponitur. — *Albanos*] Praeter Albanum lacum proprie dictum tres ibi alii et proximi fuerunt lacus; inde pluralis numerus. Videtur Paulus villam ibi habuisse. — *trabe citrea*] Sic in antiquissimis codicibus; *Cypria* ex corruptione et prava memoria loci Carm. I, 1, 13 ortum. Citrus arbor bene olens et pretiosissima ex Africa petebatur. Apud

- Duces thura, lyraeque et Berecynthiae
 Delectabere tibiae
 Mixtis carminibus non sine fistula;
 25 Illic bis pueri die
 Numen cum teneris virginibus tuum
 Laudantes pede candido
 In morem Salium ter quatient humum.
 Me nec femina nec puer
 30 Iam nec spes animi credula mutui
 Nec certare iuvat mero
 Nec vincere novis tempora floribus.
 Sed cur heu, Ligurine, cur
 Manat rara meas lacrima per genas?
 35 Cur facunda parum decoro
 Inter verba cadit lingua silentio?
 Nocturnis ego somniis
 Iam captum teneo, iam volucrem sequor
 Te per gramina Martii
 40 Campi, te per aquas, dure, volubiles.

CARMEN II.

Pindarum quisquis studet aemulari,
 Iule, ceratis ope Daedalea

Persium I, 53 inveniuntur *lecti citrei*. — *Berecynthiae tibiae*] cf. Carm. III, 19, 20; de dativo Epod. 9, 5. Indicatur concentus trium instrumentorum; cui accedunt mox cantus et saltatio. cf. IV, 15, 30. — *bis die*] matutino et vespertino tempore. — *morem Salium*] cf. Carm. I, 36, 12. — *ter quatient humum*] cf. Carm. III, 18, 16 et I, 37, 2.

V. 30. *mutui*] cf. Carm. II, 12, 15. — *novis floribus*] Inde concludas, veno tempore carmen scriptum esse. — *Ligurine*] fictum nomen. — Ad eundem est Carm. 10. — *rara*] cf. Carm. I, 13, 6. Egrege intimus animi sensus furtim et raro cadentibus lacrimis exprimitur. Huc accedit *silentium*, de

quo cfr. Epod. 11, 9. — *per gramina*] In somniis sequi Ligurinum sibi videtur currentem per Campum, natantem per Tiberim; ibi enim quam maxime sese prodit pueri venustas. Cfr. Carm. III, 12, 7 sqq. Et cf. Ovid. Trist. V, 1, 32: „Mollia quot Martis gramina campus habet.“

Carmen II.

Anno 738 Germani populi, Usipetes, Tencteri et Sugambri, excursiones in Galliam trans Rhenum fecerant neque equitatum solum Romanum contra se missum vicerant sed etiam M. Lollio legato gravem cladem intulerant. Quos ut ulcisceretur Augustus ipse in Gal-

Nititur pennis vitreo daturus

Nomina ponto.

5 Monte decurrens velut amnis, imbres

Quem super notas aluere ripas,

Fervet immensusque ruit profundo

Pindarus ore,

Laurea donandus Apollinari,

liam profectus nominis sui magnitudine tantopere Germanos terruit, ut obsidibus datis in suos fines redirent. Quo facto restitutoque honore imperii Augustum Romam rediturum omnes expectabant, cf. Carm. IV, 5, 2 sqq.; quae tamen eos spes fefellit; nam aliis interea bellis exortis in Gallia imperator remansit neque rediit nisi a. 741 pacatis rebus Germanicis, Gallicis, Hispanicis. Iam cum a. 739 de victis Sugambriis nuntius Romam pervenisset, probabile est Horatium a Iulo Antonio, altero M. Antonii triumviri ex Fulvia filio, gratioso apud Augustum (fuit enim coniux Marcellae maioris, sororis M. Marcelli generi Augusti, quae ante nupsit Agrippae) poeticisque studiis deditissimo ad canendas Pindarica ratione novas Augusti laudes excitatum hoc carmen fecisse. Ac primum quidem quam magnus sit Pindarus ostendit (str. 1—7); contra quem postquam octava strophæ suas facultates posuit, reliqua parte carminis id quod a se erat postulatum ad Antonium quasi relegat, dum suo more inter recusandum tantum laudis addit, quantum ipse sibi videtur posse impertire, finemque et carminis et comparationis suarum virium cum Antonio invenit victimarum certamine, quas et sibi et Antonio festo redeuntis Augusti die immolandas esse censet. Victimarum eadem ratio est quae poetiarum utriusque facultatum. Antonio, qui Diomedeam duodecim libris scripserat, immolandi sunt decem boves totidemque vaccae, Horatio unus vitulus candida nota in fronte insignis, reliquis partibus fulvus. Nimirum Horatius parvum se esse poetam dicit, aptum ad unum tantum poematum genus, amatorium; sublimia genera, Pindaricum et epicum, a se esse aliena. Qua ratione cum extremam partem car-

minis intellexeris, ab iniqua vituperatione abstinebis. Octava strophæ ipse Horatius inter Pindaricam poesim et magna quae sunt proposita Augusti facinora utrisque impar ponitur; quare carminis oeconomiam perfectam recte nominabis. cf. Carm. I, 6, II, 12, IV, 15.

V. 1. *aemulari*] Est discrimen inter imitari et aemulari; qui aliquem aemulatur, aequare studet et superare, non item qui imitatur. — *Iule*] Sic omnes codices. Sed Peerlkampius *Iulum* neminem esse nisi Aeneae filium Ascanium neque Horatianae videri consuetudinis eundem hominem bis diverso nomine alloqui ratus ille scribendum suspicatus est, ut hic non certus aliquis homo, infra v. 26 Antonius Rufus, fabularum scriptor, significaretur. Sed Augusti aetate quae olim cognomina erant etiam pro praenominibus dari solebant; sic superiore carmine *Paulus* Fabius Maximus. Iuli nomen apud Virgilium (Aen. I, 267. 288) graeca pronuntiatione trisyllabum, apud Horatium bisyllabum. — *daturus nomina*] ut ab Icaro mare Icarium nominatur. De plurali *nomina* cf. Carm. III, 27, 76. — *vitreo*] a natura sumptum aquae pelliculae, ut Virg. Aen. VII, 759. Hor. Carm. III, 13, 1. — *amnis*] Hoc vocabulum ex sublimiori scribendi genere Augusti demum aetate saepius usurpatum magnum aliquod flumen vel rapidum torrentem significat. cf. Cic. orat. 12, 39: „Alter (Herodotus) sine ullis salebris quasi sedatus amnis fluit; alter (Thucydides) incitator fertur.“ Id. Fin. II, 1, 3: „Cum fertur quasi torrens oratio, quamvis multa cuiusquemodi rapiat, nihil cet.“ Propert. III, 16(17), 40: „Qualis Pindarico spiritus ore tonat.“ Deinde confer Sat. I, 7, 27. 10, 62. — *notas*] consuetas. Carm. I, 2, 10. Virg. Aen. VI, 221.

- 10 Seu per audaces nova dithyrambos
 Verba devolvit numerisque fertur
 Lege solutis;
 Seu deos regesve canit, deorum
 Sanguinem, per quos cecidere iusta
 15 Morte Centauri, cecidit tremendae
 Flamma Chimaerae;
 Sive quos Elea domum reducit
 Palma coelestes pugilemve equumve
 Dicit et centum potiore signis
 20 Munere donat;
 Flebili sponsae iuvenemve raptum
 Plorat et vires animumque moresque
 Aureos educit in astra nigroque
 Invidet Orco.
 25 Multa Dircaeum levat aura cyncum,
 Tendit, Antoni, quoties in altos
 Nubium tractus. Ego apis Matinae

XI, 195. Tacit. Agric. 18: „nota vada.“ — *laurea*] cf. Carm. III, 30, 15. IV, 3, 6. *Apollinaris* forma maxime de ludis Apollinaribus etiam in pedestri oratione usitata; poetae contra qui hexametris usi sunt aliam magis sibi commodam usurpant, *Apollineus*. — *audaces dithyrambos*] Cic. de orat. III, 48: „Inde ille licentior et divitior fluxit dithyrambus, cuius membra et pedes sunt in omni locupletis oratione diffusa.“ Per totum locum vides Horatium constantem esse in imagine fluminis. — *nova verba*] Aristot. Poet. 22, 14: „τῶν δὲ ὀνομάτων τὰ μὲν διπλᾶ μάλις ἀρμόττει τοῖς διδυράμβοις.“ — *lege solutis*] Dithyrambicum genus variis animi motibus versuum numerorumque genera varia accommodavit neque tulit certam metrorum repetitionem. Praeter dithyrambos describuntur deinceps paeones et hymni, epinicia, threni; singula singulis strophis.

V. 13. *regesve*] semideos esse deorum ostendit sanguis. Sunt autem Theseus, Pirithous, Bellerophon, alii

cf. Carm. I, 18, 8. I, 27, 23. II, 17, 13. — *iusta morte*] propter raptatam Hippodamiam, Pirithoi novam nuptam. — *cecidere*] Eiusdem vocabuli eadem forma in eodem versus loco posita et sonum efficit gratum et vigorem addit orationi. — *Elea*] Olympica, ut apud Virgilium Georg. III, 202. cf. Ovid. Met. V, 576. Vitruv. Lib. 9. Praef.: „graecorum maiores hieronicis ita magnos honores constituerunt, uti non modo in conventu stantes cum palma et corona ferant laudes, sed etiam, cum revertantur in suas civitates cum victoria, triumphantes quadrigis in moenia et in patrias invectantur eoque publica perpetua vita constitutis vectigalibus fruuntur.“ — *coelestes*] cf. Carm. I, 1, 6. — *pugilemve*] cf. A. P. 84. Carm. IV, 3, 3. — *signis*] statuus. — *moresque*] Sunt duo versus hypermetri. — *iuvenemve*] Assumenda particula *si* ex praecedentibus. — *invidet Orco*] nam „Coelo Musa beat“, ut est Carm. IV, 8, 29. — *Dircaeum*] Pindarus Thebanus a fonte Dirce sic appellatus. — *Antoni*]

More modoque

Grata carpentis thyma per laborem

30 Plurimum circa nemus uvidique

Tiburis ripas operosa parvus

Carmina fingo.

Concines maiore poëta plectro

Caesarem, quandoque trahet feroces

35 Per sacrum clivum merita decorus

Fronde Sugambros;

Quo nihil maius meliusve terris

Fata donavere bonique divi,

Nec dabunt, quamvis redeant in aurum

40 Tempora priscum.

Concines laetosque dies et Urbis

Publicum ludum super impetrato

Fortis Augusti reditu forumque

Litibus orbum.

45 Tum meae, si quid loquar audiendum,

Vocis accedet bona pars, et O sol

Pulcher, o laudande! canam recepto

Caesare felix;

Teque dum procedis, Io Triumphæ,

De altera hac allocutione bene notatum est ab Orellio, citari Antonium tanquam testem, qui quam vera haec sint ipse sit expertus, deinde parari ad insequentia transitum. — *apis Matinae*] Plat. Ion. p. 534 A.: „*ἄγονσι γὰρ πρὸς ἡμᾶς οἱ ποιηταί, ὅτι ἀπὸ κρηνῶν μέλι ῥύτταν ἐκ Μουσῶν κήπων τινῶν καὶ ναπῶν δρεπόμενοι τὰ μέλη ἡμῖν φέρονσι ὥσπερ αἱ μέλιτται.*“ Pindaro grandia etiam carmina ultro fluunt; Horatio necessaria est apum sedulitas ac plurimus labor. — *Matinae*] Mons Matinus in Apulia, ubi mel optimum. Carm. III, 16, 33. II, 6, 15. I, 28, 3. — *thyma*] quoniam mella reddunt. Epist. I, 3, 21. — *Tiburis*] cf. Carm. II, 6, 5. III, 29, 6. Ripae autem sunt Anienis; quare Bentleyi coniectura *rivos* nihil opus est.

V. 33. *plectro*] vide ad Carm. II, 1, 40. Ceterum vocabula *maiore plectro* et cum *concines* et cum *poeta* coniungenda sunt; nam ne *poeta* nomen necessario ornatu careret, prohibitum est consueta vocabulorum positione. — *quandoque*] vide ad Carm. IV, 1, 17. — *sacrum clivum*] pars acclivis viae sacrae, qua triumphantes ad Capitolium ibant. cf. Epod. 7, 7. Martial. I, 70, 5: „*Inde sacro veneranda petes Palatia clivo.*“ Sed Augustus a. 741 confectis rebus Germanicis, Gallicis, Hispanicis honores a senatu decretos non accepit et noctu urbem intravit. — *Sugambros*] Graece *Σύγανβοι* et *Σύγανβοι*, inter Rhenum, Sigiam et Luppian habitantes. In antiquissimis Horatii codd. scriptum est *Sygambros*. — *nihil maius*] cf. Epist. II, 1, 15

50 Non semel dicemus, Io Triumphæ,
 Civitas omnis dabimusque divis
 Thura benignis.
 Te decem tauri totidemque vaccae,
 Me tener solvet vitulus, relictæ
 55 Matre qui largis iuvēnescit herbis
 In mea vota,
 Fronte curvatos imitatus ignes
 Tertium lunæ referentis ortum,
 Qua notam duxit niveus videri,
 60 Cetera fulvus.

CARMEN III.

Quem tu, Melpomene, semel
 Nascentem placido lumine videris,

sqq. — *boni divi*] cf. Carm. IV, 5, 1. — *impetrato*] Supersunt nummi a. u. c. 738 cum inscriptione S. P. Q. R. V. S. Pro S. ET RED. AVG. h. e. Sen. pop. que Rom. vota suscepta pro salute et reditu Augusti. — *litibus orbis*] Festis diebus iustitia indicebantur. — *loquar*] rectius quam *loquor*, quod est in nonnullis codicibus. Nam: „si quid canere, inquit, potero quod dignum sit tanto die, ego vero publicæ laetitiae non deero.“ — *tequedum procedis*] Sic antiquissimi et plurimi codices, nisi quod unus antiquus Bernensis habet *procedit*. Illud rectius; etenim ad triumphum ipsum est oratio, id quod scholiastæ iam viderunt. De qua re cf. Ovid. Met. I, 560. Trist. IV, 2, 51 „tempora Phoebea lauro cingentur, „ioque Miles „io“ magna voce „triumphe“ canet.“ et Liv. XLV, 38: „(Milites) triumphum nomine cient suasque et imperatoris laudes canentes per urbem incedunt“; cum quibus conferas Hor. Epod. 9, 21. Invocatur igitur tanquam deus Triumphus; quare sic locum interpretare: „Dum tu, Triumphæ, procedis; omnes te cives non semel invocabimus, sed continuo clamore dicemus Io triumphæ.“ In qua re hoc egregium est, quod iteratus civium clamor bis positus verbis *io*

triumphe in fine duorum versuum ad nostras quoque aures paene adducitur. — *thura*] Solebant in plateis et areis, per quas pompa triumphalis ducebatur, thura in aris ibi exstructis adoleri. — *Te*] Redit oratio ad Antonium, ad quem transitio valde expeditur interposita prima pluralis numeri persona. — *solvēt*] voto a me concepto. — *iuvēnescit*] cf. Carm. III, 23, 11. — *fronte*] Cornua non sunt maiora quam lunæ tertio die post novilunium. — *niveus videri*] λευκὸς ἰδέσθαι. Ad totam victimæ descriptionem compara Carm. III, 13, 4. Apud Moschum 2, 84 taurus, qui Europam fefellit, similis est: „Τοῦ δ' ἦτοι τὸ μὲν ἄλλο δέμας ξανθόχροον ἔσκεν, Κύνλος δ' ἀργύρεος μέσσω μάρμαρκε μετώπῳ.“ Cf. Hom. II. XXIII, 454. Contrarius est taurus Pasiphaæ apud Ovidium A. A. I, 291: „Signatus tenui media inter cornua nigro, Una fuit labes, cetera lactis erant.“

Carmen III.

Argumentum carminis hoc est. „Quem nascentem, inquit Horatius, Musæ benignis oculis adspexerunt, eum qui aliunde veniunt honores non alliciunt (in quibus describendis hono-

Illum non labor Isthmius

Clarabit pugilem, non equus impiger

5 Curru ducet Achaico

Victorem, neque res bellica Delii

Ornatum foliis ducem,

Quod regum tumidas contuderit minas,

Ostendet Capitolio;

10 Sed quae Tibur aquae fertile praefluunt

Et spissae nemorum comae

Fingent Aeolio carmine nobilem.

Romae principis urbium

Dignatur suboles inter amabiles

ribus eandem sequitur poeta rationem quam ante erat secutus in Carm. I, 1; septem enim versus 3—9 inter Graecos honores dividuntur et Romanos), sed naturae amoenitates in nemoribus et agris capiunt dulcissimisque sensibus implent. Ex quibus ego quoque sum; nam me, quidquid clamant derogantque obtrectatores, Romani vatem praedicant. De quo honore si licet gloriari, ita tamen gloriior, ut cui tantum ego beneficium debeam, bene sciam. Tuum igitur est, Musa, quidquid sum et quidquid cano; poetica facultas deorum est hominum pectora intrantium. Dividitur igitur carmen in duas partes, superiorem generalem (1—12), inferiorem specialem; neque difficile est ad intelligendum, id consilium secutum esse poetam, ut poetas non sibi sed Musarum potestati carmina debere doceret. Quam de poetica arte sententiam si cum superiore carmine (vv. 27—32) pugnare quis credat, eum liquet non bene perspexisse, quam graviter Tiburis uvida arva et nemora in utroque carmine posita Horatii constantiam demonstrent; quo accedit, quod in utroque carmine poetarum animos a magnis rebus gestis gerendisque alienos esse ponitur. De tempore quo sic Horatius cecinerit nihil invenias certi; suspicabantur tamen viri docti, ortum esse carmen cum Horatius a. 737 ab Augusto iuberetur saeculare carmen componere; probabilius tamen est Weberi senten-

tia, scriptum esse carmen a poeta ad indicandam suam laetitiam ob laudem ex carmine saeculari a populo et principe acceptam.

V. 1. *semel*] Adverbium hoc ex frequenti Latinorum usu sic usurpatur, ut et eae res significantur quae non saepius quam semel fiant et quae cum semel sint factae, perpetuam vim teneant. Exempla sint Cic. pro Deiot. 3, 9, 14, 39 et Virgil. Aen. XI, 418. Posteriores et deteriores scriptores dixerunt *semel et in perpetuum*. — *lumine videris*] Hesiod. Theog. 82: "Ὀντινα τιμήσουσι Διὸς κοῦραι μεγάλοιο Γεινόμενόν τ' ἐσιδῶσι — Τῷ μὲν ἐπὶ γλώσση γλυκερὴν χεῖρυσιν αἰοιδήν. — *labor Isthmius*] de certaminibus in ludis Isthmiis, qui in honorem Neptuni quinto quoque anno celebrabantur. De eadem re Graeci *πόνος, κάματος*. — *clarabit*] vocabulum poeticum, ne a Cicerone quidem in versibus (de divin. I, 12 fin.) sprellum. — *Achaico*] Tota Graecia a Romanis tunc Achaia appellabatur. Intelligitur autem curriculum Olympicum, nam *ducet* non est *reducet in patriam*, quod epitheton *impiger* iam debuit ostendere. — *Delii foliis*] Laurus Apollini in insula Delo nato sacra fuit. — *contuderit*] cf. Carm. II, 12, 12, III, 6, 10. — *praefluunt*] i. e. praeterfluunt, ut Carm. IV, 14, 26. Liv. I, 45. XLIV, 31. Virg. Aen. VI, 705. Non est recipiendum *perfluunt*, quod etiam in codd. legitur. — *comae*] Carm.

- 15 Vatum ponere me choros,
 Et iam dente minus mordeor invido.
 O testudinis aureae
 Dulcem quae strepitum, Pieri, temperas,
 O mutis quoque piscibus
 20 Donatura cycni, si libeat, sonum,
 Totum muneris hoc tui est,
 Quod monstror digito praetereuntium
 Romanae fidicen lyrae:
 Quod spiro et placeo, si placeo, tuum est.

CARMEN IV.

Qualem ministrum fulminis alitem,
 Cui rex deorum regnum in aves vagas

I, 21, 5. — *Aeolio carmine*] cf. Carm. II, 13, 24. III, 30, 13.

V. 13. *principis urbium*] Martial. XII, 8, 1: „Terrarum dea gentiumque Roma, Cui par est nihil et nihil secundum.“ — *suboles*] Romanum genus; nam per iuventutem Romanam poetae laus ad posteros quoque pervenit. — *dente invido*] Epod. 6, 15. Epist. I, 18, 82. Ovid. Trist. IV, 10, 123: „Nec qui detrectat praesentia *Livor* iniquo Ullum de nostris *dente momordit* opus.“ Cic. Balb. 26: „More hominum invident, in conviviis rodunt, in circulis vellicant: non illo inimico sed hoc maledico *dente* carpunt.“ De re cf. Carm. II, 20, 4. — *testudinis aureae*] Poetis aureum est quidquid est praeclarum et egregium. cf. Carm. IV, 2, 23. Pind. Pyth. 1, 1: „Χρυσέα φόρμιγγ.“ — *strepitum*] de grato citharae sono, ut Ep. I, 2, 31. 14, 26. — *Pieri*] Musae hoc nomen traxerunt a Pierio monte Thessaliae in confinio Macedoniae. Frequens pluralis *Pierides*, rarus singularis. — *donatura, si libeat*] Idem genus constructionis quod iam observatum est ad Carm. II, 3, 4. — *muneris*] beneficii, meriti. De genitivo compara Cic. Tusc. I, 48, 114: „*Hoc ei muneris* pro sua missione dedisse dicitur.“ Ovid. Trist. I, 5, 6 „Si quid adhuc

ego sum, muneris omne tui est.“ — *monstror*] Hoc imitatus est Persius I, 28: „At pulchrum est digito monstrari et dicier Hic est.“ Martial. V, 13, 3: „sed toto legor orbe frequens, et dicitur Hic est.“ id. IX, 98, 3: „Rumpitur invidia, quod turba semper in omni Monstratur digito, rumpitur invidia.“ — *quod spiro*] *Quod* particula est, non accusativus. Sententia haec: quod movet me spiritus poeticus, quod poeta sum. cf. IV, 6, 29. Similiter Ovidius Trist. IV, 10, 115: „Ergo quod vivo durisque laboribus obsto, Gratia, Musa, tibi.“

Carmen IV.

Raeti et Vindelici qui ex Alpibus in Italiam Galliamque saepe excursiones fecerant, a. u. c. 739 a Druso primum, deinde cum Tiberius fratri bellandi adiutor missus esset, ab Augusti privignis coniunctis viribus et divisis copiis ad summa Alpium iuga fugati superatique sunt. Quam victoriam Horatius Augusti, ut videtur, iussu celebraturus ita rem instituit, ut hoc carmine Drusum, decimo quarto Tiberium magis ornaret, neutrum in alterutro plane omitteret. Nam in hoc quoque Tiberii, etsi nomen eius non nominatur, aperta tamen mentio fit v.

Permisit expertus fidelem
Iuppiter in Ganymede flavo,
5 Olim iuventas et patrius vigor
Nido laborum propulit inscium

28; deinde recta versuum 17 sq. interpretatio utrumque iam populum Raetorum et Vindelicorum victum esse docet. Unde manifestum est, utrumque carmen eodem tempore compositum esse neque — id quod alii voluerunt — quartum post primam Drusi victoriam, quartum decimum anno demum 741 reverso ex Gallia Augusto. Tantum tamen his tribuendum est, ut cum carmen 14 post reversum Augustum (vide ibi v. 8 *nuper* et extremam partem carminis) scriptum sit, ne hoc quidem quartum antea compositum videri. Sed haec hactenus. Compositionem carminis hanc esse puto; „Qualem aquilam iuvenem, regem avium, iuvenilis vigor et patrius animus ex nido pellit, ut iam verno tempore quid alis valeat tentet, deinde vividus impetus ovibus terribilem hostem reddit, tum pugnandi cupiditas et praedae amor ad certamen etiam cum ferocibus anguibus ineundum agit (in qua re videas tres animi et roboris quasi gradus; prorsus Horatiano more, quapropter nihil hic ut Horatio indignum tentandum), talem Raeti Drusum in Alpibus conspexerunt, talem etiam Vindelici, antiquitus bellicosissimum genus nobisque ad hunc diem paene ignotum (hanc sententiam inesse puto vv. *quibus* — *omnia* 18—22, a multis viris doctis Horatio abiudicatis), viderunt, quorum victrices catervae imperatoria virtute iuvenis Romani (nam Drusus h. a. natus erat annos 25) superatae et reiectae (h. e. *revictae* v. 24) senserunt, quid nativa virtus bene culta, quid Augusti patrius in Nerones animus efficere posset.“ (Hucusque prima sententia pergit. Clauditur versus 28 nomine *Nerones*, incipit v. 29 voce *fortes*; hoc quoque consulto factum a poeta, nam *Nero* in Sabina lingua *fortem* significat). „Neque potuit aliter res fieri, nam fortes creantur fortibus, quaeque bene nata sunt ea recto cultu magnopere etiam augentur (v. 29—36. Hae duae strophae proxime praecedentem sententiam bene illustrant.

Ab hoc inde loco altera pars carminis incipit; nam cum ante Neronum, imprimis Drusi gloria efferatur, iusta Augusti commemoratione facta adiungitur laudatio totius Neronum familiae). Quid Romanum imperium Neronibus debeat testatur Metauri flumen, testatur Hasdrubal, testatur ille dies, quo nova lux oborta est Romano nomini, ex quo Hannibal per Italiam saeviebat ut ignis et tempestas (h. l. observandum pugnam ad Metauri flumen triplici ratione significari, loco, hostium duce, die). Hic enim dies fortunam Romanorum mutavit; quae adversa fuerat, ea propitia rursus facta cum diis faventibus rediit, ut cognosceret Hannibal, occidisse sua astra.“ Hannibale per omnem Romanorum memoriam nemo fuit terribilior: Quare scite ac prudenter Horatius fecit, quod tantum hostem ita intulit, ut Romam urbem, quae tantos cives aleret quantus esset Claudius Nero, non posse ulla unquam potestate dirui ipse palam fateretur. Hoc secutus est Horatius consilium in addenda oratione Hannibalis a Peerlkampio iniuria eiecta. Populus, cuius cives fortissimi sunt omnes, nunquam vincitur. En sententiam, quae fabulis, sententiis, figuris illustratur ac probatur. Extrema quoque strophæ Hannibalis est; non semel Horatius carmen subito videtur magis abruptum quam abruptum. cf. Carm. I, 17. I, 15. III, 11. III, 27.

V. 1. *Qualem*] Fuit qui hanc ubertatem comparationis vituperaret, non memor, solere poetas gravitatem rerum comparationum copia exornare (cf. Hom. II. II, 455 sqq.) neque id anxie spectare, ut omnes partes imaginum respondeant comparatae rei, sed ordinandi causa plura etiam addere. Deinde quod v. 17 *talem* voc. omisum est, ne id quidem exemplo caret; vide Virg. Aen. III, 641 sqq. — *ministerium fulminis*] Virg. Aen. V, 255. De Ganymede lege Hom. II. XX, 232. Hymn. in Vener. 203. Hor. Carm. III, 20, 16. — *olim*] vide ad Carm. II, 10, 17. — *propulit*] vide ad Carm. I, 1, 4.

Vernique iam nimbis remotis
 Insolitos docuere nisus
 Venti paventem; mox in ovilia
 10 Demisit hostem vividus impetus,
 Nunc in reluctantes dracones
 Egit amor dapis atque pugnae;
 Qualemve laetis caprea pascuis
 Intenta fulvae matris ab ubere
 15 Iam lacte depulsum leonem,
 Dente novo peritura vidit:
 Videre Raeti bella sub Alpibus
 Drusum gerentem, Vindelici — quibus
 Mos unde deductus per omne
 20 Tempus Amazonia securi

propulit ex antiquis codicibus, quamquam in aliis etiam vetustis *protulit*. Illud tamen fortius. — *laborum*] volatus et certaminum. — *nisus*] quia alis volucres quasi nituntur. — *paventem*] Ne hoc quidem inane est; ex omnibus enim partibus aquilae imago mirifica quadam varietate magnoque etiam splendore quasi pingitur. Talem profecto orationis ornatum verborumque proprietatem cuiusvis non est versificatoris invenire. Ne id quidem facile fuit, in tanta verborum copia perspicuitati quoque dilucide dispositis vocabulis consulere. — *demisit*] ex natura rapacium volucrum ex alto nubium tractu subita vi in praedam sese deicientium. — *reluctantes*] Plin. H. N. X, 4: „Draco multiplici nexu alas aquilae ligat, ita se implicans ut simul decidat.“ cf. Virg. Aen. XI, 751 sqq. — *dapis*] Fest. p. 51: „Daps apud antiquos dicebatur res divina, quae fiebat aut hiberna semente aut verna.“ A poetis deinde et senioribus scriptoribus a sacris rebus ad profanas etiam translata vox est. — *iam lacte*] Cum post *ab ubere* vocabula molestum videretur *lacte* iis, qui *ubere* substantivum esse putarent, partim mutarunt *iam mane*, *iam sponte*, *iam macte*, *iam iamque*, paulo ante, partim satis inepte opinabantur, addere voluisse poetam, a cuius rei usu pro-

hiberetur leo ab ubere matris depulsus, partim *lacte depulsus* quodam modo in unam notionem coalescere suspicati sunt. Sed tantum abest, ut quominus coniungamus *ab ubere lacte* (cf. Carm. II, 19, 10) obstare quidquam videatur, ut particula *iam* aliam interpretationem plane refellat. Hoc enim dicit Horatius: etiamsi uber est matris lac, quo tempore leo qui carne vescatur vix idoneus est, tamen insitus vigor catulum iam depellit acuitque ut oves aggrediatur. Nuper alia etiam coniectura proposita est: *iam tacta*; tangere enim dici de rebus, quae magna vi magnoque impetu in aliquid irruant. — *videre*] Iterato hoc verbo ex praecedente versu omnis istius comparationis vis huc transfertur.

V. 17. *Raeti*] Sic in plurimis et antiquissimis codicibus et editionibus; primus Bentleius ex coniectura *Raetis*, quod cum in duobus tribusve libris Mstis inventum esset, receperunt recentiores editores prope omnes. Non recte, opinor. Etenim si iam tunc inter Raetos et Vindelicos accurate discrimen statuebant Romani, quomodo tandem Vindelici sub Raeticis Alpibus Drusum bellum gerentem potuerunt videre? Quare aut cum scholiastis Horatianis et Servio ad Virg. Aen. I, 247 *Raeti Vindelici* uno nomine coniungendi sunt, ita ut Vindelicos, igno-

- Dextras obarmet quaerere distuli,
 Nec scire fas est omnia; — sed diu
 Lateque victrices catervae
 Consiliis iuvenis revictae
- 25 Sensere quid mens rite, quid indoles
 Nutrita faustis sub penetralibus
 Posset, quid Augusti paternus
 In pueros animus Neronēs.
- Fortes creantur fortibus et bonis;
 30 Est in iuvenis, est in equis patrum
 Virtus, nec imbellem feroces
 Progenerant aquilae columbam;
 Doctrina sed vim promovet insitam
 Rectique cultus pectora roborant:
- 35 Utcunque defecere mores,
 Indecorant bene nata culpaē.
- Quid debeas, o Roma, Neronibus,
 Testis Metaurum flumen et Hasdrubal
 Devictus et pulcher fugatis
- 40 Ille dies Latio tenebris,

tam prope gentem, Raetorum partem Horatius cum aequalibus habuisse videatur, aut commate posito post *gerentem* anacoluthia in hoc loco videnda, et ita quidem, ut Horatium, cum scribere voluisset *Vindelici* — *sensere*, interposita longiore sententia nominativi quasi immemorem alterum nominativum *victrices catervae* addidisse putandum sit. Quae quidem ratio adiumentum habet ex particula *sed* in eiusmodi structura satis frequenti. Nam ne hoc quidem placet *gerentem et Vindelici*, quod est in nonnullis Mss. In sententia autem quae sequitur *quibus* — *omnia* si quid est quod poetam dedecet, in ipso Horatio tu quaere culpam, non in innocenti nescio quo scriba vel interprete. Qui delent hos versus, scribunt *Vindelici et diu*. — *fas est*] i. e. concessum non est, fieri non potest, ut cet. — *rite*] bene ac recte.

V. 29. *fortibus*] est ablativus casus, cum quo *creari* verbum saepissime coniungitur, ut Ovid. Met. XI, 295. XIII, 22. 616. Sententia iterum tribus exemplis explicatur; in quibus nisi consulto vim anaphorae minuere velis, noli cum aliis commate post *fortibus* posito verba *et bonis* cum *iuvenis* coniungere; quo nihil pravius excogitari potest. Et cf. Epist. I, 9, 13. Deinde Theogn. 587: „Οὔτε γὰρ ἐκ συλλης ῥόδα φέται οὐδ' ἄνινθος, Οὔτε ποτ' ἐκ δούλης τέκνον ἐλευθέριον.“ — *doctrina sed*] Sic alii quoque poetae *sed* part. in secundo loco collocarunt. — *utcumque*] i. e. simulac, ut Carm. I, 17, 10. I, 35, 23. II, 17, 11. III, 4, 29. — *indecorant*] Alii *dedecorant*; illud mutari potuit facilius quam contra. Utrumque in bonis ac vetustis codd. — *Metaurum flumen*] vide apud Livium XXVII, 43 sqq. De verbis conferas

- Qui primus alma risit adorea,
 Dirus per urbes Afer ut Italas
 Ceu flamma per taedas vel Eurus
 Per Siculas equitavit undas.
- 45 Post hoc secundis usque laboribus
 Romana pubes crevit et impio
 Vastata Poenorum tumultu
 Fana deos habuere rectos,
 Dixitque tandem perfidus Hannibal:
 50 Cervi, luporum praeda rapacium,
 Sectamur ultro quos opimus
 Fallere et effugere est triumphus.
- Gens, quae cremato fortis ab Ilio
 Iactata Tuscis aequoribus sacra
 55 Natosque maturosque patres
 Pertulit Ausonias ad urbes,
 Duris ut ilex tonsa bipennibus
 Nigrae feraci frondis in Algido,
 Per damna, per caedes ab ipso
 60 Ducit opes animumque ferro.

Carm. II, 9, 21. A. P. 18. — *tenebris*] Eadem metaphora apud Ciceronem Rosc. Amer. 32, 91. — *adorea*] Donatione adorea — nam far primus in Latio cibus — milites fortissimi antiquis temporibus ornari solebant. Inde ipsa adorea sensim posita est pro victoria et gloria. Plin. XVIII, 3: „Gloriam a farris honore adoream appellabant.“ Aliter Festus s. v. „Adoream laudem sive gloriam dicebant, quia gloriosum eum putabant esse, qui farris copia abundaret.“ Alma autem ea appellatur, quoniam virtutem nutrit; nam quae alunt alma (alima) sunt. — *risit*] exsplenduit, ut Carm. IV, 11, 6. — *ut*] ex quo. Epod. 7, 19. — *ceui*] Particula haec ante Augustum prorsus poetica paulatim ad prosam orationem descendit. — *equitavit*] Hoc vocabulum cum celeritatis notionem habeat, facili non zeugmate sed metaphora ad flammam et Eurum

transfertur. — *crevit*] Immerito vituperatum hoc est, quasi crescere numero tantum sit augeri; tu compara Hor. Carm. III, 30, 8. Cic. Rosc. Am. 30, 83. Ovid. Heroid. XV, 117: „Gaudet et e nostro crescit moerore Charaxus.“ — *deos rectos*] Deorum statuae, a suis sedibus olim deturbatae, in fanis restitutae sunt et erectae.

V. 49. *perfidus Hannibal*] Ab omnibus Romanis hoc perfidiae crimine Poenum affici, non est mirum. Sed vide Liv. XXI, 4. XXII, 6 extr. Ad orationem compara quae sunt apud eundem Liv. XXVII, 51. — *fallere*] pro latere ut Carm. I, 10, 16. — *gens*] cf. Virg. Aen. I, 67. — *maturos*] sc. funeri, ut III, 15, 4. A. P. 115. — *Algido*] vide Carm. I, 21, 6. — *per damna*] Cfr. quae lamentantur Karthaginienses apud Livium XXIX, 3. — *opes animumque*] non *animosque*, quod ex coniectura importuna et duobus

Non hydra secto corpore firmior
 Vinci dolentem crevit in Herculem,
 Monstrumve summisere Colchi
 Maius Echioniaeve Thebae.

65 Merses profundo, pulchrior evenit;
 Luctere, multa proruet integrum
 Cum laude victorem geretque
 Proelia coniugibus loquenda.

Karthagini iam non ego nuntios
 70 Mittam superbos: occidit, occidit
 Spes omnis et fortuna nostri
 Nominis Hasdrubale interempto.

Nil Claudiae non perficiunt manus,
 Quas et benigno numine Iuppiter
 75 Defendit et curae sagaces
 Expediunt per acuta belli.

codd. passim receptum. cf. Caes. B. G. VII, 76. Hor. Carm. IV, 2, 22. — *hydra*] Fabulam de hydra Lernaee lege apud Ovid. Met. IX, 69 sqq. — *vinci dolentem*] qui nisi magno dolore non vincitur, is intendit etiam ne vincatur vires; quapropter acre inter Herculem et hydram certamen sic significatur. — *firmior*] coniunge cum *crevit* pro firmius, ut v. 53 *fortis pertulit*. — *summisere*] Viri enim illi armati e terra provenerunt; sic tellus apud Lucanum IV, 411 summittit pabula pascendis equis, apud Lucretium I, 8 eadem summittit flores. — Fabulas Iasonis et Cadmi invenies apud Ovidium Met. III, 24 sqq. et VII, 121 sqq. Cur Thebae dicantur *Echioniae* ex eodem loco Ovid. Met. III, 126 intelligitur.

V. 65. *merses*] De hoc genere constructionis vide Epist. I, 6, 31. I, 10, 24. Altera lectio *mersus* propter parallelismum reiicienda est. De re compara Liv. XXVII, 14. — *evenit*] Sic optimi codices. Alterum *exiet* hominis esse videtur, qui futurum tempus propter *proruet* necessarium haberet; quae nimia est diligentia. Praeterea *exiet* antiquior est forma a bonis scriptoribus non usurpata; nam apud Ti-

bullum I, 4, 27 *transiet* cedat oportet meliori *transiit*. Illud autem *evenire* propria notione raro quidem legitur, sed compara Colum. IV, 32, 2: „Tota arundo serius praedicto tempore evenit.“ — *coniugibus*] Romanorum, non Karthaginensium. — *nuntios superbos*] ut post cladem Cannensem; vide apud Livium XXIII, 11. De Hasdrubale lege Liv. XXVIII, 12. — *Claudiae manus*] cf. Carm. II, 12, 6. III, 3, 28. III, 4, 72. — *perficiunt*] Sic praestat scribere cum nonnullis codd.; inter quos omnium antiquissimus Bland. Nam hoc quoque praedictionis speciem habet, praesertim in ore Hannibalis, ut non opus sit altera lectione *perficient*. — *acuta belli*] cf. Carm. IV, 12, 19. Sat. II, 2, 25. A. P. 49. Curae autem sagaces eam significant animi virtutem, qua quid quovis tempore optime fiat reperimus. *Sagax* enim a canum naribus vestigia ferarum insequentium ad alios aliorum animalium sensus et ad ipsos etiam hominum animos bene transducitur. De re compara quae Tiberius de se ipse profitetur apud Tacit. Ann. II, 26: „se novies a D. Augusto in Germaniam missum *plura consilio quam vi* perfecisse.“

CARMEN V.

Divis orte bonis, optime Romulae
Custos gentis, abes iam nimium diu;
Maturum reditum pollicitus patrum
Sancto concilio redi.

5 Lucem redde tuae, dux bone, patriae:
Instar veris enim vultus ubi tuus
Affulsit populo, gratior it dies
Et soles melius nitent.

Ut mater iuvenem, quem Notus invido

Carmen V.

Dulcissimum hoc carmen, multis nominibus laudandum, ad Augustum, qui a mense Sept. a. 738 usque ad Februar. 741 in Germania et Gallia tenebatur, scriptum tenerrimos prodit sensus de beneficiis pacis ex diuturnis bellis intestinis restitutae morumque ex longa corruptione emendatorum. Exprimitur universi populi desiderium boni principis, nam non inconsulto et in initio et in fine carminis Augustus *dux bonus* appellatur, neque deerant causae, cur tanto omnes cives tenerentur desiderio. Ut enim prima et secunda strophae compellationem Augusti habent cum brevi quidem sed venusta rationum cur ei redeundum sit significatione, sic patriae desiderium grata matris filium diu exspectantis comparatione tertia et quarta proponitur. Illud autem unde in animis civium sit excitatum, tribus deinde strophis ita ostenditur, ut quinta celebretur securitas agriculturae, navigationis, mercaturae, ex quibus quasi fontibus domesticarum rerum prosperitas profluit; ut sexta addat innocentiam vitae, cui leges et consuetudines quam maxime consulant (v. 22), laude simul bonorum (v. 23) et poena malorum (v. 24) adiuncta; ut denique septima sit de potestate et honore imperii Romani apud exterarum nationes. Quae nationes eo compositae sunt ordine, ut omnes fines indicentur, ex quibus bella moveri possint; ab oriente pergitur ad occidentem, a Parthis per Scythas et Germanos ad Hispanos, qui quattuor sunt bellicae laudis Augusti

gravissimi testes. Illa beneficia qui bene ponderaverit, is profecto cum poeta Augustum venerabitur ut coelitus missum pacis auctorem et conservatorem, atque ut pax diu ac feliciter colatur sinceris precibus deos rogabit. Quam sententiam postquam poeticis coloribus illustratam addidit Horatius, carmen ea ratione absolvit, ut a quo profectum esset eo etiam rediret, ad Augustum. Qui cum Februario a. 741 ex Gallia reversus sit, probabile est carmen scriptum esse a. 740.

V. 1. *divis orte bonis*] Intelliguntur haec ex Carm. IV, 2, 37 sq. Contrarium est Sat. II, 3, 8. — *Romulae*] Eadem adiectivi forma C. S. 47. Virg. Aen. VI, 877. cf. Carm. I, 15, 10. Altera forma est *Romuleus*, non minus usitata; eligebant poetae utram metrum efflagitaret. — *sancto concilio*] Virg. Aen. I, 426. In paucis libris *consilio*; quod cum per se ferri possit, refellitur tamen auctoritate librorum. — *Lucem*] Virg. Aen. II, 281. Eurip. Orest. 243: „ἤκει φῶς ἐμοῖς καὶ σοῖς κακοῖς.“ — *affulsit*] Silius VII, 467: „nitenti affulsit vultu ridens Venus.“ — *soles*] de plurali cf. Epod. 2, 41. 16, 13. Epist. I, 20, 24. — *it dies*] Carm. II, 14, 5. — *Notus*] qui adversus est ex Asia in Italiam navigantibus. Poetis autem cum omnes res etiam inanimatae spiritum et vitam habere videantur, ventus etiam vivit et voluntate aliqua vel cupiditate agitur; inde *invido flatu*, non *wido*, quod in nonnullis est codd. — *Carpathii*] cf. Carm. I, 35, 8. — *volitis*] cf. Liv. praef. extr. „cum bonis omi-

- 10 Flatu Carpathii trans maris aequora
 Cunctantem spatio longius annuo
 Dulci distinet a domo,
 Votis ominibusque et precibus vocat,
 Curvo nec faciem littore demovet;
 15 Sic desideriiis icta fidelibus
 Quaerit patria Caesarem.
 Tutus bos etenim rura perambulat,
 Nutrit rura Ceres almaque Faustitas,
 Pacatum volitant per mare navitae,
 20 Culpari metuit Fides,
 Nullis polluitur casta domus stupris,
 Mos et lex maculosum edomuit nefas,
 Laudantur simili prole puerperae,
 Culpam Poena premit comes.
 25 Quis Parthum paveat, quis gelidum Scythen,
 Quis Germania quos horrida parturit
 Fetus incolumi Caesare? quis ferae
 Bellum curet Hiberiae?

nibus votisque ac precationibus.“ — *curvo*] ut Epod. 10, 21. Virg. Aen. III, 223. V, 765. — *icta*] cf. Aesch. Agam. 544: „*ἰμέρω πεπληγμένος*.“ De comparatione cfr. Hom. Od. XVI, 17 sqq. — *etenim*] tertium locum occupavit contra Ciceronis morem; sed poetis in hac re magna est licentia. — *nutrit rura*] Qui anaphorae potestatem non sentiebant, *rura* non bene iterari putabant. Inde inanes natae sunt coniecturae *tuta, culta, prata*. — *Faustitas*] *ἄπαξ λεγόμενον* pro *Fausta Felicitate*. — *pacatum*] Sueton. Aug. 98: „Vectores nautaeque de navi Alexandrina Augusto acclamarunt, per illum se vivere, per illum navigare, libertate atque fortunis per illum frui.“ — *volitant*] ab avium volatu translatum ad nautas per mare vagantes. Sic Auct. ad Herenn. IV, 39, 51: „volitabit et vagabitur in foro.“ — *metuit*] vide ad Carm. I, 1, 8. — *mos et lex*] cf. III, 24, 35. — *edomuit*] verbum poetis et serioribus scriptoribus usur-

patum; funditus domuit. — *simili prole*] Hesiod. O. et D. 232: „*Τίττονσιν δὲ γυναῖκες φοινῶτα τέκνα γονεῦσιν*.“ Catull. Epithal. Iul. et Manl. 221: „Sit suo similis patri (Torquatus parvulus) Manlio, et facile insciis Noscitur ab omnibus, Et pudicitiam suae Matris indicet ore.“ — *Poena*] cf. Carm. III, 2, 32. — *paveat*] Accusativus *pavere* verbum accuratius definit et indicat, circa quam rem pavor versetur. Epod. 12, 25.

V. 26. *parturit fetus*] cf. Epod. 16, 7. Scripsit de h. l. Peerlkampius: „Non poterant (Romani) timere fetus, quos Germania pariebat, cum Horatius haec scribebat“; itaque corrigendum opinatur *motus*. Sed inter Parthos, Scythas, Hispanos non potuerunt poni Germaniae *motus*; deinde parturire verbo i. e. iterum iterumque parere (ut Carm. I, 7, 16) egregie significatur magna Germanorum Romanos lacessendi cupiditas, qua nunquam fines imperii devastare desierunt. *Fe-*

Condit quisque diem collibus in suis
 30 Et vitem viduas ducit ad arbores;
 Hinc ad vina redit laetus et alteris
 Te mensis adhibet deum;
 Te multa prece, te prosequitur mero
 Defuso pateris et Laribus tuum
 35 Miscet numen uti Graecia Castoris
 Et magni memor Herculis.
 Longas o utinam, dux bone, ferias
 Praestes Hesperiae: dicimus integro
 Sicci mane die, dicimus uvidi,
 40 Cum sol oceano subest.

CARMEN VI.

Dive, quem proles Niobeae magnae
 Vindicem linguae Tityosque raptor

tus autem sunt immania Germanorum corpora. — *Condit*] exigit inter laborem. Sic latine dicimus *diem, noctem, lustrum condere*. Deinde bene additum est *suis*, quo quam certae tum possessiones fuerint significetur. — *vitem ducit*] vide ad Carm. II, 15, 4. Epod. 2, 10. — *ad vina*] Redit agricola confecto labore ad coenam, inter quam eius etiam sive hominis sive dei memor est, cui hoc ipsum quod agrum colere et coenam honestam parare potuit acceptum refert. Secundis mensis libare solebant penatibus et diis tutelariis; quibus cum par sit Augustus beneficiis, non minus adhibetur. Virg. Aen. V, 62. et vide Carm. III, 3, 12. Ceterum cf. Dion. Cass. 51, 19, qui de tempore post pugnam Actiacam haec scripsit: „ἐν τοῖς συσσιτίοις, οὐχ ὅτι τοῖς κοινοῖς ἀλλὰ καὶ τοῖς ἰδίοις, πάντας αὐτῷ σπένδειν ἐκέλευσαν ἕς τε τοὺς ὕμνους αὐτὸν ἐξ ἴσου τοῖς θεοῖς ἐγγράφεισθαι.“ Ovid. Fast. II, 636: „Parca precaturae sumite vina manus, Et bene nos patriae, bene te, pater, optime Caesar, Dicite suffuso per sacra verba mero.“ — *magni Herculis*] Genitivi suspensi sunt ex adi. *memor*; ita ipse

vocabulorum ordo suadet, de quo confer hos locos: Carm. I, 14, 12. I, 17, 21. I, 18, 12. I, 24, 13. I, 27, 10. I, 36, 13. II, 1, 9. III, 9, 7. IV, 6, 33. IV, 11, 31. IV, 15, 26. Deinde *memor*. adi. non facile caret obiecto. Herculi aliisque heroibus hoc maxime debebat Graecia, quod per omnes regiones vagantes quidquid invenissent vel ferorum hominum vel bestiarum necabant vitamque humanam a periculis liberam et quietam reddebant. — *dicimus integro*] Animadvertē hoc iterum artificium, quo quae inter se respondent vocabula *dic. int.* et *dic. uvid.* eadem obtinent versuum loca. — *uvidi*] apud computationem. cf. Carm. IV, 1, 25.

Carmen VI.

Horatius cum a. u. c. 737 ab Augusto iussus carmen saeculare scripsisset, hoc carmen quasi prooemium addidit. Nam scriptum esse patet confecto iam carmine saeculari necdum celebratis ipsis ludis. Etenim „idem deus, inquit poeta, qui superbos castigat, pios autem omnesque qui sum numen rite colunt tutatur ac per incommoda et calamitates ad felicitatem

Sensit et Troiae prope victor altae
Phthius Achilles,

5 Ceteris maior, tibi miles impar,
Filius quamvis Thetidis marinae
Dardana's turres quateret tremenda
Cuspide pugnax.

Ille, mordaci velut icta ferro
10 Pinus aut impulsa cupressus Euro,
Procidit late posuitque collum in
Pulvere Teucro.

Ille non inclusus equo Minervae
Sacra mentito male feriatos
15 Troas et laetam Priami choreis
Falleret aulam;

Sed palam captis gravis, heu nefas heu,
Nescios fari pueros Achivis

tem et gloriam perducit, cuius tutela Roma urbs condi potuit (v. 24), me quoque iuvabit iustamque canendi facultatem tribuet. Huic enim artem et laudem acceptam refero. Quare vos, pueri et puellae, qui electi estis ad canendum carmen saeculare, digna carminis mei reverentia impleti rite laudate Apollinem et Dianam, magnumque vobis obvenisse honorem credite, quemadmodum ego laetor, quod inter omnes qui componerem carmen dignus habitus sum." Duae sunt huius carminis partes; argumentum positum est partim in ea sententia quae est Carm. II, 10, 18—20, partim in consensientia favoris eiusdem dei, in cuius honorem ludi celebrantur.

V. 1. *Niobe*] cf. Hom. II. XXIV, 602 sqq. Ovid. Met. VI, 148. Cic. Tusc. III, 26, 63. Tria superbiae exempli particulis *que*, et coniuncta sunt, ut saepissime. cf. ad II, 10, 9. De *Tityo* vide ad Carm. II, 14, 8. — *prope victor*] vide ad Carm. III, 17, 9; conferas Virg. Aen. VI, 56 sqq. — *altae*] *ἀλπή*, ut Hom. Od. III, 130. — *impar*] Soph. Philoct. 334: „Τέθνηκεν ἀνδρὸς οὐδενός, θεοῦ δ' ὕπο, Τοξευτός, ὥς λέγουσιν, ἐκ

Φοῖβον δαμείς." — *quamvis*] Sic boni codd. Vide ad Carm. I, 28, 13. Alii *quamquam*. — *Dardanas*] De adiectivi forma vide ad Carm. IV, 5, 1. Tam diu poeta in Achillis morte ac fortitudine immoratur, quia Achille gravior hostis non fuit Troianis; qui si diruisset urbem omnesque incolas, etiam infantes, necasset, Roma urbs non poterat unquam condi. Quapropter Achilles caedes maximum erat Romanis beneficium. — *cuspide*] Hom. II. XIX, 387. — *pinus*] Aptissima haec imago ad ingentem corporum vastitatem relata ex Homero sumpta est. cf. II. XIII, 178 sqq. XVI, 482 sqq. Virg. Aen. II, 626. — *procidit late*] Expressa haec videntur ex Hom. Od. XXIV, 39 sq. — *Minervae*] Virg. Aen. II, 15 sqq. 183. cf. Hom. Od. 4, 272. — *falleret*] De imperfecto cf. Sat. I, 6, 80.

V. 17. *palam captis*] Non consentiunt in h. l. codices. In aliis *captis*, in aliis *captos* vel *raptor* vel *victor*, in aliis vocabulum plane omisum est. Unde recte collegerunt critici, in antiquissimis codicibus, ex quibus qui ad nos pervenerunt profecti sunt, scriptum fuisse vocabulum aliquod vel

- Ureret flammis, etiam latentem
 20 Matris in alvo,
 Ni tuis victus Venerisque gratae
 Vocibus divum pater annuisset
 Rebus Aeneae potiore ductos
 Alite muros.
 25 Doctor argutae fidicen Thaliae,
 Phoebe, qui Xantho lavis amne crines,
 Daunia defende decus Camenae,
 Levis Aggyieu.
 Spiritum Phoebus mihi, Phoebus artem
 30 Carminis nomenque dedit poetae.
 Virginum primae puerique claris
 Patribus orti:
 Deliae tutela deae fugaces
 Lyncas et cervos cohibentis arcu,
 35 Lesbium servate pedem meique
 Pollicis ictum,
 Rite Latonae puerum canentes,

rarissimum scribisque ignotum vel male pictum, ut alius aliud legeret ac scriberet. Fuerunt qui *captor* ab Horatio scriptum putarent, rarissimum illud quidem, sed repertum in Anthologia Burmanni II. p. 453, ubi *venatorem* significat; alii autem scripserunt *captor*. — *nescios fari*] *νήπια τέκνα*. Memoratu digna res est, quod Horatius fabulam ab Homero sumptam Homericis etiam vocabulis onnavit; inde etiam quae sequuntur *etiam latentem*, de quibus cf. II, VI, 57 sq. — *victus*] Omnium antiquissimus cod. Bland. habet *flexus*, quod fortasse rectius est. — *potiore alite*] cf. Carm. I, 15, 5. — *ductos*] Muri *ducuntur* (Virg. Aen. I, 423) ut parietes, valla, fossae, sulci, versus, lineae, propter longitudinem, per quam extenduntur. — *argutae*] canorae, *λυγέας*; cf. ad Carm. III, 14, 21. Epist. II, 2, 90. — *Xantho lavis*] De verbo *lavere* vide ad Carm. II, 3, 18. Videtur esse Lyciae fluvius, non Troadis. cf. Hom. II, II,

877. In Lycia enim *Patara* urbs est Apollini sacra. cf. Carm. III, 4, 61 sqq. — *Daunia*] vide ad Carm. II, 1, 34. — *Aggyieu*] Apollō apud Graecos *ἄγγιεὺς* appellabatur, quia viis urbanis praepositus erat. Levis, imberbis est propter perpetuam iuventutem.

V. 29. *Spiritum*] Inter se opposita sunt *spiritus* et *ars*, egregio consilio in praecipuis versus locis collocata. Quae cum coniuncta sunt bonum efficiunt poetam nominisque laudem parant. Qui comma inter *Phoebus mihi* posuit, scilicet ne interductus cum caesura pugnaret, non sensit, *mihi* pronomini iusto maius ita addi pondus. — *primae*] Chorus eligebatur ex nobilibus pueris et puellis, patrimis et matrimis. — *tutela*] quia chorus in tutela deorum est, quorum laudes canit. — *Lesbium*] metrum Sapphicum, quo Carmen Saeculare compositum est. — *pollicis ictum*] Loquitur de carminis *ῥυθμῶ*, qui pollicis motu indicabatur.

Rite crescentem face Noctilucam,
 Prosperam frugum celeremque pronos
 40 Volvere menses.

Nupta iam dices: Ego dis amicum
 Saeculo festas referente luces
 Reddidi carmen docilis modorum
 Vatis Horati.

CARMEN VII.

Diffugere nives, redeunt iam gramina campis
 Arboribusque comae;

Terent. Maur. 2253: „adsuetam moram, Quam pollicis sonore vel plausu pedis Discriminare, qui docent artem, solent.“ — *rite*] bis positum per anaphoram propter magnam sacerorum religionem, qua ne quid prave fieret diligenter cavendum erat. cf. Carm. IV, 15, 28. — *face*] lumine. Est enim Diana *νυκτιφαής, νυκτιλαμπής*, Noctiluca. — *frugum*] De genitivo cf. III, 6, 17. C. S. 19. 29. *Prospera* est *frugum*, quia fruges nutrit nocturno rore et recto anni tempestatisque decursu. — *Nupta*] Grata olim erit festorum et honoris recordatio; quae ipsa tunc quoque incendere debuit studium et diligentiam. Neque mirandum est quod puellas solas dulci recordatione futuri temporis excitare satis habuit poeta; sponte enim ad pueros quoque ea recurrit. — *lucēs*] dies; per triduum enim et trinoctium celebrari solebant ludi saeculares, cf. C. S. 23 sq. — *vatis Horati*] Gravi cum vi in fine nomen positum est. In ipso autem nomine *Horatii* dignitatis aliquid invenisse videtur poeta, quoniam ubi sine laudatione nomen suum simpliciter inferre voluit, *Flaccum* se appellavit (Epod. 15, 12. Sat. II, 1, 18); ubi blandientes scribas designat, blando etiam praenomine *Quinte* (Sat. II, 6, 37) salutatur. Compara Epist. I, 14, 5.

Carmen VII.

Videmus ex v. 23, ad Torquatum aliquem scriptum esse hoc carmen;

qui cum idem esse non possit, quo consule Horatius natus est, neque eius filius qui ante a. u. c. 709 in Hispania occidit, haerent interpretes, ad quem alium Manlium Torquatum scriptum esse carmen putent. Nam neque de alio illius Manlii filio neque de nepote neque omnino de ullo alio ex hoc genere quidquam nobis traditum est. Ac ne is quidem satis idoneus est, quem ex Suetonio viri docti huc transtulerunt, C. Nonius Asprenas, ab Augusto torque donatus et Torquati cognomine ornatus. Huius enim neque pietatem neque genus (v. 23), quamquam consul postea factus est, tantopere laudare potuit Horatius. Possis etiam de *Silano* aliquo *Torquato* cogitare ex *Iunia* gente. cf. Tacit. Ann. III, 24 ubi mentio iniicitur D. Silani, in nepti Augusti adulteri, et eius fratris *M. Silani*, qui „per insignem nobilitatem et eloquentiam praecelebat.“ Deinde C. Silanus, proconsul Asiae, repetundarum a sociis postulatur apud Tacit. III, 66, qui idem *Torquatus* fuit, nam eius soror (c. 69) est *Torquata*, virgo Vestalis, quae, ut patet ex inscriptione aliqua, annos 64 nata decessit. Et C. Silano causa dicta est a. u. c. 775. Praeterea apud Tacit. Ann. XV, 35: „*Torquatus Silanus* mori adigitur, quia super *Iuniae* familiae claritudinem D. Augustum atavum ferebat.“ Is fuit consul a. u. c. 806. Primus Torquatorum, qui in familiam Silanorum receptus est, fuit D. Iunius Silanus Manlianus, T. Manlii Torquati filius, a D.

- Mutat terra vices et decrescentia ripas
 Flumina praetereunt;
 5 Gratia cum Nymphis geminisque sororibus audet
 Ducere nuda choros.
 Immortalia ne speres monet annus et alnum
 Quae rapit hora diem.
 Frigora mitescunt zephyris; ver proterit aestas
 10 Interitura, simul
 Pomifer auctumnus fruges effuderit, et mox
 Bruma recurrit iners.
 Damna tamen celeres reparant coelestia lunae;
 Nos ubi decidimus,
 15 Quo pius Aeneas, quo dives Tullus et Ancus,
 Pulvis et umbra sumus.

Iunio Silano adoptatus; et praetor fuit a. 142 a. Chst. Cic. Fin. I, 7. Quisquis autem est, ad eundem data videtur epist. I, 5, et fuit homo hilari ac liberali animo. Continet autem carmen eas cogitationes, quas verni temporis reditus poetae suppeditavit; comparatur humani generis vita cum anni vicissitudine. Anni tempora redeunt, non vitae, quae si peracta est in perpetuum aufugit. A morte neque virtutes homines defendunt, neque amoris aut amicitiae potestas liberabit. Simile est Carm. I, 4. Referunt carmen alii ad a. 734 vel 735, alii ad a. 738.

V. 1. *nives*] Pluralis numerus talium etiam rerum usurpatur, quae sua natura eum numerum pati non videntur; et causa quidem duplex est, concinnitas orationis et in eadem re locorum vel temporum diversitas. Utrumque h. l. valet. cf. v. 9. — *comae*] Carm. I, 21, 5. IV, 3, 11. — *Gratia*] cf. ad Carm. I, 4, 6. — *nuda*] cf. Carm. I, 30, 5. III, 19, 17. — *alnum*] vide ad Carm. IV, 4, 41. — *frigora*] Animadvertendum quattuor versibus quattuor tempora describi. Similis rerum cumulatio verborumque brevis est Carm. III, 6, 45 sqq. — *proterit*] Servavit particula *pro* suam potestatem, neque est *retro pellit*, sed *pellit* ut progrediatur, ut festinet. Quod quomodo dictum sit a poeta ut intelligas,

cogita rotam perpetuo motu agitatam. Inde vocabula *proterit*, *interitura*, *recurrat*. Quod alii habent *recurrat* ex nimia et molesta diligentia nescio cuius scribae exortum est. — *iners*] cf. Carm. II, 9, 5. Hieme enim nihil procreatur. — *decidimus*] Epist. II, 1, 36.

V. 15. *pius Aeneas*] Alii *pater* legunt. Utrumque apud Virgilium. Pietas tamen Aeneae propria quaedam virtus est, perpetua eius apud Romanos comes. Praeterea fluctuant codices inter *Tullus dives* et *dives Tullus*. Sed nisi vis quaedam inest in adiectivo, quid poeta Tullum hac laude auxit? Quae si adest, priorem locum occupet necesse est. Tullus autem dives appellatur, quia rex fuit; etiam Ancus dives. Oppositionis nihil videndum est inter pium Aeneam et divitem Tullum; uterque suo honore fruitur. Tanta autem nomina illata non sunt consolandae condicionis, sed amplificandae sortis humanae gratia. cf. Epist. I, 6, 27. — *pulvis*] cf. Eurip. fr. Meleagr. 20; „κατθανόν δὲ πᾶς ἀνὴρ Γῆ καὶ σινύ.“ — *quis scit an*] Raro apud aureae aetatis scriptores *an* part. sic legitur in simplici oratione obliqua; saepe apud inferiores. cf. A. P. 462. Paulo aliter Carm. II, 4, 13, nam *nescio an*, *haud scio an* saepius sine verbo *pro fortasse*. — *summae*] cf. Carm. I, 4, 15. Ex quo

Quis scit an adiiciant hodiernae crastina summae
Tempora di superi?

Cuncta manus avidas fugient heredis, amico

20 Quae dederis animo.

Cum semel occideris et de te splendida Minos
Fecerit arbitria,

Non, Torquate, genus, non te facundia, non te
Restituet pietas;

25 Infernis neque enim tenebris Diana pudicum
Liberat Hippolytum,

Nec Lethaea valet Theseus abrumpere caro
Vincula Pirithoo.

CARMEN VIII.

Donarem pateras grataque commodus,
Censorine, meis aera sodalibus,

loco nata est alia nonnullorum codicum lectio *vitae*, quod vocabulum interpretandi causa in margine adscriptum sensim receptum est. — *animo*] Simili ratione dicitur animo obsequi, animo morem gerere; animus enim appetitus est. — *dederis*] cf. ad III, 23, 3. — *Minos*] cf. Hom. Od. XI, 567. — *splendida arbitria*] non honorifica, sed augusta pro maiestate iudicis et tribunalis. — *genus*] Nihil potest a morte defendere mortales homines, neque suae virtutes (genus, facundia, pietas) neque quae maximas etiam difficultates vincere possunt, amor et amicitia (Diana, Theseus). — *Diana*] De Hippolyto et Diana lege Virgil. Aen. VII, 765 sqq. Ovid. Met. XV, 497 sqq., a quibus tamen Horatius ita recedit, ut illi Hippolytum in vitam revocatum tradant, hic nihil valuisse amorem deae affirmet. Dianae nominis antepenultima modo produciatur modo corripitur ad necessitatem metricam. cf. Carm. II, 12, 20. C. S. I. 70. A. P. 16. 454. De Pirithoo vide ad Carm. III, 4, 79. Cuius fabulam Horatius vel mutata iam accepit vel ipse mutavit. Vulgo enim Theseus simul cum amico et ad inferos descendisse et ab Orco retentus

esse traditur; qui cum postea ab Hercule liberatus esset Pirithoum tamen secum ducere non potuit. Apud Horatium Pirithous solus videtur descendisse, qui cum captus retineretur, ne a Theseo quidem, quem amicitia misit, liberatus est.

Carmen VIII.

Fuit mos hominum Romanorum, ut Kalendis Martiis et Saturnalibus grata dona (strenas) cuiusvis generis amicis darent. Quem cum sequi vellet Horatius, Censorino amico — qui fuit cos. a. u. 746 — non pretiosa vasa sed hoc carmen non minoris pretii misit. In quo cum ostendit quid carmina possent efficere, quanto ad laudem et gloriam apud posteros bonis hominibus tribuendam magis apta essent quam publicae inscriptiones et ipsa facinora, tum id quoque consecutus est, quod tecto saepe consilio paravit. Censorini nomen oblivioni ereptum aeterno splendore nitet. Fuit autem homo probus, demerendis hominibus genitus, ut dicit Velleius Patereculus II, 102. Quo tempore carmen scriptum sit, ne coniectura quidem assequi possumus; alii retulerunt ad a. 743, alii prae-

Donarem tripodas, praemia fortium
 Graiorum, neque tu pessima munerum
 5 Ferres divite me scilicet artium,
 Quas aut Parrhasius protulit aut Scopas,
 Hic saxo, liquidis ille coloribus
 Sollers nunc hominem ponere nunc deum.
 Sed non haec mihi vis, non tibi talium
 10 Res est aut animus deliciarum egens.
 Gaudes carminibus; carmina possumus
 Donare et pretium dicere muneri.
 Non incisa notis marmora publicis,

dentius ad tempus intra annos 737—741.

V. 1. *pateras*] poculi genus planum ac patens, cuius usus etiam in sacris plurimus. De more dona mittendi cf. Tibull. III, 1, 1: „Martis Romani festae venere Kalendae... Et vaga nunc certa discurrunt undique pompa Perque vias urbis munera perque domos.“ — *commodus*] cum *donarem* coniungi debere versus ratio docet, non cum *sodalibus*. cf. Ep. II, 1, 227 et Ep. I, 18, 75. — *aera*] vasa, imprimis Corinthia. cf. Sat. II, 3, 21. Epist. I, 6, 17. — *tripodas*] cf. Hom. II. XXIII, 513. IX, 122. Virg. Aen. IX, 264 sqq. — *ferres*] acciperes, ut Carm. III, 16, 22. Sat. II, 1, 12. Epist. II, 2, 14. Qui verbi usus unde sit exortus videbis ex Virg. Aen. V, 248. — *artium*] operum affabre factorum, ut Epist. I, 6, 17. Virg. Aen. V, 359. De genitivo confer Epist. II, 2, 31 et illud Virgilianum *dives opum* (Georg. II, 468. Aen. I, 14. II, 22). — *Parrhasius*] pictor clarus, Ephesius, Olymp. 98. — *Scopas*] statuarum fector, Parrhasius, Olymp. 87. — *sollers ponere*] fingere, facere, *τιθέναι*, darstellen. cf. A. P. 34. — *carmina*] Cum vi tractum est vocabulum ex praecedente sententia. — *muneri*] Dativum genitivo elegantiores tuentur antiquissimi codices; dicendi verbum graviorem statuendi, ponendi notionem accepit. cf. Sat. II, 3, 23. loci autem nihil in h. l. inest; an tu putas, Horatium ipsum iocando potuisse deprimere carminum pretium et dignitatem, quam vere ac sincere statim additurus est?

V. 13. Quid hoc et insequentibus versibus poeta dicere voluerit, satis manifestum est, nimirum *pretium dicere muneri*. „Non monumenta, inquit, titulis publice inscripta, ne ipsae quidem magnae res gestae hominum manent; temporis perpetuo motu quidquid bene factum est oblivionis caligine paulatim obducitur. Quare nihil ad posterum pervenit nisi quod fixum firmatumque est poetarum aeternis carminibus.“ Sed ut poetae solent, exemplis usus est. *Celeres fugae* (ex Italia) et *reiectae minae Hannibalis* Scipionem Africanum maiorem, deinde *incendia Karthaginis* minorem Africanum indicant, tum *Calabrae Pierides* iterum ad maiorem referendae sunt, quoniam Ennius Rudiis Calabriae opido natus (a. u. c. 515—584) maiorem Scipionem carmine celebravit. Quae ab altero ad alterum Scipionem transitio quibus displicet, iis *incendia* non sunt intelligenda de urbe a Scipione minore combusta, sed de navibus et portu a maiore Scipione incendio deletis, quam calamitatem Karthaginienses non minus aegre tulerunt, quam si ipsa urbs esset deleta. cf. Liv. XXX, 43. Attamen inter Romanos certe nemo fuit, qui *incendia Karthaginis* non referret ad minorem Scipionem. Quod diaeresis v. 17 omissa est, id excusationem inveniet in natura nominis proprii. Itaque non assentior iis qui locum corruptum putarunt. Qui contrariam medelam adhibuerunt; alii quattuor versus eiiciendos rati hunc constituerunt versuum cursum *post mortem ducibus, clarius indicant*. At vero

- Per quae spiritus et vita redit bonis
 15 Post mortem ducibus, non celeres fugae
 Reiectaeque retrorsum Hannibalis minae,
 Non incendia Karthaginis impiae
 Eius, qui domita nomen ab Africa
 Lucratus rediit, clarius indicant
 20 Laudes, quam Calabrae Pierides: neque,
 Si chartae sileant quod bene feceris,
 Mercedem tuleris. Quid foret Iliae
 Mavortisque puer, si taciturnitas
 Obstaret meritis invida Romuli?
 25 Ereptum Stygiis fluctibus Aeacum
 Virtus et favor et lingua potentium
 Vatum divitibus consecrat insulis.

si celeres fugae et minae Hannibalis expelluntur, si Scipionis omnia vestigia tolluntur, unde *Calabrae Pierides* possunt teneri, quae fundamento quodam, in quo niterentur, carerent? Alii deesse duos versus opinantes lacunae signa collocarunt inter v. 17 et 18; ideo maxime moti, quod monostropha et distropha metra omnia praeter hoc carmen eum versuum numerum habent, qui quaternario numero possit dividi. Quod etsi verum est de tribus prioribus libris, nonne Horatio eam legem, quam ipse sibi imposuerat neque in Epodis observaverat, quarto etiam libro relinquere licuit? Ac praeterea si quid omissum credas, omnino non vides, quomodo illa quam volunt difficultas de utroque Scipione circuli instar posito possit amoveri. Alii ad coniecturas *impendia*, *stipendia* pro *incendia* faciendas confugerunt; desperatum illud quidem remedium in tanta librorum constantia. Bentleyus v. 17 spurium efficiendumque habuit. De re cf. Sueton. Aug. 31: „Augustus proximum a diis immortalibus honorem memoriae ducum praestitit, qui imperium populi Romani ex minimo maximum reddidissent. Itaque et opera cuiusque manentibus titulis restituit et statuas omnium triumphali effigie in utraque fori sui porticu dedicavit.“ Lamprid. Alex. 28: „Augustus sum-

orum statuas virorum in foro suo e marmore collocavit additis gestis.“

V. 21. *chartae*] poemata, ut Carm. IV, 9, 31. — *Iliae Mavortisque puer*] In hac parentum laudatione latet cogitatio, nobilitate et genere Romulum ab oblivione non potuisse liberari. Romulum autem idem Eanius laudavit in primo Annalium libro. Vide ap. Cicer. de Rep. I, 41: „O Romule, Romule die, Qualem te patriae custodem di genuerunt! O pater, o genitor, o sanguen dis oriundum! Tu produxisti nos intra luminis oras.“ — *divitibus insulis*] *μακάρων νήσοις*. cf. Epod. 16, 41. Cic. Phil. XIV, 12: „fortissimi dum vixistis, nunc vero etiam sanctissimi milites.“ Senec. de provid 2: „Mors illos consecrat, quorum exitum et qui timent laudant.“ Tibull. I, 4, 61: „Pieridas, pueri, doctos et amate poetas, Aurea nec superent munera Pieridas. Carmine purpurea est Nisi coma; carmina nunc sint, Ex humero Pelopis non nituissit ebur.“ — *Sic*] hac ratione; poetarum carminibus. Quae exempla hic proferuntur, iis ante iam usus erat poeta Carm. III, 3. — *Tyndaridae*] vide ad Carm. I, 3, 2. — *pampino*] cf. Carm. III, 25, 20. — *vota*] Hoc quoque divinitatis indicium est; in qua describenda observa poetae ubertatem.

Dignum laude virum Musa vetat mori;
 Coelo Musa beat. Sic Iovis interest
 30 Optatis epulis impiger Hercules:
 Clarum Tyndaridae sidus ab infimis
 Quassas eripiunt aequoribus rates;
 Ornatus viridi tempora pampino
 Liber vota bonos ducit ad exitus.

CARMEN IX.

Ne forte credas interitura, quae
 Longe sonantem natus ad Aufidum

Carmen IX.

Sententiae carminis hoc ordine procedunt. Mea, inquit poeta, carmina nunquam interibunt, quamquam non, ut alter Homerus, magnorum hominum res gestas epico carmine celebrare conor. Verum etiam lyrici poetae adhuc vivunt (Pindarus, Simonides, Alcaeus, Stesichorus, Anacreon, Sappho, quorum nomina Horatius eo ordine coniunxit, ut a summo hymnorum poeta Pindaro ad leviora genera Sapphonis descenderet); poetarum cantus temporis invidia non obruitur. v. 1—12. Factis hominum non eadem sors est; neque enim ii, qui in Troianis campis pugnarunt, soli meruerunt laudem poetarum (Troianorum et Graecorum virorum aptum hunc ordinem constituit, ut ad Sapphonis carmina amatoria bene annexis Helenae amoribus sursum ascenderet ad maximum omnium regem Agamemnonem). Sed vivunt illi in memoria hominum, reliqui vitam et memoriam amiserunt; et cur? quia vate carent. v. 13—28. Hic incipit altera pars, qua a generali sententia ad unum Lollium transitur. Transito paratur hac sententia: oblivione omnia aequantur; ignota virtus nil distat sepulta inertia. Quare se Lollium celebraturum dicit, ne nobilitas eius et honesti studium ex memoria hominum excidant. Animum eius prudentem esse, constantem in secundis rebus et adversis, purum ac sincerum, fidum et certum, summoque honore dignum.

v. 29—45. Itaque Lollium bono animo esse debere, quoniam quae homines fecerint non felicitate sed voluntate et consilio aestimentur. v. 45—52. — Lollius, qui a. u. 733 consul fuerat, gravi clade a Germanis a. 738 reiectus est; nihilo minus favorem sibi Augusti servavit; postea in Orientem missus avaritia et malis artibus odium sibi aequalium contraxisse dicitur. Subita vi mortis a. u. 753 oppressus est. Vellei. Paterc. II, 97: „accepta in Germania clades sub legato M. Lollio, homine in omnia pecuniae quam recte faciendi cupidior et inter summam vitiorum dissimulationem vitiosissimo.“ ibid. 102: „Quo tempore M. Lollii, quem veluti moderatorem iuventae filii sui Augustus esse voluerat, perfida et plena subdoli ac versuti animi consilia, per Parthum indicata Caesari, fama vulgavit. Cuius mors intra paucos dies fortuita an voluntaria fuerit ignoro.“ Sueton. Tiber. c. 12: „Namque privignum Caium, Orienti praepositum, cum visendi gratia traiecisset Samum, alieniorem sibi sensit ex criminationibus M. Lollii, comitis et rectoris eius.“ Tacit. Ann. III, 48: „incusato M. Lollio, quem auctorem C. Caesari pravitatis et discordiarum arguebat (Sulpicius).“ Qui vir quo tempore ab Horatio tantam laudem accepit, aut liber erat omni criminatione aut inter summam vitiorum dissimulationem etiam Horatium fefellit. Scriptum videtur hoc carmen non multo post acceptam in Germania cladem; apertum enim est consolandi

- Non ante vulgatas per artes
 Verba loquor socianda chordis.
- 5 Non, si priores Maeonius tenet
 Sedes Homerus, Pindaricae latent
 Caeaeque et Alcaeï minacēs
 Stesichoriquē graves Camenae;
 Nec si quid olim lusit Anacreon
 10 Delevit aetas; spirat adhuc amor
 Vivuntque commissi calores
 Aeoliae fidibus puellae.
- Non sola comptos arsit adulteri
 Crines et aurum vestibis illitum
- 15 Mirata regalesque cultus
 Et comites Helene Lacæna,
 Primusve Teucer tela Cydonio
 Direxit arcu; non semel Ilios
 Vexata; non pugnavit ingens
- 20 Idomeneus Sthenelusve solus

hominis consilium. Suspiciatur tamen Weber, Lollium etiam post cladem apud Augustum in Germania remansisse cum eoque anno demum 741 Romam reversum esse; itaque probabile esse hoc carmen non ante vernum tempus anni 741 compositum videri. Lollii cognomen incertum est; alii Palikanum, alii Paulinum appellant; neptis certe Lollia dicebatur Paulina.

V. 2. *Aufidum*] cf. Carm. III, 30, 10 sqq. — *Maeonius*] cf. Carm. I, 6, 2. — *Cæaeque*] vide ad Carm. II, 1, 38. — *Stesichori*] Hic, Himerae in Sicilia natus, mortuus est Olymp. 56; de quo Quintilianus X, 1, 62: „Stesichorum, inquit, quam sit ingenio validus, materiae quoque ostendunt, maxima bella et clarissimos canentem duces et epici carminis onera lyra sustinentem.“ Inde *graves* eius Camenas appellavit Horatius. — *Anacreon*] cf. Carm. I, 17, 18. — *spirat*] vivit ac viget. cf. IV, 8, 14. Cic. Brut. 24: „Videtur Laelii mens spirare etiam in scriptis.“ Virg. Aen. VI, 848. — *calores*] pluralis ut amores.

Qui poetice *vivere* dicuntur, ut carmina, Carm. I, 32, 3. Epist. I, 19, 2. — *puellae*] Est genitivus, non dativus pro: ab Aeolia puella. — *arsit*] Ardere verbum cum sit ardentem amare ac desiderare, activam quandam habet naturam; inde accusativus, ut apud Virgilium Buc. 2, 1. Ablativus, quocum idem verbum coniunctum est Carm. II, 4, 7. III, 9, 5. Epod. 14, 9. Epist. II, 1, 95, id indicat unde venit ardor. Ceterum ad sententiam compara Ovid. Heroid. 13, 57: „Venerat, ut fama est, multo spectabilis auro, Quique suo Phrygiæ corpore ferret opes, Classe virisque potens.“ Eurip. Troad. 991: „Ὅν εἰς ἰδοῦσα βαρβάρους ἐσθήμασι χρυσῶ τε λαμπρὸν ἐξέμαργώθης φρένας.“ — *primusve*] In nonnullis codd. *primusque*. Sed vide ad Carm. II, 5, 20. De Teucro cf. Carm. I, 7, 21. Hom. II. XIII, 313. — *Cydonio*] Cydon, urbs Cretæ. Vide ad Carm. I, 15, 17. — *non semel Ilios*] Non semel tanta urbs quanta fuit Ilios oppugnata est; quod dico, ne quis de unius urbis Tro-

Dicenda Musis proelia; non ferox
 Hector vel acer Deiphobus graves
 Excepit ictus pro pudicis
 Coniugibus puerisque primus.

25 Vixere fortes ante Agamemnona
 Multi; sed omnes illacrimabiles
 Urgentur ignotique longa
 Nocte, carent quia vate sacro.

Paulum sepultae distat inertiae
 30 Celata virtus. Non ego te meis
 Chartis inornatum silebo
 Totve tuos patiar labores

Impune, Lolli, carpere lividas
 Obliviones. Est animus tibi
 35 Rerumque prudens et secundis
 Temporibus dubiisque rectus,
 Vindex avarae fraudis et abstinens
 Ducentis ad se cuncta pecuniae,
 Consulque non unius anni
 40 Sed quoties bonus atque fidus

iae pluribus cogitet oppugnationibus. — *Idomeneus*] Hom. Il. III, 230. Schenelus, Capanei et Euadnes filius, Diomedis auriga. Hom. Il. II, 564. — *Deiphobus*] Priami et Hecubae filius, Helenae post Paridem coniux. cf. Hom. Il. XII, 94 sq. XIII, 156 sqq. Virg. Aen. VI, 495 sqq. — *pro coniugibus*] cf. Hom. Il. XVII, 223 sq. XXIV, 730. — *primus*] Magna cum gravitate iteratur ex initio superioris strophae; qua re hoc simul efficitur, ut quae inter se quasi certant vocabula *non*, *primus*, locorum etiam distantia distineantur. — *urgentur*] cf. Carm. I, 24, 5 sq.

V. 29. *inertiae*] dativus est, ut Sat. I, 4, 48. Nihil prope discriminis est inter virtutem celatam et inertiam sepultam. — *chartis*] vide ad Sat. I, 10, 4. — *impune*] Oblivio quasi quendam animum ac voluntatem habet ac perpetuo studio agitur hominum res bene gestas opprimendi. Huic qui se oppo-

nit, quasi castigat oblivionem neque impune eam hominum memoriam carpere patitur. Pluralis autem numerus positus est propter oblivionis continuos exstinguendae famae conatus. — *rectus*] qui neque bonis neque malis rebus flectitur, ut Cic. de Senect. 6. — *vindex*] De animo tanquam de persona loquitur; inde appellatur vindex, consul, iudex, victor, inde habet vultum et arma. Ex magna hac Lollii innocentiae et abstinentiae laude non inique iudicaveris, iam tum in hominum invidiam incertis rumoribus incidisse Lollium; quam Horatius cum immeritam putaret, defendere ab innocenti homine fortasse voluit. — *cuncta*] Pecuniae crimini datur quod avarorum hominum est, quorum cupiditas nunquam expletur, omnia ad se rapit. — *consul*] Consulatus, summus magistratus, summum honorem tribuit; dicit igitur, rectum animum sempiterno ac summo honore esse dignum; de qua

Iudex honestum praetulit utili,
 Reiecit alto dona nocentium
 Vultu, per obstantes catervas
 Explicuit sua victor arma.

45 Non possidentem multa vocaveris
 Recte beatum, rectius occupat
 Nomen beati qui deorum
 Muneribus sapienter uti
 Duramque callet pauperiem pati
 50 Peiusque leto flagitium timet,
 Non ille pro caris amicis
 Aut patria timidus perire.

CARMEN X.

O crudelis adhuc et Veneris muneribus potens,
 Insperata tuae cum veniet pluma superbiae,
 Et quae nunc humeris involitant deciderint comae,
 Nunc et qui color est puniceae flore prior rosae

re cf. Cic. Tusc. II, 17, 41. Hor. Carm. III, 2, 19. — *alto vultu*] quo in eas res, quas contemnimus, despicere solemus. Cic. Tusc. II, 4, 11. — *catervas*] malorum hominum et corrumpere tentantium. — *recte*] Notanda gradatio *recte, rectius*; cui quam vim addiderit poeta locorum in quibus illa vocabula posita sunt gravitate manifestum est. — *callet*] cum infinitivo, ut Iuven. 4, 142: „ostrea callebat primo deprendere morsu.“ Pers. 5, 105: „veri specimen dignoscere calles.“ — *peius*] pro *magis* positum, sed fortius est; sic Epist. I, 17, 30. Cic. ad Fam. VII, 2: „oderam multo peius hunc quam illum.“ — *non timidus*] figura *λιτότης*; paratus. cf. Carm. III, 19, 2. Qua figura cur h. l. poeta usus sit perspicuum est; gravis enim sic paratur oppositio quaedam. Sapiens timet quidem flagitium, non timet pro patria mortem.

Carmen X.

Argumentum huius carminis breviter potest indicari hoc versu Virgilii Buc.

2, 17: „O formose puer, nimium ne crede colori.“ Et credibile est hoc carmen iam dudum compositum tum demum a poeta ex scriniis sumptum esse, cum librum hunc editurus esset. Quod si verum est, Ligurini nomen ex hoc carmine in primum huius libri transiit. Alii arbitrati sunt, compositum esse hoc carmen eodem anno quo primum huius libri. Cum incerta res sit, nihil moror.

V. 1. *Veneris muneribus*] cf. Hom. II. III, 54. — *pluma*] metaphorice pro lanugine, cuius mollities bene hoc vocabulo exprimitur. Nostrates prorsus eadem ratione dicunt Flaum, Graeci *πύλον*. — *deciderint*] nam tondebatur adulta aetate capillus, quem pueri, imprimis delicati, alere solebant. cf. Carm. II, 5, 21 sqq. Epod. 11, 28. — *puniceae*] purpureae, ut Virg. Aen. XII, 77. — *Ligurinum*] Accusativus hic acerbitalis aliquid habet; barba enim bellum et levem Ligurinum roseo generum colore privabit et hispidum reddet. Praestat igitur is casus vocativo, quem alii ex codd. recepe-

5 Mutatus Ligurinum in faciem verterit hispidam,
 Dices, heu, quoties te speculo videris alterum:
 Quae mens est hodie, cur eadem non puero fuit,
 Vel cur his animis incolumes non redeunt genae?

CARMEN XI.

Est mihi nonum superantis annum
 Plenus Albani cadus; est in horto,
 Phylli, nectendis apium coronis;
 Est hederæ vis
 5 Multa, qua crines religata fulges;
 Ridet argento domus; ara castis
 Vincita verbenis avet immolato
 Spargier agno;

ruñt. — *hispidam*] Tibull. I, 8, 77: „Carior est auro iuvenis, cui levia fulgent Ora nec amplexus hispida barba terit.“ — *speculo*] est ablativus instrumenti quem vocant, nec bene in codicibus nonnullis scriptum est *te in speculo*, qua praepositione admissa pronominis *te* vis propter elisionem nimis minuitur. Et docuit Lachmannus ad Lucret. p. 219 in quarto carminum libro vocales longas non elidi. — *alterum*] mutatum. — *his animis*] qui nunc mihi sunt.

Carmen XI.

Ut Lyden Carm. III, 28 ad Neptunalia, sic h. c. Phyllidem ad celebrandum diem natalem Maecenatis, Idus Apriles invitat. Introitus similis est ei quo Maecenatem vocat Carm. III, 29. Sententiae simplici ordine procedunt; ex quibus satis perspicuum est Horatium ex Sabino suo sic scribere, Phyllidem annis nondum propectam, carmen ipsum fortasse ante editos tres libros superiores compositum esse, haud ita multo post Carm. II, 4, anno fere 730. Potuit tamen etiam paulo post editos tres libros haec scribere, cum primum epistolarum librum componeret et ipse vitam rusticam urbanae in dies magis praeferre inciperet. cf. Epist. I, 14. Quae ratio

cui placuerit, is urbane Horatium Maecenati indicare suspicetur, ruri quoque se amicorum memorem satis esse. Aliis non ante a. 740 carmen videtur compositum esse.

V. 2. *Albani*] cf. Sat. II, 8, 16. Ex nobilissimis hoc genus vini fuit, deinde quod habuit poeta satis est vetustum ac molle. — *apium*] cf. Carm. I, 36, 16. II, 7, 24. — *religata*] cf. Carm. II, 11, 24. Construe igitur *qua fulges crines religata* i. e. qua imposita crinibus in nodum collectis fulgere soles. Tum *fulges* non est futurum antiqui verbi fulgère, neque premendum hoc est, quod hederam Phyllis accipere demum debebat apud Horatium; omnino amabat Phyllis hederaceam coronam, quippe quae bene sciret aptissimam eam sibi esse summamque venustatem praebere. Ceterum fuit qui comma poneret post *vis* et *multa fulges* coniungeret, nimirum quod putabat *vim* i. e. copiam non recte appellari posse *multam* i. e. magnam. Sed cf. Cic. Tusc. V, 32 „magna vis auri argentique.“ — *ridet*] splendet. cf. Carm. II, 18, 2. Catull. 64, 44: „fulgenti splendent (sedes) auro atque argento, Candet ebur solis, conlucent pocula mensae.“ — *verbenis*] vide ad Carm. I, 19, 14. — *spargier*] Hoc uno in lyricis loco Horatius hac antiquiore forma usus est.

- Cuncta festinat manus, huc et illuc
 10 Cursitant mixtae pueris puellae;
 Sordidum flammae trepidant rotantes
 Vertice fumum.
- Ut tamen noris quibus advoceris
 Gaudiis, Idus tibi sunt agendaе,
 15 Qui dies mensem Veneris marinae
 Findit Aprilem,
- Iure sollemnis mihi sanctiorque
 Paene natali proprio, quod ex hac
 Luce Maecenas meus affluentes
 20 Ordinat annos.
- Telephum, quem tu petis, occupavit
 Non tuae sortis iuvenem puella
 Dives et lasciva tenetque grata
 Compede vinctum.
- 25 Terret ambustus Phaëthon avaras
 Spes, et exemplum grave praebet ales
 Pegasus terrenum equitem gravatus
 Bellerophontem,
- Semper ut te digna sequare et ultra
 30 Quam licet sperare nefas putando
 Disparem vites. Age iam, meorum
 Finis amorum —

— *immolato agno*] Abstinebant quidem antiqui teste Varrone apud Censorinum c. 2 die natali a caede ac sanguine, ne quo die ipsi lucem acceperissent aliis demerent. Sed nihil impendebat Horatium quominus *Maecenatis* die natali pro salute amici agnum diis immolaret. Cf. etiam ad Carm. III, 17, 14. — *pueris puellae*] servi et ancillae. — *vertice*] non aedum, sed ipsius flammae et foci. *Trepidare* autem verbum accommodatum est ad incertum ac trepidum flammarum motum. cf. Virg. Buc. 8, 105. Ovid. Met. VI, 296. — *Veneris marinae*] vide ad Carm. I, 3, 1. III, 26, 5. Aprilis Veneri sacer fuit, quia hoc mense ex

spuma maris provenisse dicebatur. — *findit*] dividit. Iduum nomen ab antiquo verbo *iduarē* i. e. dividere factum dicebant antiqui. — *affluentes*] translatum verbum a leni flumine aquarum ad annos et tempora, ut Epist. I, 1, 23.

V. 21. *Telephum*] Idem nomen Carm. I, 13. III, 19. Tribus locis commune est, quod qui appellatur Telephus a puellis petitur, non ipse petit. — *non tuae sortis*] Ex quibus verbis ut ex adi. *dives* intelligitur, Phyllidem libertinam fuisse. — *compede*] cf. Carm. I, 33, 14. — *Phaëthon*] cf. Ovid. Met. II, 1 sqq. — *Pegasus*] vide ad Carm. I, 27, 24. Bellerophon cum Chimae-

Non enim posthac alia calebo
 Femina —, condisce modos, amanda
 35 Voce quos reddas: minuentur atrae
 Carmine curae.

CARMEN XII.

Iam veris comites, quae mare temperant,
 Impellunt animae lintea Thraciae;
 Iam nec prata rigent nec fluvii strepunt
 Hiberna nive turgidi.
 5 Nidum ponit Ityn flebiliter gemens
 Infelix avis et Cecropiae domus

ram occidisset, temerarius factus ipsum coelum petere conatus est, sed a Pegaso deiectus cupiditatis poenas solvit. Pegasus enim Neptuno et Medusa procreatus homini mortali ita tantum servire voluit, ut a Minerva erat iussus. Pind. Isthm. 6. 44. B.: „πτερόεις ἔρριψε Πάγασος Δεσπότην ἐθέλοντ' εἰς οὐρανοῦ σταθμοὺς ἔλθειν μεθ' ὁμάγων Βελλεροφόνταν Ζηγός· τὸ δὲ παρ' δίκην Γλυνὸν μικροτάτα μένει τελευτά.“ — reddas] cf. Carm. IV, 6, 43. — minuentur] melius hoc quam praesens *minuuntur*, quod aliis placuit; quamquam ad solam Phyllidem curas referri nolo. — atrae] cf. Carm. III, 1, 40. III, 14, 13. Sat. II, 7, 115.

Carmen XII.

Non ad Virgilium nescio quem unguentarium vel medicum sed ad poetam Virgilium ioci ac iuvenilis hilaritatis plenum carmen scriptum est. Incipit autem ita, ut verni temporis suavitas copiose et eleganter describatur. Iam adest ver, cum vere calor, cum calore sitis. Eam autem optime pellunt vina mediocria. „Sed, inquit, si apud me esse gestis ut apud iuvenes nobiles ac divites, quibuscum esse soles, si Calena vina ducere cupis, agedum dabo, sed ea lege, ut cum in comissatione Calenum nardo carere non possit, tu unguenta praestes.“ Est igitur iocabunda ad hilarum comissationem invitatio, neque

difficultates movendae sunt ex v. 25; dummodo credatur, carmen scriptum esse a iuvene Horatio ad iuvenem Virgilium, anno fortasse 714 vel 715; cuius quidem dulcissimi amici memoriam edito post multos annos hoc carmine quasi renovare et celebrare Flaccus voluit. Antiqua illa inscriptio: *ad Virgilium medicum Neronum*, cuius auctoritatem etiam Weber secutus est, non videtur esse speciosior quam aliae *ad Virgilium unguentarium, mercatorem, negotiatorem*. Hausta est enim ex ipso carmine, ab iis, qui sciebant, poetam Virgilium, cum liber quartus ab Horatio ederetur, iam mortuum esse et totum librum vulgatum esse in honorem Augusti eiusque privignorum. Compositio carminis ea est, quam frequentem iam invenimus. Septem stropharum media quarta principalem sententiam continet, quam quae praecedunt et sequuntur aut viam quasi muniunt aut ubertatem et explicationem addunt.

V. 2. *animae Thraciae*] Aquilones. Colum. XI, 2, 21: „Venti septentrionales qui vocantur Ornithiae per dies XXX esse solent; tum et hirundo advenit.“ Cum vere mare navibus ex hieme aperitur. *Temperare* igitur est placare. Comparari potest simillimum carminis I, 4 initium. — *infelix avis*] De Procne, Pandionis filia, et Tereo rege, eius marito, lege Ovidium Met. VI, 623 sqq. Hom. Od. XIX, 518 sqq. Schol. Vatic. ad Rhesum 547: „καὶ ἡ μὲν Πρόκνη εἰς ἀηδόνα μετεβλήθη,

Aeternum opprobrium, quod male barbaras
Regum est ulta libidines.

Dicunt in tenero gramine pinguium
10 Custodes ovium carmina fistula
Delectantque deum, cui pecus et nigri
Colles Arcadiae placent.

Adduxere sitim tempora, Virgili;
Sed pressum Calibus ducere Liberum
15 Si gestis, iuvenum nobilium cliens,
Nardo vina merebere.

Nardi parvus onyx eliciet cadum,
Qui nunc Sulpiciis accubat horreis,

ὥς καὶ ἡ Φιλομήλα εἰς χελιδόνα.“
Neque aliter apud Horatium Procne in
lusciniā, Philomela in hirundinem
mutata est, contra apud alios latinos
poetas Procne in hirundinem, Philo-
mela in lusciniā. Et lusciniā quo-
que nuntia veris est, ut in fragm.
Sapphonis 19. Schneidew.: „ἡρὸς
ἄγγελος, ἡμερόφωνος ἀηδὼν.“ Olim
cum aliis hirundinem indicari puta-
bam, parum reputans, lugubrem can-
tum non hirundinis, sed lusciniā
esse et multo suaviorem esse imaginem
lusciniā in arborum ramis quam hi-
rundinis in aedificiorum parietibus ni-
dum ponentis. Compara etiam Virgil.
Georg. IV, 511 sqq. Martial. X, 52,
2: „Ridet ager, vestitur humus, vesti-
tur et arbor; Ismarium pellex Attica
plorat Ityn;“ ubi lusciniā est, quae
vernum tempus indicat et Ityn plorat,
quamquam *pellex Attica Φιλομήλα*
est, non *Πρόνη*. — *opprobrium*] de
persona, ut *ἐλεγχος, ὄνειδος* apud Ho-
merum. cf. II. II, 235. — *male*] nimis,
nimis atrociter; de qua adverbii signi-
ficatione confer Carm. I, 17, 24. Sat.
I, 3, 31/45. I, 4, 66. I, 9, 65. In
prosa orationis scriptoribus non facile
ullum huius generis exemplum inve-
nietur. — *libidines*] Pluralis ampli-
ficandae rei causa: quales esse solent
barbarorum regum libidines; quam-
quam Terei imprimis libido tangitur.
— *dicunt*] canunt, ut Carm. III, 4, 1.
— *delectantque*] In aliis et codicibus
et editionibus *delectante*, ad fistulam

vocabulo relato. Sed pastores ipsos
deum, Pana, delectare deumque quasi
auscultare illis canentibus poetam magis
debet. — *nigri*] vide ad Carm. I,
21, 7.

V. 14. *Calibus*] cf. Carm. I, 20, 9.
— *ducere*] vide ad Carm. I, 17, 22.
— *iuvenum nobilium*] Agrippae, Pollio-
nis, aliorum, apud quos gratus
erat Virgilius. Nam nihil nisi favor
et familiaritas quaedam hominum no-
bilium et maiore loco ortorum in hac
clientela quaerendum est. Sic poetae
sunt etiam in clientela Musarum. —
nardo] unguento pretiosissimo, quod
ex India et Syria Romam portabatur.
Dicit igitur Horatius, se utrumque, et
vinum et oleum, praestare neque posse
neque velle; neque Virgilium immu-
nem fore ut in ampla ac divite domo,
neque (id quod per iocum et risum
additur) curandum esse, utrum vinum
sit carius an oleum. De pretio nardi
cf. Ev. Ioann. 12, 3: „Ἡ οὖν Μαρία
λαβοῦσα λίτραν (uncias XII) μύρον
νάρδον πιστικῆς πολυτίμου... τρια-
κοσίων δραχμῶν ... ἤλειψε τοὺς
πόδας τοῦ Ἰησοῦ.“ — *onyx*] concha
ex onyche facta. — *eliciet*] Hoc quo-
que iocose dictum, quasi tam blanda
sit vis nardi, ut vini cadus ex hor-
reis Sulpiciis eliciatur. Sed Hora-
tio emendandum erat vinum. — *Sulpi-
ciis*] Vide ad Carm. I, 15, 10. Sul-
piciā horrea publicae quasi apothecae
erant, ubi vinā vendebantur. — *amara*

Spes donare novas largus amaraque

20 Curarum eluere efficax.

Ad quae si properas gaudia, cum tua

Velox merce veni: non ego te meis

Immunem meditor tingere poculis

Plena dives ut in domo.

25 Verum pone moras et studium lucri,

Nigrorumque memor, dum licet, ignium

Misce stultitiam consiliis brevem:

Dulce est desipere in loco.

CARMEN XIII.

Audivere, Lyce, di mea vota, di

Audivere, Lyce: fis anus et tamen

Vis formosa videri

Ludisque et bibis impudens

5 Et cantu tremulo pota Cupidinem

curarum] vide ad Carm. IV, 4, 76. — *immunem*] ἀσύμφορον. — *tingere*] madefacere, τέγγειν. Iocose dictum. — *studium lucri*] Male quidam severo vultu cogitarunt de ficta quadam Virgilii parsimonia aut nimia pretiorum vini et unguenti aestimatione. Quae ridendo scripta sunt, ridendo etiam sunt legenda; nimirum: „agedum, inquit, festina ad convivium; noli retardari magno pretio, mihi tamen vinum carius est.“ — *nigrorum*] Quaecunque ad inferos pertinent nigra sunt; igitur etiam rogus. Virgil. Aen. XI, 186. — *in loco*] Aequabilem vitae cursum nonnunquam grata quadam stultitia interrumpi necesse est, sed iusto et tempore et loco. Dicitur enim *loco*, *in loco* (Epist. I, 7, 57), pro commodo loco, opportune. Menander Mein. p. 150: „Ὁὐ πανταχοῦ τὸ φρόνιμον ἀρμόττει παρόν, καὶ συμμανηῖναι δ' ἐνία δεῖ.“ Senec. de tranq. an. 15: „Si Graeco poetae credimus, aliquando et insanire iucundum est.“

Carmen XIII.

Etiam si hoc carmen referendum videatur ad III, 10, tamen satis longo

temporis intervallo post scriptum est. Nam quae ibi aetate floruit Lyce, hic anus facta ne rugis quidem oris deterreretur, quo minus amores nectere studeat; et quam iram ibi poeta Lycae minatus est, eam hoc carmine explet. Quodsi Carm. III, 10 Lyce recens nupta annos habuit 22 vel 23, nunc facile duplicem habere potest annorum numerum, ut hoc carmen anno fere 737 vel 738 scriptum esse conicias. Abundat autem irridendi et vellicandi figuris et artificiis; in qua re non satis possumus admirari frequentem acutarum litterarum *i* copiam in primis versibus conspicuam cum sibilantibus litteris et festivo ludo verborum *fis* et *vis*. Deinde animadvertendi sunt vv. 13—15 propter allitterationem quam vocant vocabulorum *nec* — *nec* — *notis*; vv. 17—20 propter quo — quo — quae — quae; praeterea v. 1 et 2 *audivere* Lyce — *audivere* Lyce; v. 18 *illius* — *illius*, alia.

V. 6. *lentum*] tibi non obsequentem. — *excubat*] Sic Soph. Ant. 776: „Ἐρως — ὃς ἐν μαλακαῖς παρειαῖς νεανίδος ἐννυχεύεις.“ Scilicet ibi

Lentum sollicitas. Ille virentis et

Doctae psallere Chiae

Pulchris excubat in genis.

Importunus enim transvolat aridas

10 Quercus et refugit te quia luridi

Dentes, te quia rugae

Turpant et capitis nives.

Nec Coae referunt iam tibi purpurae

Nec clari lapides tempora; quae semel

15 Notis condita fastis

Includit volucris dies.

Quo fugit venus, heu, quove color? decens

Quo motus? Quid habes illius, illius,

Quae spirabat amores,

20 Quae me surpuerat mihi,

Felix post Cinaram, notaque et artium

Gratarum facies? Sed Cinarae breves

quasi in statione quadam est, unde quos velit iuvenes capiat. — *importunus*] iniquus, difficilis, lepide hoc ex mente Lycae, similium. — *aridas quercus*] cf. Carm. I, 25, 19. — *te quia*] Haec quoque magna cum vi in simili versuum sede collocata sunt; nimirum quia in utroque versu diaeresis praecedit, qui legunt redintegrata quasi voce ista irrisionis plena vocabula pronuntiare et audientium animos quam maxime tangere prope coguntur. *Et* part. consecutivam vim habet *et propterea*; quare ita interpungendum fuit, ut bis positum pronomen *te* ex utroque verbo *refugit*, *turpant* pendere intelligeretur. — *capitis nives*] Quintil. VIII, 6, 17: „Sunt et durae, id est a longinqua similitudine ductae translationes ut *capitis nives*.“ Hic ipsa translationis durezza risus movetur. — *Coae purpurae*] tenues ac paene pellucidae ex bombycinis filis contextae vestes, ex insula Coe, in quam bombyces ex Oriente apportabantur. Sat. I, 2, 101. — *clari lapides*] uniones splendentes. Sic rectius scribitur quam *cari*, ex codd. Dicere enim debuit poeta, ne unionum qui-

dem splendorem venustatem et inventum semel amissam posse referre. Nam nihil ad h. l. valet quod pretiosi etiam sunt uniones. — *notis fastis*] Cf. Cic. Verr. II, 1, 7: „non solum notis, sed etiam ignotis probatam meam fidem esse.“ Phaedr. I, 11, 2: „Ignotos fallit, notis est derisui.“ Sunt igitur fasti, quibus satis notum est quot annos habeas; non; qui omnibus nimis noti sunt. — *venus*] venustas et gratia, ut Epist. I, 6, 38. A. P. 42. — *color*] cf. Carm. IV, 10, 4. — *surpuerat*] cf. Sat. II, 3, 283. De syncope vide ad Carm. II, 2, 2. — *felix*] amata et laudibus celebrata. — *post Cinaram*] Commemoratur haec Cinara, quam vere amasse Horatium omnes existimant, Carm. IV, 1, 4. Epist. I, 7, 28. I, 14, 33. Proprio carmine ea laudata non est. Ubique hoc nomine Horatius iuventutem suam significat; quare primis post reditum ex Macedonia annis Horatio cum Cinara amores fuisse credendum est. Vide ad Carm. I, 19. Weber Cinaram ab Horatio amatam fuisse censet intra annos 717—721. — *notaque et artium*] De genitivo cf. Carm. II, 2, 6. Hic

Annos fata dederunt

Servatura diu parem

25 Cornicis vetulae temporibus Lycin,

Possent ut iuvenes visere fervidi

Multo non sine risu

Dilapsam in cineres facem.

CARMEN XIV.

Quae cura patrum quaeve Quiritium

Plenis honorum muneribus tuas,

et particula pro *etiam* est. Facies autem totam corporis speciem significat. — *Cornicis vetulae*] cf. Carm. III, 17, 13. — *dilapsam in cineres facem*] Sic de vetula lasciva Martial. X, 90, 2: „Quid busti cineres tui laccessis?“ Est etiam aliquod vocabulorum certamen inter *fervidos iuvenes* et hanc dilapsam in cineres facem. Fax enim amoris iuventutis est; ea autem in iuvenibus ardet, in anu combusta in cineres dilabitur.

Carmen XIV.

Supra ad carmen IV notatum est, quo consilio et quo tempore hoc carmen scriptum sit. Restat ut de compositione dicatur. „Tuas, inquit, virtutes, Auguste, neque senatus neque populus digno potest honorare colere, quia maximus es per omnem terrarum orbem princeps. Quod quam sit verum quae nuper gesta sunt clarissime demonstrarunt. Tuam enim potestatem nuper senserunt invicti adhuc Vindelici, cum Drusus ad summa Alpium iuga pertinaces hostes fugaret, Tiberius ingenti proelio immanes Raetos vinceret quicquid obiciebatur prosternens et ipse incolumis. Tu enim, Auguste, praebueras ei tuum exercitum, tuum consilium, tuos deos. Magno tu quidem deorum favore gaudes, qui vel hac re ostenditur quod eo ipso die, quo ante quindecim annos Alexandriam ingressus eras, terribile hoc bellum composuisti.“ Sic Horatius magnam hanc de Gallis victoriam sapienter et egregie coniungit cum eo die qui Augusto imperium olim totius

orbis dederat; in qua re Romanorum pietas non potuit non videre deorum voluntatem. Augustus autem imperium tenet omnium terrarum, cuius potestati obnoxii sunt Hispani, Parthi et Indi, Scythae i. e. omnes populi ab Occidente ad ultimam Orientis oram; Augustus quasi decus et praesidium est urbis Romae et urbs Roma domina est terrarum; hunc timet Africa (Nilus), Europa (Ister), Asia (Tigris), hunc metuunt atrocissimae gentes, Britannii, Galli, Iberi, Germani. — Perfectum omnino et quasi rotundum est carmen. Altera et principalis pars, ad quam sustentandam prior laudes Neronum et praecipue Tiberii tanquam argumenta praebet, quam verum sit illud quod in initio carminis positum est: *o qua sol habitabiles illustrat oras, maxime principum*, firmissimis sententiis probat. Victoria enim de Gallicis populis reportata occasionem magis ad carmen componendum praebuit quam ipsa praedicatur; omnis gloria cumulatur in Augustum; ad quem quanta arte transgrediatur poeta vide v. 33. De bello Raetio cf. Strab. IV, 6: „πάντας δ' ἔπαυσε τῶν ἀνέδην καταδρομῶν Τιβερίος καὶ ὁ ἀδελφὸς αὐτοῦ Δροῦσος θεοῖς μιᾷ.“ Vellei. Paterc. II, 95: „Reversum inde Neronem Caesar haud mediocris belli molem experiri statuit, adiutore operis dato fratre ipsius Druso Claudio, quem inter Caesaris penates enixa erat Livia; quippe uterque divisus partibus Raetos Vindelicosque aggressi multis urbium et caestellorum oppugnationibus nec non directa quoque acie feliciter functi gen-

- Auguste, virtutes in aevum
 Per titulos memoresque fastos
 5 Aeternet, o qua sol habitabiles
 Illustrat oras maxime principum?
 Quem legis expertes Latinae
 Vindelici didicere nuper
 Quid Marte posses; milite nam tuo
 10 Drusus Genaunos, implacidum genus,
 Breunosque veloces et arces
 Alpibus impositas tremendis
 Deiecit acer plus vice simplici;
 Maior Neronum mox grave proelium
 15 Commisit immanesque Raetos
 Auspiciis pepulit secundis,
 Spectandus in certamine Martio,
 Devota morti pectora liberae
 Quantis fatigaret ruinis;
 20 Indomitas prope qualis undas

tes locis tutissimas, aditu difficillimas, numero frequentes, feritate truces, *maiore cum periculo quam damno Romani exercitus, plurimo cum earum sanguine perdomuerunt.*"

V. 2. *plenis*] iustus. Sic enim coniungendum est: *plenis muneribus honorum.* — *titulos*] Sunt statuae et monumenta publica Augusti laude inscripta. — *fastos*] vide ad Carm. III, 17, 4. — *aeternet*] Praeter h. l. semel tantum hoc verbum apud scriptores Romanos legitur, in Varronis aliquo fragmento ap. Non. II, 57: „litteris ac laudibus aeternare“, sed grave verbum est et Horatio dignissimum. Ceterum in *aevum aeternare* idem est quod Ovid. Met. I, 662 dixit *aeternum extendere in aevum.* — *principum*] Hoc nomine gaudebat Augustus, qui etiam mortuus laudabatur, quod „non regno neque dictatura, sed principis nomine“ rempublicam constituerat. Tacit. Ann. I, 9. — *Quem didicere*] Attractionis quodam genere quod subiectum esse debebat verbi *posses*, cum primario verbo *didicere* coniunctum

est; qua constructione apud Graecos frequentius est nihil; cf. Terent. Eunn. IV, 3, 15: „ego illum nescio qui fuerit.“ — *nam*] vide ad Carm. I, 18, 3. — *Genaunos*] Genauni et Breuni Alpinae gentes fuerunt ad fontem et ripas Aeni fluvii. Strab. IV, 6, 8: „Οἱ Οὐνδελικοὶ καὶ Νωρικοὶ τὴν ἐπὶ τὸς παρωρεῖαν κατέχουσι τὸ πλεον μετὰ Βορύνων καὶ Γενανίων, ἣδη τούτων Ἰλλυριῶν.“ — *implacidum*] h. v. ante Horatium a nullo scriptorum qui supersunt usurpatum est. — *arces*] castella, quae in Alpibus barbari habebant. Epist. II, 1, 252. — *vice simplici*] quia plures hostium prostraverat, quam suorum militum perdiderat. Notandum rarius genus constructionis *plus vice pro plus quam vice*; sic Carm. I, 13, 20. cf. etiam Epist. I, 10, 39 sq. Comm. Cruq. „Quia plures hostium prostraverat, quam perdiderat; Drusus enim laesus placari non poterat, nisi duplex illis inferret damnum.“ — *certamine*] Solita caesura in hoc nomine neglecta est. — *prope qualis*] Rarus quidem in com-

- Exercet Auster Pleiadam choro
 Scindente nubes, impiger hostium
 Vexare turmas et frementem
 Mittere equum medios per ignes.
- 25 Sic tauriformis volvitur Aufidus,
 Qui regna Dauni praefluit Apuli,
 Cum saevit horrendamque cultis
 Diluviem meditatur agris,
 Ut barbarorum Claudius agmina
- 30 Ferrata vasto diruit impetu
 Primosque et extremos metendo
 Stravit humum sine clade victor,
 Te copias, te consilium et tuos
 Praebente divos. Nam tibi quo die
- 35 Portus Alexandria supplex
 Et vacuam patefecit aulam,
 Fortuna lustris prospera tertio
 Belli secundos reddidit exitus,

parationibus poetarum est usus particulae *prope*, sed cf. Sat. II, 3, 268. Habet autem illa aliquam cautionem dictionis, non dissimilem illi, qua Graeci nimiam gravitatem minuebant addito indefinito pronomine *τις*. — *Pleiadam choro*] Pleiades Atlantis septem filiae inter stellas relatae, latine Vergiliae, sicuti, ubi mane i. e. heliace oriebantur (Non. Mai.), serenae aestatis initium tutamque navigationem, ita ubi mane occidebant (VI. Id. Nov.), procellosae hiemis initium periculosamque navigationem ostendere existimabantur. — *per ignes*] Tiberius ipse fortiter pugnavit et immiscuit se ardentissimae pugnae. cf. Sat. II, 3, 56. Epist. I, 1, 46. Silius XIV, 175: „per medios ignes mediosque per enses.“ XV, 41: „per medias volitare acies mediosque per ignes.“ — *tauriformis*] Fluvii solebant fingi cornuto capite, imagine petita ab ingenti aquarum mugitu, cf. Hom. II. XXI, 237. Virg. Georg. IV, 371. Aen. VIII, 77. Eadem comparatione usus est Hom. II. V, 87. — *praefluit*] vide ad Carm.

IV, 3, 10. cf. Plin. H. N. III, 11: „Aufidus ex Hirpinis montibus Canusium praefluens.“ — *meditatur*] Alii ex codd. *minitatur*. Illud tamen magis aptum est ad personam quam induit Aufidus fluvius; audacior etiam translatio lyrico carmine multo videtur esse dignior. cf. Virg. Bucol. 5, 60 sq. V. 30. *ferrata*] ferreis loriceis tecta. — *diruit*] Hoc quoque audacter translatum est ad ordines hostium, sed egregie describit ingentem vim, qua opus erat ad disiciendam Gallorum aciem; quae quia *ferrata* est, etiam diruitur. cf. Liv. XXXIX, 18: „Bacchanalia diruere.“ — *metendo*] Sic de caede militari Virg. Aen. X, 513. Sil. IV, 464: „metit agmina tectus Coelesti clipeo.“ Cfr. Hor. ep. II, 2, 178. — *stravit humum*] cf. Carm. III, 17, 12. — *praebente divos*] cf. Suet. Aug. 21: „domuit partim ductu partim auspiciis suis Cantabriam, Aquitaniam, Pannoniam, Dalmatiam cum Illyrico omni, item Raetiam et Vindelicos ac Salassos.“ — *Alexandrea*] Utraque forma usitata, Alexandria et

- Laudemque et optatum peractis
 40 Imperiis decus arrogavit.
 Te Cantaber non ante domâbilis
 Medusque et Indus, te profugus Scythes
 Miratur, o tutela praesens
 Italiae dominaeque Romae!
 45 Te fontium qui celat origines
 Nilusque et Ister, te rapidus Tigris,
 Te beluosus qui remotis
 Obstrepi Oceanus Britannis,
 Te non paventis funera Galliae
 50 Duraeque tellus audit Hiberiae,
 Te caede gaudentes Sugambri
 Compositis venerantur armis.

Alexandria, Antiochea et Antiochia. Fuit is dies Kal. Sext. — *vacuam*] mortua Cleopatra. — *arrogavit*] Epist. II, 1, 35. A. P. 122. Est autem haec verbi significatio poetica pro dare alicui aliquid ut suum. *Imperia* autem sunt expeditiones et bella olim feliciter gesta, quibus eo die fortuna novam laudem addidit. — *Cantaber*] cf. Carm. II, 6, 2. III, 8, 22. — *Indus*] Sueton. Oct. 21: „Indos etiam ac Scythas auditu modo cognitos pellexit ad amicitiam suam populique Romani ultro per legatos petendam. Parthi quoque et Armeniam vindicanti facile cessarunt et signa militaria, quae M. Crasso et M. Antonio ademerant, reposcenti reddiderunt.“ — *profugus*] cf. Carm. I, 35, 9. III, 24, 9. — *celat*] Lucan. X, 295: „Nili Arcanum natura caput non prodidit ulli.“ Plin. H. N. V, 9: „Nilus incertis ortus fontibus it per deserta et ardentia.“ — *Tigris*] Plin. H. N. VI, 27: „Ipsius (nomen) quae tardior fluit, Diglito; unde concitatur, a celeritate Tigris incipit vocari. Ita appellant Medi sagittam.“ — *beluosus*] *μεγαλήτης*. Plin. H. N. IX, 5: „Tiberio principe contra Lugdunensis provinciae littus in insula simul trecentas amplius beluas reciprocans destituit oceanus, mirae varietatis et magnitu-

dinis, nec pauciores in Santonum litore, interque reliquas elephantos et arietes, candore tantum cornibus assumulatis, nereidas vero multas.“ Ac similiter Tacit. Ann. II, 24 de Romanis Germanico duce adversis ventis ex Amisia flumine in Britanniam delatis: „Ut quis et longinquo revererat, *miracula* narrabant, *vim turbinum*, et *inauditas volucres*, *monstra maris*, *ambiguas hominum et beluarum formas*; visa sive ex metu credita.“ — *obstrepi*] cf. Carm. II, 18, 20. — *Britannis*] cf. Carm. I, 21, 15. I, 35, 30. III, 5, 3. — *non paventis*] vide Caes. B. G. VI, 14. — *durae*] cf. IV, 5, 27. — *Sugambri*] Graece *Σύγαμβροι* et *Σούγαμβροι*. Hi Lollium a. 737 magna clade affecerunt; inde quia Romanis terribiles erant, caede gaudere dicuntur. Suet. Oct. 21: „Germanos ultra Albim fluvium summovit; ex quibus Ubios et Sugambros dedentes se traduxit in Galliam atque in proximis Rheno agris collocavit.“ Eutrop. VII, 9: „Tiberius CCCC.M. captivorum ex Germania transtulit et supra ripam Rheni in Gallia collocavit;“ quamquam apud Sueton. Tiber. c. 9 legitur: „*quadraginta* milia dedititiorum traiecit in Galliam.“

CARMEN XV.

Phoebus volentem proelia me loqui
 Victas et urbes increpuit lyra,
 Ne parva Tyrrhenum per aequor
 Vela darem. Tua, Caesar, aetas
 5 Fruges et agris rettulit uberes
 Et signa nostro restituit Iovi
 Derepta Parthorum superbis
 Postibus et vacuum duellis

Carmen XV.

Celebrantur Augusti quasi pacificatoris orbis honores ac merita; ad quae non insolito quidem sed proprio modo aditus sic paratur. „Bella, inquit, et victorias cum canere vellem, prohibitus sum ab Apolline, ne parvo carmine magnas res detererem. Sed est etiam alia ratio tuarum laudum, Caesar; tu enim non bellorum solum gerendorum sed pacis etiam restituendae artifex es, tu huic aetati pacem et eius omnia beneficia reddidisti.“ Sic prima strophæ coniungitur cum reliquis septem, quarum media, quæ est totius carminis quinta, generalem sententiam habet de securitate totius imperii imperante Caesare Augusto; quam securitatem quibus artibus paraverit magnus ille vir, strophæ ostendunt secunda, tertia, quarta. Deinde tribus extremis strophis bene describitur quid Augusti imperium et auctoritas in populos valuerit, primum in hostiles et barbaros, tum in ipsos Romanos. — Temporis quo scriptum sit carmen non certa quidem sed multa insunt vestigia. Nam præter vv. 6. 9. 22. ex quibus potest aliquid effici, versus 21 demonstrat, cum hoc scriberetur, victos iam fuisse Raetos et Vindelicos; unde probabile est, carmen compositum esse vere anni 741, quo tempore Augustus ex Germania et Gallia rediit. Nam quod dicunt, v. 9 annum respici 744, quo Ianum tertium clausum affirmant, id duplici ratione infirmum est; nam primum universe laudatur Augustus, quod sua ætate Ianus clausus sit — id quod bis factum erat a. 725 et 729 —, deinde quamquam diserte scriptum est apud veteres, sene Au-

gusto tertium Iani templum clausum esse, incertum tamen est quo id anno factum credamus. Quare in tam dubia re recte iudicatum est, non debere hoc carmen ab reliquis huius libri sine necessitate nimis removeri.

V. 2. *increpuit lyra*] pulsata lyra me admonuit, ne relictis levioribus carminibus grandia tentarem, quibus impar esset mea lyra. Apollo enim quasi choragus est, qui cantores ab rectis modis aberrantes graviter tacta lyra interpellat et *increpat* i. e. corrigit, erroris admonet. Cf. Ovid. A. A. II, 493: „Haec ego cum canerem, subito manifestus Apollo, Movit inauratae pollice fila lyrae.“ Virg. Bucol. 6, 3: „Cum canerem reges et proelia, Cynthus aurem Vellit et admonuit.“ Cave igitur, ne iungas *loqui lyra*, quo perversius vix quidquam potest cogitari. — *parva*] Non insolita poesis comparatio cum navigatione. cf. Propert. III, 9, 3: „Quid me scribendi tam vastum mittis in aequor? Non sunt apta meae grandia vela rati.“ Tyrrhenum autem mare non pro quovis mari, sed pro vasto, aperto mari positum esse. — *uberes*] cfr. Carm. IV, 5, 18. — *signa*] Restituta a Parthis arma a. u. 734, Crasso aliisque olim erepta, inter pacifica Augusti opera commemorari bene poterant, quia non bello coacti sed solo nominis Augusti terrore permoti Parthi sua sponte ea reddiderant. Quam rem Augustus pro magna victoria habuit. Quare Horatius eam cum clauso Iano etiam Epist. II, 1, 255 coniungendam putavit. — *postibus*] templorum, in quibus suspensa fuerant. Peregrinis igitur diis erepta arma restituit Augustus *nostro Iovi*, i. e. rectis diis; quamquam re

- Ianum Quirini clausit et ordinem
 10 Rectum evaganti frena licentiae
 Iniecit emovitque culpas
 Et veteres revocavit artes,
 Per quas Latinum nomen et Italiae
 Crevere vires famaue et imperi
 15 Porrecta maiestas ad ortus
 Solis ab Hesperio cubili.
 Custode rerum Caesare non furor
 Civilis aut vis exiget otium,
 Non ira quae procudit enses
 20 Et miseras inimicat urbes.
 Non qui profundum Danubium bibunt
 Edicta rumpent Iulia, non Getae,
 Non Seres infidive Persae,

vera non Iovi sed Marti Ultori Augustus ea dicavit. Cf. Epist. I, 18, 56. — *Ianum Quirini*] In hac re summa Augusti cernitur laus. Nam: „Ianium Quirinum, inquit Suetonius (Oct. 22), semel atque iterum a condita Urbe memoriam ante suam clausum in multo breviori temporis spatio terra marique pace parta ter clusit.“ Dicebant quidem *Ianum Quirinum*, sed omnes codd. praebent *Quirini*. Reliquit Horatius vulgarem formulam, ut *Ianium* a Quirino positum Quiritium esse indicaret. — *ordinem rectum*] Per bella civilia pudor et severitas impudicitiae et luxuriae cesserant; restituit quantum quidem potuit Augustus castos mores legibus a. 736 de pudicitia atque de maritandis ordinibus perlatis. cf. Carm. IV, 5, 21 sq., quod carmen totum cum hoc apposite comparari potest. — *artes*] Intelliguntur frugalitas, patientia pauperatis, iustitia, continentia animi. — *emovitque*] Legitur etiam in codd. *amovitque*; illud tamen Horatianum. cf. Sat. II, 3, 28. Epist. II, 2, 46.

V. 15. *ad ortus*] Multi editores singularem numerum *ortum* ex codd. praetulerunt, nimirum ne toties sibi let littera s; a qua quam non abstinerit Horatius ut intelligas, compara hos

locos: Carm. I, 2, 1. I, 12, 5. II, 18, 14. III, 7, 8. III, 17, 9. III, 18, 3. 4. III, 23, 1. III, 27, 73, alios. Deinde pluralis locum significat quo quotidie iteratur solis ortus. Eo enim consilio poetae pluralem saepe praetulerunt, ut quae certis temporibus certo ordine redirent ad exemplum naturae verborum vi describerentur. cf. Carm. III, 24, 37. III, 19, 6. Virg. Georg. II, 481. — *custode rerum*] cf. Carm. III, 14, 14. — *exiget*] In codd. legitur etiam *eximit*, *eximet*, *exuet*. Hoc extremum ex errore scribarum ortum est; alterum *eximet* a recentibus etiam editoribus praelatum ex glossa ortum videtur; nam ita saepius Horatius, veluti Carm. II, 2, 19. III, 14, 14. Epist. I, 5, 18. II, 2, 212. *Exigere* autem, exquisitius hoc certe loco vocabulum, est quasi extra agere, expellere. Cicero. Or. II, 48: „Neque reges ex hac civitate *exigi* sine nobilium dissensione potuisse.“ Plaut. Aul. III, 1, 7: „Itaque omnes *exegit* foras.“ — *vis*] bellica. — *inimicat*] inimicas inter se reddit. Grave hoc vocabulum Horatius primus ausus esse videtur. — *bibunt*] vide ad Carm. II, 20, 20. Indicantur autem Vindelici et Pannonii. — *edicta Iulia*] leges ab Augusto iis impositas, foedera, pacta. — *Seres*] cf. Carm.

Non Tanain prope flumen orti;
 25 Nosque et profestis lucibus et sacris
 Inter iocosi munera Liberi
 Cum prole matronisque nostris
 Rite deos prius apprecati
 Virtute functos more patrum duces
 30 Lydis remixto carmine tibiis
 Troiamque et Anchisen et almae
 Progeniem Veneris canemus.

I, 12, 56. et ad Carm. III, 29, 27. — *infidive Persae*] Sic rectius quam *infidique*; affertur enim novum Persarum exemplum. Infidi autem dicuntur, quia saepius pactiones cum Romanis initas violarunt. — *profestis lucibus*] cf. Sat. II, 2, 116. — *iocosi Liberi*] cf. Carm. III, 21, 15. — *apprecati*] Praeter h. l. hoc verbum non legitur nisi bis apud Apuleium. — *more patrum*] De his laudibus maiorum in epulis celebratis vide Cic. Tusc. I, 2, IV, 2. — *duces*] quorum grata memoria animi hominum delectantur et superbia quadam implentur. cf. Hom. II. IX, 189. — *remixto*] Etiam hoc verbum *remiscere* pro *miscere* rarissimum; nam praeter duos Horatii locos (vide A. P. 151) duo tantum videntur esse loci Senecae, in quibus reperiatur. — *Lydis tibiis*] i. e. tibiis, quibus cani-

tur ad modum Lydium. Ex diversis enim modis musicis (harmoniiis) Lydus mollis et hilaris fuit conviviorumque hilaritati aptissimus. Ceterum compara hunc locum Plat. Polit. III, 10: „Τίνες οὖν μαλακαὶ τε καὶ ξυποτικάι τῶν ἀρμονιῶν; ἡ ἰαστί, ἡ δ' ὅς, καὶ λυδιστί, αἵτινες χαλαραὶ καλοῦνται. Ταύτας οὖν, ὦ φίλε, ἐπὶ πολεμικῶν ἀνδρῶν ἔσθ' ὃ τι χρῆσαι; Οὐδαμῶς, ἔφη, ἀλλὰ κινδυνεύει σοι ἡ δωριστὶ λείπεσθαι καὶ φρυγιστί. — *progeniem Veneris*] totam gentem Iuliam ab Iulo, Aeneae filio, ortam. Sic sensim ascendit oratio ad Augustum, qui ex tota stirpe Iulia summus et optimus a laetis et gratis convivis carminibus celebratur et libationibus colitur. cf. Carm. IV, 5, 31 sq.

Q. HORATHI FLACCI

E P O D O N

L I B E R.

CARMEN I.

Ibis Liburnis inter alta navium,
Amice, propugnacula

Carmen I.

Epodorum librum editum videri anno 725 supra iam p. 16 dictum est; falsa enim eorum est opinio quibus Octavianus tam infirmo et pusillo, Horatius tam vili et humili animo fuisse videbatur, ut quae in his inessent liberiora carmina (Epod. 7. 16) neque illum benevole accipere potuisse neque hunc in vulgus edere ausum esse sibi persuaderent et mortuo demum Horatio Epodos a grammatico aliquo collectos esse affirmarent. Nomen autem hoc genus carminum accepit a metro, quo duo simplices versus ita coniunguntur, ut aut longiorem brevior excipiat aut brevior longior sequatur. Quo metri genere ad exemplum Archilochi et aliorum Graecorum Horatius usus est in omnibus his carminibus excepto decimo septimo, quod, siquidem non metri, rei tamen natura reliquis cognatum est; de qua re memorabilis locus est ipsius poetae Epist. I. 19, 23. Monendum tamen est ne quis omnia quae in Epodis legantur nomina propter Archilochi imitationem vera statim habeat; immo vero con-

sentaneum est in Epodis quoque fictis interdum nominibus aequales Horatii celari.

Anno u. c. 723 cum bellum in Cleopatram et Antonium pararetur, Maecenas Octavianum in bellum comitandi consilium cepit. Horatius pro necessitudine quae ei erat cum illo viro sum esse hoc carmine professus est, iisdem sese periculis quae amicus obiret obicere. Etenim „tu, inquit, Maecenas, amicum tuum Octavianum comitaturus es in extrema belli pericula, idem ne ego faciam vetas. In qua re qui putas me tibi posse obtemperare? Immo paratus sum omnia tua pericula libenter obire, non lucri et praedae causa sed quia praesens tibi minus timeo quam Romae relictus.“ Haec Horatius; Maecenas deinde qui urbanis negotiis praesset ab Octaviano relictus captum ante consilium non est persecutus.

V. 1. *Liburnis*] Liburnae vel Liburnicae naves erant parvae et velocissimae a Liburnis, gente Illyrica, nominatae. Plura vide infra in Excursu. — *si superstite*] Alii *sit supersti.*, quod facilius quidem minore

- Paratus omne Caesaris periculum
 Subire, Maecenas, tuo:
 5 Quid nos, quibus te vita si superstite
 Iucunda, si contra gravis?
 Utrumne iussi persequemur otium
 Non dulce ni tecum simul,
 An hunc laborem mente laturi, decet
 10 Qua ferre non molles viros?
 Feremus et te vel per Alpium iuga
 Inhospitalem et Caucasum,
 Vel Occidentis usque ad ultimum sinum
 Forti sequemur pectore.
 15 Roges tuum labore quid iuven meo
 Imbellis ac firmus parum?
 Comes minore sum futurus in metu,
 Qui maior absentes habet;
 Ut assidens implumibus pullis avis
 20 Serpentium allapsus timet
 Magis relictis, non ut adsit auxili
 Latura plus praesentibus.
 Libenter hoc et omne militabitur
 Bellum in tuae spem gratiae,

tamen codicum auctoritate nititur. Vocabula *te superstite*, quorum alterum in caesura alterum in fine versus collocatum est, locis distracta metrum coniunguntur; non aliter v. 17 vocabula *minore metu*. Ordo hic est: quibus vita si te superstite (sit), iucunda; si contra, gravis. Similiter *esse* verbum omissum infra v. 8, ubi ellipsis sic explenda erit: non dulce *futurum*, ni tecum simul *persequemur*. Vide ad Carm. I, 20, 3. — *utrumne*] cf. Sat. II, 2, 107. II, 3, 295. 317; ex usu poetarum, nam quod apud Ciceronem saepius legitur, veluti Tusc. IV, 27: „*utrum illudne non videatur aegre ferendum, an*“, id longe diversum est; etenim *ne* part. per se quidem super vacanea est, sed vim addit vocabulo, cui adhaeret. — *laborem*] militiae. — *Caucasum*] cf. Carm. I, 22, 6. — *im-*

bellis] Carm. II, 6, 7. Alterum *firmus* ad valetudinem pertinet. — *Comes*] Respondent haec ad praecedentem interrogationem. — *Ut assidens*] „Quem admodum avis implumibus pullis assidens serpentium impetus magis timet cum eos escae quaerendae causa reliquit, quam cum apud eos sedet, etiamsi praesens nihil possit auxilii ferre, ita ego quoque minore metu crucior praesens quam absens.“ *Relictis* dativus est suspensus a verbo *timet*; *ut adsit* est *etiamsi adsit*. Altera lectio *uti sit* orta videtur ex correctura mendi, quo prave scriptum erat *ut sit*. — *militabitur bellum*] Audacter et nove dictum. Sed compara similia Carm. III, 19, 4: III, 3, 43. Epist. I, 16, 25. — *in spem*] Particula *in* exprimitur res, cui efficiendae aliquid est destinatum, ad quam consequendam impel-

25 Non ut iuvençis illigata pluribus

Aratra nitantur mea;

Pecusve Calabris ante sidus fervidum

Lucana mutet pascuis,

Neque ut superni villa candens Tusculi

30 Circaea tangat moenia.

Satis superque me benignitas tua

Ditavit; haud paravero

Quod aut avarus ut Chremes terra premam,

Discinctus aut perdam nepos.

limur ad agendum. Tacit. Agric. 24: „partem Britanniae, quae Hiberniam adspicit, copiis instruxit in spem magis quam ob formidinem.“ Liv. XXI, 43, 7: „in hanc opimam mercedem arma capite.“ Id. XLIV, 25, 10: „malebat in spem Romanae pacis non recusare impensam.“ — *nitantur mea*] In antiquissimis quidem libris *meis*; at Bentleius: „possessivum, inquit, cum propiore nomine coniungi debet: neque vero in *meis pluribus iuvençis* aut duplex adiectivum aut prava et luxata collocatio tolerari potest.“ — *Calabris*] „neque ut maxima ego latifundia habeam, quibus greges ante calores solis ex fervida Calabria in Lucuniam minus aestuosam aestivatum mittere possim.“ Varro R. R. II, 1, 16: „Mihi greges in Apulia hibernabant, qui in Reatinis montibus aestivabant.“ De mutandi verbo vide ad Carm. I, 17, 2. — *sidus fervidum*] ante Caniculae ortum. — *pascuis*] In codd. legitur etiam *pascua*. At Bentleius: „nos, inquit, ideo pascuis praefertimus, ne in tribus continuis epodis eadem exeat terminatio.“ — *superni*

Tusculi] Antiquum Tusculum in summo monte conditum erat, ubi nunc est *la villa della Rufinella*, non in clivo leniter assurgente, ubi nunc situm est oppidum *Frascati*; iam cum haud dubie amoenior esset villa quae haud procul a moenibus oppidi et in superiore parte collis quam quae in inferiore erat sita, nihil erit causae cur relativum adiectivum *supernus*, quo infernae v. inferioris partis ratio habetur, ad exemplum loci Carm. III, 4, 23 in *supini* cum Bentleio mutetur. *Supernus* neque apud Ciceronem neque apud Caesarem legitur. — *Circaea moenia*] vide ad Carm. III, 29, 8. — *Satis*] cf. Carm. II, 18, 12. III, 16, 38. Sat. II, 6, 1. — *Chremes*] Exemplum avari senis ex Menandri aliqua fabula. — *discinctus*] luxuriosus; discingi enim ut corporis ita animi molliem et turpitudinem quandam designat. Ovid. Am. I, 9, 41: „Ipse ego segnis eram discinctaque in otia natus.“ — *perdam nepos*] Sic antiquissimi codices; unde postea factum videtur *perdam ut nepos*. cf. Epod. 2, 5.

Excursus de Liburnis.

Appian. de reb. Illyr. c. 3: „Καὶ ναυτικοὶ μὲν ἐπὶ τοῖς Ἀρδιαίοις ἐγένοντο Λιβυρνοὶ, γένος ἕτερον Ἰλλυριῶν, οἱ τὸν Ἰώνιον καὶ τὰς νήσους ἐληΐστεον ναυσὶν ἀκείλαις τε καὶ κουφαῖς· ὁδὸν ἐπὶ τὴν Ῥωμαίων τὰ κοῦφα καὶ ὀξέα δόρυχα Λιβυρνίδας προσαγορεύουσιν.“ Idem bell. civ. II, 39: „ἕτερον γένος Ἰλλυριῶν Λιβυρνοὺς, οἱ τὰ περίοικα νησὶ ταχείαις ἐληΐζοντο· καὶ Λιβυρνίδας ἐντεῦθεν ἡγοῦνται Ῥωμαῖοι τὰς ναῦς τὰς ταχείας, ὧν ἀρὰ πρῶτων ἐς πείραν ἦλθον.“ Liburni igitur, gens Illyrica, piraticam diu ac feliciter facientes rerum maritimarum peritiam adepti sunt, ut Pompeius contra Caesarem (cf. Caes. b. c. III, 5) et Octavianus contra Sextum Pompeium (Appian. b. c. V, 99: „διεφθάρετο δ' αὐτῷ [Καίσαρι] νῆες, βαρεῖαι μὲν ἕξ, κουφότεραι δὲ ἕξ καὶ εἰκοσι, λιβυρνίδες δὲ ἐπὶ πλείους“) et contra Antonium (Veget. de re mil. V, 3: „Augusto dimi-

cante Actiaco proelio, cum *Liburnorum* auxiliis praecipue victus fuisset Antonius, experimento tanti certaminis patuit, *Liburnorum* naves ceteris aptiores⁽¹⁾ eorum auxilio uteretur. Navigia eorum propter celeritatem et agilitatem aptissima erant et in ipsis pugnis ad cingendas magnas naves et post proelia ad persequendos hostes. Plutarch. Anton. c. 67: „*Ἐν τούτῳ δὲ Λιβυρνίδες ὤφθησαν διώκονσαι παρὰ Καίσαρος.*“ Praeterea iis utebantur duces, ut celeriter mare traicerent (Sueton. Octav. c. 17: „repetit Italiam tempestate in traiectu bis conflictatus, primo inter promontoria Peloponnesi atque Aetoliae, rursus circa montes Ceraunios, utrobique parte *Liburnicarum* demersa, simulque eius, in qua vehebatur, fuis armamentis et gubernaculo diffracto⁽²⁾) vel ut classem circumveherentur adhortandorum militum causa vel alios ad usus. Appian. b. c. V, 111: „*Λιβυρνίδος δὲ αὐτὸς ἐπέβαινε καὶ περιέπλει πάντας παρακαλῶν.*“ Iam cum certum sit, in pugna Actiaca Antonium altiores et mole sua impeditas naves habuisse, Octavianum minores et faciliores, plurima pars interpretum *Liburnis* hoc Horatii loco Octavianum, *altis navium propugnaculis* Antonii classem indicari opinantes sic locum sunt interpretati: „Caesaris navibus ibis inter ingentes illas naves Antonii, cum hoc depugnaturus.“ Non recte, opinor. Primum enim Octavianum classis non ex solis *Liburnis* composita erat, sed naves habuit satis altas, quamquam humiliores quam maximae erant Antonii. Florus IV, 11: „Nobis CCCC amplius naves, CC non minus *hostium*, sed numerum magnitudo pensabat; quippe *a senis in novenos remorum ordinibus*, ad haec turribus atque tabulatis allevatae castellorum et urbium specie; *Caesaris naves a trirēmibus in senos nec amplius ordines creverant*, itaque habiles ad omnia quae usus poscebat cet.“ Plut. Anton. 61: „*Ἀντωνίῳ μὲν ἦσαν αἱ μάχιμοι νῆες οὐκ ἐλάττους πεντακοσίων, ἐν αἷς οὐκ ἤμεναι πολλαὶ καὶ δεκῆρεις.*“ Inde intelligitur, maiores naves Octavianum bene potuisse dici *alta propugnacula*. Plin. H. N. XXXII, 1, 1: „Armatae classes imponunt sibi turrium propugnacula, ut in mari quoque pugnetur velut e muris.“ Cic. Verr. II, 5, 34: „Navis ita magna, ut propugnaculo ceteris possit esse.“ Nec, si Octavianus nullas habuisset nisi parvas naves, potuisset Virgilius scribere Aen. VIII, 691 sqq.: „pelago credas innare revulsas Cycladas aut montes concurrere montibus altos: Tanta mole viri turritis puppibus instant.“ Deinde non video quomodo qui illa ratione locum Horatii interpretari velint, particulam *inter* intelligant. Nam si Maecenas *inter* alta navium propugnacula iturus est, non est pugnaturus contra ea, *inter* quae proficiscitur, sed cum iis contra hostes. Itaque non dubito iis accedere, qui *Liburnas* h. l. ea navigia esse voluerunt, quibus ad traiciendum mare Adriaticum usus erat Maecenas, ut pugnae quae instabat interesset. Ceterum *Liburnicae* rostra habuerunt et *καταστροφάματα*. Plin. H. N. IX, 6: „Hoc scire oreas, infestam his (balenis) beluam. Irrumpunt ergo in secreta ac vitulos earum ac foetas, vel etiamnum gravidas lancinant morsu incussaeque ceu *Liburnicarum* rostris fodiunt.“ Id. X, 23: „Olores *Liburnicarum* modo rostrato impetu feruntur, facilius ita findentes aera, quam si recta fronte impellerent.“ Plut. Ant. 67: „*Ἐν τούτῳ δὲ Λιβυρνίδες ὤφθησαν διώκονσαι παρὰ Καίσαρος· ὁ δ' (Ἀντώνιος) ἀντίπροσθεν ἐπιστρέφειν τὴν ναῦν κελεύσας τὰς μὲν ἄλλας ἀνέστειλεν· Ἐὐρυκλῆς δ' ὁ Λαίῳν ἐνένευτο σοβαρὸς, λόγῃν τινὰ κραδαίνων ἀπὸ τοῦ καταστροφάματος ὡς ἀφῆσαν εἰς αὐτόν.*“ Propert. III, 9, 44: „*Liburna* rostra.“ Posteriore tempore ea quoque navigia, quibus divites et nobiles aut itineris faciendi aut delectationis causa per mare navigabant (Jachten), *Liburnicae* appellabantur. Sueton. Calig. 37: „Fabricavit et deceres *Liburnicas*, gemmatis puppibus, versicoloribus velis, magna thermarum et porticuum et tricliniorum laxitate magnaue etiam vitium et pomiferarum arborum varietate, quibus discumbens de die inter choros ac symphonias littora Campaniae peragraret.“ id. Neron. c. 34: „datoque negotio trierarchis, qui *Liburnicam*, qua advecta erat (mater) velut fortuito concursu confringerent, protraxit (Nero) convivium.“ *Vegetii* denique seu *Valentiniani* imperatoris aetate omnes naves bellicae appellabantur *Liburnae*. Veget. V, 3: *Liburna* namque Dalmatiae pars est, Iadertinae subiucens civitati, cuius exemplo nunc naves bellicae fabricantur et appellantur *Liburnae*.“

CARMEN II.

Beatus ille qui procul negotiis,
 Ut prisca gens mortalium,
 Paterna rura bobus exercet suis
 Solutus omni fenore,
 5 Neque excitatur classico miles truci,
 Neque horret iratum mare,
 Forumque vitat et superba civium
 Potentiorum limina.
 Ergo aut adulta vitium propagine
 10 Altas maritat populos,
 Aut in reducta valle mugientium

Carmen II.

Inducitur Alfius, fenerator eius aetatis notissimus, molliore quadam animi affectione nescio quo casu motus et rusticae vitae suavitates deliciasque facundo ore praedicans. Cuius qui seriam et severam orationem per sexaginta sex versus continuatam audiverit, exspectabit certo hunc hominem fenore posito urbem et negotia statim esse relicturum. Quae quidem spes egregie fallitur, nam „Naturam expellas furca, tamen usque recurret“ (Epist. I, 10, 24). Laudat vir ille bonus vitam rusticam, redigit pecuniam in fenore positam Idibus tanquam praedia empturus, sed vincit avaritia et proximis Kalendis pecunia iterum fenori datur. Omnis carminis *ἐλεγεια* inest in gravi illo *ἀποροδομήτω*, quo homines alia saepe laudant alia sequuntur. Est igitur tota descriptio ex illo genere, quod satira prima alia ratione propositum et castigatum legimus. Fuerunt qui Horatium Virgilii locum Georg. II, 458 sqq. amabili quadam irrisione respexisse putarent; fuit etiam qui ad Tibulli carmina quaedam libri primi totum carmen accommodatum diceret; neutrum habet idoneas quibus possit recte defendi causas. Quo tempore carmen scriptum sit, non potest dici. Mirum est quod non pauci codices antiqui ex hoc uno carmine duo fecerunt, quorum alterius initium est v. 23. Ceterum Alfi etiam Columella mentionem fecit I, 7, 2: „Vel optima

nomina non appellando fieri mala fenerator Alfius dixisse verissime fertur.“

V. 1. *negotiis*] saepe de omni genere quaestus, sed imprimis de eo quod ex fenore reddit. Epist. I, 6, 33. — *exercet*] eleganter pro *subigit*. cf. Carm. IV, 14, 21. Virg. Georg. I, 99. — *truci*] ob sonitum ut hostibus ita saepe dormientibus vel otiantibus militibus terribilem. Lucan. IV, 395: „certos non rumpunt classica somnos.“ Veget. II, 22: „Classicum appellatur, quod buccinatores per cornu dicunt. Hoc insigne videtur imperii, quia classicum canitur imperatore praesente vel cum in militem capitaliter animadvertitur.“ — *ergo*] Ab his igitur molestiis agricola cum liber sit, totum se dare potest naturae amoenitatibus; quarum quidem magna quaedam tabula deinde proponitur. — *adulta propagine*] Novellae vites tertio anno cum radices satis egisse viderentur, *maritari* solebant. Vide ad Carm. II, 15, 4. *Altas* adiectivum ex natura earum arborum petium non est inane neque mutandum in *albas*, in quod incidit Lambinus. — *Aut in reducta*] Ne maritatio vitium ab simili opere putationis et insitionis arborum separaretur, multi editores invitis codicibus hunc versuum ordinem restituendum censuerunt, ut versus 11. 12 insequentium versuum 13. 14 locum occuparent. Maritatio autem mense fit Octobri, putatio et insitio Martio; inter utramque ad ordinem anni et naturae armento-

- Prospectat errantes greges,
 Inutilesve falce ramos amputans
 Feliciores inserit,
 15 Aut pressa puris mella condit amphoris,
 Aut tondet infirmas oves;
 Vel cum decorum mitibus pomis caput
 Auctumnus agris extulit,
 Ut gaudet insitiva decerpens pyra,
 20 Certantem et uvam purpurae,
 Qua muneretur te, Priape, et te, pater
 Silvane, tutor finium.
 Libet iacere modo sub antiqua ilice
 Modo in tenaci gramine.
 25 Labuntur altis interim ripis aquae,
 Queruntur in silvis aves,
 Fontesque lymphis obstrepunt manantibus,
 Somnos quod invitet leves.
 At cum tonantis annus hibernus Iovis
 30 Imbres nivesque comparat,
 Aut trudit acres hinc et hinc multa cane
 Apros in obstantes plagas,

rum prospectus ponitur ut laborum intermissio et agricolarum voluptas. cf. Carm. I, 17, 17. — *inutilesve*] Sic ex Bentleii coniectura pro *inutilesque*, ne diversa male coniungi videantur. Idem iudicandum de versu 35. — *feliciores*] Frugiferae arbores felices nominantur. Virg. Georg. II, 81. Liv. V, 24.

V. 16. *infirmas oves*] imbelles, molles, quippe quae nihil resistant tondentibus. Ovid. Ib. 43: „Pax erit haec nobis, donec mihi vita manebit, Cum pecore infirmo quæ solet esse lupis.“ — *vel cum*] „Vel sic usurpatum eam habet potestatem, ut transitum paret ad alia, cum respicit ad praegressa.“ Wagner ad Virg. Aen. XI, 406. — *agris*] Hoc praeferendum auctoritate codicum alteri lectioni *arvis*; quamquam arva quoque pomifera sunt ut Prop. IV, 7, 81: „Pomosis Anio qua spumifer incubat arvis.“ — *ut gaudet*] cf. Carm. III, 25, 12. infra 61.

— *insitiva*] ab ipso inserta. In ea re causa est gaudii, quod pyra licet decerpere, ab ipso, non ab aliis olim inserta. — *purpurae*] Codd. aliquot *purpura*; sed vide ad Carm. I, 3, 13. — *Priape*] Priap. 82, 4: „Assiduus custos ruris ut esse velis.“ De Silvano vide Carm. III, 29, 23. Virg. Aen. VIII, 601. — *tenaci gramine*] vel propter altitudinem, quod pedes euntium quasi tenet; vel quod terrae firmiter adhaeret. — *obstrepunt*] iacenti. Liv. XXI, 56. Ingeniosa sed non necessaria Marklandi coniectura *frondesque* ad exemplum Propertii IV, 4, 4: „Multaque nativis obstrepit arbor aquis.“ — *tonantis*] Est epitheton ornans, ὀφειβόμενης, ὀφειβάννος, τερατιέαννος. Alii interpretati sunt de tempestatibus, quae cum tonitru permixtae hiemis initio in Italia saevire solent. cfr. Carm. III, 5, 1. Describuntur gaudia hiberna. — *hinc et hinc*] Sic poe-

Aut amite levi rara tendit retia,
 Turdis edacibus dolos,
 35 Pavidumve leporem et advenam laqueo gruem
 Lucunda captat praemia.
 Quis non malarum quas amor curas habet
 Haec inter obliviscitur?
 Quodsi pudica mulier in partem iuвет
 40 Domum atque dulces liberos,
 Sabina qualis aut perusta solibus
 Pernicis uxor Apuli,
 Sacrum vetustis exstruat lignis focum
 Lassi sub adventum viri,
 45 Claudensque textis cratibus laetum pecus
 Distenta siccet ubera,
 Et horna dulci vina promens dolio
 Dapes inemptas apparet:
 Non me Lucrina iuverint conchylia
 50 Magisve rhombus aut scari,
 Si quos Eois intonata fluctibus
 Hiems ad hoc vertat mare;

tae, quibus quae remota sunt etiam praesentia videntur, pro *hinc et illinc*. Id imitati sunt prosaici scriptores a Livii tempore: Liv. XXI, 8, 8. I, 13, 2. cf. Epod. 4, 9. Carm. I, 34, 14 sqq. — *rara*] opponuntur densis; sic rariores silvae apud Tacitum Agr. 37. — *amite*] pertica aucupali. — *edacibus*] Bene additum; edacitas enim fraudi iis est.

V. 35. Notandus hic versus, qui celeritate anapaestorum et tribrachys cursum leporis et volatum gruis imitari videtur. Plin. X, 23, 31 grues hie-
 mis, ciconias aestatis advenas appel-
 lat. — *amor*] Male intellexerunt amo-
 rem habendi, cum sit feminarum. De
 attractionis genere cf. Sat. I, 4, 2. I,
 10, 16. Ovid. Met. I, 342: „Et quibus
 est undis audita, coercuit omnes.“ —
Haec inter] vide ad Carm. III, 3, 11.
 — *in partem*] κατά μέρος, ex parte.
 Plaut. As. III, 3, 89: „agesis tu in
 partem nunc iam hunc delude.“ —

Sabina] vide ad Carm. III, 6, 38. De-
 scribitur inde ab hoc loco rusticorum
 vita domestica; ita ut tota haec lau-
 datio in duas fere aequales partes di-
 vidatur, quarum altera vitam rusticam
 extra domum, altera in domo habeat.
 Quae de amore dicta sunt, ea ab al-
 tera parte ad alteram legentes trans-
 ducunt. Ceterum Horatium imitatus
 est Statius Silv. V, 1, 122: „velut
 Apula coniux Agricolae parci vel sole
 infecta Sabina, Quae videt emeriti iam
 prospectantibus astris Tempus adesse
 viri, propere mensasque torosque In-
 struit expectatque sonum redeuntis
 aratri.“ — *exstruat focum*] Ne quid
 audacter dictum putes pro *tigna in
 foco exstr.* compara Ciceronem Tusc.
 V, 21, 62. — *horna vina*] pro sim-
 plicitate rustica. — *inemptas*] domi na-
 tas. Virg. Georg. IV, 132 sq. — *Lu-
 crina*] e lacu Lucrino. — Sat. II, 4, 32.
 — *Eois*] praecipue Syriae. — *intona-
 ta*] cum tonitru immissa; praeter h.

- Non Afra avis descendat in ventrem meum,
 Non attagen Ionicus
 55 lucundior quam lecta de pinguissimis
 Oliva ramis arborum
 Aut herba lapathi prata amantis et gravi
 Malvae salubres corpori
 Vel agna festis caesa Terminalibus,
 60 Vel haedus ereptus lupo.
 Has inter epulas ut iuvat pastas oves
 Videre properantes domum,
 Videre fessos vomerem inversum boves
 Collo trahentes languido
 65 Positosque vernas, ditis examen domus,
 Circum renidentes lares.
 Haec ubi locutus fenerator Alfius,
 Iam iam futurus rusticus,
 Omnem redegit Idibus pecuniam,
 70 Quaerit Kalendis ponere.

I. non videtur inveniri haec forma; de significatione tamen comparari potest Val. Fl. III, 168: „Occupat os barbamque viri clavaque superne Intonat.“ — *Afra avis*] gallina Numidica, Perlhuhn. Varro R. R. III, 9, 18: „Gallinae Africanae sunt grandes, variae, gibberae. Veneunt propter penuriam magno.“ Plin. H. N. X, 26: „Africae hoc est gallinarum genus (Meleagrides), gibberum, variis sparsum plumis, quae novissimae sunt peregrinarum avium in mensas receptae propter ingratum virus.“ — *attagen*] Plin. H. N. X, 48: „Attagen maxime Ionius celebratur, vocalis alias, captus vero obmutescens, quondam existimatus inter raras aves. Iam et in Gallia Hispaniaque capitur, et per Alpes etiam.“ Martial. XIII, 61: „Inter saporis fertur alitum primus Ionicarum gustus attagenarum.“ — *lapathi*] Sat. II, 4, 29. *λάπαθον*, latine *rumex*. — *malvae*] Carm. I, 31, 16. Martial. X, 48, 7: „Exoneraturas ventrem mihi villicae malvas Attulit.“ — *Terminalibus*] a. d. VII. Kal. Mart. Ovid. Fast.

II, 653: „Spargitur et caesa communis Terminus agna.“ — *ereptus lupo*] Parci agricolae non mactant haedos, sed lupo ereptos et iam admorsos non spernunt, ita ex damno lucrum quasi capientes. — *ditis*] Poetica haec forma a prosaïcis scriptoribus recepta est ab Augusti demum aetate. Liv. XLII, 34. cf. Tibull. II, 1, 23: „Turbaque vernarum, saturi bona signa coloni.“ Sat. II, 6, 66. — *renidentes*] tersi ac politi; hellpolirt, spiegelblank. Fuerunt qui coniungere mallerent *vernas renidentes circum lares*, quod nemo probabit nisi qui verborum insidias struxisse Horatium putet. — *iam iam*] vide ad Carm. II, 20, 9. — *Idibus*] Cic. Catil. I, 6. Hor. Sat. I, 3, 87. Kalendis, Nonis, Idibus pecunia a feneratoribus aut in fenus dabatur aut redigebatur a debitoribus. — *ponere*] cf. A. P. 421. Cic. pro lege Manil. 7, 18. *Redigere* pecuniam est apud debitores collocatam exigere. — *Quaerit*] *Ἀπορροδύητον* mirifice adiuvatur *ἄσυνδότης*.

CARMEN III.

Parentis olim si quis impia manu
 Senile guttur fregerit,
 Edit cicutis allium nocentius.
 O dura messorum ilia!
 5 Quid hoc veneni saevit in praecordiis?
 Num viperinus his cruor
 Incoctus herbis me fefellit? an malas
 Canidia tractavīt dapes?
 Ut Argonautas praeter omnes candidum
 10 Medea mirata est ducem,
 Ignota tauris illigaturum iuga
 Perunxit hoc Iasonem;
 Hoc delibutis ulta donis pellicem,
 Serpente fugit alite.
 15 Nec tantus unquam siderum insedit vapor
 Siticulosae Apuliae,
 Nec munus humeris efficacis Herculis

Carmen III.

Videtur olim Maecenas Horatio rusticum aliquod edulium, fortasse mortuum, ex allio confectum commendavisse; quod cum gustasset Horatius visceraque ardore et dolore affecta haberet, seriam is rem in iocum vertit, exsecratur allium dirissimis venenis nocentius, Maecenatique, cuius iocosa quadam malignitate deceptum se sentit, iocosam etiam poenam optat. Quo anno carmen scriptum sit non liquet; neque tamen vehementer erraveris, si propter familiaritatem qua cum Maecenate poeta coniunctus iam vixit duobus tribusve post iter Brundisium annis talia scribi potuisse putes.

V. 1. *olim*] vide ad Carm. II, 10, 17. — *fregerit*] Carm. II, 13, 6; quo scelere gravius nullum est. — *edit*] Sat. II, 8, 90. Etiam Cic. ad Fam. IX, 20 „ne comedim.“ Antiqua forma. — *messorum*] qui ferre possint tam dirum venenum. Exclamatio admirationem exprimit. cf. Virg. Buc. 2, 10. — *viperinus cruor*] ut Carm. I, 8, 9, praesentissimum venenum. —

Canidia] vide ad Epod. 5. — *tractavit*] cf. Carm. II, 13, 10. — *praeter omnes*] Coniungenda haec sunt cum *candidum*, non cum *mirata est*; cum quadam elegantia pro *magis quam*. Epod. 11, 3. — *Iasonem*] ut is resistere posset flammis quas taurus evomere solebat. — *hoc*] Magna cum vi repetitur pronomen ex superiori versu, quo nihil certius esse indicetur nisi venenum Medae ex allio fuisse factum. — *pellicem*] cf. Epod. 5, 63 sqq. Est Glaucē vel Creusa, Creontis regis Corinthi filia, quam cum Iason in matrimonium duxisset, repudiata Medea palla veneno imbuta combussit; quo facto Medea curru draconibus alatis iuncto per aërem Athenas aufugit. cf. Carm. IV, 11, 26. — *vapor*] proprie calida exhalatio, deinde ipse calor unde illa efficitur. Sic Lucretius II, 148: „vapor is quem sol mittit.“ Cic. de Sen. 15, 51. — *siticulosae*] cf. Carm. III, 30, 11. — *munus*] Ovid. Met. IX, 130. — *efficacis*] Carm. IV, 8, 30. Cic. Fam. VIII, 10, 3: „Nosti Marcellum quam tardus et parum efficax sit.“

Inarsit aestuosius.

At si quid unquam tale concupiveris,
 20 Iocose Maecenas, precor
 Manum puella savio opponat tuo,
 Extrema et in sponda cubet.

CARMEN IV.

Lupis et agnis quanta sortito obtigit
 Tecum mihi discordia est,
 Hibericis peruste funibus latus
 Et crura dura compede.
 5 Licet superbus ambules pecunia,
 Fortuna non mutat genus.
 Videsne, sacram metiente te viam
 Cum bis trium ulnarum toga,

Carmen IV.

Invehitur Horatius acerbissime in hominem quendam, qui olim nequissimum mancipium malis artibus divitias sibi et auctoritatem paraverat. In qua re bene animadvertendum est, Horatium non servili qua ille fuisset condicione ut hominem vehementissime castigaret commotum esse, sed vilitate et nequitia quam paratae opes arrogantia et iactantia quasi cumulo auxissent. Pecunia enim non mores mutat, sed rationem, qua quales sint mores indicatur. Ille enim servus furta egit et nequitias, ut flagellis et compedibus a domino coerceretur; dives factus et tribunus militum omnium in via Appia ambulantium proborum hominum indignationem et odium sibi contraxit. Scriptum carmen est cum classis pararetur contra latrones et piratas S. Pompeii a. u. 718. Vide Velleii locum, qui infra ad Epod. 9, 7 transscriptus est. Fuit autem qui castigatur tribunus militum in exercitu ipsius Octaviani, non Sextus Menas, Pompeii libertus, qui non tribunus militum fuit, sed dux classis Pompeianae, et „cum sexaginta navium classe ad Caesarem defecit eidemque classi iussu Caesaris praefuit.“ Oros. VI, 18. In

titulis nonnullorum codicum nominatur Veditius quidam Rufus, quod nomen a nemine certe excogitari potuit ob eamque causam non parvam habet probabilitatis speciem. Illud tamen noli credere, Horatium de certa quadam persona non cogitavisse; nimirum ita toti carmini pondus demeres et aculeum.

V. 1. *sortito*] sorte s. lege naturae. — *Hibericis*] ex sparto Hispanico tortis. — *peruste*] Epist. I, 16, 47. Urunt enim vulnera flagellis facta. — *compede*] In prosa oratione usitatus solus fuit pluralis numerus; aptior utique, cum compedibus pedes utrimque vincti constringerentur. Poetae primum usi sunt ablativo singularis, postea etiam genitivo et accusativo. — *ambules*] Sat. I, 2, 25. I, 4, 66; respicitur hominis affectatio dignitatis et gravitatis. — *genus*] Male interpretati sunt servilem condicionem, cum sit genus morum. Illam Horatius libertini filius recto iudicio munitus non vituperasset. cf. Epist. I, 12, 10. — *Sacram metiente*] Sacram viam, quae ad Capitolium ducebat, frequentare solebat otiosorum hominum turba. Sat. I, 9, 1. *Metiri* autem acerbè dictum de homine qui otiosus et vanus totam viam perambulat, aliis scilicet ut osten-

- Ut ora vertat huc et huc euntium
 10 Liberrima indignatio?
 Sectus flagellis hic triumviralibus
 Praeconis ad fastidium
 Arat Falerni mille fundi iugera
 Et Appiam mannīs terit,
 15 Sedilibusque magnus in primis eques
 Othone contempto sedet.
 Quid attinet tot ora navium gravi
 Rostrata duci pondere
 Contra latrones atque servilem manum
 20 Hoc, hoc tribuno militum?

CARMEN V.

At o deorum quidquid in coelo regit
 Terras et humanum genus,

dat quam amplis et pretiosis vestimentis utatur. Talis enim toga est quae insequenti versu describitur; cui nihil desit quod delicato etiam homini gratum et iustum possit videri. In codd. scriptum est *bis ter*; ex quibus verbis cum apta sententia non possit extorqueri, recipienda fuit ingeniosa Barthii coniectura *bis trium*, praesertim cum aliquid auxilii accedat ex scriptura duorum bonorum codicum *bis . t . ulnarum*; quam vides facile potuisse ab incautis scribis corrumpi. cf. Cic. Cat. II, 10 „velis amictos, non togis.“ — *huc et huc*] poetice pro huc et illuc. Vide ad Epod. 2, 31. *Vertat* recte interpretati sunt scholiastae *avertat, detorqueat*. — *triumviralibus*] Quae sequuntur usque ad finem carminis imitantur sermones hominum, qui tam nefarium hominem sumptuosius mollissimisque vestibus indutum gloriari indignabantur. Triumviri capitales de delictis servorum aliorumque hominum villioris generis, etiam peregrinorum cognoscebant suppliciiisque eorum praeerant. A quibus damnatus si quis caederetur, praeco simul criminis et poenae genus magna voce pronuntiabat. — *Falerni*] et amoenis-

simi et fertilissimi. — *mannis*] vide ad Carm. III, 27, 7. — *terit*] frequentibus ad sua in Campania praedia itineribus. — *Othone*] L. Roscius Otho trib. pl. a. u. c. 687 lege vetuit ne quis in quattuordecim gradibus orchestrae, in qua senatores sedebant, proximis sederet, nisi qui eques aut equestri censu esset. Hic igitur homo tam fuit dives, ut legem Rosciam theatrali facile posset contemnere; equestrem enim censum divitiis suis longe superavit. — *Quid attinet*] nil expedit, nil prodest. Cic. Fin. IV, 22: „Quid attinuit cum iis, quibuscum concinebat, verbis discrepare?“ — *ora navium rostrata*] Nihil mutandum neque cum Benteio scribendum *tot aera* aut cum Sanadono *rostra . . . aerata*. Poetarum oratio non est coercenda vulgari dicendi ratione aut nostrorum lexicorum copia et legibus.

Carmen V.

Describitur in hoc carmine, quod totum dramaticum est, phyltrorum magicorum terribilis apparatus. Quo consilio in medias res poeta legentes ducit raptumque puerum, cuius intestinis

Quid iste fert tumultus? et quid omnium

Vultus in unum me truces?

5 Per liberos te, si vocata partibus

Lucina veris affuit,

Per hoc inane purpurae decus precor,

Per improbaturum haec Iovem,

sagae uti volunt, mirantem et querentem, quod subita vi vestimentis privatum se videat, inducit. Iam indicatur quo ornato mulieres quid agant; Canidia viperis in capillum insertis componit singulas partes philtri: caprificos et cupressus funebres, ova et plumas strigis ranae sanguine infecta, herbas magicas ex Thessalia et Hiberia collectas, ossa esurienti cani erepta eiusque sanie conspersa, quibus omnibus postea addenda sunt medulla et iecur pueri fame necati; altera, Saggana, domum conspergit aqua Averni lacus (cf. Cic. Tusc. I, 16); tertia, Veia, scrobem effodit, in quem iniiciatur miser ille puer; quarta, Folia, carminibus devocat sidera et lunam. Inter quas praecipua est Canidia, propter quam omnia parantur; ea enim Varum iam senem, a quo olim amatum relicta est, magica vi ad se reducere tentat. Quae dicuntur in hoc carmine a Canidia (v. 49), a multis male intellecta sunt; ipsa enim cum hoc agit senem illum neque videt neque audit, nam quaecunque id indicare videntur ad furorem et ardentem cupiditatem mulieris referenda sunt. „Adeste, inquit, nocturna numina, mihi auxilio, adversariis meis terrori; Varum enim cogam, ut ardenti amore ad me agitatus nocturno tempore uncto capillo et delicato ornato domum relinquat, canes ex somno excitet, vicinos ex domo eliciat ab omnibusque derideatur. Sic me ulciscar (v. 60).“ Qui insequuntur versus causas ostendunt, quibus Canidia ira ac furore excitata ut certissimo et extremo artis suae genere utatur permota esse dicitur. Nam „quid, clamat, factum est? Cur solitae artes nihil adiuverunt? Nullas tamen neque herbas neque radices inexpertas reliqui, immo etiam lectulum eius unguentis illevi, quae aliarum amorem omnem ex eius animo delere debebant.“ Quibus verbis cum acerbitate et ira ridens haec ad-

dit: „At vero alia et potentior saga me superasse videtur; sed nondum ostendi quid ego valeam.“ Iam cum in eo sit, ut puerum in fossam iniiciat terraque usque ad os tegat, miser ille in dirissimas execrationes erumpit. Quibus Horatius sapienter carminis finem fecit; pueri enim necem poeta neque potuit describere neque debuit, cum id quod vellet, nimium ut insaniam immanium mulierum vehementer carperet, satis effecisset. Sunt carminis quattuor partes: 1) pueri nescientis quid sibi mulieres paraturae sint querela, v. 1—10; 2) apparatus omnium rerum quae sagis sunt necessariae, v. 11—46; 3) preces et consilium Canidiae, v. 47—82; 4) execratio pueri, v. 83—102. Principales igitur partes; altera et tertia, tricenos senos habent versus; quarta duplicem habet versuum numerum primae partis. Videtur carmen eodem fere tempore esse scriptum quo Sat. I, 8; quae hic severe et graviter reprehenduntur, eadem satira illa ridendo proferuntur. In Satiris enim ridendo dicitur verum. Scholiastae affirmant Canidiam vero nomine fuisse *Gratidiam*, Neapolitanam unguentariam, a canitie ioci causa sic appellatam.

V. 1. *at*] Indicat particula dolorem et aegritudinem cum animi quadam vehementia. Incipit Ovidius Her. XII, 1 eadem particula. — *quidquid*] Liv. XXIII, 9: „iurantes per quidquid deorum est.“ Ovid. Met. X, 17: „quidquid mortale creamur.“ — *et quid*] Orellius ex compluribus codicibus *aut quid*, quo turbatum pueri animum melius exprimi arbitratur. Praefero plurimorum et antiquissimorum codicum auctoritatem. — *te*] Alloquitur Canidiam, sagarum principem. — *partibus veris*] si liberos vere habes, non alios supposuisti. Epod. 17, 50. Poeta, pueri dicentis paene immemor, suam sententiam mordacissime interposuit. De Lucina cf. C. S. 15. — *purpurae*]

- Quid ut noverca me intueris aut uti
 10 Petita ferro belua?
 Ut haec trementi questus ore constitit
 Insignibus raptis puer,
 Impube corpus quale posset impia
 Mollire Thracum pectora,
 15 Canidia brevibus implicata viperis
 Crines et incomptum caput
 Iubet sepulcris caprificos erutas,
 Iubet cupressus funebres
 Et uncta turpis ova ranae sanguine
 20 Plumamque nocturnae strigis
 Herbasque, quas Iolcos atque Hiberia
 Mittit venenorum ferax,
 Et ossa ab ore rapta ieiunae canis
 Flammis aduri Colchicis.
 25 At expedita Sagana per totam domum
 Spargens Avernales aquas
 Horret capillis ut marinus asperis
 Echinus aut currens aper.
 Abacta nulla Veia conscientia
 30 Ligonibus duris humum
 Exhauriebat ingemens laboribus,
 Quo posset infossus puer
 Longo die bis terque mutatae dapis

togae praetextae. Quintil. Decl. 340. extr.: „Ego vobis allego etiam ipsum sacrum praetextarum, quo sacerdotes velantur, quo magistratus: quo infirmitatem pueritiae sacram facimus ac venerabilem.“ *Inane* decus est, quia, cum tueri debeat, non tueretur puerum. Haec praetexta et bulla insignia sunt, quae leguntur v. 12. — *implicata viperis*] Furiarum instar. — *sepulcris erutas*] scilicet quae validiores in hac re haberentur. — *cupressus*] cf. Carm. II, 14, 23. Virg. Aen. III, 64. VI, 216. — *ranae*] bufonis. — *Iolcos*] Thessalae enim mulieres notae erant beneficiis et magicis artibus. Hiberia

autem regio Ponti est; frequentes ibi venenatae herbae, quibus olim Medea usa est. — *Colchicis*] quales accendisse fertur Medea Colchica, additis infelicibus lignis. — *Sagana*] Haec Canidia sociā commemoratur etiam Sat. I, 8, 25. — *Avernales aquas*] Virg. Aen. IV, 512. — *currens aper*] in venatores ruens. Ovid. Halieut. 59: „Aetus socia aper setis iram denuntiat hirtis.“ Supervacaneae igitur coniecturae *Laurens, ruens, certans*.

V. 30. *humum*] in domus impluvio, ut videtur. — *bis terque*] Male olim *bis terve*; nam *bis terque* significat *saepius, bis terve* est pro *raro*. —

- Inemori spectaculo,
 35 Cum promineret ore quantum exstant aqua
 Suspensa mento corpora:
 Exsucta uti medulla et aridum iecur
 Amoris esset poculum,
 Interminato cum semel fixae cibo
 40 Intabuissent pupulae.
 Non defuisse masculae libidinis
 Ariminensem Foliam
 Et otiosa credidit Neapolis
 Et omne vicinum oppidum,
 45 Quae sidera excantata voce Thessala
 Lunamque coelo deripit.
 Hic irresectum saeva dente livido
 Canidia rodens pollicem
 Quid dixit aut quid tacuit? O rebus meis
 50 Non infideles arbitrae
 Nox et Diana, quae silentium regis,
 Arcana cum fiunt sacra,
 Nunc nunc adeste, nunc in hostiles domos
 Iram atque numen vertite!
 55 Formidolosis dum latent silvis ferae

inemori] vide ad Carm. I, 5, 8. — *exsucta]* Probata haec lectio est bonis codicibus et antiquissimorum Cruquii codicum glossa *extracta*. In aliis *exsecta*, *exesa*, similia. cf. Iuvenal. 8, 90: „Ossa vides regum vacuis exsucta medullis.“ — *cum semel]* simul ac. Sat. II, 1, 24. — *otiosa Neapolis]* Fuerunt qui ex hoc nomine concluderent scenam huius epodi Neapoli esse; in quo eos errasse docent versus 58 et 100. Canidia Romae vixit ibique scelus hoc nefarium committitur. Nominatur autem Neapolis, et quia Canidia Neapolitana fuit et quia otiosa fuit urbs (Ovid. Met. XV, 711 „in otia natam Parthenopen“), cuius incolae, talium rerum cupidi, rumores illuc quoque allatos avide arripuerunt. Liv. VIII, 22. Alii versum 43 ad solam *Foliam* referre maluerunt, quam

suspiciantur Neapoli notam fuisse vel ibi habitasse atque a Canidia in auxilium Romam esse arcessitam. Neque minus errare videntur qui Canidiam olim ab Horatio amatam tradunt. Nusquam enim amoris vestigium. — *excantata]* Epod. 17, 4. Virg. Buc. 8, 69. Platon. Gorg. p. 513. A.: „τὰς τὴν σελήνην καθαιρούσας τὰς Θεταλίδας.“ De voce Thessala vide ad Carm. I, 27, 21. — *irresectum]* Hoc quoque Furiis proprium, rabiei signum. — *livido]* ut vetulae. — *tacuit]* Epist. I, 7, 72.

V. 51. *Diana]* Hecate. Carm. III, 22, 4. Sacris omnibus silentio opus est, etiam magicis. — *hostiles domos]* earum quae Varum a Canidia ad se detraxerant. — *formidolosis]* Habet h. v. et activam et neutralem significationem; illa cum aperta sit altero loco

Dulci sopore languidae,
 Senem, quod omnes rideant, adulterum
 Latrent Suburanae canes
 Nardo perunctum, quale non perfectius
 60 Meae laborarint manus.
 Quid accidit? Cur dira barbarae minus
 Venena Medae valent?
 Quibus superbam fugit ulta pellicem,
 Magni Creontis filiam,
 65 Cum palla, tabo munus imbutum, novam
 Incendio nuptam abstulit.
 Atqui nec herba nec latens in asperis
 Radix fefellit me locis.
 Indormit unctis omnium cubilibus
 70 Oblivione pellicum.
 Ah ah! solutus ambulat veneficae
 Scientioris carmine.
 Non usitatis, Vare, potionibus,
 O multa fleturum caput,
 75 Ad me recurre nec vocata mens tua
 Marsis redibit vocibus.
 Maius parābo, maius infundam tibi
 Fastidienti poculum,
 Priusque coelum sidet inferius mari

Horatiano quo vocabulum legitur, Carm. II, 17, 18, praetuli hanc vetustissimorum codicum scripturam, quam confirmant antiqua glossa codd. Blandin. „propter horrorem noctis et ferarum.“ In aliis codd. est *formidososae*. — *Suburanae*] Subura regio urbis Romae, ubi habitabant diffamatae mulieres in iisque Canidia. — *latrent*] De accusativo cf. Sat. II, 1, 85. Epist. I, 2, 66. *laborarint*] Ne antiquissimi quidem codices consentiunt; alii *laborarint*, alii *laborarunt* exhibent. Coniunctivus potentialis videtur praestare. — *Medae*] Iisdem se gloriatur uti venenis, quibus olim Medea usa erat; *minus* igitur idem quod *non*, *nihil*, vel, si placet, *minus quam alias*. — *super-*

bam] Iasonis amore arroganter gloriantem. Altera lectio *superba* vel propter metrum posthabenda est. — *Creontis*] vide ad Epod. 3, 13. — *palla*] *Λεπτόν τε πέπλον καὶ πλόκον χρυσήλατον*. Eurip. Med. 786. — *Ah, ah*] risus cum acerba cavillatione. — *solutus*] Epod. 17, 45. — *Vare*] In veteribus carminis inscriptionibus nominatur *Alfius Varus*, qui quis fuerit nescimus. — *vocata*] Sententia haec est: ad me recurre, sed non Marsae voces i. e. non vulgaria omnibusque nota erunt carmina, quibus mens tua vocata ad me redibit, sed maius parabo veneficium. Ovid. A. A. II, 106: „Philtro nocent animis vimque furoris habent.“ — *Marsis vocibus*] Marsis

- 80 Tellure porrecta super,
 Quam non amore sic meo flagres, uti
 Bitumen atris ignibus.
 Sub haec puer iam non ut ante mollibus
 Lenire verbis impias,
 85 Sed dubius unde rumperet silentium,
 Misit Thyesteas preces:
 Venena magnum fas nefasque, non valent
 Convertere humanam vicem.
 Diris agam vos: dira detestatio
 90 Nulla expiatur victima.
 Quin ubi perire iussus exspiravero,
 Nocturnus occurram furor,
 Petamque vultus umbra curvis unguibus,
 Quae vis deorum est manium,
 95 Et inquietis assidens praecordiis
 Pavore somnos auferam.
 Vos turba vicitim hinc et hinc saxis petens
 Contundet obscoenas anus;
 Post insepulta membra different lupi

carminibus; de quibus Gellius XVI, 11: „Marsis hominibus vi quadam genitali datum est, ut serpentium virulentorum domitores sint et intentionibus herbarumque sucis faciant medellarum miracula.“ cf. Tac. Ann. IV, 22: „Mox Numantina, prior uxor eius, accusata iniecisse carminibus et veneficiis vecordiam marito, insons iudicatur.“ Epod. 17, 28. Sat. I, 9, 29. — *atris ignibus*] nam atrum ipsum bitumen atrum fumum edit. cf. Virg. Georg. III, 451. — *sub haec*] Statim postquam Canidia haec dixit. Haec enim particula utrumque tempus significat et quod proxime aliquam rem praecedit et quod statim sequitur. De qua re compara Sat. II, 8, 43 et Carm. I, 9, 19. Sat. II, 1, 9. II, 7, 109. Epist. II, 2, 169. Sat. II, 7, 33. I, 1, 10. Epist. I, 16, 22. — *Thyesteas preces*] vide Cic. Tusc. I, 44. — *Venena*] Difficillimum hunc et diversissime tentatum locum ita optime

expedies, si ex verbis *non valent* ipsum verbum *valent* omitta negante particula repetas: venena valent quidem magnum fas nefasque convertere i. e. confundere, non valent convertere humanam vicem, hominum sortem. Sic Tacit. Ann. XII, 64: „Agrippina, quae filio dare imperium, tolerare imperitantem nequibat.“ cf. ib. XIII, 56: „Deesse nobis terra, in qua vivamus, in qua moriamur non potest.“ Deinde cf. Suet. Aug. 66: „vicem suam conquestus est,“ et Virg. Georg. I, 505: „quippe ubi *fas versum atque nefas*.“ Ceterum ex coniectura nuper Hauptius in editione apud Weidmannos: *venena maga non fas nefasque, non valent* etc.; ingeniose quidem, sed praeter necessitatem. — *nulla expiatur*] cf. Carm. I, 28, 34. — *nocturnus furor*] Interfectorum animas perpetuo sequi et terrere eos, a quibus necati essent, vulgaris opinio fuit. Virg. Aen. IV, 385. Cic. Rose. Am. 24, 67. — *cur-*

- 100 Et Esquilinae alites,
Neque hoc parentes heu mihi superstites
Effugerit spectaculum.

CARMEN VI.

- Quid immerentes hospites vexas canis
Ignavus adversum lupos?
Quin huc inanes, si potes, vertis minas,
Et me remorsurum petis.
5 Nam qualis aut Molossus aut fulvus Lacon,
Amica vis pastoribus,
Agam per altas aure sublata nives,
Quaecunque procedet fera;
Tu cum timenda voce complesti nemus,
10 Proiectum odoraris cibum.
Cave, cave: namque in malos asperrimus
Parata tollo cornua,

vis unguibus] Furiis praelongi erant ungues et incurvi. — *hinc et hinc*] vide ad Epod. 2, 31. — *Esquilinae alites*] rapaces, quae cadavera quaerunt. De Esquilis cf. Sat. I, 8, 14. Hiatus proprio nomine excusatur. — *heu*] Luget quod parentes habiturus sit superstites, cum naturae lege filii parentibus superstites esse debeant.

Carmen VI.

Acerbissimum carmen in hominem ignotum, qui innocentes et peregrinos homines, qui ipsi se non potuerunt defendere, malignis carminibus — nam videtur poeta fuisse — erat calumniatus. Horatius se comparat cum cane pastoralis, qui natura fidelis ac mitis, si qua fera gregem aggressa sit, in furorem agatur; adversarium cum venatico ac malo, qui vehementi latratu fortitudinem quidem promittat, sed cum in silvam a domino missus sit muneris statim obliviscatur neque ferarum vestigia sed proiecti cibi odorem sequatur, fortitudinem autem in allatrando viatoribus expromat. Scholiastae nominant Cassium quendam

Severum, maledicum oratorem, qui a. u. 786 senex mortuus est et, quo tempore hoc carmen scriptum est, pueritiam vix egressus erat. Orta fortasse ea suspicio est ex eo, quod Tacitus scripsit Ann. I, 72: „Primus Augustus cognitionem de famosis libellis tractavit, commotus *Cassii Severi* libidine, qua viros feminasque illustres procacibus scriptis diffamaverat.“ Suet. Calig. c. 16: „*Cassii Severi* scripta, senatusconsultis abolita requiri et esse in manibus lectitarique permisit (Caligula).“ Alii de Maevio poeta cogitant; de quo vide Epod. 10; alii de Bavio, aequae malo poeta. Tempus incertum est, alii ad a. 716, alii ad a. 718 carmen retulerunt.

V. 1. *canis*] natura impudens. — *quin vertis*] Non recte in nonnullis codd., etiam in antiquissimo omnium Bland., *verte* et *pete*, quia priori certe imperativo metrum adversatur. De indicativo cf. Liv. I, 57. — *Molossus*] cf. Virg. Georg. III, 405. — *procedet*] Sic rectius quam quod inest in plurimis codicibus *praecedet*: „quaecunque fera gregem aggressura silvam relinquet.“ — *cornua*] cf. Carm. III,

Qualis Lycambae spretus infido gener
Aut acer hostis Bupalo.

15 An si quis atro dente me petiverit,
Inultus ut flebo puer?

CARMEN VII.

Quo, quo scelesti ruitis? aut cur dexteris
Aptantur enses conditi?

Parumne campis atque Neptuno super
Fusum est Latini sanguinis?

5 Non ut superbas invidae Karthaginis
Romanus arces ureret,

Intactus aut Britannus ut descenderet
Sacra catenatus via,

21, 18. Sumptum ex imagine tauri. — *Lycambae*] Aëchilochus poeta Lycamben, qui filiam suam illi iam desponsam daturum se negaverat, tam contumeliosis versibus insectatus erat, ut et socer et sponsa aegritudinis medelam laqueo quaereret. Epist. I, 19, 25. 30 sq. — *Bupalo*] Plin. H. N. XXXVI, 5: „Bupalus et Athenis clarissimi in ea (sculpendi) scientia fuere Hipponactis poetae aetate, quem certum est LX Olympiade fuisse. Hipponacti notabilis foeditas vultus erat; quamobrem imaginem eius lascivia iocorum ii proposuere ridentium circulis. Quod Hipponax indignatus amaritudinem carminum destrinxit intantum, ut credatur aliquibus ad laqueum eos compulisse, quod falsum est.“

Carmen VII.

Conqueritur poeta fatalem Romani imperii sortem, qua scelus olim interfecto Remo a Romulo commissum mutuis cladibus perpetuisque bellis civilibus posterius debeant luere. Scriptum videtur esse carmen a. 716, cum bellum pararetur inter Octavianum et S. Pompeium, qui Italiae littora iterum devastare urbemque ipsam Romam fame premere coeperat. Antonius ab Octaviano ad societatem belli vocatus

Brundisium constituta quidem die venit, sed, cum Octavianum ibi non reperisset, nihil moratus in Asiam reversus est, ubi Ventidius legatus Parthos, qui Pacoro duce in Syriam excursionem fecerant, felici pugna devicerat. Octavianus deinde solus cum Pompeio certavit, sed non feliciter primis proeliis. Alii carmen ad bellum Perusinum a. 713, alii ad a. 722 referendum esse existimarunt.

V. 2. *aptantur*] Eleganter pro: gladii stringuntur, educuntur. cf. Sen. Agam. 425: „Ad militares remus aptatur manus.“ *Scelesti* autem sunt ἐννοεῖς, ut *scelus* (Carm. I, 2, 29) τὸ ἄγος. — *Neptuno*] per metonymiam pro mari. De praepositione vide ad Carm. III, 3, 11. — *non*] Iusta hoc positum brevitate pro: „quod quidem non est factum, ut cet.“ — *invidae*] Sall. Cat. 10. — *Sacra via*] vide ad Epod. 4, 7. „Ex porta Triumphali per Campum Martium, Velabrum, Circum maximum et qua nunc est arcus Constantinianus qui triumphabant inde per hanc viam procedebant usque ad locum arcus Septimii Severi, unde captivi dimittebantur ad dexteram in proximum carcerem Tullianum; triumphantes per clivum Capitolinum ad laevam ascendeabant ad Capitolium.“ *Fea.* — *unquam*] Sic omnes codices;

Sed ut secundum vota Parthorum sua
 10 Urbs haec periret dextera.
 Neque hic lupis mos nec fuit leonibus
 Unquam nisi in dispar feris.
 Furorne caecus, an rapit vis acrior,
 An culpa? Responsum date!
 15 Tacent, et albus ora pallor inficit
 Mentesque percussae stupent.
 Sic est: acerbâ fata Romanos agunt
 Scelusque fraternae necis,
 Ut immerentis fluxit in terram Remi
 20 Sacer nepotibus cruor.

CARMEN VIII.

Rogare longo putidam te saeculo,
 Vires quid enervet meas,
 Cum sit tibi dens ater et rugis vetus
 Frontem senectus exaret,
 5 Hietque turpis inter aridas nates
 Podex velut crudae bovis?
 Sed incitat me pectus et mammae putres,
 Equina quales ubera,
 Venterque mollis et femur tumentibus
 10 Exile suris additum.
 Esto beata, funus atque imagines
 Ducant triumphales tuum,

in una antiqua editione *nunquam*, ex correctione, opinor. Ordo est: neque hic mos unquam fuit lupis neque leonibus feris nisi in dispar. *Dispar* ut substantivum positum est; *feris* autem magno cum pondere sententiam claudit, ut prope idem efficiat ac si scriptum sit: *qui tamen feri sunt*. — *caecus*] cf. Carm. I, 18, 14. Sat. II, 3, 44. Virg. Aen. II, 244. — *vis acrior*] fatalis necessitas. — *albus pallor*] qualis conspicitur in ore mortui hominis; quo quidem proditur terror divinus et conscientia culpa. Inde etiam

tacent, stupent. — *ut*] vide ad Carm. IV, 4, 42. — *sacer nepotibus*] perniciosus. cf. Virg. Aen. III, 57. Altius calamitates, quibus per bella civilia premebantur Romani, repetit Virgilius Georg. I, 501 sq.

Carmen VIII.

V. 1. *Rogare*] Infinitivo utuntur Romani in interrogando ad exprimendam vel indignationem vel admirationem. Sat. II, 4, 83. I, 9, 72. II, 8, 67. Virg. Aen. I, 37. — *dens ater*]

- Nec sit marita quae rotundioribus
 Onusta bacis ambulet.
 15 Quid, quod libelli Stoici inter sericos
 Iacere pulvillos amant?
 Illiterati num minus nervi rigent?
 Minusve languet fascinum?
 Quod ut superbo provocas ab inguine,
 20 Ore allaborandum est tibi.

CARMEN IX.

- Quando repostum Caecubum ad festas dapes
 Victore laetus Caesare
 Tecum sub alta, sic Iovi gratum, domo,
 Beate Maecenas, bibam
 5 Sonante mixtum tibiis carmen lyra,
 Hac Dorium, illis barbarum?
 Ut nuper, actus cum freto Neptunius

cf. Carm. II, 8, 3. — *vetus senectus*] cf. Ter. Eunn. IV, 4, 21: „Hic est vetus, vietus, veterosus senex.“ — *exaret*] Eadem metaphora apud Virgilium Aen. VII, 417. — *imagines*] vide ad Carm. II, 20, 24. p. 143. — *marita*] matrona. Rarissime sic usurpatur vocabulum; sed compara Ovid. Fast. II, 139: „Tu rapis, hic castas duce se iubet esse *maritas*.“ — *ambulet*] vide ad Epod. 4, 5. — *amant*] vide ad Carm. II, 3, 10.

Carmen IX.

Statim post acceptum primum nuntium de victoria Actiaca poeta ut laetitiam suam exprimeret, tantam rem non minus quam sexennio ante, cum Agrippa de S. Pompeio victoriam reportasset, hilari convivio celebrandam esse Maecenati ostendit. In qua re tantum aberat, ut Octaviano victori adularetur, ut simul indicaret, quid esset cur hac victoria tantopere gaudendum existimaret. Turpiora etiam vincula, quam quae olim servilis Pompeii exercitus, Cleopatrae et Antonii luxuria ac mollities Urbi et civitati

paraverat. Vicit Romana disciplina; restituta est Romana dignitas; inde iusta de felici pugnae exitu laetitia.

V. 1. *repostum*] vide ad Carm. II, 2, 2. — *Caecubum*] cf. ad Carm. I, 20, 9. — *alta domo*] Magnam sibi Maecenas in Esquilis, ubi olim sepulchra fuerant, domum aedificaverat. cf. Carm. III, 29, 10. — *sic Iovi gratum*] „Iovi enim victoriae auctori gratum ita animum testamur.“ — *beate*] cui omnia ex voto cedunt. cf. Carm. I, 4, 14. — *mixtum*] cf. Carm. III, 19, 18. IV, 15, 30. Dorica harmonia ad bellicos cantus, Phrygia ad computationes aptissima; utraque coniuncta bene miscetur carmen, quo laetitia de aliqua victoria precepta exprimitur. Catull. 64, 264: „Barbaraque horribili stridibat tibia cantu.“ — *actus freto*] Siculo, ubi prope Messanam S. Pompeius ab Agrippa victus est a. u. 718. — *nuper*] „Nuper saepe non tam praesenti temporis quam antiquiori opponitur.“ Hand. Turs. T. IV. p. 346. Cic. de nat. D. II, 50, 126: „Quid ea, quae nuper, id est paucis ante saeculis, medicorum ingenis reperta sunt.“ — *Neptunius*] S. Pompeius re-

- Dux fugit ustis navibus,
 Minatus Urbi vincla, quae detraxerat
 10 Servis amicus perfidis.
 Romanus, eheu, posteri negabitis,
 Emancipatus feminae
 Fert vallum et arma miles et spadonibus
 Servire rugosis potest,
 15 Interque signa turpe militaria
 Sol adspicit conopium!
 At hoc frementes verterunt bis mille equos
 Galli canentes Caesarem,
 Hostiliumque navium portu latent
 20 Puppes sinistrorsum citae.

rum mari gestarum magnitudine elatus Neptuni se filium esse gloriabatur. Appian. b. c. V, 100: „Ο δὲ Πομπή-
 ρος οὐδ' ἐπὶ τοιαύτῃ εὐκαιρίᾳ τοσοῦ-
 δε ναυαγίοις ἐπιχειρεῖν ἤξιον· ἀλλ'
 ἔθνε μόνον θαλάσσει καὶ Ποσειδῶνι,
 καὶ υἱὸς αὐτῶν ὑφίστατο καλεῖσθαι.“
 Vellei. Pat. II, 73: „Is tum occupata
 Sicilia servitia fugitivosque in nume-
 rum exercitus sui recipiens magnum
 modum legionum effecerat, perque Me-
 nam et Menecratem, paternis libertos,
 praefectos classium latrocinis ac prae-
 dationibus infestato mari ad se exer-
 citumque tuendum rapto utebatur, cum
 eum non depuderet vindicatum armis
 ac ductu patris sui mare infestare pi-
 raticis sceleribus.“ Aurel. Vict. c. 84:
 „Cum mari feliciter uteretur, Neptuni
 se filium confessus est eumque bubus
 auratis et equo placavit.“ — *Emanci-
 patus*] Emancipare se alicui est se
 alicui vendere, totum tradere. cf. Cic.
 de sen. II, 38. Phil. II, 21, 51. —
Romanus] non unus est Antonius, sed
 omnis exercitus Antonii. Singularis
 autem cum vi et indignatione positus:
 homines Romanorum civium nomine
 ornati, clarissimi totius orbis milites.
 — *Fert vallum et arma*] cf. Cic. Tusc.
 II, 16. Quod inter tantos labores tanta
 ipsi virium magnitudine instructi spa-
 donibus, vilissimo hominum generi,
 et mulierculis servire potuerunt, illud
 indignissimum est; inde *potest* i. e.
 ab animo impetrat, sustinet. — *cono-
 pium*] κωνωπέιον, unde etiam cono-

pæum et conopæum; fuit velum ad ar-
 cendos culices in Aegypto frequentes
 lectulis obtentum; quod turpissimum
 visum est Romanis muliebris mollietiei
 indicium. Apud Propert. III, 11, 45:
 „Foedaque Tarpeio conopea tendere
 saxo“ Cleopatra minata esse dicitur.
 — *Sol*] Qui omnia videt, hoc quoque
 videt et indignatur. — *At hoc*] In co-
 dicibus *At huc vel Ad hunc vel Ad-
 huc*, in uno *At hunc*. Quod recepi,
 ex emendatione Feae est; neque tamen
 ablativum ibi cum Fea video, sed cum
 Orellio accusativum cum verbo *fre-
 mentes* coniungendum. Cuius rei Ro-
 manos non puduit, puduit Gallos (Ga-
 latas, milites Deiotari minoris). De
 accusativo compara Virg. Aen. VII,
 460. XI, 132. — *canentes Caesarem*]
 Plut. Ant. 63: „Ἐγένοντο δὲ καὶ βα-
 σιλέων ἀποστάσεις Ἀνύπτον καὶ
 Δηιοτάρον πρὸς Καίσαρα.“ De ver-
 bis compara Virg. Aen. VII, 698.
 Ovid. Met. XII, 241. — *hostiliumque*]
 „Etiam navalium copiarum pars pu-
 dore et metu perculti navibus retror-
 sum actis (*puppes citae*) ignavi in
 portu latuerunt.“ Quae res cum ab
 Horatio fingi non potuerit, haud dubie
 cum primo de pugna nuntio Romam
 perlata est; nam quod rerum scripto-
 res qui ad nos pervenerunt nihil eius
 rei memoriae tradiderunt, Horatium id
 non potest refellere. — *sinistrorsum*]
 Aegyptum versus: *puppes ciere* est
remis inhibere; quod fieri solet ne fuga
 ab hostibus sentiatur. — *Io triumphae*]

Io Triumphe, tu moraris aureos
 Currus et intactas boves?
 Io Triumphe, nec Iugurthino parem
 Bello reportasti ducem,
 25 Neque Africanum, cui super Karthaginem
 Virtus sepulcrum condidit.
 Terra marique victus hostis punico
 Lugubre mutavit sagum.
 Aut ille centum nobilem Cretam urbibus
 30 Ventis iturus non suis,
 Exercitatas aut petit Syrtes Noto,
 Aut fertur incerto mari.
 Capaciores affer huc, puer, scyphos
 Et Chia vina aut Lesbia,
 35 Vel quod fluentem nauseam coërceat
 Metire nobis Caecubum:
 Curam metumque Caesaris rerum iuvat
 Dulci Lyaeo solvere.

CARMEN X.

Mala soluta navis exit alite
 Ferens olentem Maevium.

vide ad Carm. IV, 2, 49. — *intactas*] quibus iugum nondum impositum. — *ducem*] Non tanta fuit neque Marii de Iugurtha neque Scipionis de Karthagine triumphantis gloria. Intelligendus est Scipio minor, cui virtus in ipso solo ubi Karthago steterat monumentum quasi erexit; nam id ipsum quod aemula olim imperii Romani Karthago deleta est, Scipionis perpetuum est monumentum. Non temere est factum, quod Iugurthinum et Punicum bellum in comparisonem vocantur; Octavianus quoque ex Africa (Aegypto) unde summa imperio pericula semper imminerant triumphavit. — *punico*] i. e. purpureo sago posito lugubre sumpsit; purpureo enim paludamento imperatores in proeliis utebantur. De forma *punico* cf. Carm. IV, 10, 4. Florus IV, 11, 3 de Antonio: „Aureum in manu baculum, ad

latus acinaces, purpurea vestis ingentibus obstricta gemmis, diadema aderat. — *mutavit*] Lachmann. ad Lucret. p. 123 pro perfecto futurum *mutabit* necessarium habuit, contra omnes, quod sciam, codd.; quem nollem secutus esset Hauptius. — *centum urbibus*] cf. ad Carm. III, 27, 33. — *non suis*] adversis. cf. Cic. Quinct. 7, 29: „Alphenus utebatur populo sane suo.“ Ovid. Met. XIII, 195. — *exercitatas*] pro vulgari *exercitas*, ut Tacit. Agric. c. 5: „non sane alias exercitatio magisque in ambiguo Britannia fuit.“ — *coerceat*] quia Caecubum austerum. Nausea, si proprie intelligenda est, ad vomitum in Romanorum conviviiis solitum neque apud illos pudendum referenda videtur; non inepte tamen sentias hoc loco fastidium spadonibus et luxuria Cleopatrae motum (*fluens*).

Ut horridis utrumque verberes latus,
 Auster, memento fluctibus.
 5 Niger rudentes Euris inverso mari
 Fractosque remos differat.
 Insurgat Aquilo quantus altis montibus
 Frangit trementes ilices.
 Nec sidus atra nocte amicum appareat,
 10 Qua tristis Orion cadit;
 Quietiore nec feratur aequore,
 Quam Graia victorum manus,
 Cum Pallas usto vertit iram ab Ilio
 In impiam Aiakis ratem.
 15 O quantus instat navitis sudor tuis
 Tibique pallor luteus,
 Et illa non virilis eiulatio
 Preces et aversum ad Iovem,

Carmen X.

Dira est detestatio Maevii, mali poetae, bonorum hominum obtrektoris (Virg. Buc. 3, 90), Athenas tunc proficiscentis. Comparandum est Carm. I, 3, quo amicum Virgillum, item Athenas proficiscentem, optimis votis prosequitur. Quo anno scriptum sit hoc carmen dici nequit; probabilis autem est opinio eorum, qui exeunte a. 713, non diu postquam Horatius cum Virgilio familiaritatem contraxit, carmen compositum putant. Virgilii Bucol. 3 scriptum est vere anni 712.

V. 1. *Mala alite*] Carm. I, 15, 5. — *olentem*] putidum et animo et corpore. cf. Sat. II, 3, 75. — *Auster*] Concitantur in Maevii perniciem tres venti, Auster, Euris, Aquilo. Quartus, Iapyx, non vocatur, quia secundus esset. Plane contrarius locus est Carm. I, 3, 4. — *niger Euris*] nubes cogens. cf. Carm. I, 5, 7. — *quantus*] tanto impetu, quanto. — *sidus amicum*] cf. Carm. I, 3, 2. — *tristis Orion*] Epod. 15, 7. Carm. III, 27, 18, ubi vide annot. Optat ut ne amicum sidus appareat *ea nocte*, qua Orion cadens tristem tempestatem concitat. — *Ilio*] vide ad Carm. I, 10,

14. De pernicie Aiakis minoris lege Hom. Od. IV, 499 sqq. Virg. Aen. I, 39. Ceterum neque in hac comparatione inest quidquam festivitatis neque in ulla parte carminis, quod totum acerbum est et prope malignum. — *sudor*] ut Carm. I, 15, 9. — *pallor luteus*] Lutum herba est in palustribus et aquosis locis nascens, flore rufo vel aureo; quo pannorum infectores utuntur ut caerulei coloris pannos virides efficiant; nostratibus Wau, Gilbgrau, ap. Linn. reseda luteola. Ornatur hoc adiectivo pallor ad summum terrorem significandum. — *eiulatio*] Frequentior videtur altera forma *eiulatus*; illa tamen etiam apud Ciceronem de legg. II, 23. Cur ea non virilis sit, videbis apud eundem Tusc. II, 23, 55. cf. Epod. 16, 39. — *preces et*] vide ad Carm. I, 2, 9. — *sinus*] cf. Carm. I, 33, 16. III, 27, 19. Epod. 1, 13. Servius ad Virg. III, 211: „Quidam Ionium ab Io, Inachi filia, dictum volunt, quod amata hoc mare transverit; nonnulli Ionium ab Ionio rege, qui in insula, quae ante Illyrium iacet, regnaverant, dictum tradunt.“ — *remugiens*] Carm. III, 10, 5 sq. III, 29, 57. — *Opima praeda*] Non intelligo de pinguitudine corporis Maevii, sed ut

Ionius udo cum remugiens sinus
 20 Noto carinam ruperit!
 Opima quodsi praeda curvo littore
 Porrecta mergos iuveris,
 Libidinosus immolabitur caper
 Et agna Tempestatibus.

CARMEN XI.

Petti, nihil me sicut antea iuvat
 Scribere versiculos amore perculsum gravi,
 Amore, qui me praeter omnes expetit
 Mollibus in pueris aut in puellis urere.
 5 Hic tertius Decembris, ex quo destiti
 Inachia furere, silvis honorem decutit.
 Heu me, per urbem — nam pudet tanti mali —
 Fabula quanta fui! Conviviorum et poenitet,

posita haec sunt vocabula apud Cic. Rosc. Am. 3, 8: „illam opimam praeclearamque praedam.“ cf. Cic. Verr. II, 1, 50: „Indignum videri coepit, ex tanta aede non *opinum praeda* discedere;“ et Valer Fl. III, 143: „opima cadavera“ i. e. ex quibus spoliantes ditescunt. — *iuveris*] Sic ex minore quidem parte MSS., sed quam magnopere adiuvat Commentator Cruquii, apud quem est *paveris*. Maior pars codd. habet *iuverit*. — *mergos*] Qui quamquam cadavera non attingunt, insatiabiles tamen sunt. Plin. XI, 37, 79: „Insatiabilia animalium, quibus a ventre protinus recto intestino transeunt cibi, ut lupis cervariis et inter aves mergis.“ — *Tempestatibus*] Virg. Aen. III, 120. V, 772.

Carmen XI.

Apud amicum Pettium conqueritur, se tantopere nunc captum esse amore, ut ne versus quidem facere, dulcissimum ante studium, aut possit aut velit; nihil se posse aliud cogitare nisi amorem; eodem se semper vel ultro trahi. Pettius — sic in antiquis editionibus et inscriptionibus nomen scribitur — quis fuerit nescimus; neque

potest definiri annus quo videatur scriptum hoc carmen, nisi quod tribus annis post Epod. 12 compositum esse versu 5 ostenditur. Suspiciantur igitur non male, scriptum hoc esse a. 716; alii minore probabilitate ad a. 720 v. 721 retulerunt.

V. 2. *versiculos*] non sine aliquo contemptu Cic. orat. 20, 67: „Apud quos (comicos poetas), nisi quod versiculi sunt, nihil est aliud quotidiani dissimile sermonis.“ sed cf. Sat. I, 10, 58. — *praeter omnes*] vide ad Epod. 3, 9. — *expetit urere*] me prae omnibus elegit quem urat. Vide ad Carm. I, 1, 8. De praepositione *in* compara Ovid. Rem. Am. 283: „in qua male vulneror una.“ id. Met. VII, 21: „quid in hospite, regia virgo, ureris?“ id. A. A. I, 731: „pallidus in Lyricae silvis errabat Orion.“ Terent. Eun. III, 5, 19: „in hac commotus sum.“ — *honorem*] frondes, ut Virg. Georg. II, 404. cf. Carm. I, 17, 16. — *nam pudet*] Similiter Graeci γὰρ usurpant ad explicandam non totam sententiam sed unam partem vel unum etiam vocabulum. Inest in his causa, cur *heu* me vocabulis doloris et aegritudinis sensum prodiderit. — *Fabula*] Latinis fabulae dicuntur qui homini-

- In quis amantem languor et silentium
 10 Arguit et latere petitus imo spiritus.
 Contrane lucrum nil valere candidum
 Pauperis ingenium? querebar applorans tibi,
 Simul calentis inverecundus deus
 Fervidiore mero arcana promorat loco.
 15 Quodsi meis inaestu et praecordiis
 Libera bilis, ut haec ingrata ventis dividat
 Fomenta vulnus nil malum levantia,
 Desinet imparibus certare sommotus pudor.
 Ubi haec severus te palam laudaveram,
 20 Iussus abire domum ferebar incerto pede
 Ad non amicos heu mihi postes et heu
 Limina dura, quibus lumbos et infregi latus.
 Nunc gloriantis quamlibet mulierculam
 Vincere mollitie amor Lycisci me tenet;
 25 Unde expedire non amicorum queant
 Libera consilia nec contumeliae graves,
 Sed alius ardor aut puellae candidae,
 Aut teretis pueri longam renodantis comam.

CARMEN XII.

Quid tibi vis, mulier nigris dignissima barris?
 Munera quid mihi quidve tabellas

bus confabulandi et ridendi occasionem prae-buerunt. cf. Epist. I, 13, 9. — *languor*] non pallor oris, sed torpor quidam animi et omnium rerum, de quibus agitur, negligentia. Inde oritur *silentium*. — *arguit*] Est perfecti temporis. — *Contrane*] Indignantis est exclamatio, ut Epod. 8, 1. — *lucrum*] cum Inachia ditio-rem rivalem propter pretiosa dona ingenio pauperis poetae praeferret. — *applorans*] Praeter h. l. non videtur legi nisi semel apud Senecam. — *inverecundus*] Simulac vini largiore usu effectum erat, ut amore me captum profiterer. Aliter Bacchus *verecundus* est Carm. I, 27, 3. — *ventis dividat*] h. e. ven-

tis dissipanda tradat. cf. Carm. I, 26, 1 sqq. — *fomenta*] querelas, ex quibus remedia saepe et solatia petuntur. cf. Epist. I, 3, 26. *Ingrata* sunt, quia vulnus nihil levant. — *imparibus*] ingenio inferioribus. Est tertius casus. Vide ad Carm. I, 3, 13. — *te palam*] Ovid. Trist. V, 10, 39: „meque *palam* de me tuto mala saepe loquuntur.“ Liv. VI, 14, 5: „inde rem creditori *palam populo* solvit.“ — *incerto pede*] cum pedes quasi invitum me ad Inachiam perducerent. — *postes*] cf. Carm. III, 10, 2. 20. — *renodantis comam*] qui, ut puellae solebant, comam eleganter in nodum colligit.

- Mittis nec firmo iuveni neque naris obesae?
 Namque sagacius unus odoror,
 5 Polypus an gravis hirsutis cubet hircus in alis,
 Quam canis acer, ubi lateat sus.
 Qui sudor vietis et quam malus undique membris
 Crescit odor, cum pene soluto
 Indomitam properat rabiem sedare; nec illi
 10 Iam manet humida creta colorque
 Stercore fucatus crocodili, iamque subando
 Tenta cubilia tectaque rumpit!
 Vel mea cum saevis agitat fastidia verbis:
 Inachia langues minus ac me;
 15 Inachiam ter nocte potes, mihi semper ad unum
 Mollis opus. Pereat male quae te
 Lesbia quaerenti taurum monstravit inertem,
 Cum mihi Cous adesset Amyntas,
 Cuius in indomito constantior inguine nervus,
 20 Quam nova collibus arbor inhaeret.
 Muricibus Tyriis iteratae vellera lanæ
 Cui properabantur? Tibi nempe,
 Ne foret aequales inter conviva, magis quem
 Diligeret mulier sua quam te.
 25 O ego non felix, quam tu fugis, ut pavet acres
 Agna lupos capreaeque leones!

Carmen XII.

V. 1. *barris*] „Apud Indos elephantus a voce *barrus* vocatur; vox eius *barritus*.“ Isid. Orig. XII, 2, 14. — *quid mihi*] Praetulerunt alii ex maxima parte codicum *cur*, non bene; nam orta est particula ex glossa, quae postea in versum irrepsit, ut modo *cur mihi quidve* modo *quid mihi curve* scriberetur. Recte igitur Bentleius simplicissimum et elegantissimum revocavit *quid mihi quidve*. — *tabellas*] epistolas amatorias. — *obesae*] crassae, pinguis; tum, quia pinguedo sagacitatem impedit, obtusae, hebetis. —

sagacius unus] Unus saepe superlativis, raro comparativis additur. cf. Virg. Aen. I, 15. — *vietis*] h. l. bisyllabum. — *creta*] Ovid. A. A. III, 199: „Scitis et inducta, candorem quaerere creta.“ — *stercore crocodili*] Plin. H. N. XXVIII, 8, 28: „Intestina (crocodili) diligenter exquiruntur iucundo nidore farta. Illita quoque ex oleo cyprino molestias in facie enascentes tollit (crocodilea).“ — *Lesbia*] lena. — *Muricibus Tyriis iteratae*] dibapha. Vide ad Carm. II, 16, 35. — *pavet lupos*] De accusativo vide ad Carm. IV, 5, 25.

CARMEN XIII.

- Horrida tempestas coelum contraxit et imbres
 Nivesque deducunt Iovem; nunc mare, nunc silvae
 Threicio Aquilone sonant: rapiamus, amici,
 Occasionem de die, dumque virent genua
 5 Et decet, obducta solvatur fronte senectus.
 Tu vina Torquato move consule pressa meo.
 Cetera mitte loqui: deus haec fortasse benigna
 Reducet in sedem vice. Nunc et Achaemenio
 Perfundi nardo iuvat et fide Cyllenea
 10 Levare diris pectora sollicitudinibus,
 Nobilis ut grandi cecinit Centaurus alumno:
 Invicte, mortalis dea nate puer Thetide,

Carmen XIII.

Compositum videtur haud ita multo post pugnam Philippensem, quamquam alii annum potius 721 vel 722 significari putant. Est autem simillimum carmini I, 9; die enim hiberno [ac pluvioso adhortatur amicos, ut genio indulgentes eas ante omnia remove velint molestias, quibus tunc ipsum iniquitate anni premantur, futuri temporis rerumque publicarum curam benignitati et consilio deorum bono animo mandent. Quod praeceptum ut auctoritate firmet, exemplo utitur Chironis, qui Achilli alumno, cum fatum Parcarum certa voluntate fixum ac destinatum effugere non posset, ut quidquid sibi vitae concessum esset laeto animo transigeret neve nimia futurarum rerum sollicitudine ipse perderet sapienti quondam consilio suaserat.

V. I. *contraxit*] Cic. N. D. II, 40, 102: „Sol modo accedens, tum autem recedens quasi *tristitia quadam contrahit terram*, tum vicissim laetificat“; unde qualis in hoc verbo insit metaphora intelliges. — *Iovem*] pluvium. Sic Lucr. I, 251: „Postremo pereunt imbres, ubi eos pater Aether In gremium matris Terrae praecipitavit: At nitidae surgunt fruges ramique virentis Arboribus cett.“ cf. Virg. Georg. II, 325 sqq. — *Threicio Aquilone*] Hiatus in proprio nomine et arsi veniam inveniet. Cuius rei exempla

ex Ovid. Metam. conguessit Lœrsius ad Met. III, 184 haec: II, 244. V, 312. 409. 625. VIII, 310. XI, 93. IV, 535. XI, 17, quae tamen omnia praeter unum (V, 625) hoc habent commune, quod hiatus admissus est in arsi quinti pedis. Ceterum cf. Carm. I, 25, 11. — *de die*] de praesenti die, nihil confisi futuro tempore. cf. Carm. III, 8, 27. — *virent genua*] cf. Carm. I, 9, 17. In genibus robur corporis inesse visum est antiquis hominibus. Plin. H. N. XI, 45: „Genibus hominum, inquit, inest quaedam religio observatione gentium; haec supplices attingunt, ad haec manus tendunt, haec ut aras adorant; fortasse quia inest iis vitalitas.“ Inde Homerica illa *θεῶν ἐν γούνασι κείται et γούνατα λύνει*. — *obducta*] curam nubibus. — *Torquato*] cf. Carm. III, 21, 1. Ex hoc loco Walckenarius nimis acute efficere conatus est, hoc carmen scriptum esse ab Horatio ipso suo natali die anni 714. Alloquitur poeta symposiarchum. — *move*] cf. Carm. III, 21, 6. III, 28, 7. — *cetera*] Intelligenda hominum discordia et perturbatus rerum civilium status; ut Carm. I, 9, 9. — *Achaemenio*] cf. Carm. II, 11, 16. II, 12, 21. III, 1, 44. Neutrale positionem *nardum*, quae est etiam Epod. 5, 59, h. l. codicum auctoritas tuetur. — *Cyllenea*] Mercurius, natus in Cyllene Arcadiae monte, Iyram invenisse dicebatur. cf. Carm. I, 10, 6. — *grandi*]

Te manet Assaraci tellus, quam frigida parvi

Findunt Scamandri flumina lubricus et Simois;

15 Unde tibi reditum certo subtemine Parcae

Rupere nec mater domum caerulea te revehet.

Illic omne malum vino cantuque levato,

Deformis aegrimoniae dulcibus alloquiis.

CARMEN XIV.

Mollis inertia cur tantam diffuderit imis

Oblivionem sensibus,

Pocula Lethaeos ut si ducentia somnos

Arente fauce traxerim,

5 Candide Maecenas, occidis saepe rogando:

Referendum hoc ad ingentem corporis
staturam, qualis esse solebat heroum.

— *mortalis dea*] Noli negligere artem
poetae, qui quae contraria sunt loci
propinquitate coniunxit, ut vitae bre-
vitas etiam Achillis deae filii clarius
illustraretur. cf. Virg. Aen. VI, 365.
VIII, 293. — *Assaraci*] Hom. II. XX,
232. — *frigida flumina*] Plurali numero
indicare videntur variae quas flumen
per agrum Troianum serpens edit spes-
cies. Cum *parvum* dicit Scamandrum,
repugnare videtur Homero II. XXI, 15.
Sed non priscam aetatem sed suum
tempus respexit, quo „(Caesar) Inscius
in sicco serpentem pulvere rivum
Transierat, qui Xanthus erat“, ut Lu-
can. Phars. IX, 972. In qua re si
quid peccatum est, poetaetribuendum
est, non scribis; itaque abstinendum
erit a coniecturis *proni* (Bentl.), *puri*
(Peerlkamp.), *torvi* (Hermann.), *tardi*
(Meineck.), *flavi* (Heins.) — *subte-
mine*] poetica variatione pro *flo*, quod
certo et immutato tempore sectum vi-
tae finem imponit. — *cantu*] cf. Hom.
II. IX, 186. — *alloquiis*] quae, vina
et cantus, dulcia sunt alloquia, solatia
aegrimoniae. *Alloquium* ante Augusti
aetatem non videtur fuisse usitatum.
— *deformis*] quae deformat ut vultum
sic animum. Eadem ratione Lucan.
Phars. VIII, 81 *deformis dolor*. Ce-
terum conferas Stat. Silv. II, 1, 232:
„noctesque Dulcibus alloquiis et vivis
vultibus imple.“

Carmen XIV.

Simili ratione qua Epod. 11 Hora-
tius quod carminibus conscribendis
limandis edendisquae operam dare non
possit, saeva amoris potestate effici
Maecenati amico candido animo pro-
fitetur. In qua re suas rationes com-
parat cum Anacreonte Teio, quem quid
sentiret amoris vi coactum saepe in
carminibus deposuisse indicat, nimi-
rum ut animum curis gravatum leva-
ret, conscripta dein carmina quippe
quae quid deberent effecissent iteratis
curis non limasse, sed intacta reliquisse.
En habemus vere lyricum poetam, qui
ex intimo pectore sensus haurit, quae-
que ipse vel passus est vel vidit vel
fecit carminibus prodit. Iam vero quae
subito animi quodam furore composita
sunt ut limentur politius, tranquillo
animo opus est. In fine carminis
ipsum Maecenatem quid valeat amor
sentire ait poeta; iam opponitur puella
a Maecenate amata libertinae Horatii,
unde non pauci interpretes concludere
ausi sunt, amicam Maecenatis Teren-
tiam esse, tum sponsam, nondum in
matrimonium ductam. Sed cf. ad
Carm. II, 12. Ceterum hoc carmen
non ita multo ante editam *συλλογήν*
Epodorum scriptum esse videtur.

V. 1. 2. *imis sensibus*] ut Virg. Buc.
3, 54. — *oblivionem*] earum rerum,
quas promiserim me facturum. — *du-
centia*] ut Carm. III, 27, 42; aliter

Deus, deus nam me vetat
 Inceptos, olim promissum carmen, iambos
 Ad umbilicum adducere.
 Non aliter Samio dicunt arsisse Bathyllo
 10 Anacreonta Teïum,
 Qui persaepe cava testudine flevit amorem
 Non elaboratum ad pedem.
 Ureris ipse miser: quodsi non pulchrior ignis
 Accendit obsessam Ilion,
 15 Gaude sorte tua; me libertina neque uno
 Contenta Phryne macerat.

CARMEN XV.

Nox erat et coelo fulgebat luna sereno
 Inter minora sidera,

Virg. Aen. IV, 560. — *deus nam*] *Nam* particula proxime est referenda ad v. *occidis*; dicit enim hoc: tu non desinis me rogare; ita ut perpetuis quaestionibus cruciatum me sentiam; nam quid ego aliud tibi respondeam nisi hoc unum, deum esse qui me absolvere non patiar incepta carmina. Ceterum cf. ad Carm. I, 18, 3. — *olim*] iamdudum tibi promissum iamborum librum; quo nomine non est dubium quin epodos a maiori parte nominare voluerit. Carminis nomine lyrica poesis significatur, opposita epicae; sic apud Quintilianum II, 4, 2: „fabula, quae versatur in tragoediis atque *carminibus*.“ Similiter Lucretius VI, 936 de toto primo libro: „Nunc omnes repetam quam raro corpore sint res Commemorare, quod in primo quoque *carmine* claret.“ — *ad umbilicum adducere*] „Extremitas chartae papyraeae vel membranae, ex quibus conficiebantur volumina, agglutinabatur bacillo, cui circumvolvebatur totum volumen. Illius capita ex osse aut ligno facta *umbilici* vocabantur, quia in media parte libri erant.“ *Fea*, Est igitur absolvere, ut Mart. IV, 91, 1: „Ohe, iam satis est, ohe libelle, Iam pervenimus usque ad umbilicos.“ — *arsisse*] cum ablativo. cf. Carm. II,

4, 7. III, 9, 5, ubi vide. — *miser*] propter nimiam potestatem etiam felicitis amoris. — *quodsi*] de usu huius particulae apud Horatium vide ad Carm. I, 1, 35. Fuerunt, quibus aut languida aut inepta videretur ea particula. Quibus ita videtur, iis magis placebit quod *Axtius* ex coniectura restitui iussit *quo si* (i. e. quandoquidem, siquidem, quia isto tuo igni non pulchrior-*cet.*), quam quod *Orellius* ex uno antiquo codice, in quo est *do q'*, eruere voluit: *quando*. — *ignis*] Virg. Buc. III, 66. — *neque uno*] i. e. ac ne uno quidem contenta. Liv. XXXVIII, 21, 6: „saxis nec modicis utebantur.“ Sic augetur levitas mulierculae, ipso nomine *libertinae* iam indicata. — *macerat*] Carm. I, 13, 8.

Carmen XV.

Perfidiam Neerae, quae sanctissimo iureiurando interposito perpetuam ei fidem promiserat, graviter accusat, et ita quidem, ut iamiam se eam relicturum aliamque sibi fide et animo parem etsi minus pulchram quaesiturum minetur, rivali autem nunc glorianti ostendat neque divitias Croesi neque sapientiam Pythagorae neque pulchritudinem Nirei eum ab eadem

Cum tu magnorum numen laesura deorum
 In verba iurabas mea,
 5 Artius atque hedera procera adstringitur ilex
 Lentis adhaerens brachiis:
 Dum pecori lupus et nautis infestus Orion
 Turbaret hibernum mare,
 Intonsosque agitare Apollinis aura capillos,
 10 Fore hunc amorem mutuum.
 O dolitura mea multum virtute Neaera!
 Nam si quid in Flacco viri est,
 Non feret assiduas potiori te dare noctes,
 Et quaeret iratus parem,
 15 Nec semel offensae cedit constantia formae,
 Si certus intrarit dolor.
 Et tu, quicumque es felicior atque meo nunc
 Superbus incedis malo,

perfidia tueri posse. Quo anno carmen compositum sit nos latet. Bene autem ii iudicant, qui hoc pulcherrimum carmen, si non antiquissimum omnium, inter antiquissima tamen Horatii habent atque a. 713 scriptum existimant.

V. 2. *minora sidera*] similiter Carm. I, 12, 47. — *in verba iurabas mea*] Liv. XXVIII, 29: „Milites in verba P. Scipionis iurarunt“; a militibus igitur ad amantes translata res. cf. Epist. I, 1, 14. — *artius atque*] *Atque* post adiectivorum comparativos pro *quam* ponitur rarissime aut nunquam ab oratoribus, saepius a poetis. cf. Sat. I, 1, 46. I, 2, 22. 5, 5. 6, 130. 10, 34. 59. II, 3, 241. 270. II, 7, 96. Virg. Aen. III, 561. — *hedera*] eadem imago Carm. I, 36, 20. Catull. 61, 33: „Mentem amore revinciens, Ut tenax hedera huc et huc Arborem implicat errans.“ — *Orion*] vide ad Carm. III, 27, 18. I, 28, 21. Epod. 10, 10. — *infestus*] semel positum, cum bis necessarium sit ad explendam sententiam: dum pecori lupus infestus foret et nautis infestus Orion cet. — *turbaret*] Sic et postea *agitaret* in plurimis codicibus; atque immerito prava paucorum codicum lectio *turbarit*, *agitavit* a nonnullis editoribus praelata est. Utique enim referenda sententia ad

imperfectum *iurabas*, quo idem tempus vehementer efflagitatur. Suo more Horatius tres eiusdem rei imagines coniunxit, duas ex natura rerum, tertiam ex mythologia petitam. Gratae huius varietatis dilucida exempla exhibet Carm. II, 10. De Apolline vide ad Carm. I, 21, 2. — *mea virtute*] per me, meis viribus. cf. Plaut. Mil. III, 1, 82: „Deum virtute trans-euntem hospitio accipere.“ ibid. 142: „tua te ex virtute et mea Meae domi accipiam benigne.“ Sententia haec est: quantum in me est, efficiam, ut tuae te perfidiae poeniteat. — *in Flacco*] Cum vi et gravitate nomen ponitur tanquam tertiae personae. Vide ad Carm. IV, 6, 44. — *semel offensae*] semel invisae, ut apud Ciceronem Sest. 58: „cui nos offensi invisique fuimus.“ Hoc minatur, si semel pectus ita intraverit dolor, ut aliam puellam quaesiverit, nunquam se hac relicta ad Neaeram quamquam pulchriorem rediturum, nunquam suam constantiam semel invisae venustate superatum iri. Benteius et alii, quibus ea sententia displiceret, corrigendum putarunt *offensi*. — *superbus incedis*] cf. Epod. 4, 5. — *sis licebit*] cf. Carm. I, 28, 35. III, 27, 13. Sat. II, 2, 59. — *Pactolus*] Plin. H. N. XXXIII, 4: „Au-

Sis pecore et multa dives tellure licebit,
 20 Tibique Pactolus fluat,
 Nec te Pythagorae fallant arcana renati,
 Formaue vincas Nirea,
 Eheu translato alio moerebis amores:
 Ast ego vicissim risero.

CARMEN XVI.

Altera iam teritur bellis civilibus aetas
 Suis et ipsa Roma viribus ruit,
 Quam neque finitimi valuerunt perdere Marsi
 Minacis aut Etrusca Porsenae manus,
 5 Aemula nec virtus Capuae nec Spartacus acer
 Novisque rebus infidelis Allobrox,

rum invenitur fluminum ramentis, ut in Tago Hispaniae, Pado Italiae, Hebro Thraciae, Pactolo Asiae, Gange Indiae. Non ullum absolutius aurum est, cursu ipso trituque perpolitum.“
 — *renati*] vide ad Carm. I, 18, 10.
 — *Nirea*] vide ad Carm. III, 20, 15.

Carmen XVI.

Memorabilis est Acronis scholiastae ad versum 41 annotatio: „In quo (Oceano) sunt insulae fortunatae, ad quas Salustius in historia dicit victum voluisse ire Sertorium“; cui fides accedit ex auctoritate Plutarchi in vita Sertorii c. 9 eandem rem narrantis. Iam cum Horatium misero reipublicae statu graviter afflictum hoc carmine idem civibus suis consilium dare videamus, non inanis videatur coniectura poetam Sertorianam illam vocem in simili omnium rerum desperatione arripuisse et poeticis imaginibus ac luminibus illustrasse. Summa autem Romanarum rerum desperatio quae per totum carmen quasi regnat, quod aliud tempus ostendere potest nisi illud quo Brutianae partes dissipatae ac profligatae nullam restituendae libertatis spem reliquerant necdum Horatius cum contraria parte ita pacem fecerat ut salutem inde posset expectare? Quare scriptum videtur carmen a. u. c. 713

sub initium belli Perusini. Scena quae carmini quasi subiecta est, sumpta est ex concione civium, ad quos poeta agit de republica; ut speciem praebeat orationis ad populum habitae metrorum vinculis circumclusae. In qua re quaerenda mihi videtur causa molestae cuiusdam ubertatis ac paene vitiosae latitudinis, quam ut in magna figurarum τοῦ ἀδυνάτου copia ita in nimia fortunatarum insularum descriptione reprehendas. Ceterum animadvertendum est, principalem sententiam eandem esse quam in Epod. 7 inesse vidimus.

V. 1. *Altera*] nam Sullana aetas prima fuit. — *suis et ipsa*] In pedestri oratione scriberemus *suis ipsius viribus*; et part. postposita est. cf. Epod. 7, 9 sq. Augustin. de C. D. 18, 45: „Roma late orbi terrarum imperans tanquam se ipsam ferre non valens sua se quodammodo magnitudine fregerat.“ — *Marsi*] Tria in his versibus diversorum hostium quasi quaedam castra coniuncta, distichorum spatium inter se divisa. In qua re quod diversissimas quasque nationes coniunxit poeta, id consulto factum puto, nimirum quo magis pateret nihil unquam fuisse quod Romanam potestatem imminuere potuisset. Iam habes etiam cur vv. 6 et 8 non videatur necessarium librorum particulam *que in ve*

- Nec fera caerulea domuit Germania pube
 Parentibusque abominatus Hannibal,
 Impia perdemus devoti sanguinis aetas,
 10 Ferisque rursus occupabitur solum.
 Barbarus heu cineres insistet victor et Urbem
 Eques sonante verberabit ungula,
 Quaeque carent ventis et solibus ossa Quirini,
 Nefas videre! dissipabit insolens.
 15 Forte quid expediat communiter aut melior pars
 Malis carere quaeritis laboribus;
 Nulla sit hac potior sententia, Phocaeorum
 Velut profugit exsecrata civitas
 Agros atque Lares patrios habitandaque fana
 20 Apris reliquit et rapacibus lupis,
 Ire pedes quocunque ferent, quocunque per undas
 Notus vocabit aut protervus Africus.

mutare. — *Capuae*] Cicer. de leg. agr. II, 32: „Maiores tres solum urbes in terris omnibus, Karthaginem, Corinthum, Capuam statuerunt posse imperii gravitatem ac nomen sustinere.“ — *Allobrox*] Videnda necessario coniuratio Catilinaria et bellum quod eam secutum est. Cic. de prov. cons. 13: „C. Pomptinius ortum repente bellum Allobrogum atque hac scelerata coniuratione (Catilinae) excitatum proeliis fregit eosque domuit qui lacerassent.“ Allobroges Galli erant, de quorum novarum rerum studio certissimus locus est Caes. B. G. IV, 5. Ceterum singularis *Allobrox* non legitur nisi in poetarum libris. — *parentibus*] maioribus nostris. Qualem Romani Hannibalem cogitaverint, ex hoc loco Senecae de ira II, 5 intelligas: „Hannibalem aiunt dixisse, cum fossam sanguine humano plenam vidisset: o formosum spectaculum! Quanto pulchrius illi visum esset, si flumen aliquod lacumque complexset. Quid mirum, si hoc maxime spectaculo caperis innatus sanguini et ab infante-caedibus admotus?“ — *abominatus*] passive ut Liv. XXXI, 12, 8. — *rursus*] ut ante urbem conditam. — *cineres, insistet*] Apposite ad primam verbi significatio-

nem oritur vis *calcandi* et *insultandi* cum notione contumeliae et contemptio- nis etiam in verbo *verberabit* conspicua; neque ita rarus est accusativus obiecti propter cognatas adeundi, ineundi, ingrediendi notiones. Virg. Aen. VI, 563. Terent. Eun. II, 3, 3: „quam insistam viam? — *carent*] h. e. nunc defenduntur, quia Romanis sacra sunt. „Sic dicit, quasi Romulus sepultus sit, non ad coelum raptus aut discerptus a senatoribus: nam Varro post Rostra fuisse sepulcrum Romuli dicit.“ *Porphyrio*.

V. 15. *Forte quid*] Omissa particula *si*, ut Sat. II, 5, 74. Epist. I, 6, 56. Ordo est: „si forte quaeritis communiter (omnes) aut melior pars (cf. v. 37), quid expediat carere malis laboribus“, h. e. quid efficiat ut careamus. *Carere* enim infinitivus obnoxius est potestati alterius verbi *expediat*. — *Phocaeorum*] Herod. I, 165. — *exsecrata*] Herod. I, 1: „ἐποικήσαντο ἱερὰς κατὰρας. — *profugit agros*] ut Colum. I, 3: „ut propter iniurias vicinorum sedes suas profugerint.“ Curt. X, 2: „ne servi quidem uno grege profugiunt dominos. — *patrios*] In editionibus et veteribus et recentioribus *proprios*, quod ex inter-

- Sic placet? an melius quis habet suadere? Secunda
 Ratem occupare quid moramur alite?
 25 Sed iuremus in haec: simul imis saxa renarint
 Vadis levata, ne redire sit nefas;
 Neu conversa domum pigeat dare lintea, quando
 Padus Matina laverit cacumina,
 In mare seu celsus procurrerit Apenninus,
 30 Novaque monstra iunxerit libidine
 Mirus amor, iuvet ut tigres subsidere cervis,
 Adulteretur et columba miluo,
 Credula nec ramos timeant armenta leones,
 Ametque salsa levis hircus aequora.
 35 Haec et quae poterunt reditus abscindere dulces
 Eamus omnis exsecrata civitas,
 Aut pars indocili melior grege; mollis et exspes
 Inominata perprimat cubilia!
 Vos, quibus est virtus, muliebrem tollite luctum,
 40 Etrusca praeter et volate littora.
 Nos manet Oceanus circumvagus: arva, beata
 Petamus arva divites et insulas,
 Reddit ubi Cererem tellus inarata quotannis

pretatione ortum esse statim vides. — *habitanda*] cf. Carm. III, 3, 40 sq. — *pedes*] cf. Carm. III, 11, 49. — *pro-
 tertus*] Carm. I, 26, 2. — *saxa*] Ad
 exemplum Phocaeorum, qui ferri mas-
 sam in mare iniecis-
 se dicuntur. — *Matina*] vide ad Carm. I, 28, 3. — *ramos*] Alii *flavos* vel *fulvos*; sed vide
 ad Carm. III, 27, 3. — *levis hircus*] Oxy-
 moron; nam natura villosus est
 hircus, levis factus cum per aquam
 natavit. — *haec et quae*] Coniunge
 cum *exsecrata*: his similibusque ex-
 secrationibus factis. Accusativum com-
 para cum hoc apud Ciceron. ad Attic.
 VI, 2, 2: „quod quidem illum so-
 leo hortari.“ — *dulces*] blandos; ad
 redeundum in patriam propensus est
 hominum animus. Pluralis *reditus* va-
 ria redeundi consilia et conatus signi-
 ficat. — *exsecrata civitas*] Consulto
 haec repetuntur ex v. 18, quo par
 Phocaeorum et Romanorum status ma-

gis etiam inculcetur. — *Etrusca prae-
 ter*] Praepositiones postpositas (vide
 ad Carm. III, 3, 11) encliticarum vo-
 cularum instar nomini suo adhaerere
 caesura ostendit atque altera inclitica
et. Alii tmesin vident, pro *praeter-
 volate*. — *circumvagus*] ἀπόρροος.
 Cat. 64, 30: „Oceanusque pater, to-
 tum qui amplectitur orbem.“ — *arva*] De
 iterato in altero versu eodem vo-
 cabulo — in qua re quanta vis insit
 non est quod dicatur — conferas Epod.
 11, 3. Virg. Aen. VII, 586 sq. Quam-
 quam concedo, non nimis felicem hanc
 esse epizeuxim, quoniam qui arva iam
 habent non possunt simpliciter iuberi
arva petere, atque id ipsum, cur no-
 va arva petantur, adiectivo *beata* po-
 stea additur, tamen abstineo a coniec-
 turis et emendationibus et reprehèn-
 do potius poetam quam scribas. *Ax-
 tius* e coniect. *circumvagus*: *eia, beata*
 cet., quod si scriptum esset a poeta,

- Et imputata floret usque vinea,
 43 Germinat et nunquam fallentis termes olivae
 Suamque pulla ficus ornat arborem,
 Mella cava manant ex ilice, montibus altis
 Levis crepante lymphā desilit pede.
 Illic iniussae veniunt ad muletra capellae
 50 Refertque tenta grex amicus ubera,
 Nec vespertinus circumgemit ursus ovile,
 Neque intumescit alta viperis humus.
 Pluraque felices mirabimur, ut neque largis
 Aquosus Eurūs arva radat imbribus,
 55 Pingua nec siccis urantur semina glebis,
 Utrumque rege temperante coelitum:
 Non huc Argōo contendit remige pinus,
 Neque impudica Colchis intulit pedem;
 Non huc Sidonii torserunt cornua nautae,
 60 Laboriosa nec cohors Ulixei.

non facile corruptum esset à scribis. — *Cererem*] pro frumento, ut Vulcanus pro igne apud Ovid. Met. VII, 104: „Ecce adamanteis Vulcanum naribus efflant Aeripedes tauri.“ id. VIII, 290 sqq.: „Is modo crescentes segetes proculcat in herba, Nunc matura metit fleturi vota coloni, Et *Cererem* in spicis intercipit.“ Ceterum lege Ovid. Met. V, 341 sqq. — *pulla ficus*] matura. Ac nascitur ea in sua arbore, non in insitivis ramis; insitione igitur in beatis insulis non est opus. — *Levis crepante*] „Eleganter ipso versu susurrum aquae desilientis imitatus est.“ *Comm. Cruq.* Aquae quia currunt, apud poetas *pedem* quoque habent; ut Virg. Cul. 17: „Castaliaeque sonans liquido pede labitur unda.“ — *tenta ubera*] ut Virg. Buc. 4, 21. — *vespertinus*] vide ad Carm. I, 2, 45. *circumgemit*] Gemere dicuntur ea maxime animalia, quorum vox gementi similis est, sed extendunt poetae notionem, ut Virg. Aen. VII, 15. — *intumescit alta*] Voc. *alta* notione sua artissime cum *intumescit* coniungendum, ut sit „Noch schwillt von Naturem hoch der Boden auf.“

V. 53. *mirabimur, ut*] cf. Carm. III, 4, 13 sqq. — *radat imbribus*] proprio sensu; imbres enim agros diluunt et dilacerant. Paulo aliter Sat. II, 6, 25. — *nec*] postpositum; vide ad Carm. I, 8, 6. — *pingua*] sunt sucosa; artificiose igitur adiectiva per se contraria vicinitate locorum coniuncta sunt, ut saepe. — *Non huc*] Intactae illae insulae sunt ab hominum commercio neque infectae cupiditatibus, mercaturae et commercii illis quidem sociis. Cuius rei triplex affertur exemplum: Argo navis cum Medea, quae patre relicto peregrinum virum secuta est; Sidonii nautae, qui ut divitias conquirerent in remotissimas regiones penetrabant; Ulixes versutus et astutus. Praeterea notandum, eadem tria exempla clarissima esse per antiquitatem longinquis per Oceanum navigationibus. — *Nulla nocent*] „Hoc loco hi versus in omnibus codd. leguntur. Interpretes eos aut in alium locum vel post v. 52 vel post v. 56 transferunt aut pro spuris habent. Sed poeta primum eas insularum dotes, quae terra ipsa continentur, vv. 43—52 descripsit, deinde res quae extrinsecus

Nulla nocent pecori contagia, nullius astri
 Gregem aestuosa torret impotentia.
 Iuppiter illa piaae secrevit littora genti,
 Ut inquinavit aere tempus aureum;
 65 Aere, dehinc ferro duravit saecula: quorum
 Piis secunda vate me datur fuga.

CARMEN XVII.

Iam iam efficaci do manus scientiae,
 Supplex et oro regna per Proserpinae,
 Per et Dianae non movenda numina,
 Per atque libros carminum valentium
 5 Refixa coelo devocare sidera,
 Canidia, parce vocibus tandem sacris
 Citumque retro solve solve turbinem.
 Movit nepotem Telephus Nereium,

veniant subiunxit. Terra nihil in se continet quod aut agris aut incolis et gregibus noceat neque extrinsecus mala veniunt. Etenim agros neque nimiae pluviae vexant nec siccitas exurit, incolae a peregrinis non turbantur, pecudes denique nullis contagiis laborant. Igitur neque agris neque hominibus neque pecudibus quidquam timendum est.“ *Iahn.* — *astri*] cf. Carm. III, 13, 9. — *aere*] Tres habet aetates, auream, aeream, ferream, omissa argentea. — *aere, dehinc*] Alii ex codd. *aerea dehinc* (monosyll.), qua lectione molestam, ut dicebant, anaphoram vitarent. At vero recte animadversum est, referri anaphora commotum poetae animum, quo intueatur humani generis depravationem. cf. supra v. 41. Deinde si quid ibi molesti est, id ne adiectivo quidem *aerea* pellitur. — *quorum*] Genitivus est quem solemus obiectivum dicere.

Canidiam versibus suis in furorem gravissimamque iram agitatam magica arte etiam in se usam esse, non ut ludibrium et odium in amorem converteret, sed ut durissima quaeque mala in inimicum cumlaret. Cuius quidem artis maximam vim iam nunc se sentire simulat inimicamque ut tandem sibi satis cruciato parcere velit supplex obsecrat. Sed surdae sunt aures Canidiae; nunquam ea furorem ultionemque minuet. Duae igitur carminis sunt partes, prima (v. 1—52) qua poeta quidquid olim calumniatus sit mentitum se esse humili animo videtur fateri; altera (v. 53—81) qua Canidia veniam se daturam non negat solum sed poenas etiam aucturam minatur. Qua carminis ratione novam salsissimamque Canidiae irrisionem addi supervacaneum prope videtur uno verbo indicare. Quo anno carmen compositum videatur inveniri nequit; vehementer enim erraret qui ex v. 23 concludi aliquid posse opinaretur. Frankio novissimus omnium epodorum esse visus est, scriptus circa a. 724; aliis a. 715, aliis a. 717.

V. 1. *do manus*] victum me profiteor. Cic. ad Att. II, 22: „Aiebant

Carmen XVII.

Duobus carminibus, quae in Canidiam sagam et veneficam acerbissime scripta erant (Epod. 5. Sat. I, 8), hoc tertium additur. Fingit enim poeta,

- In quem superbus ordinarat agmina
 10 Mysorum et in quem tela acuta torserat.
 Unxere matres Iliae addictum feris
 Alitibus atque canibus homicidam Hectorem,
 Postquam relictis moenibus rex procidit
 Heu pervicacis ad pedes Achillei.
 15 Setosa duris exuere pellibus
 Laboriosi remiges Ulixei
 Volente Circa membra; tunc mens et sonus
 Relapsus atque notus in vultus honor.
 Dedi satis superque poenarum tibi,
 20 Amata nautis multum et institutoribus.
 Fugit iuventas et verecundus color
 Reliquit ossa pelle amicta lurida;

illum primo sane diu multa contra, ad extremum autem manus dedisse.“ — *Proserpinae*] a Canidia maga magnopere culta. Eadem de causa etiam Diana memoratur. cf. Epod. 5, 51. — *movenda*] movere deos est deos laedere, violare, irritare. Liv. 25, 26: „intoleranda vis aestus omnium ferme corpora movit.“ Fuit etiam proverbium *non movenda moves*, ἀκίνητα κινεῖς. — *per atque*] Ne credas cum Bothio esse scribendum *per teque*, recordare etiam *atque* postponi a poetis, ut Epod. 8, 11. Sat. I, 5, 4. I, 6, 131. I, 7, 12. — *carminum*] sunt formulae magicae. cf. Epod. 5, 45. — *refixa*] Sic scribendum ex optimis et antiquissimis codd., non *defixa*. Vide ad Carm. I, 28 p. 79. — *solve solve*] Iteratio est enixe precantis. Similiter Carm. I, 35, 15. — *turbinem*] rhombum magicum, qui ut per licia attraheret et advoluta agitatus incantatos ad voluntatem magae adstrinxit, sic retro actus adstrictos vi solvit. cf. Theocr. II, 30: „Χῶς δινεῖθ' ὅδε ῥόμβος ὁ χάλκεος ἐξ Ἀφροδίτας, Ὡς τῆνος δινοῖτο ποθ' ἀμετέρῃσι θυρήσι.“ — *Telephus*] Mysorum rex ab Achille (*Nerei* nepote) vulneratus consulto oraculo responsum tulit: ὁ τρώας καὶ ἰάσεται. Achilles precibus eius motus ferrugine cuspidis hastae suae vulnus sanavit. — *unxere*] Boni etiam codi-

ces *luxere*, male; lugere etiam poterant non receptum, ungere non poterunt. *Unxere* indicat redditum et receptum corpus Hectoris, *luxere* non indicat, nec magis *planxere*, quod proposuit Peerlkampius. Sic igitur recte, etiamsi Homerus II. XXIV, 776 discrete non narrat quod rerum ratio tulit. — *addictum*] Hom. II. XXIII, 183. — *homicidam*] Hom. II. I, 242. — *procidit*] Hom. II. XXIV, 510. cf. Carm. I, 10, 14. — *pervicacis*] Carm. I, 6, 6. — *laboriosi*] Epod. 16, 60. De Circa vide Hom. Od. X, 388 sqq. Latina forma *Circa* ex bonis codicibus. — *sonus*] vox humana. — *relapsus*] In bonis libris legitur *relatus*, de quo Bentleius: „in eo dumtaxat differunt, quod *relatus* externa vi reductum significet, *relapsus* ultro et sponte sua reversum.“ — *multum*] vide ad Carm. I, 25, 5. — *institutoribus*] vide ad Carm. III, 6, 30. Sed animadvertite quanta insit in hac laude acerbitas et contumelia.

V. 21. *fugit*] Nimirum ficta sunt haec omnia; non verior est canities quam luridus color cutis. Verecundus color rubor est iuventuti proprius; is ossa relinquit, cum corpus macie confectum nihil est nisi ossa et cutis. Quare tenenda est codicum lectio *ossa* contra Bentleyi coniecturam *ora*. —

- Tuis capillus albus est odoribus,
 Nullum ab labore me reclinat otium;
 25 Urget diem nox et dies noctem, neque est
 Levare tenta spiritu praecordia.
 Ergo negatum vincor ut credam miser,
 Sabella pectus increpare carmina
 Caputque Marsa dissilire nenia.
 30 Quid amplius vis? O mare, o terra, ardeo
 Quantum neque atro delibutus Hercules
 Nessi cruore, nec Sicana fervida
 Virens in Aetna flamma: tu, donec cinis
 Iniuriosis aridus ventis ferar,
 35 Cales venenis officina Colchicis.
 Quae finis aut quod me manet stipendium?
 Effare; iussas cum fide poenas luam,
 Paratus expiare, seu poposceris
 Centum iuvencos sive mendaci lyra
 40 Voles sonari: Tu pudica, tu proba
 Perambulabis astra sidus aureum.
 Infamis Helenae Castor offensus vicem

odoribus] unguentis magicis. — *neque est]* οὐδ' ἔστι. — *Sabella]* Sat. I, 9, 29. Ut Marsi sic etiam Sabelli et Peligni magicarum rerum periti. cf. Epod. 5, 76, infra v. 60. Vide ad Carm. II, 1, 38. — *Hercules]* Epod. 3, 17. — *virens flamma]* ad colorem sulfureae flammae, quam exhalat Aetna. In codd. etiam *urens* et *furens*. — *cinis]* „Tu veluti quaedam venenorum officina non cessabis me tuis venenis exurere, donec exaruerim et cineris in modum consumptus atque a ventis dispersus fuerim?“ — *iniuriosis]* Summa in mortuis iniuria est cineres eorum ventis dissipandos dare. — *Quae finis]* exitus, eventus; sic non raro feminino genere: Virg. Aen. II, 554. Liv. XXII, 57. Cic. Leg. II, 22: „Necesse est edisseri a nobis, quae finis funestae familiae cet.“ — *stipendium]* de poena, ut Catull. 64, 173: „Indomito nec dira ferens stipendia tauro“, de adolescentibus et puellis, quos Athenien-

ses quotannis Minotauro miserunt. — *sive mendaci lyra]* Gravissima *εἰρω-νεία* hic aperta; nam quam mendacem ita appellat lyram; ut mentitam eam in diffamanda Canidia videatur fateri, eam simul significat nunc mentiri in laudanda. Quae verba *mend. lyr.* cum praecedant, insequentem laudem omnem in irrisionem vertunt. — *perambulabis]* vide ad Epod. 4, 5. — *Infamis Helenae]* infamatae; Stesichorus enim poeta oculis captus esse dicitur quia Helenam maledicis et contumeliosis versibus laceraverat. Plat. Phaedr. p. 243. A.: „Ἔστι δὲ τοῖς ἀμαρτάνουσι περὶ μυθολογίαν καθαροὺς ἀρχαῖος, ὃν Ὀμηρος μὲν οὐκ ᾔσθετο, Στρηγόχορος δὲ τῶν γὰρ ὁμμάτων στερηθεὶς διὰ τὴν Ἑλένης κακηγορίαν, οὐκ ᾔγνόησεν ὥσπερ Ὀμηρος, ἀλλ' αἶτε μουσικὸς ὢν ἔγνω τὴν αἰτίαν καὶ ποιεῖ εὐθύς Οὐκ ἔστ' ἔτυμος λόγος οὗτος, οὐδ' ἔβας ἐν νηυσὶν εὐσέλμοις οὐδ' ἔκειο Περ-

Fraterque magni Castoris victi prece
Adempta vati reddidere lumina.

- 45 Et tu, potes nam, solve me dementia,
O nec paternis obsoleta sordibus,
Nec in sepulcris pauperum prudens anus
Novendiales dissipare pulveres.
Tibi hospitale pectus et purae manus,
50 Tuusque venter Pactumeius, et tuo
Cruore rubros obstetrix pannos lavit,
Utcunque fortis exsilis puerpera.

- Quid obseratis auribus fundis preces?
Non saxa nudis surdiora navitis
55 Neptunus alto tundit hibernus salo.
Inultus ut tu riseris Cotyttia
Vulgata, sacrum liberi Cupidinis,
Et Esquilini pontifex venefici
Impune ut urbem nomine impleris meo?
60 Quid proderat ditasse Pelignas anus,
Velociusve miscuisse toxicum?
Sed tardiora fata te votis manent:

γάμα Τροίας. καὶ ποιήσας δὴ
πάσαν τὴν καλουμένην καλινῶδιαν
παραχρῆμα ἀνέβλεψεν.“ — *vicem*] Plurimi codices *vice*; sed lege Zumpt. gr. lat. §. 453. cf. Plant. III, 5, 34: „vos respondetote istinc istarum *vicem*.“ Cic. Fam. IV, 5: „An illius *vicem*, credo, doles?“ — *potes nam*] vide ad Carm. I, 18, 3. Et compara Virg. Aen. VI, 116 sq. Hom. Od. IV, 237. 612. 827. V, 25 sqq. — *sepulcris pauperum*] cf. Sat. I, 8, 14–20. Divitum sepulcris sui erant custodes. — *novendiales cineres*] recentes; nono enim die omnia iusta mortuis peracta erant. *Dissipare est in magicum usum consumere*. — *Pactumeius*] Est nomen filii suppositicii, quem sibi filium esse dicebat. cf. Epod. 5, 5. Illud autem vere est nomen Romanum, nam in inscriptionibus reperitur. *Venter* autem pro filio positus est.

V. 55. *Neptunus hibernus*] Metonymia; mare procellosum. Vide ad Epod. 16, 43. — *ut tu*] cf. Sat. II, 5, 18. Liv. IV, 2, 12. — *Cotyttia*] sacra nocturna et flagitiosa a Cotyttone Thracia dea impudicitiae dicta. — *pontifex*] Pontifex maximus index et arbiter erat omnium rerum sacrarum; quare Canidia Horatium invidiose pontificem appellat Esquilini veneficii, cuius arbitrum eum fuisse ostendit Sat. I, 8. — *Pelignas*] vide ad v. 28. — *ditasse*] ut me suas artes docerent. — *Sed tardiora*] Non pauci et boni codices *si tard.*, quod cum olim praetulerim nunc tamen relinquendum video. Canidia enim hoc vult: „Quid proderat mihi magna mercede magicam artem didicisse, si te nunc ulcisci non possum? Verum senties meam potestatem; mori males quam vitam ducere a me tibi paratam. Sed tuis votis tar-

- Ingrata misero vita ducenda est in hoc,
 Novis ut usque suppetas laboribus.
 65 Optat quietem Pelopis infidi pater,
 Egens benignae Tantalus semper dapis,
 Optat Prometheus obligatus aliti,
 Optat supremo collocare Sisyphus
 In monte saxum; sed vetant leges Iovis.
 70 Voles modo altis desilire turribus,
 Modo ense pectus Norico recludere,
 Frustraque vincla gutturi innectes tuo,
 Fastidiosa tristis aegrimonia.
 Vectabor humeris tunc ego inimicis eques,
 75 Meaeque terra cedet insolentiae.
 An quae movere cereas imagines,
 Ut ipse nosti curiosus, et polo
 Deripere Lunam vocibus possim meis,
 Possim crematos excitare mortuos
 80 Desiderique temperare pocula,
 Plorem artis in te nil agentis exitus?

diora fata te manent cet.“ — *in hoc*] Ovid. Met. VIII, 77. Liv. XXI, 42, 2. Significatur res, propter quam aliquid fieri dicitur. — *Pelopis infidi*] quia in mare coniecerat Myrtilum aurigam, cuius ope Hippodamiam, Oenomaï filiam, in matrimonium acceperat. Gravis in hoc loco anaphora *optat*; nam „tu quoque, inquit, nequidquam optabis a perpetua poena morte liberari.“ — *obligatus*] tenacissime ligatus; ut dicunt Latini *nexu se obligare*, similia. — *Norico*] Carm. I, 16, 9. — *recludere*] aperire. Virg. Aen. X, 601. — *innectes*] Sic antiqui codices non pauci, etiam Barcellonensis Hauthalii, alii etiam boni *nectes*. Difficilior lectio praestare videtur. cf. Virg. Aen. VI, 609. Lucan. II, 670: „Tunc placuit caesis innectere vincula silvis.“ — *vectabor humeris*] In cervicibus tuis sedebo meamque potesta-

tem in aerem sublata quasi triumphans comprobabo. Nec omnino dissimile est Graecorum *καθιππάζεσθαι*. Aesch. Eum. 778: „θεοὶ νεώτεροι παλαιόνες νόμους καθιππάζασθε.“ ibid. 731: „καθιππάζει με πρεσβύτερον νέος.“ — *cereas imagines*] Hoc quid sit, discas ex Virg. Buc. 8, 79 sqq. et Theocr. 2, 29: „Ὡς τοῦτον τὸν καρὸν ἐγὼ σὺν δαίμονι τάκω, Ὡς τάκοιθ' ὕπ' ἔρωτος ὁ Μύνδιος ἀντίκα Δέλφης.“ — *curiosus*] invidiose dictum: „cum tu ex insidiis arti meae interesses.“ — *pocula*] Praestare videtur pluralis ex bonis codicibus; in aliis *poculum* et *exitum*. Sed plura amoris pocula (Epod. 5, 73) conficere illa norat variaeque artis plures exitus exspectabat. cf. Carm. IV, 14, 38. — *nil agentis*] nil efficientis; ut Sat. I, 9, 15. II, 3, 103.

Q. HORATHI FLACCI
CARMEN SAECULARE
AD APOLLINEN ET DIANAM.

Phoebe silvarumque potens Diana,
Lucidum coeli decus, o colendi

Carmen saeculare.

„Augustus ludos saeculares celebravit a. u. c. 737, cum primum decennium, in quod prorogandum sibi a senatu imperium curaverat a. u. c. 727, praeterisset: qua occasione oblata partim praeclarum felicitatis imperii Romani se principe monumentum posteris proponere, partim Romanis legem suam de maritandis ordinibus sensim commendare studuit. Finis igitur huius caerimoniae omnino erat πολιτικώτατος. Compacto autem rem cum Quindecimviris sacris faciundis ita egisse videtur, ut hi pro eius voluntate dicis causa consultis libris Sibyllinis et compositis fortasse illis ipsis versibus, quos servarunt Phlegon Tral-
lianus et Zosimus, pronuntiarent, ultimos ludos saeculares celebratos esse a. u. c. 628, quo fortasse piaculum et lustrum aliquod sollemne populi Romani factum erat, cum re vera proxime superiores editi essent a. u. c. 605 vel 608, sequentibus (a. u. c. 705 vel 708) per bellorum civilium turbas intermissis: saeculum autem fluiri annis CX, qua in re Etruscam doctrinam secuti esse videntur, cum consuetudo Latina v. saeculum pro

centenis annis usurparet.“ *Orellius*. Augusti iussu Horatius hoc carmen ludis saecularibus rite canendum composuit. Celebrabantur ludi tribus noctibus totidemque diebus continuis; incipiebant sub vesperam, Νύξ ἡνίκα γαῖαν ἐπέλθῃ, Ἑλλίου κρύψαντος ἔον φάος, ut est in versibus Sibyllinis. Ex iis, quae apud Zosimum hist. Rom. II, 5 leguntur: „Ἡμέρα δὲ τρίτη ἐν τῷ κατὰ τὸ Παλάτιον Ἀπόλλωνος ἱερῷ τρεῖς ἑννέα παῖδες ἐπιφανεῖς μετὰ παρθένων τοσοῦτων, οἱ πάντες ἀμφιθαλεῖς, ὅπερ ἐστίν, ἀμφοτέρους τοὺς γονεῖς ἔχοντες περιόντας, ὕμνους ᾄδουσι τῇ τε Ἑλληνῶν καὶ Ῥωμαίων φωνῇ καὶ παιᾶνας, δι’ ὧν αἱ ὑπὸ Ῥωμαίοις σώζονται πόλεις,“ *Steiner* (progr. schol. Cru-
cen. 1841) concludi posse arbitratum est, tertio die in Palatino Apollinis templo carmen saeculare recitatum esse. Dubitationem movit *Duentzer*, nec iniuria; nam idem Zosimus de prima nocte sic scripsit: „τῇ δὲ πρώτῃ τῶν θεωριῶν νυκτὶ δευτέρως ὥρας ὁ αὐτοκράτωρ ἐπὶ τὴν ὀχθρὴν τοῦ ποταμοῦ τριῶν παρασκευασθέντων βωμῶν τρεῖς ἄρας θύει, μετὰ τῶν δεκαπέντε ἀνδρῶν καὶ τοὺς βωμοὺς καθαιμάξας ὀλοκάντοῖ τὰ

Semper et culti, date quae precamur
Tempore sacro,

θύματα. Κατασκευασθείσης δὲ σκη-
νῆς δίκην θεάτρον πῶτα ἀνάπτεται
καὶ πυρὰ, καὶ ὕμνος ᾄδεται
νεωστὶ πεποιημένος, θεωρεῖται
τε ἱεροπρεπεῖς ἄγονται.“ Iam cum
certissimum videatur, hoc saeculare
carmen Horatii eum ipsum ὕμνον
νεωστὶ πεποιημένον esse neque prae-
terea alia carmina nove facta recitata
esse, deinde cum, quae tertio die ca-
nebantur carmina Graeca et Latina,
videantur alia esse antiquitus accepta

et religiose servata, *Duentzer* conclu-
sit, Horatianum carmen prima iam
nocte in campo Martio a choro esse
recitatum. Videntur autem septem
illi et viginti pueri tribus ordinibus
instructi fuisse, totidemque ordinibus
septem et viginti puellae. cfr. Liv.
XXVII, 37. XXXI, 12. Atque inter
hos duos choros carminis saecularis
strophas hoc modo distribuendas esse
Steiner censuit:

Stropha 1 et 2 proodus
iuncti pueri et puellae

Str. 3 pueri — 4 puellae

5 pueri — 6 puellae

7 pueri — 8 puellae

Str. 9 mesodus

vs. 1 et 2 pueri,

vs. 3 et 4 puellae

Str. 16—19 epodus

iuncti pueri et puellae.

Str. 10 pueri — 11 puellae

12 pueri — 13 puellae

14 pueri — 15 puellae

Qui ordo multo est veri similior quam
qui aliis placuit puellis puerisque
Quindecimvirovum etiam chorum im-
miscentibus. Puellas a puerorum cho-
ris seiunctas fuisse patet ex versibus
Sibyllinis apud Zosim. l. l., nam v.
20 sic legimus: *χωρὶς δὲ κόραι χο-
ρόν αὐτὰ ἔχοιεν Καὶ χωρὶς παίδων
ἄρσην στάχυν*. Bene autem *Iahnus*
ad Virg. Ecl. 4, 10: „Fuit, inquit,
apud Graecos vulgata atque a philo-
sophis Platoniceis Stoicisque maxime
exulta opinio de magno anno mun-
dano, tum demum impleto, cum omnia
sidera in ortus suos redirent et omnium
rerum ἀνανήλωσις et ἀποκατάστασις
futura esset. Eadem fama etiam inter
Etruscos et Romanos fuit, ubi in
libris ritualibus Etruscorum et Roma-
norum libris Sibyllinis ille annus in
decem menses magnos sive saecula
divisus, neque tamen eorum mensium
longitudo et exitus certis finibus cir-
cumscribitur erat, sed portentis divi-
nitis missis indicibus credebatur. Unde
etiam ludi saeculares apud Romanos
diversis intervallis instituti sunt. In
libris Sibyllinis praeterea scriptum
erat, quis quoque mense imperaret
deus. Primo mensi Saturnus praeerat,
ultimus Soli sive Apollini tribuebatur,
Apollinem praecessisse videtur Diana,

cui etiam in civili anno mensis Novem-
ber sacer erat. Quamobrem in Hora-
tii carmine saeculari Apollo et Diana
prae ceteris diis celebrati sunt. Ro-
mani vero hoc ipso tempore saeculo
decimo se vivere putaverunt. Etenim
cum post mortem C. Iulii Caesaris
stella crinita apparuisset, Volcatius
haruspex hunc cometam significare
exitum saeculi noni et ingressum deci-
mi in concione dixit.“ Hac fama
usus Augustus, ut se suumque impe-
rium populo commendaret, et Apolli-
nis se filium esse gloriabatur, et Apol-
lini templum aedificavit, eidemque deo
et Dianae summos in saecularibus
ludis honores attribuit. Nam antea
hi ludi maxime inferis diis celebrari
solebant. Quapropter Horatius carmen
suum ita instituit, ut ex consilio Au-
gusti Apollo et Diana ut dii tutelares
populi Romani laudarentur. cfr. Carm.
IV, 6. Praeterea Sol et Luna aëris
salubris et agrorum fertilitatis datores
erant et ad pestem aliaque mala aver-
runcanda praesentissima habebantur
numina. cfr. Carm. I, 21.

V. 1. *Phoebe*] cf. Carm. I, 21. III,
22, 1. — *decus*] Singularis numerus
de geminis numinibus Latoidarum, ut
Carm. IV, 8, 31. — *Sibyllini versus*]

5 Quo Sibyllini monuere versus

Virgines lectas puerosque castos

Dis, quibus septem placuere colles,

Dicere carmen.

Alme Sol, curru nitido diem qui

10 Promis et celas aliusque et idem

Nasceris, possis nihil urbe Roma

Visere maius.

Rite maturos aperire partus

Lenis, Ilithyia, tuere matres,

15 Sive tu Lucina probas vocari

Seu Genitalis:

Diva, producas subolem patrumque

Prosperes decreta super iugandis

Feminis prolisque novae feraci

20 Lege marita,

Certus undenos decies per annos

Orbis ut cantus referatque ludos

Hi ipso carmine memorari debebant, quia eorum auctoritate ductus Augustus ludos habere dicebatur. — *lectas*] vide Zosimi l. l. Recte autem observatum est, utrumque adiectivum *lectas*, *castos* ad utrumque sexum pertinere. Debebant enim pueri et puellae ex confarreatis parentibus esse, senatoriae stirpis, patrimi et matrimi. — *celas*] Totus mundus naturali quadam caligine obductus radiis Solis illustratur; occidente igitur Sole priore nocte orbis necesse est tegatur. — *rite*] uti soles, cfr. Carm. III, 24, 10. Coniungendum hoc cum v. *aperire*; simillimus locus est Carm. II, 5, 22; etiam Epod. II, 17. — *Ilithyia*] Hom. II. XI, 270. XVI, 187. XIX, 103. Callim. Hymn. 3, 6: „Δός μοι παρθενίην αἰώνιον, ἅπαντα φυλάσσειν καὶ πολυώνυμην.“ Soph. Antig. 1115, ubi Bacchus appellatur Πολυώνυμη. Multis igitur nominibus dii gaudent; quare duo alia adduntur latina nomina, Lucina et Genitalis. Catull. 34, 21: „Sis (Lantonia) quocunque tibi placet Sancta nomine.“ cf. Sat. II, 6, 20. De no-

minativo cum infinitivo vide ad Carm. I, 37, 31.

: V. 17. „Cum quarta strophā puelle Lucinam ut matres parturientes adiuvaret precatae sint, quinta strophā pueri hanc precationem excipientes optant, ut suboles partu edita eadem dea adiutrice laeta capiat incrementa et aliquando adulta legibus nuptialibus obtemperans novam ex se gignat prolem, ita ut alterius saeculi orbe impleto iidem ludi in Apollinis et Dianae honorem maxima civium frequentia denuo celebrari possint. Hanc alteram sententiae partem, ut secundariam, puellis attribuit poeta stroph. 6.“ Steiner. — *iugandis feminis*] sunt leges de maritandis ordinibus, quas hoc ipso anno Augustus tulerat sed non pertulerat; quod factum tandem est a. u. c. 762 M. Papio Q. Poppaeo coss. suffectis, a quibus nominata lex Papia Poppaea. — *lege marita*] ad coniugium pertinente, ut Ovid. Her. XII, 87: „Iuno sacris praefecta maritis.“ — *referatque*] vide ad Carm. II, 7, 25. — *ter*] In toto carmine numerus ternarius

Ter die claro totiesque grata

Nocte frequentes.

25 Vosque veraces cecinisse Parcae,

Quod semel dictum est stabilisque rerum

Terminus servet, bona iam peractis

Iungite fata.

Fertilis frugum pecorisque Tellus

30 Spicea donet Cererem corona;

Nutrient fetus et aquae salubres

Et Iovis auras.

Condito mitis placidusque telo

Supplices audi pueros, Apollo;

35 Siderum regina bicornis, audi,

Luna, puellas:

Roma si vestrum est opus, Iliaeque

quasi regnat; „tres sunt festi dies, tres noctes, ter novem pueri, ter novem puellae, ter singulas preces fundunt pueri in utraque carminis parte, ter puellae; ter ut preces exaudiantur precantur chori.“ *Steiner*. — *frequentes*] Consulto h. v. in fine strophae positum, quo magis eius vis eluceat; quod consilium frequens apud Horatium. — *Parcae*] Preces ad Parcas et Tellurem (v. 29) praescriptae erant verbis Sibyllinis: „ἐνθα σὺ ῥέξειν Ἱερὰ ποντογόνοισι Μοῖραις ἄρνας τε καὶ αἶγας· Κρανέας δ' ἐπὶ ταῖςδ' Ἐλλειθυίας ἀρέσασθαι Παιδοτόκους θνέσσειν ὅπῃ θέμις. Αὐτὶ δὲ Γαίῃ Πληθουμένη χοῖρος τε καὶ ὄς ἱεροῖτο μέλαινα.“ — *semel*] vide ad Carm. I, 24, 16. Romanis oraculo erat praedictum, quamdiu ritu haberentur ludi saeculares tamdiu incolume fore imperium Romanum. — *servet*] Sic Scholiastae et antiquissimi plurimique codices, in aliis male *servat*, quod ex praecedenti indicativo est corruptum apparet. Ordo verborum hic est: „vos Parcae veraces cecinisse iungite bona fata iam peractis fati, quod quidem semel dictum est quodque stabilis rerum terminus servet.“ Benth. coniecerat *dictum stabilis per aevum Terminus servet*.

V. 29. *Tellus*] vide versus Sibyllinos ad v. 25 scriptos. cf. iusiurandum Philippi cos. apud Dion. fragm. p. 128: „Ὀμνυε τὸν Δία τὸν Καπετώλιον καὶ τὴν Ἑστίαν τῆς Ῥώμης καὶ τὸν πατρώον αὐτῆς Ἄσθρην καὶ τὸν γέναρχον Ἥλιον καὶ τὴν εὐεργέτιν ζώων τε καὶ φυτῶν Γῆν.“ Et cfr. Tibull. I, 1, 15: „Flava Ceres, tibi sit nostro de rure corona Spicea.“ — *fetus*] h. v. dicitur non solum de animalium partu, sed etiam de agrorum fructibus. Virg. Georg. I, 55, II, 390. Cic. Or. 2, 30: „Ager novatus et iteratus, quo meliores fetus possit et grandiores edere.“ — *salubres*] Adiectivum medium inter nomina subst. positum ad utrumque referendum neque ulla distinctione segregandum a voc. *aquae* aut ab altero *aurae*. Aqua est pluvia cf. Carm. III, 10, 19. — *Condito telo*] Apollinis tela pestifera erant, et *Diana bicornis* i. e. luna alternis cornuum vicibus ad terrae fertilitatem plurimum conferre credebatur. Sic haec strophæ optime cum praecedente cohaeret. cf. Hom. II. I, 50 sqq. — *si vestrum est*] Particula *si* modestiam exprimit in precibus; est enim: *si vestrum est, ut est*. Coharent autem hae strophæ a v. 33 usque ad v. 48 eadem ratione qua Chry-

Littus Etruscum tenuere turmae,
 Iussa pars mutare lares et urbem
 40 Sospite cursu,
 Cui per ardentem sine fraude Troiam
 Castus Aeneas patriae superstes
 Liberum munivit iter daturus
 Plura relictis:

45 Di, probos mores docili iuventae,
 Di, senectuti placidae quietem,
 Romulae genti date remque prolemque
 Et decus omne.

Quaeque vos bobus veneratur albis
 50 Clarus Anchisae Venerisque sanguis,
 Impetret bellante prior, iacentem
 Lenis in hostem.

Iam mari terraque manus potentes
 Medus Albanasque timet secures;

sis sacerdotis preces in Iliad. I, 37—42. De re compara Virg. Aen. III, 93 sq. IV, 345. Hor. Carm. IV, 6, 21. — *iussa pars*] per appositionem. — *sine fraude*] Carm. II, 19, 20. De *casto* Aenea vide ad Carm. III, 2, 30. — *placidae*] Cic. de Sen. 5. Placidus est qui perturbatione animi caret, qui tranquillo animo est. Senes autem, quorum natura quieta est, requirunt et optant quietem. Alii e codd. aut *senectutis* aut *placidam*. Verum congruant inter se oportet *docili iuventae*, *senectuti placidae*, *Romulae genti*. Tertius huius strophae versus non sine arte primum et secundum complectitur. — *Romulae*] vide ad Carm. IV, 5, 1. — *quaeque veneratur*] i. e. quaeque venerando precatur, ut Sat. II, 2, 124. 6, 8. Vers. Sibyll. apud Zosim. I. I. 12: „Ζάλευνοι πάντοι δὲ Διὸς παρὰ βωμὸν ἀγέσθων“ et v. 16: „Καὶ Φοῖβος Ἀπόλλων, Ὅστε καὶ Ἥλιος κικλήσκονται, Ἰσα δεδέχθω Θύματα Ἀητοῖδης.“ — *impetret*] Sic recte ex optimis codicibus. Alii *Quique* — *imperet*. De sententia cfr. Virgil. Aen. VI, 853.

V. 53. „Singulis precationibus ad deos peractis praeclara adiungitur laudatio Caesaris Augusti, ludorum saecularium auctoris, quem callide poeta stroph. 13 monstravit potius quam nominavit. Quae igitur chori antea a diis immortalibus precati sint: probos mores, quietem, rerum amplitudinem et copiam, ea populum Romanum Augusto principe iam aliqua ex parte consecutum esse profitentur. Cautè autem Horatius, ne nihil a diis precandum superesse videretur, usus est verbis: *redire audet Pax cet., apparetque*; his enim verbis inchoata magis quam absoluta significatur civitatis salus ac felicitas.“ *Steiner*. „Nota quam caute totum per carmen omnem bellorum civilium quae imperium laceraverant vel occultissimam mentionem devitet ac de exteris dumtaxat nationibus ab Augusto domitis loquatur, tum v. 57 de fide ac pace ab eodem restituta.“ *Orellius*. — *Albanas secures*] Securibus potestas et maiestas populi indicatur; cur, in promptu est. cfr. Caes. b. g. VII, 77 extr.: „respicite finitimam Galliam, quae in provinciam redacta, iure

55 Iam Scythae responsa petunt superbi
Nuper et Indi.

Iam Fides et Pax et Honos Pudorque
Priscus et neglecta redire Virtus
Audet apparetque beata pleno

60 Copia cornu.

Augur et fulgente decorus arcu
Phoebus acceptusque novem Camenis,
Qui salutarī levat arte fessos
Corporis artus,

65 Si Palatinas videt aequus arces,
Remque Romanam Latiumque felix
Alterum in lustrum meliusque semper
Prorogat aevum.

Quaeque Aventinum tenet Algidumque

et legibus commutatis, *securibus* subiecta, perpetua premitur servitute. "Albanae sunt, quia Romani Alba Longa oriundi sunt. — *responsa*] Carm. IV, 15, 22. De re vide ad Carm. II, 13. — *Copia*] Carm. I, 17, 14. Epist. I, 12, 28. „Pacatum autem et quietum iam terrarum orbem cum verbis tum numeris lenioribus egregie declaravit poeta, qui in duabus his strophis quinques molli caesura trochaica usus sit. Eiusdem caesurae in primo odarum libro sex exempla reperies, in altero unum exemplum, in tertio nullum, ut mirum sit, quod quarti libri tria carmina sapphica viginti duas exhibent caesuras trochaicas, unumque carmen saeculāre undeviginti." *Steiner*. Cuius quidem dissimilitudinis causa si quae potest inveniri, in argumenti magis ratione quam in aetatis Horatii differentia quaerenda videtur. — *Augur*] „In proodo chorus cecinit: Date quae precamur, Phoebe et Diana. In mesodo eandem sententiam iteravit: audite nostras preces, Apollo et Luna. Denique in epodo universus chorus hanc sententiam ita repetit, ut non iam numina ipsa alloquatur, sed ad populum ni fallor conversus tertia persona dicat: Phoebus et Diana cum Quindecimviri

pias preces, quas illi in sacrificando pro imperii incolumitate susceperunt, tum nostra quae modo nuncupavimus vota benigne curent. Postremo omnibus precibus rite perfectis idem chorus iam domum discessurus se certam spem habere profitetur, fore ut Iuppiter cunctique dii quae chorus precatus sit rata esse velint." *Steiner*. — *fulgente arcu*] *χρυσότοξος, ἀργυρότοξος*. — *fessos*] morbo. Est enim Apollo *Παῖων*. cf. Hom. II. XVI, 514 sqq. — *si videt*] i. e. siquidem, quandoquidem. cf. supra v. 37. — *arces*] Ne optimi quidem et antiquissimi codices concordēs sunt; in aliis *aras*. Sed *arces* sunt colles. Virg. Georg. II, 535. Ovid. Met. XIII, 196; ex cuius significationis ignorantia facilior illa scriptura exoriri potuit. cf. ad Carm. II, 6, 22. — *Latiumque felix*] Sic coniunge verba; adiect. *felix* magna cum vi versum claudit; nam *felix prorogat* est „fecilitatem qua nunc Augusto principe gaudet Latium prorogat." Ceterum cum omnibus prope optimis codd. nunc indicativum modum *prorogat, curat, applicat* coniunctivo praetuli; etenim non iam ad precesiones redit chorus, sed confidit, Apollinem Dianamque placidis oculis Romam urbem adspecturos ea-

70 Quindecim Diana preces virorum

Curat et votis puerorum amicas

Applicat aures.

Haec Iovem sentire deosque cunctos,

Spem bonam certamque domum reporto,

75 Doctus et Phoebi chorus et Dianae

Dicere laudes.

que, quae ante precatus sit, daturus esse. — *Aventinum*] Zosimus l. l.: „Συνελθόντος δὲ τοῦ δήμου παντὸς ἐν τε τοῖς ῥηθείαι τόποις καὶ ἐν τῷ ἱερῷ τῆς Ἀρτέμιδος, ὃ ἐν τῷ Ἀουεντίνῳ λυφφ καθίδρυνται.“ — *Algidum-que*] Carm. I, 21, 6. — *quindecim virorum*] Tacit. Ann. XI, 11: „Collegio Quindecimvirum antiquitus ea cura (ludorum saecularium), et magistratus

potissimum exsequiebantur officia caerimoniarum.“ — *puerorum*] „Pueri appellatione etiam puella significatur.“ Paul. de Verb. sign. p. 78 ed. Cramer. — *Haec*] quae precati sumus. — *doctus*] cf. Carm. IV, 6, 43. — *laudes*] Phoebi et Dianae. Sic vocabula coniungenda esse intelliget, qui versus recte recitaverit.

Q. HORATHI FLACCI S A T I R A R U M

LIBER PRIMUS.

SATIRA I.

Qui fit, Maecenas, ut nemo, quam sibi sortem
Seu ratio dederit seu fors obiecerit, illa

De Satirarum origine scriptoribusque brevis expositio.

De origine satirarum praecipuus locus est Livii VII, 2, a quo satiras primo rude aliquod fabularum genus fuisse docemur, quod descripto ad tibicinem cantu congruenti motu perageretur, certo tamen argumento careret. Ex qua rei natura nomen sumptum est, nam: „Satira, inquit Diomedes (p. 483. P.), dicta a *satura lance*, quae referta *variis multisque primitiis* in sacro apud priscos diis inferebatur... sive a quodam genere farciminis, quod multis rebus refertum, saturam dicit Varro vocitatum.“ Inde vides quid sit habendum de prava illa scribendi nominis ratione, qua hoc genus vere Romanum, quasi petium esset a satyrica Graecorum fabula, *satyram* appellare solebant. Deinde cum Iivius Andronicus fabulas argumento serere primus esset ausus, iuventis autem Romana histrionibus fabularum actu relicto inconditis suis nullaque lege impeditis ludis diu etiam delectaretur, sensim factum est, ut satirae scriberentur non quae agerentur sed quae legerentur, et eae quidem mixtae et rerum et versuum diversitate neque omnino prosam orationem, ut videntur, spernentes. Patet autem ex ipsa origine qualis saturarum fuerit natura; nam cum de certo argumento non ageretur, ex vita sermones petebantur, castigabantur aequales quo-

rum aut res gestae aut mores non placerent, laudabantur etiam qui laudem viderentur merere. Sed quoniam in vituperationem magis inclinatus humanus animus quam in laudem, in vellicandisque hominibus ioco risuique maior campus patebat, saturas plenas fuisse probabile est irrisu et contumeliosi saepe ludibrii. Ennius quoque Porphyrio teste (ad Horat. Sat. I, 10, 46) quatuor libros satirarum scripsisse fertur, quae si recte indicamus, mixtae fuerunt carmina, et severa et iocosa, diversis versuum generibus composita. Plurimum tamen ad excollandum hoc genus contulit *C. Lucilius*, eques Romanus, Suessae Auruncae a. u. c. 606 natus, cum, id quod sua maxime aetas ad luxuriam et voluptates iam propensior postulare videbatur, quaecunque in hominum vita aut bona aut mala inter se certant, in carminibus componeret, describeret, illustraret propositisque malorum hominum verissimis exemplis reliquos quid sequi deberent docere studeret. Is triginta libros satirarum scripsisse fertur; quamquam alii ipsum duobus libris edidisse carmina suspicantur, quos quidem postea grammatici in minores partes distraxerint, priorem in XXI minores libros, posteriorem in IX. Hunc imitatus est et superavit *Horatius*, quem de Lucilio iudicantem audimus Sat. I, 4. I, 10. II, 1. Post Horatium nominandi sunt *A. Persius Flaccus* et *Decimus Iunius Iuvenalis*.

Contentus vivat, laudet diversa sequentes?

O fortunati mercatores! gravis annis

Et ille quidem (natus prid. Non. Dec. anni p. Chr. 34. Volaterris, mortuus a. d. VIII. Kal. Dec. a. 62) acerrimo virtutis amore, vitiorum odio incensus, Stoicorum ceteris doctrinis deditissimus et magna quadam animi tristitia paene oppressus Neronis tempora non magis tolerare potuit quam Dec. Iuvenius Iuvenalis Domitiani corruptam aetatem postea tulit. Verum ut Persii nobilitatem animi sex satiris quae ad nos pervenerunt comprobant diligenter et admiramur, ita Iuvenalis sedecim satirae ingentem animi acerbilitatem, aetatis suae moribus omni vitio contaminatis procreant, Domitiani saevo imperio diu repressam, et quasi quandam in describendis pingendisque cuiusvis generis turpissimis flagitiis delectationem produnt. Iuvenalis vita nunc caligine quadam premittitur, sed suspicatus est *Heinrichius*, de interpretandis Iuvenalis satiris optime meritis, vixisse eum inde ab a. 42 p. Chr. usque ad a. 122. — Iam ut ad Horatium revertar, fuerunt qui ipsum poetam quattuor libros satirarum et epistolarum uno nomine *sermonum* comprehendisse (Epist. I, 4, 1. II, 2, 60) affirmarent; quibus cavendum est ne quis obtemperet. Manifestum est enim, eo ipso nomine (*sermonum*) Horatium et satiras et epistolas ut *sermoni* i. e. prosae orationi propiores (Sat. I, 4, 42) contra altius genus lyricorum carminum collocavisse, nunquam ut proprio quodam titulo inscripseris.

Satira I.

Horatium, qui iam puer contemplandis variis hominum studiis assuetus erat, haudquaquam fugere potuit communis omnium hominum omniumque aetatum de suae sortis iniquitate querela. Hanc igitur poeta risu et castigatione abundantem partim iocosa partim severa ratione reprehendit eiusque originem quaerendam esse docet in invidia, qua cum singulis quibusque hominibus certum quendam locum certumque officium natura et condicione attributa in iisque recte et fideliter explendis sum-

mam laudem unamque felicitatem cernendam esse nesciamus, nostra soleamus contemnere, aliena ut praestantiora laudare. Iam cum satiricum genus dramaticum esset, factum est ut Horatius et adversarium aliquem saepe statueret et vigore suae orationis ex vita sumptas tabulas legendum oculis proponeret. Cuius quidem rei egregium exemplum initium statim praebet huius satirae, quo loco bis composita habes vota veteris militis et mercatoris, iuris consulti urbanis negotiis occupati et agricolae urbanam vitam suae praeferentis. Iam cum quaeritur, unde fiat ut tam multi homines sua sorte non sint contenti, respondendum erit nimias esse hominum cupiditates, quibus plura etiam expetantur quam quibus ad bene vivendum opus sit; neque minui eas mutata sorte ac rerum statu; cupiditatibus autem curas nasci, curis desiderium alienae sortis. At habent etiam homines quo suas curas cupiditatesque excusatas atque probatas velint. Scilicet a) alii id tantum se curare aiunt ut senectutem sibi securam et placidam parent (v. 31); imitari se formicae exemplum quae aestate colligat quibus hieme vitam sustentet. Nae isti in colligendis quidem opibus formicae similes sunt, in fruendis dissimillimi, cum nunquam congestis fruuntur, aurum autem ipsum sine sapiente usu nullius sit pretii. cf. Carm. II, 2. (v. 50). Iam sunt b) alii, quibus suave videtur de magno sumere posse acervo. Qui quidem non minus stulti sunt (v. 60). Tum sunt c) qui suam agendi rationem excusaturi nihil satis esse affirmant, quoniam cum rebus etiam dignitas et auctoritas crescat. Quibus ita persuasum est, ii miseri sunt neque possunt sanari. Hi comparandi sunt cum Tantalo suavissimas fruges semper contemplanti sed perpetua fame vexato. Opes iis non commoda parant sed metum ac sollicitudinem. Nemo est qui tales homines amet, ne cognati quidem; nam ne ipsi quidem quemquam amant. Quo fit, ut in ipsa hominum societate ab omnibus destituantur, deserantur. v. 92. Quid igitur

- 5 Miles ait multo iam fractus membra labore.
 Contra mercator navem iactantibus Austris:
 Militia est potior. Quid enim? Concurritur; horae
 Momento cita mors venit aut victoria laeta.
 Agricolam laudat iuris legumque peritus,
 10 Sub galli cantum consultor ubi ostia pulsat.
 Ille, datis vadibus qui rure extractus in urbem est,
 Solos felices viventes clamat in urbe.
 Cetera de genere hoc, adeo sunt multa, loquacem
 Delassare valent Fabium. Ne te morer, audi
 15 Quo rem deducam. Si quis deus, En ego, dicat,
 Iam faciam quod vultis: eris tu, qui modo miles,
 Mercator; tu, consultus modo, rusticus; hinc vos,
 Vos hinc mutatis discedite partibus. Eia!

d) inde docemur? Desistendum aliquando a colligendis divitiis, fruendum tandem esse ne mala vita malum habeat exitum (v. 100). Neque propterea in contrarium vitium delabamur oportet, nam „est modus in rebus“ v. 106. Versu 117 respondetur ad primi versus interrogationem. Satira quando scripta sit ignoramus; probabile tamen est ex ultimis eam esse huius libri, et scriptam a. 719, non ita multo postquam primus liber Georg. Virgilii editus est; versus enim 114 sqq. apertam habent imitationem Virgil. Georg. I, 512 sqq. Is autem liber Virgilii a. 719 editus est.

V. 1. *sortem*] vitae genus. — *illa*] In codicibus legitur etiam *ulla*, quod ferri nequit propter relativum *quam*, quo demonstrativum requiritur. — *laudat*] Ex negante vocabulo *nemo* affirmans *quisque* per Zeugma intelligendum est. — *gravis annis*] Sic codices, quorum auctoritas non debuit cedere coniecturae Bouherii *armis*; quamquam *anni* non magis militiae sunt quam vitae. Significatur enim miles, qui multa stipendia meruit neque tamen tantum sibi paravit, ut „senex in otia tuta“ recedere posset. v. 31. cf. Virg. Aen. IX, 246. II, 435. Liv. X, 34, 12. Etiam particula *iam* Bouherii coniecturae repugnat. — *Austris*] Carm. III, 27, 21. IV, 14, 21. — *quid enim*] Sat. II, 3, 132. Apud Ciceronem semper sequitur altera interrogatio. — *cita*] Alii aut

cita: sed cf. 72 et 101. cf. Liv. XXI, 43: „hic vincendum aut moriendum, milites, est, ubi primum hosti occurreris.“ — *momento*] cf. Liv. IX, 16: „momentoque unius horae caesus Samnis, Satricanus captus et omnia in potestate consulis erant.“ — *iuris peritus*] Non est patronus causae vel orator, sed vir iuris scientia insignis qui vel in foro ambulans vel domi in atrio sedens de iure responsa dat. Epist. II, 1, 104. Cic. Mur. c. 9. Martial. I, 50, 35: „Non rumpet altum pallidus somnum reus, Sed mane totum dormies.“ — *vadibus*] Vades apud praetorem spondebant reum in iudicium sisti; quod ni fieret fore ut ipsi litis aestimationem sufferrent. Cic. de off. III, 10, 45. Proprie autem cum *vades* in re capitali essent, non in re civili, ii videntur recte h. l. intellexisse, qui rusticum *vadimonio facto* in urbem tractum existimant. Auson. Idyll. 12: „Quis subit in poenam capitali iudicio? vas. Quid, si lis fuerit nummaria? quis dabitur? praes.“ — *clamat*] fortiter contendit. Sat. II, 3, 130. Ep. II, 1, 80. — *Fabium*] Idem Sat. I, 2, 134. Stoicus aretalogus, quem equitem Romanum Naibonensem fuisse et aliquot libros ad Stoicam philosophiam pertinentes scripsisse Porphyrio scholiasta tradidit. — *valent*] vide ad Carm. I, 34, 12. — *eia*] est impatientis et adhortantis. Sat. II, 6, 23. — *Nolint*]

- Quid statis? — nolint. Atqui licet esse beatis.
 20 Quid causae est, merito quin illis Iuppiter ambas
 Iratus buccas inflet neque se fore posthac
 Tam facilem dicat, votis ut praebeat aurem?
 Praeterea, ne sic, ut qui iocularia, ridens
 Percurram, — quamquam ridentem dicere verum
 25 Quid vetat? ut pueris olim dant crustula blandi
 Doctores, elementa velint ut discere prima; —
 Sed tamen amoto quaeramus seria ludo.
 Ille gravem duro terram qui vertit aratro,
 Perfidus hic caupo, miles nautaeque, per omne
 30 Audaces mare qui currunt, hac mente laborem
 Sese ferre, senes ut in otia tuta recedant,
 Aiunt, cum sibi sint congesta cibaria; sicut
 Parvula, nam exemplo est, magni formica laboris
 Ore trahit quodcunque potest atque addit acervo
 35 Quem struit, haud ignara ac non incauta futuri.
 Quae, simul inversum contristat Aquarius annum,
 Non usquam prorepat et illis utitur ante

Est apodosis. cf. Sat. II, 7, 24. In codd. est etiam *nolunt* et *nolent*. — *beatis*] Zumpt. gr. §. 601. — *praeterea*] Tota sententia ἀνακολούθια est; abrupta per parenthesin oratio continuatur quidem particula *sed*, alia tamen ratione. Similis locus Cicer. Tusc. II, 1, 3. — *iocularia*] sc. percurrit. — *olim*] vide ad Carm. II, 10, 17. — *percurram*] Virg. Aen. VI, 627. H. I. cum obiecto careat idem est quod pergere usque ad finem. — *perfidus hic caupo*] Cum eisdem qui supra inducti sunt hic quoque nominandos putarent non pauci interpretes neque novum hunc cauponem, genus illud Romae frequentissimum, inferri tolerarent, in alia omnia discesserunt. Sed acriter tenenda illa est plurimorum et optimorum codicum lectio; *Fea* e codd. recepit *Perfidus hic campo miles*; eum secutus est *Iahnus*; coniecturas enumerare longum est. Nominantur homines qui lucrum sequuntur; quid inter hos iuris consultus, quem iniuria desiderarunt? Ne rusticus quidem idem

est qui v. 11 producebatur. Pronomina *ille*, *hic* exempla proponunt ex vita petita satisque frequentia. — *nautae*] mercatores. Carm. II, 13, 14. Epod. 17, 20. — *hac mente*] eo consilio cf. Sat. II, 2, 90. — *senes*] Senec. de brev. v. 4: „audies plerosque dicentes: a quinquagesimo in otium recedam, sexagesimus annus ab officio me dimittet.“ — *exemplo est*] cuius illi exemplo utuntur. Virg. Georg. I, 186. — *magni laboris*] vide ad Carm. I, 36, 13.

V. 36. *Quae*] At ea. — *Aquarius*] „Sol transit in Aquarium XVII. Kal. Februar.“ *Porphyrio*. Annus antiquis est circulus quem sol in coelo conficit; inde Horatius *inversum* annum dixit ad exemplum Homericorum περιπλομένην, περιτελλομένην, ἐνιαυτῶν. Macrobius. Sat. I, 14 p. 178 Gron. „Sicut *lunaris annus* mensis est, quia luna paulo minus quam mensem in Zodiaci circuitione consumit, ita *solis annus* est quem peragit, dum ad signum se denuo vertit ex quo digressus est: unde annus vertens vocatur.“ Senec.

- Quaesitis sapiens, cum te neque fervidus aestus
 Demoveat lucro neque hiems, ignis, mare, ferrum,
 40 Nil obstat tibi, dum ne sit te ditior alter.
 Quid iuvat immensum te argenti pondus et auri
 Furtim defossa timidum deponere terra?
 Quod si comminuas vilem redigatur ad assem.
 At, ni id fit, quid habet pulchri constructus acervus?
 45 Milia frumenti tua triverit area centum,
 Non tuus hoc capiet venter plus ac meus: ut si
 Reticulum panis venales inter onusto
 Forte vehas humero, nihilo plus accipias quam
 Qui nil portarit. Vel dic quid referat intra
 50 Naturae fines viventi, iugera centum an
 Mille aret? At suave est ex magno tollere acervo.
 Dum ex parvo nobis tantundem haurire relinquo,
 Cur tua plus laudes cumeris granaria nostris?
 Ut tibi si sit opus liquidi non amplius urna

Nat. Quaest. VII, 27: „Quid est quare in Leone semper sol ardeat et terras aestibus torreat, in Aquario astringat hiemem, flumina gelu claudat?“ — *sapiens*] Carm. I, 7, 17. Sat. II, 7, 73. Sic antiqui codices; in aliis etiam bonis crebra confusione *patiens*; male. — *dum te*] Ad unum ex multis conversa oratio ad vitam redit unde petita est. — *furtim*] Certabant interpretes, illud vocabulum utrum referendum sit ad *defossa* an ad *deponere*. Tu noli in partes dissecare *defossa deponere terra*. — *quod si*] Ex mente cupidorum hominum haec interponit Horatius ipse: *at id si*, ut supra v. 36. — *redigatur*] Modus est potentialis, quo idem efficitur, quod graeco optativo cum particula *av*. — *milia centum*] sc. modium. — *area*] cf. Carm. I, 1, 9. Virg. Georg. I, 298. Terebantur fruges equis vel bobus ad tribulum iunctis. — *hoc capiet*] Sat. I, 3, 93. I, 9, 8. De *ac* part. post adiectivi comparativum vide ad Epod. 15, 5. — *inter*] vide ad Carm. III, 3, 11. Inter servos qui cum domino iter faciunt, unus tantum est, cui imponitur reticulum panis; et tamen hic non plus accipiet quam reliqui. Eadem res avari

hominis. — *referat*] In dativo *viventi* non est haerendum. Similis est Taciti locus Ann. XV, 65: „non referre decori, si citharoedus demoveretur et tragoedus succederet.“ Non necessaria igitur Chabotii et Cuningamii coniectura *viventis*; *viventi* est dativus commodi. — *intra naturae fines*] Qui intra naturae fines vivit, is nec plus consumere gestit quam natura patitur nec alia quam quae natura efflagitat. Qua sententia avari eo facilius refelluntur, quo diligentius ab omnibus abstinent, quae non videntur quam maxime necessaria. — *at suave*] haec interponuntur ab avaro vel ex eius sententia. — *tantundem*] quantum tu ex magno acervo, i. e. quantum natura poscit. — *cumeris*] Epist. I, 7, 30. Videntur fuisse vasa viminea, in quibus frumenta condebantur. Cumerae pauperum sunt, granaria divitum. — *urna*] dimidia pars amphorae paulo maior fuit quam undecim modii (Quart) Berolinenses; *cyathus*, duodecima pars sextarii, magnitudinem vix aequiparat poculorum vitreorum quo vinum nos bibere solemus. — *malim*] Non consentiunt neque codices neque editiones; in aliis *malim*, in aliis *mallem*. Illud

- 55 Vel cyatho et dicas: Magno de flumine malim
 Quam ex hoc fonticulo tantundem sumere. Eo fit,
 Plenior ut si quos delectet copia iusto,
 Cum ripa simul avulsos ferat Aufidus acer.
 At qui tantuli eget quanto est opus, is neque limo
 60 Turbatam haurit aquam neque vitam amittit in undis.
 At bona pars hominum decepta cupidine falso,
 Nil satis est, inquit; quia tanti, quantum habeas, sis.
 Quid facias illi? Iubeas miserum esse, libenter
 Quatenus id facit: ut quidam memoratur Athenis
 65 Sordidus ac dives, populi contemnere voces
 Sic solitus: Populus me sibilat, at mihi plaudo
 Ipse domi, simul ac nummos contemplor in arca.
 Tantalus a labris sitiens fugientia captat
 Flumina Quid rides? Mutato nomine de te
 70 Fabula narratur: congestis undique saccis
 Indormis inhians et tanquam parcere sacris
 Cogeri aut pictis tanquam gaudere tabellis.
 Nescis quo valeat nummus? quem praebeat usum?
 Panis ematur, olus, vini sextarius; adde

rectius; quid enim quominus ad flumen eat talem hominem prohibet? *Aufidus* deinde infertur, quia patrio fluvio libenter poeta utitur. cf. Carm. III, 30, 10. IV, 14, 25. Species igitur pro genere et imago pro ipsa re posita est. Constantem se praebeuit poeta in imagine inchoata; Aufidus enim illatus ab eo est, quia antea avarus homo magnum flumen sibi magis placere dixit quam fonticulum.

V. 61. *cupidine*] vide ad Carm. II, 16, 15. — *bona pars*] est satis magna pars, ex qua unus deinde protractus et loquitur et refellitur (v. 63 *illi, miserum*). — *quia tanti*] Lucilius apud Schol. Iuv. 3, 143: „Quantum habeas, tantum ipse sies tantique habearis.“ Plut. *περί φιλοπλουτίας* c. 7: „*Κέθ-δαινε καὶ φείδου καὶ τοσούτου νό-μιζε σπαντὸν ἄξιον, ὅσον ἂν ἔχῃς*.“ — *facias*] cf. Cic. pro Caec. II, 30: „Quid huic tu homini facias?“ id. pro Sext. 13, 29: „Quid hoc homine facias?“ — *quatenus*] quoniam. Carm.

III, 24, 30. Sat. I, 3, 76. — *facit*] Generale hoc verbum in alterius verbi vicem ita substituitur ut nostrum *thun* et Graecum *ποιεῖν* (non *πράττειν* Stallb. ad Plat. Crit. p. 48. E.). Sat. I, 4, 79. Cic. de off. I, 1, 1. I, 38, 136. I, 40. 144. — *quidam memoratur*] Schol. explicant de Timone *μισανθρώπων*, glossa cod. Bland. nominat *Fabium* aliquem; sed nescio quid inanius sit quam in eiusmodi fabulis veritatem certosque et locos et homines quaerere. Et si sciremus, quid inde lucraremur? Non refellitur ab Horatio argumentum illud de crescente cum pecunia auctoritate, sed ostenditur eorum hominum miserrimus status, non ex populi contemptione sed ex perpetua fame, quae nunquam paratarum rerum usu restinguitur. Inde exemplum Tantali, cuius nomen solum nominatum avaro satis quid poeta velit ostendit. Ridet ille, cum nesciat quid ea ad se pertineat fabula. — *sacris*] Carm. III, 3, 52. Sat. II, 3, 110.

- 75 Quis humana sibi doleat natura negatis.
 An vigilare metu exanimem, noctesque diesque
 Formidare malos fures, incendia, servos,
 Ne te compilent fugientes, hoc iuvat? Horum
 Semper ego optarim pauperrimus esse bonorum.
- 80 At si condoluit tentatum frigore corpus
 Aut alius casus lecto te afflixit, habes qui
 Assideat, fomenta paret, medicum roget, ut te
 Suscitet ac natis reddat carisque propinquis?
 Non uxor salvum te vult, non filius; omnes
- 85 Vicini oderunt, noti, pueri atque puellae.
 Miraris, cum tu argento post omnia ponas,
 Si nemo praestet quem non merearis amorem?
 At si cognatos nullo natura labore
 Quos tibi dat retinere velis servareque amicos,
- 90 Infelix operam perdas, ut si quis asellum
 In campo doceat parentem currere frenis.

— *tabellis*] quae nullum usum praebent nisi adspectum. — *sextarius*] sexta pars congi, paulo maior quam dimidia pars modii Berolinensis ($\frac{1}{2}$ Quart = 29,0452 Kubz.). — *quis*] quibus. Menander p. 103. Mein.: „Τὰ γυναικῶν εἶναι μειράκιόν σοι φαίνεται Οὐ τῶν ἀναγκαίων κατ’ ἡμέραν μόνον τίμην παρασχεῖν δυνατόν, ἀλλ’ ἅλφιτον, ὅσους, ἐλαίον, μέλιτος ἢ ἄλλον τινός;“ — *bonorum*] quae quia curas habent et molestias mala potius dicenda sunt. Ironia efficitur certamine quod est inter *pauperrimus* et *bonorum*. De genitivo cf. Sat. II, 3, 142. Sic etiam *dives* c. gen. Carm. IV, 8, 5. Sat. I, 2, 74. Epist. II, 2, 31. — *frigus*] Sat. II, 3, 290. ibid. 163. — *afflixit*] Sic antiquissimi codices, alii *affixit*, quod cur praetulerint recentissimi editores satis causae esse non videtur. Vim aliquam casus in altero inesse aiunt, quae si quid video non abhorret ab hoc loco. Ovid. Met. XII, 139: „Cygnum Vi multa vertit terraeque afflixit Achilles.“ — *assideat*] ad lectum. — *suscitet*] a dormiente translatus verbum ad aegrotantem in lectuloque cubantem. Generalis eius verbi notio cernitur in commovendo ho-

mine aliquo quiescente, tam cubante quam sedente. cf. Carm. II, 10, 19. III, 27, 11. Virg. Aen. IX, 463. Ovid. Met. VIII, 643. — *pueri atque puellae*] ex proverbio, ut nos Jung und Alt. Sat. II, 3, 130. — *post omnia ponas*] Tmesis, ut Cic. de off. III, 17. Virg. Aen. I, 412. — *at si*] Etiam optimi et antiquissimi codd. dissentiunt; alii *at si*, alii *an si* habent; pauci etiam *ac si*. Quam varietatem interpretes coniecturis etiam auxerunt: *ut si*, *aut si*, *non si*. Refellit autem poeta avarum, qui cognatos quos ultro ei obtulit natura — ultro autem datis rebus quid gratius est avaro? — nulla etiam impensa amicos sibi servare velit, non magis stultus quam si quis asellum freno currere velit docere. Quare verba *nullo labore ἀπὸ χοιρῶν* posita sunt. — *in campo*] Martio, ubi equi exercebantur, cf. Carm. I, 8, 4. II, 9, 18. cf. III, 1, 11. Asinus autem ad equestrem cursum indocilis est. V. 92. *denique*] nos: kurz und gut, mit einem Worte. — *plus*] Metuunt homines paupertatem, opes quaerunt. Iam cum plus habent quam eo tempore quo maxime metuebant, minuendus etiam metus est. Sic Acron.: „cum

- Denique sit finis quaerendi, cumque habeas plus,
 Pauperiem metuas minus et finire laborem
 Incipias, parto quod avebas, ne facias quod
 95 Ummidius quidam, non longa est fabula, dives
 Ut metiretur nummos, ita sordidus, ut se
 Non unquam servo melius vestiret, ad usque
 Supremum tempus ne se penuria victus
 Opprimeret metuebat. At hunc liberta securi
 100 Divisit medium, fortissima Tyndaridarum.
 Quid mi igitur suades? Ut vivam Maenius? aut sic,
 Ut Nomentanus? Pergis pugnantia secum
 Frontibus adversis componere: non ego, avarum
 Cum veto te fieri, vappam iubeo ac nebulonem.
 105 Est inter Tanain quiddam socerumque Viselli.
 Est modus in rebus, sunt certi denique fines,
 Quos ultra citraque nequit consistere rectum.
 Illuc unde abii redeo, nemo ut avarus
 Se probet ac potius laudet diversa sequentes,
 110 Quodque aliena capella gerat distentius uber

aucta sit pecunia tua, minus iam debes paupertatem metuere, et labor tuus finem debet accipere, cum habeas acquisitum quantum optaveras. Habes enim, ait, quantum avidus fueras quaerere. — Intelligunt alii *plus quam opus est*, non bene. *Plus* et *minus* eadem ratione intelligenda sunt; tum si illud voluisset poeta suo more *plura* posuisset, ut Sat. II, 2, 109. Epist. II, 2, 196. — *facias*] Generale verbum est ut Germanicum *machen*, quo tota agendi et vivendi ratio significatur, non excluso tristi exitu. — *quidam*] Ingeniosa et facilis sed supervacanea et prava est Bentleii coniectura *qui tam*. — *Ummidius*] Est nomen Romanum, quod alias quoque reperitur. Alii cum Charisio grammatico *Nummidius*, quod nomen etiam in duobus Feae codicibus est, et fictum putant a nummis, *Silbermann*. — *metiretur*] cf. Xenoph. Hellen. III, 2, 27: „οἱ περὶ Ξενίαν τὸν λεγόμενον μεδίμνον ἀπομετρήσασθαι τὸ παρὰ τοῦ πατρὸς ἀργυρίον.“ Germanis idem proverbium est. — *divisit*

ut apud Virgil. Aen. IX, 750. Iocose igitur vel comice dictum non est. — *fortissima Tyndaridarum*] Masculina forma *Tyndaridae* utrumque sexum comprehendit; quare quod per synesin quandam femininum genus additur mirandum non est. Carm. I, 37, 21. Sat. I, 9, 4. Suet. Ner. 33: „Locusta venenariorum inclita.“ Iocose illa libertina appellatur fortissima earum mulierum, quae, ut olim Clytaemnestra Agamemnonem, viros trucidarunt. Iuvenal. 6, 657: Clytaemnestram nullus non vicus habebit. — *Maenius*] Hic et Nomentanus noti eius aetatis nepotes et ganeones. cf. Epist. I, 15, 26. Sat. II, 3, 175. De omissa particula *ut* (ut Maenius) cf. Epod. I, 34. — *vappam*] a vino corrupto ad hominem perditum translatum. — *Tanais*] hic spado fuit. Visellii socer herniosus. — *nemo ut*] Sic recte ex codicibus, quamquam in multis etiam antiquissimis *nemon ut*, ortum illud ex inepto hiatus timore. Nam intolerabilis hoc loco esset admirantis aut cum admiratione indi-

Tabescat, neque se maiori pauperiorum
 Turbae comparet, hunc atque hunc superare laboret.
 Sic festinanti semper locupletior obstat,
 Ut cum carceribus missos rapit ungula currus,
 115 Instat equis auriga suos vincentibus, illum
 Praeteritum temnens extremos inter euntem.
 Inde fit ut raro qui se vixisse beatum
 Dicat et exacto contentus tempore vita
 Cedat uti conviva satur reperire queamus.
 120 Iam satis est: ne me Crispini scrinia lippi
 Compilasse putes, verbum non amplius addam.

SATIRA II.

Ambubaiarum collegia, pharmacopolae,
 Mendici, mimae, balatronēs, hoc genus omne

gnantis exclamatio. De part. *ut vide* ad Carm. I, 9, 1. I, 14, 3. — *hunc atque hunc*] Uno superato alterum statim videt cui invidet. — *Sic festinanti*] Sic fit, ut obstat. Cui verborum coniunctioni non adversatur ea quae v. 117 sequitur ratiocinatio. Sententiarum ordo est hic: „sic fit, ut semper locupletior obstat, et inde fit, ut raro inveniat, qui beate se dicat vixisse.“ — *illum*] non equum, sed aurigam. — *temnens*] In pedestri oratione simplex rarissimum. Sat. II, 2, 38. Virg. Aen. VI, 620. VII, 236. — *Crispini*] Sat. I, 3, 139. II, 7, 45. I, 4, 14. Fuit philosophus Stoicus, qui quotiescunque potuit emendandos mores insulsis suis versiculis clamabat nomenque aretalogi ab aequalibus acceperat. Lippitudo eius non minus ad mentem referenda videtur quam ad oculos; quamquam his quoque laborasse eum necesse est. Ex frequenti lippitudinis mentione apud antiquos recte videtur concludi posse, fuisse aliquid ridiculi in eo oculorum morbo. De sua autem lippitudine Horatius non cogitavit nec impudentis est, quod, cum ipse interdum oculis laboraret, Crispinum ob idem vitium deridebat. Otiosa igitur est Bentleyi coniectura *lippum*. Ceterum quam frequens is morbus apud Romanos fuerit, videre licet

ex multis remediis, quae apud Plinium in Nat. Hist. nominantur. Admirabilis autem Horatius est propter egregiam inveniendi exitus artem, qua satiris et epistolis inexpectato quodam ioco finem saepe imposuit legentiumque animos grata affecit hilaritate.

Satira II.

Occasionem scribendae huius satirae accepisse videtur Horatius mortuo M. Tigellio, Sardo, qui musicae artis peritissimus propter raram vocem gratiosus fuerat apud C. Iulium Caesarem, Cleopatram, Octavianum; homo tamen pestilentior sua patria (Cic. Fam. VII, 24) et in facilitate parandarum opum maxime prodigus. Argumentum generali sententia proponitur v. 24, cui quattuor exemplis diversissimis, prodigi hominis et avari, nepotis et feneratoris, aditus paratur. Iam versum 24 bina iterum exemplorum paria sequuntur, ut inde a v. 28 generalis illa sententia quam sit vera in certa re, quantum maxime Romana civitas laborabat, demonstretur. De tempore quo satira scripta videatur non consentiunt viri docti. Hoc certum est, ante tertiam et quartam huius libri hanc compositam esse. Iam alii, qui sibi persuaserunt versu 25 ficto nomine Malchini vel Malitini Maecenatem vellicari, neque credunt

- Moestum ac sollicitum est cantoris morte Tigelli:
 Quippe benignus erat. Contra hic, ne prodigus esse
 5 Dicatur metuens, inopi dare nolit amico,
 Frigus quo duramque famem propellere possit.
 Hunc si perconteris, avi cur atque parentis
 Praeclaram ingrata stringat malus ingluvie rem,
 Omnia conductis coëmens obsonia nummis;
 10 Sordidus atque animi quod parvi nolit haberi
 Respondet: laudatur ab his, culpatur ab illis.
 Fufidius vappae famam timet ac nebulonis;
 Dives agris, dives positus in fenore nummis,
 Quinas hic capiti mercedes exsecat atque
 15 Quanto perditior quisque est, tanto acrius urget;
 Nomina sectatur modo sumpta veste virili

facere id potuisset Horatium in Maecenatis familiaritatem iam receptum, satiram anno 714 vel 715 attribuunt; alii ad a. 717 referendam putant. Quorum opinio mihi quidem probabilior videtur, quoniam satira tertia ante a. 717 haudquam scripta est (vide ib. v. 64) neque veri simile est hanc, cuius haud dubie in tertia ratio habetur, duobus vel tribus annis ante scriptam esse. Et vide infra ad v. 25.

V. 1. *ambubaiaarum*] Sunt „mulieres tibicinae lingua Syrorum: etenim Syris tibia sive symphonia ambubaia dicitur.“ Comm. Cruq. Compara אַמְבּוּבָא, plur. אַמְבּוּבָא. *Collegia* iocose dicta sunt, quasi his mulieribus, ut collegiis pontificum, angurum, aliorum, ex lege coire liceret. — *pharmacopolae*] medicorum quoddam genus circumforaneorum, qui per urbes circumsabant creduloque popello medicamenta venditabant. Cic. Cluent. 14: „Tum repente Anconitanum quendam L. Clodium pharmacopolam circumforaneum aggreditur.“ — *Mendici*] ἀγγύραι; harioli, Galli, quorum impudentia mendicandi summa fuisse traditur. Etiam Indaei Romae vagabantur mendicantes et quaestus causa hariolantes. — *balatrones*] scurrae, qui loquacitate divites delectabant. Inde Servilii cognomen Sat. II, 8, 21. — *Tigelli*] Hic Sardus diversus est ab Hermogene Tigellio, cuius mentio fit

in Satira quarta et decima huius libri. — *benignus*] ex sententia illorum hominum, re vero prodigus. — *ingrata*] quia nunquam satiatur. Lucret. III, 1016: „Deinde animi *ingratam* naturam pascere semper Atque *explere bonis rebus satiareque* nunquam.“ — *stringat*] deminuat, radat. „Sumpta metaphora a ramis quos stringimus, quando illos nudamus foliis“ Comm. Cruq. cf. Virg. Buc. 9, 61. — *omnia conductis*] *Conducere* h. l. est fenori sumere, ut Iuven. XI, 46: „Conducta pecunia Romae Et coram dominis consumitur.“ Compara Sat. II, 3, 224—230. Pers. VI, 21: „hic bona dente Grandia magnanimus peragit puer. — *animi parvi*] cf. Cic. off. I, 20: „nihil est tam angusti animi tamque parvi, quam amare divitias.“ — *Fufidius*] Feneratorem hunc hominem fuisse locus ipse docet; praeterea nihil de eo scimus. — *dives*] Idem versus est A. P. 421. — *capiti*] sorti, Capital. Sordidissimus homo quinas centesimas in singulos menses de sorte extorquet, *exsecat*: quo verbo bene castigatur crudelitas hominis quintuplicatam usuram (60 Procent) debitoribus exprimentis. — *nomina*] de re pecuniaria. Cic. Planc. 28: „nomen quod urget dissolvere.“ id. Rosc. Com. 1: „Non refert parva nomina in codices.“ de off. III, 14. — Etiam debitores nomina appellantur: Epist. II, 1, 105. Cic.

- Sub patribus duris tironum. Maxime, quis non,
Iuppiter! exclamat, simul atque audivit? At in se
Pro quaestu sumptum facit hic. Vix credere possis,
20 Quam sibi non sit amicus, ita ut pater ille, Terenti
Fabula quem miserum gnato vixisse fugato
Inducit, non se peius cruciaverit atque hic.
Si quis nunc quaerat: Quos res haec pertinet? illuc:
Dum vitant stulti vitia, in contraria currunt.
25 Malchinus tunicis demissis ambulat; est qui
Inguen ad obscenum subductis usque facetus:

Att. V, 21: „Nam aut *bono nomine* centesimis contentus erat, aut non bono quaternas centesimas sperabat.“ — *veste virili*] Lege Laetoria (Cic. off. III, 15) vetitum erat ne XXV annis minores stipulari possent. Quare feneratorum si perditis adolescentulis suo periculo pecuniam fenori darent, maiores etiam usuras expresserunt. — *Terenti*] In *Εαντοντιμωρομένην* Menedemus pater se cruciat dies noctesque, quod filium Cliniam nimia severitate eo egerit ut relicta domo in Asiam militatum iret. — *peius atque*] vide ad Epod. 15, 5. — *quo res*] Similis ad ipsam rem transeundi ratio Sat. 1, 1, 14 sq.

V. 25. *Malchinus*] Nomen fictum a graeco *μαλακός*, quo veteres etiam latini poetae usi sunt, ut Plaut. Mil. III, 1, 74: „cinaedus malacus.“ Qui ex aliis codicibus *Malthinus* vel *Maltinus* scribendum censuerunt, ab antiquo vocabulo *malta* i. e. *mollis* rependendum nomen docent. Scholiastis auctoribus *Maecenas* hoc nomine tangitur, qui teste Seneca ep. 115 soluta tunica per urbem ire solebat. Seneca l. 1: „Quomodo Maecenas vixerit, notius est quam ut narrari nunc debeat; quomodo *ambula*verit, quam delicatus fuerit, quam cupierit videri, quam vitia sua latere noluerit. Quid ergo? Non oratio eius aequae soluta est quam ipse *discinctus*?“ De qua re cum olim non esset dubitatum scrupulum nunc moverunt doctissimi viri, qui scurrilem et ab Horatii Maecenatisque coniunctione alienissimam putarent Maecenatis sub ficto nomine irrisiorem. Attamen et illa scholiastarum annotatio antiquitus tradita videtur

neque in ipso hoc loco quidquam est tam malignum aut contumeliosum ut Maecenas, sive coniunctus iam fuit cum Horatio sive non fuit, iure potuerit offendi. Nam „stulti prope omnes“ dicuntur Sat. II, 3, 32; cum quo loco cf. Sat. II, 3, 307. II, 7, 42. Deinde ne amicorum quidem vitis Horatius pepercit; id quod perspicuum est ex loco Sat. I, 3, 26, quem non sine huius loci ratione scriptum esse veri simile est. Praeterea ne hoc quidem recte concluditur, qui ita Maecenatem ipsum vituperaret eum nondum potuisse amicum fuisse Maecenatis. Nam si quid iniuriarum in hoc loco inerat, non minus inerat cum coniunctae ederentur satirae primi libri quam cum haec una scriberetur; ut idonea ex ea re inveniri non possit causa cur haec satira ante scripta esse debebat quam Horatius a Maecenate esset inter familiares receptus. — *tunicis dimissis*] solutis. cf. v. 99. Non videntur esse demissitiae vel talaras. Cic. in Cat. II, 10. — *ambulat*] vide ad Epod. 4, 5. Senec. Nat. Qu. VII, 31: „Tenero et molli incessu suspendimus gradum, non ambulamus, sed repimus.“ — *subductis*] Quintil. XI, 3, 138: „Cui lati clavi ius non erit ita cingatur, ut tunicae prioribus oris infra genua paulum, posterioribus ad medios poplites usque perveniant. Nam infra mulierum est, supra centurionum.“ Varro de vit. pop. Rom. ap. Non. de gen. vest.: „Postquam binas tunicas habere coeperunt, instituerunt vocare subuculam (virorum) et indusium (mulierum).“ — *facetus*] eleganter se vestitum esse putans. Sic Plaut. Most. I, 1, 41: „Non omnes possunt

- Pastillos Rufillus olet, Gargonius hircum.
 Nil medium est. Sunt qui nolint tetigisse nisi illas,
 Quarum subsuta talos tegat instita veste;
 30 Contra alius nullam nisi olenti in fornice stantem.
 Quidam notus homo cum exiret fornice, Macte
 Virtute esto, inquit sententia dia Catonis;
 Nam simul ac venas inflavit tetra libido,
 Huc iuvenes aequum est descendere, non alienas
 35 Permolere uxores. Nolim laudarier, inquit,
 Sic me, mirator cunni Cupiennius albi.
 Audire est operae pretium, procedere recte
 Qui moechis non vultis, ut omni parte laborent;
 Utque illis multo corrupta dolore voluptas,
 40 Atque haec rara, cadat dura inter saepe pericla.
 Hic se praecipitem tecto dedit, ille flagellis
 Ad mortem caesus, fugiens hic decedit acrem
 Praedonum in turbam, dedit hic pro corpore nummos,
 Hunc perminxerunt calones; quin etiam illud
 45 Accidit, ut quidam testes caudamque salacem
 Demeteret ferro. Iure omnes: Galba negabat.
 Tutior at quanto merx est in classe secunda,
 Libertinarum dico, Salustius in quas

olere unguenta exotica, si tu oles, neque tam *facetis*, quam tu vivis, vitiis.“ — *Pastillos*] cf. Sen. ep. 86: „Descripturus infamem et nimis notabilem deliciis Horatius quid ait? Pastillos cet.“ Martial. I, 87: „Ne gravis hesterno fragres, Fescennia, vino, *Pastillos* Cosmi luxuriosa voras.“ Hi homines satis noti fuerunt neque minimae dignitatis, ut eorum irrisio poetarum invidiam conflaverit. cf. Sat. I, 4, 91 sq. — *hircum*] foedum alarum odorem. Epist. I, 5, 29. Catull. 69, 5: „laedit te quaedam mala fabula, qua tibi fertur Valle sub alarum trux habitare caper.“ id. 71, 1: „Si quoui iure bono sacer alarum obstitit hircus.“ — *instita*] fasciola fimbriata in ima stola matronarum. — *laudarier*] vide ad Carm. IV, 11, 8. cf. infra 104. Sat. II, 8, 67. Epist. II, 1, 94. II, 2, 148.

— *Cupiennius*] C. Cupiennius Libo Cumanus Augusti familiaritate clarus. — *albi*] „Respexit ad stolam candidam, qua vestiebantur matronae; nam meretrices habebant nigram vestem.“ Comm. Cruq. — *audire*] „Urbane abutitur Ennianis versibus: Audire est operae pretium, procedere recte Qui rem Romanam Latiumque augescere vultis.“ *Schol.* — *moechis*] Sic optimi codices. Alii *moechos*, quem casum cur praeferas, ex Ennii loco idoneam causam non invenies. — *praedonum*] nocturno tempore per urbem grassantium.

V. 46. *Galba*] Ser. Galbam iuris peritum dicit Comment. Cruq., cui non obsecuti recentiores interpretes A. Galbam Octaviani scurrarum praetulerunt, non sufficiente causa. — *Salustius*] vide ad Carm. II, 2. Fuit qui

- Non minus insanit quam qui moechatur: at hic si,
 50 Qua res, qua ratio suaderet quaque modeste
 Munifico esse licet, vellet bonus atque benignus
 Esse, daret quantum satis esset nec sibi damno
 Dedecorique foret. Verum hoc se amplectitur uno,
 Hoc amat et laudat: Matronam nullam ego tango.
 55 Ut quondam Marsaeus, amator Originis ille,
 Qui patrium mimae donat fundumque laremque,
 Nil fuerit mi, inquit, cum uxoribus unquam alienis.
 Verum est cum mimis, est cum meretricibus, unde
 Fama malum gravius quam res trahit. An tibi abunde
 60 Personam satis est, non illud, quidquid ubique
 Officit, evitare? Bonam deperdere famam,
 Rem patris oblimare, malum est ubicunque. Quid inter
 Est in matrona, ancilla peccesve togata?
 Villius in Fausta Sullae gener, hoc miser uno
 65 Nomine deceptus, poenas dedit usque superque
 Quam satis est pugnīs caesus ferroque petitus,
 Exclusus fore, cum Longarenus foret intus.

historicum Salustium indicari vellet. At is decessit a. u. c. 719 iam quinquagenarius, ita ut in hoc iocus Horatii ineptus videatur. — *Marsaeus*] homo ignotus. — *donat*] praesens pro perfecto; non est syncope pro *donavit*. — *malum gravius*] Grave est malum patriam rem effundere, gravius famam corrumpere. — *Quid inter Est*] cf. Sat. I, 9, 51. II, 3, 117. Epist. II, 2, 93. 188. A. P. 290. 424. Lachm. ad Lucret. p. 82: „Dactylicos heroicis binos ita semper coniunxerunt, ut continua esset neque interrupta *συνάφεια*, ergo hic pedi sexto spondeus convenit, non trochaeus. Hoc certissimum est, perperam in Horat. Serm. I, 2, 62 plerosque scribere *quid inter* — *Est in matrona*“ — *peccesve*] Sic plurimi et antiquissimi codices in iisque omnes Cruquiani; quod quamquam insolitum est, tamen retinendum videtur. Sententia est: quid interest, sive in matrona sive in ancilla sive in togata pecces? Et brevius dictum est: quid interest, in matrona, in ancilla,

in togata pecces? Tibull. IV, 5, 20: „Quid refert *clamae palamve* roget?“ ubi Lachmannus et Disenus non scripserunt cum aliis *clamne palanne*. Eadem varietas infra Epist. I, 11, 3. — *Villius*] Faustae, Sullae filiae, Milonis uxoris adulter. Eiusdem mulieris moechus Longarenus videtur fuisse. Milo ipse, quem propter staturam sub Longareni nomine latere alii voluerunt, non potest intelligi. — *fore*] Singularis positio h. v. rarior est, sed cfr. Liv. VI, 34: „forem, ut mos est, virga percutere.“ Terent. Ad. II, 3, 11: „foris crepuit.“ — *opis*] antiquae pro *opum*. — *tuo vitio*] „utrum tua culpa labores an propter externam rerum necessitatem, quam superare non potes.“ — *Quare*] Haupt. obs. crit. p. 12. „Horatius in sermonibus (I, 2, 77. II, 3, 176) non abstinuit a causali *quare* in recta oratione posito pro eo quod est *propterea*, abstinuit in epistolis, atque in carminibus *quare* plane nusquam ab eo dictum est.“ — *Sit licet hoc*] Simplicissi-

- Huic si mutonis verbis mala tanta videntis
 Diceret haec animus: Quid vis tibi? Numquid ego a te
 70 Magno prognatum deposco consule cunnum
 Velatumque stola, mea cum conferbuit ira?
 Quid responderet? Magno patre nata puella est.
 At quanto meliora monet pugnantiaque istis
 Dives opis naturae suae, tu si modo recte
 75 Dispensare velis ac non fugienda petendis
 Immiscere. Tuo vitio rerumne labores,
 Nil referre putas? Quare ne poeniteat te,
 Desine matronas sectarier, unde laboris
 Plus haurire mali est quam ex re decerpere fructus.
 80 Nec magis huic inter niveos viridesque lapillos, —
 Sit licet hoc, Cerinthe, tuum, — tenerum est femur aut crus
 Rectius, atque etiam melius persaepe togatae est.
 Adde huc quod mercem sine fucis gestat, aperte
 Quod venale habet ostendit, nec si quid honesti est
 85 Iactat habetque palam, quaerit quo turpia celet.
 Regibus hic mos est: ubi equos mercantur, opertos
 Inspiciunt, ne, si facies ut saepe decora
 Molli fulta pede est, emptorem inducat hiantem,
 Quod pulchrae clunes, breve quod caput, ardua cervix.
 90 Hoc illi recte: ne corporis optima Lyncei
 Contemplere oculis, Hypsaea caecior illa
 Quae mala sunt spectes. O crus! o brachia! verum
 Depugis, nasuta, brevi latere ac pede longo est.
 Matronae praeter faciem nil cernere possis,

ma ratio haec est, ut *hoc* ad *lapillos* referatur; similis locus est infra v. 97. — *tuum*] Haec tua res sit, tibi relinquo. Cerinthus vanus homo fuisse videtur, qui externo vestitus splendore capi se pateretur. — *honesti*] pulchri. — *regibus*] vide ad Carm. I, 4, 14. Inde ab hoc versu in nonnullis codicibus nova incipit satira; male. — *hiantem*] cf. Sat. I, 1, 71. — *molli pede*] Non tenui et agiliore, sed infirmo ac debili. Diversus enim locus est Virg. Georg. III, 76. — *Hypsaea*] Plautia

Hypsaea, ita caeca, ut in proverbium abiret. Eius enim caecitas ponitur contra Lyncei aciem. Lynceus unus fuit ex Argonautis, filius Apharei, Messenius, qui tanta fuisse oculorum acie traditur, ut vel parietem visu penetraret. Occisus est a Polluce. — *depugis*] vide ad Carm. I, 5, 8. — *Cattia*] impudica mulier. — *hoc facit insanum*] Hoc referendum ad praecedentium verborum sententiam: interdicta petere. — *ciniflones*] „Ciniflones et cinerarii eadem significatione apud

95 Cetera, ni Catia est, demissa veste tegentis.

Si interdicta petes, vallo circumdata, — nam te

Hoc facit insanum, — multae tibi tum officient res,

Custodes, lectica, ciniflones, parasitae,

Ad talos stola demissa et circumdata palla,

100 Plurima, quae invideant pure apparere tibi rem.

Altera, nil obstat; Cois tibi paene videre est

Ut nudam, ne crure malo, ne sit pede turpi;

Metiri possis oculo latus. An tibi mavis

Insidias fieri pretiumque avellier ante

105 Quam mercem ostendi? „Leporem venator ut alta

In nive sectetur, positum sic tangere nolit,“

Cantat et apponit, „Meus est amor huic similis: nam

Transvolat in medio posita et fugientia captat.“

Hiscine versiculis speras tibi posse dolores

110 Atque aestus curasque graves e pectore pelli?

Nonne cupidinibus statuatur natura modum quem,

Quid latura sibi quid sit dolitura negatum,

Quaerere plus prodest et inane abscindere soldo?

Num, tibi cum fauces urit sitis, aurea quaeris

115 Pocula? num esuriens fastidis omnia praeter

Pavonem rhombumque? tument tibi cum inguina, num si

Ancilla aut verna est praesto puer, impetus in quem

Continuo fiat, malis tentigine rumpi?

antiquos habebantur, ab officio calami-
mistrorum in cinere calefaciendorum,
quibus matronae capillos crispabant.
Dicit autem ciniflones ab eo, quod in
cinerem flant ad ferrum calefacien-
dum.“ *Acro.* — *Altera*] Sententiae
filum abruptum ex imitatione sermo-
nis quotidiani. — *Cois*] cf. Sen. de
Benef. VII, 9: „Video sericas vestes,
si vestes vocandae sunt, in quibus ni-
hil est quo defendi aut corpus aut de-
nique pudor possit.“ — *Leporem ve-
nator*] Expressit epigramma Callimachi
33: „Ὀρχευτῆς, Ἐπίκνδες, ἐν οὐ-
ρεσι πάντα λαγῶν Διφᾶ καὶ πάσης
ἰχθυα δορκαλίδος, Στίβη καὶ νιφετῶ
κεχημένος· ἦν δὲ τις εἴπη· Τῇ
τοδὲ βέβληται θηρίον, οὐκ ἔλαβεν.

Χοῦμὸς ἔρως τοιόσδε. τὰ μὲν φεύ-
γοντα διώκειν Οἶδε, τὰ δ' ἐν μέσσοις
Κείμενα παρπέταται.“ Ex quo vi-
des quid sit *positum*. cf. tamen Sat.
II, 2, 23. — *pell]* Optimi codices
dissentiunt; in aliis *pell*, in aliis *tolli*;
utrumque sua natura rectum et aptum.
Pelli alliteratione videtur commendari.
— *quem*] Interrogativum in fine ver-
sus. Cf. Sat. II, 7, 104. II, 3, 187.
— *soldo*] De syncope vide ad Carm.
II, 2, 2. Solidum inani opponitur
splendori, ut Cic. de fin. I, 18: „Illi
negant bonum quidquam esse nisi ne-
scio quam illam umbram, quod appel-
lant honestum, non tam solido quam
splendido nomine.“ ibid. 21: „In qui-
bus nulla solida utilitas omnisque pue-

- Non ego; namque parabilem amo venerem facilemque.
 120 Illam „Post paulo“: „Sed pluris“: „Si exierit vir“
 Gallis, hanc Philodemus ait sibi, quae neque magno
 Stet pretio neque cunctetur, cum est iussa venire.
 Candida rectaque sit; munda hactenus, ut neque longa
 Nec magis alba velit, quam dat natura, videri.
 125 Haec ubi supposuit dextro corpus mihi laevum,
 Ilia et Egeria est; do nomen quodlibet illi,
 Nec vereor ne, dum futuo, vir rure recurrat,
 Ianua frangatur, latret canis, undique magno
 Pulsa domus strepitu resonet, vepallida lecto
 130 Desiliat mulier, miseram se conscia clamet,
 Cruribus haec metuat, doti deprensa, egomet mi.
 Discincta tunica fugiendum est ac pede nudo,
 Ne nummi pereant aut puga aut denique fama.
 Deprendi miserum est; Fabio vel iudice vincam.

SATIRA III.

Omnibus hoc vitium est cantoribus, inter amicos
 Ut nunquam inducant animum cantare rogati,

rilis est delectatio.“ — *pavonem*] vide ad Sat. II, 2; 23. — *rhombum*] cf. Epod. 2, 50. — *Philodemus*] Epiœureus philosophus et poeta, Ciceronis aequalis. — *Gallis*] Cybelae sacerdotibus castratis. — *candida*] ut statim *alba* de grato faciei colore. Epod. 11, 27. — *Ilia et Egeria*] nobilissima et antiquissima nomina. — *vepallida*] vide ad Carm. I, 5, 8. — *conscia*] ancilla conciliatrix. — *cruribus*] Infidelibus servis crudeles domini crura saepe frangebant. — *doti*] Mulieres adulterii convictae dotis parte multabantur. — *Fabio*] Sat. I, 1, 14. Is etiam, qui verborum linguaeque certamine nemini unquam cessit, hoc verum esse concedet ipse fortasse expertus.

Satira III.

Patet ex v. 63 (*saepe*) Horatium cum haec satira scriberetur in amicitiam Maecenatis fuisse iam receptum; amplius nihil poterit de tempore affirmari; modo teneatur haud ita magnum

spatium intercedere potuisse inter hanc et superiorem. Familiaritatem Horatii cum Maecenate tota satira declarat, in qua nihil est timiditatis aut incertae sese gerendi rationis. Scribendae autem huius satirae causam et voluntatem ipsa altera praebuisse videtur, quippe qua castigatis multorum hominum perversitatibus non paucos sibi adversarios excitasset poeta, clamantes eos quidem malignum eum esse hominem qui ne ab amicorum quidem parvis vitiis abstinuerit Maecenatique illudere ausus sit. Quare nunc ostendit quales homines esse soleant, qui sua vitia non videntes alios maligne vituperent, quidque discriminis intersit inter sinceram etiam amicorum reprehensionem correctionemque et malignum levissima vitia augendi efferendique studium. Cui pravitati cum excusatio quaeri saltem possit in Stoicorum philosophia, poeta eo ultro ducitur, ut doceat, eius sectae nimis severam disciplinam, qua omnia peccata aequa-

- Iniussi nunquam desistant. Sardus habebat
 Ille Tigellius hoc. Caesar, qui cogere posset,
 5 Si peteret per amicitiam patris atque suam, non
 Quidquam proficeret; si collibuisset, ab ovo
 Usque ad mala citaret. Io Bacche! modo summa
 Voce, modo hac resonat quae chordis quattuor ima.
 Nil aequale homini fuit illi: saepe velut qui
 10 Currebat fugiens hostem, persaepe velut qui
 Iunonis sacra ferret; habebat saepe ducentos,
 Saepe decem servos; modo reges atque tetrarchas,
 Omnia magna loquens, modo: Sit mihi mensa tripes et
 Concha salis puri et toga, quae defendere frigus
 15 Quamvis crassa queat. Decies centena dedisses

lia esse contenderunt (v. 76), opposita Epicureorum doctrina (v. 99—112) ab humani generis ratione et vita non minus alienam et remotam esse quam miram illam Stoicorum de perfecto sapiente sententiam. Iam cum haec satira scripta sit eo consilio, ne altera in posterum prave intelligeretur, ab eodem Tigellio Sardo paulo ante mortuo initium cepit eiusque miros mores perpetuamque vivendi inconstantiam lepide descripsit, ut ab hoc semel vituperato ad suam rem communemque hominum invidendi aliosque vellicandi consuetudinem viam sibi muniret. De iocoso exitu vide quae sunt adnotata ad finem primae satirae.

V. 2. *cantare*] utrimque pendet et ab *induc. animum* et ab *rogati*. — *habebat*] Non recte ex hoc imperfecto nonnulli concluderunt, Tigellium iam *pridem* mortuum fuisse. Quod secus est; neque enim quidquam eius rei in imperfecto tempore inest neque poeta *pridem* mortui nomine et moribus sic uti potuit. Ad significationem v. habendi cf. Cic. Phil. II, 32: „Habebat hoc omnino Caesar“; intellige hoc moris, consuetudinis; hoc mirum, singulare. — *Caesar*] Octavianus. — *ab ovo*] „Ovum initium coenae erat, quippe quod in gustatione statim a balneis offerebatur; poma vero cum bellariis in secundis mensis erant.“ *Schol.* — *Io Bacche*] Significatur cantilena convivalis, cuius strophae iterato hoc versu, ut videtur, claudiebantur (Re-

frain). Posterior syllaba v. *Bacche* in arsi producta est; quod noli mirari, quia haec verba, quae velut obiectum quod vocatur a verbo *citaret* pendent, ex ipsa cantilena convivali in hunc versum recepta sunt et cessationem quandam vocis post se efficiunt. Quare exemplum Hauptii non est imitandum, qui Lachmanni (ad Lucret. p. 75 sq.) auctoritatem secutus Turnebi coniecturam *io Bacchae* recipere non dubitavit. — *modo summa*] „Tigellius modo utebatur ea voce, quae summa chorda tetrachordi, τῇ ὑπέρτῃ, resonat i. e. gravissima τῇ βαρυτάτῃ; modo ea quae ima chorda, τῇ νήτῃ, eademque acutissima, τῇ ὀξύτάτῃ resonat.“ *Gesner.* — *chordis*] est ablativus instrumenti; nam *resonare chordis* est *prodire ex chordis*. — *Iunonis sacra*] Cic. off. I, 36. *Κανηφόροι* sacra capite portantes lento gradu incedebant. Sat. II, 8, 13. — *decem servos*] admodum parvus numerus. cf. Sat. II, 7, 118. I, 6, 116. I, 6, 107. Valer. Max. IV, 4, 11: „M. Scaurus quantulam a patre hereditatem acceperit, in primo libro eorum, quae de vita sua scripsit, refert. Ait enim sibi *decem sola* mancipia, totumque census centum quinque ac triginta milium nummum relictum.“ — *modo reges*] Modo nihil nisi magna loquens amicitiam suam cum regibus magnisque viris iactabat, modo minima etiam sibi sufficere dictitabat. — *omnia magna*] modo de regibus et tetrarchis

- Huic parco paucis contento, quinque diebus
 Nil erat in oculis. Noctes vigilabat ad ipsum
 Mane, diem totum stertebat. Nil fuit unquam
 Sic impar sibi. Nunc aliquis dicat mihi: Quid tu?
 20 Nullane habes vitia? Immo alia et fortasse minora.
 Maenius absentem Novium cum carperet: Heus tu,
 Quidam ait, ignoras te? an ut ignotum dare nobis
 Verba putas? Egomet mi ignosco, Maenius inquit.
 Stultus et improbus hic amor est dignusque notari.
 25 Cum tua pervideas oculis mala lippus inunctis,
 Cur in amicorum vitiis tam cernis acutum,
 Quam aut aquila aut serpens Epidaurius? At tibi contra
 Evenit, inquirant vitia ut tua rursus et illi.
 Iracundior est paulo, minus aptus acutis

narrabat, nihil denique nisi magna in ore habens. — *decies centena*] sc. milia sesterium; quae ad nostram rationem redacta efficiunt fere 95456 flor. Rhen. Martial. I, 104: „Si dederint superi decies mihi milia centum.“ Ex proverbio est, ut nos eine Million. — *impar*] Senec. epist. 121: „Omnes isti tales sunt, qualem hunc describit Horatius Flaccus, nunquam eundem nec similem quidem sibi; adeo in diversum aberrat.“

V. 20. *et fortasse*] Sic recte scribitur ex omnibus prope codicibus, altera lectio *haud fort.* unius tantum codicis auctoritate sustentatur. „Habeo, inquit, vitia sed alia et nisi fallor minora, non tanta vituperatione digna.“ Sat. I, 4, 130. I, 6, 65. Iam sic videtur poeta pergere: „quod quidem cum intelligam, neque mihi ipsi ignosco et aliorum vitiis libenter veniam dare soleo; nam bene perspexi omnia vitia paria non esse, immo alia severe quamquam non maligne reprehendi, aliis benevole ignosci debere.“ In quo loco ne arrogantiae ac superbiae Horatium accusas, consideres velim antiquos homines alienissimos semper fuisse a fucata illa et simulata modestia qua nostra aetas immerito gloriari saepe solet, deinde Tigellii vitia quae vituperasset poeta non solum non parva fuisse sed quae totam hominis vitam temeritati et cupiditatibus obnoxiam

omnemque operam et laborem irritum vanumque redderent. — *Novium*] potest esse fenerator Novius ex Sat. I, 6, 121. — *Maenius*] Sat. I, 1, 101. — *pervideas*] Recte sic codices praeter duos, in quibus *praevidas*, quod quibus placuit interpretantur *praetervideas*, nulla sane auctoritate adiuti. *Pervideas* eo ipso quod certare videtur cum *oculis lippus inunctis* praefendum est. Est Oxymoron; qui lippis oculis pervidet, is male pervidet, parum pervidet. Ceterum non bene ex nonnullis codicibus alii receperunt *male lippus*, ut v. 31 *male laxis*. *Mala* sunt vitia, ut Ep. II, 2, 126. — *Epidaurius*] Epidauri templum fuit Aesculapii, cui sacri serpentes. — *iracundior est*] Rectius esse praecipit hominum parva vitia patienter ferre et ponderandis etiam magnis saepe virtutibus benevole compensare. Suo igitur more hominis aliquam imaginem exprimit, ad quam efficiendam putant lineamenta quaedam suorum morum (Sat. II, 3, 323. Epist. I, 1, 94. I, 20, 25) eum admiscuisse. Quod cum de vitiis possit concedi, de virtutibus non potest; nam siquidem ingenium sibi esse nunquam negavit (Carm. II, 18, 9. III, 30.) Horatius, tamen ingens sibi ingenium (v. 33) non magis unquam, nedum hoc tempore, arrogavit quam singularem animi bonitatem, ut alium quemquam meliorem se au-

- 30 Naribus horum hominum; rideri possit eo quod
 Rusticius tonso toga defluit et male laxus
 In pede calceus haeret: at est bonus, ut melior vir
 Non alius quisquam, at tibi amicus, at ingenium ingens
 Inculto latet hoc sub corpore. Denique te ipsum
 35 Concute, num qua tibi vitiorum inseverit olim
 Natura aut etiam consuetudo mala; namque
 Neglectis urenda filix innascitur agris.
 Illuc praevertamur, amatorem quod amicae
 Turpia decipiunt caecum vitia, aut etiam ipsa haec
 40 Delectant, veluti Balbinum polypus Hagnae.
 Vellem in amicitia sic erraremus et isti
 Errori nomen virtus posuisset honestum.
 At pater ut gnati, sic nos debemus amici
 Si quod sit vitium non fastidire: strabonem
 45 Appellat paetum pater, et pullum, male parvus
 Si cui filius est; ut abortivus fuit olim
 Sisyphus; hunc varum distortis cruribus, illum

deret negare. Peius etiam est quod apud Acronem legitur: „Hic dicitur pulsare Virgilium, qui indecori corporis et habitus fuit.“ — *acutis naribus*] quibus minima etiam aliorum vitia odorantur. — *horum hominum*] i. e. quales nunc esse solent. — *male laxus*] vide ad Carm. IV, 12, 7. et ad Sat. I, 4, 66. — *tibi*] Fictus significatur adversarius. — *Concute*] idem quod *excute*, quo libentius utebantur prosae orationis scriptores. Dicimus enim excutere vestem alicuius hominis, ut si quid ibi celatum sit id excidat. Arrian. Epict. 3, 14, 3: „περίβλεψαι, ἐν εἰσθῆτι, ἵνα γνῶς τίς εἶ.“

V. 38. *praevertamur*] Praeverti est altera re relicta ad alteram sese convertere, ut hanc habeamus sententiarum iuncturam: „Iam cum nemo sit qui purum se liberumque vitiis dicere possit, summa lenitas adhibenda est in iudicandis amicorum vitiis imitandumque exemplum amantium, quibus amatorum hominum etiam pravitates placent, aut certe parentum, qui puerorum vitia blandis saepe nominibus celare student. — *polypus*] „Primam

syllabam Latini poetae constanter producunt, Aeolicam illi formam, quae *πῶλνπος* est, sequentes.“ — Meineke Fragm. Com. I. p. 256. Est autem vitium foetidum ipsarum narium. Iam animadvertenda est satirica acerbitas in ipso exemplo; dicunt enim significari L. Coelium Balbinum, qui hoc tempore proscripius, postea reversus a. u. c. 724 consul suffectus est. Hagna libertinae nomen. — *honestum*] Nam ii quibus sensus est aequi bonique, eam inter amantes lenitatem non possunt non probare. — *At pater*] Etiam si adamare non possumus amicorum vitia, tamen non fastidire ea, sed quantum possumus celare debemus. — *strabonem*] „Strabo dicitur qui est detortis oculis; paetus autem qui est oculis leniter declinatis cuique huc atque illuc tremuli celeriter volvuntur.“ — *Comm. Cruq.* — *pullum*] „Antiqui puerum, quem quis amabat, pullum eius dicebant.“ — *Festus*. Ceterum haec nomina, quibus patres filiorum vitia vel pravitates celare student, omnia sunt cognomina Romanarum familiarum, in quibus erant Paeti, Pulli, Vari, Stra-

- Balbutit scaurum pravis fultum male talis.
 Parcius hic vivit: frugi dicatur. Ineptus
 50 Et iactantior hic paulo est: concinnus amicis
 Postulat ut videatur. At est truculentior atque
 Plus aequo liber: simplex fortisque habeatur.
 Caldior est: acres inter numeretur. Opinor,
 Haec res et iungit iunctos et servat amicos.
 55 At nos virtutes ipsas invertimus atque
 Sincerum cupimus vas incrustare. Probus quis
 Nobiscum vivit, multum demissus homo ille:
 Tardo cognomen, pingui damus. Hic fugit omnes
 Insidias nullique malo latus obdit apertum,
 60 Cum genus hoc inter vitae versetur, ubi acris
 Invidia atque vigent ubi crimina: pro bene sano
 Ac non incauto fictum astutumque vocamus.
 Simplicior quis et est, qualem me saepe libenter

bones, Scauri. — *Sisyphus*] M. Antonii triumviri pumilio fuisse dicitur, ob calliditatem hoc nomine ornatus. — *balbutit*] infantes imitans. Varus est cuius pedes introrsum retorti sunt, scaurus qui talos habet exstantes vel inversos et tortuosos. (Klumpfuss). — *ineptus*] Cic. de Orat. II, 4, 17: „Qui aut tempus quid postulet non videt, aut plura loquitur, aut se ostentat, aut eorum quibuscum est vel dignitatis vel commodi rationem non habet, aut denique in aliquo genere aut inconcinnus aut multus est, is ineptus dicitur.“ — *concinnus*] „Si ineptus est et paulo iactantior, tu eum excusa dicens: officiosa sedulitate amicis sese studet commendare.“ — *simplex*] Contrarius est *duplex*, ut Carm. I, 6, 7. Simplex ut sentit ita loquitur. — *inter*] vide ad Carm. III, 3, 11. — *opinor*] Praeter hunc tribus locis apud Horatium legitur Sat. I, 7, 2. Epist. I, 16, 78. II, 2, 17; ubique verum claudit, nimirum eo consilio ut insigni loco ironica eius verbi vis augeatur. — *incrustare*] „Adeo per-versi sumus, ut et purum vas corrupto aliquo liquore eiusque faecibus obducere cupiamus.“ *Orellius*. Homines igitur aliorum mores non tales iudicare

solent, quales sunt, sed in praviorem speciem a se maligne conversos; cuius iam rei exempla adduntur.

V. 57. *ille*] Restitui nunc scripturam codicis Bland. omnium vetustissimi, neque addidi quod contra codices Bentleyo placuit *tardo ac* vel Hauptio *tardo et*; sententia enim sic optime procedit per asyndeton, quae additis particulis haec est: si quis probus (*simplex*) nobiscum vivit, si ille est multum demissus (*modestus*) homo, *tardo* ei, pingui cognomen illico damus. Ut protasis, ita apodosis bipartita est; neutrius tamen partes coniunctionibus inter se copulatae sunt. cf. Cic. Mur. 40: „Sit apud vos *modestiae* locus, sit *demissis hominibus* perfugium, sit auxilium *pudori*.“ id. Or. II, 43: „Ea omnia, quae proborum, *demissorum*, non aerium, non pertinacium, non litigiosorum, non acerborum sunt, benevolentiam conciliant.“ — *multum*] vide ad Carm. I, 25, 5. — *fictum*] Is est fictus qui se ipse fingit, talem se non praebet qualis est. — *qualem me*] i. e. qualem me tibi saepe obtuli et libenter obtuli, ut ne nunc quidem poeniteat. *Libenter* est sponte, consulto, ut Sat. I, 1, 63. Simplicem igitur et rectum neque nimis falsae cuiusdam

- Obtulerim tibi, Maecenas, ut forte legentem
 65 Aut tacitum impellat quovis sermone molestus:
 Communi sensu plane caret, iniquimus. Eheu
 Quam temere in nosmet legem sancimus iniquam!
 Nam vitiis nemo sine nascitur; optimus ille est,
 Qui minimis urgetur. Amicus dulcis ut aequum est,
 70 Cum mea compenset vitiis bona, pluribus hisce,
 Si modo plura mihi bona sunt, inclinet, amari
 Si volet: hac lege in trutina ponetur eadem.
 Qui ne tuberibus propriis offendat amicum
 Postulat, ignoscet verrucis illius: aequum est,
 75 Peccatis veniam poscentem reddere rursus.
 Denique, quatenus excidi penitus vitium irae,
 Cetera item nequeunt stultis haerentia, cur non
 Ponderibus modulisque suis ratio utitur, ac res
 Ut quaeque est, ita suppliciis delicta coercet?
 80 Si quis eum servum, patinam qui tollere iussus
 Semesos pisces tepidumque ligurierit ius,
 In cruce suffigat, Labeone insanius inter
 Sanos dicatur. Quanto hoc furiosius atque

urbanitatis legibus obsequentem se esse apud Maecenatem dicit poeta, quo clarius sua familiaritas ab omni assentatione et adulatione libera eluceat. *Simplex* enim est, qui non anxie circumspicit, quid dicat, quid faciat, qui sincere ac libere sensus suos aperit. Ceterum *Horkelius* (Anal. Horat. p. 39), ne rusticitas potius quam simplicitas in hoc loco retineatur, coniectura locum sanare non dubitavit *licenter*: „ut Horatium pristinos errores ipsum improbasse plenius intelligamus.“ Sed nec rusticitatis quidquam in his verbis inest et videndum, ne quid ipsa ista excusatione addatur, quod non minus alienum sit ab Horatii cum Maecenate familiaritate quam a totius loci natura. — *Communi sensu*] eius quod decet. Quint. I, 2, 20: „Sensum ipsum, qui communis dicitur, ubi discet, cum se a congressu; qui non hominibus solum sed mutis quoque animalibus naturalis est, segregarit?“ — *amicus dulcis*] vide ad Carm. I, 16, 23.

— *cum mea compenset*] *Cum* non est praepositio sed coniunctio. *Compensare* enim verbum duplici ratione potest coniungi, ut mutandi quoque verba, de quibus vide ad Carm. I, 17, 2. Cf. Ovid. Her. 3, 51: „Tot tamen amissis te compensavimus unum.“ — *Ut aequum est* in fine versus posita sunt et ne seiungantur ab adi. *dulcis* et quo efficaciora reddantur, ut v. 74. — *hac lege*] Videnda lex in verbis *pluribus hisce inclinet*, non in vv. 73 sq., qui rationis reddendae causa adduntur. — *quatenus*] vide ad Sat. I, 1, 64. — *stultis*] ex sententia Stoicorum omnes stulti sumus praeter vere sapientem. Sat. II, 3, 32. Qualem Stoici vere sapientem cogitaverint, lege apud Ciceron. de off. III, 4. — *Si quis*] Est argumentum a minori ad maius. — *Labeone*] M. Antistius Labeo, postea clarissimus Ictus, tum iuvenis servum, qui nescimus quid parvum commiserat, crudelissima poena affectisse videtur. — *inter sanos*] i. q. a sanis. — *hoc*] quod statim dicam.

- Maius peccatum est! Paulum deliquit amicus,
 85 (Quod nisi concedas, habere insuavis): acerbus
 Odisti et fugis ut Rusonem debitor aeris;
 Qui nisi, cum tristes misero venere Kalendae,
 Mercedem aut nummos unde unde extricat, amaras
 Porrecto iugulo historias captivus ut audit.
 90 Comminxit lectum potus mensave catillum
 Euandri manibus tritum deiecit: ob hanc rem,
 Aut positum ante mea quia pullum in parte catini
 Sustulit esuriens, minus hoc iucundus amicus
 Sit mihi? Quid faciam, si furtum fecerit, aut si
 95 Prodiderit commissa fide sponsumve negarit?
 Quis paria esse fere placuit peccata, laborant,
 Cum ventum ad verum est; sensus moresque repugnant
 Atque ipsa utilitas, iusti prope mater et aequi.
 Cum prorpserunt primis animalia terris,
 100 Mutum et turpe pecus, glandem atque cubilia propter
 Unguibus et pugnīs, dein fustibus, atque ita porro
 Pugnabant armis, quae post fabricaverat usus,
 Donec verba, quibus voces sensusque notarent,
 Nominaque invenere; dehinc absistere bello,
 105 Oppida coeperunt munire et ponere leges,
 Ne quis fur esset neu latro neu quis adulter.

— *Rusonem*] „Octavius Ruso acerbus fenerator esse traditur; idem scriptor historiarum.“ *Schol.* — *Kalendae*] vide ad Epod. 2 fin. Ceterum cf. A. P. 474. — *audit*] Debitores coacti sunt tristi recitationi Rusonis adesse, ne crudelem feneratorum offendant. — *Euandri*] prisci illius regis. Romani enim antiquorum vasorum cupidissimi erant. Sat. II, 3, 20. Mart. VIII, 6, 7 sqq.: „Hoc cratere ferox commisit proelia Rhoecus Cum Lapithis: pugna debile cernis opus; Hi duo longaevo censentur Nestore fundi: Pollice de Pylio trita columba nitet.“ — *mea quia pullum*] Negligentior qui videtur ordo verborum restituitur caesurae ope, qua *mea in parte* facile coniunguntur. — *ante*] adverbialiter, ut Tibull. I, 1, 13: „Et quod-

cunque mihi pomum novus educat annus, Libatum agricolae ponitur ante deo.“ id. II, 5, 98: „coronatus stabit et ante calix. — *fide*] vide ad Carm. III, 7, 4. — *quis*] quibus. De hac Stoicorum sententia cf. Cic. de fin. IV, 19, 55; „recte facta omnia aequalia, omnia peccata paria; quae cum magnifice primo dici viderentur, considerata minus probantur; sensus enim cuiusque et natura rerum atque ipsa veritas clamabat quodammodo, non posse adduci, ut inter eas res, quas Zeno exaequaret, nihil interesset.“ — *fere*] ut graecum *σχεδόν*; cf. Epist. I, 6, 9. 17, 24. II, 1, 236. Stoicorum rigida sententia addita particula lenitur. — *ad verum*] relicta sterili doctrina ad ipsam vitam. — *primis terris*] novis. —

- Nam fuit ante Helenam cunnus teterrima belli
 Causa, sed ignotis perierunt mortibus illi,
 Quos venerem incertam rapientes more ferarum
 110 Viribus editior caedebat, ut in grege taurus.
 Iura inventa metu iniusti fateare necesse est,
 Tempora si fastosque velis evolvere mundi.
 Nec natura potest iusto secernere iniquum,
 Dividit ut bona diversis, fugienda petendis;
 115 Nec vincet ratio hoc, tantundem ut peccet idemque,
 Qui teneros caules alieni fregerit horti
 Et qui nocturnus sacra divum legerit. Adsit
 Regula, peccatis quae poenas irroget aequas,
 Ne scutica dignum horribili sectere flagello.
 120 Nam ut ferula caedas meritum maiora subire
 Verbera, non vereor, cum dicas esse pares res
 Furta latrociniis et magnis parva mineris
 Falce recisurum simili te, si tibi regnum
 Permittant homines. Si dives, qui sapiens est,
 125 Et sutor bonus et solus formosus et est rex;

ignotis mortibus] cf. Carm. IV, 9, 13 sqq. Numerus pluralis ad res plures et diverso tempore gestas est accommodatus. — *editior*] i. e. superior; cuius significationis aliud exemplum vix reperitur. — *iura inventa*] Ex Epicuri sententia; nam Stoici τὸ δίκαιόν φασί φύσει εἶναι καὶ μὴ θέσει.

V. 115. *ratio*] Ratione nitebantur Stoici ad evincendam suam sententiam. Sat. II, 3, 225. *Vincere* est adversarium vincendo demonstrare; sic apud Cic. Cluent. 44, 124: „Vince deinde, bonum virum fuisse Oppianicum.“ Graece: οὐδὲ αἰσθήσει ὁ λόγος. — *sacra legerit*] inde sacrilegus. — *Nam ut ferula*] „Nam ne graviora lenioribus poenis coerceas, illud profecto non est timendum.“ Non offendendum in particula *ut*, quam tu noli coniungere cum verbo *vereor*. Cui verbo cum addideris *illud*, omnia bene se habent ad exemplum huiusmodi sententiae: Cic. de divin. II, 31, 66: „De ipso Roscio potest illud quidem esse falsum, ut circumligatus fuerit angui; sed ut in cunis fuerit anguis, non tam est mi-

rum.“ cf. Liv. XXVIII, 22: „Nihil minus quam ut egredi moenibus auderent timeri poterat.“ — *magnis parva*] Vide quam sit brevis et concisa lingua Latina. Simili enim ratione atque ea, quam ad Carm. II, 6, 14 observavimus, haec posita sunt: „parva mineris simili te falce recisurum ei falci quae magna.“ *Recidere* est nimia et exuberantia caedendo rem ad iustum modum reducere. — *regnum*] Epist. I, 1, 106 sqq. Cic. Acad. 2, 44: „Xenocrates et Aristoteles unquam dicerent sapientes solos reges? solos divites? solos formosos? omnia quae ubique essent, sapientis esse?“ Plutarch. de tranq. an. 12: „Ἐνιοι τοὺς μὲν Στωϊκοὺς οἴονται παῖζειν, ὅταν ἀκούσωσι τὸν σοφὸν παρ' αὐτοῖς μὴ μόνον φρόνιμον καὶ δίκαιον καὶ ἀνδρεῖον, ἀλλὰ καὶ δῆτορα καὶ στρατηγὸν καὶ ποιητὴν καὶ πλούσιον καὶ βασιλέα προσγορευόμενον, αὐτοὺς δὲ πάντων ἀξιοῦσι τούτων, καὶ μὴ τυγχάνωσιν, ἀνιῶνται.“ Ceterum utitur poeta hoc vocabulo ad hilarem satirae exitum parandum. — *optas*] Referendum hoc ad

- Cur optas quod habes? Non nosti, quid pater, inquit,
 Chrysippus dicat: Sapiens crepidas sibi nunquam
 Nec soleas fecit, sutor tamen est sapiens. Qui?
 Ut quamvis tacet Hermogenes, cantor tamen atque
 130 Optimus est modulator; ut Alfenus vafer omni
 Abiecto instrumento artis clausaque taberna
 Sutor erat, sapiens operis sic optimus omnis
 Est opifex solus, sic rex. Vellunt tibi barbam
 Lascivi pueri; quos tu nisi fuste coërces,
 135 Urgeris turba circum te stante miserque
 Rumperis et latras, magnorum maxime regum.
 Ne longum faciam: dum tu quadrante lavatum
 Rex ibis neque te quisquam stipator ineptum
 Praeter Crispinum sectabitur, et mihi dulces
 140 Ignoscent si quid peccaro stultus amici,
 Inque vicem illorum patiar delicta libenter,
 Privatusque magis vivam te rege beatus.

v. 121 *cum dicas si.* — *pater Chrysippus*] cf. Sat. II, 3, 44. 287. Epist. I, 19, 7. *Εἰ μὴ ἦν Χρύσιππος, οὐκ ἂν ἦν Στωά.* Diog. Laert. VII, 183. — *Hermogenes*] vide ad Sat. I, 2, 3. Tigellii Sardi filius adoptivus fuisse videtur. Sat. I, 9, 25. — *Alfenus vafer*] „Urbane satis Alfenum Cremonensem deridet, qui abiecta sutrina quam in municipio suo exercuerat Romam venit magistroque usus Ser. Sulpicio Rufo Icto ad tantam pervenit scientiam, ut consulatum gereret et publico funere efferretur.“ *Schol.* Apud Cruquium nomen scriptum est *Alfinius*, Orellius *Alfenius* scribendum esse docuit, ita ut trisyllabum sit; nam P. Alfenium cos. suff. a. u. c. 755 reperiri in Inscript. Apud Pighium Ann. Rom. anni 754 consules sunt P. Vinucius M. f. P. n. et P. *Alfinius* P. f. *Varus*. — *Sutor*] Bentleius eumque qui secuti sunt alii ex uno, sed omnium antiquissimo codice Bland. *Tonsor* receperunt, ne exemplum ex eodem artificii genere, sed ex diverso peteretur. — *barbam*]

Praeter *barbam* abolla (*ἀμβόλλα, ἀναβολή*), pallium philosophicum, insigne fuit Stoici. Inde iocosum votum Sat. II, 3, 17. Gell. N. A. IX, 2: „Video, inquit Herodes, *barbam* et pallium; philosophum nondum video.“ — *rumperis et latras*] *rumperis* latrando. cf. Sat. II, 1, 85. Latrant canes; Stoici autem semicynici erant. — *quadrante*] In publicis balneis tenuiores homines quadrante lavabant. — *stipator*] Cic. off. II, 7, 25. Varro L. L. VII, 3, 91 fin.: Latrones dicti ab latere, qui circum latera erant regi, quos postea a stipatione stipatores appellarunt.“ De-ridetur igitur regia philosophi dignitas. — *Crispinum*] vide ad Sat. I, 1, 120. — *inque*] Hic unus Horatii locus, in quo *que* part. in praepos. adhaeret. cf. I, 4, 66. — *peccaro*] Alii *peccavero*. „Neque enim o finale in verbis temere invenies correptum apud huius aetatis scriptores.“ *Bentleius*. Sed cf. Sat. I, 4, 104. I, 6, 119. I, 9, 2. 17. — *stultus*] non sapiens, non Stoicus.

SATIRA IV.

Eupolis atque Cratinus Aristophanesque poëtae
 Atque alii quorum comoedia prisca virorum est,
 Si quis erat dignus describi, quod malus ac fur,
 Quod moechus foret aut sicarius aut alioqui
 5 Famosus, multa cum libertate notabant.
 Hinc omnis pendet Lucilius, hosce secutus
 Mutatis tantum pedibus numerisque, facetus,

Satira IV.

Haec quoque satira scripta est a poeta, ut se satirasque suas ab iniusto iudicio vindicaret. Duplex autem fuit criminatio, quam in editas tunc satiras adversarii coniicerent. Ac primum quidem negabant poetam esse Horatium, quippe qui nihil nisi paucos versus conscripsisset, deinde malignum esse hominem qui ne amicis quidem, scilicet ut risum sibi excuteret, parceret. Quae ut refelleret inchoavit satiram ab origine generis satirici et auctore suo Lucilio, qui cum multa scripsisset facilem ad priorem criminationem paucorum versuum transitum praeiit (vv. 9—22). Neque minore arte ad alterum crimen transitur Fannio quodam poeta imperitae multitudini gratissimo in comparisonem vocato. Iam versu 38 ad ipsam defensionem accingitur; in qua primum ne ipsum quidem poetam se habere affirmat, cum non versus sed res et rerum ingeniosa tractatio poetam faciat (v. 63). Deinde a malignitate sese defendit; neque se timendum esse ait cuiquam nisi malis neque se satiras suas in medio foro primo cuique recitare (v. 78), neque delectari laedendis hominibus, cum absentes non rodat nec falsa fingat nec commissa prodat nec quibus videatur esse amicus ex insidiis calumniatur (v. 103). Iam cum qualis non sit ostenderit, addit qualis velit haberi quaque ratione ex puerili institutione paulatim exorta sit sua hominum contemplantorum consuetudo, qua ut puer tunc quoque ad animum suum in dies magis excolendum utatur; hoc suum esse vitium. Cui qui ignorare nolit, in eos iocosas minas in clausula satirae proicit. De tempore certum est non potuisse haec scribi nisi pluribus iam satiris divulgatis; ex

iis quae ad nos venerunt secunda prior (v. 92), decima posterior (10, 1) est. Nihil amplius certum; priores fortasse etiam tertia et sexta. Scripta esse videtur *Frankio* et *Webero* a. u. c. 716, *Grotefendio*, *Duentzero*, *Zumptio* a. 718, *Kirchner* a. 722.

V. 1. Triplex fuit comoedia graeca; *antiqua*, cuius principes erant Eupolis c. a. 430, Cratinus mortuus a. 427 centesimum annum egressus, Aristophanes qui maxime floruit intra a. 427—392. Haec liberrima erat et insectandis vitiis deditissima. Moderatior iam *media* erat, cuius tamen argumenta ad civiles res pertinebant, id quod probatur fragmentis Antiphanis Rhodii a. 408 et Alexidis Thuri a. 336. Tandem cum Macedonum auctoritas graecam libertatem opprimeret, *nova* comoedia delapsa est ad res privatas; in qua eximius Menander fuit intra a. 342—290. cf. A. P. 281—284. — *virorum*] Sat. I, 10, 16. Designatur et nomine et loco, quem hoc nomen bis accepit, virilis illa libertas in castigandis vitiis conspicua. — *numerisque*] Epist. I, 19, 24. Cum pedibus coniunctus numerus est, ὁριθμός. Lucilius praeter hexametrum etiam iambicis et trochaicis pedibus usus est. Io. Laurentius Lydus de magistr. R. R. 1, 41: „Πίνδαρον ἐξαμέτροις ἔγραψε πρῶτος κομωδιαν̄ ἐξ οὗ πρῶτος λαβὼν τὰς ἀφορμὰς Λουκίλιος ὁ Ῥωμαῖος ἠρώωντοῖς ἔπεσιν ἐκομώδησε. Μεθ' οὗ καὶ τοὺς μετ' αὐτὸν, οὓς καλοῦσι Ῥωμαῖοι σατυρικοὺς, οἱ νεώτεροι τὸν Κρατύνον καὶ Εὐπόλιδος χαρακτῆρα ἡλωσάντες τοῖς μὲν Πίνδαρονος μέτροις τοῖς δὲ τῶν μνημονευθέντων διασυρμοῖς χρησάμενοι τὴν σατυρικὴν ἑρτάττην κομωδίαν.“ — *emunctae naris*] quasi purgatis naribus ut vitia bene odoraretur. Sat. I, 3, 29 sq. — *durus*] durities, qua

- Emunctae naris, durus componere versus.
 Nam fuit hoc vitiosus: in hora saepe ducentos,
 10 Ut magnum, versus dictabat stans pede in uno.
 Cum flueret lutulentus, erat quod tollere velles;
 Garrulus atque piger scribendi ferre laborem,
 Scribendi recte: nam ut multum, nil moror. Ecce,
 Crispinus minimo me provocat: Accipe, si vis,
 15 Accipiam tabulas; detur nobis locus, hora,
 Custodes; videamus uter plus scribere possit.
 Di bene fecerunt, inopis me quodque pusilli
 Finxerunt animi, raro et perpauca loquentis.
 At tu conclusas hircinis follibus auras,
 20 Usque laborantes, dum ferrum molliat ignis,
 Ut mavis, imitare. Beatus Fannius ultro

non tactus solum sed sapor etiam et auditus laeditur, a versu ad ipsum hominem est translata. Plin. H. N. XXXV, 11: „Mechopanes pictor durus in coloribus.“ Horatii iudicium fragmentis Lucillii egregie comprobatur. — *flueret lutulentus*] Quint. X, 1, 93: „Ego ab Horatio dissentio, qui Lucilium fluere lutulentum et esse aliquid, quod tollere possis, putat.“ *Cum* particula est causalis; iam ut *fluere* dicitur eius oratio, cui quae alii multo labore consequuntur nullo prope negotio in mentem veniunt, ita poeta quasi fluit qui facillime versus componit. Imago autem a flumine sumpta verbo *lutulentus* continuatur, quod per quandam *πρόληψιν* positum sententiam satis illustrat. *Tollere* est recidere, non reservare aut laudare. Seneca Controv. 2, 10: „Naso rogatus aliquando ab amicis suis ut tolleretur tres versus.“ cf. Sat. I, 10, 50. Eadem imagine usus est Callimachus de Apollonio Rhodio hymn. in Apoll. 107: „*Ἀσπρίον ποταμοῖο μέγας ῥόος· ἀλλὰ τὰ πολλὰ Λύματα γῆς καὶ πολλὸν ἐφ’ ὕδατι συρρετόν ἔλκει.*“ — *multum*] Multum scribere posse non magna laus est, quam insulso etiam et loquaci Crispino libenter concedam. Vide ad Sat. I, 1, 120. — *minimo*] „Minimo provocare dicuntur ii qui in restipulatione plus ipsi promittunt quam exigunt ab adversario.“ *Schol.* Crispinus suis viribus egregie confidens ac de victoria

securus *minimo* provocat Horatium i. e. ita, ut maximum ipse promittat, alter minimum debeat pignus contra ponere. Sic bene procedit oratio neque pro superlativo comparativum modum requirit, uti visum nuper est *Horkelio*, qui *numero* scribendum esse ratus est, ut *numero* versuum, non bonitate Crispinus se superiorem fore speraret. At bonitatis quoque laudem ille, opinor, sibi arrogasset, si de ea ageretur. — *accipiam*] Melioris haec lectio auctoritatis est quam quae aliis placuit *accipe iam*. *Ego* pronomen necessarium non est. — *hora*] temporis spatium quod ad scribendum utrique conceditur. — *custodes*] ne alieni versus afferantur. — *quodque*] vide ad Carm. II, 7, 25. — *At tu*] Fictus adversarius appellatur. — *follibus*] Tumidum et verbosum genus facete comparatur cum vento ex indefessis follibus emissio. Poetarum enim spiritus est et spirare. Carm. IV, 3, 24. IV, 6, 29.

V. 21 *Fannius*] Sat. I, 10, 80. Salse praedicat Fannium, cui a docta plebe pretiosae capsae, in quibus tumida sua carmina conderet conservaretque, et imago coronata ultro oblata esse videntur. Nam quod Scholiastae tradunt, in publicas bibliothecas eius carmina et imaginem delata esse, id quidem ut ex male intellecto ipso loco ortum videtur ita omni probabilitate caret. Nam in Pollionis bibliothecam a. u. c. 716

- Delatis capsis et imagine, cum mea nemo
 Scripta legat vulgo recitare timentis ob hanc rem,
 Quod sunt quos genus hoc minime iuvat, utpote plures
 25 Culpari dignos. Quemvis media erue turba,
 Aut ob avaritiam aut misera ambitione laborat.
 Hic nuptarum insanit amoribus, hic puerorum;
 Hunc capit argenti splendor; stupet Albius aere;
 Hic mutat merces surgente a sole ad eum quo
 30 Vespertina tepet regio; quin per mala praeceptis
 Fertur uti pulvis collectus turbine, ne quid
 Summa deperdat metuens aut ampliet ut rem.
 Omnes hi metuunt versus, odere poëtas.
 Foenum habet in cornu, longe fuge: dummodo risum
 35 Excutiat sibi, non hic cuiquam parcat amico,
 Et quodcunque semel chartis illeverit, omnes
 Gestiet a furno redeuntes scire lacuque
 Et pueros et anus. Agedum, pauca accipe contra.
 Primum ego me illorum, dederim quibus esse poëtas,

conditam M. Terentii Varronis unius viventis imago recepta est. Fannius autem etiam tunc vixit. — *timentis*] Coniunge cum pronomine *mea*. Sic Ovid. Heroid. 5, 45: „nostros vidisti flentis ocellos.“ Martial. 7, 50: „Si tenet absentis nostros cantatque libellos.“ — *plures*] per attractionem quandam cum *sunt quos* coniunctum atque explicandi gratia additum. — *erue*] In antiquissimis codd. est *eripe*, in aliis *elige*. Ex quibus illud *eripe* magno-pere mihi placere fateor, quoniam in eo non tam distinguendi, quod putabant, et supra vulgus tollendi significatio inest, quam caeci casus indicium; contra qui *eruit*, is indagavit et scrutatus est, id quod ab hoc loco quam maxime alienum est. *Elige* infelix est glossema; quamquam apud Acronem iam legitur in lemmate. — *ob avaritiam*] Male alii ex coniectura duobus codicibus adiuta *ab avaritia*; nam neque Horatius *laborare ab aliqua re* dixisse unquam videtur, neque, si unquam, hoc loco dixisset, ubi morbus, non membrum vel pars ex qua dolor oritur, significandus erat. cf. Liv. XXXVIII, 39:

„non tam *ob recentia ulla merita*, quam originum memoria.“ Tacit. Ann. II, 42: „non *ob crimina*, sed *angore finem vitae* implevit.“ Salust. Ing. 22: „ob easdem artes a Micipsa, non penuria liberorum, in regnum adoptatum esse.“ — *Albius*] homo ignotus. cf. v. 109. — *tepet regio*] Epist. I, 20, 19. — *pulvis collectus*] Carm. I, 1, 4. — *ut rem*] ut part. coniungenda cum *metuens*. — *odere poetas*] oderunt praecipue satirarum scriptores, ab iisque odium in omne genus poetarum extendunt. Ex qua intemperantia adversariorum Horatii primam defensionis rationem (v. 39) nanciscitur. Sententia est: metuunt versus ac propterea odere poetas. Bentleii coniectura *poetam* facile caremus. — *foenum*] „Quando feriant boves, eorum in cornibus ligatur foenum.“ Schol. — *lacuque*] M. Agrippa aedilis DCC aquae receptacula in urbe fecit; praeterea CV salientes. — *poetas*] Sic ex auctoritate omnium codicum; alii cum Heinsio et Bentleio ex attractione *poëtis*, de quo genere cf. Sat. I, 1, 19. I, 2, 51. I, 6, 25. A. P. 372. Cui scripturae auctoritatem parare studue-

- 40 Excerptam numero: neque enim concludere versum
Dixeris esse satis; neque si quis scribat uti nos
Sermoni propiora, putes hunc esse poëtam.
Ingenium cui sit, cui mens diviniore atque os
Magna sonaturum, des nominis huius honorem.
- 45 Idcirco quidam comoedia necne poëma
Esset quaesivere; quod acer spiritus ac vis
Nec verbis nec rebus inest, nisi quod pede certo
Differt sermoni sermo merus. At pater ardens
Saevit, quod meretrice nepos insanus amica
- 50 Filius uxorem grandi cum dote recuset,
Ebrius et, magnum quod dedecus, ambulet ante
Noctem cum facibus. Numquid Pomponius istis
Audiret leviora, pater si viveret? Ergo
Non satis est puris versum perscribere verbis,
- 55 Quem si dissolvas, quivis stomachetur eodem
Quo personatus pacto pater. His, ego quae nunc,
Olim quae scripsit Lucilius, eripias si
Tempora certa modosque et quod prius ordine verbum est
Posterius facias praepone ns ultima primis,
- 60 Non, ut si solvas „Postquam Discordia tetra
Belli ferratos postes portasque refregit,“
Invenias etiam disiecti membra poëtae.
Hactenus haec: alias iustum sit necne poëma.

funt ex Aconis schol. ad Sat. I, 6, 25: „Fieri tribuno, figurate per dativum, ut supra *dederim quibus esse poetis*.“ Sed illud scholion non legitur in edit. Basil. a. 1527 neque in edit. prima Henricopetrina. Reperitur tamen in Comment. Cruquiano. — *concludere versum*] cf. Sat. I, 10, 59. II, 1, 28. — *comoediae necne poema*] Comoedia poema non est neque verbis (Form) neque rebus (Inhalt); omnia enim vulgaria sunt et ex vitae quotidianae sermone sumpta. Cic. Orat. 20: „Video visum esse nonnullis Platonis et Democriti locutionem, etsi absit a versu, tamen quod incitatus feratur et clarissimis verborum luminibus utatur, potius poema putandum quam comicorum poe-

tarum, apud quos nisi quod versiculi sunt nihil est aliud quotidiani dissimile sermonis.“ Dubium non est quin construi debeat *comoedia poema esset necne*. cf. v. 63. — *At pater*] Res in comoediis frequentissima, quam adversarius ut in comoediis etiam incitationem esse orationem demonstret potuit afferre. — *ardens*] sc. ira. Virg. Aen. II, 41. — *nepos*] dissolutus, ἀσέλγης. — *cum facibus*] cf. Pers. V, 163: „An siccis dedecus obstem Cognatis? an rem patriam rumore sinistro Limen ad obscenum frangam, dum Chrysidis udas Ebrius ante fores exstincta cum face canto?“ — *Pomponius*] ut locus suadet, luxuriosus iuvenis, cetera ignotus. — *personatus*] in comoedia. —

- Nunc illud tantum quaeram, meritone tibi sit
 65 Suspectum genus hoc scribendi. Sulcius acer
 Ambulat et Caprius, rauci male cumque libellis,
 Magnus uterque timor latronibus; at bene si quis
 Et vivat puris manibus, contemnat utrumque.
 Ut sis tu similis Coeli Birrique latronum,
 70 Non ego sim Capri neque Sulci: cur metuas me?
 Nulla taberna meos habeat neque pila libellos,
 Quis manus insudet vulgi Hermogenisque Tigelli;
 Nec recito cuiquam nisi amicis, idque coactus,
 Non ubivis coramve quibuslibet. In medio qui
 75 Scripta foro recitent sunt multi quique lavantes;
 Suave locus voci resonat conclusus. Inanes
 Hoc iuvat, haud illud quaerentes, num sine sensu,
 Tempore num faciant alieno. Laedere gaudes,
 Inquit, et hoc studio pravus facis. Unde petitum
 80 Hoc in me iacis? est auctor quis denique eorum,
 Vixi cum quibus? Absentem qui rodit amicum,
 Qui non defendit alio culpante, solutos
 Qui captat risus hominum famamque dicacis,

Postquam Discordia] Versus Ennii testibus scholiastis. — *hactenus*] Omissa uberiore eius rei explicatione ab hoc certe loco alienissima ad alterum crimen transgreditur. — *Sulcius et Caprius*] „Hi acerrimi delatores (id est quadruplatores) et causidici fuisse traduntur et ideo male, valde rauci, quod in contentione iudiciorum altissima voce clamarent.“ *Schol.* Argumentum petit Horatius a maiori ad minus. — *libellis*] accusatoriis. — *sim*] Sic optimi codd. Est modus potentialis οὐκ ἂν εἴην, ut Sat. I, 1, 19. 48. 55. 79. I, 2, 5. 35 al. — *habeat*] optativus modus. — *taberna*] cf. Mart. I, 118, 10 sqq.: „Contra Caesaris est forum taberna Scriptis postibus hinc et inde totis, Omnes ut cito perlegas poetas.“ *Epist.* I, 20, 1 sqq. — *quis*] eo consilio, ut iis insudet. — *Hermogenis*] vidē ad Sat. I, 2, 3, Huius igitur hominis iudicium nihil melius esse iudicio imperitae multitudinis acerbissime indicatur. — *recitent*] Horatius meliora sua carmina habet

quam quae nullo locorum aut occasionum habito delectu recitentur: intelligendae utique sunt pravae illae recitationes, quibus divites saepe ac nobiles homines ingentia sua ac tumida carmina ad taedium clientium et debitorum recitarunt. Sat. I, 3, 88 sq. — *haud illud*] „Gravior negatio in iis apparet, ubi unum vocabulum sua negatione intenditur atque una res reliquis opponitur. Huius generis sunt demonstrativa pronomina atque adverbia.“ *Hand. Turs.* III. p. 32. — *sensu*] communi. Sat. I, 3, 66.

V. 79. *inquit*] Ut graecorum ὀφείλ usurpatur non certa cogitata persona (heisst's). Sat. II, 2, 99. Cic. Tusc. I, 39, 93. V, 41, 118. — *studio*] cf. Cic. Rosc. Am. 32: „ut omnes intelligant, me non studio accusare sed officio defendere.“ — *captat risus*] Cic. Tusc. II, 7, 17. Frequentativa verbi forma studium et operam hominis ostendit. — *niger*] Cic. pro Caec. 10; „Clodius, cui nomen est Phormio, nec minus ni-

- Fingere qui non visa potest, commissa tacere
 85 Qui nequit; hic niger est, hunc tu, Romane, caveto.
 Saepe tribus lectis videas coenare quaternos,
 E quibus unus amet quavis adspargere cunctos
 Praeter eum qui praebet aquam; post hunc quoque potus,
 Conditā cum verax aperit praecordia Liber.
 90 Hic tibi comis et urbanus liberque videtur;
 Infesto nigris; ego si risi, quod ineptus
 Pastillos Rufillus olet, Gargonius hircum,
 Lividus et mordax videor tibi? Mentio si qua
 De Capitolini furtis iniecta Petilli
 95 Te coram fuerit, defendas, ut tuus est mos:
 Me Capitolinus convictore usus amicoque
 A puero est, causaque mea permulta rogatus
 Fecit, et incolumis laetor quod vivit in urbe;
 Sed tamen admiror, quo pacto iudicium illud
 100 Fugerit. Hic nigrae sucus loliginis, haec est
 Aerugo mera; quod vitium procul afore chartis
 Atque animo prius, ut si quid promittere de me
 Possum aliud vere, promitto. Liberius si
 Dixero quid, si forte iocosius, hoc mihi iuris
 105 Cum venia dabis: insuevit pater optimus hoc me
 Ut fugerem exemplis vitiorum quaeque notando.
 Cum me hortaretur, parce, frugaliter atque

ger nec minus confidens.“ — *caveto*] Loquitur poeta tanquam legem proponens. — *quaternos*] summus numerus elegantiorum hominum. — *amet*] Sic scribendum esse etiam cum uno cod. Bland. nunc intellexi; alterum *avet* nihil habet nisi voluntatem ac studium adspargendi, cum tamen sententia requirat consuetudinem. — *praebet aquam*] praeter convivatorem; elocutio accommodata ad verb. *adspargere*, i. e. salsis dictis carpere et vellicare. — *hunc*] postea hunc quoque i. e. ipsum convivatorem. — *pastillos*] Sat. I, 2, 27. — *Petilli*] „Fingit se loqui cum amico Petilli Capitolini, qui cum praesset capitolio accusatus est quod coronam Iovis Capitolini rapuisset; quare

ipse sublatae coronae causam dixit et absolutus est a iudicibus in gratiam Caesaris Octaviani, cuius amicus erat.“ *Comm. Cruq.* Sat. I, 10, 26. — *amicoque*] Versus hypermeter, ut Sat. I, 6, 102. — *ut si quid*] Ne ter ponendum esset verbum promittere, primam personam in fine posuit sententiae; pro: ut promitto, si quid aliud vere de me promittere possum, ita promitto afore cet. — *insuevit hoc me*] Lambinus et Heinsius *mi*. Sed cf. Sat. II, 2, 109. Tacit. Ann. II, 52: „ut *lectos viros* imperiis *suesceret*.“ Ne in duplici quidem accusativo haerendum est, praesertim in pronomine *hoc*. — *vitiorum*] ἀπὸ κοινῶν positum. — *Albi*] supra v. 28. Patris disciplinam ostendens

- Viverem uti contentus eo, quod mi ipse parasset:
 Nonne vides, Albi ut male vivat filius atque
 110 Barrus inops? magnum documentum, ne patriam rem
 Perdere quis velit. A turpi meretricis amore
 Cum deterreret: Scetani dissimilis sis.
 Ne sequerer moechas, concessa cum venere uti
 Possem: Deprensi non bella est fama Treboni,
 115 Aiebat. Sapiens, vitatu quidque petitu
 Sit melius, causas reddet tibi; mi satis est, si
 Traditum ab antiquis morem servare tuamque,
 Dum custodis eges, vitam famamque tueri
 Incolumem possum; simul ac duraverit aetas
 120 Membra animumque tuum, nabis sine cortice. Sic me
 Formabat puerum dictis, et sive iubebat
 Ut facerem quid, Habes auctorem, quo facias hoc:
 Unum ex iudicibus selectis obiiciebat;
 Sive vetabat, An hoc inhonestum et inutile factu
 125 Necne sit addubites, flagret rumore malo cum
 Hic atque ille? Avidos vicinum funus ut aegros
 Exanimat mortisque metu sibi parcere cogit;
 Sic teneros animos aliena opprobria saepe
 Absterrent vitiis. Ex hoc ego sanus ab illis,
 130 Perniciem quaecunque ferunt, mediocribus et quis
 Ignoscas vitiis teneor; fortassis et istinc
 Largiter abstulerit longa aetas, liber amicus,
 Consilium proprium; nequē enim, cum lectulus aut me
 Porticus excepit, desum mihi. Rectius hoc est.

vide quam multos simul carpat. — *magnum documentum*] vide ad Carm. III, 20, 7. — *Barrus*] Sat. I, 6, 30. I, 7, 8. Ceterum ignotus homo, ut etiam Scetanus et Trebonius. — *quidque*] vide ad Carm. II, 7, 25, — *duraverit*] cf. Sat. II, 4, 72. Vellei. II, 78: Caesar patientia periculorum bellicque experientia *durabat* exercitum. — *iudicibus selectis*] sc. rerum capitalium. Cic. pro Cluent. 43: „Praetores urbani iurati debent optimum quemque in selectos iudices referre.“ — *an hoc*]

Coniunge *an addubites*, hoc inhonestum sit necne. Si quis coniungeret *addubites an . . . necne*, is violaret consuetudinem latinam. Coniunctivus autem *addubites* potentialis est quem vocant.

V. 126. *avidos*] intemperantes. — *sibi parcere*] Epist. I, 7, 11. — *Ex hoc*] hac educatione. — *quis*] ut supra v. 72. — *liber amicus*] qui cum libertate me corrigat. — *lectulus*] lucubratorius. — *porticus*] ubi deambulare solebant Romani. — *desum mihi*] in emendandis meis moribus. — *Rectius*]

135 Hoc faciens vivam melius. Sic dulcis amicis
 Occurram. Hoc quidam non belle: numquid ego illi
 Imprudens olim faciam simile? Haec ego mecum
 Compressis agito labris; ubi quid datur oti,
 Illudo chartis. Hoc est mediocribus illis
 140 Ex vitiis unum; cui si concedere nolis,
 Multa poetarum veniet manus, auxilio quae
 Sit mihi; nam multo plures sumus ac veluti te
 Iudaei cogemus in hanc concedere turbam.

SATIRA V.

Egressum magna me exceptit Aricia Roma
 Hospitio modico; rhetor comes Heliodorus,
 Graecorum longe doctissimus: inde Forum Appi
 Differtum nautis, cauponibus atque malignis.
 5 Hoc iter ignavi divisimus, altius ac nos

Verba sunt quasi secum loquentis ac de suis rebus cogitantis, ut ostendit v. 137. — *olim*] vide ad Carm. II, 10, 17. — *poetarum manus*] „Festive fingit magnum Romae esse poetarum quasi sodalicium et coniurationem. Simul ridet studium versificandi, quo tunc quam plurimi etiam invita Minerva ducebantur.“ *Orellius*. In qua re hoc quoque facetum est, quod poetarum turba Horatio quam infestissima erat. — *Iudaei*] qui multi tunc Romae multos ad suam doctrinam trahere studebant.

Satira V.

Caesar Octavianus cum aestate a. 716 maritimo bello contra S. Pompeium gesto maximam classis partem amisisset, ad Antonium misit Maecenatem, qui remota inter triumviros similitate ad belli societatem utrumque coniungeret. Quare ineunte vere a. 717 Antonius cum trecentis navibus Brundisium vectus est; ubi cum non esset receptus, Tarentum cursum direxit. Iam cum alter alterum timeret, primo per amicos agebant, deinde intercedente Octavia ipsi prope Tarentum congressi mutuum inter se auxilium promiserunt: Octavianus Antonio duas legiones Italicas contra Parthos, Antonius Octavia-

no centum naves contra Pompeium. Amici per quos primo agebant non est dubium quin fuerint Maecenas et Cocceius, per quos iam a. 714 foedus Brundisium ictum erat; unde v. 29 dicuntur „aversos soliti componere amicos.“ Maecenati autem, qui ne in itinere quidem doctorum amicorum usu carere vellet, comes fuit Horatius; qui cum Lucilius olim iter Roma usque ad fretum Siculum factum in Satiris descripsisset, non potuit a se impetare, quin in hac quoque re eum aemularetur, cum praesertim sperare posset fore ut eius exemplum et rebus et oratione et versu facile superaret (Sat. I, 4, 8). Iter factum esse verno tempore docet imprimis versus 14, cum quo conferantur vv. 72 et 81; quare veri videtur simile eodem anno etiam scriptam esse hanc satiram.

V. 1. *exceptit*] Sic in maiore parte antiquissimorum codd., et quod in non paucis reperitur *cepit*, id hanc scripturam confirmat, non eam quam Lambinus et Bentleius praetulerunt *accepit*. — *Aricia*] ad viam Appiam, distat a Roma XVI. M. P. — *Heliodorus*] rhetor graecus. — *Forum Appi*] distans ab Aricia XX. M. P., ab Appio Claudio Caeco qui Appiam viam fecit no-

- Praecinctis unum: minus est gravis Appia tardis.
 Hic ego propter aquam, quod erat deterrima, ventri
 Indico bellum, coenantes haud animo aequo
 Expectans comites. Iam nox inducere terris
 10 Umbras et coelo diffundere signa parabat;
 Tum pueri nautis, pueris convicia nautae
 Ingerere: Huc appelle! Trecentos inseris! Ohe
 Iam satis est! Dum aes exigitur, dum mula ligatur,
 Tota abit hora. Mali culices ranaeque palustres
 15 Avertunt somnos, absentem ut cantat amicam
 Multa prolutus vappa nauta atque viator
 Certatim. Tandem fessus dormire viator
 Incipit, ac missae pastum retinacula mulae
 Nauta piger saxo religat stertitque supinus.
 20 Iamque dies aderat, nil cum procedere lintrem

minatum. — *atque*] vide ad Epod. 17, 4. — *cauponibus*] Sat. I, 1, 29. Maligni sunt quod viatoribus, mala sua vina atque edulia magno pretio vendunt. — *altius ac*] vide ad Epod. 15, 5. Qui altius praecincti sunt, expeditiores sunt celeriusque iter conficiunt. Facite dictum. His opponuntur postea *tardi*, qui abhorrent a labore viae. Nam Appia magnis ac durissimis lapidibus strata euntium pedibus molesta erat. Quare rectius ex optimis libris *minus*, quam alterum *nimis*. Fori Appii initium erat Pomptinarum paludum, per quas iter continuabatur lintre a mulis tracta usque ad templum Feroniae (v. 24) distans a Terracina III. M. P. Non mirandum igitur, quod Forum Appii refertum erat nautis et cauponibus. — *comites*] Omnes intelligendi sunt qui per paludes iter facturi erant eadem navicula, quae vespere solvi solebat, ut altero die mane ad Feroniae appelleretur. — *huc appelle*] Iam cum nox adesset, cuius adventum poeta epica quadam dignitate utpote expectabundus describit v. 9. 10, omnes conscendunt lintrem, omnes properant, curant ne quid suarum rerum relinqueretur. Inde puerorum nautarumque convicia; sed sufficebat poetae puerorum convicia paucis significasse, nautarum non memorantur. Haec igitur verba *huc*

appelle; trecentos inseris; ohe, iam satis est non sunt dividenda inter puerum et nautam. Et cogitandum est, increpari ita nautam non uno tenore, ut aiunt, sed iustis interpositis intervallis; etenim sunt quasi exempla altercationis proposita. — *prolutus*] Sat. II, 4, 27. — *nauta atque viator*] Etiam si v. 11 plures *nautae* memorantur, unus tamen est qui hanc unam naviculam regit, cui in imponendis et hominibus et sarcinis reliqui auxilio erant. Viator autem mulio non est, sed vilioris condicionis homo qui idem iter facit. Mulionem omnino non video; unus nauta in quieti fossa et navem regit et mulam loro lintrem trahentem. Sed cum facilius sit ex lintre mulam quam ex mula lintrem regere, nautam non apud mulam ambulantem aut mulae insidentem video, sed in navicula stantem suaque voce mulam satis docilem et assuetam agitantem. Cui rei ne obstare, illud credas, quod nautam in terra postea cubantem dormientemque videmus, considera modo quam facile fuerit nautae ex nave in terram prosilire praesertim in angusta fossa; quae v. 21 ne cerebrosum quidem illum non nautam potuit retinere.

V. 20. *dies aderat*] Omnes in navicula dormiverant; unus tandem prima luce expergefactus mirabundus cum vi-

Sentimus; donec cerebrosus prosilit unus
 Ac mulae nautaeque caput lumbesque saligno
 Fuste dolat; quarta vix demum exponimur hora.
 Ora manusque tua lavimus, Feronia, lympa.

25 Milia tum pransi tria repimus atque subimus
 Impositum saxis late candentibus Anxur.

Huc venturus erat Maecenas optimus atque
 Cocceius, missi magnis de rebus uterque
 Legati, aversos soliti componere amicos.

30 Hic oculis ego nigra meis collyria lippus
 Illinere. Interea Maecenas advenit atque
 Cocceius Capitoque simul Fonteius, ad unguem
 Factus homo, Antoni non ut magis alter amicus.
 Fundos Aufidio Lusco praetore libenter

deat nautam dormientem, mulam pascentem, navem nihil prope progressam, prosilit iratus et non leniter suscitatur nautam agitque mulam. — *quarta hora*] Romani quovis anni tempore in easdem duodecim horas diem noctemque tum longiorem tum breviorē dividebant. Iam cum vere iter hoc factum sit, quo tempore sexta fere nostra hora sol oritur, quarta Romana respondet circiter nostrae decimae. — *Feronia*] antiqua dea Italica. Haec templum celebre habebat III. M. Pass. a Tarracina, ubi nunc est turris antiqua, nominata *Torre Otto-faccia*. Ibi non deerant cauponiae in quibus qui iter faciebant recrearentur. — *subimus*] Tarracina, cuius antiquum nomen Anxur erat, in monte posita erat. Liv. XXVII, 18. Hirt. de bell. Gall. VIII, 15, 1. Saxa candentia sunt propter calcem; inde Mart. V, 1 „candidus Anxur.“ — *Cocceius*] M. Cocceius M. F. Nerva, consul a. u. 718, proavus Nervae imperatoris, et Octaviano et Antonio gratus. *Optimus* Maecenas est, non Cocceius, quem sic laudari voluit Bentleius, scilicet ne nimia in Maecenatem familiaritate uteretur poeta. cf. Carm. I, 20, 5. Simillima ratio est Sat. I, 10, 82. — *collyria*] Plura erant genera; unum a cinereo colore *τέφριον* appellabatur. Ex hoc loco noli concludere perpetua lippitudine vexatum fuisse poetam; illud solum recte efficiet, in-

firmitates fuisse eius oculos qui nocturnos humores et frigora non bene tolerarent. Compara quae de Hannibale narrantur apud Livium XXII, 2 extr. — *Fonteius*] C. Fonteius Capito, elegans homo ac politus, Antonii in Asia legatus, a. u. c. 721 consul suffectus. — *ad unguem*] A. P. 294. Virg. Georg. II, 277. Sic εἰς ὄνυχας vel ἐπ' ὄνυχος. „Translatio a marmorariis, qui iuncturas marmorum tum demum perfectas ducunt, si unguis superductus non offendatur.“ Schol. — *Fundos*] hodie *Fondi*; Latii oppidum a Tarracina XII. M. P. distans; secundum Walekenarium XIII. M. P. et D. Aufidius olim scriba, tunc praefectus huius oppiduli, praetoris sibi nomen arrogabat, quo nomine in nonnullis municipiis summi magistratus honorabantur, non in praefecturis, ex quibus Fundi erant. Liv. VIII, 14. XXXVIII, 36: „De Formianis Fundanisque municipibus et Arpinatibus C. Valerius Tappo tribunus plebis promulgavit, uti iis suffragii latio (nam ante sine suffragio habuerant civitatem) esset.“ *Festus* autem Fundos et Formias inter praefecturas numeravit. Ceterum cf. Liv. XXIII, 19 extr. Qui insanus et vanus homo ut rite acciperet Maecenatem, Cocceium, Fonteium, maximos in civitate viros, quacunque potuit ratione externo cultu dignitatisque insignibus sese ornaverat, molestaque fortasse iter fa-

- 35 Linquimus, insani ridentes praemia scribae,
 Praetextam et latum clavum prunaeque batillum.
 In Mamurrarum lassi deinde urbe manemus,
 Murena praebente domum, Capitone culinam.
 Postera lux oritur multo gratissima: namque
 40 Plotius et Varius Sinuessae Virgiliusque
 Occurrunt, animae quales neque candidiores
 Terra tulit neque quis me sit devinctior alter.
 O qui complexus et gaudia quanta fuerunt!
 Nil ego contulerim iucundo sanus amico.
 45 Proxima Campano ponti quae villula, tectum
 Praebuit, et parochi quae debent ligna salemque.
 Hinc muli Capuae clitellas tempore ponunt.
 Lusum it Maecenas, dormitum ego Virgiliusque;

cientes sedulitate rogaverat ut in suo oppido pernoctare ne dedignarentur. Ridebant autem magni viri vanitatem hominis senatorum instar praetexta et lato clavo ornati. Quibus insignibus ἀποσδονήτως accedit *prunae batillum*; quod quid sit, incerti sumus. Scribitur etiam *vatillum* in antiquis codicibus et apud Comment. Cruq., qui vas parvum fuisse ait „in quo pro felici hospitum adventu incensis odoribus Iovi hospitali sacra fiebant; quod cum ex cupro esset, ita tollebat et ostentabat hospitibus, quasi esset aureum.“ Gesnero videbatur focolus sacrificandi causa praelatus huic magistratui; *Cruquius* existimavit „vatillum esse focolum in coenatione aut cubili a laquearibus aut contignatione suspensum, in quo sub adventum hospitum vel convivarum prunis positus suffitus fiat.“ Iam cum prunarum vasculum non facile praemium sive insigne vocetur in aliisque locis batillo prunae vel stercola tollantur (Varr. R. R. III, 6, 5: „cum batillo circumire oportet ac stercus tollere“), Duentzero visum est, significari scipionem male factum, quo vanus homo virorum triumphalium et consulum scipiones eburneos imitari ausus sit. Aliis placuit coniectura *prunaeque bacillum*; bacillum prunae pro consulis scipione usurpatum. — *Mamurrarum urbe*] Formiis a Fundis XIII. M. P. distantibus. Formiae hodie sunt

Molo di Gaeta. Mamurra eques Romanus, homo ditissimus et Formiis infimo loco natus. Festive poeta dicit *Mamurrarum urbe*, quasi magna ibi ac vetus familia Mamurrarum fuerit, ut Lamiarum, de quibus vide ad Carm. III, 17. — *Murena*] L. Licinius Terentius Varro Murena, de quo vide ad Carm. II, 10. Murena et Capito Formiis domus habuerunt atque aemulati, uter hospites reciperet, tandem honorem et operam inter se diviserunt. Murena casu aderat, cf. Carm. III, 19, 7. — *Plotius*] M. Plotius Tucca. Sat. I, 10, 81; qui postea cum L. Vario (Carm. I, 6, 1) Virgilii mortui Aeneidem edidit. — *Sinuessae*] XVIII. M. P. a Formiis. Est locus, ubi nunc est *Vagnoli* sive *Bagnoli*. Fuit autem ultimum oppidum Latii in Appia.

V. 45. *Campano*] Pons impositus (hodie *Molino Ceppani* secundum Walckenarium) Savoni flumini III. M. P. a Sinuessa. Inter pontem et Capuam plures villulae; in proxima pernoctarunt. Capua a ponte Campano distabat XXII. M. P., secundum Walckenarium XVII. M. P. Vetus autem *Capua* sita erat, ubi nunc est vicus *Santa Maria di Capoa*, qui III. M. P. distat ab eo loco, quo nunc urbs Capua sita erat, olim *Casilinum*. — *parochi*] Sunt homines quibus publicum munus erat ligna, foenum, salem, tectum iter reipublicae causa facientibus praebere. —

Namque pila lippis inimicum et ludere crudis.

50 Hinc nos Cocceii recipit plenissima villa,

Quae super est Caudi cauponas. Nunc mihi paucis

Sarmenti scurrae pugnam Messique Cicirri,

Musa, velim memores, et quo patre natus uterque

Contulerit lites. Messi clarum genus Osci;

55 Sarmenti domina exstat: ab his maioribus orti

Ad pugnam venere. Prior Sarmentus: Equi te

Esse feri similem dico. Ridemus, et ipse

Messius: Accipio; caput et movet: O, tua cornu

Ni foret exsecto frons, inquit, quid faceres, cum

60 Sic mutilus miniteris? At illi foeda cicatrix

Setosam laevi frontem turpaverat oris.

Campanum in morbum, in faciem permulta iocatus,

Pastorem saltaret uti Cyclopa rogabat:

Nil illi larva aut tragicis opus esse cothurnis.

lippiis] Celsus VI, 6 lippis quietem et abstinentiam commendat, crudos iubet „neque labori se neque exercitationi neque negotio credere.“ — *crudis*] qui cibis difficulter digerunt; *crudis* indicatur Virgilius, *lippiis* Horatius. — *Caudi*] Caudium in Hirpinis XXI. M. P. a Capua. Cocceii villa sita fuit secundum F. Daniel, ubi nunc est *la maseria delle Moliche*, secundum Romanellium, ubi est *Monte Sarchio*, secundum Walckenarium, ubi est *Castro Aïrola* non procul a *Costa Cauda*. — *plenissima*] Carm. II, 12, 24. IV, 12, 24. — *Nunc mihi paucis*] Iocosa epicae dignitatis imitatio. Qui fastidiose hunc locum vituperarunt, neque quid Romanus mos tulerit neque qualem Romani rusticationem habuerint satis considerarunt. Cic. de orat. II, 6: „Saepe ex meo socero audiui, cum is diceret socerum suum Laelium semper fere cum Scipione solitum rusticari eosque incredibiliter repuerascere esse solitos.“ — *Sarmenti*] Sarmentus Maecenatis videtur fuisse scurra, Messius Cocceii; hic robusto, ille gracili corpore. Cicirrus ridiculum nomen, *κίκίρρος*, *ἀλεκτρονών*. — *domina exstat*] fuerat servus M. Favonii inter proscriptos occisi; cuius bonorum sectio cum ad Maecenatem venisset, Sarmentus manumis-

sus et scriba factus est. Quod cum bene sciret Messius, simulat tamen se nescire v. 65 sq. Fuga etiam Sarmenti ficta videtur in contumeliam. — *equi feri*] Plin. H. N. VIII, 21: Asperissimam autem feram *monocerotem*, reliquo corpore equo similem, capite cervo, pedibus elephantis, cauda apro, mugitu gravi, uno cornu nigro media fronte cubitorum duum eminentem.“ — *accipio*] istam comparisonem. — *caput et movet*] vide ad Carm. I, 2, 9. — *miniteris*] Codd. fluctuant inter *miniteris* et *minitaris*. Sententia autem causam habet, cur Sarmentus adversarium terribilem fore dicat, nisi cornu esset exsectum. — *At*] At ne quaeras cur alterum ita comparaverit cet. — *Campanum*] „Hoc enim quasi a natura Campanis fere omnibus est, ut capitis temporibus magnae verrucae innascantur in modum cornuum.“ *Comm. Cruq.* — *iocatus*] Cic. de orat. II, 59, 239: „Est etiam deformitatis et corporis vitiorum satis bella materies ad iocandum.“ — *Cyclopa*] Epist. II, 2. 125. Saltare cum accus. ut ludere cum acc. est saltando exprimere; Vell. Pat. II, 73 „Glaucum saltare“, etiam passive ut Ovid. Trist. II, 519: „Et mea sunt populo saltata poemata saepe.“ Ante Augustum sic usurpatum verbum non vide-

- 65 Multa Cicirrhus ad haec: Donasset iamne catenam
 Ex voto Laribus, quaerebat; scribe quod esset,
 Deterius nihilo dominae ius esse; rogabat
 Denique, cur unquam fugisset, cui satis una
 Farris libra foret, gracili sic tamque pusillo.
- 70 Prorsus iucunde coenam producimur illam.
 Tendimus hinc recta Beneventum, ubi sedulus hospes
 Paene macros arsit dum turdos versat in igni:
 Nam vaga per veterem dilapso flamma culinam
 Vulcano summum properabat lambere tectum.
- 75 Convivas avidos coenam servosque timentes
 Tum rapere atque omnes restinguere velle videres.
 Incipit ex illo montes Apulia notos
 Ostentare mihi, quos torret Atabulus et quos
 Nunquam erepsemus, nisi nos vicina Trivici
- 80 Villa recepisset lacrimoso non sine fumo,
 Udos cum foliis ramos urente camino.
 Hic ego mendacem stultissimus usque puellam
 Ad mediam noctem exspecto; somnus tamen aufert
 Intentum veneri; tum immundo somnia visu
- 85 Nocturnam vestem maculant ventremque supinum.
 Quattuor hinc rapimur viginti et milia rhedis,
 Mansuri oppidulo, quod versu dicere non est,

tur. — *catenam*] Fugitivi et ostiarii plerumque catenati erant; sed vide ad v. 55. — *nihilo*] bisyllabum est. — *una libra*] Servis quotidie quaternae vel quinae farris librae dari solebant. Saepe tamen probabile est factum esse ut fame pressi aufugerent servi. — *producimus*] Praeferendum putavi praesens tempus; cfr. v. 25. 35. Alii ex codd. *producimus*. — *Beneventum*] A Caudio distabat XII. M. P. Ibi in cauponis hospitium devertisse videntur. — *macros turdos*] iam verno tempore. Construe sic: *hospes paene arsit, dum versat* cet. Ipse hospes i. e. caupo paene correptus est flammis. Versus quaedam perturbatio ipsam rem quodammodo imitatur; insequentes duo non sine iocosa quadam epicae gra-

vitatis aemulatione sunt. — *notos*] nimirum patrii montes sunt Horatii. — *Atabulus*] perniciosus ventus, nunc *Alitino* nominatus. — *erepsemus*] cf. Sat. I, 9, 73. II, 3, 169. II, 7, 68. vide ad Carm. II, 2, 2. — *Trivici*] „oppidi in fine Campaniae, quo vehicula iuncta accedere nequeunt; ergo Horatius ad villam devertit.“ *Schol.* Villa Trivicana non videtur esse amici cuiusdam, sed vel parochi vel cauponis. Trivicum nusquam praeter h. l. commemoratur; est autem secundum Romanellium locus qui nunc appellatur *Civita* prope hodiernum *Trivico*.

V. 87. *versu dicere*] Ad exemplum Lucilii, cuius versus exstat: „Servorum est festu' dies hic, Quem plane hexametro versu non dicere possis“,

Signis perfacile est: venit vilissima rerum
 Hic aqua, sed panis longe pulcherrimus, ultra
 90 Callidus ut soleat humeris portare viator;
 Nam Canusi lapidosus, aquae non ditior urna
 Qui locus a forti Diomede est conditus olim.
 Flentibus hinc Varius discedit moestus amicis.
 Inde Rubos fessi pervenimus, utpote longum
 95 Carpentés iter et factum corruptius imbri.
 Postera tempestas melior, via peior ad usque
 Bari moenia piscosi; dein Gnatia Lymphis

et aliorum, etiam Graecorum. Equum tuticum vel Equotuticum significari male scribunt scholiastae; nimirum Maecenas comitesque a recta via septentriones versus declinassent et ex Apulia, quam iam intraverant, rursus in Campaniam deflexissent; deinde cum Benevento tertio demum die Canusium pervenirent, et ita quidem ut primam noctem in Trivicana villa, alteram in hoc oppidulo transigerent, duobus primis diebus tantum XXII. M. P. confecissent, tertioque diei XLII reliquissent; id quod factum esse nequit et per totam itineris faciendi rationem et quia uno iam altero die XXIV. M. P. se confecisse dicit Horatius v. 86. Hoc quoque accedit quod Equi Tutici vel Equotutici nomen, si u littera longa est — id quod veri simile est — versu non excluditur. Apponam verba Walckenarii, qui de locis Horatianis dignus est qui legatur: „Les itinéraires anciens indiquent deux routes pour traverser les montagnes en se rendant à Brindes. L'une par *Equus Tuticus* ou *Equus Magnus (Fojano)* et *Civitas Sardonis (Ordona)*, l'autre route par *Eclano (Bonito)*, *Aquilonia (Cairano)*, *Venusia (Venouse)*, la patrie de notre poète. Nos voyageurs ne prirent aucune de ces deux routes, mais ils suivirent un chemin plus court, qui circule dans les montagnes et qui se trouve tracé sur les grandes cartes topographiques du royaume de Naples. Ce chemin se dirige en sortant de Bénévent sur Montefusco; il passe par Paparici et Mirabella, tourne la haute montagne nommée Capo di Diavolo et conduit à un lieu nommé *Trevico*, qui est le *Trivicum* mentionné dans la sa-

tire d'Horace.“ Et: „Si en partant de Trevico on se dirige sur Brindes, on ne trouve dans ces vallées profondes d'autre route praticable et facile que celle qui conduit à Ascoli ou *Asculum*, et cette ville est iuste à vingt-quatre milles romaines de distance de Trevico.“ Itaque suspicatur oppidum significatum esse *Asculum* et scribit: „Ce n'est pas la difficulté de prononcer le nom de cette ville, ni de le faire entrer dans un vers qui fait dire à Horace qu'on ne peut la nommer; il est évident que par cette réticence il fait une plaisanterie bouffonne, sur la signification de *culum* qui termine le nom qu'il s'abstient d'écrire.“ Et deinde: „Lorsqu'il (Capmartin de Chaulpy) visita cette ville (Asculum), on était obligé d'aller, au moyen de bêtes de somme, chercher l'eau qui jaillit d'une source au pied de la montagne. Les environs produisaient de beau froment et on y mangeait de très-bon pain.“ Sed de hac quoque sententia licet dubitare, ita ut nihil habeas quod pro certo vendere audeas. — *signis*] non litteris, sed iis signis quae statim adduntur. — *Canusi*] distat a Benevento LXIV. M. P.; nunc *Canosa*. — *qui locus*] In hoc loco ne erres compara Carm. IV, 2, 5, C. S. 9, qui hoc quidem differunt, quod nomen quocum relativum coniungendum est praecedit. — *Rubos*] Rubi (nunc *Ruvo*) a Canusio distabant XXIV. vel alio auctore XXX. M. P. — *Bari*] Barium (nunc *Bari*) ad mare situm, a Rubis distans XXI. M. P. — *Gnatia*] populari forma pro *Egnatia*; oppidum fuit a Bario remotum XXXVII. M. P., quod cum dulci aqua careret iratis Lymphis conditum

Iratis exstructa dedit risusque iocosque,
 Dum flamma sine thura liquescere limine sacro
 100 Persuadere cupit. Credat Iudaeus Apella,
 Non ego; namque deos didici securum agere aevum,
 Nec si quid miri faciat natura, deos id
 Tristes ex alto coeli demittere tecto.
 Brundisium longae finis chartaeque viaeque est.

SATIRA VI.

Non, quia, Maecenas, Lydorum quidquid Etruscos
 Incoluit fines, nemo generosior est te,

dicitur. Est hodie *Monopoli* secundum Romanellium, *Torre d'Anazzo* secundum Walckenarium. Incipiebat ibi via Egnatia. Lymphae latinum nomen Nympharum. De hoc oppido Plin. N. N. II, 111: „In Salentino oppido Egnatia imposito ligno in saxum protinus flammam existere.“ — *flamma sine*] De praepositione postposita vide ad Carm. III, 3, 11. — *Iudaeus Apella*] Apella libertini nomen. Iudaeis ab Augusto concessum est ut in regione Transiberina habitarent. Dicit igitur, eiusmodi miraculis neminem fidem posse habere nisi credulum magicaeque arti deditum Iudaeum. Plin. H. N. XXXI, 1: „Est et alia magices factio a Moyse et Iamne et Iotape Iudaeis pendens, sed multis milibus annorum post Zoroastrem.“ — *deos didici*] Imitatus est Lucretii versum (V, 83. VI, 57): „Nam bene qui didicere deos securum agere aevum.“ Profitetur Horatius iocose Epicuri disciplinam. Cic. de leg. I, 7: „nihil curare deum, nec sui nec alieni.“ Diog. Laert. X, 138: „τὸ μαντικὸν καὶ ἀφθαρτον οὐτε αὐτὸ παράγματα ἔχει οὔτε ἄλλω παρέχει.“ cf. Cic. off. III, 28. de divin. II, 17. — *Brundisium*] ab Egnatia distabat XLIV. M. P. Nunc Brindisi. Totius viae longitudinem Walckenarius esse dicit CCCLXXVII. M. P., et iter confectum est quattuordecim diebus. Orellius contra quindecim dies itineris fuisse vult, nam Beneventi (v. 71) quoque Maecenatem comitesque pernoctasse suspicatur.

Satira VI.

Qui recte rationem consideraverit, qua poeta satiras suas oriri ipse dixit Sat. I, 4, 134—139, is non mirabitur alteram ex altera quasi nasci. Sic haec sexta ex quinta orta videtur. Ibi enim cum comitem se et convictorem Maecenatis publice proposuisset, iterum expertus est quod olim in Asia et Graecia cum tribunus legioni praeesset, invidiam homines recte de aliis iudicare non pati, plurimis eos qui a magnis viris diligerentur magnique haberentur importunos videri ac superbos, quia parentum et condicionis qua essent nati oblitum magna captare auderent. Iam quid ipse sibi de hac re persuaserit, ingenue hac satira profitetur. Etenim „etiamsi tu, inquit, Maecenas homines non maiorum sed sua dignitate recte soles iudicare, populus tamen genus et nobilitatem maxime spectat; quare stulti est ibi sese inferre ubi importunum et alienum quisque perspiciat. Exemplum praebet Tillius, qui cum omnibus sui similibus iniquum populi iudicium ipse provocat neque aliorum se exemplo recte potest excusare (v. 44).“ Hanc generalem sententiam altera deinde parte ad se adhibet. Immerito se ait invidia hominum carpi, nunc maxime cum Maecenati sese non unquam obtruderit ipse sed ab amicis commendatus propter virtutes placuerit et vocatus venerit (v. 64). Quas virtutes cum patris sapienti educationi debeat (v. 88), tantum abesse, ut parentum se pudeat, ut ne nobilissimos

- Nec quod avus tibi maternus fuit atque paternus
 Olim qui magnis legionibus imperitarent,
 5 Ut plerique solent, naso suspendis adunco
 Ignotos ut me libertino patre natum.
 Cum referre negas, quali sit quisque parente
 Natus, dum ingenuus; persuades hoc tibi vere,
 Ante potestatem Tulli atque ignobile regnum
 10 Multos saepe viros nullis maioribus ortos
 Et vixisse probos, amplis et honoribus auctos;
 Contra Laevinum, Valeri genus, unde superbus
 Tarquinius regno pulsus fugit, unius assis
 Non unquam pretio pluris licuisse notante
 15 Iudice quo nosti populo, qui stultus honores
 Saepe dat indignis et famae servit ineptus,
 Qui stupet in titulis et imaginibus. Quid oportet
 Nos facere a vulgo longe longeque remotos?
 Namque esto, populus Laevino mallet honorem

quidem eorum loco accipere velit. Nobilitate enim generis nihil nunc effici nisi molestias et curas, veram libertatem non augeri sed imminui; nunc se parvis parentibus ortum multo vivere felicius et liberius quam alios permultos nobilissimis maioribus immerito superbientes. Scripta est satira eodem anno quo iter Brundisium factum et quinta satira composita est.

V. 1. *Maecenas*] vide ad Carm. I, 1, 1. — *Lydorum quidquid*] Sic Epod. 5, 1. Ovid. Met. X, 18. De Lydis vide Herod. I, 94. — *avus*] collectivi vocabuli singularis numerus pro plurali positus; avi enim omnino maiores sunt, ut apud Ovidium Fast. II, 30: „Hoc apud intonsos nomen habebat avos.“ Id. Met. IX, 491. XV, 425. — *imperitarent*] In codd. etiam *imperitarint* et *imperitarunt*; utrumque falsum. — *magnis legionibus*] Sall. Cat. 53: „Saepenumero parva manu cum magnis legionibus hostium contendisse.“ Etiam apud Livium X, 5 *legiones* sunt Etruscorum, ut Bruttiorum et Lucanorum VIII, 24. — *naso*] Sat. II, 8, 64. Plin. H. N. XI, 37, 59: „Novi mores subdolae irrisioni dicavere nasum.“ — *ingenuus*] Suet. Octav. 74: „Valerius

Messalla tradit, neminem unquam libertinorum adhibitum ab Augusto coenae, excepto Mena sed asserto in ingenuitatem.“ Vide supra p. 1 adn. 4. — *Tulli*] Servii Tullii, de quo Liv. IV, 3. — *Laevinum*] „Hic P. Valerius Laevinus adeo foedis ac proiectis in omnem turpitudinem moribus vixit, ut provehi non potuerit ultra quaesturae dignitatem.“ *Schol.* — *unde*] vide ad Carm. II, 12, 7. — *pulsus fugit*] Sic in optimis codd., in aliis *fuit*. De illo recte Madvigius: „patet Horatium liberius praesenti historico uti, non in continua et incitata narratione, sed in brevi rei praeteritae significatione per pronomen relativum interiecta. Non dubitabimus igitur, quin idem Horatius ausus sit post coniunctionem *cum*, praesentis sit temporis *donat* in Sat. I, 2, 56 et *edormit* in Sat. II, 3, 61.“ cf. Tib. II, 4, 55: „Quidquid habet Circe, quidquid Medea veneni.“ Ovid. Met. VII, 290. — *licuisse*] Licere verbum locum habet in rebus venalibus; quare vilissimo mancipio negat meliorem fuisse. — *quo nosti*] Attractio Graecis usitatissima cf. Cic. ad Att. X, 8, 7: „hoc confirmamus illo augurio, quo diximus.“ Terent. Heautont. I, 1,

- 20 Quam Decio mandare novo, censorque moveret
 Appius, ingenuo si non essem patre natus:
 Vel merito, quoniam in propria non pelle quiessem.
 Sed fulgente trahit constrictos Gloria curru
 Non minus ignotos generosis. Quo tibi, Tilli,
 25 Sumere depositum clavum fierique tribuno?
 Invidia accrevit, privato quae minor esset.
 Nam ut quisque insanus nigris medium impediit crus
 Pellibus et latum demisit pectore clavum,
 Audit continuo: Quis homo hic est? quo patre natus?
 30 Ut si qui aegrotet quo morbo Barrus, haberi
 Et cupiat formosus, eat quacunque, puellis
 Iniiciat curam quaerendi singula, quali
 Sit facie, sura, quali pede, dente, capillo:
 Sic qui promittit cives, urbem sibi curae,
 35 Imperium fore et Italiam et delubra deorum,
 Quo patre sit natus, num ignota matre inhonestus,
 Omnes mortales curare et quaerere cogit.
 Tune Syri, Damae aut Dionysi filius, audes
 Deiicere e saxo cives aut tradere Cadmo?
 40 At Novius collega gradu post me sedet uno;

35: „hac quidem causa, qua dixi tibi.“ — *imaginibus*] vide ad Carm. II, 20, 24. — *Decio*] homini novo, sed probro. Non certus quidam Decius cogitandus neque Appius; significantur homines quales Decii erant, et severi Censores, qualis olim Appius. — *vel merito*] sc. me moveret censor, quia senatoria dignitas natalibus meis parum convenire videretur. Genus et natales nemo potest magis mutare quam eutem; inde *in propr. non pelle quies.* ex proverbio. — *Sed*] Quod quamquam verissimum est, omnes tamen, nobiles et ignobiles, Gloriam currum quasi triumphalem (*fulgente*) sequuntur cf. Epist. II, 1, 177.

V. 24. *Tilli*] „Tillius hic senatu motus est a Caesare quasi Pompeianus; occiso vero Caesare recepit latum iterum clavum, id est, senatoriam dignitatem, et tribunus militum factus est.“ *Comm. Cruq.* Tribuni quattuor primarum legionum habebant ius lati clavi.

Aliis tribunum plebis Tillium fuisse probabilius videtur. — *nigris pellibus*] Senatorum calcei hoc differebant ab aliorum, quod quattuor nigris corrigiis in medio crure ligabantur ac praeterea ad talem addebatur lunula, quae litteram C (Centum Senatores primi) forma redderet. Calcei ipsi albi aut purpurei erant. — *Barrus*] Sat. I, 4, 110. — *Et cupiat*] Sic longe plurima pars optimorum codd., quod iam Cruquius bene interpretatus est; nam *et cupiat formosus haberi* ἐπεξηγητικῶς addita sunt. Etiam Acron ita legit. Alii *ut cupiat*, quod ex interpretatione ortum est. — *Tune Syri*] Dicit aliquis ex populo. Tria nomina hic coniuncta servorum sunt. De genitivo *Dionysi* vide ad Carm. I, 29, 14. — *saxo*] Tarpeio. — *Cadmo*] „Cadmus dicitur eo tempore fuisse carnifex notae crudelitatis.“ *Schol.* Necandos qui tradunt cives, quaestores sunt rerum capitalium.

Namque est ille, pater quod erat meus. Hoc tibi Paulus
Et Messalla videris? At hic, si plostra ducenta
Concurrentque foro tria funera, magna sonabit,
Cornua quod vincatque tubas; saltem tenet hoc nos.

45 Nunc ad me redeo libertino patre natum,
Quem rodunt omnes libertino patre natum,
Nunc, quia sum tibi, Maecenas, convictor, at olim,
Quod mihi pareret legio Romana tribuno.
Dissimile hoc illi est: quia non ut forsit honorem
50 Iure mihi invidet quivis, ita te quoque amicum,
Praesertim cautum dignos assumere prava
Ambitione procul. Felicem dicere non hoc
Me possim, casu quod te sortitus amicum:
Nulla etenim mihi te fors obtulit; optimus olim
55 Virgilius, post hunc Varius dixere quid essem.
Ut veni coram, singultim pauca locutus,
Infans namque pudor prohibebat plura profari,
Non ego me claro natum patre, non ego circum
Me Satureiano vectari rura caballo,

— *Novius*] Respondet ignobilis ille, libertinus et tamen munere maiore fungens: „At collega meus Novius uno gradu deterior est me; nam cum ego sim libertino patre natus, ille ipse libertinus est.“ Res metaphorice sumpta est a theatro et ordinibus. — *Hoc tibi*] Horatii sunt tribuno respondentis, cuius etiam insequentes versus sunt, quibus quam parvis saepe rebus multitudinis iudicium nitatur acerbè ostenditur. — *Concurrentque*] De part. *que* bis transposita vide ad Carm. II, 7, 25. — *Foro*] In foro habebantur laudationes funebres, quibus habitis mortui in Campo cremabantur. — *magna sonabit*] cf. Sat. I, 4, 44. Iuven. VII, 108: „Ipsi magna sonant.“ Valer. Fl. III, 198: „Opheltem vana sonantem.“ Non bene alii coniunxerunt *funera magna*, ut *quod* quasi obiectum sit verbi *sonabit*. Tu potius *quod* refer ita ad *magna sonare*, ut vim habeat consecutivam.

V. 45. *libertino patre natum*] Repetitio egregie imitatur continuos adversariorum clamores. cf. Carm. I, 35,

15. Ovid. Met. I, 325 sqq. VIII, 628 sq. — *convictor*] Ovid. ex Pont. IV, 3, 15: „Ille ego convictor (tibi) densoque domesticus usu.“ Et confer epistolam Augusti supra p. 11. — *forsit*] Huius formae praeter h. l. nullum reperitur certum exemplum; quamquam de ea dubitari nequit, quoniam Priscianus p. 1015 in libris Horatii ita se legisse testatur. — *ambitione*] Haec tria verba coniuncta unius adiectivi locum explent; Graeci participium *ὄντας* adderent; nam tanquam accusativus sunt. — *possim*] Coniunctivus ad exprimendam modestiam recte positus est. In nonnullis codd. est *possum*, apud Comm. Cruq. *possunt*. — *casu*] Vide quanta vi hoc nomen primam sententiae partem et arsim occupaverit. — *quid essem*] Animadvertite quam sit hoc diversum a *quis essem*. — *Satureiano*] Steph. Byz. v. *Σατύριον, χώρα πλησίον Τάραντος*. Fertilissima ea regio est. Neque temere magno quasi hiatu dixit *Sat. caballo*. Epist. I, 7, 88. De toto loco vide supra p. 7

- 60 Sed quod eram narro. Respondes, ut tuus est mos,
 Pauca; abeo, et revocas nono post mense iubesque
 Esse in amicorum numero. Magnum hoc ego duco,
 Quod placui tibi, qui turpi secernis honestum,
 Non patre praeclaro sed vita et pectore puro.
- 65 Atqui si vitiis mediocribus ac mea paucis
 Mendosa est natura, alioqui recta, velut si
 Egregio inspersos reprehendas corpore naevos,
 Si neque avaritiam neque sordes nec mala lustra
 Obiiciet vere quisquam mihi, purus et insons,
- 70 Ut me collaudem, si et vivo carus amicis;
 Causa fuit pater his, qui macro pauper agello
 Noluit in Flavi ludum me mittere, magni
 Quo pueri magnis e centurionibus orti,
 Laevo suspensi loculos tabulamque lacerto,
- 75 Ibant octonis referentes Idibus aera,
 Sed puerum est ausus Romam portare docendum
 Artes, quas doceat quivis eques atque senator
 Semet prognatos. Vestem servosque sequentes

sq. — *vita et pectore*] Ad Horatium ipsum, non ad patrem haec sunt referenda; etenim ipsius poetae ignobilitas generis poni debuit contra innocentiam vitae. — *nec mala*] Sic recte in antiquissimo omnium cod. Bland., alii *aut vel ac*. — *Flavi*] Flavius fuit ludi magister, qui arithmeticen imprimis docebat, scilicet eam artem quae lucelli cupidis hominibus prae reliquis ad veram humanitatem informantibus exoptata videbatur. — *magni*] quales sibi videbantur in parvo oppido. — *loculos tabulamque*] Ex Iuven. X, 116: „Quisquis adhuc uno partem colit asse Minervam, Quem sequitur custos angustae vernula capsae“ intelligimus, pueros qui ludum peterent secum habuisse paedagogos capsam cum libris et chartis tabulamque portantes. Iam cum *loculi* nil differant a *capsa*, utpote quae loculos contineret, non sine acerbitate significatur, nobilium istorum centurionum nobiles filios ipsos tulisse capsam tabulamque, non habuisse paedagogos. Non magnam enim impensam

contulerunt isti homines in puerorum educationem; quare in eum ludum pueros mittebant, ubi minimo pretio litteraturam possent discere. Hoc dicitur v. 75. Nam octonae idus sunt eorum mensium, qui singulis annis scholis habendis destinabantur. Ferae quadrimestres erant per menses aestivos, nam ab Idibus Iun. usque ad Id. Octobr. scholae cessabant. *Aera* haud dubie sunt didactrum, quod singulis mensibus solvebatur, satis parvum. His igitur hominibus nomine fortasse nobilibus, animo ignobilibus opponit poeta patris sui libertini hominis eximiam de filio bene educando curam.

V. 76. *est ausus*] nam pauper erat. — *in magno ut populo*] h. e. ut in magno populo, in magna urbe decet. Referenda haec sunt ad vestem et servos; nam Venusiae nobilium etiam qui videbantur filii deterioribus vestibus utebantur ac sine servis in ludum mittebantur. Alii sic explicant: quatenus id fieri poterat in tanta hominum aliud agentium multitudine, in qua etiam me-

- In magno ut populo si qui vidisset, avita
 80 Ex re praeberi sumptus mihi crederet illos.
 Ipse mihi custos incorruptissimus omnes
 Circum doctores aderat. Quid multa? Pudicum,
 Qui primus virtutis honos, servavit ab omni
 Non solum facto verum opprobrio quoque turpi,
 85 Non timuit, sibi ne vitio quis verteret, olim
 Si praeco parvas aut, ut fuit ipse, coactor
 Mercedes sequerer; neque ego essem questus: at hoc nunc
 Laus illi debetur et a me gratia maior.
 Nil me poeniteat sanum patris huius; eoque
 90 Non, ut magna dolo factum negat esse suo pars,
 Quod non ingenuos habeat clarosque parentes,
 Sic me defendam. Longe mea discrepat istis
 Et vox et ratio: nam si natura iuberet
 A certis annis aevum remeare peractum
 95 Atque alios legere ad fastum quoscunque parentes
 Optaret sibi quisque, meis contentus honestos
 Fascibus et sellis nollem mihi sumere, demens
 Iudicio vulgi, sanus fortasse tuo, quod
 Nollem onus haud unquam solitus portare molestum.
 100 Nam mihi continuo maior quaerenda foret res
 Atque salutandi plures, ducendus et unus

lius vestiti veluti latent atque in paucorum oculos incurrunt; non recte, opinor. — *avita*] cf. supra v. 10. Liv. IV, 3, 12. — *coactor*] vide supra p. 2. — *at hoc*] „Comici poetae antiqui hoc dixerunt, ut causam designarent, pro *ideo*, *propterea*, ut graecum τῷ. Idque rursus in usum revocarunt scriptores aevi Augustei et recentiores. Apud Ciceronem nullum exstat exemplum.“ *Hand. Turs.* III. p. 92. cf. supra 41. 52. — *dolo*] culpa, ut apud Ictos. — *ad fastum*] Haec verba *ad fast. quosc. par.* cum non magis ad optandi quam ad legendi verbum referenda sint, interductus ponendi non sunt. Constructio similis est Epod. 2, 37. Sat. I, 4, 2. I, 10, 16. — *fascibus et sellis*] Summorum honorum in-

signia; honesti sunt nobiles, qui honores gessere in republica. Plin. XVIII, 3, 4: „Honestis manibus (imperatorii) omnia laetius proveniunt.“ — *tuo*] Maecenatis, qui ipse senatorium ordinem sprexit. — *haud unquam*] „Non dicunt veteres Latini *non quidquam*, *non usquam*, *non ullum*, sed *haud quidquam*. Recentiori demum tempore Plinii negligentior existit usus.“ *Hand. Turs.* III. p. 18 sq. — *salutandi*] Cic. Fam. IX, 20 fin.: „Mane salutamus domi et bonos viros multos cet.“ Utrumque tamen officium est magnorum virorum, et alios salutatum ire et salutantes domi accipere; utrumque eodem verbo significatur. Quid igitur discrimen faciamus, ubi Horatius non statuit? Cic. ad Att. XIV, 20 fin.;

- Et comes alter, uti ne solus rusve peregreve
 Exirem, plures calones atque caballi
 Pascendi, ducenda petorrita. Nunc mihi curto
 105 Ire licet mulo vel si libet usque Tarentum,
 Mantica cui lumbos onere ulceret atque eques armos;
 Obiiciet nemo sordes mihi, quas tibi, Tilli,
 Cum Tiburte via praetorem quinque sequuntur
 Te pueri, lasanum⁷ portantes oenophorumque.
 110 Hoc ego commodius quam tu, praeclare senator,
 Milibus atque aliis vivo. Quacunque libido est,
 Incedo, solus percontor quanti olus ac far;
 Fallacem Circum vespertinumque pererro
 Saepe forum, adsisito divinis, inde domum me
 115 Ad porri et ciceris refero laganique catinum;
 Coena ministratur pueris tribus, et lapis albus
 Pocula cum cyatho duo sustinet, adstat echinus
 Vilis, cum patera guttus, Campana supellex.

„Eram continuo Piliam salutaturus, deinde ad epulas Vestorii cet.“ — *curto*] Carm. III, 24, 64. Pers. IV, 52: *curta supellex*.“ — *peregreve*] vide ad Sat. I, 4, 96. — *sordes*] cf. v. 68. Sat. II, 5, 105: „Tillium hunc et supra increpuerat, quod senatoriam dignitatem accepisset, non sufficiens ei censu nec moribus.“ *Schol.* Populus tamen, qui credere non potest, hominem praetoria dignitate iusta rerum copia carere, cum tam exiguo comitatu cinctum vidit Tillium, sordidum hominem habet. — *Tiburte via*] a porta Esquilina ad Tibur ducente. Exiguum iter facturus tamen Tillius sordidus instrumenta culinaria secum habet. — *lasanum*] Tillius obscuro loco natus magnos hospites, in quorum villis pernoctare posset, non habuit; iam cum propter paupertatem deversoria quam maxime vitare deberet, quae necessaria viderentur, domesticum vinum, panem, salem, oleum cum vasis coquinariis servis imposuit. Lasanum enim olla culinaria est, non vas vel sella exonerandae alvo. — *milibus atque aliis*] Notanda duplex comparativi constructio. Alia milia sunt multi alii, qui eodem honorum studio ducuntur, quo

Tillius. Alii explicant: in hac re et mille aliis rebus.

V. 113. *Circum*] ubi semper erant multi circulatores, mathematici, sortilegi, alii id genus. — *divinis*] vide ad Carm. III, 27, 10. — *laganique*] „Lagana sunt placentulae quaedam vulgares quasi membranulae compositae, quae cum pipere et liquamine conditae depromi solebant ad coenam moderatam et parabilem.“ *Comm. Cruq.* — *pueris tribus*] Nobis satis magnus videtur numerus, Romanis parvus. Plin. H. N. XXII, 10: „C. Caecilius Claudius Isidorus testamento suo edixit, quamvis multa civili bello perdidisset, tamen relinquere servorum quattuor milia centum decem.“ — *lapis albus*] ex vulgari marmore factus; in hac quoque re ingens fuit luxuria Romanorum. — *pocula duo*] alterum ad vinum, alterum ad aquam. — *echinus*] vas fuisse videtur, in quo calices lavantur. *Comm. Cruq.* „Echinum dixit vas salis in modum echini marini; alii ampullam vitream, alii lignum dicunt cum uncinis, in quo ponuntur calices, alii ampullam scorteam iuxta illud Lucilii: *echinus Cinnabari infectus*.“ — *cum patera guttus*] utrumque ad libationes faciendas.

- Deinde eo dormitum non sollicitus, mihi quod cras
 120 Surgendum sit mane, obeundus Marsya, qui se
 Vultum ferre negat Noviorum posse minoris.
 Ad quartam iaceo; post hanc vagor, aut ego lecto
 Aut scripto quod me tacitum iuвет, ungor olivo,
 Non quo fraudatis immundus Natta lucernis.
 125 Ast ubi me fessum sol acrior ire lavatum
 Admonuit, fugio rabiosi tempora signi.
 Pransus non avide, quantum interpellat inani
 Ventre diem durare, domesticus otior. Haec est
 Vita solutorum misera ambitione gravique;
 130 His me consolor victurum suavius ac si
 Quaestor avus pater atque meus patruusque fuisset.

SATIRA VII.

Proscripti Regis Rupili pus atque venenum
 Hybrida quo pacto sit Persius ultus, opinor

— *Campana*] Sat. II, 3, 144. Fictilis ac vilis supellex. — *Marsya*] „Marsya statua erat pro Rostris, ad quam solebant convenire causidici, qui lites et negotia tractabant et componebant.“ *Comm. Cruq.* Et idem: „Minor enim Noviorum ad hanc statuam turpissime fenerabatur summo mane, quare iocatur Horatius inquiring, Marsyam alteram habere manum erectam ad depellendum Novios, quod eorum feneratorum impudentiam non posset sustinere.“ — *Natta*] Sordidissimus homo oleo ungebatur ex lucernis detracto. Sat. II, 2, 59. II, 3, 125. — *rabiosi tempora signi*] Non significantur dies caniculares, sed tempus meridianum, quo solis aestus est acerrimus et quasi in rabiem agit. Haec unice vera lectio miro modo in recentioribus editionibus posthabita est antiquissimi Codicis Blandinii et unius Gothani (qui pessimus esse dicitur) interpolationi *fugio Campum lusumque trigonem*. Trigon quidem genus fuit pilae minimae, inde nominatae quod a tribus iactabatur ludentibus et ita dispositis, ut trianguli formam efficerent. Sed obscure dictum *lusum trigonem* pro *lusum* (vel ludum) tri-

gonis; deinde vehementer est dubitandum, num hac aetate trigonis nomen iam usurpatum fuerit, cum ante Martialem nusquam legatur. Veterem esse corruptelam patet, ortam fortasse ex glossa in margine explicandi loci causa addita. Veram lectionem tuetur etiam perantiquus codex Barcellon. Hauthalii; etiam scholiastae et Comment. Cruq. qui male interpretantur dies caniculares. — *quaestor*] Primus hic maiorum honorum, ad quem qui nobili loco essent nati plurimi pervenerunt. Quaestura igitur generis nobilitas satis explicatur.

Satira VII.

Facete describit Horatius litem quam Persius quidam Clazomenius P. Rupilio Regi apud Brutum in Asia imperium tenentem olim intenderat. Cui rei probabile est ipsum interfuisse Horatium. Summa autem lepidae narrationis videnda est in festiva ratione qua Rupilli cognomen luditur. Ac veri simile est, primam hanc esse inter Horatii satiras, scriptam haud ita multo post quam ex Macedonia in Italiam poeta reversus esset. Nam quis credat

Omnibus et lippis notum et tonsoribus esse.
 Persius hic permagna negotia dives habebat
 5 Clazomenis, etiam lites cum Rege molestas,
 Durus homo atque odio qui posset vincere Regem,
 Confidens tumidusque; adeo sermonis amari,
 Sisennas, Barros ut equis praecurreret albis.
 Ad Regem redeo. Postquam nihil inter utrumque
 10 Convenit; hoc etenim sunt omnes iure molesti,

levissimam illam rem sex septemve annis post ita divulgatam etiam fuisse, ut nota omnibus et lippis et tonsoribus dici pōset? Deinde vehementer cavendum est, ne quis Bruti levem aliquem contemptum in satira inesse putet indeque posteriorem annum quasi natalem velit efficere. Horatio Bruti memoria semper sacra fuit, etiam cum omnino deditus esset Maecenati Octavianique partibus. cf. Carm. II, 7. Epist. I, 20, 23. Turpe sane facinus fuisset, si Horatius a. 718, quo alii putant scriptam satiram, quinto anno post reditum in Italiam, Brutum oblique tangere ausus esset, turpius etiam quam si idem fecisset anno iam 713. Ne in tricesimo quarto quidem versu quidquam inest maligni aut contumeliosi in Brutum aut caedem Caesaris; sed salse dicta ea sunt in Regem Rupiliū, quibus etiam simplicissimus Brutoque deditissimus quisque vel praesente Bruto innocenter uti potuit. Attamen non recte videntur iudicasse qui inter praestantissimas satiras hanc quoque habendam arbitrati sunt.

V. 1. *Regis Rupili*] P. Rupilius Rex Praenestinus, eques Romanus a. 702 magister publicanorum in Bithynia fuerat; deinde a. 711 Romae praetor factus sed Octaviano auctore proscriptus ad Brutum confugit in eiusque comitatum receptus est. cf. v. 25. Consulto Horatius cognomen in priore loco posuit, quo certamen aliquod oriretur inter proscriptum et Regem. — *Persius*] Clazomenius fuit, patre Asiatico, matre Romana; inde hybrida dicitur. Iam si quid licet divinare de hac lite, Persium cogita mercaturam fecisse frumentis colligendis ac dividendis, cf. v. 4; id quod probabile fit ex contumeliae genere quo v. 24 sqq. utitur Persius. Rupilio, olim magistro socie-

tatis Bithynicae reiue frumentariae fortasse perito, Brutus, ut videtur, colligendi emendique frumenti negotia mandaverat; quae cum ille exerceret, facile fieri potuit ut cum Persio negotiatore de commodis vel incommodis exercitus Brutiani litigaret. — *lippis*] Admodum frequens Romae lippitudo fuit; iam cum ii qui ex oculis laborarent certa negotia sequi non possent, in medicinis, quo illinendorum oculorum causa conveniebant, diutius sedebant et confabulabantur. Tonsores autem etiam antiquos loquacissimos fuisse, quid mirum? Sic Aristoph. Plut. 337: „καὶ τοι λόγος γ' ἦν, νῆ τὸν Ἡρακλέα, πολὺς Ἐπὶ τοῖσι κουρείοισι τῶν καθημένων, ὧς κτλ.“ Plant. Amphitr. IV, 1, 5: „In medicinis, in tonstrinis, apud omnes aedes sacras Sum defessus quaeritando.“ — *confidens*] cf. Cic. Tusc. III, 7, 14. — *tumidusque*] Carm. IV, 3, 8. Sat. II, 5, 98. II, 3, 213. A. P. 94. — *Sisennas, Barros*] homines maledicos ac mordaces. — *equis albis*] „quasi quadrigis triumphalibus incederet.“ *Schol.* Albi enim equi nobiliores sunt „quod victores in triumpho albis equis vectari solebant.“ Erasm. Adag. I, 4, 21. cf. Hom. II, X, 437. Liv. V, 23.

V. 9. *Ad Regem redeo*] Exspectas poetam hinc Rupiliū quoque accuratam aliquam morum descriptionem additurum esse; sed frustra, nimirum ne primus versus dilatatus redire videretur. Quare non diffiteor, duram hanc mihi videri redeundi rationem; qua cur opus fuerit nihil videas. — *molesti*] difficiles, quorum alter alteri non cedit. Qui comparantur cum hominibus fortitudine paribus et usque ad mortem pugnantibus; quorum exempla sunt Hector et Achilles. Alia ratio est hominum pugnantium, quorum alter for-

- Quo fortes, quibus adversum bellum incidit: inter
 Hectora Priamiden animosum atque inter Achillem
 Ira fuit capitalis, ut ultima divideret mors,
 Non aliam ob causam, nisi quod virtus in utroque
 15 Summa fuit; duo si discordia verset inertes
 Aut si disparibus bellum incidat, ut Diomedi
 Cum Lycio Glaucō, discedat pigrior ultro
 Muneribus missis. Bruto praetore tenente
 Ditem Asiam, Rupili et Persi par pugnat, uti non
 20 Compositum melius cum Bitho Bacchius. In ius
 Acres procurrunt, magnum spectaculum uterque.
 Persius exponit causam; ridetur ab omni
 Conventu: laudat Brutum laudatque cohortem,
 Solem Asiae Brutum appellat, stellasque salubres
 25 Appellat comites, excepto Rege: canem illum,
 Invisum agricolis sidus, venisse; ruebat
 Flumen ut hibernum, fertur quo rara securis.
 Tum Praenestinus salso multoque fluenti
 Expressa arbusto regerit convicia, durus
 30 Vindemiator et invictus, cui saepe viator

tis, alter ignavus est; quales dicuntur fuisse Diomedes et Glaucus, quamquam Glaucus apud Homerum II. VI, 119 sqq. ignavus non est. Tota autem haec comparatio vitiosa quadam ubertate non caret; neque grata est haec orationis negligentia, qua inchoata narratio (v. 9) statim relinquatur. Versu enim decimo octavo de integro iterum inchoatur; nam quis sic coniungat: „postquam nihil inter utrumque convenit, Bruto praetore tenente Ditem Asiam Rupili et Persi par pugnat?“ — *inter atque inter*] Epist. I, 2, 12. Liv. X, 7, 1. Cic. de amic. 25, 95. De *atque* particula vide ad Epod. 17, 4. — *verset*] Sat. II, 3, 249. II, 7, 94. Alii ex codd. *vetet*. Passim haec verba inter se commutantur a librariis.

V. 20. *Compositum*] par. „Bithus et Bacchius gladiatores optimi illis temporibus fuerunt, qui cum multis interemissent, commissi inter se mutuis vulneribus conciderunt.“ *Schol.* — *ri-*

detur] impersonaliter; non Persius. Rident omnes propter acutam et salsam rei expositionem. Deinde nihil video tumidarum metaphorarum et ridiculae *ἀντιθέσεως* in imaginibus quibus usus esse dicitur Persius. Negotiatori, praesertim agricolae qui magna habuit latifundia illa cum sole et stellis et Cane comparatio haud dubie facilissima fuit. — *fertur quo*] ubi densissima est silva. — *multoque fluenti*] Virg. Georg. III, 28. — *expressa arbusto*] cf. Epist. II, 1, 146. Solebat probro obiici vindemiatoribus, si cuculus eos deprehendisset putantes vineam. Quare viatores si quos vindemiatores sero putantes conspexissent, cuculum clamantes illis conviciari solebant. Quibus conviciis vindemiatores dure satis et rustice respondebant. Rupilius igitur salsis cavillationibus Persii rustica et dura convicia obiicit, ita ut Graeci lepore omnino et facile superetur. — *vindemiator*] pronuntia quattuor sylla-

Cessisset magna compellans voce cuculum.
 At Graecus, postquam est Italo perfusus aceto,
 Persius exclamat: Per magnos, Brute, deos te
 Oro, qui reges consuesti tollere, cur non
 35 Hunc Regem iugulas? Operum hoc, mihi crede, tuorum est.

SATIRA VIII.

Olim truncus eram ficulnus, inutile lignum,
 Cum faber incertus scamnum faceretne Priapum
 Maluit esse deum; deus inde ego, furum aviumque
 Maxima formido: nam fures dextra coërcet
 5 Obscenoque ruber porrectus ab inguine palus:
 Ast importunas volucres in vertice arundo
 Terret fixa vetatque novis considerare in hortis.
 Huc prius angustis eiecta cadavera cellis

bis; vide ad Carm. III, 4, 41. — *consuesti*] Indicativum, qui videtur esse necessarius, recepi ex scholiis Acronis et Porphyriouis et uno cod. Bentleii. Alii *consueris*. — *reges*] ridicule auget rem; nam etiamsi qui audiebant etiam de Tarquinio Superbo sponte sua debebant cogitare, de uno Caesare interfecto dictum est. — *Regem*] Ambiguitatem quae inest in cognomine Regis nos imitari non possumus.

Satira VIII.

In Esquiliiis magnum olim pauperum hominum sepulcretum fuit: qui locus a Maecenate, ad quem nescimus qua ratione his temporibus turbulentis et incertis pervenerat, in amoenos hortos commutatus magnoque aedificio, quam turrim Maecenatianam vocarunt (Carm. III, 29, 9 sq.), ornatus est. In hoc igitur loco etiam ante quam perfecti omnino essent horti Priapi, fertilitatis dei, statua ficulnea posita erat. Quare quasi deum ipsum hac satira narrantem audimus, quam saevas artes ibi a Canidia cum Sagana socia exerceri viderit, quo terrore ac pudore correptus ipse sit, qua denique iocosa ratione veneficas fugaverit. Proxime igitur hoc carmine tangitur Canidia de qua vide Epod. 5, 43; a quo haec satira ita dif-

fert, ut cum in utroque carmine terribiles insanarum mulierum magicae artes tanquam a testibus describantur, illud triste et acerbum, hoc iocosum ac lepidum sit. De tempore huius satirae hoc tantum dici potest, scriptam eam esse ante Epod. 17; reliqua quae viri docti excogitarunt, lubrica sunt ac debilia. Etenim quis inveniatur, satira utrum scripta sit antequam Horatius a Maecenate acceptus sit an postea? Quamquam altera opinio, qua postea scripta dicitur, mihi quoque magis videtur probabilis esse. Alii ad a. 715, alii ad a. 719 vel 720 retulerunt; fuit etiam qui a. 714 satiram scriptam putaret, nullis tamen praesidiis munitis. Neque illud potest investigari, quo anno Maecenas hortos in Esquiliiis fecerit.

V. 1. *inutile lignum*] Lignum ficulneum fragile atque spongiosum; inde Graecis quoque *σύνυος ἄνρη, συνήνη γυνή, συνήνη ἐπινοήσια*. Inutilis iacuit truncus, antequam faber accederet deumque faceret. — *faceretne*] vide ad Carm. II, 7, 25. Priap. 9: „Non me Praxiteles Scopasve fecit, Nec sum Phidiaca manu politus; Sed lignum rude vilius dolavit Et dixit mihi: Tu Priapus esto.“ Similiter Vertumnus apud Propertium IV, 2, 59: „Stipes acernus eram properanti falce dolatus.“ — *eiecta cadavera*]

- Conservus vili portanda locabat in arca;
 10 Hoc miserae plebi stabat commune sepulcrum,
 Pantolabo scurrae Nomentanoque nepoti.
 Mille pedes in fronte, trecentos cippus in agrum
 Hic dabat, heredes monumentum ne sequeretur.
 Nunc licet Esquiliis habitare salubribus atque
 15 Aggere in aprico spatium, quo modo tristes
 Albis informem spectabant ossibus agrum;
 Cum mihi non tantum furesque feraeque suetae
 Hunc vexare locum curae sunt atque labori,
 Quantum carminibus quae versant atque venenis
 20 Humanos animos: has nullo perdere possum

Becker. Gall. T. II. p. 293 (ed. Ima): „Allgemeine Begräbnissplätze für alle Klassen gab es zu keiner Zeit. Wer irgend die Kosten bestreiten konnte, der wählte oder erwarb sich einen Platz ausserhalb der Stadt und zwar an den frequentesten Stellen, namentlich an grossen Landstrassen, wo ein Familienbegräbniss angelegt wurde. Nur für die niedrigste Klasse, für Sklaven und Verurtheilte war der gemeinschaftliche Begräbnissort bis auf August am Esquilinus.“ — *cellis*] miseris servorum cubiculis. — *arca*] Est sandapila, feretrum mortuorum, quo plebeiorum atque damnatorum cadavera portabantur. — *Pantolabo*] „Mallius Pantolabus scurra et Cassius Nomentanus nepos cum omnia bona sua comissando vorassent, ita ut privata sepulcra habere non possent, in Esquiliis publicis sepulti sunt. Mallius autem Pantolabus dictus est, quod ab omnibus acciperet postquam sua omnia comedisset.“ *Comm. Cruq.* cf. Sat. I, 1, 102. II, 1, 22. II, 3, 224. Acerbissima igitur contumelia Priapus dicit, nepotes illos constanti profusione ingens sibi hoc sepulcrum parasse inter pauperes et servos; quod cum dis Manibus consecrassent ne ad heredes transiret prohibuisse. Scilicet heredes nihil omnino acceperunt. Illi autem decoctores etiam tum erant inter vivos. Sic intellige locum; in pauperes et servos inepta esset contumelia. — *cippus*] In sepulcris privatis columna posita indicare solebat, quantum spatium

dis Manibus consecratum esset; veluti IN. AG. P. XII. IN. FR. P. XXIV. Acron: „Nescio quis donavit agrum suum populo ad sepulchra et posuit fines, ut habeant in latitudine mille pedes trecentosque in longitudine.“ De qua re non iniuria videtur dubitatio esse iniecta; nam si per testamentum is locus sepulchris publicis destinatus erat, religione ac legibus prohibebatur, ne in Maecenatis privatam possessionem transiret. Quae si vera est sententia, totus hic locus de cippo ab Horatio facete excogitatus est. — *Herodes*] Solita haec formula: H. M. H. N. S. (hoc monumentum heredes non sequitur). — *salubribus*] Quare Octavianus „aeger in domo Maecenatis cubabat.“ Suet. Oct. 72. — *aggere*] Est agger Tarquinii Superbi, a porta Esquilina usque ad Collinam, unde prospectus patebat in Esquilias. Cic. de Rep. II, 6: „ut unus aditus, qui esset inter Esquilinum Quirinaleque montem, *maximo aggere obiecto*, fossa cingeretur vastissima.“ — *quo*] ex quo. Bentleii coniectura *qua* facile caremus. Insequens versus spondeorum gravitate premitur; apposite ad rem. — *Cum*] i. e. quo tempore (während). *Doeringius* ex coniectura *dum*; *Horkelius*: *quin*. — *feraeque*] Sunt Esquilinae alites (Epod. 5, 100), alia animalia id genus, quae cadavera sequuntur. — *non tantum quantum*] non tam quam. Sat. II, 5, 80. cf. Sat. II, 3, 313. Virg. Georg. IV, 101. Poetis hoc proprium et iis qui poetas secuti sunt.

- Nec prohibere modo, simul ac vaga Luna decorum
 Protulit os, quin ossa legant, herbasque nocentes.
 Vidi egomet nigra succinctam vadere palla
 Canidiam pedibus nudis passoque capillo,
 25 Cum Sagana maiore ululantem; pallor utrasque
 Fecerat horrendas adspectu. Scalpere terram
 Unguibus et pullam divellere mordicus agnam
 Coeperunt; cruor in fossam confusus, ut inde
 Manes elicerent animas responsa daturas.
 30 Lanea et effigies erat, altera cerea: maior
 Lanea, quae poenis compesceret inferiorem;
 Cerea suppliciter stabat servilibus, ut quae
 Iam peritura, modis. Hecaten vocat altera, saevam
 Altera Tisiphonen: serpentes atque videres
 35 Infernas errare canes, Lunamque rubentem,
 Ne foret his testis, post magna latere sepulcra.
 Mentior at si quid, merdis caput inquiner albis
 Corvorum atque in me veniat mictum atque cacatum

V. 21. *Luna*] Epod. 5, 51. cf. etiam ibid. v. 17. — *Vidi egomet*] Hic cum initium habeat ipsa rei narratio, oratio insurgit ad epicam quandam gravitatem. Iam *Schol.* in comparisonem vocarunt Virg. Aen. III, 623. — *nudis*] Compara Medeam apud Ovidium Met. VII, 182. — *Sagana*] Epod. 5, 25. Maior appellatur, vel quia sororem natu minorem habuit, vel quia potentior fuit quam Canidia. cf. v. 41. Non necessaria est coniectura *Nauckii* ad Epod. 5, 25 *maiora*, quod coniungit cum *ululantem*. — *utrasque*] Non necessaria coniectura *utramque*. cf. Virg. Aen. VI, 685. Cic. Ligar. 12, 36. Sal. Cat. 30. Caes. B. G. I, 53. B. C. II, 6. — *cruor*] Hom. Od. XI, 44 sqq. — *Manes*] Frequentissima tum temporis *νεκρομαντεία*. Cic. Tusc. I, 16. Inde apud poetas Manes evocantur, ubicunque grave aliquid et arcanum fit, veluti apud Silium Ital. I, 97 ad Hannibalis sacramentum. cf. Tacit. Ann. II, 28: „Iunius quidam, tentatus, ut infernas umbras carminibus eliceret etc.“ — *responsa*] de felici rei exitu. cf. v. 40 sq. — *Lanea*] Duae erant imagines,

altera lanea quae Canidiam, altera cerea quae hominem, quem magica vi amore sui implere illa vellet, referebat. Lanea maior est ad indicandam maiorem Canidiae potestatem; et lanea est quia lana invulnerabilis et dura est; altera cerea, ut liquescat igni admota. cf. Virg. Bucol. 8, 80. — *atque videres*] Ordo hic est: serpentes atque infernas canes. Hyperbaton vocant grammatici, cuius exempla alia sunt Sat. I, 5, 49. 72. — *lunamque rubentem*] Devocabant sagae lunam et sidera de coelo. Tam atrox autem et foeda res est quae committitur, ut etiam Luna prae pudore rubeat et lateat post magna sepulcra. *Magna autem sepulcra* tumulorum reliquiae sunt; horti enim nondum sunt perfecti.

V. 37. *Mentior*] Priapo timore agitato omnia maiora ac terribiora visa sunt quam vere fuerunt; inde in narratione ridiculae superlaciones ut vv. 26. 27. 34. 35. 36. Iam cum mendacia eius satis nota sint, sacramento fidem sibi facere conatur. — *inquiner*] quod ne fieri posset, statuae sub dio positae operculis tectae erant. — *Pe-*

Iulius et fragilis Pediatia furque Voranus.

40 Singula quid memorem? quo pacto alterna loquentes

Umbrae cum Sagana resonarent triste et acutum,

Utque lupi barbam variae cum dente colubrae

Abdiderint furtim terris et imagine cerea

Largior arserit ignis, et ut non testis inultus

45 Horruerim voces Furiarum et facta duarum.

Nam, displosa sonat quantum vesica, pepedi

Diffissa nate ficus; at illae currere in urbem.

Canidiae dentes, altum Saganae caliendrum

Excidere atque herbas atque incantata lacertis

50 Vincula, cum magno risuque iocoque videres.

SATIRA IX.

Ibam forte via sacra, sicut meus est mos

Nescio quid meditans nugarum, totus in illis;

diatia] Pediatius, Romanus, homo mollissimus et effeminatus i. e. *fragilis*; inde in ludibrium Pediatia appellatus. Cf. Cic. de orat. II, 68, 277: „cum Q. Opimius consularis, qui adolescentulus male audisset, festivo homini Egilio, qui videretur mollior nec esset, dixisset: Quid tu, *Egilia mea*? quando ad me venis cum tua colu et lana? Non pol, inquit, audeo. Nam me ad famosas vetuit mater accedere.“ *Iulius* libertus fortasse C. Iulii Caesaris, mala fama tunc notissimus. — *Voranus*] „Aiunt Voranum Q. Lutatii Catuli libertum fuisse adeo furacem, ut nummos surreptos a nummulario in calceos demiserit.“ *Comm. Cruq.* — *resonarent*] Bentleius reclamantibus codicibus, quo concinnior esset oratio, *resonarint* scribendum censuit. Sed imperfectum tempus iteratos Saganae cum umbris sermones exprimit; contra lupi barba semel tantum abdita est. Deinde forma *resonavi* insolita est, cui ex Sat. I, 4, 44 auctoritas non accedit. — *lupi barbam*] Plin. XXVIII, 10 (44): „Veneficiis rostrum lupi resistere inveteratum aiunt ob idque villarum portis praefigunt.“ Hac barba lupi utuntur ad advertendas alius sagae adversarias artes. cf. Epod. 5, 69. — *abdiderint*

furtim] Non rara apud poetas in eadem sententia adiectivi et adverbii cumulatio. cf. Sat. I, 1, 41. Tibull. I, 8, 60: „Et *strepitu nullo clam* reserare fores.“ id. II, 1, 80: „*placidus leniter* afflat Amor.“ id. II, 6, 45: *furtimque* tabellas *occulto* portans itque reditque sinu. — *cerea*] disyllabum; vide ad Carm. III, 4, 41. — *Furiarum*] Cur Furias appellet, colligas ex Epod. 5, 15. 27. — *dentes*] „locatur in has, quasi altera dentibus appositis uti solita sit, altera, quod glabra fuerit, caliendrum h. e. galericulum sive crinem suppositum habere consuesset.“ *Schol.* *Excidere* verbum non magis est aptum dentibus quam caliendro et herbis; dicunt enim latini *excidere equis*, *excidere arce*, similia. — *vincula*] „amoris, licia ex diversis coloribus, quibus mentes hominum vincebant.“ *Comm. Cruq.* cf. Virg. Bucol. 8, 73.

Satira IX.

Familiaritas Maecenatis Horatio ut obtrectatorium invidiam, de qua sunt satirae 3. 4. 6, ita importunorum hominum molestam sedulitatem contraxerat, qui fortunae filium, quem Horatium esse putabant, admirantes eodem quo ille pervenisset perventuros se quo-

- Accurrit quidam notus mihi nomine tantum,
 Arreptaque manu: Quid agis, dulcissime rerum?
 5 Suaviter, ut nunc est, inquam, et cupio omnia quae vis.
 Cum assectaretur: Num quid vis? occupo. At ille:
 Noris nos, inquit; docti sumus. Hic ego: Pluris
 Hoc, inquam, mihi eris. Misere discedere quaerens,
 Ire modo ocius, interdum consistere, in aurem
 10 Dicere nescio quid puero, cum sudor ad imos
 Manaret talos. O te, Bolane, cerebri
 Felicem! aiebam tacitus, cum quidlibet ille
 Garriret, vicos, urbem laudaret. Ut illi

que confiderent, dummodo primam difficultatem ad Maecenatem perveniendi superassent. Ex hac igitur turba doctorum, ut aiebant, hominum unum poeta arreptum iocosa ac lepida ratione describit. Quo tendit homo importunus, eo per ambages progreditur ita ut consilium suum versu demum 43 aperiat. Haec quoque satira ex eo genere est, quod indicatur supra Sat. I, 4, 137—139. Quo anno haec scripta

Ibam	forte via	sacra	sic	ut	meus	est mos
Ibat	forte aries	inquit	iam	quod	genus	quantis
Nescio —						
Festibus						

V. 1. *via sacra*] vide ad Epod. 4, 7, 7, 8. — *nugarum*] Catull. 1, 4: „Namque tu solebas Meas esse aliquid putare nugas.“ Martial. IX, 1, 5: „Ille ego sum nulli nugarum laude secundus.“ Possunt igitur hoc vocabulo carmina significari; necessarium non est. Verba *sicut m. e. mos* ad meditationem referenda sunt, non ad ambulationem. Animadvertenda est levitas ac paene negligentia narrationis; inde asyndeti figura. — *totus*] Epist. I, 1, 11. — *dulcissime rerum*] Sic coniungenda verba. cf. Ovid. Met. VIII, 49. Her. 4, 125 „pulcherrime rerum.“ Animadvertendum in hoc sermone est Horatii studium urbana quadam ratione molestum hominem abigendi. Inde frigidissime respondet, modo hoc modo illud tentat, ostendit luculenter se solum esse velle; omnia tamen irrita sunt, cum urbanitas poetae duram importuni hominis naturam non vincat. — *cupio omnia*] Urbanitatis hac formula respondetur ad

sit si quaeras, nihil poterit aliud responderi, nisi adulta iam Maecenatis Horatiique amicitia tale quid scribi potuisse; quare haudquaquam magnopere potuerunt errare qui anno 719 vel 720 hanc satiram attribuerunt. Memorabilis est imitatio Lucilii, quam in primo versu cum Luciliano comparato tantum invenimus ut verbum verbo, caesurae caesura respondeat:

officiosi hominis de rerum statu interrogationem. — *Num quid vis?*] Haec valedicentis sunt. Terent. Eun. II, 3, 50: „Rogo num quid velit. Recte, inquit, abeo.“ — *Noris nos*] Coniunctivus pendet ex praecedente verbo *vis*. Simulat enim male sedulus homo, se non intelligere quid illud *num quid vis?* velit. — *docti*] vide ad Carm. I, 1, 29. — *Pluris hoc*] iterum urbane, sed quam frigidissime; nam si diutius eum tenere voluisset poeta aut vere eum magni fecisset, ipse opinor de doctrina et facultatibus plura interrogasset. — *puero*] pedisequo; scilicet ut videretur arcanum habere negotium aut consilium. Quod cum videret alter, nisi impudentissimus fuit, abire debuit. — *Bolane*] Qui quis fuerit nescimus; certum est hominem fuisse durissimum et agrestem, cui nihil notum esset urbanitatis. — *quidlibet garriret*] Ex more hominum, qui, ne subito quo velint tendere videantur, per inanes ambages multa quidem faciunt verba, ni-

- Nil respondebam: Misere cupis, inquit, abire:
 15 Iam dudum video; sed nil agis: usque tenebo;
 Persequar hinc quo nunc iter est tibi. Nil opus est te
 Circumagi: quendam volo visere non tibi notum;
 Trans Tiberim longe cubat is, prope Caesaris hortos.
 Nil habeo quod agam et non sum piger: usque sequar te.
 20 Demitto auriculas, ut iniquae mentis asellus,
 Cum gravius dorso subiit onus. Incipit ille:
 Si bene me novi, non Viscum pluris amicum,
 Non Varium facies: nam quis me scribere plures
 Aut citius possit versus? quis membra movere
 25 Mollius? invidet quod et Hermogenes, ego canto.
 Interpellandi locus hic erat: Est tibi mater,
 Cognati, quis te salvo est opus? Haud mihi quisquam;
 Omnes composui. Felices! nunc ego resto!
 Confice: namque instat fatum mihi triste, Sabella

hil tamen dicunt. Cic. Att. XII, 1: „Garrimus quidquid in buccam venit.“

V. 14. *misere cupis*] Homo dum urbanus vult videri et facetias quaerit, rusticius loquitur. Inde *persequar*, in quo quasi minae sunt, quas ille lepidas habet, praefereudum alteri lectioni codd. *prosequar*, quod innocens est et honorificum. — *cubat*] De aegrotantibus saepius, ut Sat. II, 3, 289. Epist. II, 2, 68. Ovid. Her. 20, 166: „Haec cubat, ille valet.“ — *Caesaris hortos*] in Ianiculo sitos; quo a sacra via horae prope integrae iter faciendum erat. — *piger*] cf. Sat. I, 5, 6. — *subiit*] De ultima syllaba vide ad Carm. I, 3, 36. — *onus*] quartus casus est, ut Epist. I, 7, 33. Carm. III, 4, 8. — *me novi*] cf. Epist. I, 18, 1. Quae verba non dubitationem habent, sed urbanitatem quandam et modestiam, qua nimii sui amoris criminationem ille defendere studet. — *Viscum*] cf. Sat. I, 10, 83, ubi Schol.: „Visci duo fratres fuerunt; pater eorum Vibius Viscus, quamvis et divitiis et amicitia Augusti clarus esset, in equestri tamen ordine perduravit, cum filios suos senatores fecisset.“ De Vario vide ad Carm. I, 6, 1. — *mollius*] Ovid. A. A. I, 595: „Si vox est, canta, si mollia brachia, salta.“ Lucrèt. IV, 577:

Cernere saltantes et mollia membra moventes.“ — *Hermogenes*] vide ad Sat. I, 3, 129. — *est opus*] cf. Sat. II, 6, 116. Idem est quod *expedit*; sic etiam Cic. de off. III, 11. — *haud quisquam*] vide ad Sat. I, 6, 99. — *composui*] Ut nostrum vocabulum *beisetzen* de recens mortuis, qui cognatis olim mortuis in sepulcris adduntur. Tacit. Hist. I, 47: „Pisonem Verania uxor ac frater Scribonianus, T. Vinium Crispina filia composuere.“ Catull. 68, 98: „Nec prope cognatos compositum cineres.“ Virg. Aen. I, 249. Haec verba *haud . . . composui* necessario tribuuntur molesto. Quae deinde insequuntur usque ad v. 34 Horatius tacite cogitat magis quam pronuntiat, atque intelligenda sunt ex vv. *omnes composui*. Ex quibus festive satis colligit poeta, ab homine qui omnes suos composuerit sibi quoque mortem instare. Innocenti enim componendi verbo Horatius ipse necandi aliquam notionem cogitatione addit, quasi alter suos quoque importunitate et molestiis ad mortem cruciaverit. — *Confice*] Sumptum verbum a negotiis, ut Cic. Att. XII, 19: „Tu cum Apella Chio confice de columnis“, unde ad eos transfertur qui alios plane interficiunt, ut Plaut. Truc. II, 7, 52: „Iam hercle

- 30 Quod puero cecinit divina mota anus urna:
 Hunc neque dira venena nec hosticus auferet ensis
 Nec laterum dolor aut tussis nec tarda podagra;
 Garrulus hunc quando consumet cunque: loquaces
 Si sapiat vitet, simul atque adoleverit aetas.
- 35 Ventum erat ad Vestae quarta iam parte diei
 Praeterita, et casu tunc respondere vadato
 Debebat; quod ni fecisset, perdere litem.
 Si me amas, inquit, paulum hic ades. Inteream si
 Aut valeo stare aut novi civilia iura;
- 40 Et propero quo scis. Dubius sum quid faciam, inquit,
 Tene relinquam an rem. Me, sodes. Non faciam, ille,
 Et praecedere coepit; ego, ut contendere durum est
 Cum victore, sequor. Maecenas quomodo tecum?

ego te hic hac offatim conficiam.“ — *Sabella*] vide ad Epod. 17, 28. — *divina*] vide ad Carm. III, 27, 10. De urna cf. Carm. II, 3, 26. III, 1, 16. Virg. Aen. VI, 22. Non est offendendum in coniunctis verbis divinā motā urnā, quoniam longae etiam syllabae eliduntur, ut Sat. I, 1, 101. II, 3, 16. Ep. I, 2, 29. I, 7, 24. I, 14, 37. Virg. Aen. II, 182.; deinde *divina urna* unam quasi efficiunt notionem. „*Anum divinam* vocare poterat, sed *urnam* maluit; id enim *πυριπυώτερον* est, perinde ac si urna ipsa divinaret, unde sortes legebantur.“ Torrent. — *tarda*] cf. Catull. 71, 2: „aut si quem merito tarda podagra secat.“

V. 35. *Vestae*] Vestae templum situm erat ad Forum inter Capitolium et Palatium; haud procul aberat Libonis puteal, ubi iudicia exercebantur. — *quarta parte*] tertia hora. Vide ad Sat. I, 5, 23. Martial. IV, 8: „Prima salutantes atque altera conterit hora, Exercet raucos tertia causicos, In quintam varios extendit Roma labores, Sexta quies lassiss.“ — *respondere*] ad iudicium adesse, ut Varr. ap. Gell. XI, 1, 4: „M. Terentius quando citatus neque respondet neque excusatus est, ego ei unum ovem mulctam dico.“ — *vadato*] ei, qui eum vadatus erat. Cf. Liv. III, 13: „tot vadibus accusator vadatus est reum.“ Cic. Quint. 19: „Debere tibi dicis Quintium, pro-

curator negat: *vadari* vis, promittit: in ius vocat, sequitur: iudicium postulas, non recusat.“ Alii, cum verbum *respondere* in hac formula absolute poni soleat, *vadato* pro ablativo absoluto habebant, ut esset *postquam vadatum est*, ut Sat. I, 1, 94 *parto*; Bentleius ex coniectura *vadatus*: „quippe *vador*, inquit, verbum commune est et nunc active nunc passive accipitur.“ — *perdere litem*] „Contumacia eorum qui ius dicenti non obtemperant litis damno coercetur. Contumax est qui tribus edictis propositis vel uno pro tribus, quod vulgo peremptorium appellatur, litteris evocatus praesentiam sui facere contemnit.“ Digest. LII, 1, 53. *Lis* autem h. l. est summa vadimonii, quae rem, de qua litigabant, aequiparabat. — *me amas*] Solita petendi formula, in qua h. l. *me* vocabulum ante vocalem correptum non colliguescit; cf. Virg. Aen. VI, 507. Bucol. 2, 65. 8, 108. Ovid. Met. III, 501. — *ades*] Summa est arrogantia hominis molesti, quod Horatium petit ut in iudicio advocatus sibi adsit, cf. Cic. de off. I, 10. Advocatos noli confundere cum patronis. — *stare*] in iudicio; idem est quod adesse et astare. — *Maecenas*] Haec verba usque ad *omnes* v. 48 omnia importuno homini tradenda sunt. Cuius quidem hominis natura egregie hic proditur. Ad id quod ipse interrogavit quid responsu-

- Hinc repetit; paucorum hominum et mentis bene sanae;
 45 Nemo dexterius fortuna est usus. Haberes
 Magnum adiutorem, posset qui ferre secundas,
 Hunc hominem velles si tradere: dispeream ni
 Summosses omnes. Non isto vivimus illic,
 Quo tu rere, modo: domus hac nec purior ulla est
 50 Nec magis his aliena malis; nil mi officit, inquam,
 Ditiior hic aut est quia doctior; est locus uni
 Cuique suus. Magnum narras, vix credibile! Atqui
 Sic habet. Accendis quare cupiam magis illi
 Proximus esse. Velis tantummodo: quae tua virtus,
 55 Expugnabis; et est qui vinci possit, eoque
 Difficiles aditus primos habet. Haud mihi deero:
 Muneribus servos corrumpam; non, hodie si
 Exclusus fuero, desistam; tempora quaeram;
 Occurram in triviis; deducam. Nil sine magno
 60 Vita labore dedit mortalibus. Haec dum agit, ecce

rus sit Horatius non exspectat, sed continuata statim oratione Maecenatem laude, qua eum extollit, Horatium spe, quam ei excitare studet, simul offendit. Utrumque enim se meliorem non ducit. — *paucorum hominum*] i. e. paucis quidem et egregiis familiaribus utitur. Sic Terent. Eun. III, 1, 19: „Immo sic homo est *perpaucorum hominum*. Gn. Immo *nullorum*, arbitror, si tecum vivit.“ — *dexterius*] quam Maecenas. Alii *Nemo* ad Horatium retulerunt; non bene, arbitror. Nam ne obscurius dictum videretur, pronomen *te* addi debebat. — *ferre secundas*] sc. partes; ab histrionibus hoc sumptum, inter quos *δευτεράγωνιστῆς πρωταγωνιστῆν* quam maxime adiuvat. — *hunc hominem*] *δειντικῶς* ad se ipsum. — *summosses*] ut Carm. II, 16, 10. II, 10, 17. Sumptum vocabulum ab hominibus in via festinantibus aut iter per hominum catervas sibi facientibus. De Syncope vide ad Sat. I, 5, 79. Plusquamperfecto tempore, cum ipsa commendatio ut iam facta ponatur, nihil certius esse indicatur quam Horatii de rivalibus, quos ille somniat, victoriam. — *rere*] Sat. II, 3, 134. Verbum poetis usitatus est

quam prosae orationis scriptoribus, quamquam Cicero etiam et Livius eo utuntur, non Caesar. Quintilianus VIII, 3, 26 horridum appellat. — *inquam*] Sic cum antiquissimis codd., etiam Blandiniis Cruq., Bentleius et Hauptius, quos nunc secutus sum. Alii *inquam*. — *uni Cuique*] vide ad Sat. I, 2, 62.

V. 52. *Magnum*] Importuni hominis sunt, qui tamen quominus consilium suum exsequi studeat non deterretur. Itaque cum Horatius rem ita sese habere confirmaverit, maiore etiam studio inflammari se ait. Artes tamen quibus aditum ad Maecenatem sibi se paraturum sperat, vilem hominis animum iterum testantur. — *haud mihi deero*] cf. Sat. II, 1, 17. II, 2, 98. — *deducam*] Cic. ad Fam. X, 12, 2: „Cum magna multitudo optimorum virorum et civium me de domo deduceret;“ cum quo loco cf. Cic. pro Mur. 34. — *labore*] cf. Eurip. Androm. 14: „ἐν κλειαν ἔλαβον οὐκ ἄνευ πολλῶν πόνων.“ Archil. fr. 8: „ἀλλ’ οἱ πόνοι τίλπουσι τὴν εὐδοξίαν.“ Hesiod. O. et D. 287: „τῆς ἀρετῆς ἰδρωῖτα θεοὶ προπάροιδεν ἔθνηκιν.“ Epicharm. fr. apud Xenoph. Mem. II, 1, 20: „τῶν

Fuscus Aristius occurrit, mihi carus, et illum
 Qui pulchre nosset. Consistimus. Unde venis? et,
 Quo tendis; rogat et respondet. Vellere coepi
 Et prensare manu lentissima brachia, nutans,
 65 Distorquens oculos, ut me eriperet. Male salsus
 Ridens dissimulare; meum iecur urere bilis.
 Certe nescio quid secreto velle loqui te
 Aiebas mecum. Memini bene; sed meliore
 Tempore dicam: hodie tricesima sabbata: vin tu
 70 Curtis Iudaeis oppedere? Nulla mihi, inquam,
 Religio est. At mi, sum paulo infirmior, unus
 Multorum. Ignoscas; alias loquar. Huncine solem
 Tam nigrum surrexe mihi! Fugit improbus ac me
 Sub cultro linquit. Casu venit obvius illi
 75 Adversarius, et: Quo tu turpissime? magna
 Inclamat voce, et: Licet antestari? Ego vero

πόνων Πωλοῦσιν ἡμῖν πάντα τὰ γὰρ οἱ θεοί.“ — *Fuscus Aristius*] vide ad Carm. I, 22. — *pulchre*] Ex sermone familiari et quotidiano, ut Cic. ad Fam. X, 23: „Lepidum pulchre noram;“ et inest quaedam ironia, ut Plaut. Mil. II, 4, 50: „Si ad herum haec res pervenit, peristi pulchre.“ — *prensare*] Sic meliores libri MSS., in aliis *pressare*. *Vellere* ad togam referendum, non ad brachia. Ovid. A. A. I, 606: „Velle latus digitis et pede tange pedem.“ — *lentissima*] quasi nihil sentiant. Tac. Ann. I, 65: „lenta adversus imperia aures.“ Tibull. IV, 11, 6: „Nostra potes lento pectore ferre mala?“ Aliter Epod. 15, 6. — *Male salsus*] intempestive, ut Carm. IV, 6, 14. Sat. II, 1, 20. — *iecur*] vide ad Carm. I, 13, 4. — *tricesima sabbata*] Ad interpretandum hunc locum quaecunque excogitari potuerunt ab interpretibus tentata sunt. Inde alii in paschatis festum inciderunt, alii in scenopodia, alii denique in neomeniam. Et nisi forte Aristius certus satis, a nemine se facile refelli posse, primum quemque numerum sabbatorum, non certum festi alicuius diem nominavit, veri videtur simillimum neomeniae festum indicari, ut *tricesima sabbata*

sint sabbata tricesimo die habita. In comparisonem vocari potest locus Ovid. A. A. I, 76: „Cultaque Iudaeo septima sacra Syro,“ ubi septima sacra haud dubie sunt quae septimo die habentur. — *curtis*] circumcisis. Iudaei creduli et religiosi et anxii in observandis praeceptis sacris Romanis saepe sunt ludibrio. cf. Sat. I, 5, 100. I, 4, 143. De cultu Iudaico Romae cf. Iuven. XIV, 96 sqq.: „Quidam sortiti metuentem sabbata patrem Nil praeter nubes et coeli numen adorant, Nec distare putant humana carne suillam, Qua pater abstinuit; mox et praepudia ponunt, Romanas autem soliti contemnere leges, Iudaicum ediscunt et servant et metuunt ius, Tradidit arcano quodcunque volumine Moses, Non monstrare vias, eadem nisi sacra colenti, Quaesitum ad fontem solos deducere verpos.“ — *vin*] ex usu quotidiano et comicorum; factum ex *visne*. — *infirmior*] „Quid mirum igitur, si in auspiciis et in omni divinatione *imbecilli animi* superstitiosa ista concipiant, verum dispicere non possint.“ Cic. de divin. II, 39. — *huncine solem*] Haec quoque et omnia usque ad *linquit* Horatii sunt non narrantis sed exclamantis, cum ab Aristio desereretur. — *ad-*

Oppono auriculam. Rapiſ in ius; clamor utrimque,
Undique concursus. Sic me ſervavit Apollo.

SATIRA X.

*Lucili, quam sis mendosus, teste Catone
Defensore tuo pervincam, qui male factos
Emendare parat versus, hoc lenius ille,
Est quo vir melior, longe subtilior illo,
5 Qui multum puer et loris et funibus udis
Exhortatus, ut esset opem qui ferre poetis
Antiquis posset contra fastidia nostra,
Grammaticorum equitum doctissimus. Ut redeam illuc.*

versarius] Necessario idem est qui hunc hominem vadatus erat, non alius. Videtur enim adversario ea aetate licuisse contumacem reum, quo citius res dirimeretur, obtorto collo in ius rapere. — *auriculam*] Vellere aurem admonentis est. Virg. Buc. 6, 4. *Schol.* „Solebant testium aures tenere et ita dicere: memento quod tu mihi in illa causa testis eris, quod est antestari.“ — *Apollo*] in cuius tutela sunt poetae.

Satira X.

Ad confirmandum quod quarta huius libri satira factum erat iudicium de Lucilio Horatius praeter risus movendi artem alia quoque requiri docet quibus bona efficiatur satira, nimirum magnam curam collocandam esse in ipso scribendi ac describendi genere, ne vitiosa verborum ubertate oratio et languescat ipsa et audientes taedio obruat neve neglecta rerum locorumque diversa natura urbani sales severaeque doctrinae male confundantur (v. 1—19). Aliud quoque vitium Lucilii in ea re cerni, quae ab ineptis talium rerum iudicibus hominibusque recto pulchri sensu destitutis laudi ei tribuatur; solere eum latinis versibus graeca admiscere, qua ratione nihil esse aut invenustius aut facilius aut periculosius. Quare se graeca poemata, quae olim adolescentulus fecisset, omnia ad perpetuam oblivionem damnasae generis aliquid occupasse, cui vires suas sufficere sensisset. Id genus satiricum

esse; in quo si operam collocaret, nolle se de Lucilii veris laudibus quidquam detrachere (v. 50). Iniquos igitur esse qui ipsum, quod ea quae vituperanda essent in Lucilio vituperasset, reprehenderent; ne summos quidem poetas aequo ac vero iudicio sese debere subtrahere, iustumque esse in Lucilio quoque quae pravorum versuum duraeque formae fuisset causa quaerere (v. 64). Immo vero non esse dubium, quin ipse Lucilius, si tunc etiam viveret, multa corrigeret; multa politius limaret, redundantia detraheret. Non debere poetam offendi limae labore et mora (cf. A. P. 290 sq.), lima poematis diuturnitatem parari et verorum iudicium assensum et approbationem. Atque eos qui recte possent iudicare solos esse respiciendos, reliquos iure negligendos. Sic sese sibi persuasisse; quapropter nihil se malevolorum et imperitorum hominum iudicio moveri satis contentum ac beatum approbatione bonorum poetarum prudentiumque artium ac litterarum existimatorum. — Hac igitur satira, quam quasi quandam custodem et comitem toti libro edendo addidit, liberali ac plena ratione se comparavit cum Lucilio, quem tanquam inique iudicatum et longe se maiorem ab invidio quodam genere hominum sibi opponi saepe audiebat. Quo intervallo haec satira post quartam scripta sit, non poterit inveniri; suspicantur viri docti compositam eam esse anno vel 718 vel 719, nec fortasse iniuria; nam

- Nempe incomposito dixi pede currere versus
 Lucili: quis tam Lucili fautor inepte est,
 Ut non hoc fateatur? At idem, quod sale multo
 Urbem defricuit, charta laudatur eadem.
- 5 Nec tamen hoc tribuens dederim quoque cetera; nam sic
 Et Laberi mimos ut pulchra poëmata mirer.
 Ergo non satis est risu diducere rictum
 Auditoris; et est quaedam tamen hic quoque virtus;
 Est brevitae opus, ut currat sententia neu se
- 10 Impediat verbis lassas onerantibus aures;
 Et sermone opus est modo tristi, saepe iocoso,
 Defendente vicem modo rhetoris atque poëtae,
 Interdum urbani, parcentis viribus atque
 Extenuantis eas consulto. Ridiculum acri
- 15 Fortius et melius magnas plerumque secat res.

quibus annus 723 magis placuit, iis non assentior. — Octo versus in fronte carminis inclinatis litteris expressi merito ab Horatio abiudicati sunt. Ne sunt quidem in omnibus codicibus.

V. 1. *nempe*] „Concedentis, quasi diceret: fateor me dixisse.“ Comm. Cruq. Imitatus Horatium Persius est Sat. III, 1: „Nempe hoc assidue;“ uterque poeta lectorem rapit in medias res. — *dixi*] Sat. I, 4, 7. 8. — *incomposito*] rudi. Virg. Georg. I, 350. Quintil. X, 1, 66: „rudis in plerisque et incompositus.“ — *sale multo*] Catull. 86, 4: „nulla venustas, Nulla in tam magno est corpore mica salis.“ Cic. Brut. 34: „P. Scipio omnes sale facetiisque superabat.“ id. Tusc. V, 19, 55. cf. Hor. Epist. II, 2, 60. De Lucilio haec leguntur apud Quintilianum X, 1, 94: „Ego quantum ab illis, tantum ab Horatio dissentio, qui *Lucilium fluere lutulentum* et *esse aliquid quod tollere possis* putat (Sat. I, 4, 11). Nam et eruditio in eo mira et libertas atque inde acerbitas et abunde salis. Multo est tersior ac purus magis Horatius et ad notandos hominum mores praecipuus.“ — *charta*] Sat. I, 4, 7. cf. Sat. I, 5, 104. Carm. IV, 9, 31. Epist. II, 1, 35. 161. 270. A. P. 310. — *dederim*] verbum hoc in disputationibus frequentissimum, ut Cic. Tusc. I,

11, 25. Hor. Epist. II, 1, 125. — *Laberi*] Macrob. Sat. II, 7: „D. Laberium, asperae libertatis equitem Romanum, Caesar quingentis milibus invitavit, ut prodiret in scenam et ipse ageret mimos quos scriptitabat.“ Et Cic. ad. Fam. XII, 18: „Equidem sic iam obdurai (a. u. c. 709), ut ludis Caesaris nostri aequissimo animo audirem Laberii et Publii (Syri) poemata“ Obiit Laberius Ol. CLXXXIV, 2 sive a. 711 (Varr.) ineunte. — *rictum diducere*] nam ridentes *labra diducunt*, ut dicit Quintil. XI, 3, 81, unde rictus efficitur. — *currat*] Cave ne quid nimii motus in hoc verbo invenias. Comparatur oratio rivo facili motu aquarum fluenti; ut apud Ciceronem Fin. V, 28, 84: „Proclivi currit oratio, venit ad extremum, haeret in salebra.“ — *rhetoris atque poetae*] Utrique enim dignitas gravitasque orationis propria; contra quam ponitur urbani hominis levitas; de quo Quintil. VI, 3, 105: „Urbanus homo erit cuius multa bene dicta responsaque erunt, et qui in sermonibus, circulis, conviviis, item in concionibus, omni denique loco ridicule commodeque dicit. *Risus erunt, quicumque haec faciet orator.*“ — *secat*] cf. Epist. I, 16, 42; de qua re memor sis velim eius rei quam narrat lepide Horatius Sat. I, 7. — *qui-*

Illi scripta quibus comoedia prisca viris est
 Hoc stabant, hoc sunt imitandi; quos neque pulcher
 Hermogenes unquam legit, neque simius iste
 Nil praeter Calvum et doctus cantare Catullum.

20 At magnum fecit, quod verbis Graeca Latinis
 Miscuit. O seri studiorum! quine putetis
 Difficile et mirum, Rhodio quod Pitholeonti
 Contigit? At sermo lingua concinnus utraque
 Suavior, ut Chio nota si commixta Falerni est.

25 Cum versus facias, te ipsum percontor, an et cum
 Dura tibi peragenda rei sit causa Petilli?
 Scilicet oblitus patriaeque patrisque, Latine

bus viris] Sat. I, 4, 1. De verborum constructione vide ad Epod. 2, 37. — *stabant*] Sollemne hoc verbum de fabulis quae populo placebant; ut Epist. II, 1, 176. Terent. Phorm. prol. 9: „Quodsi intelligeret, cum stetit olim nova (fabula), Actoris opera magis stetisse quam sua cet.“ Translatum etiam ad oratores; Cic. orat. 28: „Magnus orator, si semel *constiterit*, nunquam *cadet*.“ Pronomen autem *hoc* omnem in re describenda et exornanda curam (v. 9—16) comprehendit. — *Hermogenes*] Sat. I, 4, 72. I, 9, 25. I, 3, 129, ubi vide. Cum Hermogene qui coniungitur *simius iste*, Marcus quidam Demetrius poeta esse dicitur, ob deformitatem brevemque staturam simius appellatus; „in quo nomine, inquit *Weichertus* lat. poet. reliq. p. 289, convicium inesse manifestum fit ex oppos. *pulcher Hermogenes*, quod et ipsum *εἰρωνικῶς* accipi debet. Sicut enim Hermogenes ob affectatam formae habitusque elegantiam *pulcher* i. e. der Stutzer vocatur, ita Demetrius, quia deformis esset brevisque staturae, simius, das Affengesicht, audit.“ — *Calvum*] C. Licinius Calvus, orator et poeta, Catulli amicus, praematura morte circiter a. u. c. 706 extinctus est. C. Valerius *Catullus*, natus in Sirmione peninsula lacus Benaci a. 668, non videtur ante a. 707 mortuus esse. Horum igitur nugae isti homines cantabant (cf. v. 91), Graeca et maiora et digniora negligebant. Cantare autem cum contemptu dictum est de vocis modulatore et mimarum

doctore. Noli tamen credere, etiam Catullum et Calvum h. l. oblique vituperari.

V. 21. *seri studiorum*] Quam suam *ὀψιμαθίαν* et ignorantiam ipso illo probabant iudicio; et „*ὀψιμαθεῖς* homines scis quam insolentes sint.“ Cic. ad Fam. IX, 20. De re lege Cicer. de off. I, 31. — *quine*] *Ne* part. relativo pronomini adiuncta interrogationi vehementiam aliquam addit; Plaut. Mil. I, 1, 66: „Quaene ambae obsecraverint?“ — *Pitholeonti*] *Weichert.* l. I. p. 333 annot.: „Pitholeon Rhodius videtur esse Pitholaus ille, qui C. Iulii Caesaris existimationem male-dicentissimis carminibus laceravit, auctore Sueton. c. 75. Is, cum nomen Pitholaus, *Πειθόλαος*, in hexametrum versum non veniret, Horatio dictus est Pitholeon, *Πειθόλεως*, *Πειθολέων*, ut *Τιμόλαος*, *Τιμολέων* et id genus alia.“ — *Chio*] Chia vina dulcia erant, Falerna austera. De *nota* vide ad Carm. II, 3, 8. — *causa Petilli*] vide ad Sat. I, 4, 94. Non magis igitur Graeca admiscenda sunt in poematis quam si quis in iudicio idem vellet conari. In patrio sermone vera vis inest; quare orator ut populum iudicesve moveat peregrino non utitur. — *Latine*] Quamquam in plerisque Codd. legitur *patriisque Latini*, tamen ipsum verbum exsudandi (cf. Liv. IV, 13. V, 5) definitione aliqua indiget, ne magni oratores, ut Pedius Poplicola et M. Valerius Poplicola Mesalla Corvinus, in perferendis causis magnam operam omnino collocasse, sed *latine* dixisse

- Cum Pedius causas exsudet Poplicola atque
 Corvinus, patriis intermiscere petita
 30 Verba foris malis, Canusini more bilinguis.
 Atqui ego cum Graecos facerem natus mare citra
 Versiculos, vetuit me tali voce Quirinus,
 Post mediam noctem visus, cum somnia vera:
 In silvam non ligna feras insanius ac si
 35 Magnas Graecorum malis implere catervas.
 Turgidus Alpinus iugulat dum Memnona dumque
 Defingit Rheni luteum caput, haec ego ludo,
 Quae neque in aede sonent certantia iudice Tarpa
 Nec redeant iterum atque iterum spectanda theatris.
 40 Arguta meretrice potes Davoque Chremeta
 Eludente senem comis garrire libellos
 Unus virorum, Fundani; Pollio regum

dicantur, i. e. eleganter et aperte, nullo dolo, nulla ambiguitate verborum. Cic. de opt. gen. or. 2: „pure et emendate, quod est latine.“ Hoc tamen celare nolo, non iniuria dubitasse Bentleium, num recte possit dici *latine exsudare*. Q. Pedius, filius ex sorore C. Iulii Caesaris, uxorem habuit Valeriam atque e filio Quinto nepotem natura mutum. Itaque adoptavit filium alterum Messallae maioris, qui inde Pedius dictus est. Corvinus igitur Pedii frater fuit, uterque Poplicola. — *bilinguis*] Canusii, Apuliae oppido, et Graeco et Osco sermone utebantur. — *atqui ego*] Sic plurimi codd. et antiquae editiones; in aliis *atque* ex frequenti particularum confusione. Opponitur tamen haec de Quirino fabula praecedenti perversae adversariorum opinioni. — *somnia vera*] cf. Plat. Criton. p. 44. A. Hom. Od. IV, 841. — *Alpinus*] Significatur hoc lepido nomine M. Furius Bibaculus Cremonensis, natus a. u. c. 651, qui cum in Aethiopide descripsisset, quomodo Memnon, Tithoni et Aurorae filius, a Priamo in auxilium vocatus, ab Achille interfectus esset, ab Horatio facete dicitur ipse iugulasse Memnonem; quippe mala caedis descriptio altera quasi quaedam iugulatio est. Praeterea Furius scripserat *παγαγεῖν* belli Gallici a

Caesare gesti, quam exorsus erat hoc versu: „Iuppiter hibernas cana nive conspuat Alpes;“ propter quem versum ab Horatio Sat. II, 5, 41 salsa *παγαγεῖν* repetitum h. l. *Alpinus* iocose appellatur. Et probabile est, in eadem narratione belli Gallici fontem Rheni fluvii *Rheni luteum caput* appellatum ac tumidis imaginibus descriptum esse; id quod eo facilius fieri potuit quo minus tum Romanis notus erat Rheni fons, nisi forte recte viderunt, qui *caput* non fontem sed ostium Rheni significare putarunt, ut apud Caes. b. g. IV, 10. Scilicet ostium arenosum est et potuit appellari *luteum*, fons Rheni non potest. cf. A. P. v. 18. — *defingit*] Rarissimum hoc vocabulum, quod haud dubie reprehensionem h. l. continet ut simile verbum *deformare*. — *aede*] Musarum. — *Tarpa*] A. P. 387. Sp. Maecio Tarpae cum aliis quatuor iudicibus cura tradita erat fabularum aut mimorum diiudicandorum; a quibus quae non essent probata, in scenam non deferebantur.

V. 40. *Davoque Chremeta*] Personae ex Andria Terentiana; Davus servi nomen est. Scripsit igitur Fundanius comoedias. cf. Sat. II, 8. 19. — *comis garrire*] comis est lepidus, ut Sat. II, 8, 76; et nominativus est, non vocativus neque accus. plur. — *Pollio*] cf.

- Facta canit pede ter percusso; forte epos acer
 Ut nemo Varius ducit; molle atque facetum
 45 Virgilio annuerunt gaudentes rure Camenae.
 Hoc erat, experto frustra Varrone Atacino
 Atque quibusdam aliis, melius quod scribere possem,
 Inventore minor; neque ego illi detrahere ausim
 Haerentem capiti cum multa laude coronam.
 50 At dixi fluere hunc lutulentum, saepe ferentem
 Plura quidem tollenda relinquendis. Age, quaeso,
 Tu nihil in magno doctus reprehendis Homero?
 Nil comis tragici mutat Lucilius Atti?
 Non ridet versus Enni gravitate minores,
 55 Cum de se loquitur non ut maiore reprensus?
 Quid vetat et nosmet Lucili scripta legentes
 Quaerere, num illius, num rerum dura negarit

Carm. II, 1, 9. Praeterea animadvertite aptam verborum varietatem: garrere comoediam, canere tragoediam, ducere epica carmina. cf. Epist. II, 1, 225. — *facta*] nefanda, dira facta heroum, quae in tragoediis quoque describuntur. Attamen *Horkelius*, ne quae epicorum essent tragicis tribuerentur, coniecit *fata* esse scribendum; blande quidem, sed, ut videtur, nimis acute. — *pede ter percusso*] „Tragoedia trimetris versibus fere textitur“ Comm. Cruq. In singulis dipodiis pede percusso numerus a tibicine indicabatur, ita ut percussio idem sit quod *ictus*, *ῥυθμός*. — *facetum*] Quintil. VI, 3, 19: Facetum quoque non tantum circa ridicula opinor consistere. Neque enim diceret Horatius, facetum carminis genus natura concessum esse Virgilio. Decoris hanc magis et exultae cuiusdam elegantiae appellationem puto. Ideoque in epistolis Cicero haec Bruti refert verba: „Nae illi sunt pedes faceti ac deliciis ingredienti (v. ingrediendi) molles.“ „Quod convenit cum illo Horatiano *molle atque facetum Virgilio*. — *annuerunt*] De correpta syllaba cf. Epod. 9, 17. Epist. I, 4, 7. — *Varrone Atacino*] P. Terentius Varro, ab Atace (nunc *Aude*) Narbonensis Galliae fl. Atacinus dictus, a. u. c. 672—717, ad exemplum Apol-

lonii Argonautica, deinde satiras, elegias, Cosmographiam, carmen de Caesaris bello Aquitanico scripsit. De eo Quintil. X, 1, 87: „Atacinus Varro in iis per quae nomen est assecutus, interpretes operis alieni, non spernendus quidem, verum ad augendam facultatem dicendi parum locuples.“ — *quibusdam aliis*] Incertum est quos indicaverit; scimus tamen Saevium aliquem Nicanorem, T. Quintium Attam (Epist. II, 1, 79) alios satiras scripsisse. — *inventore minor*] Lucilium inventorem satirici generis dici docent ea quae adduntur. cf. Sat. II, 1, 62 sq. 74 sq. — *tollenda*] recidenda. cf. Sat. I, 4, 11. — *doctus*] ironice positum. — *Atti*] L. Attius natus a. u. c. 584, tragoediarum nobilissimus scriptor. Epist. II, 1, 56. De Ennio vide ad Carm. IV, 8, 20. — *maiore reprensus*] Lucilius etsi in Attio et Ennio quae sibi non placerent reprehendebat, tamen se reprehensis maiorem non gloriabatur. Idem igitur de se quoque iudicandum ait Horatius. — *num illius*] Hoc quaeritur, utrum carminis an Lucilii natura factum sit ut versiculos tam duros parumque politos fecerit. Inter se opponuntur duae particulae *num*; neque in iis quidquam inest negationis, utpote in obliqua interrogatione, Deinde ne simpliciter di-

- Versiculos natura magis factos et euntes
 Mollius ac si quis pedibus quid claudere senis,
 60 Hoc tantum contentus, amet scripsisse ducentos
 Ante cibum versus, totidem coenatus; Etrusci
 Quale fuit Cassi rapido ferventius amni
 Ingenium, capsis quem fama est esse librisque
 Ambustum propriis. Fuerit Lucilius, inquam,
 65 Comis et urbanus, fuerit limatior idem
 Quam rudis et Graecis intacti carminis auctor
 Quamque poetarum seniorum turba; sed ille,
 Si foret hoc nostrum fato dilatus in aevum,
 Detereret sibi multa, recideret omne quod ultra
 70 Perfectum traheretur, et in versu faciendo
 Saepe caput scaberet, vivos et roderet ungues.
 Saepe stilum veritas iterum quae digna legi sint
 Scripturus, neque te ut miretur turba labores,
 Contentus paucis lectoribus. An tua demens
 75 Vilibus in ludis dictari carmina malis?

ceret *versiculos euntes mollius quam suos*, hanc partem *quam suos* similitudine dilatavit ac descripsit qua Sat. I, 4, 9. Iam nihil offendes in hoc loco, cum verba *hoc tantum*, quippe quae proxime praecedentem sententiam repetant, quodammodo abundare et infin. *claudere* ab adi. *contentus* suspensum esse intellexeris. Simul vero vides, quanta his additis accedat vis verbis *pedibus quid claudere senis*; nam hoc quidem minimum est quod curare debeat poeta. — *ac si*] i. e. quam si. cf. Sat. I, 2, 21.

V. 61. *Etrusci Cassi*] Diversus hic a Cassio Parmensi. Epist. I, 4, 3. Hic igitur Etruscus permulta scripsit, ita ut festinatione prope ardesceret. Iam cum nescio quo casu magna eius librorum et chartarum multitudo flammis corripere, ut ipse undique libris et igne circumventus vitam aegre servaret, malevoli quidam derisores ipsum suo fervore libros incendisse urbane affirmabant. Si pauciores eius fuissent libri, nihil inde factum esset periculi. Eam puto esse *famam* de Cassio divulgatam, qua certam aliquam

rem significari apertum est. Illud autem quod Scholiastae tradunt, Cassio mortuo decrevisse senatum, ut libri cum cadavere comburerentur, ridiculum est ipsorum ex hoc loco commentum. *Amburitur* qui flammis undique cinctus uritur; neque est necessarium cum igne simul perire. cf. Cic. Mil. 5, 12 ac saepius amburi dicuntur qui fulmine tacti non necantur. — *Graecis intacti carminis auctor*] Concedam, inquit Horatius, libenter Lucilium limatiorem fuisse quam in homine, qui genus aliquod poeticum rude adhuc et a Graecis intactum primus tentare audeat, exspectari possit. — *poetarum seniorum*] Livii Andronici, Cn. Naevii, Pacuvii, Attii, Ennii, aliorum. — *dilatus*] si vita eius in nostram aetatem incidisset. — *traheretur*] Quae iustum modum superant, aegra et molesta trahuntur. — *vivos ungues*] usque ad vivam carnem; prostant pars unguium vita caret, inde ipsi vivi dicuntur. — *stilum veritas*] Superiore i. e. lata stili parte obliterari solebant male exarata.

V. 74. *paucis lectoribus*] sed quibus rectum sit iudicium. — *ludis*] cf.

- Non ego: nam satis est equitem mihi plaudere, ut audax
 Contemptis aliis explosa Arbuscula dixit.
 Men moveat cimex Pantilius, aut cruciet quod
 Vellicet absentem Demetrius, aut quod ineptus
 80 Fannius Hermogenis laedat conviva Tigelli?
 Plotius et Varius, Maecenas Virgiliusque,
 Valgius et probet haec Octavius optimus atque
 Fuscus et haec utinam Viscorum laudet uterque.
 Ambitione relegata te dicere possum,
 85 Pollio, te, Messalla, tuo cum fratre simulque
 Vos, Bibuli et Servi, simul his te, candide Furni,
 Complures alios, doctos ego quos et amicos
 Prudens praetereo; quibus haec, sunt qualiacunque,
 Arridere velim, doliturus si placeant spe
 90 Deterius nostra. Demetri, teque, Tigelli,
 Discipularum inter iubeo plorare cathedras.
 I, puer, atque meo citus haec subscribe libello.

Epist. I, 20, 17. — *Arbuscula*] Mima fuit eximia; quae cum aliquando a multitudine exsibilata, a paucis equitibus laudata esset, horum se prudentium laudem imperitae multitudinis vituperationi longe praeferre dixit. Cic. ad Att. IV, 15, 6: „Quaeris nunc de *Arbuscula*; valde placuit.“ — *Pantilius*] Nomen est mali poetae, qui cum clam adversarios pungeret, *cimex*-acerbe dicitur. — *Demetrius*] idem qui supra v. 18 simius audit. — *Fannius*] Fannius Quadratus. Sat. I, 4, 21. — *Plotius*] vide ad Sat. I, 5, 40. De Valgio ad Carm. II, 9, de Aristio ad Carm. I, 22, de Viscis ad Sat. I, 9, 22. Octavius poeta fuit et historicus. — *cum fratre*] Pedius Poplicola; vide supra ad v. 28. — *Bibuli*] Sic omnes codices, quos cur plurimi editores post Bentleyum reliquerint non satis causae esse video. Etenim quidni pluralem cum singulari *Servi* coniungat Horatius? Nec cum Orellio in eo haerendum

est, quod Bibulos nomine, Servium praenomine indicavit. Suspiciantur significari filios M. Calpurnii Bibuli et Ser. Sulpicii Rufi Icti, trib. pleb. a. u. c. 706. — *Furni*] „C. Furnius historicarum fide et elegantia claruit.“ *Comm. Crug.* — *plorare*] flebili ac molli voce cantare; vide supra ad v. 19. De his *Acro*: „Hi modulatores fuerunt et docuerunt puellas ingenuas modos, quia hoc tempore maximum earum studium fuit affectandi lyricam disciplinam.“ Ambigue dictum est; nam Graeci, cum mala imprecarentur, dicebant *κλέειν, οἰμῶζειν κελένω σε*. cf. Sat. II, 1, 46. 5, 69. — *cathedras*] feminarum sedilia, molliora et delicatiora. — *haec subscribe*] Finis sic imponitur toti libro; *haec* enim non ad extrema solum de Demetrio ac Tigellio dicta referenda sunt sed ad totam hanc satiram. Solebant autem Romani non ipsi scribere sed pueris dictare.

Q. HORATHI FLACCI

S A T I R A R U M

LIBER SECUNDUS.

SATIRA. I.

Sunt quibus in satira videor nimis acer et ultra
Legem tendere opus; sine nervis altera quidquid

Satira I.

Ultima haec omnium satirarum alteri libro quasi prologus addita liberimam habet et perfectam totius generis defensionem. Nam cum inter eos qui editis satiris laesos se sentirent haud dubie multi eo irae progredirentur, ut malignum quem putarent poetam iniuriarum posse accusari arbitrarentur, Horatius nunc simulat se C. Trebatium Testam, iuris peritissimum, de ea re consulere; qui olim Ciceronis amicus, a. u. c. 707 tribunus plebis, si tunc etiam vixit, sexagenarius fere fuit. Hunc igitur quid in tanta adversariorum malorumque hominum ira faciendum sibi praescribat rogat, ostendens simul neque malitia aut invidia ductum ad satiras scribendas se pervenisse neque ipsas satiras ita esse comparatas, ut innocentes adorirentur, immo vero et ipsum pacis esse amantissimum (v. 43 sq.) et satiras natura placidas illatas solum iniurias defendere (v. 39); neque ab animo se posse impetrare, quin quae viderit iniqua et iniusta et improba ea summisserat ferat aut scribendi studium quo agatur ad aliam rem suis facultatibus altiore convertat (v. 6—17), quoniam hoc genus a natura sibi quasi arma datum sit, quibus ita utatur ut lupus dente et cornu taurus (v. 47 sqq.). Neque ait se timere ne magni homines et in civitate potentes ideo sibi magis succenseant quam Lucilio idem olim facienti Laelius aut

Scipio (v. 60 sqq.). Quae cum refellere non possit Trebatius, monet tamen ne propter mala carmina actio iniuriarum ipsi aliquando intentetur, cum fortasse quid leges de iis praescripserint nesciat. Iam ne leges quidem timendas sibi esse ait poeta, quoniam quae ipse Caesar Octavianus probaverit carmina ea non mala sed bona oporteat habeantur. Consistente demum Trebatio splendidam quasi de inimicis victoriam reportasse videtur poeta; quid enim rectius, quid innocentius esse potest quam illud, quod Octavianus, potentissimus inter omnes et iustissimus — quam laudem v. 16 Octaviano non inconsulto tributam vides — et Trebatius legum iurisque peritissimus pari approbatione laudaverunt? — Haec igitur ultima poetae defensio est et absoluta; de qua, ne mirum credas satiris frequentem satirarum excusationem addi, considerandum est ipsum hoc genus defendendi satiricum iniectis plurimis malorum hominum castigationibus eximiaque urbanitate lepide esse ornatum; deinde Horatium imitatum esse Lucilii exemplum, cuius tota vita in satiris aperte fuit proposita (v. 33). Veri simile est scriptam esse hanc satiram u. a. c. 724, qui quidem annus optime convenire videtur cum paucis temporum quae hic latent indiciiis (v. 11 et 13—15); ut totus liber intra annos 719—724 confectus videatur. Quamquam non defuerunt qui spatium aliquod longius inter primum librum et secundum in-

Composui pars esse putat similesque meorum
 Mille die versus deduci posse. Trebati,
 5 Quid faciam praescribe. Quiescas. Ne faciam, inquis,
 Omnino versus? Aio. Peream male, si non
 Optimum erat; verum nequeo dormire. Ter uncti
 Transnanto Tiberim, somno quibus est opus alto,
 Irriguumque mero sub noctem corpus habento.
 10 Aut, si tantus amor scribendi te rapit, aude
 Caesaris invicti res dicere, multa laborum
 Praemia laturus. Cupidum, pater optime, vires
 Deficiunt: neque enim quivis horrentia pilis
 Agmina nec fracta pereuntes cuspidē Gallos

tercessisse probabilius putarent, causam inventientes in ipso quod inter utriusque libri satiras interest discrimine. Nam praeterquam quod alterius libri satirae „numeris, elocutione ac compositione et perfectiores sunt quam priores et dramatica forma novo veluti artificio novam induunt et singularem indolem“ (Frank. fast. Hor. p. 71), juvenilis etiam fervor ac vehementia sententiarum, gravis in accusandis carpendisque vitiis acerbitas, liberrima singulorum hominum castigatio molli ac placido deducendi sermonis vigori, considerato consilio ac lenitati reprehensionis, comi in vellicandis hominum ac vitae perversitatibus urbanitati ubique cessit. Hae tamen virtutes cum in posterioribus satiris maiores, in iis qui primo libro propiores sunt, ut in Sat. 2, minores inveniantur, quid prohibet quominus in homine tricesimum aetatis annum egresso paulatim eas provenisse, in perfectissimo epistolarum genere maxime excultas credamus?

V. 1. *ultra legem*] ultra modum et iustum satirarum finem, cf. A. P. 135; sed legem dixit, cum iuris consultum alloqueretur. Deinde *tendere* sumptum ab arcu, quo etiam quod contrarium hic ponitur *sine nervis* referendum. Qui enervem putabant Horatianam satiram, iis lepida urbanitas minus placuit quam durae salsaeque Lucilii facetiae. cf. Sat. I, 4, 41. 10, 13. — *deduci*] a nendo sumptum, ut Sat. I, 10, 44. Epist. II, 1, 225. — *dormire*] ambigue dictum; cf. Ep. II, 2, 54.

Quae respondet Trebati, sumpta sunt ex eius natura et moribus, nam Cicero de eo sic: ad Fam. VII, 10, 2: „qui neque in oceano natare volueris studiosissimus homo natandi,“ et VII, 22: „illuseras heri inter scyphos etc.“ — *ter*] coniunge cum *transnanto*. Numerum autem ternarium medici amabant, qui in eo nescio quid magicae potestatis inveniebant. — *praemia*] approbationem Caesaris et laudem aequalium. — *pater*] reverentiae nomen, quo iuniores alloquebantur seniores. cf. v. 60. Ceterum haec Horatii excusatio frequentissima; veluti Carm. II, 12. IV, 2. I, 6. — *fracta cuspidē*] „qua vulneratus erat hostis. Ex historia de Mario hoc sumptum est; nam Marius adversus Santonas talia tela commentus est, ut fracta mitterentur, ne remitti ab hostibus possent.“ *Porphy.* De Mario autem h. l. cogitare alienum est; probabilius de materis et gaeis Gallorum (Caes. b. g. I, 26. III, 4), qui victi indicantur fractis telis ita, ut Parthi equis deiecti. Gallos autem et Parthos nominavit ut infestissimos et pervicacissimos Romano nomini hostes. Ceterum a. 724 Octavianus ex Aegypto per Syriam in Asiam venit ibique res Parthicas inter Phraatem et Teridatem composuit; adversus Gallos autem non solum ipse a. 715 profectus erat sed Agrippa quoque devictis a. 717 Gallis triumphavit; deinde a. 719 Gallicis gentibus bellum illatum coloniaeque deductae sunt. — *describit*] Sic boni codd., alii *descri-*

- 15 Aut labentis equo describit vulnere Parthi.
 Attamen et iustum poteras et scribere fortem,
 Scipiadam ut sapiens Lucilius. Haud mihi deero,
 Cum res ipsa feret: nisi dextro tempore Flacci
 Verba per attentam non ibunt Caesaris aurem;
 20 Cui male si palpere, recalcitrat undique tutus.
 Quanto rectius hoc quam tristi laedere versu
 Pantolabum scurram Nomentanumque nepotem,
 Cum sibi quisque timet, quamquam est intactus, et odit.
 Quid faciam? Saltat Milonius, ut semel icto
 25 Accessit fervor capiti numerusque lucernis;
 Castor gaudet equis, ovo prognatus eodem
 Pugnis; quot capitum vivunt, totidem studiorum
 Milia: me pedibus delectat claudere verba
 Lucili ritu, nostrum melioris utroque.
 30 Ille velut fidis arcana sodalibus olim
 Credebat libris, neque si male cesserat usquam
 Decurrens alio, neque si bene; quo fit, ut omnis
 Votiva pateat veluti descripta tabella
 Vita senis. Sequor hunc Lucanus an Apulus anceps:
 35 Nam Venusinus arat finem sub utrumque colonus,
 Missus ad hoc pulsus, vetus est ut fama, Sabellis,

bat, describet; indicativus autem ipse potestatem aliquid faciendi exprimit. Idem usus nobis Germanis, ut *das thut nicht Jeder*, pro: *das kann nicht Jeder thun*. — *fortem*] magnanimum, ut Ep. I, 7, 46.

V. 17. *Scipiadam*] Cum versus hexameter Scipionis nominis nihil ferret nisi nominativum ipsum, neque poetae iusta patronymici forma *Scipionides* magis uti possent, ad hanc minus rectam formam confugientes *Scipiadam* posuerunt pro accusativo *Scipionem* et similia, ut infra v. 72. Virg. Aen. VI, 843. Georg. II, 170. Indicatur autem Africanus minor, cuius laudes Lucilius idoneis satirarum locis praedicaverat. — *deero*] cf. Sat. I, 9, 56. — *quanto rectius*] Trebatii tres versus sunt 21—23. Ad v. 22 compara Sat. I, 8, 11. — *Milonius*] Scurram eius aetatis scholiastae fuisse dicunt.

— *icto*] vini potestate. cf. Carm IV, 5, 15. De saltando lege Cic. pro Mur. 6. — *vita senis*] Hieronymus in Chronic. ad Ol. 169, 2 Lucilio quadraginta sex annos vitae dedit, a. u. c. 606—651; nec videtur fides habenda esse Heusdio, qui Lucilii vitam nuper extendit usque ad a. 687. Itaque *senem* intelligo eum, qui antiquiore tempore vixit, cf. Sat. I, 10, 67, quamquam fuerunt, qui Lucilium circa a. u. 600 natum, et a. 659 vel 660 mortuum esse putarent. — *usquam*] Sic maior pars antiquissimorum codd., alii *unquam*, sed temporis notio supervacanea est. — *alio*] quam ad suos libros. — *anceps*] Non is solum anceps est, qui dubius est aut incertus quid credat faciatve, sed is etiam, de quo in utramque partem disputari potest, ut Sat. II, 5, 34. Quare vel ipsa loci concinnitas efflagitare vi-

- Quo ne per vacuum Romano incurreret hostis,
 Sive quod Apula gens seu quod Lucania bellum
 Incuteret violenta. Sed hic stilus haud petet ultro
 40 Quemquam animantem et me veluti custodiet ensis
 Vagina tectus. Quem cur destringere coner
 Tutus ab infestis latronibus? O pater et rex
 Iuppiter, ut pereat positum robigine telum
 Nec quisquam noceat cupido mihi pacis! at ille,
 45 Qui me commorit, — melius non tangere, clamo —
 Flebit et insignis tota cantabitur urbe.
 Cervius iratus leges minitatur et urnam,
 Canidia Albuci quibus est inimica venenum,
 Grande malum Turius, si quid se iudice certes.
 50 Ut, quo quisque valet, suspectos terreat, utque
 Imperet hoc natura potens, sic collige mecum:
 Dente lupo, cornu taurus petit: unde nisi intus
 Monstratum? Scaevae vivacem crede nepoti
 Matrem: nil faciet sceleris pia dextera; mirum,
 55 Ut neque calce lupo quemquam neque dente petit bos:

detur, ut *anceps* masculini, non neutrius generis esse credamus. — *ad hoc*] Sat. II, 6, 42. „Non solum se in municipio natum opponit Lucilio, equiti Romano, sed hoc quoque significat: si ingenii non nimis lenti sum, sed satis bellicosi, minime mirum; nam utraque gens fuit dura ac bellicosa.“ *Rauchenstein*. — *quo ne*] pro *ut ne*, sed cum quadam abundantia dictum, quoniam quod in verbis *ad hoc* inest, iterum ponitur relativo *quo*. Similiter Cic. ad Fam. VII, 2: „Sed eo vidisti multum quod praefinisti, quo ne pluris emerem.“ cf. Liv. XXXIV, 6 med. — *Sed*] opponitur verbis *sequor hunc*. — *ultro*] i. e. nisi quis me provocavit, non iniuriis sed vitiis suis aut ridicula agendi et vivendi ratione. Epist. II, 2, 107. II, 1, 227. Sat. II, 3, 262.

V. 40. *ensis*] Iuv. I, 165: „Ense velut stricto quoties Lucilius ardens infremuit.“ — *flebit*] Epod. 6, 16. Sat. I, 10, 91. *Cantari* autem de bona et mala fama. — *Cervius*] delator et calumniator, ut Caprius et Sulcius ex

Sat. I, 4, 70. — *urna*] iudicium. — *Canidia*] „Deest filia; alii uxorem dicunt. Canidia autem pro Gratidia. Albucius quidam veneficus, matris extincitor.“ *Acro*. Alii maluerunt coniungere *Albuci venenum*; sed consulto Horatius, ut iam notat Porphyrio, ἀμφιβολικῶς posuit genitivum *Albuci*. — *Turius*] Haud dubie iudex significatur corruptissimus; nomen eius varie legitur in scholiis: C. Marius Turius, C. Martius Turius, Turius Marinus. — *ut, quo*] quomodo fiat ut, quo cet. — *Scaevae*] „Scaeva luxuriosus quidam fuit, qui matrem dato veneno necavit, propterea quod ei nimis diu viveret. Sic Cicero pro Scauro (fragm. Beier, p. 155): *Libertus patronam non occidit, sed duobus digitulis gulam oblitit*.“ *Comm. Cruq.* — *mirum ut*] tam mirum quam, vel: non magis mirum quam. Summa in h. l. inest acerbitas: Scaeva matri fauces non elidit, quid miraris? innocentes sunt digiti, sed suo telo utitur, venenum dat. Coniecturis, quae propositae

- Sed mala tollet anum vitiato melle cicuta.
 Ne longum faciam: seu me tranquilla senectus
 Expectat seu Mors atris circumvolat alis,
 Dives, inops, Romae seu fors ita iusserit exul,
 60 Quisquis erit vitae scribam color. O puer, ut sis
 Vitalis metuo, et maiorum ne quis amicus
 Frigore te feriat. Quid? cum est Lucilius ausus
 Primus in hunc operis componere carmina morem,
 Detrahere et pellem, nitidus qua quisque per ora
 65 Cederet, introrsum turpis; num Laelius aut qui
 Duxit ab oppressa meritum Karthagine nomen,
 Ingenio offensi aut laeso doluere Metello
 Famosisque Lupo cooperto versibus? Atqui
 Primores populi arripuit populumque tributim,
 70 Scilicet uni aequus virtuti atque eius amicis.
 Quin ubi se a vulgo et scena in secreta remorant
 Virtus Scipiadae et mitis sapientia Laeli,
 Nugari cum illo et discincti ludere, donec
 Decoqueretur olus, soliti. Quidquid sum ego, quamvis
 75 Infra Lucili censum ingeniumque, tamen me

sunt, omnibus loci egregia vis frangitur, *si neque, Benteius; quin neque, Goeller; at neque, Horkel.* — scribam] Inverso ordine magna huic verbo maximam arsim sequenti accrescit vis. — *o puer*] Trebatii verba sunt usque ad v. *feriat*. Ceterum primis verbis egregio ioco alluditur ad Thetidis verba apud Homerum II. XVIII, 95. — *frigore*] Intelliguntur haec ex imitatione Persii I, 108: „Vide sis ne maiorum tibi forte Limina frigescant.“ Senec. ep. 122: „Montanus Iulius, tolerabilis poeta, et amicitia Tiberii notus et *frigore*.“ — *per ora*] Salust. Iug. 31: „*Incedunt per ora* vestra magnifici.“ — *Metello*] Q. Caecilius Metellus Macedonicus, cos. a. u. c. 611. *Estré* prosopogr. Horat. p. 78 suspicatus est non indicari Macedonicum, sed Macedonici quartum filium, Q. Caecilium Metellum Caprarium, de quo apud Cicer. de orat. II, 66 legitur: „Scipio apud Numantiam cum stomacharetur cum C. Metello, dixisse dicitur: Si

quintum pareret mater eius, asinum fuisse parituram.“ Is fuit consul a. u. 640, Censor a. u. 651. Lucilii versus in L. Cornelium Lentulum Lupum eos. a. u. c. 598 servavit Cic. de N. D. I, 23: „Tubulus si Lucius unquam. Si Lupus aut Carbo Neptuni filius, ut ait Lucilius, putasset esse deos, tam per iurus aut tam impurus fuisset?“ Quos si Lucilius contumeliosis (Epist. I, 19, 31) versibus laceravit, boni cives, ut Laelius et Scipio, idem sibi non metuerunt. De part. *que* in verbo *famosisque* vide ad Carm. II, 7, 25. — *tributim*] per omnes tribus, totum populum, nullo facto discrimine. cf. Pers. I, 114: „securi Lucilius urbem.“

V. 71. *scena*] vita publica. — *nugari*] Comm. Cruq. „Scipio et Laelius feruntur tam familiares fuisse et amici Lucilio, ut quodam tempore Laelio circum lectos triclinii fugienti Lucilius superveniens eum obtorta mappa quasi feriturus sequeretur.“ cf. Cic. de orat. II, 6. — *Lucili censum*] Fuit

Cum magnis vixisse invita fatebitur usque
 Invidia et fragili quaerens illidere dentem
 Offendet solido, nisi quid tu, docte Trebati,
 Dissentis. Equidem nihil hic diffindere possum;
 80 Sed tamen ut monitus caveas, ne forte negoti
 Incutiat tibi quid sanctarum inscitia legum:
 Si mala condiderit in quem quis carmina, ius est
 Iudiciumque. Esto, si quis mala: sed bona si quis
 Iudice condiderit laudatus Caesare? si quis
 85 Opprobriis dignum latraverit, integer ipse?
 Solventur risu tabulae, tu missus abibis.

SATIRA II.

Quae virtus et quanta, boni, sit vivere parvo, —
 Nec meus hic sermo est, sed quem praecepit Ofellus

enim Lucilius equestri loco natus et Pompeii Magni avus; alio auctore avia Pompeii soror Lucilii fuit. Vide ad Sat. II, 7, 53. — *fragili*] gen. neutr.; imago de nuce sumpta. Adversarii, inquit poeta, nihil iam efficient, cum favorem mihi et gratiam optimorum conciliaverim. — *diffindere*] Sic recte boni codices in iisque omnium antiquissimis Bland.; in aliis ex corruptione *defindere*, *diffingere*, *defingere*, *defringere*, alia. cf. Carm. III, 16, 13. Virg. Aen. IX, 586. Trebatii sunt usque ad *iudiciumque*. — *legum*] Cic. de rep. IV, 11: „Nostrae XII tabulae cum perpaucas res capite sanxissent, in his hanc quoque sancendam putaverunt, si quis occentavisset sive carmen condidisset quod infamiam faceret flagitiumve alteri.“ cf. Epist. II, 1, 152 sqq. Ut quae insequuntur recte et ordine adiungantur, supple *scito*, ut Epist. I, 1, 13. I, 18, 58. — *laudatus Caesare*] vide ad Carm. I, 6, 2. — *latraverit*] Bentleius ex codd. recepit *laceraverit*, quod cum hominis iniqui sit et malitiosi, ab hoc loco videtur esse alienum. Tu compara Epod. 5, 58. Epp. I, 2, 66. — *solventur tabulae*] tabulae, in quibus leges scriptae erant, pro ipsis legibus. Legesolvere est severitatem earum minuere, frangere. Similiter Quintil. XI, 3, 58:

„Fori sanctitatem ludorum licentia solvere.“ id. V, 10, 67: „Risu tota res solvitur.“

Satira II.

Felicissimis bellis omnium prope terrarum divitiae cum Romam essent congestae, inter reliqua luxus genera incredibilis paene cibi ac potus intemperantia et improbitas civitatem invaserat. Quae quam sit insana quamque pernicioosa, hac satira docet Horatius et ita quidem, ut non sua proponat praecepta sed loquentem inducat Ofellum quendam, rusticum hominem et sanae mentis, quem ipse suum agrum colentem bonisque rebus gaudentem Venusiae olim puer noverat (v. 112sq.). Postea cum Venusini agri bellis civilibus dominis erepti veteranis militibus darentur, Ofelli ager Umbreno cuidam veterano attributus est, ita ut qui olim dominus fuisset tunc colonus eundem agrum alieno homini coleret (v. 133). Hunc igitur Ofellum fingit Horatius inter suos et filios et amicos sedentem deque suae aetatis ingenti profusione ac stultitia disputantem; quae stultitia quo clariore luce collustretur, sordidissimae etiam avaritiae, qua obstricti alii fortasse non pauciores tenebantur, tristes quaedam imago additur (v. 53—62). Ofelli autem totus sermo est

- Rusticus, abnormis sapiens, crassaque Minerva —
 Discite non inter lances mensasque nitentes,
 5 Cum stupet insanis acies fulgoribus et cum
 Acclinis falsis animus meliora recusat,
 Verum hic impransi mecum disquirite. Cur hoc?
 Dicam, si potero. Male verum examinat omnis
 Corruptus iudex. Leporem sectatus equovē
 10 Lassus ab indomito vel, si Romana fatigat
 Militia assuetum graecari, seu pila velox
 Molliter austerum studio fallente laborem
 Seu te discus agit, pete cedentem aëra disco:
 Cum labor extuderit fastidia, siccus, inanis
 15 Sperne cibum vilem, nisi Hymettia mella Falerno
 Ne biberis diluta. Foris est promus, et atrum

praeter vv. 2 et 3, 112—116; id quod recte colligas ex v. 112, ubi verbis *hunc Ofellum* poeta ad v. 2 redit, deinde ex primae personae usu vv. 7. 8. 35. 90. 93, tum ne 53 quidem versus adversatur. Alii, ut Orellius, non recte statuunt, Ofellum ipsum loquentem induci demum v. 116. Versu 111 ea pars absolvitur quae generalia complectitur praecepta et sententias; quibus quo accedat maior fides et auctoritas deinde ostenditur, hominem illum non solum tanta usum esse doctrinae severitate, sed fecisse etiam ipsum quae bene praeceperit. Scripta videtur satira aliis alio tempore, Kirchnero et Webero anno 717 propter iter Brundisium, quo cum Ofello convenisse poetam putant, Zumptio a. 719, Frankio et Duentzero a. 720, quibus si quid debeam enuntiare, libentissime assentiar.

V. 1. *boni*] Suavis compellatio suorum et filiorum et amicorum: cf. v. 128. Iam apud Aconem scholiastam falsa est lectio *bonis*, orta ea ex continua scriptura et littera *s* prave geminata (*bonsit*). cf. Sat. II, 6, 51. 95. Epist. II, 2, 37; et de hoc genere sermonis Sat. II, 6, 70—76. — *sermo*] verba. cf. A. P. 69. — *Ofellus*] Sic omnes codd., praeter unum, in quo illud ex correctura repertum est, quod Bentleius suspicabatur, *Ofella*; haec enim, non illa forma est cog-

nominis apud Romanos noti. — *abnormis sapiens*] Tantum non recepi ex multis et optimis codd. *abnormi*. Nec male diceretur *abnormi crassaque Minerva*, ita ut *crassaque* ex proverbio explicandi gratia additum esset. cf. Colum. praef. l. 1: „potest enim nec *subtilissima* nec rursus, quod aiunt, *pingui Minerva* res agrestis administrari.“ Et dicebant etiam *omnis Minervae homo* h. e. valde ingeniosus; quare si antiquis, ut visum est Orellio, risum movisset *abnormis Minerva*, movisset quidem, sed ut elegantem et exquisitum poetae iocum intellexissent. De voc. *abnormis* cf. Cic. Lael. 5. — *acies*] oculorum. — *acclinis*] rarum et poeticum vocabulum. Virg. Aen. X, 835. Cognatum verbum *acclinare* metaphorice, ut h. l. adiectivum, positum est apud Livium IV, 48. — *impransi*] ieiuni, ut v. 38. — *Leporem sectatus*] Sententia paulo impeditius formata; nam participiorum loco, a quibus egressa est oratio, condicionalis formasubstituatur. — *graecari*] cf. Carm. III, 24, 57. Est autem exercere se mollioribus Graecorum ludis pilae et disci. — *discus agit*] allicit. — *Hymettia mella*] Carm. II, 6, 14. Macrobi. Sat. VII, 12: „Unde est et illud proverbium quod utuntur gulones: mulsum, quod probe temperes, miscendum esse novo Hymettio et vetulo Falerno.“ cf. infra Sat. II, 4, 24. Columella auctore (XII,

- Defendens pisces hiemat mare: cum sale panis
 Latrantem stomachum bene leniet. Unde putas aut
 Qui partum? Non in caro nidore voluptas
 20 Summa, sed in te ipso est. Tu pulmentaria quaere
 Sudando: pinguem vitiis albumque neque ostrea
 Nec scarus aut poterit peregrina iuvare lagois.
 Vix tamen eripiam, posito pavone velis quin
 Hoc potius quam gallina tergere palatum,
 25 Corruptus vanis rerum, quia veneat auro
 Rara avis et picta pandat spectacula cauda,
 Tanquam ad rem attineat quidquam. Num vesceris ista
 Quam laudas pluma? cocto num adest honor idem?
 Carne tamen quamvis distat, nil hac magis illa,
 30 Imparibus formis deceptum te patet. Esto:

41) mulsum optime parabatur, cum singulis urnis vini denae librae mellis addebantur. — *atrum*] procellis agitat. Carm. III, 27, 18. — *latrantem*] Sat. II, 8, 5. Lucret. II, 17: „Nihil aliud sibi naturam latrare nisi ut cet.“ — *pulmentaria*] Ad exemplum Socratis; qui cum usque ad noctem spatia- retur, interrogatus a quodam, cur hoc faceret, respondit: ὄψον συνάγω. — *pinguem vitiis*] luxuria tumidum. cf. v. 77. Pers. 3, 98: „Turgidus hic epulis atque albo ventre lavatur.“ — *ostrea*] vide ad Sat. I, 8, 43. — *scarus*] pretiosus piscis, in mari Carpathio maxime frequens, ceterum ignotus. Epod. 2, 50. — *lagois*] „avis quae carnem leporis habere perhibetur.“ *Acro*.

V. 23. *eripiam*] poetice pro *impediam*. Quod quomodo fieri potuerit vide ex hoc loco Tibulli I, 9, 35: „Illis eriperes verbis mihi sidera coelo Lucere.“ Ovid. Met. II, 483: „Posse loqui eripitur.“ — *pavone*] Q. Hortensius primus Romanos docuisse dicitur pavones in mensa apponere. Sat. I, 2, 116. — *vanis rerum*] cf. Carm. IV, 12, 19. Sat. II, 8, 83. Ep. I, 17, 21. — *attineat quidquam*] sc. picta cauda. — *num adest*] hia]us a poeta admis- sus. — *carne tamen*] Locus difficilli- mus et diversissime tentatus; sententia tamen simplex et aperta: „praefero pavonem gallinae; cur? plumarum splendore motus; at num vesceris plu-

mis? num coctis pavonibus et in men- sa positis idem splendor est, qui te antea traxit? Sed discrimen etiam est carnis, inquis. At, quamvis discrimen sit, quod concedatur oportet, non sa- por est, qui te allicit, sed formis te deceptum esse patet.“ Itaque hunc statuo ordinem verborum: „quamvis distat gallinae caro a pavonis, tamen nihil (non) hac (pavonis) magis illâ (gallina, sed) imparibus formis dece- ptum te esse patet“, vel si ex verbo *deceptum* zeugmatis quodam facili ge- nere simile *captum* assumas: quamvis (etiamsi, quantumvis) distat gallinae caro a pavonis, tamen nihil hac ma- gis quam illâ (vide ad Carm. IV, 14, 13) te captum patet, sed imparibus for- mis i. e. plumarum, formae pulchritu- dine et specie deceptum esse.“ — *esto*] Concedit Ofellus istum formae amorem habere aliquam veniam progrediturque ad alia etiam magis inania. Magnum enim discrimen gulones aiebant esse inter lupos marinos, qui in Tiberi es- sent capti, et eos, qui in alto, et ite- rum inter eos, qui ad ostia Tiberis et qui inter pontes (sublicium et senato- rium, inter quos Cloaca maxima sordes urbis in fluvium egerebat). Qui in mari erant capti, pessimi videbantur. Unde autem, inquit Ofellus, datum tibi est ut sentias sapore, quo is lupo qui appositus in mensa hiat captus sit lo- co? — *laudas*] Idem gulones ingentes

- Unde datum sentis, lupo hic Tiberinus an alto
 Captus hiet, pontesne inter iactatus an amnis
 Ostia sub Tusci? Laudas, insane, trilibrem
 Mullum, in singula quem minuas pulmenta necesse est.
 35 Ducit te species, video. Quo pertinet ergo
 Proceros odisse lupos? quia scilicet illis
 Maiorem natura modum dedit, his breve pondus.
 Ieiunus raro stomachus vulgaria temnit.
 Porrectum magno magnum spectare catino
 40 Vellem, ait Harpyiis gula digna rapacibus. At vos,
 Praesentes Austri, coquite horum obsonia. Quamquam
 Putet aper rhombusque recens, mala copia quando
 Aegrum sollicitat stomachum, cum rapula plenus
 Atque acidus mavult inulas. Necdum omnis abacta
 45 Pauperies epulis regum: nam vilibus ovis
 Nigrisque est oleis hodie locus. Haud ita pridem
 Galloni praeconis erat acipensere mensa
 Infamis. Quid? tunc rhombos minus aequor alebat?
 Tutus erat rhombus tutoque ciconia nido,
 50 Donec vos auctor docuit praetorius. Ergo

quaerebant mullos, parvos lupos, hac una causa moti quod natura mullos parvos, lupos magnos fecit. Plin. H. N. IX, 30: „Mulli binas libras ponderis raro admodum exsuperant.“ Iuven. 4, 15: „Mullum sex milibus emit Aequantem sane paribus sestertia libris.“ — *pulmenta*] Epist. I, 18, 48; sunt h. l. partes (Scheiben) in quas ingens piscis dissecandus est. — *porrectum*] mullum.

V. 40. *At*] Exsecratur Ofellus epulas luxuriosorum optatque ut Austri eas putrefaciant. Statim autem se corrigens: quamquam quid opus est, inquit, hac exsecratione, cum recentes etiam cibi talibus hominibus puteant neque iis gratus quidquam videatur quam rapula et inulae quae lassum pervellant stomachum? Sat. II, 8, 8. 51. — *quando*] quandoquidem, quoniam. — *oleis*] Oleae enim cibi cupiditatem excitant. De nigris (i. e. maturioribus) Plin. N. H. XV, 2: „Quanto maturior baca, tanto pinguior succus minus-

que gratus. Optima autem aetas ad decerpendum inter copiam bonitatemque *incipiente baca nigrescere*.“ — *Galloni*] „Galloni praeco primus acipenserem suae mensae apposuit, quare eius luxur etiam a Lucilio taxatur.“ *Comm. Cruq.* — *erat*] vide ad Carm. III, 16, 26. — *aequor alebat*] Restitui scripturam optimorum et plurimorum Codicum cum Cruquio; *aequor* h. l., ut Carm. I, 14, 9. III, 6, 34 de mari positum universe, sine partium discrimine. — *praetorius*] „Sempronius Rufus praetorius instituisse creditur ut ciconiarum pulli manducarentur: quare cum in praetura petenda repulsam tulisset, tale epigramma meruit: „Ciconiarum Rufus iste conditor Hic est duobus elegantior Plancius; Suffragiorum puncta non tulit septem, Ciconiarum populus ultus est mortem.“ *Comm. Cruq.* Is igitur vel postea praeturam obtinuit vel festivo ridetur ab Horatio et ironice *praetorius* appellatur. *mergos*] durissima carne. — *edixerit*]

- Si quis nunc mergos suaves edixerit assos,
 Parebit pravi docilis Romana iuventus.
 Sordidus a tenui victu distabit Ofello
 Iudice: nam frustra vitium vitaveris illud,
 55 Si te alio pravum detorseris. Avidienus,
 Cui Canis ex vero ductum cognomen adhaeret,
 Quinquennes oleas est et silvestria corna,
 Ac nisi mutatum parcit defundere vinum et,
 Cuius odorem olei nequeas perferre, licebit
 60 Ille repotia, natales aliosve dierum
 Festos albatu celebret, cornu ipse bilibri
 Caulibus instillat, veteris non parvus aceti.
 Quali igitur victu sapiens utetur? et horum
 Utrum imitabitur? Hac urget lupus, hac canis, aiunt.
 65 Mundus erit qua non offendat sordibus atque
 In neutram partem cultus miser. Hic neque servis
 Albuci senis exemplo, dum munia didit,
 Saevus erit, nec sit ut simplex Naevius unctam
 Convivis praebebit aquam: vitium hoc quoque magnum.
 70 Accipe nunc, victus tenuis quae quantaque secum
 Afferat. In primis valeas bene: nam variae res
 Ut noceant homini, credas memor illius escae,
 Quae simplex olim tibi sederit; at simul assis

tanquam praetor. Epist. I, 19, 10. Inde cum gravi ironia *Romana iuventus*. cf. Epist. I, 1, 70. — *Sordidus*] „Sordidus victus a tenui victu diversus est; illum non commendo.“ Ceterum omnes prope boni codd. *distabat*, quod fortasse rectius de re, quae semper et erat et erit. — *Ofello iudice*] me iudice; iudice homine qualis ego, Ofellus, sum. — *Avidienus*] ignotum nomen sordidi hominis. — *ductum*] Sic antiquissimus omnium Bland., alii *dictum*. cf. Sat. II, 1, 65. — *mutatum vinum*] vappam. — *repotia*] „Postridie nuptias apud novum maritum coenatur; quia quasi reficitur potatio.“ *Festus*. — *albatu*] toga recens cretata indutus. — *bilibri*] nimis magno, non elegantioris formae. — *qua non offen-*

dat] Sic boni codd., in aliis est *qui*. Intellige: eatenus, qua. — *cultus*] genitivus est. utrimque suspensus: *in neutram partem cultus et miser cultus*, ut Stat. Theb. IV, 403: „Ah miseri morum.“ Plin. paneg. 58. med. „miseros ambitionis.“

V. 67. *Albuci*] vide ad Sat. II, 1, 48. Albucius durissimus erat in servos maximosque cruciatus iis minabatur, si quid in coena non bene esset paratum. Naevius contra negligentissimus fuit et nimiae animi bonitatis in servos. — *didit*] poeticum vocabulum; saepissime apud Lucretium. — *aquam*] ad vinum miscendum. — *ut noceant*] quantopere noceant. cf. Cic. Mil. 24, 64. — *sederit*] quieverit nec ullos in ventriculo tumultus excitave-

- Miscueris elixa, simul conchyliis turdis,
 75 Dulcia se in bilem vertent stomachoque tumultum
 Lenta feret pituita. Vides ut pallidus omnis
 Coena desurgat dubia? Quin corpus onustum
 Hesternis vitiiis animum quoque praegravat una,
 Atque affigit humo divinae particulam aerae.
- 80 Alter, ubi dicto citius curata sopori
 Membra dedit, vegetus praescripta ad munia surgit.
 Hic tamen ad melius poterit transcurrere quondam,
 Sive diem festum rediens advexerit annus
 Seu recreare volet tenuatum corpus, ubique
- 85 Accedent anni et tractari mollius aetas
 Imbecilla volet. Tibi quidnam accedet ad istam
 Quam puer et validus praesumis mollitiem, seu
 Dura valetudo inciderit seu tarda senectus?
 Rancidum aprum antiqui laudabant, non quia nasus
- 90 Illis nullus erat, sed credo hac mente, quod hospes
 Tardius adveniens vitiatum commodius quam
 Integrum edax dominus consumeret. Hos utinam inter
 Heroas natum tellus me prima tulisset!
- Das aliquid famae, quae carmine gratior aurem
- 95 Occupet humanam: grandes rhombi patinaeque
 Grande ferunt una cum damno dedecus; adde
 Iratum patrum, vicinos, te tibi iniquum

rit. — *pituita*] trisyllabum. Epist. I, 1, 108. Est phlegma ventriculi et intestinorum. Plin. H. N. XX, 7: „*Pituitae lentitiem digerunt (lactucae).*“ — *coena dubia*] Terent. Phorm. II, 2, 28: P. „*Coena dubia apponitur.*“ G. „*Quid istuc verbi est?*“ P. „*Ubi tu dubites quid sumas potissimum.*“ — *affigit*] Sic recte omnes prope libri MSS. alii *affligit*. Compara Plat. Phaed. p. 83. D: „*ἐκαστὴ ἡδονὴ καὶ λύπη ὥσπερ ἦλον ἔχουσα προσηλοῖ αὐτήν (τὴν Ψυχὴν) πρὸς τὸ σῶμα καὶ προσπερὸν καὶ ποιεῖ σωματοειδῆ.*“ — *divinae aerae*] Cic. de senect. 21. Tusc. I, 26. — *hic tamen*] Primum simplicis victus praemium sanitas est et corporis et animi. Accedit quod qui

moderatus est in ciborum usu interdum et opportuno tempore (*quondam*) exquisitis epulis vere potest gaudere (82—93). Deinde idem bonae etiam famae consulit, sibi suisque gratus (v. 94—111). — *ubique*] et ubi. — *Tibi*] Oppositum hoc pronomen est alteri *hic* v. 82. — *validus*] Ex chiasmi ordine iunguntur *puer*, *validus*, *dura valetudo*, *senectus*. — *hac mente*] Sat. I, 1, 30. — *edax dominus*] Iuven. I, 140: „*Quanta est gula, quae sibi totos Ponit apros, animal propter convivium natum!*“ cf. Sat. II, 8, 6. — *tellus prima*] Sat. I, 3, 99; est nova tellus. — *occupet*] Sic plures vetustioresque codd., alii *occupat*. Coniunctivus causalis est quem vocant. —

- Et frustra mortis cupidum, cum deerit egenti
 As, láquei pretium. Iure, inquit, Trausius istis
 100 Iurgatur verbis; ego vectigalia magna
 Divitiasque habeo tribus amplas regibus. Ergo,
 Quod superat non est melius quo insumere possis?
 Cur eget indignus quisquam te divite? quare
 Temppla ruunt antiqua deum? cur, improbe, carae
 105 Non aliquid patriae tanto emetiris acervo?
 Uni nimirum recte tibi semper erunt res?
 O magnus posthac inimicis risus! Uterne
 Ad casus dubios fidet sibi certius? hic qui
 Pluribus adsuerit mentem corpusque superbum,
 110 An qui contentus parvo metuensque futuri
 In pace ut sapiens aptarit idonea bello?

- Quo magis his credas, puer hunc ego parvus Ofellum
 Integris opibus novi non latius usum
 Quam nunc accisis. Videas metato in agello
 115 Cum pecore et gnatis fortem mercede colonum:
 Non ego, narrantem, temere edi luce profesta
 Quidquam praeter olus fumosae cum pede pernae.
 At mihi seu longum post tempus venerat hospes
 Sive operum vacuo gratus conviva per imbrem
 120 Vicinus, bene erat non piscibus urbe petitis

patrum] Carm. III, 12, 3. Sat. II, 3, 88. — *inquit*] vide ad Sat. I, 4, 79. — *Trausius*] homo luxuriosus, non admodum dives. — *vectigalia*] Carm. III, 16, 40. Cic. de off. II, 25. — *tribus*] i. e. habeo divitias, quae tribus regibus amplae videantur, quarum iam tertia pars regalis copia est. — *Ergo*] indignantis est: cum tantum habeas, nonne est quo melius insumere possis quod superest? — *templa ruunt*] vide ad Carm. III, 6. — *recte erunt*] infra v. 120. Sat. II, 3, 162. II, 8, 19. Male in codicibus nonnullis etiam optimis *rectae*, accommodato vocabulo ad *res*. — *posthac*] „Cum patrimonium omne per luxuriam consumpseris.“ Acro. — *uterne*] vide ad Sat. I, 10, 21. cf. II, 3, 295. 317. — *superbum*]

non corpus magis quam mentem ornatur. cf. Sat. II, 6, 87. — *pace*] metaphorice ex illo praecepto: dum pax est, para bellum. —

V. 112. *Quo magis*] Horatii ipsius hi quattuor versus sunt. — *quam nunc*] post triumvirorum proscriptiones. cf. Virg. Buc. 9, 2 sqq. Suspiceris certe ex adverbio *nunc* vixisse etiam tunc Ofellum. — *integris*] producta penultima, cf. Sat. II, 4, 54.; aliter supra v. 92. Carm. IV, 4, 66. I, 14, 9. I, 26, 6. I, 31, 18. — *metato*] quem metator Umbreno militi dederat. Vide ad Carm. II, 15, 15. — *mercede colonus*] Vide ad Carm. I, 35, 6. cf. Epist. II, 1, 139. — *non temere*] non facile. Epist. II, 2, 13. — *olus*] Sat. II, 6, 64. — *duplice ficu*] ad sic-

- Sed pullo atque haedo; tum pensilis uva secundas
 Et nux ornat mensas cum duplici ficu.
 Post hoc ludus erat culpa potare magistra,
 Ac venerata Ceres, ita culmo surgeret alto,
 125 Explicuit vino contractae seria frontis.
 Saeviat atque novos moveat fortuna tumultus:
 Quantum hinc imminuet? quanto aut ego parcius, aut vos,
 O pueri, nituistis, ut huc novus incola venit?
 Nam propriae telluris herum natura neque illum
 130 Nec me nec quemquam statuit: nos expulit ille;
 Illum aut nequities aut vafri inscitia iuris,
 Postremum expellet certe vivacior heres.
 Nunc ager Umbreni sub nomine, nuper Ofelli
 Dictus, erit nulli proprius; sed cedit in usum
 135 Nunc mihi, nunc alii. Quocirca vivite fortes,
 Fortiaque adversis opponite pectora rebus.

caudum divisa. — *post hoc*] non ut luxuriosi inter edendum. cf. Sen. ep. 122: „Post prandium aut coenam bibere vulgare est: hoc patres familiae rustici faciunt et verae voluptatis ignari.“ — *culpa magistra*] Culpa dicitur magistra bibendi, quia si quis in ipso bibendo aliquid commisisset, ei ab reliquis convivis poena quasi imponebatur alterius etiam poculi hauriendi. Culpa igitur tanquam *θαλλάρχος* s. *συμποσίάρχος* est. Haec rustica ratio contra urbanam bibendi magistri eligendi ponitur. Coniecturis opus non est, quamquam multae sunt propositae, veluti *cuppa* Lambin., *cupa* (copa) Bentl., *pulpa* Heins., *pulso magistro* Kirchn., et, quam animi causa appono, *κόττ' βω* *potare magistro* Praedicow. — *venerata*] cf. Carm. saec. 49. — *ita culmo*] *ita* part. eadem ratione in voto posita qua similis *sic*; vide ad Carm. I, 3, 1. Plenam sententiam intelliges ex locis Cic. in Cat.

IV, 6, 11. ad Att. V, 15: „Ita vivam ut maximos sumptus facio.“ Cic. Famil. X, 9: „ita ab imminuentibus malis respublica liberetur!“ cf. Hom. II. VIII, 538 sqq. XIII, 825 sqq. — *surgeret*] Ceres, per metonymiam; cf. Sat. I, 5, 74. — *hinc*] ex iis bonis quae nunc nobis sunt, moderatione animi et frugalitate vitae. — *nituistis*] nitent qui bona valetudine utuntur. Epist. I, 4, 15. — *incola*] Est veteranus miles, tunc possessor agri; quem non inconsulto incolam, non dominum agri appellat Ofellus. Id cur faciat, statim addit. Cfr. Anthol. Pal. 2, 27: „*Ἀγρὸς Ἀχαιμενίδου γενόμεν ποτὲ, νῦν δὲ Μενίππον. Καὶ πάλιν ἐξ ἑτέρου βήσομαι εἰς ἕτερον. Καὶ γὰρ ἐκεῖνος ἔχειν μὲ ποτ' ὤρετο καὶ πάλιν οὗτος Οἶεται· εἰμὶ δ' ὅλως οὐδενός, ἀλλὰ Τύχης.*“ — *propriae*] vide ad Carm. II, 2, 22. — *vafri*] Sat. II, 5, 34.

SATIRA III.

Sic raro scribis, ut toto non quater anno
Membranam poscas, scriptorum quaeque retexens,
Iratus tibi quod vini somnique benignus

Satira III.

Romae cum studio et opera doctorum hominum, veluti Ciceronis, graeca philosophia excepta esset, fieri non potuit quin sat multi ita sapientiam amplecterentur, ut philosophorum simias magis quam philosophos se praestarent. Et maxime quidem Stoicorum doctrina de vera sapientia communique hominum stultitia haud paucos allicere debuit, qui suam animi nequitiam celantes aliorumque rectum de se iudicium declinantes Stoicorum severitatem cultu ac sermone misere affectarent, tristi vultu urbem percurrerent, alios homines quacunque posset ratione carperent et magna voce vituperarent. Talem igitur hominem — quod genus nihil nisi virtutem crepans ἀρεταλόγους appellarunt Romani — acerbissima ratione totum genus humanum insaniae arguentem faceto utique et lepido modo perfectissima hac satira Horatius describit. Qui quam egregie rem suam instituit! Damasippum enim — id autem nomen est circumforaneo philosopho — nimio fictae suae sapientiae studio eo latum videmus impudentiae et importunitatis, ut poetam in villam Sabinam, quo is ne Saturnalibus (a. d. XVI. Kal. Ian. usque ad XIV. Kal. Ian.) ingenti urbis strepitu infinitisque epulis male vexaretur aufugerat, persequeretur; scilicet eo certe consilio, ut cum Horatii quoque aures insanis suis disputationibus impudentibusque adhortationibus obtudisset, lautam sibi mereret coenam. Isti enim homines a divitibus ut scurrae coenae adhiberi solebant, nimirum ne qui risum moveret in hilari convivio deesset. Suet. Aug. 74: „Aut acroamata et histriones interponebat ac frequentius aretalogos.“ Nam inopes esse solebant boni isti philosophi, qui nihil antiquius haberent quam ut sua sapientia stomachum cupiditatemque placarent. Nec melior Damasippus noster; qui olim mercator singulari sua calliditate (v. 20 sqq.) egregiisque consiliis rem male

gestam perdididerat (v. 18. 37), deinde cum desperata salute de ponte se in Tiberim deicere voluisset (v. 36), a Stertinio, magno illo quidem Stoico et unice sapienti, retractus mercaturam philosophia mutaverat. Iam vero ne quid egregii huius sermonis perdas, considera modo quanta inter aretalogum et satiricum poetam intercedere videatur similitudo; quam Horatius de iudicio bonorum hominum securus consulto videtur descripsisse, ut imperitis quid inter utrumque non esset simile aperto exemplo ostenderet. Atque eam quidem comparisonem non illustratam quidem sed tribus verbis indicatam habemus Sat. I, 1, 120; etenim Crispinus quoque est aretalogus. Praeterea tecte quidem significata est similis utriusque hominis, Damasippi et Horatii, sors et via, qua ille ad philosophiam, hic ac satiram pervenerat. Quae Damasippus in foro ad medium Ianum (v. 18), ea Horatius ad Philippos in pugna videbatur certe perdidisse. — Satiram non ante a. 721 scriptam esse docet versus 180 coll. 185; eo enim anno Agrippa sponte sua aedilitate functus ingentem sibi civium approbationem liberalitate paravit. Neque multo post eum annum scriptam esse ipsa Agrippae laus ferre videtur. Horatius paulo ante Sabinam villam a Maecenate dono acceperat.

V. 1. *sic raro scribis*] Vehementer exprobrantis haec sunt, non interrogantis; excitatus enim sermo est Stoici in villam subito irrumpentis ac statim clamantis, quem mirabundus Horatius non prius interruptit quam ad finem aliquem ipse decurrit v. 16. *Scribis* ultimam syllabam produxit; quod qui vitiosum putarent scripserunt *scribes*, orationis vim valde minuentes. Vide ad Carm. I, 3, 36. III, 5, 17. 16, 26. — *benignus*] Ut genitivum intelligas, compara similis notiois adiectivum *prodigus* Carm. I, 12, 37. I, 18, 16. Epist. I, 7, 42; benignus enim est qui liberalis, largus, etiam prodigus est. Epist. I, 5, 11. Carm. I, 17, 15. —

- Nil dignum sermone canas. Quid fiet? At ipsis
 5 Saturnalibus huc fugisti. Sobrius ergo
 Dic aliquid dignum promissis. Incipe. Nil est.
 Culpantur frustra calami immeritusque laborat
 Iratis natus paries dis atque poëtis.
 Atqui vultus erat multa et praeclara minantis,
 10 Si vacuum tepido cepisset villula tecto.
 Quorsum pertinuit stipare Platona Menandro,
 Eupolin, Archilochum, comites educere tantos?
 Invidiam placare paras virtute relicta?
 Contemnere, miser. Vitanda est improba Siren
 15 Desidia, aut quidquid vita meliore parasti,
 Ponendum aëquo animo. Di te, Damasippe, deaeque
 Verum ob consilium donent tonsore! sed unde
 Tam bene me nosti? Postquam omnis res mea Ianum
 Ad medium fracta est, aliena negotia curo
 20 Excussus propriis: olim nam quaerere amabam,
 Quo vafer ille pedes lavisset Sisypheus aere,

Saturnalibus] quos dies Romani facit-
 tiis et ludis et conviviis dicabant. —
paries] Qui sententiarum vel verborum
 penuria premuntur, culpam in calamis
 parietibusque inesse saepe solent cla-
 mare eosque execrationibus agere;
 est enim antiqua execratio: deos ira-
 tos habeat! illi deos iratos! Quibus
 verbis comice additur *atque poëtis*,
 quoniam illi irati parietem, ad quem
 sedentes aut cubantes scribunt, pugnis
 caedere solent. Similiter Pers. I, 106:
 „Nec pluteum caedit nec demorsos
 sapit unguis.“ — *vacuum*] otiosum.
 — *tepido tecto*] Hieme enim celebra-
 bantur Saturnalia. — *Platona*] cuius
 libri pleni sunt Socraticae *εἰρωφελας*,
 quam satiricus poeta aemulabatur.
 Quibus philosophus h. l. minus pla-
 cebat, ii *Platona* intelligebant comi-
 cum poetam, Aristophanis aequalem.
 — *virtute relicta*] nihil iam scribendo.
 — *improba Siren*] quia blanda est et
 nocet. — *vita meliore*] non desidiosa.
 Placuerat enim Stoico severo hominum
 iudici Horatiana satira, qua homines ca-
 stigari magnopere gaudebat. — *parasti*]
 laudem et assensum bonorum hominum.

V. 16. *Damasippe*] Licinius Dama-
 sippus ut statuarum amator hortorum-
 que emptor et venditor memoratur a
 Cicerone in epistolis. De Stoicorum
 barba vide ad Sat. I, 3, 133. Exspe-
 ctare potuit Damasippus: Di deaeque
 te donent omnibus bonis et optatis;
 pro quo lepidè substituitur *tonsore*. —
Ianum] Iani dicebantur omnes arcus
 vel transitiones perviae; quales tres
 memorantur ad forum ex viis deduc-
 entes: summus, medius, imus. Ad
 medium sedebant feneratores et argen-
 tarii. Epist. I, 1, 54. Cic. de off. II,
 25. — *Sisypheus*] De hoc loco *Schnei-
 devinus* nuper egregie sic disputavit:
 „Pervulgata erat opinio, massam il-
 lam (aeris Corinthii) casu potius mix-
 tam exstitisse quam arte temperatam.
 Capta enim per Mummium urbe et
 incensa perustis plurimis simulacris
 atque statuīs fabulantur aeris auri ar-
 genti venas in commune fluxisse; ex
 qua massa catilla, paropsides, statun-
 cula alia fecisse fabros. Sed qui unice
 vetustissima quaeque exosculabantur,
 aegre ferre debebant, quod aeris Co-
 rinthii ultra modum expetiti origo ad

- Quid sculptum infabre, quid fuscum durius esset;
 Callidus huic signo ponebam milia centum;
 Hortos egregiasque domos mercarier unus
 25 Cum lucro noram: unde frequentia Mercuriale
 Imposuere mihi cognomen compita. Novi,
 Et miror morbi purgatum te illius. Atqui
 Emovit veterem mire novus, ut solet, in cor
 Traiecto lateris miseri capitisve dolore:
 30 Ut lethargicus hic cum fit pugil et medicum urget.
 Dum ne quid simile huic, esto ut libet. O bone, ne te
 Frustrere: insanis et tu stultique prope omnes,
 Si quid Stertinius veri crepat, unde ego mira
 Descripsi docilis praecepta haec, tempore quo me

recentiora saecula detruderetur. Quo rationes vetustulas suas mirifice conturbari sentiebant. Igitur ut frustra vanitas sua illius fide narratiunculae redargueretur, perceptabant vel abditos angulos litterarum, si quid alicunde causae suae patrocinium invenirent. Nam statuas quidem ex aere Corinthi diu ante Mummium fieri solitas ex fide historiae docebant: anxie circumspicebant vasculorum amatores, ecquid ex testimoniis veterum monumentorum posset erui, quo planum fieret, insulorum illam opinionem ne de vasculis quidem valere Corinthiis. Excitati ad quaerendum incidebant in Aeschylei Sisyphi *λεοντοβάμονα σκάφην χαλκήλατον*, quam cupide arripiebant. Nempe Sisyphus Aeolida Corinthi lavabat pedes haud dubie aere Corinthio. In eo autem *ξητήματι* calide solvendo occupatum se fuisse ait Damasippus, quo probet, se vel arcana artium attigisse. Et: „intelligamus igitur, hoc sibi velle Damasippum, oculos se in virtutibus vitiisque artium expendendis exercitavisse.“ — *Mercuriale*] Sic optimi quique codices; alii *Mercuriali*. Ergo hic quoque *Mercurialis* est; nova iterum cum Horatio se quodammodo comparandi ratio, quoniam poetae quoque Mercuriales viri. cf. Carm. II, 17, 29. *Mercuriales* collegium erant Romae mercatorum. cf. Liv. II, 27. — *novi*] Horatii sunt. De genitivo *morbi* cf. ad Carm. II, 9, 18. — *atqui*] Haec Damasippo tribu-

antur necesse est. *Morbus* enim ab Horatio positus erat pro vitioso illo coemendarum rerum studio; quod vocabulum a Stoico iocose assumitur ad significandum suum novum studium aliorum hominum res curandi, priori vel maxime contrarium. Horatius per totum sermonem brevissimus haec dicere non potest nisi male servatis partibus. — *mire*] Egrege adverbium sumptum est ex praecedenti verbo *miror*. Horatio mirum visum est, quod Stoicus vetere morbo liberatus sit; Stoicus acutius et mordacius, ut sibi videtur, respondet: „recte mirum, sed mire veterem novus secutus est morbus, ut solet fieri;“ in quo inest id quod vult, tantum abesse ut mirum sit, ut soleant homines ex altero in alterum incidere morbum. *Horkelius* coniecit scribendum esse *maior novus*; qua coniectura, quamquam facillima est, loci natura mutatur. — *lethargicus hic*] qui ex lethargia expergefactus subito ad tantum vigorem rediit, ut ipsum medicum pugnis peteret. Nam „dum vitant stulti vitia, in contraria currunt.“ Sat. I, 2, 24. Quod cum diceret Stoicus, gestum imitabatur ferientis; inde iocose veritus Horatius: „dum ne quid simile huic, esto ut libet.“ Haec sola verba Horatii. — *frustrere*] „Noli tu tibi timere; ego enim non sum insanus, tu insanis et omnes prope insaniunt.“ Iam adest quo voluit. — *Stertinius*] Epist. I, 12, 20, ubi *Acro*: „Stertinius philosophus,

- 35 Solatus iussit sapientem pascere barbam
 Atque a Fabricio non tristem ponte reverti.
 Nam male re gesta cum vellem mittere operto
 Me capite in flumen, dexter stetit et, Cave faxis
 Te quidquam indignum: pudor, inquit, te malus angit,
 40 Insanos qui inter vereare insanus haberi.
 Primum nam inquiram, quid sit furere; hoc si erit in te
 Solo, nil verbi, pereas quin fortiter, addam.
 Quem mala stultitia et quemcunque inscitia veri
 Caecum agit, insanum Chrysippi porticus et grex
 45 Autumat. Haec populos, haec magnos formula reges
 Excepto sapiente tenet. Nunc accipe, quare
 Desipiant omnes aequae ac tu, qui tibi nomen
 Insano posuere. Velut silvis, ubi passim
 Palantes error certo de tramite pellit,
 50 Ille sinistorsum hic dextrorsum abit, unus utrique
 Error, sed variis illudit partibus; hoc te
 Crede modo insanum, nihilo ut sapientior ille,
 Qui te deridet, caudam trahat. Est genus unum
 Stultitiae nihilum metuenda timentis, ut ignes,
 55 Ut rupes fluviosque in campo obstare queratur;
 Alterum et huic varum et nihilo sapientius ignes
 Per medios fluviosque ruentis: clamet amica,

qui ducentos et viginti libros Stoicorum latine scripsit.“ — *Fabricio*] „Hic pons Fabricius dictus est a Fabricio consule conditore, qui nunc Lapideus appellatur, iunctus insulae Tiberinae.“ *Comm. Crug.* Conditus est pons a. u. 692; Dio Cass. XXXVII, 45: „τότε μὲν πάντα τε ἐγένετο, καὶ ἡ γέφυρα ἡ λιθίνη ἢ εἰς τὸ νηοίδιον τὸ τότε ἐν τῷ Τιβερίδι ὃν φέρονσα κατεσκευάσθη.“ Hodie appellatur *Ponte di quattro capi*. — *cave*] De littera e correpta cf. v. 177. Epod. 6, 11. Sat. II, 5, 75. Epist. I, 13, 19.

V. 42: *quin*] nihil verbi addam i. e. nihil te impediam quin. cf. Sat. II, 2, 23. — *porticus*] στοὰ ποικίλη Athenis, in qua Zeno eumque qui secuti sunt docere solebant. cf. Epist. I, 4,

16. — *formula*] definitio, regula, κανὼν. — *caudam trahat*] „Solent pueri petulantes nescientibus a tergo caudam suspendere, ut velut pecus caudam trahant.“ *Porphy.* Facere id solent potissimum fatuis hominibus. — *Est genus unum*] Contrarius est error hominum; nam dum alii vident timentique pericula quae nulla sunt, alii nihil omnino vident ruuntque per omnia etiam periculosissima. — *campo*] Martio. Carm. III, 1, 11. — *nihilum*] in prosa oratione substantivum est, apud poetas interdum adverbii vice fungitur. — *clamet*] etiamsi clamet. — *amica*] Alii non bene coniungunt *amica mater*; ita enim matri accedit epitheton languidum ac nullius plane ponderis. *Horkelius*, ne amica primo

- Mater, honesta soror cum cognatis, pater, uxor:
 Hic fossa est ingens, hic rupes maxima; serva!
- 60 Non magis audierit, quam Fufius ebrius olim,
 Cum Ilionam edormit, Catienis mille ducentis
 Mater, te appello, clamantibus. Huic ego vulgus
 Errori similem cunctum insanire docebo.
 Insanit veteres statuas Damasippus emendo:
- 65 Integer est mentis Damasippi creditor. Esto.
 „Accipe quod nunquam reddas mihi,“ si tibi dicam,
 Tune insanus eris, si acceperis? an magis excors
 Reiecta praeda, quam praesens Mercurius fert?
 Scribe decem a Nerio; non est satis: adde Cicutae
- 70 Nodosi tabulas centum, mille adde catenas;
 Effugiet tamen haec sceleratus vincula Proteus.
 Cum rapies in ius malis ridentem alienis,
 Fiet aper, modo avis, modo saxum et cum volet arbor.
 Si male rem gerere insani est, contra bene sani;

loco ante ipsam matrem et uxorem nominata turpissimam notam homini inureret, ex coniectura scripsit *anicia mater* i. e. vetula mater. Sed nominantur omnino, qui cari sunt et libenter audiuntur; nec omnes qui nominantur eundem hominem circumstant a periculisque defendere conantur; alium alii cari cognatique arcunt, omnes tamen frustra. — *Fufius*] Pacuvius tragoediam scripserat nomine Ilionae, Priami filiae, Polymestoris Thracum regis uxoris. Quae cum filium Deiphilum pro fratre Polydoro, Polydorum pro filio educasset, Polymestor pater, qui Polydori opibus potiri vellet, excisa Troia filium Deiphilum pro Polydoro occidit. In hac igitur fabula Deiphili umbra ex inferis rediens matrem Ilionam dormientem de sepultura appellabat. Iam cum olim Fufius actor Ilionam ageret somnumque simulare deberet, factum est ut vino ebrius vere dormiret atque ab altero actore Catieno, Deiphilom agente, frustra appellaretur. Cic. Tusc. I, 44, 106. — *edormit*] vide ad Sat. I, 6, 13. Est iocose dictum *Ilionam edormit* pro Ilionam dormit i. e. dormiendo imitatur et crapulam edormit. — *similem*] errorem, cf.

Sat. II, 2, 53. De coniunctis verbis *errorem insanire* cf. Carm. IV, 9, 19 *pugnare proelia*. — *insanit veteres*] ex alterius mente haec interposita, ut cogitando quasi supplendum sit: dicat aliquis. — *Mercurius*] *ἡρεδῶος*, lucri dator.

V. 69. *scribe*] Creditorem alloquitur: etiamsi a debitore non unam sed decem syngraphas (*tabulas*) ad exemplum Nerii, famosi feneratoris, cautionum plenissimas scribendas curaveris, tamen cet. — *a Nerio*] vide ad Carm. II, 12, 7. — *Cicutae*] Perillius fenerator ob asperitatem et amaritudinem Cicuta nominatus; nodosus est, quia optime calluit nodos et formulas iuris. — *catenas*] cautiones. — *alienis malis*] Hom. Od. XX, 347. Est ita ridere tanquam malae essent non suae sed alienae, malis non parcere. Alia quae excogitata est interpretatio, ut sit *clam ridere, malis a risu alienis ridere* s. *ridere, ut creditor non sentiat*, ea non potest ferri, propterea quod, nisi astutus debitor effuse rideat, cum eius insolentia omnis abiiciatur loci venustas. — *fiet aper*] Hom. Od. IV, 455 sqq. — *dictantis*] „credentis; quia cum damus dicimus: scribe cautionem pro

- 75 Putidius multo cerebrum est, mihi crede, Perilli
 Dictantis, quod tu nunquam rescribere possis.
 Audire atque togam iubeo componere, quisquis
 Ambitione mala aut argenti pallet amore,
 Quisquis luxuria tristive superstitione
 80 Aut alio mentis morbo calet; huc propius me,
 Dum doceo insanire omnes, vos ordine adite.
 Danda est hellebori multo pars maxima avaris;
 Nescio an Anticyram ratio illis destinet omnem.
 Heredes Staberi summam incidere sepulcro,
 85 Ni sic fecissent, gladiatorum dare centum
 Damnati populo paria atque epulum arbitrio Arri,
 Frumenti quantum metit Africa. Sive ego prave
 Seu recte hoc volui, ne sis patruus mihi. Credo
 Hoc Staberi prudentem animum vidisse. Quid ergo
 90 Sensit, cum summam patrimoni insculpere saxo
 Heredes voluit? Quoad vixit, credidit ingens
 Pauperiem vitium et cavit nihil acrius, ut si
 Forte minus locuples uno quadrante perisset,
 Ipse videretur sibi nequior: omnis enim res,
 95 Virtus, fama, decus, divina humanaque pulchris

ea pecunia.“ *Comm. Cruq.* — *rescribere*] solvere. vide ad *Carm.* III, 29, 54. — *audire*] iam relicto Damasippo omnes mortales insanire ut demonstret Stertinius se accingit, primum his quinque versibus cunctos comprehendens, deinde a versu 82 de avaritia dicturus. — *togam componere*] plicas togae recte disponere; quod qui faciunt domum relicturi sunt et ituri quo negotiis vocantur. Itaque cum omnes ad se vocet, iam nunc monet ut paratos se habeant; neminem intactum se relicturum. — *pallet*] quia quasi aeger est. *Pers.* 4, 47: „Viso si palles, improbe, nummo.“ — *hellebori*] Est veratrum nigrum, quod melampodium dicitur; de quo *Plin.* H. N. XXV, 5: „Nigrum medetur paralyticis, *insanientibus*, hydropicis cet.“ *Epist.* II, 2, 137. A. P. 300. Anticyra urbs est in Phocide. *Strab.* IX, 3: „*Ἀντίκυρα, ὁμώνυμος τῇ κατὰ*

τὸν Μαλιακὸν κόλπον καὶ τὴν Οἰτην. Καὶ δὴ φασιν ἐκεῖ τὸν ἑλλέβορον φύεσθαι τὸν ἄσπερον, ἐν ταῦθα δὲ σκευάζεσθαι βέλτιον κτλ.“ *Scylax*: „*Δελφοὶ πόλιν καὶ Ἀντινῶρα πόλιν, οὗ βέλτιον ἔλλεβορίζονται παράπλους δ' ἐστὶ τῆς Φωκίαν χώρας ἡμῖν ἡμέρας.*“ — *Staberi*] Staberius homo fuit avarus, qui tantopere opibus suis delectabatur, ut heredes magno proposito damno quid quisque accepisset monumento inscribere iuberet. — *dammati*] testamento; sumptum ex formula in monumentis frequenti, veluti: Heres meus uxori meae dare *damnas* esto. — *Arri*] cf. v. 243. Q. Arrii filii luxoriosi patre mortuo splendidissimum epulum funebre paraverunt. Carpitur igitur alter fratrum. — *Sive ego prave*] Reprehensus sic dicere possit Staberius. — *credo*] cum ironia positum, ut saepe. — *vidisse*] statuisset, iussisset. — *quoad*]

- Divitiis parent; quas qui contraxerit, ille
 Clarus erit, fortis, iustus. Sapiensne? Etiam, et rex
 Et quidquid volet. Hoc, veluti virtute paratum,
 Speravit magnae laudi fore. Quid simile isti
 100 Graecus Aristippus, qui servos proicere aurum
 In media iussit Libya, quia tardius irent
 Propter onus segnes? Uter est insanior horum?
 Nil agit exemplum, litem quod lite resolvit.
 Si quis emat citharas, emptas comportet in unum,
 105 Nec studio citharae nec Musae deditus ulli;
 Si scalpra et formas non sutor, nautica vela
 Aversus mercaturis, delirus et amens
 Undique dicatur merito. Qui discrepat istis,
 Qui nummos aurumque recondit, nescius uti
 110 Compositis metuensque velut contingere sacrum?
 Si quis ad ingentem frumenti semper acervum
 Porrectus vigilet cum longo fuste, neque illinc
 Audeat esuriens dominus contingere granum,
 Ac potius foliis parvus vescatur amaris;
 115 Si positus intus Chii veterisque Falerni
 Mille cadis, nihil est, tercentum milibus, acre

monosyllabum est. — *contraxerit*] vulgo *construxerit*. Sed *contraxerit* legitur in omnibus codd. Cruq., exceptis duobus, praeterea in aliis bonae notae; et praefendum videtur, quia in contrahendo inest dolus, labor, cura consiliumque corradendi et coacervandi divitias. Apul. Met. IX: „non parvas contraxerant pecunias.“ Plin. H. N. VI, 27: „ibi soli mortalium in odio contrahunt; id defodiunt, ne quo cui sit in usu.“ ibid. X, 20 de pavone: „omnesque in acervum contrahit penarum, quos spectari gaudet, oculos.“ Alterum *construxerit*, quo magis est vulgare (cf. Sat. I, 1, 44), eo facilius in rarioris elegantiorisque verbi locum potuit reponi. — *sapiensne*] Se ipsum interrogat Stoicus. cf. Cic. Parad. prooem. 3.: „Cato enim Stoice solet oratoriis ornamentis adhibitis dicere.“ — *et rex*] Contrarium lege Sat. I, 3, 124 sq. Epist. I, 1, 106.

V. 103. *litem*] Se ipse corrigens contrariis exemplis rem dirimi posse negat; utendum esse talibus, quae de veritate nihil iam relinquant dubitationis. Quare cum ex logicorum praeceptis non liceat, incertam rem alia non magis certa explicare, tria addit certissima. — *citharas*] cf. Arrian. Epist. 4, 8. p. 632: „οὐδεις ἐρεῖ, Ἐγὼ μουσικός εἰμι, ἄν πληκτρον καὶ κιθάραν ἀγοράσῃ.“ — *scalpra*] σκῆλη, culter sutorum. — *formas*] linguae sunt pedes, quibus utuntur sutores; καλόπους. — *aversus*] Carm. II, 4, 19. Quintil. VII, 1, 11: „defensionem aversior;“ *mercaturis* igitur tertius casus est. — *qui discrepat*] Sic optimi codices, et recte. cf. v. 260. 275. 311. Ex initio ipsius verbi *discrepare* facile accrescere potuit *d* littera, unde quod in aliis editionibus est *quid* factum videtur. — *sacrum*] Sat. I, 1, 71. — *nihil est*] quid dico?

- Potet acetum; age, si et stramentis incubet, unde-
 Octoginta annos natus, cui stragula vestis,
 Blattarum ac tinearum epulae, putrescat in arca;
 120 Nimirum insanus paucis videatur, eo quod
 Maxima pars hominum morbo iactatur eodem.
 Filius aut etiam haec libertus ut ebibat heres,
 Dis inimice senex, custodis? Ne tibi desit?
 Quantulum enim summae curtabit quisque dierum,
 125 Ungere si caules oleo meliore caputque
 Coeperis impexa foedum porrigine? Quare,
 Si quidvis satis est, periuras, surripis, aufers
 Undique? Tun sanus? Populum si caedere saxis
 Incipias servosve tuos, quos aere pararis,
 130 Insanum te omnes pueri clamentque puellae:
 Cum laqueo uxorem interimis matremque veneno,
 Incolumi capite es. Quid enim? Neque tu hoc facis Argis,
 Nec ferro ut demens genitricem occidis Orestes.
 • An tu reris eum occisa insanisse parente,
 135 Ac non ante malis dementem actum Furiis, quam
 In matris iugulo ferrum tepefecit acutum?

non satis est dixisse *mille cadis*, dicendum *tercentum milibus*. — *acetum*] mutatum vinum, vappam tam acrem ut acetum. — *unde-Octoginta*] de verbo diviso cf. ad Sat. I, 2, 62. *Horkelius*, cui nimis accurata et paene anxia aetatis definitio ab hoc loco aliena videretur, ne *stramenta* epitheto carerent, suspicatus est vel contra codd. et scholia scribendum esse *udis Octoginta*. Sed *folia* dici debebant *amara*, quoniam non deerant quae a gulonibus cupide quaererentur; *stramenta* autem nec sunt in deliciis et ipsa contraria sunt *stragulae vesti*, i. e. tapetibus pretiosis ac mollibus. — *tun sanus*] „Tu profecto sanus non es; quamquam bene scio populo eos solos insanos videri qui rarioribus et vulgaribus vitiis laborent; veluti si quis populum saxis caedat vel magno pretio emptos servos vulneret, eum omnes insanum habebunt, verum si quis uxorem matremve laqueo vel veneno clam tollat, is quoniam in media urbe Roma

veneficiis referta vulgare facinus commisit neque apertam ut Orestes vim matri intulit, plurimis insanus non videbitur. cf. Epist. I, 1, 101. — *servosve tuos*] Sic omnes, ut videtur, codices et veteres editiones. Sed „si semel, inquit Bentleius, tuos dixeris, nihil attinet illa adicere *quos aere pararis*, ut ne addam *servos tuos quos* *κακοφωρία* sua aures offendere et vulnerare.“ Itaque coniecit legendum esse *servosve, tuo quos*; ingeniose quidem, sed falsis rationibus motus. Nam illa *quos aere pararis* causam habent, unde magna in servis vulnerandis insania intelligatur: quamquam, inquit, servos tuos magno tibi pretio parasti, tamen nunc vulneras tibi ipse damnum parans. De *κακοφωρία* vix dicendum erat. — *pueri*] vide ad Sat. I, 1, 85. — *clamentque*] De transposita particula *que* vide ad Carm. II, 7, 25; exemplis ibi collatis adde praeter hunc locum versus 157. 180. 182. 242. Sat. II, 7, 64. — *incolumi*

- Quin, ex quo est habitus male tutae mentis Orestes,
 Nil sane fecit quod tu reprehendere possis:
 Non Pyladen ferro violare aususve sororem
 140 Electram, tantum maledicit utrique vocando
 Hanc Furiam, hunc aliud, iussit quod splendida bilis.
 Pauper Opimius argenti positi intus et auri,
 Qui Veientanum festis potare diebus
 Campana solitus trulla vappamque profestis,
 145 Quondam lethargo grandi est oppressus, ut heres
 Iam circum loculos et claves laetus ovansque
 Curreret. Hunc medicus multum celer atque fidelis
 Excitat hoc pacto: mensam poni iubet atque
 Effundi saccos nummorum, accedere plures
 150 Ad numerandum; hominem sic erigit; addit et illud:
 Ni tua custodis, avidus iam haec auferet heres.
 Men vivo? Ut vivas igitur, vigila: hoc age. Quid vis?
 Deficient inopem venae te, ni cibus atque
 Ingens accedit stomacho fultura ruenti.
 155 Tu cessas? agedum, sume hoc ptisanarium oryzae.
 Quanti emptae? Parvo. Quanti ergo? Octussibus. Eheu!
 Quid refert, morbo an furtis pereamque rapinis? —

capite es] ex opinione vulgi. — *male tutae mentis]* i. e. insanus.

V. 139. *Pyladen]* Orestis exemplum Stoicis fuit usitatissimum; inde etiam apud Persium 3, 118: „Non sani esse hominis non sanus iuret Orestes.“ Ceterum ratio hic habita est Orestis Euripidei v. 264, quo Orestes Furiam appellat sororem (μὴ ὄνσα τῶν ἐμῶν Ἐρινύων). — *splendida bilis]* „Bili morbose condensatae et propterea asphalti specie splendescenti a medicis tribuebatur μελαγχολία.“ *Orellius.* cf. Pers. 3, 8 „turgescit vitrea bilis.“ — *pauper argenti]* Sat. I, 1, 79. Iam reiecta populi de insania opinione ad avarum Stertinius redit eumque eo profectum esse ostendit insaniae, ut opes ipsa vita cariores habeat. (v. 142—159). Opimius nomen est hominis ignoti. — *Veientanum]* vile vinum. — *trulla]* qua vinum ex cratere in pocula infunditur. Campana

vilis est. Vide ad Sat. I, 6, 118. — *hoc age]* Verba sunt praeconis in sacris incipiendis ad excitandos hominum animos, ne aliarum rerum cogitatione distraherentur. — *quid vis]* Opimii sunt verba. — *inopem]* defectum viribus, prorsus exhaustum. — *ingens fultura]* Senec. epist. 95: „vino fulcire venas cadentes.“ Lucret. IV, 868: „Propterea capitur cibus, ut suffulciat artus.“ *Ingenti* autem opus est fultura, quia plane exhaustus est homo. Alii tamen, quibus ineptum videbatur, graviter aegrotantis hominis curationem ab athletico victu inchoare, nec veri simile, oryzae ptisanarium ingentem fulturam praebuisse, locum emendandum esse putarunt, *Bentleius: praesens, Markland: ingesta, Sanado: instans, Horkelius: id genus.* — *ptisanarium]* sorbitio ex fervente aqua et oryza, saepius hordeo, facta. Oryzam ea aetate ex Aegypto ad usus medicorum ap-

- Quisnam igitur sanus? Qui non stultus. Quid avarus?
 Stultus et insanus. Quid? si quis non sit avarus,
 160 Continuo sanus? Minime. Cur, Stoice? Dicam.
 Non est cardiacus — Craterum dixisse putato —
 Hic aeger: recte est igitur surgetque? Negabit,
 Quod latus aut renes morbo tententur acuto.
 Non est periurus neque sordidus; immolet aequis —
 165 Hic porcum Laribus: verum ambitiosus et audax;
 Naviget Anticyram. Quid enim differt, barathrone
 Dones quidquid habes, an nunquam utare paratis?
 Servius Oppidius Canusi duo praedia, dives
 Antiquo censu, gnatis divisisse duobus
 170 Fertur et hoc moriens pueris dixisse vocatis
 Ad lectum: Postquam te talos, Aule, nucesque
 Ferre sinu laxo, donare et ludere vidi,
 Te, Tiberi, numerare, cavis abscondere tristem;
 Extimui, ne vos ageret vesania discors,
 175 Tu Nomentanum, tu ne sequerere Cicutam.
 Quare per divos oratus uterque Penates,
 Tu cave ne minuas, tu ne maius facias id,
 Quod satis esse putat pater et natura coërcet.
 Praeterea ne vos titillet gloria, iure
 180 Iurando obstringam ambo: uter aedilis fueritve

portabant. — *morbo*] morbi curatione; suas enim putat opes minores esse quam quibus possit curatio praestari, cum ptisanarium iam octo assibus constet. Dicit igitur medicum, a quo defensus sit a rapinis heredum, nunc se perdere pretiosis medicamentis. — *cur, Stoice*] Ita se ipse interrogat Stertinius; ut apud Arrian. Epist. 2, 20, 22: „τί λέγεις, φιλόσοφε;“ — *cardiacus*] qui ex stomacho laborat; *καρδία* enim non *cor* tantum, sed etiam os ventriculi est. — *Craterum*] quo nobili medico usus iam erat Atticus. Cic. ad Att. XII, 14. — *tententur*] Sic antiquissimi codices, alii *tentantur*. Coniunctivus causam habet cur neget medicus; ex cuius animo melius haec proferantur quam simpliciter ad-

duntur a Stoico. Epist. I, 6, 28 idem prope versiculus legitur; ibi autem recte codices indicativum tuentur. — *aequis*] cf. Carm. II, 4, 16. III, 23, 4. — *barathrone*] largitionibus, quibus popularis aura captatur. Id qui facit, non melius facultatibus suis utitur quam avarus, qui intactas eas servat. Cur ita, exemplo Servii Oppidii probatur. — *hoc*] Sic editiones vetustae et MSS. fere omnes. Alii *haec*. cf. v. 190.

V. 172. *sinu laxo*] ex quo facile poterant excidere. Quod deinde positum est *ludere vidi*, intelligendum de iis ludis puerorum, quo res perdi poterant; hos vitio dat pater, non item reliquos. Non opus est Bentleii coniectura *perdere* pro *ludere*. — *Nomen-*

Vestrum praetor, is intestabilis et sacer esto.
 In cicere atque faba bona tu perdasque lupinis,
 Latus ut in Circo spatiere aut aeneus ut stes,
 Nudus agris, nudus nummis, insane, paternis;
 185 Scilicet ut plausus, quos fert Agrippa, feras tu,
 Astuta ingenuum vulpes imitata leonem.
 Ne quis humasse velit Aiace, Atrida, vetas cur?
 Rex sum. Nil ultra quaero plebeius. Et aequam
 Rem imperito; ac si cui videor non iustus, inulto
 190 Dicere quod sentit permitto. Maxime regum,
 Di tibi dent capta classem reducere Troia!
 Ergo consulere et mox respondere licebit?
 Consule. Cur Ajax, heros ab Achille secundus,
 Putescit, toties servatis clarus Achivis,
 195 Gaudeat ut populus Priami Priamusque inhumato,
 Per quem tot iuvenes patrio caruere sepulcro?
 Mille ovium insanus morti dedit, inclitum Ulixen
 Et Menelaum una mecum se occidere clamans.

tanum] cf. Sat. I, 1, 102. De Cicuta vide supra v. 69. — *intestabilis*] Etsi proprium est de eo cui interdictum est iure testandi, testamenti faciendi vel testamento aliquid accipiendi, tamen saepe apud Tacitum et Plinium legitur pro *detestabilis*, *exsecrandus*. Sal. Ing. 67 „Turpilius improbus *intestabilisque* esto.“ — *in cicere*] Significatur ludi aedilium, quibus cibaria distribuebantur plebi. — *aut aeneus*] Sic plurimi codices; ex paucis primus Benteius et *aëneus*, ne aeneus *τρίσυλλάβως* pronuntiandum esset. Quod quamquam sine exemplo est, (nam quod affertur, Ovid. Met. VII, 247, incertum est, cum ibi in codd. partim *aeneaeque* partim *aereaeque*, partim *alteraeque* reperiatur,) praestat tamen hoc ipsum pro exemplo habere quam necessariam aut particulam obliterare. Nam per quendam iocum *spatiari* et *stare* verba opposita sunt inter se. — *latus*] ut Epod. 4, 7. — *imitata leonem*] Ad hunc usque locum pergit Oppidii oratio ad filios. Qua absoluta Stoicus pergit in demonstranda ambitionis insania, et ut summos

etiam homines eodem vitio laborare ostendat, summum et nobilissimum inter omnes reges Agamemnonem arcessit et explorat (v. 187—223). In quo loco noli credere, fingi ab Horatio colloquium inter Agamemnonem et gregarium militem; immo vero ipse Stertinius est qui alloquitur Agamemnonem et Stoicorum vivida disputandi ratione ex eiusdem sententia et persona sibi ipse respondet. Stoicorum arcesere omnes legimus v. 80 sq. — *humasse*] perfectum ex antiqua legum formula. — *di tibi dent*] cf. Hom. II, 1, 18. — *reducere*] De duplici littera *d* vide Zumpt. gr. §. 22. cf. Carm. II, 1, 28. Et sic omnes prope codices. Alii, quibus producta prima syllaba displiceret, maluerunt *deducere* i. e. domum ducere; qua tamen mutatione opus non est. — *ab Achille*] Hom. II, 768. Virg. Bucol. 5, 49. — *Priami*] Hom. II, 1, 255. — *mille ovium*] Genitivum intelliges, cum *mille* substantivum quoque nomen esse memineris; alia exempla non ita rara sunt: Cic. Mil. 20, 53. Corn. Nep. Dat. 8, 3. Agamemnonis hi duo versus sunt.

- Tu cum pro vitula statuis dulcem Aulide natam
 200 Ante aras spargisque mola caput, improbe, salsa,
 Rectum animi servas? Quorsum? Insanus quid enim Ajax
 Fecit, cum stravit ferro pecus? Abstinit vim
 Uxore et gnato: mala multa precatus Atridis,
 Non ille aut Teucrum aut ipsum violavit Ulixen.
 205 Verum ego, ut haerentes adverso littore naves
 Eriperem, prudens placavi sanguine divos.
 Nempe tuo, furiose. Meo, sed non furiosus.
 Qui species alias veris scelerisque tumultu
 Permixtas capiet, commotus habebitur; atque
 210 Stultitiane erret, nihilum distabit, an ira:
 Ajax cum immeritos occidit, desipit, agnos;
 Cum prudens scelus ob titulos committis inanes,
 Stas animo et purum est vitio tibi, cum tumidum est, cor?
 Si quis lectica nitidam gestare amet agnam,

— *rectum animi*] τὸ ὀρθόν, rectam mentem. — *clamans*] minitans; consulto hoc verbum in fine versus positum, quo clarius eluceat discrimen inter Agamemnonis factum et Aiakis. — *quorsum*] quorsum haec spectant, inquit Agamemno. — *uxore*] Tecmessa; filius fuit Eurysaces. — *ipsum Ulixen*] cui vel maxime irascetur.

V. 205. *adverso littore*] est Troiae e regione oppositum. Agamemnonem refellens v. 208 Stertinius paulatim ad generalem disputationem relabitur; colloquio quidem finito insania tamen Agamemnonis usque ad finem totius loci v. 223 lepida ἀντιθέσει filiae et agnae festive describitur. — *species alias*] Species sunt cogitationes et opiniones animo conceptae. Cic. Acad. I, 8: „Hanc illi ἰδέαν appellabant iam a Platone ita nominatam: nos recte speciem possumus dicere.“ Insequens vocabulum *veris* sumptum est ex tribus quattuorve antiquissimis codicibus; reliqui prope omnes *veri*, pauci *vero*. Qui *veri* legunt, iis necessitas omnino imposita est coniungendi verba *veris scelerisque tumultu*; quo facto rectam explicationem specierum *aliarum* invenire non possunt, cum *alius* neque sit *inter se diversus* neque *alienus*

(fremde Gebilde *Kirchner*) neque quidquam efficias si addere velis *atque eas quae hominibus esse solent*. *Veris* ablativus est, de quo compāra Ep. I, 16, 20. II, 1, 240. Sententia est: qui species capiet veritati contrarias (glossa antiquiss. cod. Bland.) et conturbatione malae cupiditatis (*sceleris*, cf. v. 213 *vitium*) confusas, is mente captus habebitur. Haec sententia Aiacem non minus attingit quam Agamemnonem, nec opus videtur emendatione. *Horkelius* coniecit: *cerebrique tumultu*. cf. Carm. II, 16, 10. Quintil. VII, 2, 44: „An etiam, si nulla ratione ductus est, impetu raptus sit et absque sententia. Nam vulgo dicitur: scelerum non habere consilium.“ Recte iam *Ascensius*: „sceleris i. e. iniquitatis; permixtas i. e. confusas; tumultu i. e. turbatione.“ — *commotus*] mente captus; movetur animus libidinibus et perturbatur. cf. v. 278. — *committis*] Sic uno excepto omnes codd. Crug. et alii, quos ut deseramus cum aliisque scribamus *admittis*, nihil est quod possit suadere. Dicebant committere flagitium, caedem, furtum, similia. — *stas animo*] bene ponitur contra illud *commotus habebitur*. — *cor*] sedes affectionum et cupiditatum, ut Carm. I,

- 215 Huic vestem ut gnatae, paret ancillas, paret aurum,
 Rufam et Pusillam appellet fortique marito
 Destinet uxorem; interdicto huic omne adimat ius
 Praetor et ad sanos abeat tutela propinquos.
 Quid? si quis gnatam pro muta devovet agna,
 220 Integer est animi? Ne dixeris. Ergo ubi prava
 Stultitia, hic summa est insania; qui sceleratus,
 Et furiosus erit; quem cepit vitrea fama,
 Hunc circumtonuit gaudens Bellona cruentis.
 Nunc age luxuriam et Nomentanum arripe mecum:
 225 Vincet enim stultos ratio insanire nepotes.
 Hic simul accepit patrimoni mille talenta,
 Edicit, piscator uti, pomarius, auceps,
 Unguentarius ac Tusci turba impia vici,
 Cum scurris fator, cum Velabro omne macellum
 230 Mane domum veniant. Quid tum? Venere frequentes.
 Verba facit leno: Quidquid mihi, quidquid et horum
 Cuique domi est, id crede tuum et vel nunc pete vel cras.
 Accipe, quid contra iuvenis responderit aequus:
 In nive Lucana dormis ocreatus, ut aprum
 235 Coenem ego: tu pisces hiberno ex aequare verris;
 Segnis ego indignus qui tantum possideam: aufer!
 Sume tibi decies; tibi tantundem; tibi triplex,
 Unde uxor media currit de nocte vocata.

23, 8. A. P. 98. Hom. II. IX, 646. — *Rufam et Pusillam*] Cum non propria nomina haec sint sed blanda et ὑποκοριστικά, et particulam ex auctoritate antiquissimorum codicum alteri aut praeferendam duxi. — *interdicto*] Ex lege XII tabularum praetor furioso bonis interdicebat et curatorem constituebat ex agnatis. cf. Ep. I, 1, 102. — *vitrea fama*] vide ad Carm. I, 17, 20. — *Bellona*] Tibull. I, 6, 45: „Haec ubi Bellonae motu est agitata, nec acrem Flammam, non amens verbera torta timet. Ipsa bipenne suos caedit violenta lacertos Sanguineque effuso spargit inulta deam.“ Significatur fanatici ex aede Bellonae.

V. 224. Iam tertium genus insano-

rum arcessitur. cf. v. 79. — *vincet ratio*] Sat. I, 3, 115 coll. infra 250. — *edicit*] tanquam praetor per praeconem vel tabula publice posita. — *Tusci vici*] ubi lenones habitabant. — *fator*] qui aves saginat, ὄρνετορόφος. Alii botularium intelligere malunt. Cicer. de off. I, 42. — *Velabro*] „locus Romae, ubi prostabant omnia quae ad victus rationem et delicias pertinebant.“ *Comm. Cruq.* — *macellum*] ubi caro, pisces, obsonia vendebantur. Epist. I, 15, 31. — *leno*] „Apud luxuriosum leno primum loquitur tanquam patronus omnium nebulonum.“ *Comm. Cruq.* — *pisces verris*] everriculo. — *segnis*] acerbissime dictum ut supra v. 233 *aequus*. — *decies*] cen-

- Filius Aesopi detractam ex aure Metellae,
 240 Scilicet ut decies solidum exsorberet, aceto
 Diluit insignem bacam: qui sanior ac si
 Illud idem in rapidum flumen iaceretve cloacam?
 Quinti progenies Arri, par nobile fratrum,
 Nequitia et nugis, pravorum et amore gemellum,
 245 Luscinias soliti impenso prandere coëmpas,
 Quorsum abeant? Sani ut creta an carbone notati?
 Aedificare casas, plostello adiungere mures,
 Ludere par impar, equitare in arundine longa
 Si quem delectet barbatum, amentia verset.
 250 Si puerilius his ratio esse evincet amare,
 Nec quidquam differre, utrumne in pulvere, trimus
 Quale prius, ludas opus, an meretricis amore
 Sollicitus piores; quaero, faciasne quod olim
 Mutatus Polemo, ponas insignia morbi,

tena milia sestertium. — *Aesopi*] tragici actoris et Ciceronis amici. — *Metellae*] Caecilia Metella, uxor P. Cornelii Lentuli Spintheris, repudiata ab eo a. u. c. 709. — *solidum*] integram summam decies sestertium (82214 flor. Rhen.). Plin. H. N. IX, 35 ubi Cleopatram detractum ex altera auricula unionem aceto dilutum absorbuisset et sic uno haustu decies sestertium consumpsisse narravit, „prior, addit, id fecerat Romae in unionibus magnae taxationis Clodius tragoedi Aesopi filius, relictus ab eo in amplis opibus heres.“ — *exsorberet*] Alii ex codd. *obsorberet*, alii *absorberet*. Vide etiam ad Sat. II, 8, 24. — *Arri*] vide supra v. 86. — *pravorum et*] vide ad Carm. I, 2, 9. — *lusciniis*] Plin. H. N. X, 29: „Servorum illis (lusciniis) pretia sunt et quidem ampliora quam quibus olim armigeri parabantur. Scio sestertiis sex candidam aliquam, quod est prope inusitatum, venisse, quae Agrippinae, Claudii principis coniugi, dono daretur.“ Ceterum pronuntia tribus syllabis. Vide ad Carm. III, 4, 41. — *prandere*] Sic prandere non ponitur contra coenam, sed videtur generale vocabulum esse de quovis epulo. Epist. I, 17, 13. A. P. 340. — *sani ut*] Scribendum putavi *sani ut creta an car-*

bone notati? auctoritate motus quattuor antiquissimorum codicum Cruquii, duorum Orellii, aliquot Bentleii et quattuor Pulmanni. De particula *ut* Gesnero quoque probata dubitari nequit. cf. Sat. I, 3, 89. Ovid. Am. III, 11, 12: „Excubui clausam *servus ut* ante domum.“ Deinde *notati* quoque participium, in sex antiquissimis codd. Cruquii in multisque aliis repertum, recte se habere videtur, dummodo alteram interrogationem quam proxime cum superiore coniungas: quorsum abeant, postquam ultra ratione, creta ut sani an carbone, notati sunt? Et bene iam Bentleius: „non abeunt ablegati ad insanos, *notandi* carbone; sed iam tum *notati* illuc deportantur.“ Praeterea cave ne cum Orellio pro lectione *notandi* Acronis scholion afferas; in antiquis enim editionibus totum illud scholion desideratur. —

V. 247 *aedificare*] Luxuriosos etiam adnumerandi sunt qui amore meretricum uruntur; de horum insaniam disputatur vv. 247—280. — *ludas opus*] opus serium ludendo imiteris. — *Polemo*] „Iuvenis fuit Atheniensis perditae luxuriae. Is cum ebrius incederet per urbem, fertur audisse e propinquo Xenocratis vocem disputantis, deinde introisse coronatus et unguentatus ad

- 255 Fasciolas, cubital, focalia, potus ut ille
 Dicitur ex collo furtim carpsisse coronas,
 Postquam est impransi correptus voce magistri?
 Porrigis irato puero cum poma, recusat:
 Sume, catelle; negat: si non des, optat: amator
- 260 Exclusus qui distat, agit ubi secum, eat an non,
 Quo rediturus erat non arcessitus, et haeret
 Invisis foribus? Nec nunc, cum me vocat ultro,
 Accedam? an potius mediter finire dolores?
 Exclusit; revocat: redeam? Non, si obsecret. Ecce
- 265 Servus non paulo sapientior: O here, quae res
 Nec modum habet neque consilium, ratione modoque
 Tractari non vult. In amore haec sunt mala, bellum,
 Pax rursum: haec si quis tempestatis prope ritu
 Mobilia et caeca fluitantia sorte labore
- 270 Reddere certa sibi: nihilo plus explicet ac si
 Insanire paret certa ratione modoque.
 Quid? cum Picenis excerpens semina pomis
 Gaudes, si cameram percussit forte, penes te es?
 Quid? cum balba feris annoso verba palato,
- 275 Aedificante casas qui sanior? Adde cruorem
 Stultitiae atque ignem gladio scrutare. Modo, inquam,

eum deridendum. Senex autem perse-
 veravit et invecus in luxuriam coegit
 Polemonem poenitere sui et coronas
 abicere: qui postea tantus in philo-
 sophia (Academia) existit, ut dignus
 existimatus sit qui Xenocrati succederet.
Comm. Cruq. — *fasciolas*] „fas-
 ciolae ornamenta quaedam sunt bra-
 chiorum, pedum, articularum vel vittae;
cubital pulvillus qui cubito coenantis
 supponi solebat; *focalia* collaria ad
 fovendum collum et fauces.“ *Idem.* —
impransi] sobrii. Sat. II, 2, 7. — *ca-*
telle] blanda allocutio. — *qui distat*]
 cf. v. 108. — *Nec nunc*] Totus locus
 sumptus est ex Terentii Eunuchio I, 1,
 1: „*Quid igitur faciam? non eam? ne*
nunc quidem, Cum arcessor ultro? an
potius ita me comparem, Non perpeti
meretricum contumelias? Exclusit, re-
vocat. Redeam? non, si me obsecret.“

Haec ibi Phaedria; cui servus Parmeno
 v. 12: „*Here, quae res in se neque*
consilium neque modum Habet ullum,
eam consilio regere non potes. In
amore haec omnia insunt vitia, iniuriæ,
Suspiciones, inimicitiae, induciae, Bel-
lum, pax rursum; incerta haec si tu
postules. Ratione certa facere, nihilo
plus agas, Quam si des operam ut cum
ratione insanias.“ Ceterum *nec nunc*
 recepi ex bonis codd., nam quod scri-
 ptum est in aliis codd. *ne nunc*, id
 refellitur consuetudine Latina, quae
 ne particulam pro *ne-quidem* asper-
 nari videtur. — *Picenis*] Sat. II, 4,
 70. — *gaudes*] quia faustum inde
 amoris augurium capis. Est lusus
 amantium. — *feris*] quia a palato ver-
 ba repercutiuntur. — *ignem gladio scru-*
tare] Imago Pythagorica πῶς μαχίοντα
 μὴ σκαλεῖν. Est insanos tumultus

- Hellade percussa Marius cum praecipitat se,
 Cerritus fuit? an commotae crimine mentis
 Absolves hominem et sceleris damnabis eundem,
 280 Ex more imponens cognata vocabula rebus?
 Libertinus erat, qui circum compita siccus
 Lautis mane senex manibus currebat et, Unum, —
 Quid tam magnum? addens — unum me surpitem morti;
 Dis etenim facile est, orabat, sanus utrisque
 285 Auribus atque oculis; mentem, nisi litigiosus,
 Exciperet dominus, cum venderet. Hoc quoque vulgus
 Chrysippus ponit fecunda in gente Meneni.
 Iuppiter, ingentes qui das adimisque dolores,
 Mater ait pueri menses iam quinque cubantis,
 290 Frigida si puerum quartana reliquerit, illo
 Mane die, quo tu indicis ieiunia, nudus
 In Tiberi stabit. Casus medicusve levarit
 Aegrum ex praecipiti, mater delira necabit
 In gelida fixum ripa febrimque reducet.
 295 Quone malo mentem concussa? Timore deorum.
 Haec mihi Stertinius, sapientum octavus, amico

mentis concitare. Sententia est: Nugis adde cruenta facinora atque ardorem cupiditatis auge etiam crudelitatem. — *Modo*] coniungenda particula est cum *percussa*. *Inquam*, quod affirmantis est, additur, quia exemplo Marii praece- dens generalis sententia explicatur. *Frankii* coniectura: „scrutare modo, in quem *Hellade* cett.“, blanda quidem est, sed illud offendit, quod, cum *gladio* vocabulum in generali sententia positum sit, idem relativo *quem* in specialem violentius transfertur. In MSS. nulla est varietas. — *Hellade*] puellae nomen est. — *cognata vocabula*] non multum diversa; scelus enim ab insaniam non multum distat ex Stoicorum doctrina.

V. 281. Transit ad quartum genus insanorum (v. 280—295); vide supra v. 79. Duo superstitionis exempla inter se contraria ponuntur, unum libertini (281—287), alterum insane matris (288—294). — *circum compita*] ubi Lares Praestites positi erant, — *quid*

tam magnum?] Sic optimi codd. Alii *quiddam*. „Non magnam, ait, rem postulo; ut unum saltem ex tot milibus morti eripiat; vobis certe, o di, hoc factu facillimum est.“ *Bentl.* — *litigiosus*] Digest. XXI, 1, 1: „Aiunt Aediles: Qui mancipia vendunt, certiores faciant emptores quid morbi vitiae cuique sit, quis fugitivus errove sit noxaeve solutus non sit, eaque omnia, cum ea mancipia veneunt, palam recte pronuntiant.“ — *Meneni*] „Menenius fuit illis temporibus insanus. Unde Meneniae stultitiae vel ineptiae.“ *Porphy.* — *cubantis*] vide ad Sat. I, 9, 18. — *ieiunia*] Etiam inter gentiles superstitiosi homines, cum magnis calamitatibus premebantur, ieiunia servabant. Tertull. de ieiun. 15: „Cum stupet coelum et aret annus, nudipedalia denuntiantur, . . . Iudaeum certe ieiunium ubique celebratur.“ — *timore deorum*] nimirum superstitioso ideoque reiiciendo; *δεισιδαιμονία*.

Arma dedit, posthac ne compellarer inultus.

Dixerit insanum qui me, totidem audiet atque

Respicere ignoto discet pendentia tergo.

300 Stoice, post damnum sic vendas omnia pluris,

Qua me stultitia, quoniam non est genus unum,

Insanire putas? ego nam videor mihi sanus.

Quid? caput-abscissum manibus cum portat Agave

Gnati infelicis, sibi tum furiosa videtur?

305 Stultum me fateor, liceat concedere veris,

Atque etiam insanum; tantum hoc edissere, quo me

Aegrotare putes animi vitio. Accipe: primum

Aedificas, hoc est, longos imitaris ab imo

Ad summum totus moduli bipedalis, et idem

310 Corpore maiorem rides Turbonis in armis

Spiritum et incessum: qui ridiculus minus illo?

An quodcunque facit Maecenas, te quoque verum est

Tantum dissimilem et tanto certare minorem?

Absentis ranae pullis vituli pede pressis

315 Unus ubi effugit, matri denarrat, ut ingens

Belua cognatos eliserit: illa rogare,

Quantane? Num tantum, sufflans se, magna fuisset?

Maior dimidio. Num tantum? Cum magis atque

Se magis inflaret, Non, si te ruperis, inquit,

— *pendentia tergo*] Referunt interpretes haec ad Aesopicam fabulam ap. Phaedr. IV, 10: „Peras imposuit Iuppiter nobis duas: Propriis repletam vitibus post tergum dedit, Alienis ante pectus suspendit gravem.“ Quid tamen prohibet quominus de trahentibus candam (v. 53) dictum putemus?

V. 300. Ut redeat sermo unde exiit, interrogat Horatius Stoicum, qua se dicat insanire insaniam. De particula *sic* vide ad Carm. I, 3, 1. — *post damnum*] cf. supra v. 18 sq. — *pluris*] Gloriatum erat Damasippus v. 24 se unum cum lucro scivisse aedes vendere; quare maius etiam lucrum nunc ei optat Horatius. — *quid*] Quid, inquit Damasippus, mirum, quod tu sanum te putas? Nonne idem etiam Aga-

ve? De qua lege Ovid. Met. III, 725.

— *aedificas*] in Sabino nuper accepto. Liv. VI, 11, 9: „Et erat aeris alieni magna vis, re damnosissima etiam divitibus, aedificando contracta.“ Cic. de off. I, 39, 139. Notanda etiam Lacedaemoniorum imprecatio: *οἰκοδομά σε λάβοι*. — *longos*] ambigue dictum de longitudine corporis et de magnitudine opum. cf. v. 212. — *bipedalis*] cf. Epist. I, 20, 24. — *Turbo*] „gladiator fuit exiguo corpore sed animosus pugna.“ *Porphy.* — *spiritum*] audaciam, temeritatem. — *tantum dissimilem*] vide ad Sat. I, 8, 17. — *maior dimidio*] Sic respondet pullus, cui obstupefacto et imperito rectum de magnitudine vituli iudicium non est. Fabula apud Phaedrum est I, 24. — *oleum*] Ex

320 Par eris. Haec a te non multum abludit imago.

Adde poëmata nunc, hoc est, oleum adde camino;

Quae si quis sanus facit, et sanus facies tu.

Non dico horrendam rabiem. Iam desine. Cultum

Maiorem censu. Teneas, Damasippe, tuis te.

325 Mille puellarum, puerorum mille furores.

O maior tandem parcas, insane, minori!

SATIRA IV.

Unde et quo Catus? Non est mihi tempus aventi

Ponere signa novis praeceptis, qualia vincunt

proverbio; sic Graeci *πίττη καὶ ἐλαίῳ πῦρ κατασβεσνύναι*. — *Quae si quis*] cf. A. P. 296 sq. Sat. II, 7, 117. — *rabiem*] Epist. I, 20, 25. — *insane*] Egregius hic versiculus, qui dum magnam laudem parat, uno vocabulo in salsissimam irrisiōnem subito cadit.

Satira IV.

De hac satira haud dubie post secundam scripta — vides enim Sat. II, 2, 52 sq. huic quasi viam muniri — verissime olim disputavit *Wüllner* (progr. schol. Düsseldorf. 1833). Etenim „verum, inquit, poetae in hac satira scribenda consilium discendum est primum ex ipso argumento quod cernitur in compluribus praeceptis laute et delicate vivendi (vv. 12—87). Secundum est quod in his praeceptis, quae maximam partem vulgaria sunt ac trita sed ut nova exhibentur, nonnulla comuni veterum usui plane repugnant sive falsa sunt: utrumque quin studio quaesiverit Horatius nullo modo dubium est. Deinde Catus praecepta illa convivalia non ut a se cognita tradit, sed memoriter ea et quasi sine sensu decantat: unde initio carminis poeta eum cursu celerrimo praeterire cogitat, ut continuo singula litteris consignet, priusquam ex animo suo quidquam exciderit. Quarto loco tenendum est verum auctorem sapienter dictorum sedulo occultari et arcana quadam magnitudine involutum esse tanquam alterum Tyanensem Apollonium. Porro facile vides non temere occultari nomen auctoris, sed hoc eo fieri consilio

ut praecepta a Catio memorata cum nulla re alia comprobentur, dignitate auctoris confirmata et ampliora esse videantur. Denique Catus nova sua praecepta talia esse praedicat, ut vincant „Pythagoran Anytique reum doctumque Platona.“ Atque Horatius illa sub finem carminis ironice dicit praecepta vitae beatae, se quoque a magno illo magistro ea discere velle simulans: cum nemo sanus talia discere velit sed suum quisque sensum et palatum sequi debeat.“ Et deinde: „Ergo Horatius hac satira describit gastronomorum praecepta, quae pro novis et inauditis venduntur, pleraque vulgaria esse et omnibus nota, alia ex arbitrio et libidine singulorum hominum pendere et commenticia esse. Quare si quis in gustando princeps hodie inter lautas epulas edixisset pratenses fungos ceteris meliores esse et caulem in siccis agris natum suburbano dulciorem (cf. vv. 15 et 20) vel panem nigrum inter delicatissima cupedia numerandum esse, omnes harum rerum studiosos hoc ita verum esse continuo gustare quamvis reclamante palato. Et tamen hanc disciplinam tam vulgarem tamque arbitrariam sub eiusmodi hominibus veram artem beatae vitae dici tantaeque diligentia doceri ac disci, quasi nihil rerum humanarum gravius aut difficilius sit.“ Catium autem sumpsit Horatius ex Ciceronis epistolis ad Fam. XV, 16; in qua epistola anno fere 708 scripta Catii Insubri, Epicurei philosophi, nupera mors commemoratur. Idem saepius factum ab Horatio Trebatius Testa ostendit (Sat. II,

Pythagoran Anytique reum doctumque Platona.

Peccatum fateor, cum te sic tempore laevo

5 Interpellarim; sed des veniam bonus oro.

Quodsi interciderit tibi nunc aliquid, repetes mox,

Sive est naturae hoc sive artis, mirus utroque.

Quin id erat curae, quo pacto cuncta tenerem,

Utpote res tenues tenui sermone peractas.

10 Ede hominis nomen, simul et Romanus an hospes.

Ipsa memor praecepta canam, celabitur auctor.

Longa quibus facies ovis erit, illa memento,

Ut suci melioris et ut magis alba rotundis,

Ponere: namque marem cohibent callosa vitellum.

15 Caule suburbano qui siccis crevit in agris

1). Et conferas Quintil. X, 1, 124: „In Epicureis levis quidem sed non iniunctus tamen auctor est Catius,“ quem quattuor libros de rerum natura et de summo bono scripsisse tradunt scholiastae ad h. l. Ignotum praeceptorum auctorem (v. 10. 89 sqq.) alii ipsum Horatium mira sui ipsius irrisione putant, alii non felicius Maecenatem. Verum ut auctoris nomen concessum nobis non est explorare, nisi forte ab Horatio fictum auctorem credere praestat, ita in ipso carmine quis dubitat quin non pauca insint quae nostram rei culinariae antiquorum scientiam effugiant, perspecta autem si essent, maiorem nobis crearent ex carmine delectationem. Scriptam esse hanc satiram alii a. 722 alii a. 724 opinantur; Weberus suspicatur carmen scriptum esse aestate (cf. v. 21) a. 726, Zumptius contra compositum iam esse a. 714. Desunt certae rationes, quibus innisi locus reperire queamus.

V. 2. *ponere signa*] idem est quod consignare litteris, eo fortasse discrimine, quod in ponendo signa simul inest notio firmitatis; hoc enim prohibetur est Catius ne quid sibi excidat. — *vincunt*] Sic multi et antiqui codices; recte, cum nihil certius sit Catio. Coniunctivo *vincant*, quem ex paucis codd. alii receperunt, equidem futurum *vincent* ex antiquissimo Codice Cruquii et uno Pulmanni praeferrem. Pro coniunctivo non licet citare Ep. I, 4, 3, qui locus ab hoc versu valde

diversus est. — *Anytique reum*] cf. Plat. Apol. Socr. p. 23. E. — *tempore laevo*] Sat. II, 1, 18. — *sive artis*] „optima es memoria et naturali et artificiali.“ *Comm. Cruq.* Artem memoriae, ut dicit Quintil. XI, 2, 11, primus ostendisse dicitur Simonides. Qui arte memoriam studuerunt adiuvere, ea quae essent tenenda fictis locis et imaginibus fixerunt; de quibus Quintil. XI, 2, 21: „Opus est ergo locis quae vel finguntur vel sumuntur, imaginibus vel simulacris quae utique fingenda sunt. Imagines notae sunt, quibus ea quae ediscenda sunt notamus, ut, quomodo Cicero dicit, locis pro cera, simulacris pro litteris utamur.“ Ponit igitur Horatius Catium singula praecepta certis iam locis et imaginibus fixa tenere; quod quidem a se factum ait Catius versu 8. — *tenues*] subtiles. Metaphora unde sumpta sit, intelliges ex Ep. II, 1, 225. — *peractas*] cf. Sat. I, 10, 26. — *canam*] tanquam vates. — *ovis*] Incipit ab ovis i. e. ab initio coenae (Sat. I, 3, 6) et simplicissimo cibo, cuius tria genera, ova, caulis, gallina, breviter tractantur (v. 12–20). — *ovis*] Plin. H. N. X, 52: „Quae ablonga sunt ova gratioris saporis putat Horatius Flaccus. Feminam edunt quae rotundiora gignuntur, reliqua marem.“ Contrarium tradit Aristot. H. A. VI, 6, 2: „Ἐστὶ δὲ τὰ μὲν μακρὰ καὶ ὀξέα τῶν ὀνδρῶν θήλειά, τὰ δὲ στρουγγύλα καὶ περικέφειαν ἔχοντα κατὰ τὸ ὄνυ ἁρσένα.“

- Dulcior; irriguo nihil est elutius horto.
 Si vespertinus subito te oppresserit hospes,
 Ne gallina malum responset dura palato,
 Doctus eris vivam misto mersare Falerno:
 20 Hoc teneram faciet. Pratensibus optima fungis
 Natura est: aliis male creditur. Ille salubres
 Aestates peraget, qui nigris prandia moris
 Finiet, ante gravem quae legerit arbore solem.
 Aufidius forti miscebat mella Falerno,
 25 Mendose, quoniam vacuis committere venis
 Nil nisi lene decet: leni praecordia mulso
 Prolueris melius. Si dura morabitur alvus,
 Mitulus et viles pellent obstantia conchae
 Et lapathi brevis herba, sed albo non sine Coo.
 30 Lubrica nascentes implent conchyliia lunae,
 Sed non omne mare est generosae fertile testae:
 Murice Baiano melior Lucrina peloris,

— *ponere*] Sat. II, 2, 23. — *elutius*] insipidius. Contrarium eorum est iudicium qui de re hortensi scripserunt; omnes enim aiunt caulem brassicam gaudere solo humido et minus aprico. — *malum*] pro male, ut Carin. II, 19, 6. III, 27, 67, alias, — *misto Falerno*] De hac omnium librorum MSS. scriptura Benteleus: „quid rogo, inquit, sibi vult *misto Falerno*, cum nihil quidquam hic sit quocum misceatur? Ergo subintelligi hic volunt interpretes *cum aqua*. Unde hoc iis compertum? Cur magis *cum aqua* quam *cum melle*, *oleo* vel alio quovis liquore?“ At vero nihil hic obscuritatis est. Solet a simplicibus hominibus gallina coqui in aqua, cui admiscendum docet artifex culinarius Falernum; quamquam hoc novum, ut ait ille, praeceptum nihil fortasse distabit a delicatolorum hominum vulgari ratione. Nihil opus esse videtur Benteleiana coniectura *musto Falerno*. Deinde non vinum solum aquae additum teneritatis causa est, sed „suffocatio spirituumque vitalium intus violenta conclusio carnem quodammodo maceratam tenerescere facit.“ Cruq.

V. 21. Quae insequuntur de salubritate ciborum quorundam praecepta

aut falsa videntur aut vulgaria. De promulside Plin. H. N. XXII, 24: „Semper mulsum ex vetere vino utilissimum facillimeque cum melle incorporatur, quod in dulci nunquam evenit. Ex austero non implet stomachum.“ — *Aufidius*] Suspiciantur viri docti, hunc esse M. Aufidium Lurconem, de quo Plin. H. N. X, 20: „Saginare (pavones) primus instituit circa novissimum piraticum bellum M. Aufidius Lurco exque eo quaestu reditus sestertium sexagena M. habuit.“ — *vacuis venis*] stomacho ieiuno, ut in initio prandii cf. Sat. II, 3, 153. — *prolueris*] cf. Sat. I, 5, 16. — *mitulus*] conchula esculenta. Cels. II, 29: „Alvum movent cochleae, ostrea, pelorides, echini, muscoli et omnes fere conchulae maximeque ius earum.“ — *Coo*] nam „Coi marinam aquam largiorem miscent,“ ut scripsit Plin. XIV, 8. — *albo*] Plin. H. N. XIV, 10: „Coi marinam aquam largiorem miscent (vino). . . idque translatum in album mustum *leucococum* appellatur.“ — *nascentes lunae*] Plin. II, 42: „Lunari potestate ostreorum conchyliorumque et concharum omnium corpora augeri ac rursus minui exquisivere diligen-

Ostrea Circeiis, Miseno oriuntur echini,
Pectinibus patulis iactat se molle Tarentum.

35 Nec sibi coenarum quivis temere arroget artem,
Non prius exacta tenui ratione saporum.

Nec satis est cara pisces averrere mensa,
Ignarum, quibus est ius aptius et quibus assis
Languidus in cubitum iam se conviva reponet.

40 Umber et iligna nutritus glande rotundas
Curvat aper lances carnem vitantis inertem:
Nam Laurens malus est, ulvis et arundine pinguis.
Vinea submittit capreas non semper edules.
Fecundae leporis sapiens sectabitur armos.

45 Piscibus atque avibus quae natura et foret aetas,
Ante meum nulli patuit quaesita palatum.
Sunt quorum ingenium nova tantum crustula promit:
Nequaquam satis in re una consumere curam;
Ut si quis solum hoc, mala ne sint vina, laboret,

50 Quali perfundat pisces securus olivo.
Massica si coelo supponas vina sereno,
Nocturna, si quid crassi est, tenuabitur aura

tiores.“ Iam transit Catus ad singulas delicias et cibos, hic quoque vel falsa vel omnibus nota prodens. — *patulis*] Arist. H. A. IV, 4: „τῶν δὲ ἄλλων (ὀστρακοδέσμων) τὰ μὲν ἐστὶ δίθυρα, τὰ δὲ μονόθυρα· τῶν δὲ διθύρων τὰ μὲν ἐστὶ ἀνάπτυχα, οἷον οἱ κτένες καὶ οἱ μύες· ἅπαντα γὰρ τὰ τοιαῦτα τῇ μὲν συμπερίνευσι, τῇ δὲ διαλέλνται, ὥστε συγκλείεσθαι καὶ ἀνοίγεσθαι.“ — *averrere*] Sic plurima pars antiquissimorum codicum, alii *avertere*. cf. Mart. II, 37, 1: „Quidquid ponitur (in mensa) hinc et inde *verris* . . . Haec cum condita sunt madente mappa Traduntur puero domum ferenda.“ Plaut. Truc. II, 3, 8: „Domi quidquid habet verritur ἔξω.“ Mensa autem est piscatoria in foro. — *languidus*] edendo iam fatigatus.

V. 41. *carnem inertem*] fatuam. Praefert hic Umbricum aprum Laurentino ab aliis magis laudato; nam Statius certe Silv. IV, 6, 12: „Tuscius aper

generosior Umbro.“ Becker Gall. T. II. p. 186 (ed. Imae): „Der Eber war in der Regel das Hauptgericht einer grossen coena, und der Anstand verlangte, dass er ganz auf den Tisch kam.“ Sat. II, 3, 234. II, 8, 6. — *fecundae leporis*] Adiectivum e natura sumptum leporis, nam non est *prae-gnantis*. Alii *fecundi*, sed femininum genus tuetur antiquissimus codex Cruq. Iam Priscianus docet *hic* et *haec lepus* dici. cf. Sat. II, 8, 89. — *aetas*] Iuven. 4, 140: „Circeis nata forent an Lucrinum ad saxum Rutupinove edita fundo Ostrea, callebat primo depren-dere morsu, Et semel adspecti litus dicebat echini.“ Hic quoque primo se morsu dignoscere posse gloriatur, ubi natae aves et pisces et qua sint aetate. — *Massica*] Ab exemplo quo v. 49 usus est Catus ultro ad vinorum praecepta aufertur in iisque pergit usque ad v. 62. — *tenuabitur*] Plin. H. N. XIV, 27: „Campaniae vina nobilissima

- Et decedet odor nervis inimicus; at illā
 7 Integrum perdunt lino vitiata saporem.
 55 Surrentina vafer qui miscet faece Falerna
 Vina, columbino limum bene colligit ovo,
 Quatenus ima petit volvens aliena vitellus.
 Tostis marcentem squillis recreabis et Afra
 Potorem cochlea: nam lactuca innatat acri
 60 Post vinum stomacho; perna magis ac magis hillis
 Flagitat in morsus refici, quin omnia malit,
 Quaecunque immundis fervent allata popinis.
 Est operae pretium duplicis pernoscere iuris
 Naturam. Simplex e dulci constat olivo,
 65 Quod pingui miscere mero muriaque decebit,
 Non alia quam qua Byzantia putuit orca.
 Hoc ubi confusum sectis inferbuit herbis
 Corycioque croco sparsum stetit, insuper addes
 Pressa Venafranae quod baca remisit olivae.
 70 Picenis cedunt pomis Tiburtia suco:

exposita sub dio in cadis verberari sole, luna, imbre, ventis aptissimum videtur.“ — *nervis*] corpori. cf. Ep. I, 15, 6. — *lino vitiata*] vide ad Carm. I, 11, 6. — *Surrentina*] Plin. XIV, 8: „Ad tertiam palmam venere Surrentina convalescentibus maxime probata propter tenuitatem salubritatemque.“ Colum. XII, 30: „Si qua vina erunt duriora aut minus bona, sumito faecem vini boni et panes facito et in sole arefacito et coquito in igne, postea terito et pondo quadrantem amphoris singulis infricato et oblinio.“ Quod si factum erat, postea ovo columbino defaecandum erat vinum. Haec quoque praescripta omnibus haud dubie fuerunt nota. — *marcentem*] nimio potu torpentem; sic Tacit. Hist. III, 36 Vitellium „desidem et marcentem“ appellat. — *acri stomacho*] aestuanti. Ceterum haec de lactuca doctrina contraria est Romonorum consuetudini. Martial. XIII, 14: „Claudere quae coenas lactuca solebat avorū, Dic mihi, cur nostras inchoat illa dapes?“ Virg. Moret. 76: „Grataque nobilium requies lactuca ciborum.“ — *in morsus*] Sic

scribendum ex auctoritate optimorum codicum et editionum antiquarum; qui morsus sint, videbis ex Virg. Aen. III, 394. Stomachus enim hominis qui nimis vino indulsit cibos (morsus) spernit; perna et hillis reficitur ad morsus. De nova potatione non videtur sermo esse. Quare non placet aliorum *immorsus*, quod idem esse aiunt quod *vellicatus, excitatus*; vocabulum dubiae sane et auctoritatis et interpretationis. — *immundis*] cf. Ep. I, 14, 21. Martial. VII, 61, 8: „nigra popina.“ Omnes Cruquii codices habent *in mundis*, ex mendo natum pro *immundis*. — V. 65. *muria*] liquamen praecipue thynnorum. Catius eam laudat quae paratur ex thynnis apud Byzantium captis. — *orca*] vas fictile vel ligneum servandis salsamentis. — *hoc ubi*] Cum quibus rebus compositum sit ius simplex exposuerit, iam ea addit quae ut compositum ius paretur addantur necesse sit. — *herbis*] erucis, inulis, ut Sat. II, 8, 51. — *Corycioque croco*] Plin. XXI, 6: „Prima nobilitas Cilicio (croco) et ibi in Coryco monte.“ — *stetit*] ut paulatim intepescat. — *Ve-*

Nam facie praestant. Venucula convenit ollis,
 Rectius Albanam fumo duraveris uvam.
 Hanc ego cum malis, ego faecem primus et allec,
 Primus et invenior piper album cum sale nigro
 75 Incretum puris circumposuisse catillis.
 Immane est vitium dare milia terna macello
 Angustoque vagos pisces urgere catino.
 Magna movet stomacho fastidia, seu puer unctis
 Tractavit calicem manibus, dum furta ligurit,
 80 Sive gravis veteri craterae limus adhaesit.
 Vilibus in scopis, in mappis, in scobe quantus
 Consistit sumptus? neglectis, flagitium ingens.
 Ten lapides varios lutulenta radere palma
 Et Tyrias dare circum illota toralia vestes,

nafranae] vide ad Carm. II, 6, 16. — *Picenis*] Sat. II, 3, 272. cf. Carm. I, 17, 14. — *Venuculam*] uvam, de qua Plin. XIV, 2: „Veniculam (sic quoque scribitur) inter optime deflorescentes et ollis aptissimam Campani malunt circulam vocare, alii staculam.“ — *ego*] In iterato pronomine cernenda est gloriola hominis de rebus in hoc genere inventis. cf. Sat. II, 8, 51. De faece vide ibid. v. 9. — *piper album*] lenius nigro, contra sal niger salsissimus. — *incretum*] admixtum. — *macello*] vide ad Sat. II, 3, 229. — *angustoque catino*] Catinus quoque amplus sit oportet, cum tanta pecunia consumatur in pisces. Iam loquitur de externo mensae apparatus. — *unctis*] Sat. II, 2, 68. — *furta*] sic recte antiquissimi codices, alii *frusta*. — *veteri*] per se quidem ob vetustatem pretioso sed adhaerente limo deformato. cf. Sat. I, 3, 91. II, 3, 21.

V. 81. *vilibus in scopis*] Etiam minimis rebus magna adhibenda cura est, ne convivis fastidium exoriatur neglectis. — *scobe*] „Hic scobis et haec scobes dicitur rasura serrarum; sed hic pro omni purgamento domus ponitur.“ *Comm. Cruq.* — *quantus*] quam parvus. — *mappis*] vide ad Sat. II, 8, 63. — *lapides varios*] Epist. I, 10, 19; est pavimentum tessellatum, vermiculatum, sectile (Mosaikboden). — *toralia*] Becker. Gall. T. II. p. 149: „Die

lecti tricliniales waren niedrig, was man schon daraus schliessen kann, dass sämtliche Tische, welche sich hie und da gefunden haben, bedeutend niedriger sind, als die unsrigen. Uebrigens mochten sie von derselben Beschaffenheit sein, wie die cubiculares, d. h. mit Gurten und darauf liegendem Polster, über das prächtige, gewöhnlich purpurfarbige Decken gebreitet wurden. Natürlich fand man aber hier noch mehr Veranlassung, die reichste Pracht zu entfalten, und daher werden häufig nicht nur aerati, sondern argentei, testudinei genannt. Von den Decken, welche darüber gebreitet wurden, sind durchaus zu unterscheiden die toralia.“ p. 150: „Es (die toralia) sind Behänge, mit denen der lectus von dem torus an bis zum Fussboden bekleidet wird, proponuntur, und daher sagt auch Horaz circum Tyrias vestes (purpureum torum) dare illota toralia.“ cf. Epist. I, 5, 22. — *illota*] Alii ex optimis codd. *inluta*. Cruquius de hac antiquiore, ut videtur, forma ad hunc locum de suis codicibus nihil adnotavit, sed ad Sat. II, 8, 52: „*inlutos*, sic in codd. Blandin. et aliis, quos secutus sum propter antiquitatem.“ Boni etiam codd. Orellii h. l. habent *inluta*. In antiquo cod. Montepessulano Sat. II, 8, 52 est *illutos*. Non licet provocare ad formas *ablutos*, *prolutos*, *elutos*, quoniam hae originem

- 85 Oblitum, quanto curam sumptumque minorem
 Haec habeant, tanto reprehendi iustius illis,
 Quae nisi divitibus nequeant contingere mensis?
 Docte Cati, per amicitiam divosque rogatus
 Ducere me auditum, perges quocunque, memento.
- 90 Nam quamvis referas memori mihi pectore cuncta,
 Non tamen interpret tantundem iuveris. Adde
 Vultum habitumque hominis, quem tu vidisse beatus
 Non magni pendis, quia contigit; at mihi cura
 Non mediocris inest, fontes ut adire remotos
- 95 Atque haurire queam vitae praecepta beatæ.

SATIRA V.

Hoc quoque, Tiresia, praeter narrata petenti
 Responde, quibus amissas reparare queam res

dūcunt ex verbis *abluere, proluere, eluere*; *illotus* autem compositum est ex *in* et *lotus* (Martial. X, 11, 6 „lotam terque quaterque togam.“ Plin. H. N. XXIV, 11: „pure lotis pedibus.“) — *reprehendi*] „Sensus est: iustius reprehenderis, si non habueris domi omnia munda, quae minoris constant, quam si defuerint tibi pretiosi pisces et optima vina, quae non solent habere nisi mensae divitum.“ *Comm. Crug.* — *atque haurire*] festiva imitatio versus Lucretiani I, 926: „Iuvat integros accedere fontes Atque haurire.“

Satira V.

Cum Romanorum fortitudine ac felicitate aliae ex aliis terrae ac nationes Romano imperio subiicerentur immensisque quovis anno Romam comportatis divitiis multi ibi homines casu magis quam sua opera ditarentur, quid fuit mirum, cum mores luxuria bellorumque civilium licentia plane perditis essent paupertasque pro vitio haberetur, quod ii quibus neque militia neque patrimonio bona satis magna obvenissent alii aliam ingrediebantur viam, qua ad beatam quae videretur vitam fortunaeque fastigium pervenirent? Inde natum est genus hominum, quo villius et abiectius vix

potest ullum cogitari, qui pessimis artibus, dolo, scelere atque flagitio in testamenta locupletium irrepere iustosque heredes hereditate privare studerent. Neque vero defuit malis istis hominibus cupiditatis explendae occasio; adiuvit morum nefanda foeditas. Multos enim ea aetate, quos luxuria et libido a matrimoniis ineundis deterruerunt, caelebs vita et senectus gratam praebebat quasi praedam inhabitantibus undique hereditatis. Quos cum merito sale perfricat Horatius, mollissimo sane genere satirae utitur, scenam ipsam — nam satira tota dramatica est — ex sua aetate suaeque patriae in antiquissima tempora ad Graecosque homines relegans. Ita enim rem finxit poeta, quasi Ulixes Tiresiam, vatem Thebanum, quocum in inferis convenisset (Hom. Od. XI, 90 sqq.), de futura vitae condicione quaque in Ithacam reversus amissa bona optime posset ratione recuperare, interrogare pergeret. Inde primo statim versu particula *quoque*, superioribus interrogationibus novam quasi annectens. Lepide factum est, quod Tiresias, antiquus vates, Graecus homo, per totum sermonem heroicis rebus vitam et consuetudinem Romanam admiscet exemplaque quae futura esse vaticinatur ex iis rebus sumit quae Romae factae omni-

- Artibus atque modis. Quid rides? Iamne doloso
 Non satis est Ithacam revehi patriosque penates
 5 Adspicere? O nulli quidquam mentite, vides ut
 Nudus inopsque domum redeam te vate neque illic
 Aut apotheca procis intacta est aut pecus: atqui
 Et genus et virtus nisi cum re vilior alga est.
 Quando pauperiem missis ambagibus horres,
 10 Accipe qua ratione queas ditescere. Turdus
 Sive aliud privum dabitur tibi, devolet illuc,
 Res ubi magna nitet domino sene; dulcia poma
 Et quoscunque feret cultus tibi fundus honores,
 Ante Larem gustet venerabilior Lare dives;
 15 Qui quamvis periurus erit, sine gente, cruentus
 Sanguine fraterno, fugitivus, ne tamen illi
 Tu comes exterior, si postulet, ire recuses.
 Utne tegam spurco Damae latus? Haud ita Troiaie

bus lippis et tonsoribus notae erant. De satirae anno natali viri docti non consentiunt: versibus 62 sqq. alii annum 722, alii 724 vel 725, alii denique a. 734 significari arbitrantur; utut ea res se habet, hoc certum videtur, non licere satiram post pugnam Actiacam proferre.

V. 2. *amissas*] cf. Hom. Od. XI, 113—116. — *Quid rides*] Ulixis verba sunt; vates enim, dum ille interrogat de recuperandis rebus, risit. cf. Hom. Od. XIII, 287 sqq. Dolosus enim Ulixes, cui ante sufficere videretur si vel fumum ex patria terra ascendentem conspiceret (Hom. Od. I, 58), iam maiora exoptat. — *vilior alga*] Carm. III, 17, 10. Virg. Buc. 7, 42. — *missis ambagibus*] i. e. ut breviter dicam; nam quae Ulixes uberius exposuerat et quasi excusare tentaverat, ea duobus verbis complectitur Tiresias, *pauperiem horres*. — *turdus sive aliud*] Altera particula sive omisa est, ut Carm. I, 3, 16 ubi vide. *Privum* autem cum idem sit quod *proprium* (unde voc. *privilegium* factum) tu noli separare a verbo *dabitur*: si quid ita tibi dabitur, ut tibi habeas, in tuum unius usum convertas, tamen cet. — *honores*] Carm. I, 17, 16. — *ante Larem*] „Consuetudo fuit ut rerum primitiae dis Laribus ponerentur.“

Porphy. Tibull. I, 1, 13: „Et quodcumque mihi pomum novus educat annus, Libatum agricolae ponitur ante deo.“ cf. Epist. I, 1, 78. Monet ergo vates, ut senem divitem cariorem habeat se ipso venerabiliorēque ipsis Laribus; cui rei tertium hoc adiungitur, ut eodem habeat divitem honore quo nobilissimi amplissimique soleant haberi, etiamsi ille vel vilissimus fuerit servus vel sit sceleratissimus homo. — *comes exterior*] ad sinistrum latus hostili impetui magis oppositum incedere hominis est alterum suspicientis. Sic dicebant Romani *latus tegere* v. *claudere*. Iuven. 3, 131: „Divitis hic servi claudit latus ingenuorum Filius.“ Sueton. Claud. 24: „Plautio in Capitolium eunti et inde rursus revertenti *latus texit*.“ — *si postulet*] sc. te comitem.

V. 18. *utne*] Cic. Cat. I, 9 „Te ut ulla res frangat?“ Liv. IV, 2: „Victamne ut quisquam victrici patriae praeferret?“ Terent. Andr. I, 5, 28: „Eine ego ut advorser?“ — *Damae*] Servile nomen est, Δημόδοκος, Δημῶς. Nomen autem positum pro toto genere, — ut infra v. 91 et Sat. I, 6, 38. Quae Tiresias faciendi praescribit, ea etiam Ulixi patientissimo et moderatissimo homini intolerabilia videntur;

- Me gessi certans semper melioribus. Ergo
 20 Pauper eris. Fortem hoc animum tolerare iubebo;
 Et quondam maiora tuli. Tū protinus unde
 Divitias aerisque ruam dic augur acervos.
 Dixi equidem et dico: captes astutus ubique
 Testamenta senum, neu si vafer unus et alter
 25 Insidiatorem praeroso fugerit hamo,
 Aut spem deponas aut artem illusus omittas.
 Magna minorve foro si res certabitur olim,
 Vivet uter locuples sine gnatis, improbus, ultro
 Qui meliorem audax vocet in ius, illius esto
 30 Defensor; fama civem causaque priorem
 Sperne, domi si gnatus erit fecundave coniux.
 Quinte puta aut Publi, — gaudent praenomine molles
 Auriculae — tibi me virtus tua fecit amicum:
 Ius anceps novi, causas defendere possum;
 35 Eripiet quivis oculos citius mihi, quam te
 Contemptum cassa nuce pauperet: haec mea cura est,
 Ne quid tu perdas neu sis iocus. Ire domum atque
 Pelliculam curare iube; si cognitor ipse;

quare indignabundus in haec verba erumpit. Tiresias autem frigide respondet: ergo pauper eris. Quare cum una haec relicta sit via ratioque quae amiserit recuperandi, quid restat sapienti viro nisi ut hoc quoque multis quae iam perpressus est malis forti animo addat? cf. Hom. Od. XX, 18. — *tuli*] *Horkelius*: *tulit* ex coniectura, quo propius accederet Horatii versus ad Homericum; acute, sed non satis caute. Potuit sane poeta scribere *tulit*, non debuit. Et si non debuit, quid mutem? lectionem contra omnes libros MSS.? — *ruam*] Ruendi verbum apud poetas et eos scriptores qui poeticam orationem imitabantur activam naturam induebat; quod qua ratione fiat vide apud Virgilium Aen. I, 35 et 85. XI, 211. Georg. II, 308. — *praeroso hamo*] „Metaphora a piscibus; quod apte subdit quia dixit *captes*. Praeroso hamo i. e. vorata esca, consumptis tuis et perditis muneribus.“ *Comm. Cruq.* — *certabitur*] Etsi vulgo et apud bonos

scriptores dicitur certare de aliqua re vel pro aliqua re, tamen poetae brevitas et gravitatis studio, quo molesta sane praepositio vitaretur, nihil dubitarunt usurpare *certare aliquid*; inde passiva quoque constructio verbi. Sat. II, 1, 49. Ovid. Met. XIII, 713. Sil. Ital. XVII, 337: „Certatus nobis (Scipioni et Hannibali) hodie dominum accipit orbis;“ a quo genere ne Livius quidem abstinuit XXV, 3. — *priorem*] Carm. III, 1, 12.

V. 32. *puta*] exempli causa. Imperativus, ubi quasi adverbii vice fungitur, ultimam syllabam corripit. — *molles auriculae*] quae facile offenduntur nisi permulcentur. Praenomine autem amici utebantur et cognati. cf. Sat. II, 6, 37. — *ius anceps*] Sat. II, 2, 131. I, 9, 39. — *pauperet*] Verbum est Plautinum, gratum Horatio et gravitate et sono. cf. *inimicare* Carm. IV, 15, 20, alia id genus. — *cassa nuce*] ex proverbio. „Omnes MSS. habent *quassa*, vetere scriptura, sicuti nonnun-

- Persta atque obdura, seu rubra canicula findet
 40 Infantes statuas, seu pingui tentus omaso
 Furius hibernas cana nive conspuet Alpes.
 Nonne vides, aliquis cubito stantem prope tangens
 Inquiet, ut patiens, ut amicis aptus, ut acer?
 Plures adnabunt thunni et cetaria crescent.
 45 Si cui praeterea validus male filius in re
 Praeclara sublatus aletur, ne manifestum
 Caelibis obsequium nudet te, leniter in spem
 Arrepe officiosus, ut et scribare secundus
 Heres et, si quis casus puerum egerit Orco,
 50 In vacuum venias: perraro haec alea fallit.
 Qui testamentum tradet tibi cunque legendum,
 Abnuere et tabulas a te remove memento,
 Sic tamen ut limis rapias quid primā secundo
 Cera velit versu; solus multisne coheres,
 55 Veloci percurrere oculo. Plerumque recoctus

quam offendi *quarere* pro *carere*." *Cruquius*. — *si cognitor*] „Cognitor est qui defendit alterum in iudicio, si *praesentis* causam novit et sic tuetur ut suam." Pseudoascon. in Cic. Divin. §. 11. Postquam in locum domini litis substitutus est cognitor, domini loco habetur, dominus ipse iam non in iudicio compareat necesse est. — *obdura seu*] Hereditatem captanti obdurandum esse et solis aestu et hiemis frigore ut praecipiat, singulari lepore tumidis quibusdam elocutionibus utitur, M. Furium Bibaculum, turgidum illum Alpinum (Sat. I, 10, 36 ubi vide), egregia *παρωδία* irrisurus. Nam praeter versum 41, in quo salssissime Iovis partes ad ipsum Furium translatae sunt, veri simile est alia quoque ab eodem Furio petita esse; veluti *infantes* illae *statuae*, sive mutae (Epist. II, 2, 83) sunt sive recens factae, nescio quid habent inepti ac prope monstri ornatus, neque minus elucet malignius paulo consilium poetae ex verbis *pingui tentus omaso*. In quibus ego vero non negaverim inesse dilogiam quandam a corpore ad animum translata. Boni enim Bibaculi, qui „Bibaculus et erat et vocabatur“

(Plin. H. N. praef.) corpusculum fortasse non magis extantum erat vili, ut maligne addit Horatius, omaso quam animus ridiculis imaginibus repletus.

V. 44. *thunni*] Certum piscem in imaginem supra iam usurpatam intulit. Similiter Epist. I, 1, 79. Eadem metaphora Lucian. Tim. 22: „*αὐτοῦς* (heredipetas) *ὁ θύννος ἐν μυχοῦ τῆς σαγήνης διέφρυγεν, οὐκ ὀλίγον τὸ δέλεαρ καταπιών*." — *sublatus*] Virg. Aen. IV, 203. Patres recens natos quos ali iubebant humi iacentes in genua tollebant; quos exponi, non tollebant. — *nudet*] i. e. „dolum tuum ac simulationem aperiat tuque testamento excludaris." — *tabulas*] testamenti. — *prima cera*] „prima tabula, nam in primae tabulae secundo versu heredis nomen continetur." *Comm. Cruq.* Primo versu testatoris nomen scribi solebat. — *plerumque*] Ea autem cautio necessaria est, ne ab astuto quodam homine decipiaris, ut Nasica a Corano. Festive vetera ut futura vaticinatur Tiresias. Ceterum vetat hoc adverbium ne quis Coranum scribam esse et Nasicam corvo indicari putet. Rei quae plerumque fit unum exemplum Nasicae additur. — *recoctus*] Quintil. XII, 6, 7: „Apollonio

- Scriba ex quinqueviro corvum deludet hiantem,
 Captatorque dabit risus Nasica Corano.
 Num furis? an prudens ludis me obscura canendo?
 O Laërtiade, quidquid dicam aut erit aut non:
 60 Divinare etenim magnus mihi donat Apollo.
 Quid tamen ista velit sibi fabula, si licet, ede.
 Tempore, quo iuvenis Parthis horrendus, ab alto
 Demissum genus Aenea, tellure marique
 Magnus erit, forti nubet procera Corano
 65 Filia Nasicae, metuentis reddere soldum.
 Tum gener hoc faciet: tabulas socero dabit atque
 Ut legat orabit; multum Nasica negatas
 Accipiet tandem et tacitus leget, invenietque
 Nil sibi legatum praeter plorare suisque.
 70 Illud ad haec iubeo: mulier si forte dolosa
 Libertusve senem delirum temperet, illis
 Accedas socius; laudes, lauderis ut absens:
 Adiuvat hoc quoque, sed vincit longe prius ipsum

Moloni, quem Romae quoque audierat, Rhodi rursus formandum ac velut *recoquendum* dedit (se Cicero).“ Ex qua formae mutatione facilis est transitus ad astutiam et calliditatem quam in hoc loco inesse putamus. — *ex quinqueviro*] qui olim quinquevir fuit; cogitatione supple *factus*. Cic. Acad. pr. II, 44, 136: „Neminem consulem, praetorem, imperatorem, nescio an ne quinquevirum quidem quemquam.“ Digest. L. I. Tit. 2. c. 2. §. 31: „Quia magistratibus vespertinis temporibus in publicum esse inconveniens erat, Quinqueviri constituti sunt cis Tiberim et uls/Tiberim, qui possint pro magistratibus fungi.“ Alii coniungunt: *ex quinqueviro scriba recoctus* i. e. mutata priore condicione scriba factus ex quinqueviro. —

V. 58. *Num furis*] Ulixis verba sunt, qui quid alter velit non satis se intelligere fatetur. Inde uberius de Corano expositio. — *aut erit aut non*] Recte videtur pars interpretum dilogiam quandam iocosam vidisse, ut dubium sit, utrum sincere dicat: *aut erit aut non erit*, prout dixero an voluerit quid-

quid dicam eveniet aut non eveniet, eadem omnino ratione qua sunt aliorum non divinatorum hominum dicta. Illud opinor voluit Tiresias, hoc Horatius, qui non nimiam fidem habuit vaticinationibus. — *iuvenis*] Octavianus. Carm. I, 2, 41. — *Corano*] Comicam vim huius narrationis magnopere adjuvari vides epica gravitate, quam poeta lepide imitatur epithetis *forti, procera, metuentis reddere soldum*. Coranus autem dives homo fuit; in cuius hereditatem ut irreperet Nasica, magno aere alieno obrutus, omni arte efficere studuit atque adeo seni filiam poscenti dare haudquaquam cunctatus est. Sed quid deinde factum? Nasica a Corano misere deceptus in testamento nihil invenit sibi relictum nisi luctum, non de mortuo genero sed de inani captatione. — *soldum*] sortem, summam argenti, quam mutuo acceperat, fortasse etiam ab ipso Corano. — *praeter plorare*] cf. Ovid. Heroid. 17, 162: „Nil illi potui dicere praeter *erit*.“ — *illud ad haec*] *haec* de superioribus, *illud* de iis quae insequuntur. Tertium autem hoc est praescriptum (cf. v. 45).

Expugnare caput. Scribet mala carmina vecors:

75 Laudato. Scortator erit: cave te roget; ultro

Penelopam facilis potiori trade. Putasne?

Perduci poterit tam frugi tamque pudica,

Quam nequiere proci recto depellere cursu?

Venit enim magnum donandi parca iuventus,

80 Nec tantum veneris quantum studiosa culinae:

Sic tibi Penelope frugi est, quae si semel uno

De sene gustarit tecum partita lucellum,

Ut canis a corio nunquam absterrebitur uncto.

Me sene quod dicam factum est: anus improba Thebis

85 Ex testamento sic est elata: cadaver

Unctum oleo largo nudis humeris tulit heres,

Scilicet elabi si posset mortua; credo,

Quod nimium institerat viventi. Cautus adito,

Neu desis operae neve immoderatus abundes.

90 Difficilem et morosum offendet garrulus; ultra

Non etiam sileas. Davus sis comicus atque

Stes capite obstipo, multum similis metuenti.

Obsequio grassare; mone, si increbuit aura,

— *mulier*] libertina. — *longe prius*] *ῥῆϊστον ὄν*. — *caput*] divitem ipsum. — *cave*] vide ad Sat. II, 3, 38. — *venit enim*] Particula *enim* posita est ut a Graecis in sermonibus saepissime γὰρ; nam dum quae alter affirmavit conceditur, causa simul concedendi huius particulae ope adiungitur. Iocosa haec quoque παρῳδία Homeri Od. XVIII, 274—279. — *nec tantum*] vide ad Sat. I, 8, 17. — *ut canis*] sic Lucian, adv. Indoct. 25: „Οὐδὲ γὰρ ὕψων ἀπαξ παύσεται ἂν συντοτραγεῖν μαθούσα.“

V. 84. *Me sene*] Quod supra duobus verbis v. 47 (*leniter arripe*) tetigerat, id nunc v. 84—98 amplius illustratur; scilicet magnam cautionem adhibendam esse in captandis conciliandisque hominibus, discendos esse mores, spectanda studia, laudandam voluntatem, ne male tractatus post vanam curam evadat piscis. — *improba*] astuta, quae cum viva captatorem effugere non potuisset periculum fa-

cere voluit, num mortuae felicius sibi eveniret. — *si posset*] Epist. I, 6, 41. I, 7, 39. I, 3, 30. — *ultra*] Sic plurimi et optimi codices, veluti ex Cruiquianis quattuor Blandinii et quinque alii, Pulmanni quattuor; recte. Modus enim, ultra quem vetat ne colloquendi studium excedat, constituitur praemissa generali sententia: ultra quam ne garrulus habearis et offendas. Alii *ultro*. *Bentleius* ex coniectura: *offendes garrulus ultro*; *Horkelius*: *offendet garrulus: ultra* Nos etiam sileas, ut sit: „ultra mortuos sileas;“ et „suo iure, inquit, usus est Horatius, si mortuos omnino omnes sermone carentes fecit, nisi quando Ulixes aliquis ad inferos descenderet.“ — *Davus*] Davum ex comoedia ludere, inclinato capite stare timideque loqui te decet. Theogn. 535 sq.: „Οὐ ποτε δονλεῖν κεφαλὴ ἰδεῖα πέφνηεν Ἄλλ’ αἰεὶ σκολιῇ καὶ ὀχέειν λοξὸν ἔχει.“ — *grassare*] age, ut Liv. III, 44. X, 14. Sall. Iug. 68. Frequentissimum hac significatione ver-

- Cautus uti velet carum caput; extrahe turba
 95 Oppositis humeris; aurem substringe loquaci.
 Importunus amat laudari: donec Ohe iam!
 Ad coelum manibus sublatis dixerit, urge et
 Crescentem tumidis infla sermonibus utrem.
 Cum te servitio longo curaueque levari
 100 Et certum vigilans, Quartae esto partis Ulixes,
 Audieris, heres: Ergo nunc Dama sodalis
 Nusquam est? unde mihi tam fortem tamque fidelem?
 Sparge subinde et, si paulum potes, illacrimare; est
 Gaudia prodentem vultum celare. Sepulcrum
 105 Permissum arbitrio sine sordibus exstrue: funus
 Egregie factum laudet vicinia. Si quis
 Forte coheredum senior male tussiet, huic tu
 Dic, ex parte tua seu fundi sive domus sit
 Emptor, gaudentem nummo te addicere. Sed me
 110 Imperiosa trahit Proserpina: vive valeque.

bum apud Tacitum. — *increbuit*] Cic. Fam. VII, 20: „ventus increbrescit.“ Virg. Georg. I, 359. — *aurem substringe*] coerce, cohibe. Iam cum loquaci dativus sit quem commodi appellamus, sententia plana est: aurem nemini praebeas nisi huic, si loquax est. Comparari possunt hi loci: Tacit. Germ. 38: „Crinem nodo substringere.“ Suet. Galb. 21: „Carnem fascia substringere.“ Quintil. X, 5, 4: „Omissa supplere, effusa substringere.“ — *sublatis manibus*] impatientiae signum. Cic. Acad. II, 19: „Hortensius autem vehementer admirans, quod quidem perpetuo Lucullo loquente fecerat, ut etiam manus saepe tofleret.“ — *servitio*] cf. Virg. Buc. I, 41. Usus est hac deteriore forma, quod iusta forma nominis, *servitus*, versum intrare noluit. — *cura levari*] si mortuus est. — *certum vigilans*] ne forte fallaris. — *unde mihi*] sc. petam. Sat. II, 7, 116. — *sparge*] passim inter legendum insere,

clama. — *est celare*] licet, potest fieri. cf. Sat. I, 2, 101. Epod. 17, 25. *Lachmannus* tamen ad Lucret. p. 297 negavit Horatium ita scribere potuisse, cum *est* pro *est aliquid* sive *prodest* ab antiquorum usu remotissimum sit, et coniecit scribendum esse: *illacrima; e re est*; quam coniecturam *Hauptius* et *Kruegerus* receperunt. — *nummo addicere*] ficta venditione donare. Cic. pro Rab. Post. 17: „Ecquis est ex tanto populo, qui bona C. Rabirii Postumi nummo sestertio sibi addici velit?“ Cfr. Gaius 2, 252: „Olim in usu erat ei, cui restituebatur hereditas, nummo uno eam hereditatem dicis causa venire.“ — *imperiosa*] ἐπικυρή. Satis lepide subito abruptis sermonem Tiresias nihil gratiae exspectans ab Ulixē, qui qua fuit probitate et iustitia haud dubie paupertatem praeferret divitiis improbitate ac scelere parandis. — *vive valeque*] Epist. I, 6, 67. I, 7, 3.

SATIRA VI.

Hoc erat in votis: modus agri non ita magnus,
 Hortus ubi et tecto vicinus iugis aquae fons
 Et paulum silvae super his foret. Auctius atque
 Di melius fecere. Bene est: nil amplius oro,
 5 Maia nate, nisi ut propria haec mihi munera faxis.
 Si neque maiorem feci ratione mala rem,

Satira VI.

Consilium quod in Sat. I, 9 inesse vidimus hoc quoque poemate secutum esse Horatium manifestum est. Nam quis dubitat quin multi semper fuerint homines, qui falsum sibi de amicitiae qua Horatius cum Maecenate coniunctus vixit vinculo deque Horatii studiis consiliisque fingerent iudicium? Nae isti homines non potuerunt sibi persuadere, eum qui summi prope in republica viri familiaritate uteretur alienissimo esse a publicis negotiis animo, remotissimo a comparandis sibi maioribus bonis, continentissimo in fructibus modicis quas haberet opibus. Quae prava harum rerum existimatio cum radices quasi ageret in iniqua plerorumque hominum de veris gaudiis veraque felicitate sententia, tenerrima qua fieri potuit ratione Horatius quibus finibus circumscripta essent sua vota, quo modo viveret cum Maecenate, quibus denique rebus vita vere beata compararetur docere studuit. Inde exorta est rusticae vitae suavis laudatio, urbanarum molestiarum lenis reprehensio, consuetudinis suae cum Maecenate iocosa quaedam contractio. Poema autem ita comparatum est, ut remotum ab acerbitate hominumque salsa irrisione proximum sit dulcedini ac lenitati epistolarum, ut egregia frugalitatis laude, vero ex mediocribus rebus percepto gaudio, aperta ac non simulata pravae ambitionis despicientia facillimam et planissimam viam nobis muniat ad recte aestimandam amabilem Horatii naturam, qua omnes qui primos tantum versus legerint statim capiantur necesse est. Scriptum autem poema est exeunte anno 723. Tum enim curiosi homines quaerere potuerunt de Dacis (v. 53), qui Antonio quem adiuverant Actiaca pu-

gna devicto motus ciebant, ut insequenti anno M. Crassus contra eos mitteretur; tum etiam frequens inter cives sermo erat de distributione agrorum, qua periculosam veteranorum militum in Italia seditionem ex Asia advolans Octavianus media inter annos 723—724 hieme sedavit (v. 55); tum denique negotiosi homines Horatium rogare potuerunt, ut tabellas suas anno Octaviani a Maecenate obsignandas curaret (v. 38). Maecenati enim Octavianus ad bellum proficiscens anulum signatorium sphingis imagine insignitum commiserat, ut unus Italicis rebus praeesset; cui exeunte demum anno 723 socius additus est Agrippa. Restat ut moneam ne quis eodem anno Sabinam villam Horatio datam esse credat; immo vero desiderium ruris, grata rusticationis descriptio, rusticae vitae consuetudo firmissime evincunt, paucos certe annos Horatium iam habuisse suum praedium.

V. 1. *votis*] Raro apud bonos scriptores pedestris orationis vota dicuntur pro optatis, saepe apud poetas eosque qui secuti sunt scriptores. cf. v. 59. Epist. I, 11, 5. I, 14, 41. I, 2, 56. Sat. I, 1, 22. Carm. IV, 13, 1. C. S. 71. Epod. 7, 9. 17, 62. — *iugis aquae*] Sic coniunge; ut Epist. I, 15, 16. — *super his*] In prosa melius dicitur *super haec*. Ceterum cf. Carm. II, 18, 11 sq. III, 16, 29 sq. Epod. 1, 31. — *Maia nate*] Invocat Mercurium *ἡγεμόνον*. cf. Sat. II, 3, 68. Matris autem nomen in precibus blandum est. — *si neque cel.*] Frequens in precibus particula *si*, ubi modestia indicatur, quae decet infirmum genus humanum, et probatur simul, non iniquas preces ad deos fundi. Quare quae dubitanter dicuntur ea aliquam habent causam spei fore ut dii faciant quae precibus expetantur. Horatii autem causa triplex est; inde

- Nec sum facturus vitio culpave minorem;
 Si veneror stultus nihil horum: O si angulus ille
 Proximus accedat, qui nunc denormat agellum!
- 10 O si urnam argenti fors quae mihi monstret, ut illi,
 Thesauro invento qui mercenarius agrum
 Illum ipsum mercatus aravit, dives amico
 Hercule! —; si quod adest gratum iuvat, hac prece te oro:
 Pingue pecus domino facias et cetera praeter
- 15 Ingenium, utque soles, custos mihi maximus adsis.
 Ergo ubi me in montes et in arcem ex urbe removi,
 Quid prius illustrem satiris musaque pedestri?
 Nec mala me ambitio perdit nec plumbeus Auster
 - Auctumnusque gravis, Libitinae quaestus acerbae.
- 20 Matutine pater, seu Iane libentius audis,
 Unde homines operum primos vitaeque labores
 Instituunt — sic dis placitum —, tu carminis esto
 Principium. Romae sponsorem me rapis. Eia,
 Ne prior officio quisquam respondeat, urge.

ter particula *si* posita, quam apodosis excipit versu 13. — *veneror*] vide ad C. S. 49. Sat. II, 2, 124. — *Hercule*] qui thesauris recludendis et opibus largiendis praeest. Imitatus hunc locum est Pers. 2, 8: „O si Sub rastro crepet argenti mihi seria dextro Hercule!“ — *praeter ingenium*] locatur ambiguo vocabulo *pinguis*, quod de ingenio dictum crassum, stupidum, hebes, tardum significat. Ovid. Met. XI, 148. — *utque soles*] quia Mercurialium virorum custos est. Carm. II, 17, 29. — *in montes*] Sabinos, quibus addit *in arcem*, quia tutus ibi est ab urbanae vitae molestiis. — *Quid prius illustrem*] sc. quam hanc felicitatem qua in rustica solitudine tunc utor. *Satiris* igitur et *musa pedestri* ablativi instrumenti sunt, non coniungendi cum comparativo. De musa pedestri cf. Carm. II, 12, 9. Sat. I, 4, 47. Epist. II, 1, 250. A. P. 95.

V. 18. *ambitio*] quae proficiscitur ex incontinentia animi, qua homines maiora semper petunt ad altioraque tendunt. Haec autem ambitio in urbe alitur, in secessu ruris exstinguitur;

rur igitur hominem defendit a morbis et animi et corporis. De Austro vide Carm. II, 14, 15. cf. Epist. I, 16, 15 sq.; *plumbeus* est, quia aestu corpus premit ut plumbum. — *Libitinae*] vide ad Carm. III, 30, 7. cf. Epist. I, 7, 5 sqq. — *Matutine*] Ut importuna in urbe negotia omnia describat, a matutino tempore orditur et lepide iocans ipsum deum Matutinum appellat quasi preces facturum. Deus ipse quasi testis est multorum negotiorum, quibus homines agitantur, ipse enim dormientes excitat ad muneraque adeunda agit. De duobus dei nominibus vide ad C. S. 15 sq. — *Iane audis*] Vocativus tanquam obiectum aliquod additus est verbo audiendi; quod ne singulare videatur, compara Epist. I, 7, 37. I, 16, 59. Ovid. Am. I, 7, 19: „Quis mihi non *demens*, quis non mihi *barbare* dixit?“ — id. A. A. I, 665: „Pugnabit primo fortassis et *improbe* dicet.“ — *unde*] a quo. Vide ad Carm. II, 12, 7. — *Eia, ne*] verba sunt Iani Horatium ex somno quasi excitantis. cf. Pers. 5, 133: „Surge, inquit *Avaritia*; eia, surge.“ — *officio*] Officium

- 25 Sive Aquilo radit terras seu bruma nivalem
 Interiore diem gyro trahit, ire necesse est.
 Postmodo quod mi obsit clare certumque locuto
 Luctandum in turba et facienda iniuria tardis.
 Quid vis, insane, et quas res agis? improbus urget
 30 Iratis precibus, tu pulses omne quod obstat,
 Ad Maecenatem memori si mente recurras.
 Hoc iuvat et melli est, non mentiar; at simul atras
 Ventum est Esquilias, aliena negotia centum
 Per caput et circa saliunt latus. Ante secundam
 35 Roscius orabat sibi adesses ad Puteal cras.
 De re communi scribae magna atque nova te
 Orabant hodie meminisses, Quinte, reverti.
 Imprimat his, cura, Maecenas signa tabellis.
 Dixeris, Experiar: Si vis, potes, addit et instat.
 40 Septimus octavo propior iam fugerit annus,

est quo alterius voluntati morem gerimus. Sat. II, 5, 48. Epist. I, 7, 8. cf. Epist. II, 2, 65 sqq. — *interiore gyro*] duorum circulorum, quibus idem est centrum, interior brevior est. Iam cum Sol hieme breviorē viam sequatur, dies hiberni breviores sunt. — *postmodo*] Coniungendum videtur *postmodo luctandum*, quoniam cum *obsit* coniunctum inanis ac supervacanea esset definitio. Deinde vv. *quod mi obsit* obiectum efficiunt verbo *locuto*. De re comparandum est Biantis proverbium ἐγγύα, πάρα δ' ἄτα. — *Quid vis*] Sunt verba hominis in turba pulsati et iniuriam aegre ferentis; qui cum malas preces conciat in festinantem poetam neque intelligat qua is necessitate obstrictus properare debeat, satis lepide *improbus* vocatur. Nam *preces* imprecationes sunt, ut Carm. I, 28, 33. — *tu pulses*] Coniunctivus potentialis esse videtur, cuius loco Graeci optativum usurpant cum part. ἄν. — *Hoc iuvat*] sc. recurrere ad Maecenatem. — *atras*] propter sepulcra quae olim ibi fuerant. Sat. I, 8, 14. — *secundam*] vide ad Sat. I, 5, 23. Sunt haec verba non servi alicuius Roscii, sed ipsius Horatii, aliena negotia apud Maecenatem curanda sibi in memoriam revocantis. Inde facile

cur imperfecto utatur intelliges. Alii primum Roscii, deinde scribarum servum monentem audire malunt, et imperfectum positum putant, ut in epistolis solet usurpari. — *Puteal*] „Puteal locus erat in foro, ad quem conveniebant mercatores et feneratores ad tradendum et recipiendum.“ *Comm. Cruq.* Fuit autem puteal septum lapideum puteo circumdatum ne incauti in puteum deciderent; cui quidem simile erat septum loco sacro circumdatum, ne humus consecrata praeterantium pedibus conculcaretur. Hoc loco quod memoratur Libonis est sive Scribonianum a Libone quodam Scribonio exstructum. Epist. I, 19, 8. — *adesses*] ut testis apud argentarium.

V. 36. *de re communi*] Olim Horatius ipse scribarum ordini adscriptus erat; quare quid mirum si scribae tunc quoque poetam suum haberent magnoque quem putarent fautore ad iuvanda sua negotia uterentur? — *Quinte*] cf. Sat. II, 5, 32. Non est veri simile, etiam tum Horatium scribam fuisse; quomodo enim, si ipse fuisset, scribarum negotia aliena potuisset appellare? — *tabellis*] Otiosum videtur quaerere, quae fuerint tabellae. Sufficit quod certum est, opus fuisse ut publicam fidem acciperent tabellae

- Ex quo Maecenas me coepit habere suorum
 In numero, duntaxat ad hoc, quem tollere rheda
 Vellet iter faciens et cui concedere nugas
 Hoc genus: Hora quota est? Thrax est Gallina Syro par?
- 45 Matutina parum cautos iam frigora mordent;
 Et quae rimosà bene deponuntur in aure.
 Per totum hoc tempus subiectionis in diem et horam
 Invidiae noster. Ludos spectaverat una,
 Luserat in campo: Fortunae filius! omnes.
- 50 Frigidus a rostris manat per compita rumor:
 Quicumque obuius est, me consulit: O bone, — nam te
 Scire, deos quoniam propius contingis, oportet —
 Num quid de Dacis audisti? Nil equidem. Ut tu
 Semper eris derisor! At omnes di exagitent me,
- 55 Si quidquam. Quid? militibus promissa Triquetra
 Praedia Caesar an est Italia tellure daturus?
 Iurantem me scire nihil mirantur ut unum
 Scilicet egregii mortalem atque silenti.
 Perditur haec inter misero lux non sine votis:
- 60 O rus, quando ego te adspiciam, quandoque licebit,
 Nunc veterum libris nunc somno et inertibus horis

signo Octaviani Maecenati commisso. — *septimus octavo*] vide Vita Hor. p. 7. — *duntaxat ad hoc*] Quae sequuntur iocose extenuant suam cum Maecenate necessitudinem, quippe quae admodum aliena fuit a curis negotiisq. publicis. — *Thrax*] Gallina nomen est gladiatoris parma Threïdica et gladio incurvo induti; is componitur cum alio gladiatore, Syro, mirmillone, gallicis armis instructo et piscis (μορμύλον s. μορμύρον) imaginem in galea habente. In codd. et *Thrax* et *Thraex* et *Threx* reperiuntur, sine discrimine, nam quod olim constituebant, ita ut *Thrax* et *Thraex* populi, *Threx* gladiatorum nomen esset, nullum est. — *noster*] Vocabulorum interductus nunc posui cum Bentleio, olim cum aliis *noster* coniunxeram cum *spectaverat*. *Noster* comice pro *ego*, ut Plaut. Amphitr. I, 1, 242: „*Merc.* Tu me vivus hodie nunquam facies quin sim *Sosia*.

Sosia: Certe edepol tu me alienabis nunquam quin *noster* siem, Nec nobis praeter me quisquam est alius servus *Sosia*.“ — *spectaverat*] ommissa particula *si*, ut supra v. 39. Sat. I, 3, 56. II, 7, 68. — *frigidus*] qui timorem et frigus incutit. — *compita*] cf. Sat. II, 3, 26. 281. — *deos*] facete de magnis in republica hominibus.

V. 55. *Triquetra*] Sicula; propter formam insulae. cf. Caes. B. G. V, 13, 1. — *Perditur*] Lachmann. ad Lucr. p. 121 docuit, *perditur* pro *perit* omnino nullum dixisse et scribendum esse *Pergitur*, cui simillimum sit quod Ovid. Met. IV, 199 solem *horas brumales porrexisse* fingat. Hauptius recepit; sed cum alia quoque ἀπαξ λεγόμενα sint apud Horatium, retinenda codicum scriptura. — *veterum libris*] cf. Sat. II, 3, 11. Inertes horae sunt quae non molestis negotiis auferuntur sed naturae iucunditatibus meditationi-

Ducere sollicitae iucunda oblivia vitae?

O quando faba Pythagorae cognata simulque

Uncta satis pingui ponentur oluscula lardo?

65 O noctes coenaeque deum! quibus ipse meique
Ante Larem proprium vescor vernasque procaces
Pasco libatis dapibus. Prout cuique libido est,
Siccat inaequales calices conviva solutus
Legibus insanis, seu quis capit acria fortis.

70 Pocula seu modicis uvescit laetius. Ergo
Sermo oritur, non de villis domibusve alienis,
Nec male necne Lepos saltet; sed quod magis ad nos
Pertinet et nescire malum est agitamur: utrumne
Divitiis homines an sint virtute beati;

75 Quidve ad amicitias, usus rectumne, trahat nos;
Et quae sit natura boni summumque quid eius.
Cervius haec inter vicinus garrit aniles
Ex re fabellas. Si quis nam laudat Arelli
Sollicitas ignarus opes, sic incipit: Olim

80 Rusticus urbanum murem mus paupere fertur
Accepisse cavo, veterem vetus hospes amicum,
Asper et attentus quaesitis, ut tamen artum
Solveret hospitii animum. Quid multa? neque ille
Sepositi ciceris nec longae invidit avenae,

que dicantur. cf. Sat. I, 6, 128, Carm. I, 1, 20. — *ducere*] oblivia, ut vinum. Virg. Aen. VI, 714. — *faba*] locose dictum ex vulgari opinione; de vera causa, cur fabis abstinerent Pythagorei, alii alia retulerunt. cf. Cic. de divin. I, 30, 62. II, 58. *Comm. Cruq.* „Dubitabat enim Pythagoras, an in eo corpore lateret anima patris sui an alterius propinqui.“ — *uncta satis*] haec coniungenda esse caesura suadet. cf. Sat. II, 2, 117. — *meique*] amici. *Noctes* autem *et coenae* sunt coenae in noctem productae. „Coenas deum dixit securiores et quae sunt sine sollicitudine.“ *Comm. Cruq.* — *libatis dapibus*] Liv. XXXIX, 43. Cic. de legg. II, 8: „Certasque fruges certasque bacas sacerdotes publice libanto.“ Alii interpretantur *degustatas*, reliquias coenae

intelligentes. — *prout*] monosyllabum. — *legibus insanis*] bibendi, quas *συμποσιδάρχης*, magister bibendi, in urbe imponere solebat convivis. — *acria*] cf. Sat. II, 8, 36. — *Lepos*] saltator, archimimus Caesari gratus. — *Cervius*] Hic et Arellius vicini erant Horatii in Sabinis. — *aniles*] ex nutricum narrationibus notas. — *ex re*] ut fert occasio; in quas ipsa confabulatione sponte sua incidit.

V. 80. *murem mus*] Vides bis (*murem mus, veterem vetus*) ita disposuisse Horatium verba, ut eiusdem nominis diversae formae altera alteram exciperet; id quod amabant latini scriptores. — *artum*] contractum, itaque parcum; inde verbum solvendi, cui adhaeret dativus commodi quem vocant *hospitiis*. cf. Epist. I, 7, 91; II, 1, 172.

- 85 Aridum et ore ferens acinum semesaque lardi
 Frusta dedit, cupiens varia fastidia coena
 Vincere tangentis male singula dente superbo:
 Cum pater ipse domus palea porrectus in horna
 Esset ador loliumque, dapis meliora relinquens.
- 90 Tandem urbanus ad hunc: Quid te iuvat, inquit, amice,
 Praerupti nemoris patientem vivere dorso?
 Vis tu homines urbemque feris praeponere silvis?
 Carpe viam, mihi crede, comes, terrestria quando
 Mortales animas vivunt sortita neque ulla est
- 95 Aut magno aut parvo leti fuga: quo, bone, circa,
 Dum licet, in rebus iucundis vive beatus,
 Vive memor quam sis aevi brevis. Haec ubi dicta
 Agrestem pepulere, domo levis exsilit; inde
 Ambo propositum peragunt iter, urbis aventes
- 100 Moenia nocturni subrepere. Iamque tenebat
 Nox medium coeli spatium, cum ponit uterque
 In locuplete domo vestigia, rubro ubi cocco
 Tincta super lectos canderet vestis eburnos,
 Multaque de magna superessent fercula coena,
- 105 Quae procul exstructis inerant hesterna canistris.
 Ergo ubi purpurea porrectum in veste locavit
 Agrestem, veluti succinctus cursitat hospes
 Continuatque dapes nec non verniliter ipsis
 Fungitur officiis, praelambens omne quod affert.

— *invidit avenae*] Sic Graeci *φθονεῖν τινὶ τινος*. Aliam vere Romanam constructionem habet Horatius Sat. I, 6, 50. Epist. I, 14, 41. — *tangentis male*] fastidiose. — *pater*] similiter Sat. II, 8, 7. — *patientem*] cf. Carm. I, 7, 10. — *vis tu*] Sic antiquissimi codices; alii *vin tu* quod est simpliciter interrogantis, cum illud sit hortantis et excitantis. cf. ad Sat. I, 9, 69. — *mihi crede*] Sat. II, 3, 75. — *quando*] quoniam. Facete poeta murem urbanum ex sententia Epicureorum philosophorum disputantem facit. — *quo, bone, circa*] Tmesis est pro *quocirca*, qua particula praeter positas causas

aliae et similes non excluduntur; sic *quocirca* et *quapropter* differunt a particulis *quare* et *quamobrem*. De voc. *bone* cf. Sat. II, 2, 1. — *aevi brevis*] cf. Carm. II, 14, 24. — *levis*] Notanda est in versu levitatis egregia imitatio. — *vestis*] vide ad Sat. II, 4, 84. — *procul*] *prope*, non *in altum*. Epist. I, 7, 32. Virg. Buc. 6, 16. Ovid. Met. V, 114. — *succinctus*] quia sedulus, ut Sat. I, 5, 71. — *verniliter*] in modum servorum, alacriter. — *praelambens*] Urbanus mus sic quoque morem hominum urbanorum imitatur cibos praegustantium, i. e. gustu explorantium, num bene parati sint cibi po-

- 110 Ille cubans gaudet mutata sorte bonisque
 Rebus agit laetum convivam, cum subito ingens
 Valvarum strepitus lectis excussit utrumque.
 Currere per totum pavidi conclave, magisque
 Exanimes trepidare, simul domus alta Molossis
 115 Personuit canibus. Tum rusticus: Haud mihi vita
 Est opus hac, ait, et valeas: me silva cavusque
 Tutus ab insidiis tenui solabitur ervo.

SATIRA VII.

Iamdudum ausculto et cupiens tibi dicere servus
 Pauca reformido. Davusne? Ita, Davus, amicum

tusque recte temperati. — *cubans*] in stragula purpurea. — *strepitus*] factus a servis, qui primo diluculo conclave scopis spongiisque purgaturi sunt; idem strepitus excitat canes, custodes domus. cf. Epod. 6, 5. — *haud mihi vita*] „Etiam in iis sententiis haec negatio (*haud*) proprie adhiberi poterat, quibus veritas alicuius rei demonstranda aut ipsa res confirmanda erat (*gar nicht, wirklich nicht*).“ *Händ. Turs.* T. III. p. 29. — *et valeas*] Sic recte optimi codices. Alii *valeat*; quod magnopere friget prae altera lectione, nam *et* est i. q. *et propterea*. Vide ad Carm. II, 2, 11. — *solabitur*] vide ad Carm. II, 5, 7.

Satira VII.

Superiore poemate Horatius veram suam sententiam de suis rebus suaeque cum Maecenate magnisque in civitate viris necessitudine amabili ratione descripserat; inde igitur petenda est vera morum animique Horatii cognitio. Adversarii autem, quos multos eum habuisse et natura rerum hominumque et poemata docent, aliter de eo iudicabant, quippe qui in homine olim paupere, paupertatis, frugalitatis, libertatis, temperantiae laudatore, tunc satis diato, ut etiam umbras scurrasque aleret (v. 36), divitum delicatorumque hominum sectatore et adulatore, luxuriosae vitae amatore ea omnia vitia omnemque inconstantiam et dissolutionem iure sibi invenire et vitu-

perare viderentur, quae saepissime in aliis non peioribus hominibus maligne, ut putabant, descripsisset. His igitur criminationibus postremum obviam eundi egregiam poeta invenit viam. Tantum enim abest ut iis se vitiis laborare negaverit, ut acriorem infestioemque sui ipsius incusationem hoc poemate scripserit, quam unquam vel acerrimus adversarius in se parare auderet. Etenim ea non debilis ratio est sese ab aliorum criminationibus defendendi, cum nihil eorum quae vituperata sunt extenuatur, omnia potius ridicula quadam superlatione ita augentur, ut ridere debeant quicumque audiant legantve adversariisque fidem abrogent. Putidum autem fuisset et prope cynicum, si ipse suo ore sese voluisset maculis flagitiisque conspergere; quare sapiens eam poematis formam elegit, qua quidquid esset dicendum abiecto pudore insolitae licentia posset pronuntiare. Saturnalia (vide ad Sat. II, 3) Numa rege instituta, quae Saturni auream aetatem sublatoque inter heros servosque discrimine pristinam omnium hominum aequalitatem in paucos dies referebant, magnam dicendi agendique praebuerunt servis libertatem. Fingit igitur Horatius, Saturnalibus Davum suum servum impunitate ac licentia dicendi abuti gravissimeque dominum inconstantiae, stultitiae insignisque temeritatis accusare. Consilium poetae sane felicissimum est. Servi enim, quibus ne quid dominis ingratum dicant

- Mancipium domino et frugi quod sit satis, hoc est,
 Ut vitale putes. Age, libertate Decembri,
 5 Quando ita maiores voluerunt, utere; narra.
 Pars hominum vitilis gaudet constanter, et urget
 Propositum; pars multa natat, modo recta capessens,
 Interdum pravis obnoxia. Saepe notatus
 Cum tribus anellis, modo laeva Priscus inani,
 10 Vixit inaequalis, clavum ut mutaret in horas;
 Aedibus ex magnis subito se conderet, unde
 Mundior exiret vix libertinus honeste;

per totum annum gravi poena vetitum est, ubi dicendi quidquid velint veniam accipiunt, arrogantes et impudentes sese praestant, praesertim qui sapientiores vel doctiores sibi esse videantur quam solet esse plurima pars eorum. Quare hoc egregie invenit Horatius, quod Davum a Crispini aretalogi (Sat. I, 1, 120. I, 3, 139) ianitore ridiculis Stoicorum Romanorum doctrinis imbutum esse finxit (v. 45). Aliter enim unde Davus animum sumpsisset et facultatem ita disputandi? Et vide, ab ianitore Crispini, non ab ipso Crispino suam sapientiam ille accepit, hoc est a vilissimo mancipio, unde non minima profecto vilitas et nequitia in ipsam quoque sapientiam redundavit. Quare Horatius alteram simul occasionem nactus est, in insulsum illud genus aretalogorum acerbissime invehendi; quod quomodo ludibrium reddere verius potuit inter aequales, quam ita ut doctores et interpretes doctrinae eorum nunc insanum et perditum mercatorem (Sat. II, 3) nunc nequissimum servum et ianitorem poneret? — De tempore satirae nihil certum est aliud nisi habuisse iam Horatium aliquamdiu villam suam Sabinam (v. 28, 118); veri tamen simile est haud ita multo post sextam huius libri hanc quoque scriptam esse. Itaque iis assentior qui ad a. 724 hoc poema referendum existimarunt.

V. 1. *ausculto*] Cogita Horatium in cubiculo aut clara voce legisse aut inter scribendum secum subinde esse locutum, neque servum ausum esse adhuc libertate Saturnalium uti, tandem opportunum tempus nactum silentium rumpere. Poeta ita cubat ut

Davum adesse non sentiat; iam nondum respiciens et ex vocis noto sono Davum loqui suspicans rogat *Davusne*? Affirmante Davo inter tertium versus Horatius rētro vertitur. — *ita*] „In colloquiis unum *ita* totam sententiam affirmat responsione.“ *Hand. Turs.* T. III. p. 493. — *vitale*] Sat. II, 1, 61. Et „optima prima fere Manibus rapiuntur avaris.“ Ovid. Am. II, 6, 39. Homo igitur nequam est, qui magnam sibi impertire laudem non audet. — *pars hominum*] Iam incipit Davus ratione vere philosophica, ut opinatur; antequam eo progrediatur quo vult, praemittit magnificam de hominum inconstantia universam sententiam exemplorum splendore satis ornata (6—20). — *natat*] Senec. ep. 35: „Proficet et ante omnia hoc cura ut constes tibi. Mutatio voluntatis indicat animum *natare*, aliubi atque aliubi apparere prout tulit ventus: non vagatur quod est fixum et fundatum.“ — *modo*] cui respondet *interdum*, ut Sat. I, 10, 12 sq. Aliter etiam Epist. II, 1, 63. — *tribus anellis*] De anulorum usu magnoque in iis luxu hos lege locos: Isid. Orig. XIX, 32: „Apud veteres ultra unum anulum uti infame habitum viro.“ Contra Senec. Nat. Quaest. VII, 31: „Exornamus anulis digitos; in omni articulo gemma disponitur.“ — *Priscus*] homo ignotus, senatorii ordinis. — *inaequalis*] Sat. I, 3, 9. 19. — *clavum*] Tunica indutus erat modo lato, ut senatorum, modo angusto clavo, ut equitum, ornata. — *in horas*] A. P. 160. Cic. ad Att. XIV, 20: „consilia temporum sunt; quae in horas commutari vides.“

V. 13. *doctor*] Sic optimi quique

Iam moechus Romae, iam mallet doctor Athenis
Vivere: Vertumnis quotquot sunt natus iniquis.

15 Scurra Volanerius, postquam illi iusta cheragra
Contudit articulos, qui pro se tolleretur atque
Mitteretur in phimum talos, mercede diurna
Conductum pavit: quanto constantior isdem
In vitiis, tanto levius miser ac prior illo,

20 Qui iam contento, iam laxo fune laborat.
Non dices hodie quorsum haec tam putida tendant,
Furcifer? Ad te, inquam. Quo pacto, pessime? Laudas
Fortunam et mores antiquae plebis, et idem,
Si quis ad illa deus subito te agat, usque recuses,
25 Aut quia non sentis quod clamas rectius esse,
Aut quia non firmus rectum defendis et haeres
Nequidquam coeno cupiens evellere plantam.
Romae rus optas; absentem rusticus urbem
Tollis ad astra levis. Si nusquam es forte vocatus

codices, alii *doctus*. Illud tamen praeferendum puto vel propter codicum Blandin. auctoritatem, etiamsi nihil tribuendum sit scholiastarum adnotationi: „Dicitur Priscus oratoriam docuisse.“ — *Vertumnis*] A vertendo dictus deus Vertumnus, qui variis anni temporibus praeerat. Vide de eo Ovid. Met. XIV, 642 sqq. *Comm. Cruq.* „Erat Vertumnus multiformis, positus in multis locis civitatis, et fere in omnibus municipiis Italiae consecrabantur simulacra, quibus essent ambigui vultus, qui pro habitus diversitate in diversas facies deorum vertebantur.“ Ceterum cf. Sat II, 3, 8. — *Volanerius*] Nihil praeterea de hoc homine traditur. Est autem exemplum constantiae in vitiis. — *cheragra*] Verror haec videtur esse forma in locis, in quibus prima syllaba corripitur necesse est, quam altera *chiragra*. Epist. I, 1, 31. — *mitteretur*] E fritillo, pyxide lignea, in qua tali manu agitantur, deinde ex ea in phimum coniciebantur, adeo ut duobus his instrumentis omnis fraus arceretur. Phimus autem turricula erat sive pyrgus, cylindrus cavus qui trochleatim effictus erat certosque habebat intus gra-

dis excisos, ex quibus fundebantur tali in alveolum sive tabulam lusoriam. Alii fritillum idem esse ac phimum affirmant, ut Schol. Iuven. ad Sat 14, 5: „Fritillus, pyxis cornea, qui *fmus* dicitur graece.“ — *prior ille*] „quanto pertinacior erat in suo proposito, tanto felicior illo, qui semper in diversa vertebatur.“ Acro. In bonis tamen codd. est *acrior* pro *ac prior*, et *ille* pro *illo*. — *iam—iam*] modo—modo. Tres Bland. et duo alii Cruq., unus Pulmanni, duo Orellii habent *tam—quam*. cf. Ovid. Met. I, 111. Ad imaginem cf. Lucian. Dial. meretr. III. extr.: „Ὅρα μὴ κατὰ τὴν παροιμίαν ἀποδόξωμεν πάνν τεινόνσαι τὸ καλῶδιον.“ — *hodie*] Longi sermonis taedio captus Horatius timet ne totus dies ita consumatur. — *Furcifer*] Donat. ad Terent. Andr. IV, 5, 12: „Furciferi dicebantur qui ob leve delictum cogebantur a dominis ignominiae magis quam supplicii causa circa vicinos furcam (V) in collo ferre, subligatis ad eam manibus, et praedicare peccatum suum simulque commonere ceteros ne quid simile admittant.“ Cic. pro Deiot. 9. — *coeno*] Metaphora sumpta de eo, cui in coenum delapso vires

- 30 Ad coenam, laudas securum olus ac, velut usquam
 Vincit eas, ita te felicem dicis amasque,
 Quod nusquam tibi sit potandum. Iusserit ad se
 Maecenas serum sub lumina prima venire
 Convivam: Nemon oleum feret ocus? ecquis
 35 Audit? cum magno blateras clamore furisque.
 Mulvius et scurrae tibi non referenda precati
 Discedunt. Etenim fateor me, dixerit ille,
 Duci ventre levem, nasum nidore supinor,
 Imbecillus, iners, si quid vis, adde, popino;
 40 Tu cum sis quod ego et fortassis nequior, ultro
 Insectere velut melior verbisque decoris
 Obvolvas vitium? Quid, si me stultior ipso
 Quingentis empto drachmis deprenderis? Aufer
 Me vultu terrere; manum stomachumque teneto,
 45 Dum quae Crispini docuit me ianitor edo.
 Te coniux aliena capit, meretricula Davum:
 Peccat uter nostrum cruce dignius? Acris ubi me
 Natura intendit, sub clara nuda lucerna

non sufficiunt ad enitendum. „Tantus, inquit, in te non inest sensus veri, ut ex turpitudine omnino possis exire.“ — *olus*] Sât. II, 6, 60—64. — *vincit*] vinculis oneratus, quia invitissimus. Et ne cum Horkelio dubites, num *vincere* idem possit esse quod *vinculis onerare*, lege Tacit. Ann. I, 23: „tantum consternationis invidiaeque concivit, ut pars militum gladiatores, qui e servitio Blaesi erant, pars ceteram eiusdem familiam *vincerent*.“ id Hist. I, 45: „*vinciri* iussum et maiores poenas daturum affirmans praesenti exitio subtraxit.“ ibid. III, 36: „P. Sabinum *vinciri* iubet.“ Horkelii coniectura: *escam Vix fugias*,“ necessaria non videtur, nec me offendit intra paucissimas lineas *usquam* ter ingestum. — *amasque*] Cic. ad Att. IV, 16: „In eo me valde amo.“ Sat. I, 2, 54.

V. 43. *lumina prima*] Epist. II, 2, 98. — *oleum*] lucernae, quae opus est ad Maecenatem festinanti. — *blateras*] Fest.: „Blaterare, stulte et percipide loqui.“ — *furisque*] Sic ex Cruquianis MSS. Blandinius antiquissimus et tres

alii, Pulmanni quattuor. Recte iam Georg. Fabricius: „Interrogatio prior est Horatii, vocantis servos; qui cum sint in herili imperio signiores, blaterat, clamat, furit.“ Velocitatis notio, quae inest in *fugis*, plurimorum codd. scriptura, supervacanea est, quippe quae praecedente interrogatione multo gravius indicetur. — *Mulvius*] „Scurrae spe bonae coenae decepti imprecantur tibi quae ego nolim iterare. Et recte quidem tibi maledicunt. Facile enim suam causam adversus te sic illi defendant.“ — *dixerit ille*] Mulvius. — *ultro insectere*] In scurras, qui ridendi causa alebantur, suo sibi iure invehii videbantur. — *Quid*] Confirmat Davus Mulvii criminationes in poetam coniectas: „Recte sic Mulvius; quid enim? tu nonne stultior es me ipso mancipio?“ Quod cum dicere audeat Davus, cogitandum est iratum se praestare Horatium et manum tollere minantem. — *quingentis drachmis*] quo parvo pretio (120 thal.) vilia tantum mancipia emebantur. — *cruce*] Epist. I, 16, 48. Crucis autem supplicium apud

Quaecunque excepit turgentis verbera caudae,
 50 Clunibus aut agitavit equum lasciva supinum,
 Dimittit neque famosum neque sollicitum, ne
 Ditiore aut formae melioris meiat eodem.
 Tu cum proiectis insignibus, anulo equestri
 Romanoque habitu, prodis ex iudice Dama
 55 Turpis, odoratum caput obscurante lacerna,
 Non es quod simulas? Metuens induceris atque
 Altercante libidinibus tremis ossa pavore.
 Quid refert, uri, virgis ferroque necari
 Auctoratus eas, an turpi clausus in arca,
 60 Quo te demisit peccati conscia herilis,
 Contractum genibus tangas caput? Estne marito
 Matronae peccantis in ambo iusta potestas?
 In corruptorem vel iustior. Illa tamen se
 Non habitu mutatae loco, peccatae superne.
 65 Cum te formidet mulier neque credat amanti,
 Ibis sub furcam prudens dominoque furenti

Romanos peculiare fuit servis, unde servile supplicium appellatum. — *anulo equestri*] Qua ratione Horatius equestrem dignitatem acceperit nos quidem ignoramus; fortasse beneficio Octaviani eo tempore, quo Sabinum accepit, in ingenuitatem assertus cum censu equestri dignitatem quoque adeptus est. Cum qua re non pugnat Sat. II, 1, 29. 75; ibi enim cavet ne nova sibi dignitas in crimen et arrogantiam convertatur. Alii non sententiam solum ianitoris Crispini, sed verba etiam a Dama pronuntiari putantes neque *te* v. 46 neque *tu* v. 53 ad Horatium referunt, sed virum aliquem conspicuum et locupletem obiurgari malunt. Quo fit, ut etiam v. 54 *Damam* nomen non intelligant de servo Horatii, sed positum putent omnino pro appellativo *servi*. Quae ratio quam non sit probabilis quamque conturbet dialogum satirae, in promptu est.

V. 54. *ex iudice*] nam ex equitibus iudices eligebantur. De lacerna vide ad Carm. II, 16, 35; quae ibi notata sunt iis adde haec Beckeri Gall. T. II. p. 98 (ed. 1.): „Da bei dieser

Kleidung (lacerna) der Kopf immer unbedeckt blieb und man einen petasus gewöhnlich nicht trug, so heftete man, namentlich für die Reise oder wenn man obvoluto capite unerkannt sein wollte, eine Art Capuchon, culullus, auch culullio an die lacerna oder paenula.“ — *altercante*] Verbum a iudicio est translatum; altercatur enim qui adversarium interrogando vincere studet. Cic. Brut. 43: „Cras- sus in altercando invenit parem neminem.“ — *quid refert*] „Quodsi ita te geris, num tu magis liber es quam is qui lanistae se vendidit? nihil enim interest utrum ad gladiatoria munera corpus tuum lanistae an libidinibus corpus et animus ad flagitia dederis.“ De verbis Acro: „Qui se vendunt ludu auctorati dicuntur; auctoratio enim dicitur venditio gladiatorum.“ Senec. epist. 37: „Illius turpissimi auctora- menti verba sunt, uri, vinciri, verberari ferroque necari.“ — *ibis*] omisso pronomine *tu*, cf. Sat. I, 2, 90. II, 3, 212. 234. Epist. I, 14, 40. — *pru- dens*] „Mulier certe cautior est ac minus credula quam tu, qui *prudens* in

- Committes rem omnem et vitam et cum corpore famam.
 Evasti: credo, metues doctusque cavebis;
 Quaeres quando iterum paveas iterumque perire
 70 Possis, o toties servus! Quae belua ruptis
 Cum semel effugit, reddit se prava catenis?
 Non sum moechus, ais; neque ego, hercule, fur, ubi vasa
 Praetereo sapiens argentea: tolle periculum,
 Iam vaga prosiliet frenis natura remotis.
 75 Tunc mihi dominus, rerum imperiis hominumque
 Tot tantisque minor, quem ter vindicta quaterque
 Imposita haud unquam misera formidine privet?
 Adde super dictis quod non levius valeat: nam
 Sive vicarius est, qui servo paret — uti mos
 80 Vester ait — seu conservus; tibi quid sum ego? Nempe
 Tu, mihi qui imperitas, alii servis miser atque
 Duceris ut nervis alienis mobile lignum.
 Quisnam igitur liber? Sapiens sibi que imperiosus,

periculum ruis, omnem rem tuam caeca temeritate ductus domino i. e. marito committis. — Noli cum aliis versum 65 a sequente distractum cum superiori coniungere. Ceterum pro *peccatave superne* Horkelius coniecit scribendum esse *spectatque superne*, versibus tamen 64 et 65 inter se coniunctis punctoque post *amanti* posito. — *Evasti*] Omissa particula *cum* vel *si*; vides orationem sic nerviosorem reddi. — *toties*] saepissime. cf. Epist. I, 1, 6. Cogitatione addamus necesse est: „quoties talem te ostendis.“

V. 74. *vaga*] *προληπτικῶς* positum: prosiliet et vagabitur, se extendet. — *vindicta*] De ratione manu servum mittendi Orellius ad h. l. haec habet: „Comparebat coram praetore urbano dominus cum servo, amicusque domini, assertor in libertatem; dominus servum vindicta (virgula) vel festuca dicis causa percutiebat, quo suam in eum potestatem manifestaret: tum assertor in libertatem hanc formulam pronuntiabat: *Hunc hominem liberum esse aio ex iure Quiritium*. Dominus velut cedens adversario ficto: *Hunc hominem liberum esse volo* vel

liber esto atque abito quo voles; dein eum circumagebat et manu emittebat; postea praetor edicebat *eum hominem liberum esse ex iure Quiritium*.“ — *super dictis*] Ita cur non coniungamus non video neque est cur *dictis* dativum esse dicamus. Latior enim Horatii usus est huius particulae cum ablativo coniunctae. cf. Carm. I, 9, 5. Epod. 7, 3. Virg. Bucol. 1, 80. — *vicarius*] Licuit servis alium servum ex peculio suo emere ad perficienda quae sibi essent servilia negotia. Eos autem nominabant vicarios, qui, cum peculium servorum in potestate domini esset, servi non servus solum erat sed etiam conservus. — *alii*] Sic bene ex antiquis codicibus; alii *aliis* praebent; significatur non Maecenas, sed libido et cupiditas. — *lignum*] Significantur *νευρόσπαστα*, parva quaedam animalium simulacra, quorum vel singula vel universa membra certis nervis in hanc vel illam partem movebantur (Marionetten). — *sibi que imperiosus*] Sic scripsi cum antiquissimo cod. Blandin., duobus aliis Cruquii, quattuor Pottierii, uno Pulmanni et Montepessul. pro eo quod in pluribus inest *sibi qui*. Dispicet duplex sententia relativa, al-

Quem neque pauperies neque mors neque vincula terrent,
 85 Responsare cupidinibus, contemnere honores
 Fortis, et in se ipso totus, teres atque rotundus,
 Externi ne quid valeat per leye morari,
 In quem manca ruit semper fortuna. Potesne
 Ex his ut proprium quid noscere? Quinque talenta
 90 Poscit te mulier, vexat foribusque repulsum
 Perfundit gelida, rursus vocat: eripe turpi
 Colla iugo; Liber, liber sum, dic age! Non quis:
 Urget enim dominus mentem non lenis et acres
 Subiectat lasso stimulos versatque negantem.
 95 Vel cum Pausiaca torpes, insane, tabella,
 Qui peccas minus atque ego, cum Fulvi Rutubaeque
 Aut Pacideiani contento poplite miror
 Proelia rubrica picta aut carbone, velut si
 Re vera pugnent, feriant vitentque moventes
 100 Arma viri? Nequam et cessator Davus; at ipse
 Subtilis veterum iudex et callidus audis.
 Nil ego, si ducor libo fumante: tibi ingens
 Virtus atque animus coenis responsat opimis?

tera alteram explicans. cf. Carm. III, 29, 41.

V. 86. *in se ipso totus*] Cic. Parad. 2: „Non potest non beatissimus esse, qui totus aptus est ex sese, qui in se uno sua posuit omnia.“ — *teres atque rotundus*] M. Anton. III, 41: „*Τούτου (τοῦ νου) οὐ πῦρ, οὐ σίδηρος, οὐ ὑραννος, οὐ βλασφημία οὐχ ὅτιον ἀπτεται· ὅταν γένηται σφαῖρος, κυκλωτέρης μένει.*“ — *subiectat*] Metaphora sumpta ab equite qui lasso equo calcaria subdit. Epist. II, 1, 217. — *Pausiaca*] Pausias Sicyonius floruit circa a. ante Chr. 370. De re confers Ciceronem Parad. 5: „An ille mihi liber, cui mulier imperat? cui leges imponit, praescribit, iubet, vetat quod videtur? qui nihil imperanti negare potest, nihil recusare audet? Poscit; dandum est: vocat; veniendum: eiicit; abeundum: minatur; extimescendum. Ego vero istum non modo servum, sed nequissimum servum appellandum puto.“ Et deinde: „Pari stultitia sunt

quos signa, quos tabulae, quos aedificia magnificia nimio opere delectant.“ — *Fulvi*] Tria sunt nomina gladiatorum; tertium ex Lucilii satiris sumptum. — *contento poplite*] coniunge haec cum *proelia*, quae contentis poplitibus committuntur. — *rubrica picta*] Significantur rudes picturae, quae ad alliciendum populum vel a lanistis vel ab iis, qui spectacula edebant, exponebantur. Plin. H. N. XXXV, 33: „Libertus eius (Neronis) cum daret Antimunus gladiatorium, publicas portus investivit pictura, ut constat, gladiatorum ministrorumque omnium veris imaginibus... Pingi gladiatoria munera atque in publico exponi coepta a C. Terentio Lucano. Is avo suo triginta paria in Foro per triduum dedit tabulamque pictam in nemore Dianae posuit.“ — *cessator*] „quodsi ego illas rudes tabellas a lanistis propositas admirans paulo diutius moror, statim cessator audio et vituperor; tu contra in simili re non melior lauda-

- Obsequium ventris mihi perniciosius est cur?
 105 Tergo plector enim. Qui tu impunitior illa,
 Quae parvo sumi nequeunt, obsonia captas?
 Nempe inamarescunt epulae sine fine petitae,
 Illusique pedes vitiosum ferre recusant
 Corpus. An hic peccat, sub noctem qui puer uvam
 110 Furtiva mutat strigili? qui praedia vendit,
 Nil servile gulae parens habet? Adde, quod idem
 Non horam tecum esse potes, non otia recte
 Ponere, teque ipsum vitas fugitivus et erro,
 Iam vino quaerens, iam somno fallere curam;
 115 Frustra: nam comes atra premit sequiturque fugacem.
 Unde mihi lapidem? Quorsum est opus? Unde sagittas?
 Aut insanit homo aut versus facit. Ocius hinc te
 Ni rapis, accedes opera agro nona Sabino.

SATIRA VIII.

Ut Nasidieni iuvit te coena beati?

Nam mihi quaerenti convivam dictus here illic

ris.“ — *nil ego*] nequam audio. — *plector enim*] „Perniciosum quidem est, nam tergum plectitur; tu autem nonne in stomacho et pedibus poenam sentis?“ cf. Sat. II, 2, 41 sqq. — *qui tu*] quo iure tu. Haec imitatus est Persius 5, 129: „Sed si intus et in iecore aegro Nascuntur domini, *qui tu impunitior exis* Atque hic, quem ad strigiles scutica et metus egit herilis?“

V. 110. *mutat*] vide ad Carm. I, 17, 1. — *strigili*] Becker. Gall. T. II. p. 47: „Die strigiles oder Schabeisen sind aus den Gymnasien bekannt. In den Bädern bediente man sich ihrer, um Oel, Schweiss und Unreinigkeit von der Haut zu schaben. Sie haben sämmtlich eine Höhlung, in welcher sich, wenn sie über den Körper strichen, Schweiss, Oel oder Wasser sammelte und wie in einer Rinne herabließ.“ — *erro*] Ulpian. Dig. XXI, 1, 17: „Erronem sic definimus, qui non quidem fugit sed frequenter sine causa vagatur et temporibus in rebus nugatoriis consumptis serius ad dominum

redit.“ — *unde mihi lapidem*] De impudentia servi iratus dominus lapidem quaerit, quo malum hominem percutiat. Sic autem irasci et furere hominis est qui veras criminationes iustis causis non possit diluere. Quare lepide Horatius contumeliosis servi obiurgationibus quasi cedit. Lepide etiam Davus calidis domini exclamationibus frigidissime respondet; dominus calidior etiam factus sagittas quaerit, deinde impotens neque sibi consulere sciens molestum servum dirissimis minis pellit. — *versus facit*] Poetae qui vere sunt divino quodam furore corripuntur, cum versus faciunt. Qua re Davus maligne ita utitur, ut dominum poetam, nunc furore correptum, mentis compotem esse aut quid dicat scire neget. — *opera nona*] Octo igitur iam servi fuerunt Horatio in Sabino. Viliores erant servi rustici et opera ruri duriora; quare qui ex urbana familia gravius quid deliquissent rusticae familiae addebantur.

De medio potare die. Sic, ut mihi nunquam
In vita fuerit melius. Dic, si grave non est,

Satira VIII.

Quod semper fieri solet, cum rerum publicarum status et ordines violentis bellorum motibus turbantur, ut ex infima etiam plebe homines casu vel fortunae ludibrio emergant corrasisque magnis divitiis eam sibi concilient auctoritatem quam coniunctam semper scimus cum divitiis, id Romae et Horatii aetate saepe factum esse taedium testatur, quo boni saepe cives moti de arrogantia et insolentia divitum libertinorum, aliorum id genus hominum conquerebantur. Nempe „fortuna non mutat genus“ (Epod. 4, 6). Talem tibi cogita hunc Nasidienum, cuius coenam in hac satira Horatius Fundanio, comico poeta, interprete descripsit. Is enim casu magis quam meritis dives factus cum pecunia omnia parari, genus et formam donari crederet (Epist. I, 6, 36 sq.), in consuetudine nobilium et doctorum hominum aliam in super gloriandi causam quaesivisse videtur. Quare Maecenatem clarosque poetas, Varium et Fundanium (Sat. I, 10, 42) iam saepius fortasse ad se invitaverat; sed cum illud quod ardentius cuperet tandem esset assecutus, cum Maecenas importunis eius precibus cedere tandem coactus esset, ingentem convivis ridendi copiam praeberunt eius agrestes mores, vana in ostendendis opibus elegantia, rustica in laudandis rebus arrogantia. Duae igitur res fuerunt quae Horatium ut convivium illud ridicule describeret videntur permovisse; ac primum quidem ut Nasidienorum perversitatem aequalibus ridendam praeberet aliorumque si fieri posset stolidam iactantiam sanaret, deinde quo Maecenati, qui Nasidieni imperitia et ineptiis magnopere esset delectatus, gratam eius convivii memoriam conservaret. In qua re illud tenendum est, multa haud dubie Romanis hominibus magis ridicula visa esse quam nobis de antiqua instruendae coenae ratione, de ferculorum recto ordine, de ciborum bene et eleganter parandorum et ponendorum iusto modo non satis instructis. Praeterea tamen bene velim observes, quam egregie Horatius qui ipse coenae non interfuit comico poetae Fundanio rem

narrandam demandaverit, quippe in cuius ore quae natura essent ridicula maiorem etiam risum cierent. Deinde sapienter institutum est quod Maecenatis praeter nomen nihil memoratur; nimirum ne tanti viri gravitas apud populum laederetur. Nasidienus Rufus quis fuerit nescimus; nam quod apud Acronem legitur, fuisse eum equitem Romanum, cave ne ei auctori nimium credas. Deinde alii Salvidienum Rufum, Octaviani legatum, rideri suspicati sunt; non bene, quoniam ille iam anno 714 occisus est. Unum in hac re certum est, Nasidienum nomen fuisse vere Romanum; id quod exemplorum auctoritate satis comprobatur. Quo anno satiram scriptam dicas nihil est quo docearis; nonnulli annum 724 aptissimum suspicati sunt. Webero videtur carmenscriptum esse vere (cf. v. 8 sqq.) a. 726, Zumptio iam anno 714, quoniam hic vir doctus Salvidieni fratrem derideri existimat; non recte, opinor.

V. 1. *Ut Nasidieni*] Nomen quattuor syllabis pronuntiandum διὰ συναρτήσεως. Vide ad Carm. III, 4, 41. Sat. I, 7, 30. II, 3, 245. Aliter v. 75. 84. Aliae lectiones *Ut te Nas.* et *Nasidieni qui* exortae sunt ex malo metri corrigendi studio. — *beati*] divitis. Carm. III, 7, 3. Inest tamen in hoc epitheto ironia quaedam, non tanquam vere fuerit miser et infelix, qui suis divitiis bene uti nesciret, sed quia opibus gloriari solebat vir bonus. — *Nam*] Additur hac particula unde sciat Horatius Fundanium coenae Nasidieni interfuisse. Vide ad Carm. III, 11, 1. — *dictus*] Omissum verbum *es*; ex sermone quotidiano. — *here*] De qua forma compara hos locos: Quintil. I, 7, 22: „*here* nunc e littera terminamus; at veterum comicorum adhuc libris invenio *heri ad me venit*, quod idem in epistolis Augusti, quas sua manu scripsit aut emendavit, deprehenditur.“ id. I, 4, 8: „in *here* neque e plane neque i auditur.“ Priscian. p. 1011: „Dicitur tamen et *here* (Juvenal. lib. I, 3, 23): *res hodie minor est, here quam fuit*. Horatius in II. Sermonum.“ — *de medio die*] Solita coenae hora nona fuit. cf. Epist. I, 14, 34. — *dic*] Sic omnes codd. Cruquii, Bentleyi, Pulmanni, Orellii; tamen Orel-

- 5 Quae prima iratum ventrem placaverit esca.
 In primis Lucanus aper: leni fuit Austro
 Captus, ut aiebat coenae pater; acria circum
 Rapula, lactucae, radices, qualia lassum
 Pervellunt stomachum, siser, allec, faecula Coa.
- 10 His ubi sublatis puer alte cinctus acernam
 Gausape purpureo mensam pertersit, et alter
 Sublegit quodcunque iaceret inutile quodque
 Posset coenantes offendere; ut Attica virgo
 Cum sacris Cereris procedit fuscus Hydaspes
- 15 Caecuba vina ferens, Alcon Chium maris expers.
 Hic herus: Albanum, Maecenas, sive Falernum
 Te magis appositis delectat: habemus utrumque.

lius ex paucis codd. Feae et Comment. Cruq. *da*, de quo cf. Virg. Buc. I. 19. — *placaverit*] cf. Sat. II, 2, 18. De gustatione qua initio coenae irritabatur stomachi cupiditas nihil dicitur. — *Lucanus*] Sat. II, 3, 234. II, 4, 40. — *leni Austro*] scilicet ne convivae putrescere iam aprum suspicarentur (Sat. II, 2, 41); qua quidem re quid potuit magis putide aut importune doceri? — *circum*] vide Sat. II, 4, 73 sqq. — *radices*] Rettig. Ovid. Met. VIII, 666. — *siser*] Plin. XX, 7: „Siser stomachum excitat, fastidium absterget, ex aceto laserpitatio sumptum aut ex pipere et mulso vel ex garo.“ — *faecula*] Sat. II, 4, 73. Est liquamen et condimentum ex Coi vini faece paratum. — *puer alte cinctus*] altius videtur quam decorum erat. Nam si nihil in hoc loco inesset ridiculi aut indecori, quid eam rem diserte nominavit Horatius? Deinde Servilius de eadem re videtur ridere v. 70. — *acernam*] Non sequor Commentatorem Cruquianum: „Notat eius sorditiem, quod pro divitiis non haberit mensam citream aut vermiculatam“; nam Plin. XVI, 26: „Acer, inquit, operum elegantia ac subtilitate citro secundum.“ Neque consentaneum est divitem hominem in parandis mensis, in eligenda supellectile parum aut avarum fuisse; immo vero mensa satis pretiosa est. Augusti autem aetate mensa nondum ut postea mantilibus tegebatur, quare antequam no-

vum fereculum poneretur gausape abstergi debuit. Isid. Orig. XIX, 26, 6: „Mantelia nunc pro operiendis mensis sunt, quae, ut nomen ipsum indicat, olim tergendis manibus praebebantur.“ — *sublegit*] ἀνελέξατο; unde nomen his servis analectarum.

V. 13. *Attica virgo*] κατηφόρος; cf. Sat. I, 3, 10. — *Hydaspes*] Servus Indus, quos in familia habere luxuria et mos iussit. Nomen sumptum est ex patrio flumine servi. — *Caecuba*] Plin. XIV, 6: „Divus Augustus Setinum praetulit cunctis. Antea Caecubo erat generositas celeberrima in palustribus populetis, sinu Amyclano. Secunda nobilitas Falerno agro erat et ex eo maximè Faustiano. Ad tertiam palmarum varie venere: Albana urbi vicina praedulcia ac rara in austero; item Surrentina; certant Massica aequè ex monte Gaurano.“ Vituperandus igitur Nasidienus non erat ideo quod Caecuba vina proposuit, sed quod simul gloriabatur se alia quoque habere, et quod in divitum hominum epulis plura fortasse genera praebebantur. — *Chium maris expers*] Solebat vinis graecis aqua marina admisceri; hoc igitur Chium, quod inter transmarina nobilissimum fuit auctore Plinio, non erat mixtum, sive quod salubrius fortasse habebatur (cf. Plin. XIV, 7: „Nunc gratia ante omnia est Clazomenio, postquam parcius mari condiunt,“ et ibid.: „Nec Ephesium salubre esse, quoniam mari et defruto

Divitias miseras! Sed quis coenantibus una,
Fundani, pulchre fuerit tibi, nosse laboro.

20 Summus ego et prope me Viscus Thurinus et infra,
Si memini, Varius, cum Servilio Balatrone
Vibidius, quos Maecenas adduxerat umbras.
Nomentanus erat super ipsum, Porcius infra,
Ridiculus totas simul absorbere placentas.

condiatur.“) sive ne sitim excitaret
neve qui acriter biberent minus recte
de exquisitis cibis possent iudicare
(cf. v. 36 sqq.). — *divitias miseras*]
Horatii sunt Fundanium interrumpen-
tis; de qua re ne cui dubitatio ex-
oriatur, particula *sed* satis videtur cau-

tum esse. Male igitur alii ea verba Nasidieno tribuerunt. Miserae sunt divitiae, quod miserum reddunt hominem in tantamque agunt iactantiam et stultitiam. — *pulchre*] Sat. II, 2, 106. — *Summus ego*] Quo ordine accubuerint convivae ex hac tabula videbis:

Medius lectus

Summus lectus						
3	2	1		6	5	4
Imus lectus						
7	8	9				

1) Fundanius 2) Viscus 3) Varius
4) Servilius 5) Vibidius 6) Maecenas
7) Nomentanus 8) Nasidienus 9) Por-
cius. In quo ordine hoc incertum re-
linquitur, utrum Viscus secundum et
Varius tertium tenuerit an contra Vi-
scus tertium et Varius secundum. Idem
dicendum de umbris Maecenatis. Me-
dius lectus maxime honoratus nobilis-
simo inter convivas viro eiusque co-
mitibus tribuebatur; quare Maecenas
in ultimo loco medii lecti, qui locus
consularis appellabatur, accumbebat.
Si recte rem instituisset Nasidienus
septimum locum Maecenati proximum
sibi servare debuisset; quem cur No-
mentano dederit, manifestum est ex
versu 25. — *Viscus Thurinus*] Thu-
rii oriundus, diversus a Viscis fratri-
bus qui Sat. I, 10, 83 nominantur. —
Servilio] tribus syllabis pronuntiandum.
— *quos Maecenas*] Optimi codices
quos, quod quidem a scriba nimis an-

xio de consuetudine latina in *quas* mutatum videtur. — *umbrās*] comites a domino coenae non invitatos. Epist. I, 5, 28. — *Nomentanus*] Sat. I, 1, 102. Porcius publicanus appellatur apud Comm. Cruq., Nomentanus decumanus.

V. 24. *simul*] Sic plurima pars bonorum codicum neque video cur haec lectio alteri *semel* cedat. Dicit enim Porcium, voracitate reliquis ut ostenderet quam essent egregiae placentae, totas, in partes non dissectas, absorbuisset. *Simul* igitur bene ponitur contra *totas*, ut eandem habeas sententiam quam in altera lectione *semel* adversarii inesse aiebant. Dubitationi magis obiectum est indicium de diversa lectione verborum *absorbere* et *obsorbere*, utraque a bonis codicibus commendata. Illud tamen ideo praetulimus ne egregia comparatio gulonis cum maris gurgite perdat, adiuti loco Ciceronis Phil. II, 27, 67: „Oceanus vix videtur tot res,

- 25 Nomentanus ad hoc, qui, si quid forte lateret,
 Indice monstraret digito: nam cetera turba,
 Nos, inquam, coenamus aves, conchyilia, pisces,
 Longe dissimilem noto celantia sucum;
 Ut vel continuo patuit, cum passeris atque
- 30 Ingustata mihi porrexerat ilia rhombi.
 Post hoc me docuit melimela rubere minorem
 Ad lunam delecta: quid hoc intersit, ab ipso
 Audieris melius. Tum Vibidius Balatroni:
 Nos nisi damnose bibimus, moriemur inulti;
- 35 Et calices poscit maiores. Vertere pallor
 Tum parochi faciem nil sic metuentis ut acres
 Potores, vel quod maledicunt liberius vel
 Fervida quod subtile exsurdant vina palatum.
 Invertunt Allifanis vinaria tota
- 40 Vibidius Balatroque, secutis omnibus; imi
 Convivae lecti nihilum nocuere lagenis.
 Affertur squillas inter muraena natantes
 In patina porrecta. Sub hoc herus: Haec gravida, inquit,
 Capta est, deterior post partum carne futura.
- 45 His mixtum ius est: oleo, quod prima Venafri
 Pressit cella; garo de sucis piscis Hiberi;
 Vino quinquenni, verum citra mare nato,
 Dum coquitur — cocto Chium sic convenit, ut non
 Hoc magis ullum aliud —; pipere albo, non sine aceto,

tam distantibus in locis positas tam cito absorbere potuisse.“ Praeterea *ob-sorbere* plerumque de liquidis usurpatur. — *nam cetera turba*] Nomentanus omnes cibos laudabat ob insolitum gustum et novam qua essent parati rationem; cuius quidem rei convivae, haudquaquam earum rerum imperiti, etiamsi non initiati in mysteria culinae Nasidieni, nihil sentiebant; neque magis delectabantur intestinis piscium, quae alias non apponebantur. — *passeris*] Pleuronectis Flesi Linn. — *Nos nisi*] Perpetua omnium ciborum laudatione impudentiae iactantia domini et eius socio-

rum convivis taedium paratur; quare Vibidius acri potatione ultionem quaerere constituit. cf. Virg. Aen. II, 670. IV, 659. — *parochi*] iocose dictum; vide ad Sat. I, 5, 46. — *Allifanis*] Maiores calices dicti ab Allifis, Samnii oppido. — *imi lecti*] Nomentanus et Porcius, scilicet ne gustum sibi perderent neve Nasidienum acriter bibendo offenderent. — *his*] oleo, garo, vino cet. cf. Sat. II, 4, 63. — *Venafri*] Carm. II, 6, 15. — *garo*] Plin. XXXI, 43: „Garum nunc e scombro pisci laudatissimum in Karthagini Spartariae cetariis.“ Karthago spartaria est Hispanica; quia frequens ibi

- 50 Quod Methymnaeam vitio mutaverit uvam.
 Erucas virides, inulas ego primus amaras
 Monstravi incoquere, illotos Curtillus echinos,
 Ut melius muria quod testa marina remittit.
 Interea suspensa graves aulaea ruinas
- 55 In patinam fecere, trahentia pulveris atrii
 Quantum non Aquilo Campanis excitat agris.
 Nos maius veriti, postquam nihil esse periculi
 Sensimus, erigimur; Rufus posito capite, ut si
 Filius immaturus obisset, flere. Quis esset
- 60 Finis, ni sapiens sic Nomentanus amicum
 Tolleret: Heu, Fortuna, quis est crudelior in nos
 Te deus? Ut semper gaudes illudere rebus
 Humanis! Varius mappa compescere risum
 Vix poterat. Balatro suspendens omnia naso,
- 65 Haec est condicio vivendi, aiebat, eoque
 Responsura tuo nunquam est par fama labori.
 Tene, ut ego accipiar laute, torquerier omni
 Sollicitudine districtum, ne panis adustus,
 Ne male conditum ius apponatur, ut omnes
- 70 Praecincti recte pueri comptique ministrent?
 Adde hos praeterea casus, aulaea ruant si,

foit spartum. — *mutaverit*] cf. Sat. II, 2, 58. *Vitio* est dativus, in vitium i. e. in acorem. — *illotos*] e yasis, ubi sale conditi et repositi fuerant, cum sua salsugine exemptos. Vide ad Sat. II, 4, 84. — *ut melius*] ὡς ἀγρίων ὄν; cf. v. 89. — *quod remittit*] Sic codices Cruquiani antiquissimi omnes, nisi quod in Bland. antiquiss. est *quo*; relativum autem *quod* cum non intelligeretur, a scribis corruptum est in *quam*. Verba autem *quod testa mar. remittit* subiectum sunt quod vocamus; illud enim ipsum melius esse praedicatur quam muria. Alii ex bonis etiam codd. coniunctivum *remittat* praetulerunt; non recte. — *Curtillus*] ignotus homo.

V. 54. *aulaea*] vide ad Carm. III, 29, 15. — *maius veriti*] ruinam domus vel tecti tricinii. — *mappa*] lin-

teum quo manus et ora abstergebant (Serviette). Petron 32: „Circaque oneratas veste cervices laticlaviam immerat mappam fimbriis hinc atque illinc pendentibus“; nam quibus ius latius clavi erat, ii mappas quoque et mantelia lato clavo ornabant. — *suspendens*] vide ad Sat. I, 6, 5. Balatro Nomentano quasi assentiens rem iocans et irridens magnopere auget; nam plena haec consolatio est ironiae. — *ne panis*] Particulas *ne* et *ut* vides coniungendas esse cum voc. *sollicitudine*. Ludibrium autem in ea re videndum est, quod Balatro Nasidienum, qui cibos et curam in parandis cibis positam ad taedium ipse praedicaverat, minutis curis enumerandis maligne laudat. Ac videntur ii recte locum intellexisse, qui panem vere adustum, ius male conditum fuisse putarent. —

Ut modo; si patinam pede lapsus frangat agaso.

Sed convivoris, uti ducis, ingenium res

Adversae nudare solent, celare secundae.

- 75 Nasidienus ad haec: Tibi di quaecunque preceris
Commoda dent! ita vir bonus es convivaque comis;
Et soleas poscit. Tum in lecto quoque videres
Stridere secreta divisos aure susurros.

Nullos his mallem ludos spectasse; sed illa

- 80 Redde, age, quae deinceps risisti. Vibidius dum
Quaerit de pueris, num sit quoque fracta lagena,
Quod sibi poscenti non dantur pocula, dumque
Ridetur fictis rerum Balatrone secundo,
Nasidiene, redis mutatae frontis, ut arte

- 85 Emendaturus fortunam; deinde secuti
Mazonomo pueri magno discerpta ferentes
Membra gruis sparsi sale multo, non sine farre,
Pinguibus et ficis pastum iecur anseris albae,
Et leporum avulsos, ut multo suavius, armos,

patinam] Ea, in qua muraena apposita erat, haud dubie fracta erat decidentibus aulaeis. Quare si qui servus sinister hoc quoque in convivio patinam fregit, alia est patina, neque ille id facere potuit cum aulaea quae deciderant amoveret, id quod ex verbis *pede lapsus* clarissime patet. Neque credendum est Nasidienum ut numerum ministrorum augeret agasonem i. e. seryum qui iumenta curaret aggregasse. In divite domo quis dubitat quin sat multi fuerint servi qui ad coenam adessent? praesertim cum ii homines qui in divitiis laudem quaerant in aleanda magna familia parci esse non soleant. Quare agasonis nomen positum nobis quidem videtur pro vili et rudi servo, ut apud Persium V, 76; „Hic Dama est non tressis agaso.“ — *soleas poscit*] Qui ad coenam accumbebant soleas sibi demi iuebant; qui surgere volebant soleas poscebant. — *stridere*] Versus totus factus est ad significandum susurrum.

V. 81. *quoque*] nam patina fracta erat. — *secundo*] adiuvante. Epist. II, 1, 102. I, 10, 9. — *Nasidiene*] Fun-

danius ad ridendam gravitatem qua Nasidienus quasi triumphans redit epicorum consuetudine utitur heroas saepe in carminibus alloquentium. Hom. II. IV, 127. — *arte emendaturus*] cf. Ter. Ad. IV, 7, 23: „Illud quod cecidit forte id arte ut corrigas.“ — *Mazonomo*] Est proprie ingens lanx, ex qua *μάζα νέμεται*, puls distribuitur; deinde omnino ingentem patinam significat. — *discerpta membra*] In ipsis cibis quos apponebat Nasidienus nihil videtur magnopere peccatum esse; sed importunum omnes suas res laudandi studium, quo stolide saporem augere tentavit Nasidienus, taedium renovavit convivis, qui, cum aliter sese non possent liberare ab his molestiis, satiati fastidio tandem relictis omnibus deliciis aufugerunt. Nam quod gruis membra sparsa erant sale et farre, quod anser saginatus sucosis ficis muliebris sexus erat, et quae reliqua sunt, ea omnia Nasidienus multis verbis exposuisse et praedicasse putandus est. — *armos*] cf. Sat. II, 4, 44: „Quia lumbi habent aliquid tetri odoris et saporis minus iucundi.“ *Comm. Cruq.* — *edit*]

- 90 Quam si cum lumbis quis edit. Tum pectore adusto
 Vidimus et merulas poni et sine clune palumbes,
 Suaves res, si non causas narraret earum et
 Naturas dominus, quem nos sic fugimus ulti,
 Ut nihil omnino gustaremus, velut illis
 95 Canidia afflasset peior serpentibus Afris.

Epod. 3, 3. — *pectore adusto*] cf. Ter. Ad. III, 3, 71: „Hoc salsum est, hoc adustum est, hoc lautum est parum.“ Merulae igitur apponebantur propter festinationem, qua in iis parandis usi erant coqui, non assae sed vere adustae; praeterea absurdum videtur fuisse palumbes sine clunibus apponere. Apud Gellium certe legimus XV, 8: „Praefecti popinae atque altilium luxuriae negant ullam avem praeter ficedulam totam comesse oportere; ceterarum avium atque altilium nisi tantum opponatur, ut a cluniculis inferiore parte saturi fiant, convivium

putant inopia sordere; superiorem partem avium et altilium qui edunt, eos palatum non habere.“ — *causas et naturas*] Omnia illa edulia, inquit Fundanius, satis bona fuissent, nisi coenae pater iterum docuisset cur quaeque res hac ratione, non alia, parata esset, quem gustum sucumve haberet, similia. — *Canidia*] Epod. 5, 17. Sat. I, 8. — *afflasset*] cum dativo, ut Tibull. II, 1, 80: „Felix cui placidus leniter afflat Amor.“ Virg. Aen. I, 591. Cic. Her. IV, 49: „Si quem reperiat cui aliquid mali faucibus afflare possit. — *Afris*] Carm. III, 10, 18.

Q. HORATHI FLACCI EPISTOLARUM

LIBER PRIMUS.

EPISTOLA I.

Prima dicte mihi, summa dicende Camena,
Spectatum satis et donatum iam rude quaeris,

Epistola I.

Editis tribus carminum libris Horatius magnam sibi nominis gloriam paraverat; ex quo tempore cum plures anni transiissent, quibus Romanae lyrae fidicen nihil ad sustentandam augendamve laudem novi addidisset, unus sane non fuit Maecenas, qui poetam ut laudi suae consulere benevola admonitione incitaret. Sed „tempora mutantur et nos mutamur in illis“ neque quaevis aetas aut quivis animus aptus est ad componenda lyrica carmina, quibus tenerrimos et intimos sensus poetae exprimere solent. Quod quam sit verum Horatius quoque sensit eamque excusationem Maecenatis amicorumque reliquorum voluntati opposuit. Quare olim se lusisse ait adolescentem, iam severis se disciplinis et studiis deditum eam conquirere rerum copiam, unde summam possit capere utilitatem ad vitam sapienter instituendam. Hoc enim se sequi in rebus philosophicis consilium, eandem ob rem uni philosophorum disciplinae se non addictum esse sed undecunque fieri possit optima quaeque et verissima colligere (v. 19). In qua re cum ardentissimo studio et indefesso animo elaboraret, tamen haudquaquam se nescire, non omnibus ad summum ascendere fastigium sapientiae esse concessum;

largissimam verò ibi paratam esse veritatis quasi quandam messem, ut quivis quovis tempore aut consolationem malorum aut perturbationum animi sedationem dum velit possit ibi reperire: in qua quidem animi perturbati sedatione principium cernendum esse sapientiae (v. 41). Stultitiae radices positae esse in pravo de rebus iudicio: quare admirationem et desiderium coercenda esse ad ea quae vere bona sint h. e. ad virtutem (52); quamquam homines aliter ferme iudicare, virtutem divitiis posthabere, et in hominibus non virtutem sed opes admirari. Qui vero recte intelligant, iis summam vitae legem in innocentia esse, optimum consilium in animo a Fortunae incerto favore liberimo (69); eosdem bene docere imperitiae multitudinis opinionem vel voluntatem sequendam non esse, quoniam multiplex illa sit (76—80), incerta et varia ut Proteus (93), tam caeca, ut qui in externis rebus sui negligens sit eum derideat, qui inconstans in petendis fugiendisve rebus, eum ne vituperet quidem. Quare verissimum esse illud Stoicorum; sapientem unum esse regem, unum omnibus vere expetendis rebus exornatum. En habes argumentum epistolae, quam I. Caesar Scalliger, Horatii ille quidem non caecus laudator, sic praedicavit: „Prima epistola quovis melle dulcior est. Sen-

Maecenas, iterum antiquo me includere ludo;
 Non eadem est aetas, non mens. Veianius armis
 5 Herculis ad postem fixis latet abditus agro,
 Ne populum extrema toties exoret arena.
 Est mihi purgatam crebro qui personet aurem:
 Solve senescentem mature sanus equum, ne
 Peccet ad extremum ridendus et ilia ducat.

tentiae appositae, dictio casta, rotunda, suavis. Quapropter arbitror postremam omnium (libri I) factam, primam positam ob luculentam raritatem. De tempore quo scripta sit epistola idem nunc quoque iudicant viri docti. Ne tamen credas Horatium qui olim Stoicorum doctrinam ut insanam sugillaverit laudatis iisdem praeceptis non constantem videri, animadvertite quaeso lepidam illam sententiam, qua epistolae facete et iocose finis ita imponitur, ut quid discriminis faciendum sit inter artem et vitam bene hunc intellexisse videas.

V. 1. *summa Camena*] Significat poeta suam cum Maecenate familiaritatem, dignissimo viro quem semper et praedicaverit et praedicare debeat. In quo loco noli cogitare de certis carminibus; generalis enim sententia est. De voc. *summa* vide ad Carm. III, 28, 13. cf. Virg. Aen. II, 324. Inde Quintil. VI, 4, 22: „Eadem in argumentis ratio est, ut potentissima prima et summa ponantur.“ Ipsa Camena impedit quominus aut satiras aut epistolas intelligamus. cf. Sat. I, 4, 40. II, 6, 17. — *spectatum*] Verbum hoc proprium est de gladiatoribus, quibuscum poeta se suamque laudem comparat. Satis spectati gladiatores a ludi editoribus populo postulante rude donabantur; quod signum erat exauctorationis, si liberi erant, missionis artis gladiatoriae, si servi. Huic igitur missioni opponitur v. 3 *antiquo includere ludo*, qui ludus non est amphitheatrum, quo spectabantur munera, sed ludus lanistae, in cuius parvis cellis gladiatores alebantur. — *Veianius*] „Nomen proprium gladiatoris nobilissimi; iucunde hoc exemplum attulit, quia superius meminit ludi. Comparat autem se Veiano, qui, cum post multas palmas Herculi consecrasset sua arma, tandem contentus agro suo privatim vixit. Cuius exemplo propter

aetatem et institutum vitae dicit relictis iocis et lyricis versibus se velle transire ad philosophiae studium.“ *Comm. Cruq.* — *toties*] quoties audeat in arenam denuo descendere et cum iunioribus et validioribus vires componere. cf. Sat. II, 7, 70. Laesi enim gladiatores arma submittebant; quo facto a nutu populi mors eorum pendebat aut salus. Qui saucio favebant premebant pollicem, qui necari eum volebant retro vertebant pollicem et subrigeabant. Iuven. 3, 36: „Munera nunc edunt et verso pollice vulgi Quemlibet occidunt populariter.“ Hor. Epist. I, 18, 66. Hic igitur Veianius ne partem sibi laudem perdat nullo ne maximo quidem auctoramento induci potuit, ut denuo in certamen prodiret novamque palmam reportare tentaret. Saepe enim factum est, ut qui iam missi essent gladiatores rudiarii ad singula certamina ab munus editoribus magno auctoramento revocarentur. Suet. Tib. 7: „Munus gladiatorium dedit, rudiariis quoque quibusdam revocatis auctoramento centenum millium.“ — *purgatam*] Pers. V, 96: „Stat contra ratio et secretam gannit in aurem.“ Purgabant medici antiqui aures sordibus dolentes infuso aceto. Iam quae purgatae sunt aures facilius accipiunt allatos sonos et voces, ut ipsi homines iis facilius obtemperent neque quae benevole monita sunt spernant, tanquam surdi qui nihil omnino audiverint. — *personet*] active ut Virg. Aen. VI, 418.

V. 8. *solve senescentem*] Eandem rem nova illustrat imagine, sumpta ea quidem a nobili equo, qui saepe ἀεθλοφόρος ne senescens quidem cum iunioribus certamen detrectat sed intentis quamvis omnibus viribus tamen vincitur et ridetur. — *peccet*] vincatur, eo quo velit non perveniat. Stat. Theb. VIII, 688: „Cuspis in armigerum Phle-

- 10 Nunc itaque et versus et cetera ludicra pono,
 Quid verum atque decens curo et rogo et omnis in hoc sum;
 Condo et compono quae mox depromere possim.
 Ac ne forte roges, quo me duce, quo Lare tuter:
 Nullius addictus iurare in verba magistri,
 15 Quo me cunque rapit tempestas, deferor hospes;
 Nunc agilis fio et mersor civilibus undis
 Virtutis verae custos rigidusque satelles,
 Nunc in Aristippi furtim praecepta relabor
 Et mihi res, non me rebus subiungere conor.
 20 Ut nox longa quibus mentitur amica, diesque

gyam peccavit.“ — *ilia ducat*] non lumbos trahere, sed multo labore anhelitum ducere, qua re senilis infirmitas proditur. Virg. Georg. III, 506. — *itaque*] De positura particulae Hand. Turs. III, p. 509: „Livii tempore primaria significatione obliterata et particula pro *igitur* accepta scriptores haud contemnendi eam secundo loco vel tertio ponere consueverunt.“ — *versus*] Haud dubie intelligenda sunt lyrica carmina a quibus se abstinere proficitur poeta; epistolas enim, tunc ipsum totum librum editurus, significare non potuit. cf. Epist. II, 1, 111. II, 2, 54 sqq. 141 sqq. I, 7, 27. I, 14, 36. Carm. III, 26, 4; ex quibus locis videbis quae cetera ludicra dixerit. — *curo et rogo*] meditando et alios, maxime libros, consulendo. — *omnis*] Sat. I, 9, 2. — *compono*] Quae collegi quasi in cella vel horreo condo et similia similibus compono, ut cum opus sit facile possim depromere. — *quo Lare tuter*] Metaphoram intelliges ex Carm. I, 29, 14. De ratione transeundi cf. Epist. II, 1, 208; praeterea notanda est breviloquentia in addenda apodosi et Graecis et Romanis valde usitata; vide ad Sat. II, 1, 82. Haec autem libertas, quam in philosophia quoque sibi servavit Horatius, cum satis nota esse debuerit Maecenati, ad hunc solum noli referre alteram verbi personam *roges*, sed quemcunque lectorem intelligas. — *addictus*] Verbum hoc proprium de iis, qui edicto praetoris ob aes alienum creditoribus quasi in servitutem dabantur, translatus est ad gladiatores (Sat. II, 7, 58) ab iis-

que ad philosophos h. l. ductum. Dicit autem poeta nihil aliud nisi hoc: „nunc Stoicos lego, cum iisque agendi cupidis (*agilis*) *πρακτικός* sum philosophus et *πολιτεύομαι* videoque quid illi severi verae virtutis comites et satellites de rebus publicis praescribant, ut singuli homines universae salutis quam optime inserviant, nunc nescio quo modo (*furtim*) deferor ad Cyrenaios (*ἡδονικούς*) cum iisque mediator de otiosa et beata vita, spreto rerum et hominum imperio paranda.“ Epist. I, 17, 23. Sat. II, 3, 100. De Stoicis cf. Cic. de Fin. III, 20, 67: „Praeclare enim Chrysippus cetera nata esse hominum causa et deorum; eos autem communitatis et societatis suae; quoniamque ea natura esset hominis, ut ei cum genere humano quasi civile ius intercederet, qui id conservaret eum iustum, qui migraret iniustum fore.“ — *deferor*] Constat in imagine, in quam vocabulo *tempestas* incidit. Navigantium enim hoc verbum est. — *mersor*] Nihil causae est cur hoc verbum a Porphyryone optimisque omnibus codicibus firmatum cedat alteri *versor* nullius prope auctoritatis. Et cf. Corn. Nep. Att. 6, 1. — *rigidus*] Sat. II, 1, 70. Lucan. II, 389: „(Cato) Iustitiae cultor, rigidi servator honesti.“ De Aristippo vide Ciceronem Tusc. II, 6, 15. de Fin. II, 11, 34: „His omnibus quos dixi consequentes sunt fines bonorum: Aristippo simplex voluptas, Stoicis consentire naturae, quod esse volunt e virtute, id est, honeste vivere.“

V. 21. *opus debentibus*] mercenariis,

- Longa videtur opus debentibus, ut piger annus
 Pupillis, quos dura premit custodia matrum;
 Sic mihi tarda fluunt ingrataque tempora, quae spem
 Consiliumque morantur agendi gnaviter id, quod
 25 Aequae pauperibus prodest, locupletibus aequae,
 Aequae neglectum pueris senibusque nocebit.
 Restat, ut his ego me ipse regam solerque elementis.
 Non possis oculo quantum contendere Lynceus:
 Non tamen idcirco contemnas lippus inungi;
 30 Nec quia desperes invicti membra Glyconis,
 Nodosa corpus nolis prohibere cheragra.
 Est quadam prodire tenus, si non datur ultra.
 Fervet avaritia miseroque cupidine pectus:
 Sunt verba et voces, quibus hunc lenire dolorem
 35 Possis et magnam morbi deponere partem.

servis, ancillis. — *custodia*] non tutela. Dig. XXVI, 1, 18: „Feminae tutores dari non possunt, quia id munus masculinum est.“ Cod. lib. V. Tit. XLIX, 1: „*Educatio* pupillorum tuorum nulli magis quam matri eorum, si non vitricum iis induxerit, committenda est.“ — *tempora*] De plurali compara Epist. II, 1, 4. Ovid. Met. VIII, 2. Cic. pro Arch. 6, 13. — *pauperibus*] Similiter Diogenes apud Diog. Laert. 6, 68: „Τὴν παιδείαν εἶπε μὲν νέοις σωφροσύνην, τοῖς δὲ πρεσβυτέροις παραμυθίαν, τοῖς δὲ πλούτοις πλοῦτον, τοῖς δὲ πλουτοῖς κόσμον εἶναι.“ — *elementis*] Sententia ita cum praecedentibus coniungenda videtur, ut causam ipsa prodat cur poetae omne tempus quod non consumpserit in vera doctrina perditum videatur. „Nam, inquit, meum nunc est his quae colligo philosophiae initiis (*elementis*) meam vitam regere et moderari.“ Aliena enim negotia non curat ut Damasippus (Sat. II, 3) neque ab alijs se regi patitur: — *Lynceus*] Sat. I, 2, 90. De omnia quam dicunt particula *si*, ne nobis quidem Germanis necessaria, cf. infra 33. 87. Epist. I, 6, 31. Sat. I, 1, 45. — *oculo contendere*] Sic optimi codices, recte. Pauci codices *oculos*. De constructione compara Cic. pro Ligar. 3, 6. — *in-*

ungi] vide ad Sat. I, 5, 30. De re compara Arrian. Epict. 1, 2: „οὐδὲ γὰρ Μίλων ἔσομαι, καὶ ὅμως οὐκ ἀμελῶ τοῦ σώματος, οὐδὲ Κροῖσος, καὶ ὅμως οὐκ ἀμελῶ τῆς κτήσεως.“ — *Glyconis*] Hic qui fuerit, primus Lessingius (Vermischte Schrift. I. p. 325) ostendit ex Anthol. graeca (Brunck. Analect. T. II. p. 126. n. LXVIII): „Γλύκων, τὸ Περγαμηνὸν Ἀσίδι κλέος, Ὁ παμμαχῶν κεραννός, ὁ πλατὺς πόδας, Ὁ καινὸς ἄτλας κτλ. — *cheragra*] Sat. II, 7, 15. — *tenus*] Similis tmesis apud Ovidium Met. V, 642: „Hac Arethusa tenus. — *avaritia*] „Notatu dignum est poetam, ubicunque mores suae aetatis perstringit, avaro primas tribuere partes ad eumque ire redireque. cf. Sat. I, 4, 26. II, 3, 82 sqq. I, 1, 28 sqq. Epist. II, 1, 119. II, 2, 148 sqq.“ *Obbarius*. — *verba et voces*] Probabilis eorum opinio est qui *verba* ad cantiones, carmina magica, formulas magicas quibus corporum morbis medebantur antiqui, *voces* ad cantus vel vocis humanae vel tibiarum nervorumque (Epist. I, 2, 23. A. P. 216) referunt; nam symphoniae quoque ad leniendos dolores adhibebantur. Gell. IV, 13: „Proditum est, ischiaci cum maxime doleant, tum si modulis lenibus tibicen incinat, minui dolores.“ cf. Plat. Charm. p. 155. E.

- Laudis amore tumes: sunt certa piacula, quae te
 Ter pure lecto poterunt recreare libello.
 Invidus, iracundus, iners, vinosus, amator,
 Nemo adeo ferus est, ut non mitescere possit,
 40 Si modo culturae patientem commodet aurem.
 Virtus est vitium fugere et sapientia prima
 Stultitia caruisse. Vides, quae maxima credis
 Esse mala, exiguum censum turpemque repulsam,
 Quanto devites animi capitisque labore;
 45 Impiger extremos curris mercator ad Indos,
 Per mare pauperiem fugiens, per saxa, per ignes:
 Ne cures ea, quae stulte miraris et optas,
 Discere et audire et meliori credere non vis?
 Quis circum pagos et circum compita pugnam
 50 Magna coronari contemnat Olympia, cui spes,
 Cui sit condicio dulcis sine pulvere palmae?
 Vilius argentum est auro, virtutibus aurum.
 O cives, cives, quaerenda pecunia primum est,

157. A. Eurip. Hippol. 478: „Εἰσὶν δ' ἐπ' αὐτῷ καὶ λόγοι θελητήριον.“ — *tumes*] Sat. II, 3, 213. Epist. II, 1, 177. „Ambitioni secundus post avaritiam locus tribuitur. Sat. I, 4, 26. II, 2, 187. Epist. II, 2, 205 sq.“ *Obbarius*. — *ter*] vide ad Carm. I, 28, 36. Sat. II, 1, 7. Iungendum autem *ter lecto*. — *libello*] expiationum ritus et formulas continenti. — *culturae*] Lege Cic. Tusc. II, 5, 13. et cf. Epist. I, 14, 4. Sat. I, 3, 37. — *sapientia prima*] Adi. *prima* coniunge etiam cum voc. *virtus*. cf. Epist. I, 6, 17. Sat. I, 3, 129. — *caruisse*] vide ad Carm. I, 1, 4.

V. 42. *vides*] Idem genus apostrophes quod supra v. 13; nihil prorsus ad Maecenatem unum referendum est. sed ad omnes homines. — *per saxa*] quae gravissimorum periculorum exempla sunt. Carm. IV, 14, 24. Sat. I, 1, 38. II, 3, 56. Neque rarius mercator exemplum est hominis lucri studiosi. cf. Carm. I, 1, 18. III, 1, 25. 26. III, 24, 40 sqq. Sat. I, 1, 39. I, 4, 29. — *ne cures*] non vis discere cet., ut desinas curare? *Ne part. po-*

sita est pro *ut non*. vide A. P. 152. Ceterum cf. Epist. I, 8, 8. I, 6, 1. — *circum pagos*] Exemplo docetur, neminem, qui magnum possit sibi parare praemium, parvo contentum fore: maximum autem esse virtutem. Petatum est illud exemplum a pugilibus catervariis et circumforaneis lanistis, qui arte sua et robore paganum et oppidanum popellum delectabant. — *Olympia coronari*] στεφανοῦσθαι Ὀλύμπια. Sic Ennius apud Ciceronem de senect. 5: „vicit Olympia.“ Magna autem appellantur Olympia et ornandi causa et „quia in pluribus Graeciae locis certamina sacra sub Olympiorum nomine celebrabantur et vv. *Olympia magna* differentia eorum ab illis, quae minus celebra erant, ab Horatio indicatur.“ *Iacob*. Quaest. Ep. p. 35. — *sine pulvere*] Cum quo nemo decertare audeat, is palmam tulit ἀκοντι καὶ ἀμαχῇ; id quod Olympiae Herculi primo contigisse narratur. In qua re haec inesse videtur sententia, eum qui vere sese ipse corrigere, virtuti studere audeat, si non facilem certam tamen victoriam esse reportaturum, de qua non

Virtus post nummos! haec Ianus summus ab imo
 55 Prodocet, haec recinunt iuvenes dictata senesque
 Laevo suspensi loculos tabulamque lacerto.
 Est animus tibi, sunt mores et lingua fidesque,
 Sed quadringentis sex septem milia desunt:
 Plebs eris. At pueri ludentes, Rex eris, aiunt,
 60 Si recte facies. Hic murus aëneus esto:
 Nil conscire sibi, nulla pallescere culpa.
 Roscia, dic sodes, melior lex an puerorum est
 Nenia, quae regnum recte facientibus offert,
 Et maribus Curiis et decantata Camillis?
 65 Isne tibi melius suadet, qui rem facias, rem,
 Si possis, recte, si non, quocunque modo rem,

ut de externis bonis cum aliis competitoribus decertandum sit. — *Ianus*] vide ad Sat. II, 3, 18. Ianus quasi magistri vice fungitur, inde vocabula propria *prodocet, recinunt, dictata*. *Prodocet*, docendo praeit, *προδιδάσκει*. Soph. Ai. 163. Vide ad Carm. I, 5, 8. — *laevo*] Idem versus Sat. I, 6, 74, de qua eiusdem versus repetitione, cum molesta aliis videretur, bene sic disputavit Orellius: „Versus illius bene tornati fortuito ei venit in mentem, quo aliquando centurionum Venusiorum filios, aequales suos, in Flavii ludum cum irent, nullis capsariis iis loculos (librorum chartaeque stilique repositoria) portantibus, sed ipsos haec puerilis disciplinae instrumenta gestantes, festive descripserat. Iam cum haec imago senum ac iuvenum ad Ianum medium velut in schola falsae sapientiae dictata magistro reddentium ei ante oculos versaretur, statim vidit nova hac et callida iunctura imaginem illam ita absolvi, nihil ut festivius magisve ridiculum excogitari posset.“ Nihil igitur est quod cives ipsos tabulam calculatorem et loculos nummis refertos brachiis gestantes hoc loco videre nos cogat; talia servi portabant. Similiter versus suos repetit Horatius Sat. I, 2, 13 et A. P. 421. Sat. I, 2, 27 et I, 4, 92. Sat. II, 3, 163 et Epist. I, 6, 28. Epist. I, 14, 34 et Epist. I, 18, 91. Carm. I, 19, 1 et IV, 1, 5. — *Est animus*] Hunc versusum ordinem nos quoque rectum habere

mus; alii cum codicibus contrarium praetulerunt sed servata particula *si* pro *sed*. In nostro ordine difficultatis nihil, vigoris multum inest: „habes quidem quaecunque hominem ornare possunt virtutes, ingenium, innocentiam, facundiam, incorruptam fidem (Carm. II, 18, 9), sed desunt tibi magnae divitiae; et contemneris.“ — *quadringentis*] census equester; ad nostram rationem 38198 flor. Rhen.

V. 59. *pueri ludentes*] Multo rectius pueri in ludendo viros imitantes et regna et imperia distribuentes non eum regem creant sibi praeesse volunt qui ditissimus est, sed quem iustissimum fore sperant. Neque de certo quodam puerorum ludo cogitandum esse arbitror; nimirum plures haud dubie erant ludi, in quibus qui lites dirimeret, praemia distribueret, ordinem restitueret magistratu aliquo opus erat. Hunc igitur creantes pueri canebant (*nenia*; vide ad Carm. II, 1, 38) teste Porphyryone: „Rex erit qui recte faciet; qui non faciet non erit.“ — *nil conscire*] idem quod recte facere: quam sententiam ut murum aëneum pravis cupiditatibus opponi vult poeta. — *Roscia*] vide ad Epod. 4, 16. Ex insequenti versu noli efficere, priscos homines idem cecinisse, sed idem sibi persuasisse. *Decantare* enim est semper repetere, in ore habere. Cic. de orat. II, 32, 140: „Ut causas omnes diligentes et memores et sobrii oratores percursas animo et prope dicam

- Ut propius spectes lacrimosa poëmata Pupi;
 An qui Fortunae te responsare superbae
 Liberum et erectum praesens hortatur et aptat?
 70 Quodsi me populus Romanus forte roget, cur
 Non ut porticibus sic iudiciis fruar isdem,
 Nec sequar aut fugiam quae diligit ipse vel odit;
 Olim quod vulpes aegroto cauta leoni
 Respondit, referam: Quia me vestigia terrent,
 75 Omnia te adversum spectantia, nulla retrorsum.
 Belua multorum es capitem: nam quid sequar aut quem?
 Pars hominum gestit conducere publica; sunt qui
 Crustis et pomis viduas venentur avaras
 Excipiantque senes, quos in vivaria mittant;
 80 Multis occulto crescit res fenore. Verum
 Esto aliis alios rebus studiisque teneri:
 Idem eadem possunt horam durare probantes?
 Nullus in orbe sinus Baiis praelucet amoenis,
 Si dixit dives, lacus et mare sentit amorem

decantatas habere debeant. — *propius spectes*] sedeas eques in quattuordecim ordinibus. Simul perstringitur praetereundo Pupius, tragoediarum flebilium scriptor. Is hunc sibi titulum fecisse traditur: „Flebunt amici et bene noti mortem meam: Nam populus in me vivo lacrimatu'st satis.“ — *responsare*] Sat. II, 7, 85. — *aptat*] cum infinitivo pro *aptat ad responsandum*; constructio durior quidem est, sed mitigatur interposito v. *hortatur*. Et sic optimi codd., alii *optat*. — *liberum*] cf. Epist. I, 16, 63 sqq. — *iudiciis fruar*] In fruendo delectationis vis inest; quare satis aptum hoc verbum est et porticibus et iudiciis. Sil. Ital. XII, 566: „Fruiturque timore paventum.“ Quae intelligenda sint iudicia proximus ostendit versus. — *aut fugiam*] Sic optimi ut videtur codices, quae lectio ideo est alteri *et fugiam* praeferenda, quod bene respondet insequentibus vv. *diligit vel odit*. — *vulpes*] Eodem apologo Aesopico usus erat Plato Alcib. I. c. 39. p. 123. A., deinde Lucilius, cuius hoc fragmentum restat: „Leonem aegrotum ac lassum

.... Deductum tunc voce leo: Cur tu ipsa venire Non vis huc? Quid sibi vult? quare fit, ut introversus et ad te Spectent atque ferant vestigia se omnia prorsus?“ Dicit autem ille apologus hoc: periculosum esse vestigia sequi eorum qui eo pervenerint unde redire non liceat. — *publica*] Describuntur et publicani et ii „quis facile est aedem conducere, flumina, portus, Siccandam eluviam, portandum ad busta cadaver.“ Iuven. III, 31 sq. — *viduas venentur*] Sunt hereditariae, de quibus Sat. II, 5. De ipsis vocabulis cf. Carm. III, 12, 12. Sat. I, 1, 25. II, 5, 44. Ceterum viduae omnes etiam nominantur in nuptae mulieres ut apud Livium I, 46, 7. — *esto*] Ad probandam suam sententiam v. 76 poeta augeat rem: „non solum diversa sunt studia hominum, ut alius aliud sequatur, sed ne iidem quidem in eadem re sibi constant, nunc hoc nunc illud petentes.“ — *horam*] Sat. II, 7, 112. Et cf. Terent. Ad. IV, 2, 15: „Non herele hic quidem durare quisquam, si sic fit, potest.“ Propt. I, 6, 11: „His ego non *horam* possum durare querelis.“ — *lacus*] Lucr-

- 85 Festinantis heri; cui si vitiosa libido
 Fecerit auspicium, Cras ferramenta Teanum
 Tolletis, fabri. Lectus genialis in aula est:
 Nil ait esse prius, melius nil caelibe vita;
 Si non est, iurat bene solis esse maritis.
- 90 Quo teneam vultus mutantem Protea nodo?
 Quid pauper? Ride: mutat coenacula, lectos,
 Balnea, tonsores, conducto navigio aequae
 Nauseat ac locuples, quem ducit priva triremis.
 Si curatus inaequali tonsore capillos
- 95 Occurri, rides; si forte subucula pexae
 Trita subest tunicae vel si toga dissidet impar,
 Rides: quid, mea cum pugnat sententia secum,
 Quod petiit spernit, repetit quod nuper omisit,
 Aestuat et vitae disconvenit ordine toto,
- 100 Diruit, aedificat, mutat quadrata rotundis?
 Insanire putas sollemnia me neque rides,

nus prope Baias. cf. Carm. III, 1, 33. II, 15, 1. II, 18, 20. — *vitiosa*] Cic. Tusc. IV, 13, 29. — *fecerit auspicium*] tanquam avis signum dederit mutandae voluntatis. cf. Liv. I, 34. Compara Virgil. Aen. IX, 185: „An sua cuique deus fit dira cupido.“

V. 87. *in aula*] in atrio. De eodem homine haec dicta sunt, qui si uxorem habet caelibum vitam praedicat; si non habet, maritorum. — *bene esse*] vide ad Carm. III, 16, 43. — *Protea*] Sat. II, 3, 71. Plat. Euthyphr. p. 15. D.: „ὅν αἰσχροῦς εἰ ὅσπερ ὁ Πρωτέως, πρὶν ἂν εἴπῃς.“ — *pauper*] Ne pauperes quidem sibi constantes esse ait, qui cum in magnis rebus voluntatem non possint mutare, in parvis id facere ridicule quaerant. — *nauseat*] Divites cum fastidium terram, mare petunt sua navi; eos ut imitentur pauperes, conducunt navem, idem sibi paraturi quod illis contingit, nauseam. In quo loco non negabo languoris significationem simul inesse, sed nauseam proprie dictam omnino relegare per totam loci naturam non licebit. Cic. N. D. I, 30, 84: „Confiteri potius nescire quod nescires quam ista effluentem nauseare atque ipsum sibi

displicere.“ — *tonsore*] vide ad Carm. I, 6, 2. Ad ipsum Maecenatem convertitur ad finem pergens poeta. Delicatus fuit in his rebus ac mollis Maecenas „vir, ubi res vigiliam exigeret, sane exsomnis, providens atque agendi sciens; simul vero aliquid ex negotio remitti posset, otio ac mollitiis paene ultra feminam fluens.“ Vell. Pat. II, 88. — *subucula*] tunica interior lineae vel byssina. Varro ap. Non. p. 542: „Posteaquam binas tunicas habere coeperunt, instituerunt vocare *subuculam* (virorum) et *indusium* (feminarum).“ — *dissidet*] Contrarium est apud Quintilianum XI, 3, 141: „super quod ora ex toga duplex *aequaliter* sedeat.“ Absurdum est omnia haec in corporis habitu et animi voluntate vitia ad Horatium vel ad certum hominem referre. Fuerit Horatius in corporis cultu paulo negligentior, aedificandi tamen insaniam nunquam neque est agitated neque potuit agitari. Quapropter noli de eo cogitare quod est Sat. II, 3, 308. — *disconvenit*] rarissimum vocabulum, bis apud Horatium, cf. Epist. I, 14, 18, semel apud Lactantium. — *insanire*] Sat. II, 3, 63. De sententia lege Sat. II, 3, 120.

Nec medici credis nec curatoris egere
 A praetore dati, rerum tutela mearum
 Cum sis et prave sectum stomacheris ob unguem
 105 De te pendentis, te respicientis amici.

Ad summam: sapiens uno minor est Iove, dives,
 Liber, honoratus, pulcher, rex denique regum,
 Praecipue sanus, nisi cum pituita molesta est.

EPISTOLA II.

Troiani belli scriptorem, maxime Lolli,
 Dum tu declamas Romae, Praeneste relegi,

— *curatoris*] cf. Sat. II, 3, 218. — *tutela*] vide ad Carm. I, 1, 2. Sic Ovidius Trist. V, 14, 25 de coniuge „rerum sola est tutela mearum.“ — *pendentis*] „cuius salus cum tua salute artissimo vinculo coniuncta est.“ Cf. Cic. ad Fam. VI, 22: „incolumitati tuae tuorumque, qui *ex te pendent*, consulas.“ Sil. Ital. XIII, 504: „de- que tuis *pendentia* Dardana fatis. — *respicientis*] Liv. XLVI, 8: „praesidia quae *respicerent* in re trepida.“ XXVII, 12: „nec quid fidum *respiceret* habenti.“ Caes. b. c. I, 1, 1. — *Ad summam*] Kirchner ad Sat. p. 201: „Kein Dichter hat die schwere Kunst gut zu schliessen so wie unser Horaz verstanden, der immer neu und geistreich überall befriedigt und namentlich in den Satiren und Episteln häufig durch einen überraschenden Scherz am Schlusse den heitersten Eindruck beim Leser zurücklässt; m. vgl. Sat. I, 2, 3. 4. 7. 10. II, 3, 7. Epist. I, 1. 4. 5. 17. 18 u. s. f.“ cf. Cic. de off. I, 41. — *pituita*] „Grata dilogia inest in v. *sanus*, quod cum h. l. usurpetur de corpore, tamen vix aliter fieri potest quam ut simul referamus ad Stoicorum usum loquendi, qui sapientem suum unice sanum, ceteros mortales insanos et stultos vocitabant. Sed fugit adhuc interpretes mihi notos etiam *pituitam* (h. l. trisyll.) e Stoicorum scholis petitam esse: obiciebant enim sibi met ipsi hoc incommodum interdum ob stare videri perfectae beatitudini; eo scilicet consilio, ut facili opera talem obiectionem confutarent.“ Orellius.

Arrian. Epict. I, 6. p. 36: „Ναί (ἐπέ-
 τυχον εὐδαμονίας) ἀλλ' αἱ μὲν
 μου ξείνοι. Τίνος οὖν ἐνεκα χείρας
 ἔχεις, ἀνδράποδον; οὐχ ἵνα καὶ ἀπο-
 μύσσης σκάντον;“

Epistola II.

Data haec est epistola ad Lollium adolescentem, filium natu maximum M. Lollii, quem Horatius praedicavit Carm. IV, 9; ad eundem iuvenem huius libri decima octava est. Qui cum a. 729 puer in Hispania Augusto duce militasset (Epist. I, 18, 55), Romam reversus eloquentiae laude et prudentia civili viam sibi ad maiores in republica honores munire videtur studuisse. Sic enim intelligenda est illa declamatio, qua Romae occupatum Lollium fuisse dicit huius epistolae v. 2. Cf. Cic. de Fin. V, 2, 5. „Ad flumen aiunt declamare solitum Demosthenem, ut fremitum assuesceret voce vincere.“ Iam cum epistola XVIII ex aperto indicio v. 56 anno scripta sit 734, hanc alteram, quae tempore illam praecedere videatur, annis 730—734 attribuendam esse probabile est; accuratius annum natalem vix possis definire. Obbario videtur scripta esse anno 727, cum Lollius vitae annum ageret decimum sextum vel septimum. Horatius cum Lolliis, ut ex tribus carminibus ad eos datis non temere nobis videtur concludere, intima videtur fuisse familiaritate coniunctus; quare ne amici filio, bonae fortasse spei adolescenti, deesset, absens et in Praenestino agro rusticans hac epistola iuveni

Qui quid sit pulchrum, quid turpe, quid utile, quid non,
Planius ac melius Chrysippo et Crantore dicit.

5 Cur ita crediderim, nisi quid te detinet, audi.

Fabula, qua Paridis propter narratur amorem
Graecia barbariae lento collisa duello,

Stultorum regum et populorum continet aestus.

Antenor censet belli praecidere causam:

10 Quid Paris? ut salvus regnet vivatque beatus,

Cogi posse negat. Nestor componere lites

Inter Peliden festinat et inter Atriden:

praecepit, cui maxime rei praeter exercitationes dicendi operam dare deberet. Saluberrimis enim consiliis egregiisque praeceptis viam quasi ei monstrat et rationem, qua ad vere beatam vitam, ad veros honores, ad vera gaudia certissime possit pervenire. Iam cum ipse in solitudine rustica litteris vacare et poetas legere soleret (Sat. II, 3, 11), scite doctrinam coniungit cum lectione Homeri, quem certiore et aptiorem ducem ad rectam intelligentiam praecipue adolescentibus esse ostendit quam maximos optimorum philosophorum libros. Epistolarum rationem et naturam bene conservatam videbis; praecepta enim non certo ordine, non praevia quadam meditatione dantur, sed ita ut ex benevoli animi abundante copia sua quasi sponte fluunt; versus simplices sunt et faciles, ironia rara et lenis.

V. 2. *Praeneste*] Flor. I, 11, 7: „Aestivae Praeneste deliciae,“ hodie Palestrina. cf. Carm. III, 4, 23. De particula *dum* cum praesente ad indicandam praeteritam rem *Hand. Turs.* T. II. p. 306: „In re praeterita, inquit, narranda et de re futura, ubi non totus rerum cursus sed aliqua eius pars intelligitur, ab optimo quoque scriptore ponitur praesens. Praesens enim aut historicum est aut imaginem rei ita adumbrat, ut quae coniuncta fuisse mente cogitemus ante oculos ponantur consociata praesentia. Igitur quae hoc modo dicuntur, imaginem exhibent in se conclusam, atque eiusmodi enuntiatio instar est unius substantivi quo tempus indicetur: sicuti apud Livium verba *dum in Asia bellum geritur* exprimunt *tempore* belli.“ cf.

Carm. I, 22, 10. III, 11, 23. Epist. I, 19, 16. II, 1, 7. A. P. 465. Sat. I, 5, 72. — *planius*] Codicum auctoritas divisa est inter *planius* et *plenius*; verum praeterquam quod scholiastas tres *planius* legisse docent scholia: *manifestius*, *apertius*, hoc Horatio dicendum fuisse nobis videtur, omnem de moribus et vita doctrinam multo facilius ex exemplis Homericis intelligi posse praesertim ab adolescentibus, quam ex spinosis libris philosophorum. *Plenius* haud dubie philosophus de his rebus agit, *planius* poeta. Chrysippus Stoicus, Crantor Academicus (Cic. Tusc. III, 6. II, 44), uterque Solensis Xenoph. Symp. 4, 6: „Ὁ Ὀμηρος ὁ σοφώτατος πεποίηκε σχεδὸν περὶ πάντων τῶν ἀνθρώπων.“ — *detinet*] In bonis codicibus, etiam Blandiniis, legitur etiam *distinet*. Illud h. l. rectius habeo, non quo cum aliis putem *detineri* aliquem volentem et illecebris captum, *distineri* eos qui gravi atque ingrato negotio quasi inviti occupentur (quod discrimen exemplorum auctoritate non comprobatur video), sed quia in *detinendo* maior est notio remoti loci, sive corpus sive animum respici, in *distinendo* valet significatio seiunctionis, quam vides ab hoc loco alienam esse. Carm. I, 33, 14. IV, 5, 12. Virg. Aen. II, 788. Caes. B. G. III. 12 fin. — *barbariae*] cfr. Ennianus versus ap. Cic. Tusc. I, 35, 85. Virg. Aen. II, 504. — *aestus*] cf. Sat. I, 2, 110. Virg. Cir. 340. Ceterum in codd. Bland. aliisque bonis libris reperitur *aestum*. — *Antenor*] Hom. II. VII, 348. Liv. I, 1. — *inter Peliden*] De bis collocata praepositione vide ad Sat. I, 7, 12.

Hunc amor, ira quidem communiter urit utrumque.
Quidquid delirant reges, plectuntur Achivi.

15 Seditione, dolis, scelere atque libidine et ira
Iliacos intra muros peccatur et extra.

Rursus, quid virtus et quid sapientia possit,
Utile proposuit nobis exemplar Ulixen,

Qui domitor Troiae multorum providus urbes

20 Et mores hominum inspexit, latumque per aequor,
Dum sibi, dum sociis reditum parat, aspera multa
Pertulit, adversis rerum immersabilis undis.

Sirenum voces et Circae pocula nosti;

Quae si cum sociis stultus cupidusque bibisset,

25 Sub domina meretrice fuisset turpis et excors,
Vixisset canis immundus vel amica luto sus.

Nos numerus sumus et fruges consumere nati,

Sponsi Penelopae, nebulones, Alcinoique

In cute curanda plus aequo operata iuventus,

V. 13. *hunc*] Agamemnonem. cf. Hom. II. I, 113. — *urit*] Sat. I, 9, 66. — *plectuntur Achivi*] Respicit poeta omnia ea mala, quae dum Achilles iratus pugnam detrectat, fortitudine Hectoris in Graecos redundarunt, non sola pestilentia ab Apolline in castra Graecorum missa, quae quidem iram regum praecessit, non est secuta. In versu insequenti supervacaneum est quaerere, quas seditiones, dolos, scelera indicare poeta voluerit; satis est, quod ita peccatum scimus apud Graecos et apud Troianos. — *rursus*] Iam transitur ad Odysseam, cuius initium libere expressum habemus versibus statim insequentibus. cf. A. P. 141 sq. — *domitor Troiae*] quia equi lingnei exstruendi auctor fuit. — *multorum*] statim post caesuram collocatum hoc vocabulum est propter sonum et rei gravitatem. — *immersabilis*] qui adversis rebus non opprimitur. De metaphora cf. Carm. IV, 4, 65. Quae insequuntur, exempla sunt periculorum, quibus oppositus fuit Ulixes; quamquam non negaverim Sirenum vocibus et Circae poculis intelligendas, non esse per allegoriam illecebras volutatum. cf. Hom. Od. XII, 39 sqq.

155 sqq. X, 136 sqq. 308. Biberat quidem Ulixes, sed non seductus cupiditate et munitus remedio Mercurii. — *turpis*] mutatus in turpem formam canis vel suis. cf. Sat. I, 3, 100. Carm. II, 8, 4. — *excors*] cf. Cic. Tusc. I, 9, 18. — *nos numerus*] Sicuti Ulixes exemplum est sapientis hominis et moderati, ita vulgarium hominum, quales maxima pars esse solemus, imagines ostendit Odyssea in describenda procorum et Phaeacum vita voluptatibus omnino addicta. *Numerus* ut apud Euripidem Heracl. 1000: „Εἰδὼς μὲν οὐκ ἀριθμὸν ἀλλ' ἐτητύμως Ἄνδρ' ὄντα τὸν σὸν παῖδα,“ de hominibus nullius pretii, quorum capita tantum numerantur. Vide Passow. s. v. ἀριθμός. — *nati*] Ovid. Nuc. Eleg. 113: „Sentēs tantūmodo laedere natae,“ cf. Hom. II. VI, 142: „βροτοί, οἱ ἀφούρης καρπὸν ἔδουσιν,“ unde iocose sua sumpsit ac detorsit Horatius. — *nebulones*] Non improbabilis sententia est Ferdinandi Schultzii, Brunsbergensis, qui per litteras amice me monuit, comma, quod in omnibus editionibus post v. *Penelopae* positum sit, delendum esse; eumque secutus essem, nisi unam totius versus caesu-

- 30 Cui pulchrum fuit in medios dormire dies et
Ad strepitum citharae cessatum ducere Curam.
Ut iugulent homines, surgunt de nocte latrones:
Ut te ipsum serves, non expergisceris? Atqui
Si noles sanus, cures hydropicus; et ni
35 Posces ante diem librum cum lumine, si non
Intendes animum studiis et rebus honestis,
Invidia vel amore vigil torquere. Nam cur
Quae laedunt oculos festinas demere; si quid
Est animum, differs curandi tempus in annum?
40 Dimidium facti qui coepit habet: sapere aude;
Incipe. Qui recte vivendi prorogat horam,
Rusticus exspectat dum defluat amnis; at ille
Labitur et labetur in omne volubilis aevum.

ram ita debilitari vidissem. — *cute curanda*] vide ad Carm. III, 17, 14. Sat. II, 5, 38. Iuven. XI, 203: „Nostra bibat vernum curata cuticula solem.“ Ceterum cave ne *Alcinoi* habeas pro nominativo pluralis numeri. De molli Phaeacum vita lege Hom. Od. VIII, 248. — *cessatum ducere*] Haec locutio intelligenda est ex frequentissima in nomine Curae prosopopoeia; nam quotiescunque aliqua cura eos homines agitare coepit, tanquam personam eam citharae blando strepitu *cessatum ducere* i. e. consopiebant. De consopiente vi musicae cf. Carm. III, 1, 20 sq. Mira non paucorum et antiquissimorum codd. scriptura *cessatum ducere somnum* haud dubie ex glossa exorta est, veluti ex ea, quae est apud Comm. Cruq. „ut facilius sopiamur.“ — *ut iugulent*] A luxuriosa vita iuvenum Homericorum sensim transit poeta ad senae aetatis desidiā ac negligentiam, qua seducti homines ad veram salutem sibi conciliandam rectam medicinam mature adhibere cunctantur. Argumento utitur quod vocant a minori ad maius; nam si mali homines, ut opes sibi per vim nefarie colligant, de nocte surgunt, quanto magis nos decet animo ex torpore quo premitur expergefacto vigilare et curare et studere ut summum nobis paremus bonum, *εὐδαιμονίαν*? Exemplis deinde usus est prope Socraticis; etenim ut

homines, qui in corpore curando negligentes fuerunt, cum aegrotant, sero id facere coguntur quod olim contempserunt, ita eos, qui animum ut sanum habeant nihil curarunt, negligentiae poenitet cum animus iam male affectus cupiditatibus agitur. Quod sani facere noluerunt, coacti faciunt aegrotantes. — *hydropicus*] Cels. III, 21: „Hydropicis multum ambulandum, currendum aliquando est.“ cf. Carm. II, 2, 13. — *vigil*] „Si non propter philosophiam vigilaveris, propter invidiam et amorem dormire non poteris.“ *Porphy.* Noli tamen hoc exemplum magis ad Lollium referre quam alterum hydropici. — *Nam cur*] Nam quod de corpore valet, idem de animo; in utroque sanando nihil cunctandum est. — *oculos*] Pluralem praetuli cum antiquissimis codd.; singularis Bentleio cur elegantior visus sit, non intelligo. — *est*] edit, consumit. Hom. II, VI, 202. Cic. Tusc. III, 26, 63. — *in annum*] ex proverbio sumptum. Epist. I, 11, 23.

V. 40. *aude*] ab animo impetra; ut Graecum *τολμᾶν*. Epist. II, 2, 111. Virg. Aen. VIII, 364. — *rusticus*] is idem facit quod rusticus ille, qui cum ad flumen pervenisset quod nunquam ante vidisset, se exspectaturum dixit, dum flumen defluxisset. Nunquam igitur ille ad rectam vitam perveniet. — *argentum*] pecunia, ut Sat. II, 6, 10.

- Quaeritur argentum puerisque beata creandis
 45 Uxor et incultae pacantur vomere silvae.
 Quod satis est cui contingit, nil amplius optet.
 Non domus et fundus, non aeris acervus et auri
 Aegroto domino deduxit corpore febres,
 Non animo curas: valeat possessor oportet,
 50 Si comportatis rebus bene cogitat uti.
 Qui cupit aut metuit, iuvat illum sic domus et res,
 Ut lippum pictae tabulae, fomenta podagram,
 Auriculas citharae collecta sorde dolentes.
 Sincerum est nisi vas, quodcunque infundis acescit.
 55 Sperne voluptates: nocet empta dolore voluptas.
 Semper avarus eget: certum voto pete finem.
 Invidus alterius macrescit rebus opimis:
 Invidia Siculi non invenere tyranni
 Maius tormentum. Qui non moderabitur irae,
 60 Infectum volet esse, dolor quod suaserit et mens,
 Dum poenas odio per vim festinat inulto.
 Ira furor brevis est: animum rege, qui nisi paret,

— *beata*] bene dotata, dives; in quo loco noli praeterire egregiam ironiam quae inest in his *puerisque beata creandis*; nimirum quam leges iubeant suscipiendorum liberorum causa ducere, eam avidi homines divitiarum causa ducunt. Variæ opum colligendarum rationes describuntur. De voc. *beata* cf. Carm. II, 4, 13. Sat. II, 8, 1. — *pacantur*] cf. Virg. Georg. II, 239. Aen. IX, 608. — *deduxit*] ἀφῆκε. — *valeat*] non corpore solum sed etiam animo, et magis animo quam corpore. Nam cuius animus aeger est, is divitiis non magis potest uti ac frui, quam lippus tabulis pictis, podager fomentis, auribus laborans ac paene surdus cithara et cantu. Quae sanum iuvant et delectant, iis non potest recte uti qui ea parte laborat, in qua usus et delectatio maxime sentitur. Idem valet de opibus, quorum rectus usus ad animum est referendus. — *fomenta*] Intelligitur locus, de quo diu dubitatum est, adeo ut coniecturis tentaretur, ex Seneca de provid. 4,

9: „Quem specularia semper ab afflatu vindicarunt, cuius *pedes inter fomenta subinde mutata tepuerunt*, cuius coenationes subditus et parietibus circumfusus calor temperavit, hunc lenis aura non sine periculo stringet.“ id. de vit. beat. 11, 3: „Mollibus lenibusque fomentis totum lacessitur eorum corpus, et ne nares interim cessent, odoribus variis inficitur locus ipse, in quo luxuriae parentatur.“ Quos locos primus ostendit Duentzer. — *sincerum*] Vita nemo recte fruitur, cuius animus corruptus est cupiditatibus; corrumpi autem animum cupiditatibus exemplis ostenditur. — *Siculi tyranni*] ut Phalaris, Agathocles, Dionysii. — *infectum*] Menander p. 247. M.: „Ἀπ᾽ ὅς ὀργίζομενος ἀνθρώπος ποιεῖ, Τὰ ὅς ὅσπερ ὁ λάβῃς ἐν ἡμαρτημένῳ.“ — *dolor quod suaserit*] nimius dolor, quem iracundus cum offenditur sentit. Nam „iram esse cupiditatem doloris reponendi“ ex definitione Aristotelis ait Seneca de ira I, 3, 2. — *mens*] θυμός. Carm. I, 16, 21. — *festinat*]

Imperat: hunc frenis, hunc tu compesce catena.
 Fingit equum tenera docilem cervice, magister
 65 Ire viam qua monstret eques; venaticus ex quo
 Tempore cervinam pellem latravit in aula,
 Militat in silvis catulus. Nunc adbibe puro
 Pectore verba puer, nunc te melioribus offer.
 Quo semel est imbuta recens servabit odorem
 70 Testa diu. Quodsi cessas aut strenuus anteis,
 Nec tardum opperior nec praecedentibus insto.

EPISTOLA III.

Iuli Flore, quibus terrarum militet oris
 Claudius Augusti privignus, scire laboro.

i. e. festinanter exigit; similiter *deproperare* Carm. II, 7, 24. — *tu compesce*) vide ad Carm. I, 9, 16. — *tenera cervice*] Coercendum esse praecipit animum, sed mature, cum vitium nondum inveteravit. — *viam*] Referendus accusativus est ad utrumque verbum, *ire viam* et *viam monstret*. — *latravit*] active, ut Epod. 5, 58. — *adbibe*] Cic. de Fin. III, 2, 9: „combibere artes.“ cf. Carm. II, 13, 32. Propert. III, 6, 8: „Incipe: suspensis auribus ista bibam.“ — *testa*] amphora, cadus. — *quodsi*] vide ad Epist. I, 1, 106. „En habes, inquit poeta, quod tibi praecipiam. Fac uti voles; mea mihi siat voluntas, nam in hac quoque re mediocritatis studiosus sum.“ cf. Epist. I, 6, 15 sq. — *anteis*] cf. Carm. I, 35, 17.

Epistola III.

Tiberius Claudius Nero cum anno 734 ad Tigranem in Armeniae regnum deducendum cum exercitu in orientem ab Augusto mitteretur, ut ipse doctus erat, ita in cohorte comitum non paucos secum duxisse videtur iuvenes, qui litterarum amore capti quid suis ipsi viribus possent efficere saepius tentarent. Ex hoc numero fuit Iulius quidam Florus, satirarum scriptor, si fides habenda est Porphyroni scholiastae, ceterum ignotus. Romae autem cum Horatius summa inter poe-

tas esset auctoritate, nihil mirandum est quod omnes iuvenes, qui in arte poetica elaborarent, eius et familiaritatem quaerebant et iudicium de suis conatibus magni habebant. Atque Horatii tanta fuit cura latinarum litterarum, ut non praesens solum studio optimorum iuvenum adesset sed etiam magno locorum intervallo remotus consilia eorum alere et regere non desineret. Id quomodo hac epistola factum sit ipse videbis. Quod ad Florum potissimum hanc epistolam dedit, aut factum est propter maiorem quam cum hoc iuvene habebat amicitiam (nam secundi quoque libri altera epistola ad eundem scripta est), aut propter similitudines, quas Florus cum amico antea Munatio habuisse ex versu 31 sq. videmus; nimirum ut ad componendas lites inter amicos aliquid ipse afferret. Nam hoc non videtur probabile, quod tentatum video ab elegantibus harum rerum iudicibus, in iis similitudinibus unam quaerendam esse causam cur scripserit poeta epistolam; reliqua addita esse eo potissimum consilio, ut vera causa callide tegeretur.

V. 1. *quibus oris*] Inest in hac formula notio quaedam loci incerti et longinqui; ut Virg. Aen. I, 331. Liv. XXI, 10, 12. — *Augusti privignus*] honoris causa hoc additum putat. cf. Epist. I, 8, 2. Nihil in hac compellatione videndum est ambitionis aut

- Thracane vos Hebrusque nivali compede vinctus
 An freta vicinas inter currentia turres
 5 An pingues Asiae campi collesque morantur?
 Quid studiosa cohors operum struit? hoc quoque curo.
 Quis sibi res gestas Augusti scribere sumit?
 Bella quis et paces longum diffundit in aevum?
 Quid Titius Romana brevi venturus in ora,
 10 Pindarici fontis qui non expalluit haustus,
 Fastidire lacus et rivos ausus apertos?
 Ut valet? ut meminit nostri? fidibusne Latinis
 Thebanos aptare modos studet auspice Musa
 An tragica desaevit et ampullatur in arte?

studii in Tiberium Neronem. — *Thracae*] Ex locorum ordine vides scriptam esse epistolam, cum in Armeniam pergeret exercitus, non cum rediret, quod male alii suspicati sunt. Fecit autem Tiberius hanc expeditionem per Thraciam et Macedoniam, et quidem sub vernum tempus; inde Hebrus glacie tectus. — *turres*] „Herus et Leandri. Inter Seston et Abydon medium est Hellesponti fretum.“ *Porphy.* Ceterum antiquissimus Bland. cum uno alio cod. Cruq. praebet *terras*, quae lectio Benteleio placuit. — *morantur*] amoenitatibus suis vos tenent. Accommodatum igitur verbum ad Asiae campos; unde si necessarium videbitur, facile invenies quod cum Hebro et Hellesponto coniungas aliud generale verbum. — *studiosa*] Hoc adiectivum, quod a Cicerone aliisque bonis scriptoribus non usurpatur nisi addito genitivo, quo vaga illius notio certis limitibus circumscribatur, Augusto imperante certiore significationem nactum est; eadem prorsus ratione qua ipsum verbum studendi. Quintil. XII, 11, 19: „Computamus annos, non quibus studuimus sed quibus viximus.“ Plin. Epist. V, 5, 5: „In lectulo suo compositus in habitu studentis.“ Quintil. X, 3, 32: „iuvēis studiosus aliquin.“ Plin. Epist. VI, 26, 1: „Ipse erat studiosus, litteratus, etiam disertus.“ Idem factum esse in aliis eiusdem generis adiectivis ostendunt hi loci Horatiani Carm. II, 20, 19. I, 28, 18. III, 4, 58. III, 23, 17. Sat. II, 2,

43. Carm. II, 4, 22. Est igitur hic litterata cohors. Cohors autem est quae alias grex appellatur. Epist. I, 9, 13. Sat. I, 7, 23. — *scribere*] cf. Carm. I, 6, 1. — *paces*] Epist. II, 1, 102. Sunt res praeclare in pace gestae. — *in aevum*] Carm. IV, 14, 3. III, 11, 35. — *Titius*] „Titius Septimius lyrica carmina et tragoedias scripsit Augusti tempore, sed libri eius nulli exstant. Huius autem insigne monumentum est „infra Arician.“ *Comm. Cruq.* Suspiciantur fuisse eum filium M. Titii cos. suffecti a. u. c. 723. Recte autem dubitatum est de altero nomine *Septimio*; in gentibus enim vere Romanae originis primis Augusti temporibus non coniungebantur duo nomina gentilicia. Ceterum cave ne Titium credas ab Horatio castigari ob nimiam audaciam et confidentiam; immo vero laudatur Titii animus et additur magna de eius studiis expectatio. — *in ora*] Virg. Aen. XII, 235. Georg. III, 9. Propert. III, 7, 32: „Venies tu quoque in ora virum.“ — *expalluit*] De accusativo cf. Carm. II, 12, 7. III, 27, 28. Constans in imagine faciliora et humiliora poesis genera appellat poeta lacus et rivos apertos, ad quos alii quoque non pauci accedere audent. Lucret. IV, 2: „Iuvat integros accedere fontes Atque haurire.“ — *desaevit*] Virg. Aen. IV, 52. Est ex alto i. e. vehementer saevire. „Refertur ad violentas animi perturbationes a tragicis expressas; *ampullari* autem ut Graecorum *ληρυ-*

- 15 Quid mihi Celsus agit? monitus multumque monendus,
Privatas ut quaerat opes et tangere vitet
Scripta, Palatinus quaecunque recepit Apollo;
Ne si forte suas repetitum venerit olim
Grege avium plumas, moveat cornicula risum
- 20 Furtivis nudata coloribus. Ipse quid audes?
Quae circumvolitas agilis thyma? Non tibi parvum
Ingenium, non incultum est et turpiter hirtum:
Seu linguam causis acuis seu civica iura
Respondere paras seu condis amabile carmen,
- 25 Prima feres hederæ victricis præmia. Quodsi
Frigida curarum fomenta relinquere posses,
Quo te coelestis sapientia duceret, ires.
Hoc opus, hoc studium parvi properemus et ampli,
Si patriæ volumus, si nobis vivere cari.
- 30 Debes hoc etiam rescribere, sit tibi curæ
Quantæ conveniat Munatius. An male sarta

ἄξιον de amplo et magnifico sermonis tragici ornatu.“ Orellius. cf. A. P. 97.

V. 15. *Celsus agit*] cf. Sat. I, 9, 4. Videtur esse Celsus Albinovanus, ad quem est Epist. I, 8. Immerito Celsus in plagiariorum numero habitus est; talem enim hominem Horatius profecto nunquam tulisset. Sed videtur ex iis fuisse, qui cum literas et poesim ament multaue legerint, ipsi tandem aliquid proferre audeant sed vera poetica facultate destituti in sola magnorum exemplorum imitatione haereant. — *Palatinus Apollo*] In cuius templo a. u. 726 ab Augusto condita erat bibliotheca publica. — *grex avium*] cf. fabulam Aesopicam apud Phaedrum I, 3. De libertate monendi bene Obbarius: „Addo, inquit, ego nostra sentiendi ratione utpote hominum saepe bilinguium atque incude aulica politorum non videri metiendos liberos hominum antiquorum simpliciumque mores.“ — *thyma*] Carm. IV, 2, 29. — *turpiter hirtum*] Metaphora ab agris sumpta. De coniuncto cum hoc adiectivo adverbio moneo, ne quis ita in prosa oratione bene dici posse credat; in qua qui accurate scripserunt ausi

non sunt adverbia qualitatis cum adiectivis coniungere. Apud Horatium poetam compara Carm. III, 11, 35. A. P. 3. — *acuis*] ex frequenti eloquentiae cum telis armisque comparatione. Quintil. X, 5, 16: „Ipse ille mucro ingenii quotidiana pugna retundatur necesse est.“ Cic. Brut. 97: „tu in forum veneras unus, qui non linguam modo *acuisse*s exercitatione dicendi cet.“ — *hederæ*] Carm. I, 1, 29. — *frigida fomenta*] Sunt solatia, lenimenta curarum, sed quae, cum inavia sint (frigida), malum augeant potius quam minuant. Intelligenda sunt gloria, honores. — *coelestis sapientia*] Cic. Tusc. V, 4, 10. — *ampli*] cf. Epist. I, 1, 25. — *rescribere, sit*] Sic nunc scripsi cum omnibus prope codicibus; etenim v. *sit* omissa particula interrogativa positum est, ut Epist. I, 16, 1 sq. Sat. I, 4, 63, nec verum est, quod Bentleius affirmavit, posita hac lectione sequentia (*coit, rescinditur*) fore vitiosa; transit enim poeta ex indirecta oratione in rectam, quare punctum ponendum erat post v. *Munatius*. — *Munatius*] filius fortasse eius Munatii, ad quem est Carm. I, 7. — *sarta coit*] Sumpta haec a vulneri-

Gratia nequidquam coit et rescinditur? At vos
 Seu calidus sanguis seu rerum inscitia vexat
 Indomita cervice feros, ubicunque locorum
 35 Vivitis indigni fraterum rumpere foedus,
 Pascitur in vestrum reditum votiva iuvenca.

EPISTOLA IV.

Albi, nostrorum sermonum candide iudex,
 Quid nunc te dicam facere in regione Pedana?
 Scribere quod Cassi Parmensis opuscula vincat
 An tacitum silvas inter reptare salubres,
 5 Curantem quidquid dignum sapiente bonoque est?

bus, quae *assui* et *coire* dicuntur. Ovid. Trist. IV, 4, 41: „Neve retractando nondum coeuntia rumpam vulnera.“ Petron. 113: „Credo veritus, ne inter initia coeuntis gratiae recentem cicatricem rescinderet.“ — *rerum inscitia*] Non videtur esse ἀπειρία τῶν ἀνθρώπων πραγμάτων, sed pravum iudicium, quo quae alter sine malo studio et suo iure fecerit dixeritve, consulto et ad iniuriam nobis inferendam facta saepe putamus. — *indomita cervice*] cf. Epist. I, 2, 64. — *fraternum*] cf. Epist. I, 10, 4. Male olim ex hac voce interpretes effici posse opinabantur, Munatium et Florum vere fratres fuisse. — *indigni*] quos non decet rumpere. Coniunctum autem est vocabulum ad exemplum graeci ἄξιος. — *pascitur*] Indicatur sacrum pro felici reditu amicorum faciendum. cf. Carm. I, 36, 2. Ad verbum compara Carm. III, 23, 11. IV, 2, 55.

Epistola IV.

Haec epistola ad Albium Tibullum poetam, de quo vide ad Carm. I, 33, quo anno scripta sit nos latet, nisi forte ex primo versu efficere audes datam eam esse non multo post editas ab Horatio satiras. Quas quomodo laudaverit Tibullus, utrum publice apud magnos viros an privatim in epistola aliqua ad Horatium, non magis invenies quam quid Horatium ut hanc epistolam conscriberet commoverit. Apud Messallam certe, Tibulli

fautorem, vix opus erat ut Horatium ille commendaret, quoniam Messallae iam dudum notus, fortasse etiam familiaris fuerat Horatius. Apud Philippos uterque pugnauerat. Noli igitur hoc amplius quaerere et vide mecum causam scribendae epistolae in erigendo et exhilarando animo Tibulli, qui nescimus quo casu vel dolore oppressus ex urbe in Pedanam suam villam aufugerat; dein admirare egregiam extremorum versuum festivitatem, quae si quid aliud risum movere debuit tristiculo amico.

V. 1. *candide*] Comm. Cruq. „integer, verax, pure, sine fuce, sine fallacia.“ — *Pedana*] apud Pedum (hodie Zagarola) sita, media inter Praeneste et Tibur. — *opuscula*] Intelligendae haud dubie sunt elegiae, quas cum bonas scripserit Cassius Parmensis, meliores deinde Tibullus composuit. Cassius Parmensis olim in partibus Bruti et Cassii tribunus militum militavit; postea exorto inter Octavianum et Antonium bello apud Actium cum Antonio pugnavit; dein Athenis, quo fugerat, ab Octaviano interfectus est, cum inter eos fuisset qui Caesarem necassent. Diversus hic est a Cassio Etrusco, de quo vide ad Sat. I, 10, 61. — *reptare*] lente et libere ambulare, quod est hominis otiosi et meditantis. Tibullus ipse de se IV, 13, 9: „Sic ergo secretis possum bene vivere silvis, Qua nulla humano sit via trita pede.“ — *sapiente bonoque*] Cur haec sint coniuncta vide ex Cice-

- Non tu corpus eras sine pectore: di tibi formam,
 Di tibi divitias dederunt artemque fruendi.
 Quid voveat dulci nutricula maius alumno,
 Qui sapere et fari possit quae sentiat, et cui
 10 Gratia, fama, valetudo contingat abunde
 Et mundus victus non deficiente crumena?
 Inter spem curamque, timores inter et iras
 Omnem crede diem tibi diluxisse supremum:
 Grata superveniet quae non sperabitur hora.
 15 Me pinguem et nitidum bene curata cute vises,
 Cum ridere voles Epicuri de grege porcum.

ronis loco de off. III, 15, 62; et cf. Epist. I, 7, 22. I, 16, 73. A. P. 445. — *Non tu*] Sententiarum ordo hic esse videtur: „quid dicam te facere? utrum poemata componere an philosophari potius de iis rebus quae dignae sunt sapientibus bonisque viris? Quodsi hoc facis, recte facis; tam multas enim tu habes animi et corporis virtutes, ut indignas curas tu alere non possis.“ — *eras*] semper, quamdiu te cognovi. *Horkelius* putavit ex coniectura scribendum esse *eris*. — *pectore*] Ovid. Met. XIII, 290. Heroid. XVI, 305: „Huncine tu speres hominem sine pectore dotes Posse satis formae, Tyndari, nosse tuae.“ — *voveat maius*] cum ea quae habeat bona summa sint; quae qualia sint ostendunt tres insequentes versus. Haec igitur omnia habet Tibullus, quare sapienter iis frui iubetur. — *gratia*] apud magnos viros, imprimis apud Messallam. — *fama*] Ovid. Am. I, 15, 27: „Donec erunt ignes arcusque Cupidinis arma, Discentur numeri, culte Tibulle, tui.“ — *mundus victus*] Sat. II, 2, 65. Epist. II, 2, 199. Carm. III, 29, 14. — *crumena*] Similiter Iuven. XI, 38: „Quis enim te deficiente crumena Et crescente gula manet exitus?“ — *timores*] „Poeta tranquilliore dicendi genere usus de universo rerum humanarum statu locutus est et hac de causa pluralem elegit, licet singularis in eadem re praecesserit.“ *Iacob.* de

usu num. plur. p. 11. — Ceterum *spes* est futurorum bonorum, *cura* praesentium bonorum; *timor* referendus ad futura mala, *ira* ad praesentia mala. — *diluxisse*] Significatur hoc verbo proprie id tempus, quo tam clara lux est ut res dignosci possint. Cic. Phil. XII, 2, 5: „Discussa est illa caligo, diluxit, patet, videmus omnia.“ id. Catil. III, 3. Liv. XXXVI, 24. — *curata cute*] Epist. I, 2, 29. — *nitidum*] vide ad Sat. II, 2, 128. De lepido epistolae exitu vide ad Epist. I, 1, 106. Ceterum ne offendaris maiore antiquorum hominum in his rebus libertate, compara hos locos Ciceronis in Pis. 16: „Epicure noster, ex hara producte, non ex schola.“ ibid. 30: „Quid nunc te, asine, litteras doceam?“ ad Att. IV, 5: „Scio me asinum germanum fuisse.“ Vera autem Epicuri ἡδονὴ fuit ἀταραξία et ἀπονία et υγίεια τοῦ σώματος; quam quomodo pravi homines intellexerint, vides ex hoc loco Senecae de vit. beat. 12: „Non ab Epicuro impulsus luxuriantur, sed vitiiis dediti luxuriam suam in philosophiae sinu abscondunt et eo concurrunt, ubi audiunt laudari voluptatem. Nec aestimatur voluptas illa Epicuri, ita enim mehercules sentio, cum sicca et sobria sit, sed ad nomen ipsum advolant quaerentes libidimbus suis patrocinium aliquod ac velamentum.“

EPISTOLA V.

Si potes Archiacis conviva recumbere lectis
 Nec modica coenare times olus omne patella,
 Supremo te sole domi, Torquate, manebo.
 Vina bibes iterum Tauro diffusa palustres
 Inter Minturnas Sinuessanumque Petrinum.
 Si melius quid habes, arcesse vel imperium fer.

Epistola V.

De Torquato, ad quem haec est epistola, vide ad Carm. IV, 7; atque eodem prope consilio et carmen illud et hanc epistolam scriptam esse patet. De anno natali huius epistolae non consentiunt viri docti; nimirum certum temporis indicium non reperitur. Nam ex versibus 4 et 9 hoc unum pro certo potest affirmari, dedisse Horatium hanc epistolam quattuor vel quinque annis post alterum consulatum T. Statilii Tauri a. 728; nam natalicia Augusti iam inde ab anno 724 celebrata esse memoriae prodidit Dio Cassius LI, 19: „Ἐν τε τοῖς γενεθλίοις αὐτοῦ καὶ ἐν τῇ τῆς ἀγγελίας τῆς νίκης ἡμέρᾳ ἱερομηνίαν εἶναι ἐγνώσαν,“ cum quo loco hunc alterum eiusdem scriptoris coniungas LIV, 34: „Καὶ τὰ γενεθλία τὰ τοῦ Ἀγούστου καὶ ἐν τῷ ἵπποδρόμῳ καὶ ἐν τῇ ἄλλῃ πόλει πολλαχόδι θηρίων σφαγαῖς ἐτιμήθη· καὶ τοῦτο μὲν καίτοι μὴ ψηφισθὲν ἐν πᾶσιν ὥς εἰπεῖν τοῖς ἔτεσι πρὸς τινος τῶν αἰεὶ στρατηγούντων ἐγένετο· τὰ δὲ δὴ Ἀγουνστάλια, ἃ καὶ νῦν ἄγεται, τότε πρῶτον ἐκ δόγματος ἐτελέσθη.“ Quod quidem factum est a. 743. Adde locum Suetonii vit. Octav, 57: „Equites Romani natalem eius sponte atque consensu biduo *semper* celebrarunt,“ et videbis certum annum versu 9 non indicari. Intelligendus autem natalis dies est Augusti, non divi Caesaris; nam etiamsi Augustus natus est a. d. XIV. Kal. Octobr., Iulius autem Caesar a. d. IV. Id. Quintil., aetivam noctem v. 11 in Septembri mense recte licebit invenire, praesertim sub Italiae mitissimo coelo. cf. Virg. Georg. I, 311 sq. Calpurn. I, 1: „Nondum Solis equos declivis mitigat aestas, Quamvis et ma-

didis incumbant prela racemis Et spument rauco ferventia musta susurro.“ Et quamquam Horatius quidem ipse Epist. I, 16, 16 *Septembres horas* gravi addit auctumno, recordandum tamen est varios esse Septembres, aliis annis tepidos magis et aestivos aliis frigidos et auctumnales.

V. 1. *si potes*] Solebat enim Torquatus laute ac splendide vivere. Cave igitur ne hunc virum avaritiae deditum habeas; id quod non pauci interpretes ex hac epistola et Carm. IV, 7 recte sibi videbantur efficere. De usu verbi *posse* cf. Virg. Bucol. 7, 10. Aen. XI, 307. — *Archiacis*] a fabro quodam Archia confectis, simplicibus, non pretiosis. — *olus omne*] quaecunque. Promittitur tenuis coena, sed nos quoque cum amicis invitamus, pauca promittimus, plura apponimus. — *supremo sole*] ad occasum vergente. Contrarius est *sol primus* apud Ovidium Met. IX, 93. Vide ad Carm. III, 28, 13. cf. Sat. II, 7, 33. — *iterum*] sc. consule. Sic Capitolin. vit. Pertin. 4: „Quia ille esset iterum, cum Pertinax factus est. — *Petrinum*] „vicus et locus in agro Falerno.“ *Porphyr.* Sed *Comm. Cruq.*: „Petrinus mons est Sinuessanae civitati imminens vel ager Sinuessae vicinus.“ Hodie est *Rocca di monti Ragoni*. Mediocre vinum est et, quod suspicari licet, non nimis novum sed quattuor vel quinque annos natum. — *Si*] In codd. et multis editionibus *sin*, quo tamen vocabulo Horatius usus esse non videtur. Hoc loco sic scriptum est ab iis qui oppositionem quam intelligerent etiam exprimere particula vellent. Iocatur autem poeta, cum sic scribit: noli enim cum aliis interpretari *arcesse me ad te*; apud Horatium coena iam parata est. — *splendet*] cf. Carm. IV, 11, 6. — *certamina divitiarum*] Hoc

- Iamdudum splendet focus et tibi munda supellex.
 Mitte leves spes et certamina divitiarum
 Et Moschi causam; cras nato Caesare festus
 10 Dat veniam somnumque dies; impune licebit
 Aestivam sermone benigno tendere noctem.
 Quo mihi fortunam, si non conceditur uti?
 Parcus ob heredis curam nimiumque severus
 Assidet insano; potare et spargere flores
 15 Incipiam patiarque vel inconsultus haberi.
 Quid non ebrietas designat? Operta recludit,
 Spes iubet esse ratas, ad proelia trudit inertem,
 Sollicitis animis onus eximit, addocet artes.
 Fecundi calices quem non fecere disertum?
 20 Contracta quem non in paupertate solutum?

quoque iocose et innocenter dictum est (cf. Carm. IV, 12, 25), neque quidquam aliud reperiendum hic est nisi amica ac lepida admonitio, ut omnes curas quibus soleat teneri hoc die mittat totumque se dedat amico et hilaritati. De certaminibus divitiarum compara Sat. I, 1, 113 sq. — *Moschi*] „Hic Pergamenus fuit rhetor notissimus: reus beneficii fuit, cuius causam ex primis tunc oratores egerunt, Torquatus hic et Asinius Pollio.“ *Porph.* In hanc igitur causam Torquatus magnam curam et diligentiam contulisse videtur. — *tendere noctem*] transigere usque ad finem. Similiter Virg. Georg. III, 379. Ovid. Met. XII, 159. — *quo mihi fortunam*] sc. datam esse credam; nam *quo* in hac formula est *quo*i, *quorum*. Sic non raro. Phaedr. III, 18, 9: „Quo mi, inquit, mutam speciem, si vincor sono?“ Cat. Distich. 4, 16: „Quo tibi divitias, si semper pauper abundas?“ Cic. ad Fam. VII, 23, 2: „Martis vero signum quo mihi pacis auctori?“ Sententia autem generalis est, in qua prima persona omnes saepe utuntur. — *assidet*] proximus et simillimus est. Hac tropica significatione, ab ordinibus theatrorum petita, ut videtur, ἀπαξ λεγόμενον est. Quod quomodo in prosa exprimas ostendit Cic. Brut. 147: „Antonio Philippus proximus accedebat.“ — *spargere flores*] Carm. III, 19, 22.

Horatius ed. Dillenburger ed. III.

V. 16. *designat*] Difficile hoc vocabulum alii aliter interpretantur. Porphyrio idem esse dicit quod *aperit* sc. quod signatum et clausum erat; et leviter significari et in quandam comparisonem vocandas esse lagenas *Schmidi*us affirmavit. *Comm. Cruq.* ad h. l. habet glossam *facit*, ad Epist. I, 7, 6 idem esse ait quod *confundere*. *Donatus* ad Terent. Ad. I, 2, 7: „Nam illa quae antehac facta sunt, Omitto: modo quid designavit!“ explicat: „designare est rem novam facere in utramque partem, et bonam et malam.“ — *operta*] cf. Carm. III, 21, 14. Epod. 11, 14. Sat. I, 4, 89. — *spes*] cf. Carm. III, 21, 17 sq. — *inertem*] Sic recte antiquissimi codices Blandinii et alii; *inermem* quod in aliis non malis legitur ideo reiiciendum videtur, quod animus describendus erat a poeta, non casus quo quis inermis est. cf. Cic. in Catil. II, 5, 10. — *addocet*] Hoc verbum praeter hunc locum non videtur inveniri nisi semel apud Ciceronem pro Cluent. 37, 104: „addocti indices.“ Eadem ratione dicitur *addiscere* Cic. senect. 8, 26. — *fecundi calices*] copiosi et abundantes. Notandum genus est huius vocabuli, quo Latini ab usu Graeco (ἡ κύλιξ) recesserunt. — *contracta*] cf. Carm. III, 2, 1. I, 18, 5. Animadvertite ordinem verborum, quo prohibitum est ne aut notum *paupertate* bis poneretur aut molestum pro-

- Haec ego procurare et idoneus imperor et non
 Invitus, ne turpe toral, ne sordida mappa
 Corruget nares, ne non et cantharus et lanx
 Ostendat tibi te, ne fidos inter amicos
 25 Sit qui dicta foras eliminet, ut coëat par
 Iungaturque pari. Butram tibi Septiciumque,
 Et nisi coena prior potiorque puella Sabinum
 Detinet, assumam; locus est et pluribus umbris,
 Sed nimis arta premunt olidae convivia caprae.
 30 Tu quotus esse velis rescribe, et rebus omissis
 Atria servantem postico falle clientem.

EPISTOLA VI.

Nil admirari prope res est una, Numici,
 Solaque, quae possit facere et servare beatum.

nomen *ea* deberet inferri. *Orellius* tamen *solutum* mavult absolute accipere, ut est apud Cic. Verr. Acc. II, 75: „animo semper *soluto* liberoque erat.“ — *imperor]* pro *imperatur mihi*. — *toral]* vide ad Sat. II, 4, 84. De mappa ad Sat. II, 8, 63. — *corruget]* Quintil. XI, 3, 80: „Naribus labrisque derisus, contemptus, fastidium significari solent. Nam et *corrugare nares*, ut Horatius ait, et inflare indecorum est.“ — *cantharus]* vide ad Carm. I, 20, 2. — *pari]* Plat. Symp. 18, 3: „ὁ παλαιὸς λόγος εὖ ἔχει, ὥς ὁμοίων ὁμοίῳ ἀεὶ πελάζει.“ — *Butram]* Nominantur tria sodalium nomina nobis aliunde ignotorum; nam ne de Sabino quidem certa coniectura est. Hunc alii putant esse Ovidii amicum, A. Sabinum, alii Sabinum quendam Tironem, qui librum Cepuricon Maecenati dicavit. — *umbris]* vide ad Sat. II, 8, 22. — *caprae]* Epod. 12, 5. — *atria]* vide ad Carm. III, 1, 46. Senec. de brev. vit. 14, 7: „quam multū per refertum clientibus atrium prodire vitabunt et per obscuros aedium aditus profugient?“ —

Epistola VI.

Plurimis antiquis philosophis communis fuit doctrina τοῦ μηδὲν θαν-

μάζειν, quam quidem virtutem alii ἀδαρβίαν et ἀθανασίαν alii ἀπόθειαν, alii ἀταραξίαν appellarunt. Ea autem ipsa cernitur „in duobus, si et solum id quod honestum sit bonum iudices, et omni animi perturbatione liber sis. Nam et ea quae eximia plerisque et praeclara videntur parva ducere eaque ratione stabili firmaque contemnere fortis animi magnique ducendum est, et ea quae videntur acerba, quae multa et varia in hominum vita fortunaque versantur, ita ferre, ut nihil a statu naturae discendas, nihil a dignitate sapientis, robusti animi est magnaeque constantiae.“ Cic. de off. I, 20. De hac igitur virtute scribit Horatius ad Numicium quendam, hominem nobis aliunde prorsus ignotum, in quem tamen cave credas congerendas esse omnes animi perturbationes, quas a poeta in hac epistola descriptas et vituperatas invenias; immo vero satius erit sibi persuadere, fuisse Numicium iuvenem aliquem fortem ac frugi, qui idem sibi de rerum externarum despicentia fecisset iudicium maximeque idoneus videretur ad quem de illa doctrina epistola posset dari. Incertum est quo anno epistolam scriptam esse credamus, nisi quod *porticus Agrippae* (v. 26) in-

- Hunc solem et stellas et decedentia certis
 Tempora momentis sunt qui formidine nulla
 5 Imbuti spectent: quid censes munera terrae,
 Quid maris extremos Arabas ditantis et Indos,
 Ludicra quid, plausus et amici dona Quiritis,
 Quo spectanda modo, quo sensu credis et ore?
 Qui timet his adversa, fere miratur eodem
 10 Quo cupiens pacto; pavor est utrobique molestus,
 Improvisa simul species exterret utrumque.
 Gaudeat an doleat, cupiat metuatne, quid ad rem,
 Si, quidquid vidit melius peiusve sua spe,
 Defixis oculis animoque et corpore torpet?
 15 Insani sapiens nomen ferat, aequus iniqui,
 Ultra quam satis est virtutem si petat ipsam.

norem eam esse ostendit anno 729, quo anno Neptuni seu illa Argonautarum porticus ab Agrippa aedificata esse traditur.

V. 1. *Nil admirari*] cf. Diog. Laert. VII, §. 123: „τὸν σοφὸν οὐδὲν θαυμάζειν τῶν δοκούντων παραδόξων, οἷον χαρῶνεια καὶ ἀμπώτιδας καὶ πηγὰς θεσμῶν ὕδατων καὶ πυρὸς ἀναφυσήματα.“ — *prope*] Mitigat sententiam παραδόξων adiecta haec particula, quam germanice reddas *so ziemlich*. cf. Sat. I, 3, 98. Epist. I, 18, 28. II, 2, 21. 61. — *una*] *Unus* alios non excludit, sed unum tantum ponit praeceptum; *solus* contra omnes alios excludit. cf. Sat. II, 3, 24. Virg. Aen. II, 426. — *hunc solem*] *δεικτικῶς*, quem videmus et admiramur. Cic. Tusc. I, 25, 60. pro Mil. 30, 83. Conclusio est a maiori ad minus. — *momentis*] Bewegungsgesetze. Cic. Tusc. I, 17, 40. Manil. Astron. III, 289: „Paribus per tempora versa Momentis redeunt.“ Describuntur philosophi naturalium rerum periti. — *decedentia*] *V. decedere* a cadentibus astris (Ep. I, 16, 7.) ad tempora translatum, quia tempora siderum cursus sequuntur. — *formidine*] Ex admiratione magnarum rerum oritur aut formido et timor (v. 9) aut cupiditas (v. 10); utraque res aucta et amplificata torporem (v. 14) efficit. Plaut. Amph. I, 1, 179: „Timeo, totus torpeo: non edepol nunc ubi terrarum sim scio.“

— *quid censes*] De sententiae forma cf. Cic. Rosc. Am. 17, 49. de off. II, 7. Verbum autem *credis* post longiorum verborum intercapedinem praecedenti *censes* bene substituitur. — *ludicra*] ludi publici, ut Liv. I, 9, 13. I, 35, 9. — *dona*] Iuven. X, 78 sqq.: „Nam qui (populus) dabat olim Imperium, fascēs, legiones, omnia, nunc se Continet atque duas tantum res anxius optat, Panem et Circenses.“ Ceterum vide ad Carm. II, 7, 3. — *Qui timet*] Neque debemus eas res appetere neque quae iis contraria sunt timere; nam et in appetitione et in timore inest admiratio quaedam ac pavor, qui animum ex tranquillitate excutit rectumque de rebus iudicium perturbat. De pavore vide Ciceronem Tusc. IV, 8, 19; de ipsa sententia eundem Tusc. IV, 6, 12. III, 13, 28. IV, 26, 57. V, 28, 81. — *exterret*] verbum medium et ad timorem et ad cupidinem aptum. cf. Virg. Aen. XI, 806. Liv. VII, 39, 15. Cic. de off. II, 10, 37. Etiam *spes* vocabulum medium est, ut Salust. Iug. 88, 1. Liv. II, 3, 1; quamquam de malis rebus a Cicerone et Caesare non videtur esse usurpatum. Ceterum *Lachmannus* ad Lucret. p. 266 coniecturam Iacobsii *externat* optimam et necessariam emendationem appellavit. — *defixis oculis*] immobilibus, stupidis. — *insani sapiens*] Malum cernitur in nimio appetitu, non

I nunc, argentum et marmor vetus aeraque et artes
 Suspice, cum gemmis Tyrios mirare colores;
 Gaude quod spectant oculi te mille loquentem;
 20 Navus mane forum et vespertinus pete tectum,
 Ne plus frumenti dotalibus emetat agris
 Mutus et — indignum, quod sit peioribus ortus —
 Hic tibi sit potius quam tu mirabilis illi.
 Quidquid sub terra est, in apricum proferet aetas;
 25 Defodiet condetque nitentia. Cum bene notum
 Porticus Agrippae et via te conspexerit Appi,
 Ire tamen restat, Numa quo devenit et Ancus.
 Si latus aut renes morbo tentantur acuto,
 Quaere fugam morbi; vis recte vivere: quis non?
 30 Si virtus hoc una potest dare, fortis omissis
 Hoc age deliciis. Virtutem verba putas et
 Lucum ligna: cave ne portus occupet alter,
 Ne Cibyratica, ne Bithyna negotia perdas;

in re quae petitur. Cic. Tusc. IV, 25, 55. 29, 62.

V. 17. *I nunc*] Argumentum a maiori ad minus; ipsa autem formula concedentis est sed cum dissimulatione et irrisione. Epist. II, 2, 76. — *artes*] Carm. IV, 8, 5. Versus autem sic sunt coniungendi: Quodsi ne virtus quidem nimio studio appetenda est, nihil profecto est quod viliores res tantopere secteris, quod argentea et aënea artificia conquiras, quod laudem oratoriam appetas, quod quaestui per totum diem inhies, ne alius quis, obscuro fortasse loco natus, uxoris dote i. e. sine ullo suo negotio te ditior sit. In qua re quo certior evadat imago, Mutum aliquem, hominem nobis ignotum, poetarum more induxit Horatius. — *Navus*] Sic, non *gravus*, in omnibus antiquis codd. Cruquii et compluribus Orellii scriptum est. — *emetat*] vide ad Carm. I, 5, 8. — *condetque nitentia*] Vanum igitur illorum est studium. Senec. Epist. 110: „Quid miraris? quid stupes? Pompa est. Ostenduntur istae res, non possidentur, et dum placent transeunt.“ — *conspexerit*] Nam in porticu Agrippae frequenter deambulabant Romani, et

viam Appiam divites terebant mannis et curribus. cf. Epod. 4, 14. — *Ancus*] Carm. IV, 7, 15. — *Si latus*] Sententiarum ordo hic est: „Quare si mecum intellexisti, in tranquillitate animi cernendam esse beatam vitam, idem facias oportet quod soles, cum corporis morbo tentaris: nimirum remedia quaerenda sunt et vitanda omnia quae possint nocere. Animi autem remedia videnda sunt in illa virtute, qua nihil admiramur, nulla cupiditate aut metu tentamur. Contra si summum bonum in externis rebus positum putas, agedum quaere res et cura ne quis te opibus vincat.“ Externae autem res et cupiditates, quibus homines beatam sibi vitam se paraturos vulgo opinantur, aut divitiae sunt (31—48) aut honores et gratia popularis (49—55) aut victus lautissimus (56—64) aut amores (65—67). — *latus aut renes*] *πλευρῆτις* et *νεφρῆτις*. Idem versus est Sat. II, 3, 163 ubi vide. — *virtutem verba*] Sic Schiller nostras in carmine die Worte des Glaubens: „Und die Tugend, sie ist kein leerer Schall.“ — *lucum*] sed numen est in luco et sacrilegorum vox est, lucum nihil esse nisi ligna. — *Cibyratica*]

- Mille talenta rotundentur, totidem altera, porro et
 35 Tertia succedant et quae pars quadrat acervum.
 Scilicet uxorem cum dote fidemque et amicos
 Et genus et formam regina Pecunia donat,
 Ac bene nummatum decorat Suadela Venusque.
 Mancipiis locuples eget aeris Cappadocum rex:
 40 Ne fueris hic tu. Chlamydes Lucullus, ut aiunt,
 Si posset centum scenae praebere rogatus,
 Qui possum tot? ait; tamen et quaeram et quot habebo
 Mittam: post paulo scribit, sibi milia quinque
 Esse domi chlamydam; partem vel tolleret omnes.
 45 Exilis domus est, ubi non et multa supersunt
 Et dominum fallunt et prosunt furibus. Ergo
 Si res sola potest facere et servare beatum,
 Hoc primus repetas opus, hoc postremus omittas.
 Si fortunatum species et gratia praestat,
 50 Mercemur servum, qui dictet nomina, laevum
 Qui fodicet latus et cogat trans pondera dextram

Cibyra urbs Phrygiae magnae propter ferramenta celebrata. Et cf. Carm. III, 7, 3. — *quadrat*] Sic scribendum est ex auctoritate optimorum codicum. Coniunctivus *quadrat* reliquis coniunctivis haud dubie debetur. — *fidemque*] cf. Sat. I, 1, 62. Philem. fr. XV: „Πρόσσει δὲ τῷ πέννητι ἀπιστία· ἀνὴρ δὲ πλουτῶν κἂν ἄγαν ψευδηγορῇ, δοκεῖ τι φράζειν τοῖς ἀκούουσιν ἀσφαλές.“ — *Cappadocum rex*] Cum haec epistola scriberetur, regnabat in Cappadocia Archelaus; de cuius decessore Cicero scripsit ad Attic. VI, 1: „Nihil illo regno spoliatus, nihil rege egentius“ et ibid. 3: „Ariobarzanes, rex perpauper.“ Romae autem multi erant ex Cappadocia servi, sed rudes et viles.

V. 40. *Ne fueris*] Ille igitur pauperissimus rex malum est exemplum divitiarum; quare fac colligas opes Luculli, qui quam esset dives ipse nesciebat. — *scenae*] ut pompa aliqua vel triumphus ageretur. — *tolleret*] praetor vel aedilis, qui spectacula editurus erat. — *Exilis domus*] Plutarch. Lucull. 39: „Στρατηγού δέ ποτε

φιλοτιμουμένον περὶ θεάς καὶ χορῶν τινι κόσμον αἰτουμένον πορφυρᾶς χλαμύδας ἀπεκρίνατο, σκεψάμενος, ἂν ἔχη, δώσειν· εἶτα μεθ' ἡμέραν ἠρώτησεν αὐτὸν, ὁπόσων δέοιτο τοῦ δ' ἑκατὸν ἀρκέσειν φήσαντος ἐκέλευσε λαβεῖν δις τσαύτας. Εἰς δ' καὶ Φλάκκος ὁ ποιητῆς ἐπιπεφώνηκεν, ὥς οὐ νομίζει πλοῦτον, οὐ μὴ τὰ παρορρώμενα καὶ λανθάνοντα πλείονα τῶν φαινόμενων ἐστί. — *facere et servare*] Consulto haec repetuntur ex secundo versu, ut perversum cupidorum hominum iudicium cum vera sapientia infesto certamine componatur. — *species*] splendor externus. Tacit. Ann. IV, 6, 1: „sua consiliibus, sua praetoribus species.“ — *servum*] Qui magistratum ambirent, civium in quos inciderent etiam tenuiorum manus prensabant, ut eorum sibi suffragia conciliarent. Quare servos nomenclatores secum habebant, qui singulorum civium nomina tenerent suisque auribus insusurrarent. cf. Sat. II, 5, 32. Ceterum non sine ioco verba *laevum, dextram* versus vicinos

- Porrigere. Hic multum in Fabia valet, ille Velina;
 Cui libet hic fasces dabit eripietque curule
 Cui volet importunus ebur. Frater, Pater adde;
 55 Ut cuique est aetas, ita quemque facetus adopta.
 Si bene qui coenat bene vivit, lucet, eamus
 Quo ducit gula, piscemur, venemur, ut olim
 Gargilius, qui mane plagas, venabula, servos
 Differtum transire forum populumque iubebat,
 60 Unus ut e multis populo spectante referret
 Emptum mulus aprum. Crudi tumidique lavemur,
 Quid deceat quid non obliti, Caerite cera
 Digni, remigium vitiosum Ithacensis Ulixei,
 Cui potior patria fuit interdicta voluptas.
 65 Si, Mimnermus uti censet, sine amore iocisque
 Nil est iucundum, vivas in amore iocisque.

claudunt. — *trans pondera*] Videntur haec coniungenda esse cum verbis *dextram porrigere*, non cum *cogat*; quare rectissime intelligimus plaustra saxis, trabibus aliaque mole onusta, per quae candidato ut ad suffragatorum perveniat non sine difficultate aut aliquo periculo penetrandum est. Alii, ut Lachmannus ad Lucret. p. 380 et Hauptius ad Ovid. Met. I, 13 interpretantur *ultra libramentum sive aequilibrium corporis*, ut ap. Lucan. I, 57: *librati pondera coeli Orbe tene medio*; Cic. Fat. 10: „motus (atomi) oritur extra pondus et plagam.“ — *Fabia, Velina*] duae ex XXXV tribubus Romanis. — *importunus*] durus, ut quid velit quavis ratione efficere studeat. — *adopta*] festive dictum de eo qui alienos homines blandis nominibus alloquendo inter cognatos quasi recipit.

V. 57. *ducit gula*] cf. Sat. II, 7, 102. 111. Praesens ex auctoritate codicum praeferendum futuro *ducet*. — *Gargilius*] homo ignotus, de quo recte Bentleius: „Neque enim venatum *exibat* per forum, sed a venatione *redibat*; id ex ipsis verbis pro comperto habendum; iubebat, inquit, servos per forum transire, ut populo spectante mulus aprum referret. Ergo ante lucem pro solito venatorum more exie-

rat: et mane sive ante meridiem plenum foro redibat. Neque vero recta via domum tendebat Gargilius,“ sed flexo circuitu per forum servos ire iubebat, ut populo ibi conferto aprum ostentarent, non captum ut credi volebat, sed emptum. Neque vero Bentleiana coniectura *forum campumque opus* est, quoniam satis festive iteratur *populum, populo*, quo vanitas Gargilii magis describatur, quippe qui a populo vellet praedicari ob lautas suas quotidianas epulas. Illud quoque vani hominis est, quod magnam turbam servorum cum ingenti apparatu quotidie mittit, ut unum sibi apportent aprum; nimirum pluribus apris singulis diebus uti non potuit. — *lavemur*] ad excitandum iterum ciborum appetitum. — *Caerite cera*] Caeritibus tabulis; Caerites enim primi facti sunt municipipes sine suffragii iure. — *remigium*] Epist. I, 2, 22 sqq. cf. Hom. Od. XI, 104 sqq. XII, 297 sqq. I, 8 sq. — *Mimnermus*] Colophonius, poeta elegiacus, Soloni aequalis. Mimnermi locus est (Schneidewin. del. p. 12): „*Τίς δὲ βίος τί δὲ τερπνὸν ἄτερ χρυσέης Ἀφροδίτης; Τεθναίην, ὅτε μοι μηκέτι τὰντα μέλοι κτλ.*“ — *candidus*] Ep. I, 4, 1. cf. Cic. Tusc. V, 28, 82. —

Vive, vale! Si quid novisti rectius istis,
Candidus imperti; si non, his utere mecum.

EPISTOLA VII.

Quinque dies tibi pollicitus me rure futurum
Sextilem totum mendax desideror. Atqui
Si me vivere vis sanum recteque valentem,
Quam mihi das aegro, dabis aegrotare timenti,
5 Maecenas, veniam, dum ficus prima calorque

Epistola VII.

„Maecenas cum aegre careret familiaritate Horatii vatis et amici ob eamque rem, fortasse variis vitae incommodis iam tactus, amicum dilectum invitum dimitteret, Flacci longiorem quam quem is fore promiserat in villa sua secessum aegre tulisse videtur. Poeta igitur ut suam absentiam in sex menses dilaturus excusaret crimenque animi ingrati, quod sibi propter promissum non servatum fieri videretur, dissolveret atque omnino suam suo more vivendi rationem patrono libere exponeret, hanc scripsit epistolam Romano homine dignissimam. Is enim valetudine tum utebatur minus commoda, cui ita consulendum erat, ut cum diutius rure moraretur, tum per hiemem ad mare i. e. in regionem tepidiorem descenderet. Ante omnia igitur quantum debeat patrono liberalissimo quantique in beneficiis dandis facienda sit eius humanitas grato proficitur animo, ita tamen ut suam ipsius libertatem omnibus amicorum donis et vel ipsis Arabum divitiis praeferre non dubitet. Sibi enim aetate proveciori et corporis viribus paulo fracto alia iam opus esse vitae conditione, quam qua usque ad id tempus apud patronum munificum usus sit. Quodsi Maecenas vincula, quibus ei beneficiis in ipsum collatis se sentiat obstrictum, laxare nollit, iam quae bona accepisset se reddere et re vera velle et aequo animo posse significat. Haec animi sensa tam urbane, tam facete ante oculos ponit Maecenatis, ut haec ipsa epistola insigne sit et libertatis et urbanitatis documentum. Primum

enim quod de restituendis rebus sibi facile obiiici posse praesumit poeta, iocose illustrat lepido illo de vulpula apologo, qua quidem similitudine usus omnibus nota simul, si qua fuit, rei lenitur quam maxime acerbitas. Tum ad significandum et paratum quo omnia reddere velit animum et mutatam sortem aequae ferentem duobus apprime utitur exemplis, altero a Telemacho, altero a Vulteio Mena desumptis.“ *Obbarius*. Annus quo epistolam scriptam esse dicamus inveniri nequit; nam etiamsi concedas referendam eam esse ad iter quod Veliam et Salernum poetam fecisse ex epistola XV videamus, illud ipsum iter quo anno factum sit non potest inveniri. *Obbario*, cui assentire videtur *Orellius*, scripta epistola videtur a. 731; Duentzero intra annos 732 et 735.

V. 1. *quinque dies*] certus numerus pro incerto positus ad indicandos paucos dies. cf. Sat. I, 3, 16. II, 3, 289. II, 7, 89. — *Sextilem*] qui mensis a. u. c. 746 *Augustus* nominatus est. — *sanum recteque valentem*] Hanc optimorum codicum lectionem recentissimi editores recte restituerunt utpote sermonis quotidiani formulam, reiecta altera *recteque videre valentem*. cf. Epist. I, 16, 21. Cic. Acad. II, 7, 19: „Si sensus et sani sunt et valentes.“ Altera facta videtur correctione eorum qui tautologiam aliquam timerent. — *veniam*] non est: „commeatum (Urlaub) dabis, sed precibus concedes, ut ruri vivam.“ Caes. B. G. VII, 15, 6. Virg. Aen. IV, 435. — *ficus prima*] quae mense Augusto et Septembri maturescens grave auctumni tempus indicat. Sat. II, 6, 19. Carm. II, 14, 16.

- Designatorem decorat lictoribus atris,
 Dum pueris omnis pater et matercula pallet,
 Officiosaque sedulitas et opella forensis
 Adducit febres et testamenta resignat.
- 10 Quodsi bruma nives Albanis illinet agris,
 Ad mare descendet vates tuus et sibi parcat
 Contractusque leget; te, dulcis amice, reviset
 Cum Zephyris, si concedes, et hirundine prima.
 Non quo more pyris vesci Calaber iubet hospes,
- 15 Tu me fecisti locupletem. Vescere sodes.
 Iam satis est. At tu quantum vis tolle. Benigne.
 Non invisa feres pueris munuscula parvis.
 Tam teneor dono quam si dimittar onustus.
 Ut libet: haec porcis hodie comedenda relinques.
- 20 Prodigus et stultus donat quae spernit et odit:
 Haec seges ingratos tulit et feret omnibus annis.
 Vir bonus et sapiens dignis ait esse paratus,
 Nec tamen ignorat quid distent aera lupinis.

— *designatorem*] „Designatores sunt funerum mancipēs et ordinatores; nam designare est ordinare; unde et qui loca in theatris spectatoribus distribuēbant, designatores dicebantur.“ *Comm. Cruq.* — *decorat*] Habet aliquid festivi, pro *stipat.* — *lictoribus*] Cic. de leg. II, 24, 61: „Reliqua sunt in more, funus ut indicatur, si quid ludorum; dominusque funeris utatur accenso atque lictoribus.“ — *illinet*] quo verbo prima hiems significatur, cum montes nive iam adsparguntur. — *ad mare*] Non male coniecerunt viri docti ex versu 45 Tarentum significari; nam cum Tibur et Tarentum contra urbem Romam ibi posuerit, eo autem ipso tempore, quo scriberet hanc epistolam, *rure* (v. 1) i. e. in villa sua prope Tibur sita diutius moraretur, ultro quasi in Tarentum incidimus; cum quare non temere coniungas Calabrum hospitem v. 14, quem cur potius descripserit quam alium alius regionis non videas, nisi et saepius iam Horatium in Calabria fuisse et tunc Tarentum petere voluisse existimes. — *contractus*] remotus a strepitu magnae

urbis neque distractus variis curis et officiis. Contractus enim opponitur distracto et remisso. Cic. de orat. I, 59, 251: „industriam (oratoris) in plura studia distrahere nolim.“ id. de leg. II, 15, 38: „(sonorum vis) tum remittit animos tum contrahit.“ cf. Epist. I, 18, 90. De frigore enim in loco, quem vitandi frigoris causa petiturum se dicit poeta, non licet cogitare. — *benigne*] est modeste recusantis. cf. v. 62. — *teneor dono*] Vetat caesura versus, ne quis *dono* a verbo *teneor* seiungere et cum solo adiectivo *onustus* coniungere velit; ad utrumque est referendum. — *dono*] quod offers. — *relinques*] Recte sic optimi codices cf. v. 43. Alii *relinquis*. V. 20. *prodigus*] Ea, qua Calaber hospes utebatur, ratio donandi recta non est, sed prodigorum hominum et stultorum; sapientes enim et ea solent dare quae ipsi magni aestimant et iis hominibus quos suis donis dignos habent. Quare ex sapientium hominum donis gratia redit, non ex stultorum. — *tulit et feret*] vide ad Carm. II, 13, 20. — *paratus*] graeca est con-

Dignum praestabo me etiam pro laude merentis.

- 25 Quodsi me noles usquam discedere, reddes
 Forte latus, nigros angusta fronte capillos,
 Reddes dulce loqui, reddes ridere decorum et
 Inter vina fugam Cinarae moerere protervae.
 Forte per angustam tenuis vulpecula rimam
 30 Repserat in cumeram frumenti, pastaque rursus
 Ire foras pleno tendebat corpore frustra;
 Cui mustela procul, Si vis, ait, effugere istinc,
 Macra cavum repetes artum, quem macra subisti.
 Hac ego si compellor imagine, cuncta resigno:
 35 Nec somnum plebis laudo satur altilium nec
 Otia divitiis Arabum liberrima muto.
 Saepe verecundum laudasti, rexque paterque
 Audisti coram, nec verbo parcius absens:

structio, ut Carm. III, 27, 73. — *aera lupinis*] Lupinis quasi fictitia pecunia utebantur et aleatores et histriones in scena; inde proverbium ortum. — *pro laude merentis*] Compara Lucrēt. V, 2: „Quis potis est *dignum* pollenti pectore carmen Condere *pro* rerum maiestate?“ Cicer. Div. in Caec. 13, 42: „Quidnam *pro* offensione hominum et exspectatione omnium *dignum* eloqui possim?“ Et *merentis* est *pro bene merentis*, ut Virg. Aen. VI, 664. Propert. IV, 11, 101: „Sim digna *merendo*.“ Hoc dicere videtur: „Tu, Maecenas, cum dicas te dignis semper esse paratum, in me autem tua beneficia contuleris, necesse est habeas me dignum tuis donis. Quare etiam praestabo me dignum et ita quidem, ut ex beneficiis tuis in te quoque redundet aliqua laus; qua ipsa re beneficia stultorum et sapientium inter se differunt; ad illos enim ex donis suis nihil revenit gratiae aut laudis. Quare libere beneficiis tuis utar, quae tu, cum dares, non voluisti imminuere adhaerentibus molestiis et incommodis. Olim cum iuvenis essem, semper apud te eram delectabarque urbana vita; ita me gratum praestare nunc, cum senescam, iam non potero.“ — *angusta fronte*] Contrarium habes in hoc loco Plinii Epist. III, 6, 2;

„rari et cedentes capilli, lata frons.“ Ceterum vide ad Carm. I, 33, 5. — *Cinarae*] vide ad Carm. IV, 13, 21. *forte*] idem quod *aliquando*, ut Sat. I, 9, 1. Cicero ita locutus esse non videtur, sed posteriores. — *vulpecula*] De hac omnium codicum scriptura Bentleius: „Vestram fidem, inquit, venatores, rustici, physici! Frumento vescitur vulpecula? Quis vel fando hoc audivit, quis prodidit?“; ac scribi iubet *nitedula*; quae coniectura cum olim recepta esset ab editoribus, nunc recte reiicitur. Nam praeterquam quod vulpecula etiam ab Isidoro comprobatur Orig. I, 39: „ad mores spectat fabula, ut apud Horatium mus loquitur muri (Sat. II, 6, 90), *mustela vulpeculae*,“ tenendum est apologorum inventores non tam physicam probabilitatem spectare quam doctrinae veritatem. cfr. Dio Chrysost. 47. p. 233. R. „ὄν γὰρ ὥσπερ ἡ ἀλώπηξ καταφαγοῦσα τὰ κρέα οὐκ ἐδύνατο ἐξελεῖν ἐκ τῆς θρόνης διὰ τὸ ἐμπλησθῆναι, καὶ μοὶ ἐξελεῖν διὰ τοῦτο χαλεπὸν.“ Lachmannus tamen ad Lucret. p. 204: „idem vocabulum (*nitedula*) Horatio a Bentleio restitutum qui non accipiunt, rationem et genera fabellarum ignorant.“ — *cumeram*] Sat. I, 1, 53. — *cavum quem*] Duplex substantivi forma est, *cavum* et *cavus*, cf. Sat. II, 6, 116. — *verecundum*] cf. Carm. II, 18, 12.

Inspice, si possum donata reponere laetus.

40 Haud male Telemachus, proles patientis Ulixei:

Non est aptus equis Ithace locus, ut neque planis

Porrectus spatiis nec multae prodigus herbae:

Atride, magis apta tibi tua dona relinquam.

Parvum parva decent: mihi iam non regia Roma,

45 Sed vacuum Tibur placet aut imbellis Tarentum.

Strenuus et fortis causisque Philippus agendis

Clarus ab officiis octavam circiter horam

Dum redit atque foro nimium distare Carinas

Iam grandis natu queritur, conspexit, ut aiunt,

50 Adrasum quendam vacua tonsoris in umbra

Cultello proprios purgantem leniter ungues.

Demetri, — puer hic non laeve iussa Philippi

Accipiebat — abi, quaere et refer, unde domo, quis,

Cuius fortunae, quo sit patre quoque patrono.

55 It, redit et narrat, Vulteium nomine Menam,

— *rea*] Hoc nomine tenuiores et clientes patronos suos et fautores ornare solebant. cf. Epist. I, 17, 20. 43. — *Telemachus*] Hom. Od. IV, 601 sqq. Eodem ait animo se reddere posse omnia quae acceperit, quo olim Telemachus equos sibi oblatos, utpote inutilis sibi suaeque patriae, recusaverit. — *patientis*] πολυτλας, ταλασίφρων. — *vacuum Tibur*] vacuum a turba et negotiis et officiis, plenum tranquillitatis. Epist. II, 2, 81. Virg. Georg. II, 225. Ceterum cf. Carm. II, 6, 5 — 12. De Tarento cf. Sat. II, 4, 34.

V. 46. *Philippus*] L. Marcius Philippus, consul a. u. c. 663, quem Cicer. de orat. III, 1 hominem vehementem et disertum et imprimis fortem ad resistendum appellat. De ipsa autem lepida narratiuncula bene sic disputavit Orellius: „Haec narratiuncula ita cum praecedentibus connectitur, ut Vulteii exemplo satis lepido demonstret virum prudentem, ubi casu aliquo collocetur in statu suae conditioni atque ingenio minus conveniente, etiam cum non levi iactura ex eo sese extricaturum esse, quo magis sibi aptum occupet.“ — *Foro*] ablativus est; in personis alia ratio est. cf.

Epist. I, 18, 4. — *Carinas*] „Vicus Romae celeberrimus in regione IV constitutus ab aedificiis in modum carinarum factis vocatus esse dicitur; ibi fuit templum Telluris, aedes Iunonis Sororiae, domus Pompeii, Antonii, Q. Ciceronis, aliorum virorum principum et ipsius Philippi.“ *Obbarius*. Forum Romanum in regione VII situm erat. — *adrasum*] Tenendum hoc est et ex auctoritate codicum et quia homines *adraduntur*, barba *abraditur*. *Ut aiunt* dictum est de re narrando tradita, ut Epist. I, 6, 40. I, 17, 18. De suis optimis codd. Cruquius: „aliqui codd. habent *arrasum*, sed nulli *abradum*.“ — *vacua*] quia qui adfuerant iam reliquerant tonstrinam, Vulteius autem otiosus et sibi placens ita remanserat, ut ex placido vultu tranquillitas eius animi intelligeretur. Haec igitur species hominis Philippum allexit. — *quoque patrono*] si libertus esset ac nullo patre, ut dicebant, scire cupiebat, quo uteretur patrono. — *Menam*] Libertus igitur fuit, quod ex hoc nomine Philippus antea de condicione Vulteii incertus (quare quaesivit „quo patre quoque patrono“) intellexit. — *notum*] Noli hoc coniungere neque cum prae-

Praeconem, tenui censu, sine crimine, notum,
 Et properare loco et cessare et quaerere et uti
 Gaudentem parvisque sodalibus et lare certo
 Et ludis et post decisa negotia Campo.

60 Scitari libet ex ipso quodcunque refers: dic
 Ac coenam veniat. Non sane credere Mena,
 Mirari secum tacitus. Quid multa? Benigne,
 Respondet. Negat ille mihi? Negat improbus et te
 Negligit aut horret. Vulteium mane Philippus
 65 Vilia vendentem tunicato scruta popello
 Occupat et salvere iubet prior; ille Philippo
 Excusare laborem et mercenaria vincla,
 Quod non mane domum venisset, denique quod non
 Providisset eum. Sic ignovisse putato

70 Me tibi, si coenas hodie mecum. Ut libet. Ergo
 Post nonam venies: nunc i, rem strenuus auge.
 Ut ventum ad coenam est, dicenda tacenda locutus
 Tandem dormitum dimittitur. Hic ubi saepe
 Occultum visus decurrere piscis ad hamum,
 75 Mane cliens et iam certus conviva, iubetur
 Rura suburbana indictis comes ire Latinis.

cedentibus verbis *sine crimine* neque cum insequentis versus infinitivis. Ut homo *sine crimine* innocens est et probus, sic notus is recte dicitur, qui non in omnium hominum, ut magni ac nobiles viri, sed in multorum eiusdem et condicionis et regionis cognitionem pervenit, praesertim praeco, cui cum multis fortasse hominibus negotia erant. Verba autem *sine crimine* adiectivi vice funguntur in lingua latina, cui negantia verba non tam facili opera licuit componere quam Graecae. cf. Ovid. Met. VII, 275. Senec. Phoen. 513: „sine crimine exsul.“ Infinitivi *properare*, *cessare* cett. intelligendi sunt ex forma orationis obliquae, qua servus Vultei verba domino refert. — *loco*] vide ad Carm. IV, 12, 28. — *non sane*] idem fere quod *vix*, οὐ πᾶν. Varro R. R. III, 16, 10: „Parva villa et agellus non sane maior ingero uno.“ Ille enim vix potest co-

gitare se ab homine nobili ac divite ad coenam vocari; quare tacitus miratur. — *negat ille mihi*] Sic optimi et plurimi codices, alii *neget*, quod cur praeferatur nihil est causae; immo vero grata est eiusdem formae repetitio. Servus domino adulans convicio *improbus* statim addito rem auget. — *tunicato popello*] Cum contemptu dictum; tenuiores enim tunica tantum, non toga induti in publicum ibant. Tacit. dial. 7: „vulgus imperitum et tunicatus hic populus.“

V. 72. *dicenda tacenda*] cf. Virg. Aen. IX, 595. — *tandem*] diu retentus, cum placeret, tandem ut dormitum eat dimittitur. — *cliens*] qui mane salutatum veniebant. — *indictis Latinis*] Feriae Latinae, quae quotannis a consule indicebantur, iustitium quatrimum dabant, quo qui negotiis forensibus occupati erant comitibus ex more nobiliorum hominum secum ductis rusti-

Impositus mannīs arvum coelumque Sabinum
 Non cessat laudare. Videt ridetque Philippus,
 Et sibi dum requiem, dum risus undique quaerit,
 80 Dum septem donat sestertia, mutua septem
 Promittit, persuadet uti mercetur agellum.
 Mercatur. Ne te longis ambagibus ultra
 Quam satis est morer, ex nitido fit rusticus atque
 Sulcos et vineta crepat mera, praeparat ulmos,
 85 Immoritur studiis et amore senescit habendi.
 Verum ubi oves furto, morbo periere capellae,
 Spem mentita seges, bos est enectus arando,
 Offensus damnis media de nocte caballum
 Arripit iratusque Philippi tendit ad aedes.
 90 Quem simul adspexit scabrum intonsumque Philippus,
 Durus, ait, Vultei, nimis attentusque videris
 Esse mihi. Pol me miserum, patrone, vocares,
 Si velles, inquit, verum mihi ponere nomen.
 Quod te per Genium dextramque deosque Penates
 95 Obsecro et obtestor, vitae me redde priori.
 Qui semel adspexit, quantum dimissa petitis

cari solebant. — *requiem*] recreationem, delectationem; *risus*, ridendi materiem. Vastrum enim hoc Philippi est consilium, quippe qui praesentiret tranquillum suum ac placidum praecone non optimum fore rusticum. — *undique*] undecumque potuit accipere, quoquo modo. — *ex nitido*] Cic. ad Fam. XVI, 21, 13: „Deponendae tibi sunt urbanitates: rusticus Romanus factus es.“ — *studiis*] Dativus est, ut apud Quintilianum IX, 3, 73: „immori legationi.“ — *senescit*] macrescit, *τῆ-νεται*. Epist. II, 2, 82. — *seges*] cf. Carm. III, 1, 30. — *enectus arando*] Prae nimio labore concidit bos; nimium bonus Vultei urbanam suam sedulitatem (v. 65. 71) rus etiam contulisse videtur, ut quem ipse libenter susceperet magnam laborem etiam bubus imponeret. Imperitia igitur fuit qua peccavit, non nimia cupiditas. — *arripit*] Hoc verbum et quae addita sunt *media de nocte*, quam subito fa-

stidium ceperit Vultei ad desperationemque consilium abiiciendi laboris adegerit, egregie ostendunt. — *scabrum*] Indicia haec sunt non rusticae sed tristioris vitae. — *durus*] Huc quoque trahendum *nimis*, nam Plin. Epist. VI, 30, 4: „Rusticorum praediorum administratio poscit durum aliquem et agrestem, cui nec labor ille gravis nec cura sordida nec tristis solitudo videatur.“ — *deosque Penates*] Sat. II, 3, 176. In obtestandi formula *quod* relativum est infinitum pro *propter quod*, ut Graecorum *ὅ* pro *διότι*. Virg. Aen. II, 141; cave tamen credas splendendam esse illam praepositionem. — *semel*] Negligenda fuit optimorum codicum auctoritas, qua quod comprobatur *simul* ineptum est. Ex Cruquii codd. unus tantum habet *semel*; praeterea unus Bersmanni; reliqui, ut videtur, omnes *simul*. Sed frequentissima est horum vocabulorum confusio. Ceterum vide ad Carm. IV, 3, 1.

Praestent, mature redeat repetatque relictâ.

Metiri se quemque suo modulo ac pede verum est.

EPISTOLA VIII.

Celso gaudere et bene rem gerere Albinovano

Musa rogata refer, comiti scribaeque Neronis.

Si quaeret quid agam, dic multa et pulchra minantem

Vivere nec recte nec suaviter: haud quia grando

5 Contuderit vites oleamque momorderit aestus,

Nec quia longinquis armentum aegrotet in agris,

Sed quia mente minus validus quam corpore toto

Nil audire velim, nil discere quod levet aegrum,

Fidis offendar medicis, irascar amicis,

10 Cur me funesto properent arcere veterno;

Quae nocuere sequar, fugiam quae profore credam;

Romae Tibur amem ventosus, Tibure Romam.

Epistola VIII.

Celsus Albinovanus (Epist. I, 3, 15) a Tiberio Nerone expeditionem in Armeniam faciente in cohortem receptus et ad scribendas arcanas, ut videtur, et gravioris argumenti litteras adhibitus ex Armenia vel ex itinere Horatium salutaverat. Respondet Horatius hac epistola et amico gratulatur de novo munere et parata ad honores via. Quo consilio scienter describit animi sui praesentem statum et adhortatur amicum, ne nimia futurarum rerum expectatione elatus animi continentiam perdat. In qua re tu noli reprehensionem odorari, quasi Celsus insperata sua fortuna inflatus amicos suos superbe et arroganter tractarit, cum videas quam leniter poeta amicum admonuerit post liberam illam ac familiarem aegritudinis suae descriptionem dulcissimamque de salute eius rebusque curam. Horatii autem aegritudinem eam esse docuit Iacobsius (Lect. Venus. p. 336), qua saepe tentatos videmus praestantissimos quosque homines, praesertim artifices, qui cum ad eam, quam animo et cogitatione sibi formaverint, artis suae speciem et ma-

gnitudinem pervenire posse sibi non videantur severiusque de se suisque studiis ipsi iudicent quam alii, non raro spem deponant animumque tristitia quadam obrui patiantur. Quem animi morbum alii neque intelligunt neque possunt aut consolationibus aut consiliis sanare; nimirum qui ita laborant alienam medicinam spernentes et remedia ex animo quaerentes morbum alere magis quam curare videntur. Scripta videtur epistola a. u. c. 734.

V. 1. *gaudere et bene rem gerere*] Bene comparatur Graecorum salutandi ratio *χαίρειν καὶ εὖ πράττειν*. — *minantem*] Hoc verbum cum h. l. idem sit quod *polliceri*, sua natura medium esse patet; est enim idem quod *prae se ferre*. cf. Sat. II, 3, 9. Illa autem *pulchra* non coercenda sunt poesis finibus sed intelligendus est totus animi cultus. — *suaviter*] Sat. I, 9, 5. — *nil audire*] cf. Epist. I, 1, 48. — *cur me*] vide ad Carm. I, 33, 3. — *veterno*] est torpor quidam animi, ortus ille quidem ex tristitia quadam et diffidentia rerum et virium nostrarum. cf. Virg. Georg. I, 124. — *Tibur*] Epist. I, 7, 45. Sat. II, 7, 28. Non satis firmis argumentis usi sunt qui

- Post haec, ut valeat, quo pacto rem gerat et se,
 Ut placeat iuveni percontare utque cohorti.
 15 Si dicet Recte, primum gaudere, subinde
 Praeceptum auriculis hoc instillare memento:
 Ut tu fortunam, sic nos te, Celse, feremus.

EPISTOLA IX.

- Septimius, Claudī, nimirum intelligit unus
 Quanti me facias: nam cum rogat et prece cogit,
 Scilicet ut tibi se laudare et tradere coner,
 Dignum mente domoque legentis honesta Neronis,
 5 Munere cum fungi propioris censet amici;
 Quid possim videt ac novit me valdius ipso.

praeter Sabinam villam etiam Tiburtinam Horatio fuisse affirmarunt. Summum quod possis concedere hoc est, habuisse Horatium deversorium aliquod Tibure; quamquam ne hoc quidem certum est. Cic. ad Fam. VII, 23 circ. med.: „Libentius emerim deversorium Terracinae, ne semper hospiti molestus sim.“ — *ventosus*] inconstans. cf. Ep. I, 19, 37. Ceterum in Bland. eodd. aliisque reperitur *venturus*. — *iuveni*] Tiberio tunc XXII annos nato. — *subinde*] deinde, protinus, continuo. cf. Colum. II, 4, 11: „Ager *primum* aretur ultima parte mensis Augusti, *subinde* Septembri sit iteratus.“ — *nos*] ego et omnes quibuscum versaris.

Epistola IX.

Marcello iuvene mortuo Tiberius Claudius Nero is Romae fuit, cuius gratia maxima commoda et summam spem futuri temporis praebere posset. Quare qui ad honores viam sibi vellent parare, ii quod proxime ad hoc novum sidus accedere studebant, publicarum rerum quae tum fuit ratio ipsa tulit. Et Horatius quoque Septimii iteratis precibus ita cessit, ut iuvenem amicum Neroni commendaret. Quod qua arte fecerit, ne aut Septimii iustis precibus deesset aut sua apud Neronem auctoritate arroganter abuti videretur, tu lege et admirare. De Septimio vide ad Carm. II, 6, de Nerone praecipuus

locus est Tacit. Ann. VI, 51: „Egregius vita famaue, quoad privatus vel in imperio sub Augusto fuerat.“ Inter eos qui Tiberium in Armeniam comitati sunt Septimius fuisse non videtur; si fuisset, in epistola III eum nominare Horatius non esset oblitus. Nam cuius ibi mentio fit, Titius diversus haud dubie fuit ab hoc; vide ibi ad v. 9. Quapropter libentius iis assentior qui a. 732, quam qui a. 734 scriptam suspicantur hanc epistolam; sed nihil in his rebus certum est.

V. 1. *nimirum*] Per totam epistolam urbanus quidam lepor ac iucunditas regnat; inde lenissimae ironiae in vocabulis quoque indicia. — *unus*] melius quam ceteri et ipse ego (v. 6). cf. Sat. II, 6, 57. — *tradere*] Cic. ad Fam. VII, 5: „Totum tibi hominem ita trado manu, ut aiunt, in manum tuam istam et victoria et fide praestantem.“ Sat. I, 9, 47. Epist. I, 18, 78. — *domoque*] usu et consuetudine. Versus negligenter factus in epistola *sermoni propiore* reprehendendus non est. Similes sunt Sat. I, 2, 39. I, 8, 9. 17. 36. 50. Epist. I, 5, 27. I, 16, 20. Sat. I, 2, 55. II, 8, 12. Epist. II, 2, 1. — *honestam*] neutro genere usus videtur quo magis evadat generalis sententia, ut Epist. II, 2, 179. — *Neronis*] Ipsum nomen cum vi post pronomem *tibi* infertur; i. e. hominis qualis est Nero. — *valdius*] A. P. 321.

Multa quidem dixi cur excusatus abirem:
 Sed timui, mea ne finxisse minora putarer,
 Dissimulator opis propriae, mihi commodus uni.
 10 Sic ego maioris fugiens opprobria culpa
 Frontis ad urbanae descendi praemia. Quodsi
 Depositum laudas ob amici iussa pudorem,
 Scribe tui gregis hunc et fortem crede bonumque.

EPISTOLA X.

Urbis amatorem Fuscum salvere iubemus
 Ruris amatores, hac in re scilicet una
 Multum dissimiles, at cetera paene gemelli
 Fraternis animis quidquid negat alter et alter,
 5 Annuimus pariter vetuli notique columbi.

— *mea*] meum apud te favorem et auctoritatem.— *dissimulator*] Cic. Acad. II, 5, 15: „Ita cum aliud diceret atque sentiret, libenter uti solitus est ea dissimulatione quam Graeci *σιγορῆται* vocant.“ — *opis*] facultatis, virtutis: Cic. Mil. 11, 30. Virg. Aen. I, 601.— *frontis*] Explicantur haec versu 12. Frons est animi ianua, tristitiae, hilaritatis, pudoris, impudentiae index: quare saepe accipitur pro animi affectu quo movetur. Cic. Prov. cons. 4: „libidines fronte et supercilio, non pudore et temperantia tegebat.“ id. Fin. II, 24; „ut in fronte ostentatio sit, intus veritas occultetur.“ — *urbanae*] qui in Urbe vivebant atque in circulis hominum versabantur, minus modesti ac timidi esse solebant, quam rustici; unde Cicero ad Fam. V, 12, 1: „deterruit pudor quidam paene *sub-rusticus*.“ Inde etiam de molestis et impudentibus moribus scurrarum; cf. Plaut. Trin. I, 2, 162: „Nihil est profecto stultius neque stolidius Quam *urbani* assidui cives quos *scurras* vocant.“ Epist. I, 15, 27. — *descendi*] Usurpatur h. v. de eo, quod infra dignitatem positum videmus quodque prope inviti suscipimus. Sic Liv. XXIII, 14. Cic. divin. in Caec. I, 1: „ad accusandum descendere.“ Caes. b. g. VII, 33. — *gregis*] Est partitivus genitivus, ut Carm. III, 13, 13.

Grege idem quod cohors comitum et amicorum.

Epistola X.

Horatium, qui diutius iam ruri degisset, Aristius Fuscus (Carm. I, 22. Sat. I, 9, 61. I, 10, 83.) litteris ut in urbem rediret invitasse videtur, describens simul urbanae vitae delicias et gaudia. Cui ita respondet poeta, ut rusticationis commoda et amoenitates urbi longe praeferendas esse doceat suosque de vita vere beata verissimos sensus expromat. Satiato sibi artibus urbis et deliciis opus esse ait quodam sincero et valido cibo, eumque ruri reperiri, ubi et corpori et animo recte possit consuli. Naturam enim hominum non posse reprimi fictasque delicias et iucunditates tandem fastidire. In urbe privari hominem vera libertate, in qua summum cerni debeat bonum, quo homines vere fruuntur. Quare se felicissime vivere in suo Sabino, ibi se liberum esse, ibi divitem, ibi regem. Cui felicitati si quid addi velit, dulcissimi amici se expectere praesentiam. De tempore huius epistolae cum certis indiciis destituamur, fluctuant viri docti inter annos 734—742.

V. 1. *salvere iubemus*] solita formula. Epist. I, 7, 66. Pluralis autem ponitur in huius modi enuntiatis ad evi-

- Tu nidum servas, ego laudo ruris amoeni
 Rivos et musco circumlita saxa nemusque.
 Quid quaeris? Vivo et regno, simul ista reliqui,
 Quae vos ad coelum effertis rumore secundo,
 10 Utque sacerdotis fugitivus liba recuso:
 Pane egeo iam mellitis potiore placentis.
 Vivere naturae si convenienter oportet,
 Ponendaeque domo quaerenda est area primum;
 Novistine locum potiore rure beato?
 15 Est ubi plus tepeant hiemes, ubi gratior aura
 Leniat et rabiem Canis et momenta Leonis,
 Cum semel accepit Solem furibundus acutum?
 Est ubi divellat somnos minus invida cura?
 Deterius Libycis olet aut nitet herba lapillis?
 20 Purior in vicis aqua tendit rumpere plumbum,
 Quam quae per pronum trepidat cum murmure rivum?
 Nempe inter varias nutritur silva columnas,

tandam iactantiam. — *multum*] vide ad Carm. I, 25, 5. — *annuimus*] Cicer. Orat. II, 70, 285: „Id quoque *toto capite annuit*.“ Facit vocab. *vetuli*, ut eam h. l. videamus festivitatem quae inest in hoc loco Catulli 61 (59), 163 sqq.: „Quae tibi sine serviat, Usque dum *tremulum movens Cana tempus anilitas* Omnia omnibus *annuit*.“ Masculina forma *columbi* necessaria videbatur in loco de duobus *viris*posito. Deinde ne ex antiquissimo uno codice *pariter vetulis notisque columbis* scribendum putes, memento quam saepe, comparationis particula ab Horatio omittatur. Iam cum annuere contrarium sit negando, comma ponendum post *alter* duximus, ut haec inde evadat sententia: quidquid negat alter, etiam alter negat. Cf. Sal. Cat. 29: „Idem velle atque nolle, ea demum firma amicitia est.“ — *nidum*] sumptum ex imagine columborum. — *effertis*] Ne antiquissimi quidem codices inter se consentiunt; alii simplex praebent verbum, alii ut antiquissimus omnium Bland, compositum *effertis*; in quo cum maiore pondere maior etiam elegantia inest. Cic. ad Fam. IX, 14, 1: „te summis laudibus ad coelum *extulerunt*.“

— *rumore secundo*] approbantibus plerisque. Sic poeta apud Ciceronem de divin. I, 16: „Solvere imperat secundo rumore adversaque avi.“ — *sacerdotis*] Ab iis qui sacra faciebant liba sacerdotibus relinquebantur; quae si plura essent, quam quibus sacerdotes ipsi possent uti, ne perirent, servis dabantur. Iam iocose fingitur servus sacerdotis alicuius olim taedio dulcium liborum, ut tandem pane vesceretur, aufugisse. — *naturae convenienter*] Cic. de off. III, 3, 7. — *domo*] antiquior forma pro *domui*. In insequenti descriptione suam villam Horatius respexisse videtur. Caniculae ortus erat a. d. XIII. Kal. Aug.; de Leone vide ad Carm. III, 29, 19. — *Momenta*] cf. ad Epist. I, 6, 4. — *lapillis*] de pavimentis tessellatis et vermiculatis ex marmore Numidico, de quo vide ad Carm. II, 18, 3. Solebant luxuriosi homines etiam pavimenta unguentis perfundere; inde *olet*. — *vicis*] Cic. Mil. 24, 64. cf. Sat. I, 9, 13. II, 3, 228. Epist. II, 1, 269. — *trepidat*] Carm. II, 3, 12.

V. 22. *Nempe*] Inest in hoc loco ironica quaedam argumentatio de praestantia ruris inde sumpta quod, qui ur-

- Laudaturque domus, longos quae prospicit agros.
 Naturam expellas furca, tamen usque recurret,
 25 Et mala perrumpet furtim fastidia victrix.
 Non, qui Sidonio contendere callidus ostro
 Nescit Aquinatem potentia vellera fucum,
 Certius accipiet damnum propiusve medullis,
 Quam qui non poterit vero distinguere falsum.
 30 Quem res plus nimio delectavere secundae,
 Mutatae quatient. Si quid mirabere, pones
 Invitus: fuge magna; licet sub paupere tecto
 Reges et regum vita praecurrere amicos.
 Cervus equum pugna melior communibus herbis
 35 Pellebat, donèc minor in certamine longo
 Imploravit opes hominis frenumque recepit;
 Sed postquam victor violens discessit ab hoste,
 Non equitem dorso, non frenum depulit ore.
 Sic qui pauperiem veritus potiore metallis

bes incolunt amoenitates ruris imitantur easque domos ipsi praeferunt quae magnum in agros habent prospectum. Versu 22 describitur viridarium in impluvio aedium cinctum peristyllo ex columnis marmoreis vario colore maculatis exstructo. Plin. Epp. V, 6: „diaeta cingit areolam, quae quattuor platanis inumbratur. Inter has marmoreo labro aqua exundat circumiectasque platanos et subiecta platanis leni adspersione fovet.“ Senec. Controv. 5, 5: „Intra aedificia vestra undas et nemora comprehenditis.“ — *expellas furca*] ex proverbio: cum ignominia exturbare aliquem. — *Non qui*] Incipit ab hoc versu altera epistolae pars, ita ut tota in duas aequales partes dividatur, casu magis, ut videtur, quam consilio. Ruri igitur fieri potest ut convenienter naturae vivamus, natura autem ubique suum ius postulat, quare rustica vita optima est. Quod ut recte intelligatur, necesse est verum a falso distinguatur, ne beatitudinem quaeramus, servitutem nanciscamur. — *Sidonio*] *Σιδών*, *Σιδῶνος* et *Σιδῶνος*, longa tamen o littera magis usitata in Graecis. Inde utrumque apud Latinos, *Sidōnius* et *Sidōnius*, praefer-

rebantque poetae utrum esset aptius ad metrum. Epod. 16, 59. Virg. Aen. IV, 545. XI, 74. — *contendere*] cum dativo, i. e. comparare et comparando distinguere. — *Aquinatem*] „Aquimates purpurae similes sunt Tyriis; multum ergo imperiti falluntur.“ *Acro.* — *plus nimio*] vide ad Carm. I, 33, 1. — *pones*] depones, et carebis. cf. Sat. II, 3, 16. — *reges*] Stoica haec est sententia, ac proprie accipiendi sunt *reges*, non magni ac potentes homines intelligendi. — *praecurrere*] Sat. I, 7, 8. — *Cervus equum*] Ex fabula Aesopia, qua olim Stesichorus Himerenses monuit ne se Phalaridis tyrannidi subiicerent. Paulo mutata fabula est apud Phaedrum IV, 4. — *melior*] de fortitudine, ut Carm. I, 15, 28. III, 6, 16. Sat. II, 5, 19. — *victor violens*] Epitheton *violens* tanquam molestum et supervacaneum exturbare conatus est Benteleius et substituere aut *victo sonipes* aut *victor domito*. Non bene, quoniam hoc adiectivum ex natura victorum petitum egregie describit equum, qui cum magnus sibi videretur victor violentiamque animi et iactantiam prae se ferret, inscius in servitutem inciderat hominis.

- 40 Libertate caret, dominum vehet improbus atque
 Serviet aeternum, quia parvo nesciet uti.
 Cui non conveniet sua res, ut calceus olim,
 Si pede maior erit, subvertet, si minor, uret.
 Laetus sorte tua vives sapienter, Aristi,
 45 Nec me dimittes incastigatum, ubi plura
 Cogere quam satis est ac non cessare videbor.
 Imperat aut servit collecta pecunia cuique,
 Tortum digna sequi potius quam ducere funem.
 Haec tibi dictabam post fanum putre Vacunae,
 50 Excepto quod non simul esses, cetera laetus.

V. 39. *Sic qui*] Eadem ratione qui splendore magnarum rerum captus simplicitatem naturae spernit, ut fere fit ab hominibus magnarum urbium divitiis et deliciis laudantibus, dum paupertatem quavis ratione malisque artibus vincere studet, libertatem animi perdit magnumque sibi imponit dominum, quem nunquam ad maiora semper tendens poterit excutere. Is autem dominus ipsa est animi cupiditas externarumque rerum augendarum perpetua fames. — *dominum vehet*] cf. Epod. 17, 74. Futurum tempus, optimorum codicum auctoritate munitum, non est posthabendum praesenti *vehit*. Quod qui praetulerunt eo iam tempore hominem, quo paupertatem veritus libertate careat, dominum vehere affirmarunt; recte quidem, sed futurum *vehet*, quocum coniungas velim *aeternum*, instans tempus non excludit. *Improbus* habet causam cur serviat; est enim immodicus, intemperatus. — *ut calceus olim*] Epictet. enchirid. 39: „Μέτρον κτήσεως τὸ σώμα ἐκίστω ὡς ὁ ποῦς ὑποδήματος.“ Dio Chrysost. or. 17. p. 472. R.: „Καὶ ἐσθῆτα μὲν οὐδεὶς βούλεται μείζω τοῦ σώματος ἔχειν, ὡς δύσχερστον ὄν· οὐσίαν δὲ τῷ παντὶ μείζω τῆς χρείας ἔχειν ἅπαντες ἐπιθυμοῦσιν, οὐκ εἰδότες, ὅτι τοῦτο ἐκείνου χαλεπώτερον.“ De *olim* adverbio vide ad Carm. II, 10, 17. — *nec me di-*

mittes] „Quo ego in te utor iure, eodem tu volo in me utaris; corrige me, ubi rectum modum egressum me videris.“ Vides Horatium non prae se ferre vultum molesti reprehensoris. — *pecunia cuique*] Sapienti servit, stulto imperat pecunia; sed sapientem esse decet hominem et servire pecuniam. Recte igitur *aut servit*, non *haud servit*, quae est Waddellii et Doeringi coniectura. — *ducere funem*] Imago sumpta videtur vel de fune ductario in machinis tractoriis vel de remulco. — *dictabam*] Imperfectum ut in clausulis epistolarum *scribebam, dabam*. — *Vacunae*] „Vacuna apud Sabinos plurimum colitur; quidam Dianam, nonnulli et Cererem esse dixerunt, alii Venerem, alii Victoriam, deam vacationis, quod faciat vacare a curis. Sed Varro primo rerum divinarum Minervam dicit, quod ea maxime hi gaudent qui sapientiae vacant.“ *Comm. Cruq.* Quae nominis notatio sive vera est sive falsa, illud certum videtur, non inconsulto positum a poeta esse nomen, sed ut locum indicet ad meditationem aptissimum a negotiisque molestis remotissimum. Invenire sibi visi sunt hunc locum in monte hodie *Gennaro* appellato, haud procul a vico *Rocca Giovane*, ubi parietinae sunt templi Victoriae ab imperatore Vespasiano restituti, quod Vacunae deae quondam fuisse suspicantur.

EPISTOLA XI.

Quid tibi visa Chios, Bullati, notaque Lesbos,
 Quid concinna Samos, quid Croesi regia, Sardis,
 Smyrna quid et Colophon? maiora minorave fama
 Cunctane prae Campo et Tiberino flumine sordent?

5 An venit in votum Attalicis ex urbibus una,
 An Lebedum laudas odio maris atque viarum?
 Scis Lebedus quid sit: Gabiis desertior atque
 Fidenis vicus; tamen illic vivere vellem.

Oblitusque meorum obliviscendus et illis

10 Neptunum procul e terra spectare furem.

Sed neque qui Capua Romam petit, imbre lutoque
 Adpersus volet in caupona vivere; nec qui

Epistola XI.

Ad Bullatium, amicum aliunde non notum, scribit Horatius de tranquillitate animi. Bullatius enim nescimus qua causa permotus Roma et Italia relictis tranquillam vitam in longinquis regionibus quaesiverat. Hunc igitur ut tandem redeat adhortatur poeta, quoniam cum ex patria aliquo cedamus, non cedamus in perpetuum aut diutius quam quae ad cedendum nos permoverint causae maneant, ac praeterea vera animi tranquillitas non ex loco petatur, sed ex ipso animo bene regendo certisque finibus coercendo. Incertae sunt virorum doctorum de anno quo scripta epistola videatur suspiciones; alii qui motibus civilibus Bullatium ut exiret perductum opinantur ad annum 725 eam referunt, alii non maiore fide ad a. 733 descendunt.

V. 1. *notaque*] Nobilis et propter vina et propter poetas. — *concinna*] *εὐφρόδμος*. Cicer. Pis. 10, 22: „concinna heluo“ (elegant). — *minorave*] Sic optimi codices, ut videtur, omnes; qui cum *σολοικίζειν* viderentur, posthabiti sunt faciliori scripturae *minorane*. Sed sublato post voc. *fama* interrogationis signo hunc tu constitue ordinem verborum: eunctane, sive maiora sunt fama sive minora, sordent cet. Vide ad Sat. I, 2, 63. Hanc meam scribendi et explicandi rationem nunc a Baitero (Orell. ed. 3^{ia}) rece-

ptam esse video. — *Attalicis*] Pergamo, Apollonia, Thyatira, aliis. — *Lebedum*] Distabat Lebedus 120 stad. a Colophone; scenicorum artificum conventus ibi erat et domicilium, et annua in Bacchi honorem certamina habebantur. Praeterea Strabo Myconnesios Lebedum migrasse dicit, a Lebediis benevole acceptos propter hominum ibi paucitatem. Hoc igitur oppidum *ἐξ ἀποροδοκίτων* superioribus additur, ut transeat leniter ad rem: „an tibi placet Lebedus, parvum et desertum oppidum, ubi si quae me necessitas ex societate hominum pelleret, contento possem vivere animo. Idem tu fortasse: sed huius modi refugia non sunt diutius occupanda quam ipsa necessitas fert, alioquin non supervacanea solum sunt sed etiam molesta. Parva incommoda homines non debent in desperationem agere aut in contrariam partem trahere.“ Sic cohaerent inter se sententiae usque ad v. 20; neque potuit quidquam perversius excogitari nisi hoc, tribuendos esse vv. 7—20 Bullatio aut dividendos eos esse inter Bullatium et Horatium. — *meorum*] amicorum. — *Neptunum*] neglectis hominum curis ac negotiis ibi mecum vivere possem magnitudinem naturae rerum contemplans et admirans, indeque animum alens. — *caupona*] incommoda ac sordida, ut nisi qui summa necessitate coactus esset, nemo diutius ibi vellet commorari. cf. Sat.

- Frigus collegit, furnos et balnea laudat
 Ut fortunatam plene praestantia vitam:
 15 Nec si te validus iactaverit Auster in alto,
 Idcirco navem trans Aegaeum mare vendas.
 Incolumi Rhodos et Mytilene pulchra facit quod
 Paenula solstitio, campestre nivalibus auris,
 Per brumam Tiberis, Sextili mense caminus.
 20 Dum licet ac vultum servat Fortuna benignum,
 Romae laudetur Samos et Chios et Rhodos absens.
 Tu, quamcunque deus tibi fortunaverit horam,
 Grata sume manu neu dulcia differ in annum,
 Ut quocunque loco fueris, vixisse libenter
 25 Te dicas: nam si ratio et prudentia curas,
 Non locus effusi late maris arbiter aufert,
 Coelum, non animum mutant qui trans mare currunt.
 Strenua nos exercet inertia; navibus atque
 Quadrigis petimus bene vivere. Quod petis, hic est,
 30 Est Ulubris, animus si te non deficit aequus.

EPISTOLA XII.

Fructibus Agrippae Siculis, quos colligis, Icci,
 Si recte frueris, non est ut copia maior

I, 5, 4. Epist. I, 17, 8. — *incolumi*] integro homini, non animi quadam inconstantia vel aegritudine laboranti. — *paenula*] vestis gausapina vel scortea, quo per itinera ad arcendum frigus utebantur. Contrarium est *campestre*, linteum subligaculum, quo iuvenes corpora exercentes pudenda operiebant, cetera nudi.

V. 22. *Tu quamcunque*] Omissi sunt hi duo versus in antiquis codicibus; quod quomodo negligentia scribarum fieri potuerit h. l. manifestum est. Aberravit oculus a. v. 22 ad v. 24, ut omissis duobus scriberet manus *Tu quocunque loco*, ut est in iisdem codicibus. — *grata manu*] cf. Epist. I, 4, 14. — *arbiter*] cf. Carm. I, 3, 15. — *Strenua inertia*] oxymoron, ut apud Senecam de brev. vit. 11. *desidiosa occupatio*, de tranquill. anim. 12 *in-*

quieta inertia. Nam homines qui semper magna moliuntur perpetuoque labore aguntur (*exercentur*), nihil tamen quod vere bonum sit aut magnum efficiunt, nihil omnino differunt ab aliis qui nihil minati sunt. — *Ulubris*] „Ulubrae locus in Italia, in quo nutritus est Caesar Augustus, propter quam causam ab Horatio nominatur, cum sit desertissimus vicus.“ *Porphyr.* Cum his coniunge Suetonium Octavian. 6. „Nutrimentorum eius ostenditur adhuc locus in avito suburbano iuxta *Velitras*.“ Quare reliquias Ulubrarum nunc sibi reperire visi sunt in parietinis inter *Velletri* (Velitrae) et *Mole di Taberna* ad viam Appiam.

Epistola XII.

Iccius, de quo vide ad Carm. I, 29, sive vere cum Aelio Gallo infelicem

Ab Iove donari possit tibi. Tolle querelas:

Pauper enim non est, cui rerum suppetit usus.

5 Si ventri bene, si lateri est pedibusque tuis, nil

Divitiae poterunt regales addere maius.

Si forte in medio positorum abstemius herbis

Vivis et urtica, sic vives protinus, ut te

Confestim liquidus fortunae rivus inauret,

10 Vel quia naturam mutare pecunia nescit,

Vel quia cuncta putas una virtute minora.

Miramur, si Democriti pecus edit agellos

Cultaque, dum peregre est animus sine corpore velox;

illam in Arabiam expeditionem fecit sive mutato consilio Romae mansit, post a. 730 procurator praediorum Sicularum M. Agrippae factus Horatio amico olim litteris conquestus esse videtur de nimis negotiis, de ingrata rationum ac tabularum cura, deque inopia sua, qua alienis laboribus ut totum se dederet coactus nihil prope otii servaret ad colenda ea studia, quibus maxime delectaretur: feliciores esse qui suis bonis beati suam quoque voluntatem suaeque consilia sequi possent. De his rebus amicum consolatur Horatius eique Pompeium Grosphum (Carm. II, 16), quem officiis sibi conciliare studeat, commendat. Epistola scripta videtur a. 735.

V. 1. *fructibus*] Fruges proprie dicuntur frumentum et legumina; fructus totius generis est appellatus, inde redditus praediorum et possessionum significat. Liv. XLV, 40. XXI, 7. Dicit igitur Horatius, ex fructibus Agrippae tantum etiam Iccio redundare fructum, quantum usus postulet; plura autem quam quae sint necessaria ne Iovem quidem hominibus dare posse. cf. Epist. II, 2, 160 sqq. Haec ratio quibus minus placuerit, credant licet, Agrippam atque Iccium hoc inter se pactos esse, ut dominus certum redditum modum sibi sumeret, quae reliqua essent procuratori relinqueret. Nihil enim in hac re certum, nisi Iccium in Sicilia habuisse, unde honeste viveret. *Horkeius* ex coniectura scribendum putavit pro Agrippae: *Acrillae*; quod nomen est oppiduli non longe a Syracusis siti. Sed sensit ipse, oppidi nomini

non bene accedere terrae (*Siculis*) nomen; nam Horatium vel aequalium vel posterorum inscitiae rerum geographicarum prospicere voluisse, ego vero non credam. — *est ut*] vide ad Carm. III, 1. 9. — *ventri*] cf. Solon. ap. Plut. Sol. 2: „*Ἰσὸν τοι πλουτοῦσιν, ὅτω πολὺς ἄγροσός ἐστιν καὶ χρυσὸς καὶ γῆς πρηγοφόρον πεδιά, Ἴπποι δ' ἡμίονοί τε, καὶ ὧ τὰ δέοντα πάρεστιν Γαστροί τε καὶ πλευραῖς καὶ ποσὶν ἄβρὰ παθεῖν.*“ — *pedibus*] podagra non laborantibus. — *in medio positorum*] Sat. I, 2, 108. In medio posita sunt omnia quae parata iacent ad usum. Quae cum h. l. contra herbas et urticam, vilia ciborum genera, collocantur, lautiores cibos significant, quibus Agrippae procuratori quotidie vesci licuit. Ad Iccium enim accommodata sententia est, etiamsi unum hunc non magis tangit quam mille alios. — *et urtica*] de part. *et* vide ad Carm. I, 3, 19. — *ut te*] etiamsi, licet te. Epod. 1, 21. — *naturam mutare*] cf. Epod. 4, 6. — *miramur*] In praecedentibus versibus nihil inest dissimulationis; vere potius laudat Horatius amicum suum, quod inter contagia lucri incolumis manserit Democritumque ipsum philosophicarum rerum studio superaverit. Democritus autem „ut quam minime animus a cogitationibus abduceretur, patrimonium neglexit, agros deseruit incultos, quid quaerens aliud nisi beatam vitam?“ Cic. Fin. V, 29, 87. Democritus Abderites, Eleaticus philosophus. — *peregre est*] peregrinatur quasi animus a corpore segregatus totumque mundum pervolans ac

- Cum tu inter scabiem tantam et contagia lucri
 15 Nil parvum sapias et adhuc sublimia cures:
 Quae mare compescant causae, quid temperet annum,
 Stellae sponte sua iussaene vagentur et errent,
 Quid premat obscurum lunae, quid proferat orbem,
 Quid velit et possit rerum concordia discors,
 20 Empedocles an Stertinium deliret acumen?
 Verum seu pisces seu porrum et caepe trucidas,
 Utere Pompeio Grospho et, si quid petet, ultro
 Defer: nil Grosphus nisi verum orabit et aequum.
 Vilis amicorum est annona, bonis ubi quid deest.
 25 Ne tamen ignores, quo sit Romana loco res:
 Cantaber Agrippae, Claudii virtute Neronis
 Armenius cecidit; ius imperiumque Phraates

perlustrans, cf. Carm. I, 28, 5 sq. — *scabiem*] coniunge cum *lucri*. Cic. de leg. I, 17, 47: „Voluptas malorum mater omnium, cuius blanditiis corrupti quae natura bona sunt, quia dulcedine hac et *scabie* carent, non cerimus satis.“ — *adhuc*] etiam nunc, cum tamdiu sis versatus inter lucrum et negotia.

V. 18. *obscurum*] *πολυπικνῶς* positum: quid caligine premat lunam, ut quae modo clara fuerit et splendida, iam obscura sit. Noli intelligere defectum lunae. — *concordia discors*] Oxy-moron; nam mundi partes cum discordia distrahi videntur, summa tamen concordia continentur. Ovid. Met. I, 433. — *Stertinium*] Sat. II, 3, 33. Hunc facete pro Stoicis posuit. *Stertinium* pro *Sertinianum*, cf. Carm. IV, 12, 18. Empedocles Agrigentinus, Pythagorae discipulus, ex quattuor naturis divinis (elementis) omnia constare voluit, praeterea amicitia (*φιλία*) cuncta copulari et discordia (*νεῖκος*) dissolvi. De Zenone autem Stoicorum principe Cicero scribit de N. D. I, 14, 36: „Zeno naturalem legem divinam esse censet eamque vim obtinere, recta imperantem prohibentemque contraria;“ et ibid. §. 39: „Chrysippus ait vim divinam in ratione esse positam et universae naturae animo atque mente: ipsumque mundum deum dicit esse et

eius animi fusionem universam; tum eius ipsius principatum qui in mente et ratione versetur, communemque rerum naturam universam atque omnia continentem; tum fatalem vim et necessitatem rerum futurarum.“ — *trucidas*] proprie de pecore. cf. Sall. Cat. 58, 21. Festive Iccium, hominem tenui victu contentum et lautarum rerum abstemium, describit ut Pythagorae et Empedoclis sectatorem, qui propter *μετεμψύχωσιν* quaecunque moventur et vivunt necari vetabant. Nam de parco Siculorum vivendi genere cum Niebuhrio, immortalis viro, cogitare, quasi Siculi ut Graeci herbis et piscibus, Romani carnibus magis delectati sint, id quidem videntur vetare *Siculae dapes*. Carm. III, 1, 18. — *deest*] Monosyllabum. Memorabile est, in antiquissimo cod. Blandin. scriptum fuisse sic: *de'st.* — *Cantaber*] vide ad Carm. II, 6; de Nerone vide ad Epist. I, 3. Phraates s. Arsaces XV eodem anno 734 signa Romanis olim erepta Augusto per Tiberium sponte sua remisit. — *genibus minor*] supplex, nam „Phraates cuncta venerantium officia ad Augustum verterat.“ Tacit. Ann. II, 1. Ceterum *Caesaris* genitivus coniungendus est et cum *ius imperiumque* et cum *genibus*. — *Copia*] Carm. Saec. 60.

Caesaris accepit genibus minor; aurea fruges
Italiae pleno defundit Copia cornu.

EPISTOLA XIII.

Ut proficiscentem docui te saepe diuque,
Augusto reddes signata volumina, Vini,
Si validus, si laetus erit, si denique poscet:
Ne studio nostri pecces odiumque libellis
5 Sedulus importes opera vehemente minister.
Si te forte meae gravis uret sarcina chartae,
Abiicito potius quam quo perferre iuberis
Clitellas ferus impingas Asinaeque paternum
Cognomen vertas in risum et fabula fias.
10 Viribus uteris per clivos, flumina, lamas:

Epistola XIII.

Horatius quamquam, ne libertatem suam minueret aut perderet, ad Augusti aulam et favorem propius accedere ausus non erat, tamen Carminum tres libros simul editos, quibus etiam Augusti merita laus praedicaretur, imperatori mittere non potuit dubitare. Quod ut recte faceret in suoque de hac re pronuntiatio olim consilio (Sat. II, 1, 18 sqq.) constantem sese praeberet, hanc addidit epistolam ad nuntium, per quem ex Sabino in urbem volumina missurus erat; quamquam ad eum hominem nunquam missa est epistola, sed Augusti gratia scripta „cui, inquit Iacobsius, poeta verecundiam suam vix poterat commendare urbanium. Paratam eadem habebat excusationem, si forte poemata sua Augusto ab amicis nimis officiosis male essent tradita aut minus apte commendata.“ Consilium quod sequitur poeta elucet ex vv. 4. 5. 16. 17, tectum illud quidem et velatum innocentem et iocoso quodam ludibrio nominis, quo usus erat pater eius hominis, quem cum libris ad Augustum mittebat. C. enim Vinus Fronto patrem habuit cognomine Asinam; ipse non servus Horatii sed liber homo ex vicinitate Sabinae villae; quo ad negotia facienda epistolasque ferendas fortas-

se saepius usus erat Horatius. In illo autem ioco nihil inest protervi aut inhonesti, praesertim antiquis hominibus. Scripta videtur epistola a. 730 vel 731, quo anno coniunctos tres carminum libros Horatius edidit.

V. 1. *saepe diuque*] Si operae pretium est quaerere, quomodo poeta epistolam ad Vinum iam profectum mittere potuerit, cogita sis Vinum vespertino tempore volumina accepisse, dein domum ivisse dormitum, ut altero die mane Romam pergeret. Iam habes tempus quo haec scribere Horatius potuit. Sed praestat eiusmodi quaestiones non movere in poetis. — *sedulus*] ne nimia sedulitate et vehementia studii noceas, mihi carminibusque indignationem Augusti moveas. Coniunge *sedulus opera vehemente minister*. — *sarcina*] iam paratur de nomine Asinae iocus et ludus, qui diserte proponitur vv. 8. 9. Potest autem Vinus duplici ratione peccare, et nimia sedulitate (Epist. II, 1, 260) et importuno deponendi oneris studio. Vinus enim, ad sua negotia facienda Romam profectus, tantum officii causa Horatii carmina secum portat. — *clitellas impingas*] ut „iniquae mentis asellus, cum gravius dorso subiit onus“ (Sat. I, 9, 20). — *abiicito*] non in itinere, quasi poeta nullum scriptis suis pretium statuatur; sed iubet eum remittere

- Victor propositi simul ac perveneris illuc,
 Sic positum servabis onus, ne forte sub ala
 Fasciculum portes librorum ut rusticus agnum,
 Ut vinosa glomus furtivae Pyrrhia lanae,
 15 Ut cum pileolo soleas conviva tribulis;
 Ne vulgo narres, te sudavisse ferendo
 Carmina, quae possint oculos auresque morari
 Caesaris; oratus multa prece, nitere porro.
 Vade, vale, cave ne titubes mandataque frangas.

EPISTOLA XIV.

Vilice silvarum et mihi me reddentis agelli,
 Quem tu fastidis habitatum quinque focis et

onus, si in itinere molestum id sibi fore sentiat. — *sic ne*] A. P. 152. Decore dextera libellos tenendos esse praecipit. — *Pyrrhia*] „Nomen est ancillae in quadam fabula Titinii, quae furata lanae glomos ita gestavit ut deprehensa sit.“ *Comm. Crug.* Ceterum *Lachmann.* ad Lueret. p. 408: „*Pyrrhia* neque Graecae neque Romanae feminae nomen est nec potest dubitari, quin illud a librariis ita corruptum sit.“ — *glomus*] Alii ex bonis codd. *glomos*, quae tamen forma auctoritate destituitur satis firma. Praeterea Bentleyus: „satis profecto, inquit, erit Pyrrhae, si *unum* furtivae lanae glomus sub ala recondat.“ — *furtivae*] furto ablatae, ut Ep. I, 3, 20. Liv. XLV, 39: „An noctu, tanquam furtiva, in aerarium deportabuntur.“ — *tribulis*] infimae sortis homo. cf. Mart. IX, 58, 8: „Nil est tritius Hedyli lacernis, Non ansae veterum Corinthiorum, ... Non pallens toga mortui *tribulis*.“ Is igitur a locuplete homine ad coenam vocatus calceis vel peronibus indutus venit et, cum servum non habeat, soleas quibus triclinium intret, et pileum quo nocte revertens a tempestate et frigore defendatur, ipse sub ala portat. cf. Sat. II, 8, 77. — *ne narres*] Recte per asyndeton; alii vel *nec* vel *neu*. Sic per totam epistolam singula praecepta separantur. — *sudavisse ferendo*] i. e. afferre. Nihil in hoc loco inest ingratae rusticitatis, ut visum est non-

nullis. — *oratus*] ab hominibus obviam venientibus et, quid afferas, quod tendas, rogantibus. — *titubes*] Extrema et generalis admonitio, ne quid in commissa re delinquat. Plaut. Mil. III, 3, 70: „Accurate et commode hoc quod agendum est exsequamur, Ne quid, ubi miles venerit, titubetur. — *cave*] de correpta ultima syllaba ex usu vitae quotidiano cf. Sat. II, 3, 38. — *frangas*] male exsequaris; ut dicimus *fidem, leges, foedus frangere*. Nulla in hoc loco inesse videtur descriptio asini titubantis, procumbentis resque impositas frangentis.

Epistola XIV.

Haec epistola vilici nomine simulato amicorum causa ab Horatio scripta est. Is enim cum ad consolandum L. Aelium Lamiam (Carm. I, 26. III, 17) de morte Quinti fratris diutius iam in urbe esset commoratus, magno tranquillitatis desiderio in villam suam tractus, ab amicis tamen videtur esse retentus, nescientibus neque intelligentibus quid poetam tam vehementer ex urbe in rusticam solitudinem vocaret. Quos ut de animi sui condicione doceret, hanc ad vilicum urbis desiderio agitatam epistolam fluxit. Romae autem scriptam esse docent vv. 8. 22. 37; quo anno, nos latet. Kirchnerus videtur scripta esse a. 732, sed res prorsus incerta est.

V. 2. *habitatum*] Recte iam scholi-

- Quinque bonos solitum, Variam dimittere patres,
 Certemus, spinas animone ego fortius an tu
 5 Evellas agro et melior sit Horatius an res.
 Me quamvis Lamiae pietas et cura moratur,
 Fratrem moerentis, raptō de fratre dolentis
 Insolabiliter, tamen istuc mens animusque
 Fert et amat spatiis obstantia rumpere claustra.
 10 Rure ego viventem, tu dicis in urbe beatum:
 Cui placet alterius, sua nimirum est odio sors.
 Stultus uterque locum immeritum causatur inique:
 In culpa est animus, qui se non effugit unquam.
 Tu mediastinus tacita prece rura petebas,
 15 Nunc urbem et ludos et balnea vilicus optas;
 Me constare mihi scis et discedere tristem,
 Quandocunque trahunt invisa negotia Romam.
 Non eadem miramur; eo disconvenit inter
 Meque et te: nam quae deserta et inhospita tesqua
 20 Credis, amoena vocat mecum qui sentit, et odit
 Quae tu pulchra putas. Fornix tibi et uncta popina

astae: „quem quinque aliquando possederunt senatores.“ Nam fuit praedium Horatianum compositum ex agris, qui, ante quam perpetuis bellis civilibus frequentibusque agrorum distributionibus agri prope omnes dominos suos amiserunt, quinque Sabinis agricolis fuerant iisque non civibus solum Varianis sed decurionibus. Hos enim Horatius *patres* appellare videtur, non patres familias; qui praedii magnitudinem non satis illustrarent. Horatio in villa erant octo servi (Sat. II, 7, 118), praeterea procaces vernae (Sat. II, 6, 66); vilico cura habenda est silvarum, agrorum, hortorum: ipse igitur Horatius agrum coluit, neque pro certa mercede colonis partiariis colendum tradiderat. Et satis amplum fuit praedium; nam octo servi (cum quatuor bubus) ducentorum iugerum agro subigendo sufficebant teste Columella II, 13. — *spinas animone*] curas ac perturbationes, quas rusticando ex animo sese pellere ait Horatius. Epist. II, 2, 212. — *Lamiae pietas*] in fra-

trem mortuum. — *moerentis*] Cic. ad Att. XII, 28: „Moerorem minui, dolorem non potui nec si possem vellem.“ — *spatiis*] Sumpta est metaphora ex ludis Circensibus; nam *spatia* saepe locum significant ad currendum vel deambulandum patentem. — *claustra*] carceres. — *effugit*] cf. Carm. II, 16, 19. — *mediastinus*] servus infimi ordinis, ad omnia negotia paratus, etiam viliora. Qui tunc vilicus praeerat rusticae familiae, is olim, cum Horatius iuvenis esset (v. 32—34), magnam suam fidem probaverat in eiusque rei gratiam eo munere auctus erat. — *quae deserta*] In antiquissimo cod. Bland. et alio antiquo reperitur *qua* cum glossa *ubi*, quod ferri nequit propter insequens verbum *vocat*. — *tesqua*] „loca aditu difficilia et inculta lingua Sabinorum sic nominantur.“ *Comm. Cruq.* Scripserunt alii ex nonnullis, non omnibus, codd. *tesca*. Sic variant etiam Sat. II, 5, 36 inter *cassa* et *quassa*, infra 37 inter *obliquo* et *oblico*, alias simili modo, ita tamen incerto, ut Cruquius ad

- Incutiunt urbis desiderium, video, et quod
 Angulus iste feret piper et thus ocius uva,
 Nec vicina subest vinum praebere taberna
 25 Quae possit tibi, nec meretrix tibicina, cuius
 Ad strepitum salias terrae gravis: et tamen urges
 Iampridem non tacta ligonibus arva bovemque
 Disiunctum curas et strictis frondibus exples;
 Addit opus pigro rivus, si decidit imber,
 30 Multa mole docendus aprico parcere prato.
 Nunc age, quid nostrum concentum dividat, audi.
 Quem tenues decuere togae nitidique capilli,
 Quem scis immunem Cinarae placuisse rapaci,
 Quem bibulum liquidi media de luce Falerni,
 35 Coena brevis iuvat et prope rivum somnus in herba;
 Nec lusisse pudet, sed non incidere ludum.
 Non istic obliquo oculo mea commoda quisquam
 Limat; non odio obscuro morsuque venenat;
 Rident vicini glebas et saxa moventem.
 40 Cum servis urbana diaria rodere mavis,
 Horum tu in numerum voto ruis; invidet usum
 Lignorum et pecoris tibi calo argutus et horti.

Sat. I. l. affirmet, etiam *quarere* pro *carere* se in vetustis codd. invenisse. — *uva*] Ex h. l. non licet concludere, in Sabino Horatii vites et vinum omnino non fuisse, id quod Carm. I, 20 aperte refutatur, sed tam vile fuit quod ibi nascebatur vinum, ut vilicus id eo nomine indignum haberet.

V. 26. *et tamen*] Ponere solebat vilicus incommoda sua et magnos labores, quibus opprimeretur in villa, contra illas delicias quibus olim in urbe fructus esset, tunc carere deberet. — *pigro*] cum nihil est quod praeterea agere debeat, ita ut per solitos labores quieti sese possit dare. — *rivus*] vide supra p. 9. — *Cinarae*] vide ad Carm. IV, 13, 21. Cinarum Horatium vere amavit, non ut antea alios munerum gratia; poeta igitur *immunis* placuit mulieri in alios rapaci. — *media de luce*] Sat. II, 8, 3. — *morsuque*] cf. Carm. IV, 3, 16. De *obliquo oculo* cf. Virg.

Aen. XI, 337. *Lachmann.* ad Lucret. p. 143: „Horatio ludere licuit, quasi *limi* oculi a lima ducerentur, quemadmodum et Plautus ludit cum *dolum dolari* dicit.“ — *rident*] non ob imperitiam poetae, sed quod elegantiorum hominem his laboribus exerceri vident et mirantur. — *calo*] Universe significat vilem servum ex familia urbana, qui cum bene perspiciat, quanto melius sit vilico ruri viventi (*argutus*), huic multa commoda invidet, largum usum lignorum, pecoris, olerum (*horti*); nam vilioribus servis in urbe diaria parca saepe manu dabantur; inde v. 40 *rodere*. — *bos piger*] uterque piger est, et bos et equus, laudatque alterius sortem, cum incommoda eius non sentiat. Itaque cum bove illud epitheton coniunxit Horatius vicinitate loci, cum equo et necessitate sententiae et vinculo caesurae, quae tertium pedem dividit. Abstinendum igitur est

Optat ephippia bos piger optat arare caballus;
Quam scit uterque libens, censebo, exerceat artem.

EPISTOLA XV.

Quae sit hiems Veliae, quod coelum, Vala, Salerni,
Quorum hominum regio et qualis via, — nam mihi Baias
Musa supervacuas Antonius, et tamen illis
Me facit invisum, gelida cum perluor unda
5 Per medium frigus. Sane murteta relinqui
Dictaque cessantem nervis elidere morbum
Sulfura contemni vicus gemit, invidus aegris,
Qui caput et stomachum supponere fontibus audent
Clusinis Gabiosque petunt et frigida rura.

Epistola XV.

Anno 731 Antonius Musa medicus Augustum vehementi arthritico dolore frigida aqua, quam ei ad bibendum et ad lavandum praescripserat, summo populi gaudio liberaverat suaeque arte, ut videtur, alias sanandorum morborum rationes obscuraverat. Iam Horatius quoque, qui hac aetate infirma saepe valetudine laborabat in Baianaque balnea ire solebat, Musam consuluit accepitque praeceptum, ut calidis balneis Baianis relictis frigida peteret. Cui ut obsequeretur Veliam vel Salernum ire constituit. Quare scripsit ad amicum quendam Numonium Valam, qui ibi fundos habuisse videtur, de coelo eius regionis, de annona et aqua, de universa vivendi ratione, ut ipse qui aliquamdiu corpori consulere vellet et cutem curare, alterutram sibi aptiorem posset eligere. Insignis haec epistola est grata in coniungendis sententiis negligentia ac lepida rerum suarum ac voluntatum descriptione. Quo anno sit scripta nos latet; neque magis certum est Valam eundem fuisse, quem Velleius Patere. II, 119 legatum

Quintilii Vari et suarum copiarum desertorem describit. Explicavit nuper Letronnius tres inscriptiones *Philis* repertas, quarum tertia habet nomina L. Trebonius Oricula et C. Numonius Vala; qui ad templum venisse dicuntur IMP. CAESARE XIII. COS. A. D. VIII. K. APRILES. Facilis est suspicio, hunc eundem esse Numonium, ad quem Horatius hanc dedit epistolam; quamquam dissentit Duentzerus. Epistolam alii referunt ad a. 731 vel 732, Duentzerus ad a. 734.

V. 2. *qualis via*] Omnia coniungantur oportet cum v. 25, exceptis illis quasi deviis partibus epistolae, quas inter mediam orationem intermiscere placuit vv. 3—13, 16 (*nam vina*) 21. — *supervacuas*] sc. facit, i. e. nihil eas mihi profuturas dicit. — *illis*] Baianis. — *murteta*] Celsus III, 21, 35: „Maxime utiles naturales et siccae sudationes sunt, quales super Baias in myrtetis habemus.“ Plin. H. N. XXXI, 2: „Nusquam tamen largius quam in Baiano sinu (emicant aquae) nec pluribus auxiliandi generibus, aliae sulphuris, aliae aluminis, aliae salis, aliae nitri, aliae bituminis, nonnullae etiam acida salsae mixtura.“ — *morbum*] maxime arthritidem. — *Gabiosque*] Strab. V. 3: „Ἐν δὲ τῷ πεδίῳ τοῦ τῶ ὁ Ἀνίων διέξεισι καὶ τὰ Ἄλβονλα καλούμενα ῥεῖ ὕδατα ψυχρὰ ἐκ πολλῶν πηγῶν, πρὸς ποικίλους νόσους καὶ

10 Mutandus locus est et deversoria nota

Praeteragendus equus. Quo tendis? Non mihi Cumas
Est iter aut Baias: laeva stomachosus habena
Dicet eques; sed equi frenato est auris in ore; —
Maior utrum populum frumenti copia pascat,

15 Collectosne bibant imbres puteosne perennes

Iugis aquae, — nam vina nihil moror illius orae.
Rure meo possum quidvis perferre patique;
Ad mare cum veni, generosum et lene requiro,
Quod curas abigat, quod cum spe divite manet

20 In venas animumque meum, quod verba ministret,

Quod me Lucanae iuvenem commendet amicae; —
Tractus uter plures lepores, uter educet apros,
Utra magis pisces et echinos aequora celent,
Pinguis ut inde domum possim Phaeaxque reverti,

25 Scribere te nobis, tibi nos accredere par est.

Maenius ut rebus maternis atque paternis
Fortiter absumptis urbanus coepit haberi,
Scurra vagus, non qui certum praesepe teneret,
Impransus non qui civem dignosceret hoste,

πίνονσι καὶ ἐγκαθημένοις ὕγεινά.“
— *deversoria nota*] Suspensa haec sunt
a v. *praeteragendus*, et *nota* sunt de-
versoria *equo*, qui, ut solent, etiam
nolente equite recta via relicta nota
stabula intrare cupiebat. — *laeva ha-
bena*] Finge tibi Horatium Roma ve-
nientem et viam magnam meridiem
versus sequentem: iam cum eo perve-
nisset, ubi via ex Appia Baias versus
delflexit, equus solitam viam dextror-
sum ad Baias vel Cumas secuturus
est: quod ne faciat increpandus est
(*quo tendis?*) et laeva habena regen-
dus, ut rectam viam in inferiorem Ita-
liam sequatur. Ceterum nunc *deverso-
ria* scripsi cum cod. Bland. antiquiss.,
alii cum aliis MSS. *diversoria*. — *sed
equi*] Adduntur haec ad excusandam
elocutionem *habena dicere*: scilicet
equis cum auris sit in frenato ore,
imperandum non est voce sed habena.
Verum generalis sententia non est,
quare noli ex codd. scribere *equis*.
Horkelius ingeniose ex coniectura ut

equis i. e. ut equorum ea natura est,
ut aurem in frenato ore habere vide-
antur. Quem secutus essem, nisi maior
pars optimorum codd. genitivum *equi*
videretur tueri nec particula *sed* expli-
cationem inveniret in excusandis ver-
bis *laeva stomachosus habena*. — *iugis
aquae*] Sat. II, 6, 2. Fluctuant etiam
antiqui codd. inter *iugis* et *dulcis*; maior
pars prius praebent, antiquissimus ta-
men Bland. et alius Cruquii posterius.
cf. Cic. N. D. II, 9: „ex puteis iugi-
bus aquam calidam trahi.“ id. de divin.
I, 50: „haustam aquam de iugi pu-
teo.“ ibid. II, 13: „aquae iugis co-
lore.“ — *vina*] non valde generosa;
quare aliis usus est Horatius.

V. 24. *Phaeaxque*] Epist. I, 2, 28.
— *Maenius*] Sat. I, 1, 101. 3, 21. Se-
quoque dicit lautam ac delicatam vi-
tam amare, quasi alterum esse Mae-
nium, qui parvis esset contentus cum
res deficerent, contra cum multa habe-
ret, multa etiam ventri daret. cf. v.
42 sqq. — *urbanus*] scurra, dicax.

- 30 Quaelibet in quemvis opprobria fingere saevus,
 Pernicies et tempestas barathrumque macelli,
 Quidquid quaesierat ventri donabat avaro.
 Hic ubi nequitiae fautoribus et timidis nil
 Aut paulum abstulerat, patinas coenabat omasi
- 35 Vilis et agninae, tribus ursis quod satis esset;
 Scilicet ut ventres lamna candente nepotum
 Diceret urendos corrector Bestius. Idem
 Quidquid erat nactus praedae maioris, ubi omne
 Verterat in fumum et cinerem, Non hercule miror,
- 40 Aiebat, si qui comedunt bona, cum sit obeso
 Nil melius turdo, nil vulva pulchrius ampla.
 Nimirum hic ego sum: nam tuta et parvula laudo,
 Cum res deficiunt, satis inter vilia fortis;
 Verum ubi quid melius contingit et unctius, idem
- 45 Vos sapere et solos aio bene vivere, quorum
 Conspicitur nitidis fundata pecunia villis.

Vide ad Epist. I, 9, 11. — *hoste*] Cicero de off. I, 12: „Hostis apud maiores nostros is dicebatur, quem nunc peregrinum dicimus. Quamquam id nomen durius iam effecit vetustas; a peregrino enim recessit et proprie in eo qui arma contra ferret remansit.“ Et cf. Plaut. Trin. I, 2, 65: „Te dicunt Hostisne an civis comedis parvi pendere.“ — *perniciēs*] cf. Plaut. Capt. IV, 3, 3: „Quanta pernis pestis venit! quanta labes larido!“ Terent. Eun. I, 1, 34: „(Thais) fundi nostri calamitas.“ — *macelli*] Sat. II, 3, 229. — *donabat*] De verbo cf. Carm. IV, 7, 20. De tempore verbi fateor, mihi prope melius placere id quod in antiquissimis quibuscunque codd. (quatuor Bland., optimis Bentleyi, Montepessul., Petropolit. et Einsiedl. Orellii, uno Pulmanni) reperitur, *donarat*, et propter ingentem auctoritatem librorum et quia sic oppositio quaedam paratur inter hanc sententiam atque eam quae subinde sequitur. Attamen in re dubia vulgatam nolui relinquere. — *omasi*] Sat. II, 5, 40. Vilissimo cibo conten-

tus erat, cum nihil aut paulum abstulisset ab iis quibus nequitia placeret aut ab iis qui eam timerent. Nam genitivum *nequitiae* coniunge etiam cum *timidis*, ut A. P. 28. Ovid. Met. V, 100. — *lamna*] Cic. Verr. V, 63: „Ignes candentesque laminae ceterique cruciatus.“ — *corrector Bestius*] In codd. inest *correctus*; quod cum ferendam sententiam non praeberet, a Lambino mutatum est in *corrector*; quae coniectura postea comprobata est antiquissimo codice. *Bestius* fuisse dicitur parcissimus homo. De correctore cf. Cic. Phil. II, 17: „Iam enim, quoniam criminibus eius satis respondi, de ipso emendatore ac correctore nostro quaedam dicenda sunt.“ Qui lectionem *correctus* tuentur, explicant: *corrigendo factus* alter Bestius, homo avarus. — *turdo*] cf. Sat. II, 5, 10. — *vulva*] suilla. — *unctius*] cf. Epist. I, 14, 21. I, 17, 12. — *fundata*] Cic. pro C. Rab. Post. 1: „fortunas fundatas atque optime constitutas.“ Idem quod alias est *collocare*, ut Cic. pro leg. Man. 7, 18.

EPISTOLA XVI.

Ne perconteris, fundus meus, optime Quinti,
Arvo pascat herum an baxis opulentet olivae,
Pomisne an pratis an amicta vitibus ulmo:
Scribetur tibi forma loquaciter et situs agri.

5 Continui montes, ni dissocientur opaca
Valle, sed ut veniens dextrum latus adspiciat Sol,
Laevum discedens curru fugiente vaporet.
Temperiem laudes. Quid, si rubicunda benigni
Corna vepres et pruna ferant? si quercus et ilex

Epistola XVI.

Quintius, sive fuit Hirpinus ille ad quem est Carm. II, 11, sive T. Quintius Crispinus, consul a. u. c. 745, amicus fuit Horatii natu minor, qui favore populi, quem recta opinor ratione sibi paraverat et honoribus sibi mandatis fortasse expertus erat, non iniuria laetabatur omnibusque Romae beatus videbatur. Hunc igitur Horatius opposita sua condicione parvaque felicitate adhortatur, ne aliorum aestimationibus de se suisque rebus maiorem fidem habeat quam suo ipsius recto iudicio; nam vitae honestatem non cerni in externis rebus sed in amore virtutis, in iustitia, in continentia animi. Incipit poeta ab aliqua Sabini sui descriptione, quam tamen ita comparat esse vides, ut non tam multiplex ex agris, hortis, pratis, vineis, redditus praedicetur quam salubritas et solitudo locorum; quibus rebus et corpori et animo optime consulatur. Ceterum egregie Orellius: „Vix satis nostris hominibus hoc inculcari potest, Horatium admodum sibi placuisse in facete imitandis Stoicorum παραδόξοις et tota docendi ratione, perquam feliciter devitatis solitis ἐπιδείξασθαι illarum vitiiis, id est, exaggerationibus et genere dicendi modo nimis aspero et spinoso modo vitam umbraticam ac scholas nimis redolente.“ — Temporis vestigia non reperiuntur; nisi quod Augusti nomen v. 29 post annum 727 scriptam epistolam ostendit.

Quinti] Notandum, in antiquissimo cod. Bland. scriptum fuisse *Quincti*, ut

in nummis sub Augusto signatis. — *baxis*] Sic, non *baccis*, in omnibus, uno excepto, codd. Cruquii aliisque antiquis Orellii. — *opulentet*] rarissimum vocabulum, quod non ante Horatium reperitur. — *an pratis*] Sic rectius quam quod in multis est codd. *et pratis*. — *curru*] cf. Carm. III, 6, 44. C. S. 9. Quod in antiquiss. cod. Bland. est *cursu*, nihil est nisi error scribae. — *opaca valle*] cf. Carm. I, 17, 17. — *vaporet*] tepefaciat. Lucretius II, 148 sqq.: „At vapor is, quem sol mittit, lumenque serenum Non per inane meat vacuum; quo tardius ire Cogitur, aërias quod sic diverberat undas: Nec singillatim corpuscula quaeque vaporis, Sed complexa meant inter se cunq̃ue globata.“ Colum. II, 15, 6: „Glebae solibus aestivis vaporatae.“ — *Quid, si*] cf. Carm. I, 24, 13. Postea v. 10 cum etiam boni codd. habeant *iuvat*, Bentleius ex coniectura scripsit *ferunt*; nam „coniunctivus, inquit, in hac phrasi est oratio affirmantis, subiunctivus optantis tantum vel metuentis.“ Rectius tamen rem sic constituias: ubi imperfectum in hac locutione est coniunctivi, id quod indicatur interrogando fieri non posse perspicitur, ubi praesens indicativi aut coniunctivi, fieri illud aut posse certe fieri aut fieri id posse cogitari. Ceterum uberius de hac re scripsi in Quaestionn. Horatt. p. 48 sqq. Blandinii codd. habent *ni quercus*, alii *et quercus*. — *benigni*] Sic bene antiqui codices, alii male *benigne*. Ovid. Am. I, 10, 56: „Praebeat Alcinoi poma benignus ager.“ — *cornu et pruna*] Kornellen und Schlehen: quae tamen non prae-

- 10 Multa fruge pecus, multa dominum iuvet umbra?
 Dicas adductum propius frondere Tarēntum.
 Fons etiā rivo dare nomen idoneus, ut nec
 Frigidior Thracam nec purior ambiat Hebrus,
 Infirmo capiti fluit utilis, utilis alvo.
- 15 Haec latebrae dulces, etiā, si credis, amoenae,
 Incolumem tibi me praestant Septembribus horis.
 Tu recte vivis, si curas esse quod audis.
 Iactamus iam pridem omnis te Roma beatum;
 Sed vereor ne cui de te plus quam tibi credas,
- 20 Neve putes alium sapiente bonoque beatum,
 Neu si te populus sanum recteque valentem
 Dictitet, occultam febrem sub tempus edendi
 Dissimules, donec manibus tremor incidat unctis.
 Stultorum incurata pudor malus ulcera celat.
- 25 Si quis bella tibi terra pugnata marique
 Dicat et his verbis vacuas permulceat aures:
 Tene magis salvum populus velit, an populum tu,
 Servet in ambiguo, qui consulit et tibi et Urbi
 Iuppiter; Augusti laudes agnoscere possis:
- 30 Cum pateris sapiens emendatusque vocari,
 Respondesne tuo, dic sodes, nomine? Nempe

dicantur faceta quadam ratione ut egregii fructus, sed ad describendam regionis amoenitatem. Ceterum vide supra p. 9 sq.; et de fonte ad Carm. III, 13. Tam largam aquarum copiam habet fons, ut ipse unus rivum efficiat ex suo nomine nominatum; saepe plures conveniunt fontes unumque efficiunt rivum. — *Septembribus*] Sat. II, 6, 19. — *esse quod audis*] Cic. de off. II, 12. — *sapiente*] Ex natura ablativi Latini eodem iure, quamquam raro, *alius* similia cum illo casu coniunxerunt, quo Graeci ἄλλος cum genitivo. cf. Epist. II, 1, 240. Sat. II, 3, 208. Brut. apud Ciceronem Fam. XI, 2: „Nec quidquam aliud libertate communi quaesisse.“ — *recteque valentem*] vide ad Epist. I, 7, 3. — *edendi*] Aegrotus, ne lauta coena careat, occultat febrem. — *unctis*] Ovid. A. A.

III, 755: „Carpe cibos digitis; est quidam gestus edendi: Ora nec imunda tota perunge manu.“ — *stultorum*] Stulti sunt qui falso pudore moti ulcera celare malunt quam sanare. Deinde additur argumentatio a minori ad maius. — *bella tibi*] h. e. a te; cave tamen colligas ex hoc loco, Quintium magnas res terra marique splendide gessisse. — *vacuas*] cf. Epist. I, 18, 70. II, 2, 105. — *Tene magis*] „Hi versus sunt Varii in Panegyrico Augusti.“ *Acro.* — *respondesne*] gratias acturus. cf. Cic. Phil. I, 12 med.: „Mihi etiam, quo auctore te in iis rebus uti arbitrabantur, et gratias boni viri agebant, et tuo nomine gratulabantur.“ Caes. b. g. I, 18. Cic. Mur. 38. Nec cogitandum est de militari formula *respondere ad nomina* nec opus cum *Horkelio* sic interductus ponere:

Vir bonus et prudens dici delector ego ac tu.
Qui dedit hoc hodie, cras, si volet, auferet; ut si
Detulerit fascēs indigno, detrahet idem.

35 Pone, meum est, inquit. Pono tristisque recedo.

Idem si clamet furem, neget esse pudicum,
Contentat laqueo collum pressisse paternum;
Mordeat opprobriis falsis mutemque colores?
Falsus honor iuvat et mendax infamia terret

40 Quem nisi mendosum et medicandum? Vir bonus est quis?

Qui consulta patrum, qui leges iuraque servat,
Quo multae magnaeque secantur iudice lites,
Quo res sponsore et quo causae teste tenentur.
Sed videt hunc omnis domus et vicinia tota

45 Introrsum turpem, speciosum pelle decora.

Nec furtum feci nec fugi, si mihi dicat
Servus, Habes pretium, loris non ureris, aio.
Non hominem occidi. Non pasces in cruce corvos.
Sum bonus et frugi. Renuit negitatque Sabellus:

respondesne tuo „dic sodes“ nomine?, ut vv. *dic sodes* ea ipsa sint, quae alter blande respondeat. — *Nempe vir bonus*] „Scio equidem bene omnes homines bonos et probos videri velle; sed cautio adhibenda est maxima, ne cum laudem a populo libenter accipiamus, postea ab eodem acceptam cogamur relinquere. Recte cogitat is qui vulgi iudicia spernit et bona et mala, nam *falsus honor iuvat* cet.“ Versus 39 generalem sententiam habet superiora exempla excipientem et comprehendentem. — *mutemque colores*] ut pallor rubori et rubori pallor succedat.

V. 40. *medicandum*] Plurima antiquorum codicum pars hanc lectionem tutatur, alii *mendacem* ex corruptione ortum praebent. *Medicandus* opponitur homini sano ac prudenti, i. e. sapienti; nam *mendosus* insanus est, sanandus ille quidem sapientiae praeceptis. — *vir bonus est quis?*] sc. ex iudicio vulgi. — *consulta patrum*] cfr. Cic. Top. 5: „ius civile in legibus, *senatus consultis*, rebus iudicatis consistit.“ Senatus enim consulta iam tum legi civili adnumerari coepta sunt. —

secantur] cf. Epist. I, 7, 59. — *sponsore*] cf. Sat. II, 6, 23. Haec unice vera lectio probatur antiquissimo Bland., aliisque bonis codd.; quod in aliis est *quo responsore*, id interpretati sunt *iureconsulto*, contra latinitatem, ut observavit iam Cruquius. — *tenentur*] Contrarium est *causa cadere*. Cic. pr. Caec. 24, 67: „Scaevolam dixisti *causam* apud centumviros non tenuisse.“ Sueton. Domit. 9: „Permittit accusatori, qui *causam* non *teneret*, exilium poena esset.“ Intelligendus igitur est *testis*, qui coram iudicio satis locuples est et fidus. Nam Dig. XXII, 5, 3: „Testium fides diligenter examinanda est.“ — *introrsum turpem*] Sat. II, 1, 65. Cic. de Fin. II, 24, 77: „ut vestitum sic sententiam habeas aliam domesticam aliam forensem, ut in fronte ostentatio sit, intus veritas occultetur.“ — *ureris*] Epod. 4, 3. — *cruce*] cf. Sat. II, 7, 47. I, 3, 82. — *Sabellus*] Sabelli duriores erant et simpliciores. Vide ad Carm. III, 6, 38. Non bene ab aliis intelligitur ipse Horatius, diutius eo tempore in Sabina sua villa commorans. Bene *Lachmannus* ad Lu-

- 50 Cautus enim metuit foveam lupus accipiterque
 Suspectos laqueos et opertum miluus hamum.
 Oderunt peccare boni virtutis amore;
 Tu nihil admittes in te formidine poenae:
 Sit spes fallendi, miscebis sacra profanis;
- 55 Nam de mille fabae modiis cum surripis unum,
 Damnum est, non facinus, mihi pacto lenius isto.
 Vir bonus, omne forum quem spectat et omne tribunal,
 Quandocunque deos vel porco vel bove placat,
 Iane pater, clare, clare cum dixit, Apollo;
- 60 Labra movet metuens audiri: Pulchra Laverna,
 Da mihi fallere, da iusto sanctoque videri,
 Noctem peccatis et fraudibus obliice nubem.
 Qui melior servo, qui liberior sit avarus,
 In triviis fixum cum se demittit ob assem,
- 65 Non video: nam qui cupiet, metuet quoque; porro
 Qui metuens vivet, liber mihi non erit unquam.
 Perdidit arma, locum virtutis deseruit qui
 Semper in augenda festinat et obruitur re.
 Vendere cum possis captivum, occidere noli;

cret. p. 206: „In Lucilii versu, qui est apud Priscianum p. 902 Apuli sunt pro importunis ac petulantibus, ut Horatio pro simplici *Sabellus*, cum dicit *renuit negitatque Sabellus*.“ — *negitatque*] Sic antiquissimus Bland., alii non bene *negat atque*. — *cautus*] qui animo turpes sunt, specie honesti, ii canti abstinent a mala re timore poenae; qui vere boni sunt, abstinent a turpitudine virtutis amore ducti. — *miluus*] trisyllabum, ut Epod. 16, 32. Sic omnes Blandinii codd., alii *milvius*. — *tu nihil*] Est unus ex iis qui turpes sunt, boni videntur. — *sacra profanis*] cf. A. P. 397. Carm. III, 3, 51 sq. — *non facinus*] Nam omnia peccata sunt aequalia. Quam Stoicorum doctrinam cum deridet Sat. I, 3, 96 sqq., non tam veritatem eius spectavit quam severum in hominum rebus fastisque usum. Siquidem verum est, non magis parvo spatio egredi licere honestatis fines quam magno, tamen eadem poena non sunt coercendi omnes

qui sunt egressi. — *Iane pater*] Sat. II, 6, 20. — *Laverna*] „Laverna in via Salaria lucum habet; est autem dea furum, et simulacrum eius fures colunt et qui consilia sua volunt tacita; nam preces eius cum silentio exercentur.“ *Comm. Cruq.* — *iusto sanctoque*] attractionis genus, ut Sat. I, 1, 19. I, 4, 39. Ovid. Met. VIII, 690. Repertus autem dativus est non solum in duobus codd. Pottierii, ut possit aliquis ex Orellii nota concludere, sed etiam in antiquissimo omnium Blandinio; et Montepessul. habet *iustos* suprascr. *u*, ut sit *iustus*, et distincte *sanctoque*, sed suprascriptum *us*, ut sit sanctus; praeterea duo Canteri, totidem Pulmanni cum aliquot Torrentianis. Reliqui omnes *iustum sanctumque*. — *assem*] Pers. V, 111: „Inque luto fixum possis transcendere nummum.“ Petron. 43: „Ab asse crevit et paratus fuit quadrantem de stercore mordicus tollere.“ — *captivum*] Is qui arma perdidit, locum virtutis

- 70 Serviet utiliter: sine pascat durus aretque,
 Naviget ac mediis hiemet mercator in undis;
 Annonae prosit, portet frumenta penusque.
 Vir bonus et sapiens audebit dicere: Pentheu,
 Rector Thebarum, qui me perferre patique
- 75 Indignum coges? Adimam bona. Nempe pecus, rem,
 Lectos, argentum? Tollas licet. In manicis et
 Compedibus saevo te sub custode tenebo.
 Ipse deus, simul atque volam, me solvet. Opinor,
 Hoc sentit: Moriar; mors ultima linea rerum est.

EPISTOLA XVII.

Quamvis, Scaeva, satis per te tibi consulis et scis
 Quo tandem pacto deceat maioribus uti,

deseruit, inermis capitur cupiditatibus. Iam comparat poeta cum misera captivorum condicione avarorum hominum non meliorem servitutem; contra quam deinde hominis vere sapientis ac boni nullis limitibus cinctam libertatem clarissimis luminibus illustrat. De verbis compara Institutt. lib. I. Tit. III. §. 2: „*Servi* autem ex eo appellati sunt, quod imperatores captivos vendere ac per hoc *servare* nec occidere solent; qui etiam mancipia dicti sunt eo, quod ab hostibus manu capiuntur.“ — *penusque*] Hanc formam ab Horatio praelatam esse demonstrat auctoritas codicum; Virgil. Aen. I, 703 dixit *longam penum*; quamquam hoc quoque Horatii loco nonnulli, sed pauci, codd. Feae et Combii habent *penumque*. — *Pentheu*] Imitatur Euripidis locum ex Bacch. 492 sqq., ubi Bacchus sub sacerdotis figura latens Pentho regi diros cruciatus et vincula minanti respondet: „*Ἀύσει μ' ὁ δαίμων αὐτὸς ὅταν ἐγὼ θέλῃ*.“ — *lectos*] pro omni supellectili. Epist. I, 1, 91. — *me solvet*] Stoicorum praeceptum est. Seneca de provid. 6, 5: „Contemnite mortem quae vos aut finit aut transfert. Ante omnia cave ne quis vos teneret invitos: *patet exitus*. Si pugnare non vultis, licet fugere.“ — *linea*] Imago sumpta a circo, ubi alba erat linea ad metam. Cfr.

Cic. Tuscul. I, 18, 15. Senec. ad Marc. 19: „Mors omnium dolorum et solutio est et finis, ultra quam mala nostra non exeunt.“

Epistola XVII.

Scaevam, iuniorem (cf. v. 16) amicum, docet Horatius qua possit ratione favorem sibi magnorum virorum conciliare, ita tamen ut et suam sibi conservet dignitatem libertatemque et illustrium hominum benevolentia eo quo velit perveniat. Is enim qui favore potentium virorum honeste ac digne comparato vitam sibi reddidit gratam et honoribus auctam, tantum abest ut vituperandus sit, ut longe videatur praeferendus importunae inertiae ac stultae superbiae alterius, qui, cum maioribus recte uti nesciat, omnino non uti malit. — Latet nos et quis Scaeva fuerit et quo anno scripta sit epistola. Nonnulli suspicati sunt fuisse filium aliquem Cassii Scaevae, centurionis Caesariani (Caes. B. C. III, 53); sed quo iure? Non pauci interpretes epistolam retulerunt ad a. 734 vel 735, *Weberus* propter simile argumentum, quod hanc cum epistola secunda commune habere dicit, utramque anno 731 compositam opinatur. Ceterum cave confundas hunc Scaevam cum Scaeva nepote Sat. II, 1, 53.

V. 1. *quamvis*] vide ad Carm. I,

- Disce, docendus adhuc quae censet amicus, ut si
 Caecus iter monstrare velit; tamen adspice, si quid
 5 Et nos quod cures proprium fecisse loquamur.
 Si te grata quies et primam somnus in horam
 Delectat, si te pulvis strepitusque rotarum,
 Si laedit caupona, Ferentinum ire iubebo:
 Nam neque divitibus contingunt gaudia solis,
 10 Nec vixit male qui natus moriensque fefellit.
 Si prodesse tuis pauloque benignius ipsum
 Te tractare voles, accedes siccus ad unctum.
 Si pranderet olus patienter, regibus uti
 Nollet Aristippus. Si sciret regibus uti,
 15 Fastidiret olus qui me notat. Utrius horum
 Verba probes et facta, doce, vel iunior audi
 Cur sit Aristippi potior sententia. Namque

28, 13. — *tandem*] Sic omnes libri MSS.; *Horkelius* tamen ingeniose coniecit corrigendum esse *tenuem*; cui concedendum certe est, *tandem*, quod sit impatienter interrogantis, referri posse ad verba *quaerendi*, *interrogandi*, *similia*, non posse ad verbum *sciendi*. Minus grave videtur alterum, quod addidit, de ratione, qua maioribus utendum sit, nihil universe praecipi posse, sed debere praecepta ex conditione eorum, quibus praecipitur, diversa esse. — *docendus adhuc*] „Praecepta ita elevat, ut quae Scaeva in suam rem convertere possit, se non docere, quippe qui ipse edocendus sit, sed loqui dicat.“ *Obbarius*. — *amiculus*] Deminutivum teneram, quae cum Scaeva coniunctus erat, amicitiam indicat. Catull. 30, 2: „Iam te nihil miseret, dure, tui dulcis *amiculi*.“ — *caecus*] cui cavendum est ne nimis credas, cum ipse facillime possit errare. — *fecisse*] ἀορίστως. — *si te grata*] „Si quietam vitam quaeris, si negotia fastidia tibi imponunt et tibi uni vivere vis, aliorum ope facile poteris carere, sed confer te in solitudinem parvi oppidi, ubi ignoto et securo ad mortem latere tibi licebit. Verum si negotia quaeris, ut rem tibi pares, ut tibi tuisque prosis, si laetam vitam praefers, aedum potentium hominum

amicitiam quaere.“ — *primam horam*] vide ad Sat. I, 5, 23. — *laedit*] Sic duo Blandinii, reliqui omnes Cruquii *laedat*; optimi Orellii *laedet*. — *Ferentinum*] Hernicorum municipium viae Lavicanae ad XLVIII lapidem. *Walckenarianae* pro Etruriae oppido habet, quod hodie *Ferenti* in Toscana esse dicitur. *Capmartin de Chaupy* locum non longe ab urbe Roma ad radices montis Albani situm opinatur; quae opinio *Obbario* magnopere probatur. — *fefellit*] vide ad Carm. III, 16, 32. Significatur Epicuri illud λάθε βιώσας. — *benignius*] Haec festive a coena sumpta sunt, ut Sat. II, 2, 85; inde etiam *siccus ad unctum*. cf. Epist. I, 15, 44. Ceterum Bland. antiquiss. habet pro *ad unctum* una voce *inunctum*, cf. Sat. I, 3, 25. Ep. I, 1, 29. — *si pranderet*] Diog. Laert. II, 68: „Παροίοντα ποτὲ Ἀρίστιππον λάχανα πλύνων Διογένης ἔσκωψε καὶ φησιν· Εἰ ταῦτα ἔμαθες προσφύρεσθαι, οὐκ ἂν τυράννων ἀντὶς ἐθεράπευες. Ὁ δὲ, καὶ σὺ, εἶπεν, εἴπερ ἤδεις ἀνθρώποις ὁμιλεῖν, οὐκ ἂν λάχανα ἐπλυνες.“ Ceterum prandendi generale apud Horatium verbum non significat levem aut vilem cibum, prandio quam coenae aptiorem; vide ad Sat. II, 3, 245. — *notat*] censoribus proprium verbum. — *scurror*] „si scurram me clamas,

Mordacem Cynicum sic eludebat, ut aiunt:
 Scurror ego ipse mihi, populo tu: rectius hoc et
 20 Splendidius multo est. Equus ut me portet, alat rex,
 Officium facio; tu poscis vilia rerum,
 Dante minor, quamvis fers te nullius egentem.
 Omnis Aristippum decuit color et status et res,
 Tentantem maiora, fere praesentibus aequum;
 25 Contra, quem duplici panno patientia velat,
 Mirabor, vitae via si conversa decebit.
 Alter purpureum non exspectabit amictum;
 Quidlibet indutus celeberrima per loca vadet,
 Personamque feret non inconcinnus utramque;
 30 Alter Mileti textam cane peius et angui
 Vitabit chlamydem, morietur frigore, si non
 Rettuleris pannum: refer et sine vivat ineptus.
 Res gerere et captos ostendere civibus hostes

esto: ego mihi scurra sum, tu populo.“ — *equus portet*] Ex proverbio Graeco: „ἵππος με φέρει, βασιλεὺς με τρέφει.“ Ceterum Cruquius: hic (i. e. post *multo est*) omnes scripti habent interpunctionem, perinde ac si haec *Equus ut me portet, alat rex, officium facio* sint coniungenda; ipse punctum posuit post *rex* et comma post *est*; ita etiam Lambinus. — *vilia rerum*] cf. Sat. II, 8, 83. Carm. IV, 12, 19. Sic recte cum Lambino ex bonis codd., quamquam in plurimis et antiquissimis inest *verum Dante minor*, unde postea mutatum est quod in paucis reperitur *verum es Dante minor* vel etiam *rerum es Dante minor*. Corruptio autem antiquissima est, nam *verum* iam Porphyri-
 onem scholiastam legisse, ex ipso scholió perspicuum est. Eadem verborum variatio in codd. est Epist. II, 2, 70. — *nullius egentem*] *nullius* masculinum est, non neutrum; ita suadet oppositum *dante minor* i. e. ei qui dat subiectus ex eoque pendens.

V. 23. *color*] cf. Sat. II, 1, 60. — *patientia*] καρτερία, τλημοσύνη. Cic. de Or. III, 17: „Ab Antisthene, qui *patientiam* et duritiam in Socratico sermone maxime adamarat, Cynici.“ Cynici autem non tunica et pallio utebantur, sed una abolla ex vili panno

confecta et tam ampla, ut dupliciter totum corpus amicaret; inde dicti sunt ἀχίτωνες et διπλοεμάτοι. — *fere*] omnino, ut Epist. I, 6, 9. — *alter*] Aristippus, de quo Diog. Laert. II, 66: „Διό ποτε Στράτων, οἱ δὲ Πλάτων, πρὸς αὐτὸν εἰπεῖν· Σοὶ μόνῳ δέδοται καὶ χλαμύδα φορεῖν καὶ ῥάκος.“ Plut. de fort. et virt. Alex. I, 8: „Ἀρίστιππον θανατοῦναι τὸν Σωκράτην, ὅτι καὶ τρέβων λιτῶ καὶ Μιλησίᾳ χλαμύδι χρώμενος δι' ἀμφοτέρων ἔτηρει τὸ εὖσχημον.“ — *Mileti*] Purpurae Milesiae propter egregiam lanam pretiosissimae erant. Virg. Georg. III, 306. — *peius*] cf. Carm. IV, 9, 50. — *angui*] Codd. fluctuant inter *angui* et *angue*; sed Priscian. p. 766: „Anguis, ab Angue vel Angui. Horat. in I Epist. Alter Mileti textam cane peius et *angui*.“ — *Refer*] „Aiunt Aristippum invitato Diogene ad balneas dedisse operam, ut omnes prius egrederentur, ipsum Diogenis pallium induisse eique reliquisse purpureum; quod Diogenes induere cum nollet, suum repetiit. Tunc Aristippus increpuit Cynicum famae servientem, qui algere mallet quam conspici in veste purpurea.“ Comm. Cruq. — *res gerere*] cf. Varr. L. L. V, p. 72: „Imperator qui dicitur *res gerere*, in eo

Attingit solium Iovis et coelestia tentat;
 35 Principibus placuisse viris non ultima laus est.
 Non cuivis homini contingit adire Corinthum.
 Sedit qui timuit, ne non succederet: esto.
 Quid? qui pervenit fecitne viriliter? Atqui
 Hic est aut nusquam quod quaerimus. Hic onus horret,
 40 Ut parvis animis et parvo corpore maius;
 Hic subit et perfert. Aut virtus nomen inane est,
 Aut decus et pretium recte petit experiens vir.
 Coram rege suo de paupertate tacentes
 Plus poscente ferent: distat, sumasne pudenter
 45 An rapias. Atqui rerum caput hoc erat, hic fons.
 Indotata mihi soror est, paupercula mater,
 Et fundus nec vendibilis nec pascere firmus,
 Qui dicit, clamat: Victum date. Succinit alter:
 Et mihi dividuo findetur munere quadra.

neque agit neque facit, sed gerit, i. e. sustinet. — *adire Corinthum*] Graecum proverbium: „Ὅς παντὸς ἀνδρὸς εἰς Κόρινθον ἕσθ' ὁ πλοῦς.“ Non cuique contingit summa quaeque attingere, sed enitendum est, audendum est, viriliter agendum est, nam in hoc ipso videndum illud est quod quaerimus. — *sedit*] cessat, torpet turpi otio. cf. Virg. Georg. III, 455. *Donatus* ad Terent. Ad. IV, 5, 38: „sedere proprie ignaviae cessationis est.“ — *virtus nomen*] cf. Epist. I, 6, 31. Sententia haec est: aut virtus nihil est nisi inane nomen ideoque non expetenda, aut eam sequuntur decus et praemium, ita ut qui magna moluntur, summa laude digni sint. *Experiens* enim vir est audax, promptus in rebus gerendis, ut Ovid. Met. XIV, 159: „comes *experientis* Ulixei.“ Cic. pro Cluent. 8, 38: „A. Aurius, vir fortis et *experiens*.“ — *Coram rege suo* Addit Horatius facetam descriptionem stultae rationis, qua plurimorum, qui favorem magnorum hominum sibi iam compararunt, ipso favore male utuntur ac dum nimia quaerunt omnia perdunt. Et cf. Colum. R. R. praef. 1, 9: „An honestius dixerim mercenarii saluatoris mendacissimum aucupium, circumvolitantis limina po-

teriorum somniumque *regis sui* inaugurantis?“ Bentleius cum tribus quatuorve codd. *sua*. Etenim: „Quid ergo? inquit; an nemo coram eiusmodi rege de paupertate loqui potest honeste? non de aliena paupertate? non ut inopi amico per alterius liberalitatem subveniat?“ Vides, nimis acute illa disputata esse, nam quod vetatur, ne quis de *sua* paupertate coram magnis viris loquatur, id intelligimus ultro. Aliter *Lachmannus* ad Lucret. p. 238, qui vulgatam lectionem ut ineptissimam contemnens adversarios quod aptum et verum sit sentire posse negat; eumque ut solet secutus est *Hauptius*. — *caput hoc erat*] Cic. de Or. I, 10: „Philosophorum greges iam ab illo fonte et capite Socrate.“ Sic intellige locum: „Noli impudenter rem tibi a patrono rapere, sed sume quae offeruntur verecunde et modeste; nam hoc agitur solum, ut accipias quae velis.“ — *succinit*] „Exprimit mendi-
 corum cantilenas, qui *succinunt* sibi invicem.“ *Schol.* Est enim alterum praecinentem comitari. — *quadra*] Martial. III, 77, 3: „Nec te liba iuvant nec sectae quadra placentae.“ Ibid. XII, 32, 18: „Nec quadra deerat casei Tolosatis.“ Senec. de benef. IV, 29: „Quis beneficium dixit quadram

- 50 Sed tacitus pasci si posset corvus, haberet
 Plus dapis et rixae multo minus invidiaeque.
 Brundisium comes aut Surrentum ductus amoenum,
 Qui queritur salebras et acerbum frigus et imbres,
 Aut cistam effractam et subducta viatica plorat;
 55 Nota refert meretricis acumina, saepe catellam
 Saepe periscelidem raptam sibi flentis, uti mox
 Nulla fides damnis verisque doloribus adsit.
 Nec semel irrisus triviis attollere curat
 Fracto crure planum, licet illi plurima manet
 60 Lacrima, per sanctum iuratus dicat Osirim:
 Credite, non ludo; crudeles, tollite claudum.
 Quaere peregrinum, vicinia rauca reclamationat.

EPISTOLA XVIII.

Si bene te novi, metues, liberrime Lolli,
 Scurrantis speciem praebere professus amicum;

panis aut stipem aeris abiecti?" Ceterum unus Cruquii codex et unus Pulmanni *quadrans*. — *corvus*] „Corvus repertam praedam clamore et frequenti crocitate aliis avibus proilit.“ *Comm. Cruq.* — *Surrentum*] Campaniae oppidum (*Sorrento*) ad promontorium Minervae situm, ob amoenitatem magnopere celebratum. *Sil. Ital. V, 466:* „Zephyro Surrentum molle salubri.“ — *salebras*] itineris asperitatem. — *catellam*] *Liv. XXXIX, 31:* „Praetor suos equites catellis ac fibulis donavit.“ Est catenula, non a *v. catulus*. — *verisque*] De adiectivo etiam damna ornante vide ad *Carm. I, 2, 1.* — *planum*] *πλένον* (Gaukler), circulatorem, qui artibus suis popellum delectare studebat. Hic ingenti saltu facto crus fregisse se simulabat; sed cum quis misericordia motus eum vellet sublevare, subito ille exsiliabat in exercendisque artibus pergebat. Sic risum populo adstanti movebat. — *plurima*] Vide ad *Carm. I, 7, 8.* Cfr. *Virg. Georg. I, 187. II, 183. IV, 419.* — *Osirim*] nam Isis cultus Romae tunc admodum frequens erat. *Quintil. VI, 3, 98:* „(Adiuvant urbanitatem et ver-

sus commode positi) et proverbia opportune aptata; ut homini nequam lapso et ut allevaretur roganti: „*Tollat te qui non novit.*“ cf. *A. P. 458 sqq.* — *rauca*] „vociferans ad ravim.“ *Comm. Cruq.*

Epistola XVIII.

De Lollio vide ad *Epist. I, 2.* Praeceptis ibi Lollio datis haec nova adduntur non minus utilia adolescenti ad maiores honores tendenti; agitur enim de cultura potentium hominum. Principio poeta timendum esse negat, ne Lollius libertatis amantissimus unquam possit agere partes scurrae; inter quem et verum amicum quantum intersit dilucide deinde describitur (10—14, 15—20). Deinde docet, ei qui potentibus hominibus placere velit abstinendum esse ab omni vitio, neque posse eum veniam quaerere in vitiis divitum hominum; divitibus ipsis opibus excusationem praebere, quoniam cum opibus vitia coniuncta esse soleant (v. 36). Deinde non esse exploranda arcana, et commissa servanda; sequendam non suam sed fautoris voluntatem in eaque explenda delecta-

Ut matrona meretrici dispar erit atque

Discolor, infido scurrae distabit amicus.

5 Est huic diversum vitio vitium prope maius,

Asperitas agrestis et inconcinna gravisque,

Quae se commendat tonsa cute, dentibus atris,

Dum vult libertas dici mera veraque virtus.

Virtus est medium vitiorum et utrimque reductum.

10 Alter in obsequium plus aequo pronus et imi

Derisor lecti sic nutum divitis horret,

Sic iterat voces et verba cadentia tollit,

Ut puerum saevo credas dictata magistro

Reddere vel partes mimum tractare secundas.

15 Alter rixatur de lana saepe caprina,

Propugnat nugis armatus: Scilicet ut non

Sit mihi prima fides et vere quod placet ut non

Acriter elatrem? Pretium aetas altera sordet.

tionem debere inveniri (v. 66). Cavendum esse ab incautis sermonibus (v. 71), compescendas libidines (v. 75), cautionem exercendam in commendandis amicis, commendatos ex suo quemque merito esse adiuvandos (v. 85). Praeterea fautoris mores observandos esse et sibi affingendos; etenim similem simili gaudere. In omni tamen re (v. 96) philosophiam esse colendam, ut in qua re verum bonum cernendum sit recte discatur ac teneatur. Quodsi ita agat amicus, eo sperat perventurum quo ipse pervenerit, ut precibus, quibus deos adeat, nihil possit esse modestius. — De tempore vide ad Epist. I, 2.

V. 1. *liberrime*] cf. Sat. I, 4, 132. — *ut matrona*] argumentum a simili sumptum. — *discolor*] Ne de matronae alba stola et meretricum toga variis coloribus tincta cogites, compara Persii locum V, 52: „Mille hominum species et rerum discolor usus.“ cf. I, 17, 23. Sat. II, 1, 60. Epist. I, 17, 23. — *Est huic*] Cavendum esse praecipit, ne nimio adulationis metu in contrarium vitium asperitatis ruat; rectum inter utramque positum esse. — *tonsa cute*] Proprie dicebant *caput ad cutem tondere*. Sic *ἐν χροῖ κοῦρειν*, qui mos fuit hominum elegantioris cultus habitusque incuriosorum et aspe-

ritatem Stoicae sectae sequentium. Contrarii sunt quos dicit Theophr. Char. 5, 3: „καὶ πλειστάκις δὲ ἀποκείρασθαι καὶ τοὺς ὀδόντας λευκοὺς ἔχειν.“ — *virtus est*] „Ἔστιν ἡ ἀρετὴ ἕξις προαιρετικὴ ἐν μεσότητι οὐσα.“ *μεσότης* δὲ δύο κακῶν, *τῆς μὲν κατ’ ὑπερβολῆν τῆς δὲ κατ’ ἑλλειψιν*.“ Arist. Eth. Nic. II, 6. — *imi lecti*] in quo cum convivatore scurrae accumbabant. cf. Sat. II, 8, 23. 40 sq. — *cadentia tollit*] „excidentia et temere prolata suscipit pro mirandis.“ *Comm. Cruq.* — *mimum*] In mimis secundarum partium actor parasitus esse solebat, qui primarum actorem parasitorum more omni ratione imitaretur. — *de lana caprina*] Ut nos „um des Kaisers Bart“, Graeci *περὶ ὄνον σκιᾶς*. In duobus Blandiniis codd., inter quos antiquissimus est, non *rixatur*, sed *rixatus*; Bentleius in fine versus et addidit; utrumque ex studio vitandi asyndeti, non recte. — *propugnat*] Intellige *propugnat nugis armatus nugis*; ita ut *nugis* utrimque referatur. — *ut non*] quomodo non. — *elatrem*] *Elatrare* est summa pulmonis contentione proferre quod in buccam venit. — *aetas altera*] Ne tanto quidem pretio, quantum altera aetas s. vita est, hanc libertatem vendam. cf. Hom. II, IX,

- Ambigitur quid enim? Castor sciat an Dolichos plus;
 20 Brundisium Minuci melius via ducat an Appi.
 Quem damnosa Venus, quem praeceps alea nudat,
 Gloria quem supra vires et vestit et ungit,
 Quem tenet argenti sitis importuna famesque,
 Quem paupertatis pudor et fuga, dives amicus
 25 Saepe decem vitiis instructor odit et horret,
 Aut si non odit, regit ac veluti pia mater
 Plus quam se sapere et virtutibus esse priorem
 Vult et ait prope vera: Meae — contendere noli —
 Stultitiam patiuntur opes; tibi parvula res est:
 30 Arta decet sanum comitem toga; desine mecum
 Certare. Eutrapelus, cuicumque nocere volebat,
 Vestimenta dabat pretiosa: beatus enim iam
 Cum pulchris tunicis sumet nova consilia et spes,
 Dormiet in lucem, scorto postponet honestum
 35 Officium, nummos alienos pascet, ad imum
 Thrax erit aut olitoris aget mercede caballum.
 Arcanum neque tu scrutaberis illius unquam,
 Commissumque teges et vino tortus et ira,
 Nec tua laudabis studia aut aliena reprendes,
 40 Nec cum venari volet ille, poemata panges.
 Gratia sic fratrum geminorum, Amphionis atque

444 sq. — *Castor, Dolichos*] duo gladiatores. *Dolichos* ex tribus codd. Cruquii; tres Blandinii *Dolicis*, non pauci alii *Docilis*, quod nomen placuit Bentleio. — *Minuci*] Tib. Minucius Augurinus a. u. c. 449 per montes Sabinorum et Samnitium viam munierat. Sic suspicabantur certe interpretes, quamquam incerta res est. *Walckenaerius* sic: „Quant à la voie Minucienne, nous croyons que c'est ce chemin, peu pratiqué, qui passait par Asculum, et que notre poète parcourut lorsqu'il se rendit à Brindes avec Mécène.“ In codd. est etiam *Minuti, Menuti, Munici, Numici*. *Obbario* hoc unum certum videtur, hanc viam a Roma euntibus viā Appiā ad sinistram fuisse et per Marsos, Samnites tulisse. — *prope*] vide ad Epist. I, 6, 1. — *arta toga*]

Divites ac delicati homines amplis togis utebantur. cf. Epod. 4, 8.

V. 31. *Eutrapelus*] P. Volumnius, eques Romanus, amicus M. Antonii propter facetias et urbanitatem ab aequalibus Eutrapelus appellatus est. Aristot. Rhetor. II, 12: „οἱ νέοι .. φιλογέλωτες, διὸ καὶ εὐτράπελοι· ἡ γὰρ εὐτράπελία πεπαιδευμένη ὕβρις ἐστίν.“ Est idem Volumnius, qui memoratur a Cornelio Nepote Attic. 9. 10. 12. — *pascet*] nam usura sors augetur. — *Thrax*] cf. ad Sat. II, 6, 44. — *olitoris*] extra urbem hortos colentis; ab hoc igitur quotidie cum oleribus in urbem mittetur. — *illius*] fautoris tui. Male in multis optimisque codd. scriptum est *ultius*. cf. v. 40. — *vino tortus*] A. P. 435. — *Amphionis*] Carm. III, 11, 2. Propert. III, 15, 29:

Zethi, dissiluit, donec suspecta severo
 Conticuit lyra. Fraternis cecidisse putatur
 Moribus Amphion: tu cede potentis amici
 45 Lenibus imperiis, quotiesque educet in agros
 Aetolis onerata plagis iumenta canesque,
 Surge et inhumanae senium depone Camenae,
 Coenes ut pariter pulmenta laboribus empta:
 Romanis sollemne viris opus, utile famae
 50 Vitaeque et membris, praesertim cum valeas et
 Vel cursu superare canem vel viribus aprum
 Possis. Adde, virilia quod speciosius arma
 Non est qui tractet: scis quo clamore coronae
 Proelia sustineas campestria; denique saevam
 55 Militiam puer et Cantabrica bella tulisti
 Sub duce, qui templis Parthorum signa refigit
 Nunc et, si quid abest, Italis adiudicat armis.
 Ac, ne te retrahas et inexcusabilis absis,
 Quamvis nil extra numerum fecisse modumque
 60 Curas, interdum nugaris rure paterno;
 Partitur lintres exercitus, Actia pugna

„Et durum Zethum et lacrimis Amphionem mollem.“ — *putatur*] ex fabulis poetarum. *Horkelius* nimis, nisi fallor, acute propriam *putandi* verbi significationem premens — „putamus enim ea, quorum certam persuasionem nullam habemus“ — ex coniectura *probatur*, de plausu, quem veteres in theatro edere solebant, si quid honestius in scena vel factum viderent vel dictum audirent. Sed cf. Sat. II, 3, 161. Epist. I, 7, 69. 9, 8. II, 1, 77. — *Aetolis*] Aetolia inde a Meleagri temporibus (Hom. II. IX, 543) nobilis fuit propter feras et venationem. — *inhumanae Camenae*] severae ac morosae, quoniam odit venationes ac similes delectationes. — *Romanis sollemne*] A praeceptis idoneo loco leniter delabitur poeta ad laudem iuvenis amici, corporis vigore ac robore omniumque quibus tum iuvenes exercebantur nobilium ludorum exercitatione inter aequales insignis. Tandem v. 65 ad

argumentum et praecepta revertitur. — *coronae*] A. P. 381. — *campestria*] in Campo Martio. A. P. 379. — *Cantabrica bella*] Ipse Augustus a. u. c. 729 exercitum in Cantabros et Astures duxerat. — *refigit*] Carm. I, 28, 11. Signa Romana Crasso a Parthis olim erepta Augusto a Phraate reddita sunt a. 734. — *si quid abest*] Non credo interpretibus, significari ab Horatio Armeniam eodem tempore Artaxiae adeptam et Tigrani traditam. Nam hoc dicitur, extendere Augustum Romanum imperium per totum orbem terrarum. — *extra numerum modumque*] metaphorice ut Epist. II, 2, 144; de propria significatione cf. A. P. 211. Cic. Parod. 3, 2: „histrionem si paululum se movit extra numerum, exhibetur.“ Bene comparatus est Germanorum usus in voc. *Tact* de eo quod decet. Sic Graeci *παρά μέλος*. — *Actia pugna*] Imitabantur Lollii pueri in villa paterna ludentes pugnam navalem Actia-

- Te duce per pueros hostili more refertur;
 Adversarius est frater, lacus Hadria, donec
 Alterutrum velox Victoria fronde coronet.
- 65 Consentire suis studiis qui crediderit te,
 Fautor utroque tuum laudabit pollice ludum.
 Protinus ut moneam, si quid monitoris eges tu,
 Quid de quoque viro et cui dicas saepe videto.
 Percontatorem fugito, nam garrulus idem est
- 70 Nec retinent patulae commissa fideliter aures,
 Et semel emissum volat irrevocabile verbum.
 Non ancilla tuum iecur ulceret ulla puerve
 Intra marmoreum venerandi limen amici,
 Ne dominus pueri pulchri caraeve puellae
- 75 Munere te parvo beet aut incommodus angat.
 Qualem commendes, etiam atque etiam adspice, ne mox
 Incutiant aliena tibi peccata pudorem.
 Fallimur et quondam non dignum tradimus: ergo
 Quem sua culpa premet, deceptus omitte tueri,
- 80 Ut penitus notum si tentent crimina, serves
 Tuterisque tuo fidentem praesidio: qui
 Dente Theonino cum circumroditur, ecquid

cam, adolescentium (*per pueros* v. 62; non servorum, quos liberi adolescentes haud dubie aspernati essent) ex vicina collectorum gregibus inter se divis. — *velox*] quia Victoria dea est et alata. — *pollice*] Plin. XXVIII, 2, 5: „*Pollices*, cum faveamus, *premere* etiam proverbio iubemur.“ Contrarius gestus improbationis signum erat. Ex muneribus gladiatoris haec petita sunt. Vide ad Epist. I, 1, 6.

V. 70. *patulae*] „semper patentes ad audiendum, curiosae.“ *Comm. Cruq.* — *irrevocabile*] cf. A. P. 390. *Emissum* proprie de sagitta, hasta, similibus. cf. Lucret. V, 1042: „varios sonitus emittere linguae.“ infra I, 20, 6. — *ulceret*] cf. Carm. I, 13, 4. I, 25, 13. — *marmoreum*] ut in divite domo. — *munere parvo beet*] Ne parvo hoc munere satis te beatum credat ab aliisque maioribus donis ac beneficiis abstineat. — *quondam*] vide ad Carm.

II, 10, 18. De re cf. Theogn. 963: „*Μή ποτ' ἐπαινέσης πρὶν ἂν εἰδῇς ἄνδρα σαφηνῶς, Οργὴν καὶ θυμὸν καὶ πρόπον ὅστις ἂν ᾖ.*“ — *quem sua culpa*] „Si quis potenti amico ante a te commendatus commissio scelere se maculaverit, noli eum defendere ac tutari; quemadmodum si probus est et falsae tentant eum criminationes, ut ante commendasti, ita pergere debes servare eum ac tutari.“ *Ut* part. non est *ἔνα* sed *ὥστε*; in coniunctivo *serves tuterisque* non est haerendum; est enim positus pro imperativo. Sic iam scholiastae intelligebant locum; *Acro*: „defende ac tuere,“ *Comment. Cruq.*: „ut penitus notum] h. e. non debet aliquem tibi ignotum ita tueri, sicut amicum tibi et familiarum,“ qui tamen haec verba non recte cum iis coniunxit quae praecedunt. *Bentl.* ex coniectura *At penitus.* — *Theonino*] „Luthienus Theon, liberti-

Ad te post paulo ventura pericula sentis?
 Nam tua res agitur, paries cum proximus ardet,
 85 Et neglecta solent incendia sumere vires.
 Dulcis inexpertis cultura potentis amici;
 Expertus metuit. Tu, dum tua navis in alto est,
 Hoc age ne mutata retrorsum te ferat aura.
 Oderunt hilarem tristes tristemque iocosi,
 90 Sedatum celeres, agilem navumque remissi;
 Potiores bibuli media de nocte Falerni
 Oderunt porrecta negantem pocula, quamvis
 Nocturnos iures te formidare tepores.
 Deme supercilio nubem: plerumque modestus
 95 Occupat obscuri speciem, taciturnus acerbi.
 Inter cuncta leges et percontabere doctos,
 Qua ratione queas traducere leniter aevum:
 Num te semper inops agitet vexetque cupido,

nus, dicacitatis amaritudine praeter ceteros ita patronum suum exasperavit, ut domo eius summovertetur et et quaternario (i. e. quadrante) legato iuberetur restem sibi palumque emere.“ *Comm. Cruq.* Suspiciantur corruptum esse nomen *Luthieni*. Ceterum cf. Sat. I, 4, 81. Epist. II, 1, 150 sq. I, 14, 38. I, 16, 38. — *dulcis inexpertis*] Cultura potentis amici cum inexpertis quidem dulcis, expertis periculosa et gravis videatur, cavendum est, ne quae quis multo cum labore assecutus sit subito mutatis rebus perdat. Et utitur quidem poeta imagine ab navigatione petita; inde etiam *retrorsum ferat aura*. Adiunguntur deinde praecepta de conservando magnorum hominum favore. — *potiores bibuli*] Horatius ipse hunc versiculum ex Epist. I, 14, 34 lepida quadam *παρωδία* maximam partem transsumpsisse videtur; alii, cum v. 91 in codicibus non paucis non legatur, suppositicia habuerunt verba *bibuli*... *oderunt* et coniunxerunt *Potiores porrecta*. Sententia satis plana est: „potiores, qui media etiam nocte Falernum bibere solent, oderunt abstemios qui tum porrecta pocula recusant.“ *Falerni* genit. pendet ex adi. *bibuli*, neque tamen alienus est a *poculis*. *Horkelius* leni mutatione opus esse putavit: po-

tores *vetuli*, ut Catull. 27, 1: „Minister vetuli puer Falerni;“ Martial. XI, 26: *Basia da nobis vetulo*, puer, *uda Falerno*.“ Macrob. Saturn. VII, 12: „mulsum miscendum esse novo Hy-mettio et vetulo Falerno.“ — *tepores*] Sic optimi codices prope omnes et Comment. Cruq.; alii *vapores*. Recte iam *Landinus*: „quasi dicat febrem“, ortam illam quidem nimio acerrimi vini usu. Teporibus excitantur vapores; quare facile moveri quis potuit ut adderet alterum vocabulum interpretandi gratia. Cic. N. D. II, 46, 118: „Stellae maris aluntur aquarum vaporibus (Ausdünstungen) iis, qui a sole ex agris *tepefactis* et ex aquis excitantur.“ cf. Epist. I, 16, 7. Cic. Senect. 15, 51. Et cf. Propert. III, 17 (15), 13: „*servida* tempora.“ Sil. Ital. XI, 304: „*ardescitque* Lyaeo.“ Iuven. 4, 136: „*Noverat ille... noctesque* Neronis iam medias aliamque famem, cum pulmo Falerno arderet.“

V. 96. *inter cuncta*] „Haec omnia dum agis, noli oblivisci eius rei, unde summum bonum haurias.“ — *Num*] Bland. quattuor et tres alii codd. Cruquii in utroque versu habent *num*; alii *non* in priore versu, in altero *nec*. alii *ne... ne*, alii *nunc... nunc*. Orellii quoque optimi et Pottierii plerique

- Num pavor et rerum mediocriter utilium spes,
 100 Virtutem doctrina paret naturane donet,
 Quid minuat curas, quid te tibi reddat amicum,
 Quid pure tranquillet, honos an dulce lucellum,
 An secretum iter et fallentis semita vitae.
 Me quoties reficit gelidus Digentia rivus,
 105 Quem Mandela bibit, rugosus frigore pagus,
 Quid sentire putas? quid credis, amice, precari?
 Sit mihi quod nunc est, etiam minus; et mihi vivam
 Quod superest aevi, si quid superesse volunt di;
 Sit bona librorum et provisae frugis in annum
 110 Copia, neu fluitem dubiae spe pendulus horae.
 Sed satis est orare Iovem quae ponit et aufert:
 Det vitam, det opes; aequum mi animum ipse parabo.

EPISTOLA XIX.

Prisco si credis, Maecenas docte, Cratino,
 Nulla placere diu nec vivere carmina possunt,

num, num, Pulmanni quinque. — *rerum mediocriter utilium*] Stoicorum ἀδιάφορα, a Cicerone de Fin. III, 16 in-differentia nominata. Sunt bona, honores, similia. — *doctrina paret*] cf. Plat. Menon. p. 86. C. — *secretum iter*] cf. Epist. I, 17, 10. Semita latet multitudinem; quare qui eam intravit, secretum fecit per vitam iter vel occultam vitam agit. Iuvenal. 10, 364: „Monstro, quid ipse tibi possis dare. Semita certe Tranquillae per virtutem patet unica vitae.“ — *Mandela*] *Porph.* „Mandela pagus est nimis contrahens atque algidus, frigore rugosa faciens hominum corpora.“ Hodie nominari dicitur *Bandela*. — *et mihi*] Sic recte quattuor Blandi. et Silv. Cruquii, optimi Bentleii; plerique Orellii ut. — *in annum*] „Unius anni proventum sibi superesse vult, ut, si spem mentita sit seges proximi anni, habeat unde vitam sustentet.“ *Obbarius*. Cf. Caes. b. g. IV, 29. — *neu fluitem*] Sic recte optimi codices, alii *ne*. Quod si scriberes, penderet hoc quartum quod opat ab illo quod praecedit; quod ne

possit fieri vetat extremus versus et particula *sed*. Nam illud *fluitare spe dubiae horae* significat iniquam animi condicionem, qua modo huc modo illuc homo trahitur, et opponitur aequitati animi. Hanc tamen non Iuppiter potest dare, sed homo est qui parat sibi ipse; quare satis est Iovem ea rogare quae in eius sunt potestate. — *ponit*] Sic omnes MSS. Cruquii, ex Orellii codd. Einsiedl. et Montepessul.; alii nec pauci nec mali *donat*. Bene tamen Bentleius: „*ponit* pro *donat*, etsi parum intersit, eo nobis aridet, quod et in antiquissimis Cruquii libris conspicitur et librariorum notioni minus obvium erat quam illud alterum.“

Epistola XIX.

Eo tempore, quo praeter Augustum imperatorem multi nobiles ac divites viri Musas colebant poetasque favore suo ornabant, fieri non potuit quin praeter veros poetas non parva existeret turba hominum, qui ingenio plane destituti versus magno negotio factos inanibus sententiis explerent, magno-

- Quae scribuntur aquae potoribus. Ut male sanos
 Adscripsit Liber Satyris Faunisque poëtas,
 5 Vina fere dulces oluerunt mane Camenae.
 Laudibus arguitur vini vinosus Homerus;
 Ennius ipse pater nunquam nisi potus ad arma
 Prosiluit dicenda. Forum putealque Libonis
 Mandabo siccis, adimam cantare severis.
 10 Hoc simul edixi, non cessavere poëtae
 Nocturno certare mero, putere diurno.
 Quid, si quis vultu torvo ferus et pede nudo
 Exiguaeque togae simulet textore Catonem,

rum exemplarium vestigia et verba serviliter premerent et tamen magnam sibi laudem se comparaturos sperarent. Quo morbo correpti erant partim divites, qui domi carmina sua recitantes plausum coena et pecunia coemptum colligerent, partim pauperes miserique homines, qui fame saepe in furorem agitati aut ingentes laudes liberalium patronorum clamarent aut flebiles tragoedias molibus auribus delicatulorum dominorum decantarent. Utrumque genus Horatium, a quo contemneretur, palam odebat eundemque, quem imitaretur, clam admirabatur. De his igitur hominibus hac epistola scribit ad Maecenatem, in qua lepide sed acerbè invehitur in vile illud genus imitatorum, qui, quae poetica ars esset nescientes, versus si misere conglutinassent sibi ipsi plaudere solebant. Scripta videtur paulo ante editum totum librum.

V. 1. *docte*] cf. ad Carm. I, 1, 29. III, 8, 5. De Cratino vide ad Sat. I, 4, 1. — *potoribus*] Non facile dicas utrum dativus sit an ablativus; praefero tamen ablativum, de quo vide ad Carm. I, 6, 2. Ceterum cf. epigramma *Nicenaeti* (Athenae. 2, 3. p. 39): „Οἷνός τοι χαρίεντα πίνει ταχὺς ἔππος αἰοιδῶ. Ἐδῶρ δὲ πίνων οὐδὲν ἂν τέκνοι σοφόν. Ταῦτ' ἔλεγεν, Διώνυσσε, καὶ ἔπνεεν οὐχ ἑνὸς ἀσχοῦ Κρατίνος, ἀλλὰ παντὸς ὁδῶδει πίνον.“ — *ut*] ex quo. Vide ad Carm. IV, 4, 42. — *Satyris Faunisque*] perpetuis suis comitibus. Carm. II, 19, 4. — *adscripsit*] „tanquam in legionem suam, nam hoc verbum militare est. *Porph.* cf. Carm. III, 3, 35. — *vini vinosus*]

Eiusdem verbi diversas formas et propter vim et propter sonum adamarunt latini scriptores in eiusque rei gratiam verborum ordinem non raro mutarunt. cf. Sat. II, 2, 39. A. P. 133. Epist. I, 18, 5. 89. — *Homerus*] cf. II. VI, 261; praeterea *Τὸν οἶνον μελιγδέα, μελίφρονα, ἡδύποτον, εὐήνορα, μενοεικέα* appellat. — *Ennius pater*] Hoc nomine ornatur et quia priscus fuit et quia quasi pater est poësis Romanae. Propert. III, 2, 6: „Parvaeque tam magnis admoram fontibus ora, Unde pater sitiens Ennius ante bibit.“ — *Libonis*] vide ad Sat. II, 6, 35. — *siccis*] Carm. I, 18, 3. — *edixi*] ut praetor. cf. Sat. II, 2, 51. Sic recte scribitur ex codd., non *edixit*, vel quod unus codex habet *edixti*. Nam pronomen *hoc* omnia comprehendit quae sunt in novem versibus, et vocativus *Maecenas docte* non magis scribentis est quam alloquentis. — *putere*] Martial. I, 29: „Hesterno foetere mero qui credit Acerram, Fallitur; in lucem semper Acerra bibit.“ — *textore*] festive dictum, nam *textore* ablativus eodem loco ponendus est quo reliqui *vultu torvo et pede nudo*; ut si nos dicamus „und Dank dem Weber seiner kurzen Toga.“ De Catone Uticensi Lucan. II, 384: „Huic epulae, vicisse famem; magnique Penates Submovisse hiemem tecto, pretiosaque vestis Hirtam membra super Romani more Quiritis Induxisse togam.“ Et Comm. Cruq.: „Cato senator Romanus, ut severior apparet, intonsa barba capillisque prodibat in publicum duroque calcamento et saepe nullo togaque exigua.“ — *Rupit*

Virtutemne repraesentet moresque Catonis?

- 15 Rupit Iarbitam Timagenis aemula lingua,
 Dum studet urbanus tenditque disertus haberi.
 Decipit exemplar vitiis imitabile: quodsi
 Pallerem casu, biberent exsanguie cuminum.
 O imitatores, servum pecus, ut mihi saepe
 20 Bilem, saepe iocum vestri movere tumultus!
 Libera per vacuum posui vestigia princeps,
 Non aliena meo pressi pede. Qui sibi fidet,
 Dux reget examen. Parios ego primus iambos
 Ostendi Latio numeros animosque secutus
 25 Archilochi, non res et agentia verba Lycamben.

Iarbitam] Timagenes Alexandrinus, rhetor et historicus, captivus Romam ductus in Caesaris Octaviani gratiam venit: eam autem cum licentia dicendi amisisset, ab Asinio Pollione receptus est. Qui cum olim inter viros doctos cum omnium applausu declamasset, aemulationem excitavit Iarbitae, cui homini item docto ac rhetori, ut videtur, ingenti vocis ac laterum intentione accidit, ut raptò diaphragmate subito periret. Iarbita, de quo nihil aliud notum est, Maurus fuisse dicitur. Cf. Sat. I, 3, 135. Cic. ad Fam. VII, 1, 14: „*Dirupi* paene me in iudicio Galli.“ Ceterum *Acro* de Iarbita: „qui dum Timagenem philosophum post convivium et inter pocula declamantem vellet imitari et non posset, invidia quodammodo discerptus est.“ *Porphyrio*: „qui dum Timagenem imitator post convivium et inter pocula declamantem, propter insolentiam faciendi quod conabatur, paene disruptus est. Timagenes enim multos conabatur adhibere et coenae et declamationi suae, dumque ab his multum laudatur in admirationem sui, provocasse Iarbitam dicitur, qui se et stomachum abruptit, dum Timagenem et dicendo et pascendo amicos conatur aequare.“ Comment. Cruq. sic: „qui dum Timagenem philosophum post convivium et inter pocula declamantem vellet imitari nec posset, invidia quodammodo ruptus est.“ In quibus scholiis vides latere eam scripturam, quam *Cruquius* in duobus Blandiniis, *Torrentius* in aliquot codd. reperit, *aemula coena*; nec eam omnino spernendam

esse nuper *Horkelius* (Anal. Horat. p. 25 sq.) ostendit.

V. 17. *vitiis*] coniungendum et cum *decipit* et cum *imitabile*. Cic. de Or. II, 22, 90: „Multos imitatores saepe cognovi, qui aut ea quae facilia sunt aut etiam illa quae insignia ac paene vitiosa consectantur imitando.“ — *cuminum*] Plin. H. N. XX, 14: „Omne cuminum pallorem bibentibus gignit. Ita certe ferunt Porcii Latronis, clari inter magistros dicendi, assentatores similitudinem coloris studiis contracti imitatos.“ *Exsanguie* appellatur per prolepsim quandam, ut *pallida mors* Carm. I, 4, 13. — *tumultus*] vani conatus imitandi ac deprimenti simul Horatii. Deinde addit, ne se quoque imitatore quis dicat, qua ratione Graecos secutus sit: formam se et versus sumpsisse ab Archilochi et Alcaeo, non res et verba. — *fidet*] Cruq.: „*Qui sibi fidet, dux reget examen*. Sic habet Bland. antiquissimus cum Div. et Silv., reliqui tres Bland. habent *fidit, regit*, utrumque aequè recte; alii legunt *fidit, reget*, quod non probo.“ Futurum utroque loco alii quoque boni codd., nec pauci, obtinent apud Orellium, etiam Montepessul., apud Pottierium, duo Pulmanni. Bentleius de suis MSS. nihil. Nec aliter positum est futurum quam apud Cic. Tusc. I, 28: „quam (naturam) si *sequemur* ducem, nunquam *aberrabimus*.“ ibid. I, 6: „quod vitium effugere qui *volet* (omnes autem velle debent), *adhibebit* diligentiam.“ ibid. „quod in honestis rebus curae *ponetur*, id iure *laudabitur*.“

- Ac ne me foliis ideo brevioribus ornes,
 Quod timui mutare modos et carminis artem:
 Temperat Archilochi Musam pede mascula Sappho,
 Temperat Alcaeus, sed rebus et ordine dispar,
 30 Nec socerum quaerit quem versibus oblinat atris,
 Nec sponsae laqueum famoso carmine nectit.
 Hunc ego non alio dictum prius ore Latinus
 Vulgavi fidicen; iuvat immemorata ferentem
 Ingenuis oculisque legi manibusque teneri.
 35 Scire velis, mea cur ingratus opuscula lector
 Laudet ametque domi, premat extra limen iniquus?
 Non ego ventosae plebis suffragia venor
 Impensis coenarum et tritae munere vestis;
 Non ego, nobilium scriptorum auditor et ultor,
 40 Grammaticas ambire tribus et pulpita dignor:
 Hinc illae lacrimae. Spissis indigna theatri
 Scripta pudet recitare et nugis addere pondus,
 Si dixi: Rides, ait, et Iovis auribus ista
 Servas: fidis enim manare poëtica mella
 45 Te solum, tibi pulcher. Ad haec ego naribus uti

Cur igitur auctoritas antiquissimorum codd. destituatur? — *Lycamben*] vide ad Epod. 6, 13, unde intelliges verbum *agentia*. Cfr. Ovid. Ib. 51: „in te mihi liber iambus Tincta Lycambeo sanguine tela dabit.“ De verbo *agere* cf. Epod. 5, 89. — *Temperat Archilochi*] Sappho et Alcaeus quamquam Archilochi genera versuum receperunt et reliquis suis versibus admiscuerunt, tamen alieni erant ab eius et ingenio et versuum inter se coniunctione. Horum igitur exemplis excusat Horatius, quod ipse non nova sed aliis iam culta forma usus sit. — *mascula Sappho*] quae quamquam mulier virum tamen ingenii viribus aequiparavit. — *hunc*] Alcaeum. Carm. IV, 3, 22. III, 30, 13. *Horkelius* scribendum esse coniecit *hinc ego non alio dictum melos ore*, quocum conferri iubet Carm. III, 4, 1. — *immemorata*] „a nullo ante dicta.“ *Comm. Cruq.* — *ingenuis*] ingenuorum hominum, candide iudicantium. — *ventosae*] ut Epist. I, 8, 12. De re cf. A.

P. 420. — *auditor et ultor*] cf. Epist. II, 2, 67. Omnis ironia posita est in vocabulo *ultor*. Nam qui insulsa nobilium ac divitum hominum carmina audit, deinde sua non meliora recitat, is illos quasi ulciscitur; simul igitur est auditor et ultor. Sic Iuvenalis Sat. 1, 1: „Semper ego auditor tantum? nunquamne reponam, Vexatus toties rauci Theseide Codri?“ — *Grammaticas tribus*] Sunt sectae grammaticorum, criticorum (Aesthetikerzünfte). — *pulpita*] Katheder. Quintil. XI, 3, 130: „cum in angusto quodam pulpito stans diceret.“ — *hinc illae lacrimae*] In proverbium abiit ex Terent. Andr. I, 1, 99. — *theatri*] magna auditorum corona. — *Iovis*] cf. Sat. II, 6, 52. — *manare*] transitive ut Ovid. Met. VI, 312. Plin. H. N. XIV, 20: „Arborum suco manantium picem resinamque.“ ibid. XXXVII, 10: „Indica gemma in attritu sudorem purpureum manat.“ — *naribus*] cf. Sat. I, 6, 5. II, 8, 64. — *diludia posco*] „spatium

Formido et, luctantis acuto ne secer ungui,
 Displicet iste locus, clamo et diludia posco.
 Ludus enim genuit trepidum certamen et iram,
 Ira truces inimicitias et funebre bellum.

EPISTOLA XX.

Vertumnum Ianumque, liber, spectare videris,
 Scilicet ut prostes Sosiorum pumice mundus.
 Odisti claves et grata sigilla pudico;
 Paucis ostendi gemis et communia laudas,
 Non ita nutritus. Fuge quo descendere gestis:

emendandi carmina, et intermissionem ac dilationem exposco. Diludia autem dicuntur tempora, quae gladiatoribus conceduntur inter dies munerum quibus pugnatur.“ *Comm. Cruq.* Cfr. Epicharm. apud Athen. II, 3. p. 83: „ἐν μὲν θυσίας θοίνῃ . . . Ἐν δὲ θοίνῃς πόσις ἐγένετο. B. Χάριεν, ὥς γέ μοι δοκεῖ. A. Ἐν δὲ πόσιος κῶμος, ἐν κῶμον δ' ἐγένετο θυσία (al. συναρία). Ἐν δὲ θυσίας δίκη [γένηται, ἐν δίκῃς δὲ καταδίκη], Ἐν δὲ καταδίκῃς πέδαι τε καὶ σφάκελος καὶ ζημία.“

Epistola XX.

„Haec cum libro suo videtur loqui, quem ante impositum finem cupidum esse dicit in publicum prodeundi, cum domi continendus sit ne in magnos lectores incidens vituperetur.“ *Porphyrio*. Addita est enim haec epistola quasi epilógus non Epodorum libro, quem propter rationes πολιτικὰς anno demum 733 editum iniuria suspicati sunt viri docti, sed huic ipsi epistolarum libro. Versus enim 28, quo annus indicatur 733 a. u. c., nihil impedit quominus duobus vel tribus annis post Lollium consulem epistolam scriptam credamus. Lollio honorificum erat quod Horatius hoc loco iterum mutuae amicitiae testimonium posuit; deinde qui annis 734 et 735 consules erant, Horatio aut plane ignoti aut non familiares erant; tum accessit hoc quoque, quod annus aetatis quadagesimus quartus facile in *quater undenos* annos dividi potuit. Solebant

enim poetae in versibus magnos numeros in minores partes dissecare; cuius quidem rei aliud genus habes Carm. II, 4, 23. Postremo bene animadvertendum est, Horatium non dicere: me sciat haec scripsisse Lollio Lepido coss., sed simpliciter iis consulibus se quadraginta quattuor annos natum fuisse indicare. Quibus de causis etiamsi inter epistolas plures sunt quae a. 734 scriptae videntur, tamen haec epistola omnibus quasi custos et comes data est. Similis natura est Ovidii epistolae primae Tristium libri I.

V. 1. *Vertumnus*] Sat. II, 7, 14. *Acro*: „Vertumnus et Ianus dii sunt qui praesunt negotiis ementium et vendentium, ante quorum templa erant loca, in quibus cum ceteris rebus etiam libri venales erant.“ — *Sosiorum*] Sosii fratres erant bibliopolae. A. P. 345. — *pumice*] Martial. VIII, 72: „Nondum murice cultus asperoque Morsu pumicis aridi politus Artanum properas sequi, libelle.“ id. I, 118, 14: „Dominus tabernae De primo dabit alterove nido Rasum pumice purpurae cultum Denariis tibi quinque Martialem.“ — *sigilla*] scrinia, capsas. cf. Epist. II, 1, 113. — *descendere*] in Forum, in quod ex propinquis collibus descendendum erat. Q. Cicer. de petit. cons. 1: „Prope quotidie ad Forum tibi descendenti meditatam hoc sit.“ *Descendere* repertum est in omnibus codd. Cruquii, Bentleii, Orellii, aliorum; *discedere* in paucis. — *emisso*] etiam de scriptis. Cic. Fam. VII,

- Non erit emissio reditus tibi. Quid miser egi?
 Quid volui? dices, ubi quis te laeserit; et scis
 In breve te cogi, cum plenus languet amator.
 Quodsi non odio peccantis desipit augur,
 10 Carus eris Romae, donec te deserat aetas;
 Contrectatus ubi manibus sordescere vulgi
 Coeperis, aut tineas pasces taciturnus inertes,
 Aut fugies Uticam aut vinctus mitteris Ilerdam.
 Ridebit monitor non exauditus, ut ille
 15 Qui male parentem in rupes protrusit asellum
 Iratus: quis enim invitum servare laboret?
 Hoc quoque te manet, ut pueros elementa docentem
 Occupet extremis in vicis balba senectus.
 Cum tibi sol tepidus plures admoverit aures,
 20 Me libertino natum patre et in tenui re
 Maiores pennas nido extendisse loqueris,
 Ut quantum generi demas, virtutibus addas;

33: „Si quid dignum nostro nomine emisimus.“ cf. Epist. I, 18, 71. — *in breve cogi*] „complicari.“ *Comm. Cruq.* — *plenus*] Sat. II, 2, 43. Epist. II, 1, 100. — *augur*] „ego qui haec auguror.“ *Idem.* — *deserat*] Coniunctivus aptior videtur ad sententiam; codd. fluctuant inter *deserat*, *deseret*, *deserit*. — *tineas inertes*] Lucilius ap. Serv. Virg. Aen. IV, 158: „Ut perhibetur iners, ars in quo non erit ulla.“ Cic. de Fin. II, 34, 115: „Lustremus animo non has maximas artes, quibus qui carebant inertes a maioribus nominabantur.“ Tineae igitur inertes mihi videntur, quia destitutae artium amore poemata rodere non dubitant. Sic Iuven. III, 207: „Et divina *opici* rodebant carmina *mures* (Die barbarischen Motten und Mäuse, die Nichts von der Litteratur verstehen). — *Ilerdam*] Romanae litterae in Africa et Hispania iam innotescere coeperunt; sed qui emissi erant novi libri tarde in remota ea loca pervenerunt. Quapropter qui Uticae vel Ilerdae novi erant libri, ii Romae iam in oblivionem abierunt. cf. A. P. 345. — *vinctus*] cum aliis mercibus (verpackt). Alii *vinctum* intelligunt catenis onera-

tum uti fugitivum deprehensum et ad dominum remissum; non bene, arbitrator. *Vinctus* habent optimi codices; alii male *unctus*; quod qui defendebant, librum videbant aromatatis unguentisque involvendis destinatum. — *monitor*] ego qui te monui. — *elementa docentem*] cf. Sat. I, 10, 75. Iuven. VII, 226: „Stabant pueri, cum totus decolor esset Flaccus et haereret nigro fuligo Maroni.“ *Balba senectus* libri remota tempora significat.

V. 19. *sol tepidus*] post meridiatio-nem qua uti solebant Romani; possis etiam de matutino tempore cogitare (Sat. I, 6, 122), nam non cogit natura loci, ut plures in eodem loco coniunctos videamus. Suae quisque domi sedet ac legit. Alii hunc quoque locum ad ludi magistros referebant *solemque tepidum* non de diei, sed de anni tempore intelligebant; nimirum indicari Idus Octobres, quibus feriis finitis (cf. ad Sat. I, 6, 75) pueri ludos frequentare inciperent. Quae quomodo ex uno verbo (*sol tepidus*) extorqueri potuerint, vix intelliges. — *nido*] Refer ad *maiores* et ad *extendisse*. De imagine compāra Epist. II, 2, 50. — *primis Urbis*] cf. Sat.

Me primis Urbis belli placuisse domique;
 Corporis exigui, praecanum, solibus aptum,
 25 Irasci celerem, tamen ut placabilis essem.
 Forte meum si quis te percontabitur aevum,
 Me quater undenos sciat implevisse Decembres,
 Collegam Lepidum quo duxit Lollius anno.

II, 1, 75 sq. Epist. I, 17, 35. Genitivus *belli domique* coniunge cum *placuisse*; alii cum *primis urbis*, sed bellicam laudem et tribunatum militarem Horatius plane omittere hoc loco non potuit. — *praecanum*] Carm. II, 11, 15. — *duxit*] Anno 733 cum diu ambitu

et contentionibus Q. Aemilii M. F. Lepidi et L. Silani de altero consulatu eius anni certaretur, Lollius diu solus consulatum gessit. Itaque Lollius collegam quasi duxit ut comitem paulo tardiozem.

Q. HORATHI FLACCI E P I S T O L A R U M

LIBER SECUNDUS.

EPISTOLA I.

Cum tot sustineas et tanta negotia solus,
Res Italas armis tuteris, moribus ornes,

Epistola I.

Suetonio teste (in vita) Horatius hanc epistolam scripsit, ne voluntati Augusti, qui quod nihil ad se scripsisset graviter conquestus erat, plane deesse videretur. In qua re egregium fuit Horatii consilium; qui cum intellexisset in epistola ad Augustum danda neque ineptius quidquam fore quam satiricum aliquod argumentum sive acerbe sive iocose descriptum, neque putidius quidquam quam rem aliquam ex philosophia petitam, quae malignis interpretationibus subiecta pravum aliquod suum consilium celare posset videri, id sibi describendum et illustrandum sumpsit genus, quo nullum aut Augusto aut se dignius esse posset. Praemisso enim splendido exordio de Augusto eiusque in rempublicam meritis, quod tamen ipsum ita est comparatum ut coniunctissimum sit cum reliqua parte epistolae, Horatius agit de statu, quo tunc esse sibi videatur poesis Romana, docet quid excolendae ei maxime obstet, adhortatur Augustum ut omnes eius partes eadem cura amplectatur, reditque extremo carmine transitu apposite sibi parato ad excusandam suam facultatem, cum laudandis merito Augusti virtutibus imparem se nihil ad celebrandum tantum nomen afferre posse deplorat. Praeci-

puum igitur poetae consilium cernendum est in ostendendis maximis incommodis, quibus latinam poesim suo tempore laborare ac deprimi non sine magno dolore vidit. Negligentia autem et despicientia, qua totus paene populus veros suos poetas aequales eorumque studia utique laudanda et ad reipublicae salutem utilia tum persequeretur, communis quasi fons erant, unde omnia illa incommoda proveniebant. Romani enim eo tempore caeco quodam amore abrepti aut antiqua longe praeferebant aut, id quod scenicae arti et fabulis maxime obfuit, pugnarum pompaeque triumphalium in theatris imitationibus, muneribus gladiatorii, pugnis ferarum magis ducebantur quam optimis fabulis digne ac simpliciter actis. Ea autem de antiquorum poetarum nimio amore, aequalium iniusta contemptione vituperatio Augustum quoque quodam modo tetigit: etenim Suetonius Octav. 89: „Augustus, inquit, plane poematum quoque non imperitus delectabatur etiam *comoedia veteri* et saepe eam exhibuit publicis spectaculis;“ quem locum olim de Atticorum antiqua comoedia intellectum rectius nunc Orellius interpretatus est de fabulis Plauti, Caecilii Statii, Attae, Dossenni. Etiam Quintilianus X, 1, 43 queritur: „Quidam solos veteres legendos putant“, et Mar-

Legibus emendes, in publica commoda peccem,
Si longo sermone morer tua tempora, Caesar.

5 Romulus et Liber pater et cum Castore Pollux,
Post ingentia facta deorum in templa recepti,
Dum terras hominumque colunt genus, aspera bella
Componunt, agros assignant, oppida condunt,
Ploravere suis non respondere favorem

10 Speratum meritis. Diram qui contudit hydram
Notaque fatali portenta labore subegit,
Comperit invidiam supremo fine domari.
Urit enim fulgore suo qui praegravat artes

tialis V, 10, 7 sqq.: „Ennius est lectus salvo tibi, Roma, Marone Et sua riserunt saecula Maeonidem. Rara coronato plausere theatra Menandro, Norat Nasonem sola Corinna suum.“ — Epistolam scriptam esse apparet cum Augustus ita reipublicae statum iam mutasset, ut unus omnia regeret, in se unum omnes honores contulisset — nam Lepido a. 741 mortuo etiam Pontifex Maximus factus est —, cum restitutis moribus firmataque pace a Romanis divino prope honore coleretur (v. 16). Quare interpretes annum 744 videre sibi videbantur; quibus ita consentire, ut alio anno scriptam eam esse negem, ego quidem non ausim. *Webero*, qui v. 132 ludos saeculares indicari recte intellexit, nihil aliud certum est nisi scriptam esse epistolam post a. 737, nec ultra a. 741 progrediendum esse videtur.

V. 1. *sustineas*] proprie de oneribus, iis etiam quae coniuncta sunt cum honoribus. Cic. Fam. V, 9: „Hoc quidquid est *oneris* et *muneris* pro mea dignitate tibi tuendum ac *sustinendum* puta.“ ibid. X, 12: „praetor urbanus, quod consules aberant, consulare munus *sustinebat* more maiorum.“ — *armis tuleris*] cf. Carm. IV, 14, 43 sq. Haec tria *armis tulari*, *moribus ornare*, *legibus emendare* summa sunt beneficia, quae bonus princeps in cives suos conferre potest. cf. Carm. IV, 5, 21 sqq. IV, 15, 9 sqq. Sueton. Octav. 27: „Recepit et *morum legumque* regimen acque perpetuum, quo iure cenus populi ter egit.“ ibid. 34: „Leges retractavit et quasdam ex integro

sanxit.“ cfr. Ovid. Met. XV, 833 sq. — *morer*] Epist. I, 13, 17. A. P. 321. — *Romulus*] Ad rem ipsam dum pergit, diutius etiam in laude Augusti moratur, leniter ad ingratum aequalium animum declinans, quem nemo non expertus est praeter unum Augustum, cf. Carm. III, 3, 9—16. — *post ingentia facta*] i. e. post mortem; nam quamdiu vivebant, tamdiu etiam magna effecerunt facinora. Nihil igitur opus est Bentleii coniectura *fata*. Cic. Nat. D. III, 15: „Iam vero in Graecia multos habent ex hominibus deos, Alabandum Alabandei, Tenedii Tenem, Leucotheam, quae fuit Ino, et eius Palaemonem filium cuncta Graecia, Herculem etiam, Aesculapium, Tyndaridas; Romulum nostri aliosque complures, quos quasi novos et adscripticios cives in coelum receptos putant.“ — *contudit*] nam τῷ ῥοπάλῳ τὰς νεφάλας αὐτῆς ἔκοψε. Appollod. II, 5, 2. Vide ad Carm. IV, 4, 61. — *fatali*] fatis destinato labore; cf. Carm. I, 37, 21. III, 3, 19. — *portenta*] cf. Carm. I, 22, 13. Lucret. V, 37 de iisdem monstris: „Cetera de genere hoc quae sunt *portenta* perempta.“ Ad haec referendum est etiam verbum *domari*, nam invidia quasi portentum est, quod non vincitur nisi morte. cf. Carm. III, 24, 31 sq. — *urit enim*] Causa haec est cur invidia non exstinguatur nisi morte; nam quamdiu magni viri vivunt, oppressos se magnitudine eorum sentiunt inferiores neque de eorum laude detrudere desinunt. *Artes* enim per quamdam metonymiam ipsos significant artifices; similiter de Musis Phaedra.

Infra se positas; exstinctus amabitur idem.

15 Praesenti tibi maturos largimur honores

Iurandasque tuum per nomen ponimus aras,

Nil oriturum alias, nil ortum tale fatentes.

Sed tuus hic populus, sapiens et iustus in uno,

Te nostris ducibus, te Graiis anteferendo,

20 Cetera nequaquam simili ratione modoque

Aestimat et, nisi quae terris semota suisque

Temporibus defuncta videt, fastidit et odit,

Sic fautor veterum, ut tabulas peccare vetantes,

Quas bis quinque viri sanxerunt, foedera regum

25 Vel Gabiis vel cum rigidis aequata Sabinis,

Pontificum libros, annosa volumina vatium

Dictitet Albano Musas in monte locutas.

Si, quia Graiorum sunt antiquissima quaeque

Scripta vel optima, Romani pensantur eadem

III. prol. 19: „In quo tonanti sancta Mnemosyne Iovi Fecunda novies *artium* peperit *chorum*.“ — *praegravat*] Sat. II, 2, 78. *Artes* autem accusativus est non huius solum verbi potestati obnoxius, sed alterius quoque *urit*. — *iurandas*] cf. Ovid. Met. II, 46. Et compara Cic. pro Flacc. 36: „is, cui, si aram tenens iuraret, crederet nemo.“ Ovid. ex Pont. III, 3, 68: „per matrem iuro Caesareumque caput.“ Trist. II, 1, 54: „per te (Augustum) praesentem conspicuumque deum.“ — *nomen*] Antiquiss. Cod. Bland. et duo Bersmanni *numen*, ut Carm. IV, 5, 33; reliqui omnes et Comment. Cruq., quem ex Blandiniis codd. a Cruquio compositum esse scimus, *nomen*. — *aras*] Senatus Augusto reverso anno 735 aram exstruxit inscriptam *Fortunae Reduci*. Sueton. Octav. 52: „Templa quamvis sciret etiam proconsulibus decerni solere, in nulla tamen provincia nisi communi suo Romaeque nomine recepit; nam in Urbe quidem pertinacissime abstinuit hoc honore.“ cf. Carm. III, 5, 1 sq. IV, 14, 43 sq. — *nil oriturum*] Carm. IV, 2, 37 sqq.

V. 18. *in uno*] in hac una re, quod te antefert omnibus et Romanis et Graecis ducibus. Ne *uno* cum te coniun-

gas, vetat oppositum vocabulum *cetera* v. 20. — *veterum*] gen. neutrius. — *Gabiis*] de part. *cum* compara Carm. III, 25, 2 ubi vide; de re lege Liv. I, 53 sq.; de foederibus cum Sabinis ictis Liv. I, 13. I, 17, 2; aliud ictum est cum Sabinis Tullo Hostilio rege. — *aequata*] i. e. aequis condicionibus icta. — *pontificum libros*] Significantur pontificum annales sive commentarii, de quibus Cicero de orat. II, 12, 52: „Ab initio rerum Romanarum usque ad P. Mucium, pontificem maximum, res omnes singulorum annorum mandabat litteris pontifex maximus referebatque in album et proponebat tabulam domi, potestas ut esset populo cognoscendi; ii, qui etiam nunc annales maximi nominantur. — *volumina vatium*] sunt libri vaticini, fatidici, quorum lectione populus delectabatur. Liv. XXV, 1 extr. ibid. 12. *Porphyrio*: „Veteres libros Marcii vatis Sibyllaeque et similia.“ *Symmach.* epist. IV, 34: „Et Marciorum quidem vatium divinatio caducis corticibus inculcata est.“ — *Albano*] festive dictum; nam qui vetera illa amabant, iis Musae in Albano monte, non in Parnaso et Helicone sedes suas habere videbantur. — *Graiorum*] Sic ex antiquissimo cod.

- 30 Scriptores trutina, non est quod multa loquamur:
 Nil intra est oleam, nil extra est in nuce duri;
 Venimus ad summum fortunae, pingimus atque
 Psallimus et luctamur Achivis doctius unctis.
 Si meliora dies, ut vina, poëmata reddit,
- 35 Scire velim, chartis pretium quotus arroget annus.
 Scriptor abhinc annos centum qui decedit, inter
 Perfectos veteresque referri debet an inter
 Viles atque novos? Excludat iurgia finis.
 Est vetus atque probus, centum qui perficit annos.
- 40 Quid? qui deperiit minor uno mense vel anno,
 Inter quos referendus erit? veteresne poëtas,
 An quos et praesens et postera respuat aetas?
 Iste quidem veteres inter ponetur honeste,
 Qui vel mense brevi vel toto est iunior anno.
- 45 Utor permissio caudaeque pilos ut equinae
 Paulatim vello et demo unum, demo et item unum,

Bland. Cruq. duobus Torrentii, egregio uno Benteleii, uno Pulmanni scripti, reliqui *Graecorum*: sed cf. ad Carm. II, 4, 12. — *nil intra*] „Negant manifesta, nam constat intra oleam et extra nucem esse durtiam.“ *Porph.* In quo loco noli offendi variata constructione *intra oleam* et *extra in nuce*; quod Benteleio accidit, qui *olea* i. e. in olea corrigendum esse putavit. Sententia haec est: qui affirmat, Romanorum scriptorum eandem esse rationem quam Graecorum, ei etiam insulsissima quaeque coniungere et falsissima affirmare licebit, atque adeo dicere, Romanos omnibus artibus Graecis esse superiores. — *venimus*] Eodem iure dicere quis possit Romanos omnibus artibus Graecos superasse, neque quidquam esse quod Romanos discere deceat. Deinde Horatius sorite usus (v. 34—49) ostendit quam absurda antiquariorum sit sententia. — *unctis*] proprie de luctantibus, sed ita positum est vocabulum, ut perpetua Graecorum in reliquis etiam artibus exercitatio illustretur. — *chartis pretium*] Sic antiquiss. Bland. et Tonsan. Cruquii; quod cur melius sit quam aliorum *pretium chartis*, in promptu est. — *arroget*]

legitime attribuat, ut Carm. IV, 14, 40. — *decedit*] Carm. IV, 7, 14. — *excludat*] Si anni sunt, inquit, qui bonum efficiunt scriptorem, constituamus certum annorum terminum; quem qui praecedunt perfectos habeamus, qui insequuntur novos et contemnendos. Exempli gratia v. 39 finis s. terminus centesimo anno constituitur. — *respuat*] Sic recte tres MSS. Cruquii, inter quos antiquissimus Bland., optimi Orellii, alii; reliqui Cruquii *respuat*, alii *respuet*. cf. ad Epist. I, 17, 8. — *honeste*] mit Ehren. — *caudae equinae*] Videtur exemplum sumpsisse a Sertorio, qui ut milites suos ad concordiam et patientiam adhortaretur, produxisse dicitur duos equos, alterum plane infirmum et iam veterem, alterum procerum et robustum et caudam mira pilorum crebritate habentem. Infirmo equo astabat vir magnus et validus, robusto parvus ac debilis; iam cum uterque caudam equo evellere iuberetur, robustus infirmi equi caudam totam, debilis robusti singulos pilos; ille quidem risum spectantibus praebuit, hic sine multo labore equum cauda privavit. — *et item*] Sic scribendum est ex optimis libris; in aliis est

Dum cadat elusus ratione ruentis acervi,
 Qui redit in fastos et virtutem aestimat annis
 Miraturque nihil nisi quod Libitina sacravit.
 50 Ennius et sapiens et fortis et alter Homerus,
 Ut critici dicunt, leviter curare videtur,
 Quo promissa cadant et somnia Pythagorea.
 Naevius in manibus non est et mentibus haeret
 Paene recens? Adeo sanctum est vetus omne poëma.
 55 Ambigitur quoties uter utro sit prior, aufert
 Pacuvius docti famam senis, Attius alti,
 Dicitur Afrani toga convenisse Menandro,
 Plautus ad exemplar Siculi properare Epicharmi,

vel etiam vel iterum vel itidem. — *ruentis acervi*] Cic. de divin. II, 4: „*Soriti* resistas, quem si necesse sit latino verbo liceat *acervalem* appellare.“ Nam *σῶρος* est acervus; et fuit duplex genus soritae, ruentis et struentis. — *virtutem*] poeticam facultatem et artem. — *Libitina*] vide ad Carm. III, 30, 7.

V. 50. *fortis*] ob magnum spiritum, quem in suis scriptis prae se ferebat. Ceterum non sine quadam *εὐφροσύνη* dicit, Ennium in scribendo negligentem parum curasse quid de se promississet ac somniasset; et tamen eum nunc summa laude ornari, quoniam vetus sit poeta; Naevium in omnium etiam manibus et animis haerere, reliquos omnes tantopere coli, ut sua quisque laude fruatur. De Ennio cf. Pers. VI, 10 sq.: „Cor iubet hoc Enni, postquam destertuit esse Maeonides, Quintus pavone ex Pythagoreo.“ cf. A. P. 260 sqq. — *Naevius*] Cn. Naevius Campanus a. u. c. 519 primam fabulam docuit, mortuus est a. 550 Uticae in exilio. Praeter tragoedias et comoedias scripsit epicum quoque carmen versibus Saturniis de primo bello Punico; de quo Cic. Brut. c. 19: „Tamen illius (Naevii), quem vatibus et Faunis annumerat Ennius, bellum Punicum quasi Myronis opus delectat.“ — *non est*] nonne est; ut Carm. III, 20, 1. Interrogationis signum primus recte posuit Bentleius; alii maluerunt partim *non* particulae substituere *nunc*, partim *non est*, at scribere. — *Pacuvius*] M. Pacuvius Brundisius, Enni

sororis filius, natus a. u. 534, amicus C. Laelii, Tarenti mortuus est prope nonagenarius. De *Attio* vide ad Sat. I, 10, 53. De utroque Quintil. X, 1, 97: „Tragoediae scriptores veterum Attius atque Pacuvius clarissimi gravitate sententiarum, verborum pondere, auctoritate personarum. Ceterum nitor et summa in excolendis operibus manus magis videri potest temporibus quam ipsis defuisse. Virium tamen Attio plus tribuitur, Pacuvium videri *doctiorem* qui esse docti affectant volunt.“ — *Afrani*] L. Afranius floruit circa a. u. c. 660; de eo Quintil. X, 1, 100: „*Togatis* excellit Afranius, utinamque non inquinasset argumenta puerorum foedis amoribus, mores suos fassus.“ Donat. fragm. ad Terent. fab. p. XXX. ed. Zeune: „Comoediarum formae sunt tres: *palliatæ* Graecum habitum ferentes, quas nonnulli tabernarias vocant, *togatae* iuxta formam personarum habitum togarum desiderantes, *Atellanae* salibus et iocis compositae.“ De Menandro vide ad Sat. I, 4, 1. Compararunt Afranium cum Menandro eademque arte in describendis moribus usum esse dixerunt. Cic. Brut. 45: „L. Afranius poeta, homo perargutus, in fabulis quidem etiam, ut scitis, disertus.“ — *Plautus*] T. Maccius Plautus Sarsinas, mortuus 570, cum Terentius novem annos natus esset. *Epicharmus* quinque annis maior Socrate, natus in insula Co, Siculus appellatus, quod infans in Siciliam venit ibique Hierone Syracusis dominante comoediarum laude floruit.

- Vincere Caecilius gravitate, Terentius arte.
- 60 Hos ediscit et hos arto stipata theatro
Spectat Romā potens, habet hos numeratque poëtas
Ad nostrum tempus Livi scriptoris ab aevo.
Interdum vulgus rectum videt, est ubi peccat.
Si veteres ita miratur laudatque poëtas,
- 95 Ut nihil anteferat, nihil illis comparet, errat:
Si quaedam nimis antiquae, si pleraque dure
Dicere credit eos, ignave multa fatetur,
Et sapit et mecum facit et Iove iudicat aequo.
Non equidem insector delendave carmina Livi
- 70 Esse reor, memini quae plagosum mihi parvo
Orbiliū dictare; sed emendata videri
Pulchraque et exactis minimum distantia miror.
Inter quae verbum emicuit si forte decorum et
Si versus paulo concinnior unus et alter,

Properare recte intellexerunt interpretes de motu et agilitate, qua in fabulis utriusque poetae ad eventum festinabatur (A. P. 148) animique auditorium indefessa vi intendebantur. — *Caecilius*] C. Caecilius Statius, Insuber Gallus, servus genere, Ennii familiaris, anno post Ennii mortem, a. u. c. 586 mortuus est. Cic. de opt. gen. dic. 1: „Caecilius fortasse summus Comicus.“ Varro apud Nonium in v. *melos*: „In argumentis Caecilius poscit palmam, in *ŋ-ŋ-ŋ-ŋ-ŋ* Terentius, in sermonibus Plautus.“ — *Terentius*] P. Terentius Afer, Karthagine natus a. u. 561, mortuus in itinere in Graeciam anno 594. — *ediscit*] non in scholis, sed legendo et spectando. — *arto theatro*] Theatra amplissima erant, non arcta, sed arcta videntur propter ingentem multitudinem hominum, qui adsunt. — *Livi*] Livius Andronicus, fortassē Tarentinus, captivus Romam venit, ubi a C. Livio Salinatore propter ingenii culturam libertate donatus est. Primus Romae fabulam docuit, Odysseamque latinis versibus (Saturniis) interpretatus est. — *ignave*] quae nullam vim habent ad movendos auditores. — *Iove aequo*] „Propitio sibi; Iove quidem irato fit, ut errent homines ac delirent.“ *Porph.* — *delendave*] Sic antiquiss. Bland., duo

alii Cruquii cum aliis antiquis libris MSS. Torrentii et Bentleii; rectius quam *delendaeque* post negantem particulam.

V. 71. *Orbiliū*] Sueton. de illustr. Gramm. c. 9: „Orbilius Pupillus Beneventanus primo apparituram magistratibus fecit, deinde in Macedonia corniculo, mox equo meruit, functusque militia studia repetit, quae iam inde a puero non leviter attigerat; ac professus diu in patria quinquagesimo demum anno Romam consule Cicerone transiit docuitque maiore fama quam emolumento. Namque iam persenex pauperem se, et habitare sub tegulis quodam scripto fatetur. Fuit autem naturae acerbae non modo in antisophistas, quos omni sermone laceravit, sed etiam in discipulos, ut Horatius significat plagosum eum appellans et Domitius Marsus scribens: „„Si quos Orbilius ferula scuticaque cecidit.““ De antiqua scholarum disciplina cfr. Plaut. Bacchid. III, 3, 27: „ubi revenisses domum, Cincticulo praecinctus in sella apud magistrum adsideres; Tum librum legeres. Si unam peccavisses syllabam, Fieret corium tam maculosum, quam est nutricis pallium.“ — *exactis*] i. e. perfectis; sic marmora ad unguem exiguntur, ut intelli-

75 Iniuste totum ducit venditque poëma.

Indignor quidquam reprehendi, non quia crasse
Compositum illepideve putetur, sed quia nuper;
Nec veniam antiquis sed honorem et praemia posci.
Recte necne crocum floresque perambulet Attae

80 Fabula si dubitem, clament periisse pudorem

Cuncti paene patres, ea cum reprehendere coner,
Quae gravis Aesopus, quae doctus Roscius egit:
Vel quia nil rectum nisi quod placuit sibi ducunt,
Vel quia turpe putant parere minoribus et quae

85 Imberbi didicere, senes perdenda fateri.

Iam Saliare Numae carmen qui laudat et illud,
Quod mecum ignorat, solus vult scire videri,
Ingeniis non ille favet plauditque sepultis,
Nostra sed impugnat, nos nostraque lividus odit.

90 Quodsi tam Graecis novitas invisa fuisset

Quam nobis, quid nunc esset vetus? aut quid haberet

gatur, utrum satis sint polita an non sint. Cfr. Ovid. Met. I, 406. — *ducit venditque*] ut mangones qui ubi venalium gregem in catasta exponebant maxime formosos ac validos in primo ordine collocabant, nimirum ut hi emptores allicerent totusque grex simul venderetur. — *quidquam*] Negans hoc pronomen recte positum est propter negantem vim quam inesse sentis in verbo *indignor* i. e. ferre non possum. — *crasse*] cf. Sat. II, 2, 3. Unde imago petita sit, intelliges ex versu 225. — *Attae*] T. Quintius Atta, togatarum scriptor, a. u. c. 676 mortuus est. — *fabula*] „quae inscribitur Matertera; recte necne perambulet crocum floresque i. e. in scenam recepta sit, quae floribus et croco spargitur.“ *Comm. Cruq.* Plin. H. N. XXI, 6: „Vino mire congruit crocum, praecipue dulci; tritum ad theatra replenda.“ — *patres*] seniores. cf. v. 85. — *Aesopus, Roscius*] nobilissimi fabularum actores, Ciceronis aequales. — *imberbi*] Cruq. ad A. P. v. 161: „*imberbus*; sic habet codd. Bland. antiquiss., quem secutus sum ex auctoritate Soripatr. Charis. I. I. inst. gramm. qui: *Imberbi* autem dicuntur, inquit,

non *imberbes*: sic enim et Varro de actionibus scen.: *imberbi iuvenes*, sic et Cicero *imberbum* protulit, non *imberbem*.“ Apud Acronem et Comment. Cruq. haec sunt: „*imberbus* et *imberbis*, sicut *inermus* et *inermis*.“ *Orellius* et *Krueger* parum sibi constantes h. l. *imberbes* scripserunt, postea A. P. I. I. *imberbus*. — *Saliare Numae*] lege Liv. I, 20. Axamenta appellabantur eorum carmina in honorem Martis et Iani ut videtur. Quintil. I, 6, 40: „*Saliorum* carmina vix sacerdotibus suis satis intellecta.“ Quare iis explicandis multi grammatici videntur operam dedisse, ut viderentur *scire* et intelligere, quae alii nec intelligebant nec curabant intelligere. Particula *iam* gradationem efficit (vollends gar). — *nostra sed*] Aperta hic causa est cur *sed* part. sit postposita; sic enim maior accrescit vis vocabulo *nostra*, cum gravitate postea iterato. — *quodsi tam Graecis*] Si idem, inquit, fecissent Graeci, nihil nunc esset quod antiquum admiraremur; verum Graeci magnopere diversi erant a nobis. Nos quaecunque surgunt nova odimus neque poesim nostram altius sese tollere patimur; Graeci contra ab alia ad aliam

- Quod legeret tereretque viritim publicus usus?
 Ut primum positis nugari Graecia bellis
 Coepit et in vitium fortuna labier aequa,
 95 Nunc athletarum studiis nunc arsit equorum,
 Marmoris aut eboris fabros aut aeris amavit,
 Suspendit picta vultum mentemque tabella,
 Nunc tibicinibus, nunc est gavisa tragoedis;
 Sub nutrice puella velut si luderet infans,
 100 Quod cupide petiit, mature plena reliquit.
 Quid placet aut odio est, quod non mutabile credas?
 Hoc paces habuere bonae ventique secundi.
 Romae dulce diu fuit et sollemne reclusa
 Mane domo vigilare, clienti promere iura,
 105 Cautos nominibus rectis expendere nummos,
 Maiores audire, minori dicere per quae
 Crescere res posset, minui damnosa libido:
 Mutavit mentem populus levis et calet uno
 Scribendi studio; pueri patresque severi
 110 Fronde comas vincti coenant et carmina dictant.
 Ipse ego, qui nullos me affirmo scribere versus,
 Invenior Parthis mendacior et prius orto

artem transeuntes omnes aequo amplectebantur amore ad eandemque dignitatem evexerunt. — *tereret*] cf. Cic. ad Fam. IX, 25, 1: „Παιδείαν Κόρον contriveram legendo.“ — *nugari*] sine reprehensione dictum est; nam artibus hilarioribus et levioribus se dare, si bella comparaveris, nugari videbitur. — *in vitium*] „in vitium deliciarum, propter prosperitatem fortunae.“ *Comm. Cruq.* — *suspendit vultum*] attentissime spectavit; admirata est. — *reliquit*] Graecia, non puella.

V. 102. *paces*] pacis tempora quae omnibus vitae commodis favent. — *venti*] cf. Carm. I, 14. — *Romae dulce*] Romani olim nihil curabant nisi negotia et commoda; artes contemptae iacebant. — *nominibus*] vide ad Sat. I, 2, 16. Et *recta* nomina sunt quae alias appellantur *bona*; quare iure negligimus alteram lectionem *certis*. Est autem ablativus, nam nummi caventur

rectis chirographorum formulis. — *maiores audire*] Cic. de off. I, 34, 112. Lael. 1, 1. — *damnosa*] Epp. I, 18, 21. — *calet*] cf. Sat. II, 3, 80. — *pueri patresque*] „Puerique (ut est in codd. nonnullis) suavius est et modulatus.“ *Bentl.* Sed recte iam intellectum est in *patribus* inesse gradationem aliquam eamque non pati particulam bis positam. — *fronde*] „hedera, quae est poetarum.“ *Comm. Cruq.* — *dictant*] Hoc tempore cum omnes, qui carmina vel libros componerent, non ipsi scribere sed servis dictare solerent, dictandi verbum idem significare coepit quod componere. Gloriolam multi quae-siverunt in eo, quod inter coenandum carmina dictare potuerunt, nimirum egregium suae facultatis et ingenii specimen sic se edere isti putabant. adulantibus ac stupentibus convivis. cf. Sat. I, 4, 10. coll. v. 8. 12. — *Parthis*] Carm. IV, 15, 23. De ingenti

- Sole vigil calamum et chartas et scrinia posco.
 Navem agere ignarus navis timet; abrotonum aegro
 115 Non audet nisi qui didicit dare; quod medicorum est
 Promittunt medici; tractant fabrilia fabri:
 Scribimus indocti doctique poëmata passim.
 Hic error tamen et levis haec insania quantas
 Virtutes habeat, sic collige: vatis avarus
 120 Non temere est animus; versus amat, hoc studet unum;
 Detrimenta, fugas servorum, incendia ridet;
 Non fraudem socio puerove incogitat ullam
 Pupillo; vivit siliquis et pane secundo,
 Militiae quamquam piger et malus, utilis urbi,
 125 Si das hoc, parvis quoque rebus magna iuvari.
 Os tenerum pueri balbumque poëta figurat,
 Torquet ab obscoenis iam nunc sermonibus aurem,
 Mox etiam pectus praeceptis format amicis,
 Asperitatis et invidiae corrector et irae;
 130 Recte facta refert, orientia tempora notis
 Instruit exemplis, inopem solatur et aegrum.
 Castis cum pueris ignara puella mariti
 Disceret unde preces, vatem ni Musa dedisset?
 Poscit opem chorus et praesentia numina sentit,
 135 Coelestes implorat aquas docta prece blandus,

quo tum omnes correpti erant furore scribendi cfr. A. P. 379 sqq. *Abrotonum*, Stabwurz. Plin. H. N. XXI, 21: „Usus est foliis, sed maior semini ad exalfaciendum; id nervis utile, tussi, orthopnoeae cet.“ *Porphyr.*: „Mire dixit non helleborum, sed abrotonum, quod minore periculo etiam indoctus miscere potest ac dare.“ A versu 118 describuntur commoda non exigua, quae ex scribendi illa insania in publicam salutem redundant; in qua re sensim lectores transducuntur ad brevem de origine poesis apud Latinos eiusque cultura expositionem. — *non temere*] vide ad Sat. II, 2, 116. — *hoc studet*] V. *studere* cum accusativis pronominum et adiectivorum gener. neutr. coniungitur, ut apud Cic Phil. VI, 7, 18 „unum sentitis omnes, unum

studetis;“ Terent. Hec. II, 1, 2: „Eadem aequae studeant.“ Apud Plautum Mil. gl. V, 44 antiquiore usu: „minus has res studeant.“ — *incogitat*] verbum, ut videtur, fictum ad exemplum graeci ἐννοεῖν. — *pane secundo*] non siligineo, sed dispensatorio. Sueton. Octav. 76 de Augusto: „Cibi minimi erat atque vulgaris fere. Secundarium panem et pisciculos minulos appetebat.“ — *militiae*] dativus est, contrarius alteri *urbi*. Tacit. Ann. III, 48: „impiger militiae et acribus ministeriis.“ — *iam nunc*] iam a puero: nam puerilis etiam aetas et corrumpebatur et delectabatur obscoenis saepe sermonibus. cf. Carm. III, 6, 23. — *orientia tempora*] subolem. — *aegrum*] animi aegrum, sollicitum. — *chorus*] puerorum et puellarum. — *praesentia*] vide ad

- Avertit morbos, metuenda pericula pellit,
 Impetrat et pacem et locupletem frugibus annum;
 Carmine di superi placantur, carmine manes.
 Agricolae prisci, fortes parvoque beati,
 140 Condita post frumenta levantes tempore festo
 Corpus et ipsum animum spe finis dura ferentem
 Cum sociis operum, pueris et coniuge fida,
 Tellurem porco, Silvanum lacte piabant,
 Floribus et vino Genium memorem brevis aevi.
 145 Fescennina per hunc inventa licentia morem
 Versibus alternis opprobria rustica fudit,
 Libertasque recurrentes accepta per annos
 Lusit amabiliter, donec iam saevus apertam
 In rabiem coepit verti iocus et per honestas
 150 Ire domos impune minax. Doluere cruento
 Dente lacessiti, fuit intactis quoque cura
 Condicione super communi, quin etiam lex
 Poenaeque lata, malo quae nollet carmine quemquam
 Describi; vertere modum formidine fustis
 155 Ad bene dicendum delectandumque redacti.
 Graecia capta ferum victorem cepit et artes

Carm. I, 35, 2. — *aquas*] cf. Carm. Saec. 31. Carm. III, 10, 19. Romani si aquae inopia premebantur, instituebant sacra Iovi Pluviali, aqualicia dicta, et nudipedalia agebant. — *Manes*] sunt di inferi, ut Virg. Georg. IV, 535. Aen. XII, 646. — *fortes*] Sat. II, 2, 115. Virg. Georg. II, 472. — *sociis operum*] non servis, sed ipsis filiis et uxore. Quare reiicienda lectio est *operum et pueris*. — *piabant*] propitios sibi reddebant. — *Genium*] Epist. II, 2, 187. Genio tribuitur memoria brevis aevi, quae propria est homini; sed Genius, perpetuus hominis comes, qui gignitur cum homine et moritur, eandem vitae producendae curam habet quam homo. Censorin. 3: „Genius ita nobis assiduus observator appositus est, ut ne puncto quidem temporis longius abscedat, sed ab utero matris exceptos ad extremum vitae diem committitur.“

V. 145. *Fescennina*] cf. Serv. ad Virg. Aen. VII, 695: „Fescennium oppidum est (Etruriae prope Tiberim), ubi nuptialia inventa sunt carmina.“ cf. Liv. VII, 2, 7. Plin. H. N. III, 5 urbem nominat *Fescenniam*. Alii versus non ab illa urbe dictos putant, sed a vv. *fascinus, praefascini, βασανίζειν*, ut sint versus fascini, i. e. invidiosae orationis pleni, procaces et licentiores. — *recurrentes*] quotannis grata. — *rabiem*] cf. A. P. 79. — *impune minax*] legibus de malis carminibus nondum constitutis. — *dente*] cf. Epist. I, 18, 82. — *malo carmine*] Sat. II, 1, 82. — *describi*] χαλεπήσεισθαι. Sat. I, 4, 3. — *vertere modum*] vide ad Carm. III, 30, 14. — *fustis*] intelligendum de supplicio fustuario, ut Liv. V, 6, extr. Cfr. Sat. II, 1, 82 sq. Cic. Tusc. IV, 2. — *Graecia capta*] Ovid. Fast. III, 101: „Nondum tradiderat victas victoribus artes Graecia, facun-

Intulit agresti Latio: sic horridus ille
 Defluxit numerus Saturnius et grave virus
 Munditiae pepulere; sed in longum tamen aevum
 160 Manserunt hodieque manent vestigia ruris.
 Serus enim Graecis admovit acumina chartis,
 Et post Punica bella quietus quaerere coepit,
 Quid Sophocles et Thespis et Aeschylus utile ferrent.
 Tentavit quoque rem si digne vertere posset,
 165 Et placuit sibi, natura sublimis et acer:
 Nam spirat tragicum satis et feliciter audet,
 Sed turpem putat in scriptis metuitque lituram.

dum, sed male forte genus.“ Porcius Licinius apud Gell. XVII, 21, 45: „Poenico bello secundo Musa pinnato gradu Intulit se bellicosam in Romuli gentem feram.“ — *intulit*] eodem modo dictum quo dicebant *arma, bellum inferre*. — *Saturnius*] Festus s. v. *Saturnus*: „Versus antiquissimi, quibus Faunus fata cecinisse hominibus videtur, Saturnii appellantur.“ Hermann. Epit. doct. metr. p. 214: „Numeros habet hos: „*Dabunt matum Metelli Naevio poetae*. Sed et caesuram saepe neglexerunt rudes isti poetae et omni genere solutionum usi sunt.“ Contra Duentzer et Lerschius in peculiari libro ostendere tentarunt, Saturniorum versuum certam formam nunquam existisse et voc. *numerus* h. l. significari motum et modum aliquem syllabarum certa lege carentem. — *munditiae*] elegantior et versuum et sermonis habitus; nam *grave virus* rusticitatem carminum significat. — *hodieque*] Nam tum quoque lima saepe desiderabatur ac litura in carminibus Romanis, quamquam non iniuria interpretes de carminibus Fescenninis et de mimis Atellanisque fabulis locum intellexerunt. — *serus*] sc. Romanus. — *quietus*] Coniunge cum *post Punica bella*; compara quae v. 93 de Graecia dicta sunt. — *Thespis*] A. P. 276. Tragoediarum inventor fuisse dicitur, aequalis Solonis et Pisistrati: quem tamen nihil scripsisse probabile est. — *tentavit*] periculum fecit, num ipse digne imitari posset. Accusativus autem *rem* ad utrumque verbum *tentavit* et *vertere* referendum videtur. — *na-*

tura sublimis] Quintil. I, 8, 8: „Plerique (Latini veteres) plus ingenio quam arte valuerunt.“ — *spirat*] cf. Carm. IV, 13, 19. — *audet*] de audacia antiquorum poetarum Romanorum in componendis formandisque novis vocabulis; nam in personis et argumentis exemplaria sua Graeca plerumque sequebantur. — *turpem*] „Poetae Romani satis altam audent materiam comprehendere, sed turpem putant longam lituram; et haec est causa cur ingenia Latinorum non possunt pervenire (ad perfectionem *Comm. Cruq.*), quia scilicet stulte erubescunt et timent emendare et polire longa litura quod scripserunt.“ Acro. — *in scriptis*] Restitui lectionem quattuor codd. Cruq., in quibus est Bland. antiquissimus; alii *inscite* vel *inscitiae*: illud tamen rectius, nam Horatius cum hoc dicat, in Romanis satis inesse ingenii poetici et felicitis audaciae, desiderari lituram et curam scriptorum iam poematum, quippe quae *turpis* habeatur *atque aliena ab ingenioso poeta*, id egit, ut certamen statueret inter facultatem et voluntatem, inter ingenium et laborem, inter animum poetae satis aptum et ornatum et negligentiam, qua quaecunque semel scripta essent, intacta et incorrecta relinquerentur. Verbis igitur *in scriptis* carere non possumus nec bene vidit Bentleius, qui scholiastas quoque *inscite* (vel quod ipse ex coniectura scripsit *inscitus*) legisse putavit; nam verbo *stulte* apud schol. non magis *inscite* probabitur quam ex eorundem extremis verbis *quod scripserunt* quidquam accrescet auctorita-

- Creditur, ex medio quia res arcessit, habere
 Sudoris minimum, sed habet comoedia tanto
 170 Plus oneris, quanto veniae minus. Adspice, Plautus
 Quo pacto partes tutetur amantis ephebi,
 Ut patris attenti, lenonis ut insidiosi;
 Quantus sit Dossennus edacibus in parasitis;
 Quam non adstricto percurrat pulpita socco.
 175 Gestit enim nummum in loculos demittere, post hoc
 Securus, cadat an recto stet fabula talo.
 Quem tulit ad scenam ventoso Gloria curru,
 Exanimat lentus spectator, sedulus inflat:
 Sic leve, sic parvum est, animum quod laudis avarum
 180 Subruit aut reficit. Valeat res ludicra, si me
 Palma negata macrum, donata reducit opimum.
 Saepe etiam audacem fugat hoc terretque poëtam,
 Quod numero plures, virtute et honore minores,
 Indocti stolidique et depugnare parati,
 185 Si discordet eques, media inter carmina poscunt
 Aut ursum aut pugiles: his nam plebecula gaudet.

tis verae scripturae. — *arcessit*] Digna est quae accuratius expendatur lectio antiquissimi cod. Bland., trium aliorum codd. Cruquii, unius Pulmanni, et scholiastarum *accessit*, cuius nec Bentleius nec Orellius mentionem fecit. Si recta est, *res* nominativus est. — *veniae minus*] Etenim cum res ex communi vita sumptae sint, ubi quid peccatur, quisque statim videt. — *Plautus*] Tota haec laudatio Plauti ironica est; etenim Horatio, elegantis viro iudicii et graecis exemplis culto, in sustinendis partibus non satis fecit. — *Dossennus*] „Atellanarum scriptor.“ Comm. Cruq. „Persona comica.“ glossa cod. Eins. Posterior explicatio si vera est, ut videtur, optime cum *Ritschelio* Pareg. I. praef. p. 13. interpretaberis: „Quantus ipse (Plautus) scurra sit in scurris parasitis describendis.“ — *socco*] A. P. 80. Significatur rude ac negligens scribendi genus, quo Plautus utebatur. — *percurrat*] cf. v. 79. — *pulpita*] A. P. 215. 279. — *stet*] *stare* proprie dicuntur fabulae, quae placent; *cadere* quae dis-

placent et exploduntur. *Recto talo* stare est firmiter stare, ut Pind. Isthm. 6, 12: „ὁρθῶ ἕστασας ἐπὶ σφυρῶ.“

V. 177. *Gloria*] cf. Sat. I, 6, 23. Contra eos, qui quaestus faciendi causa fabulas docuerunt, alios ponit, quibus laudem quaerentibus multo maiores difficultates superandae sunt. *Gloriae* autem *curru ventoso* est, quia ipsa inconstans ab arbitrio imperitiae saepe multitudinis pendet. — *macrum*] „tristem; *opimum*, reddat laetum.“ Comm. Cruq. — *Saepe etiam*] Magna sane audacia opus est poetae, ut fabulas in scenam mittere suamque artem iudicio levis populi tradere velit; sed aliud est obstaculum, quod *audaces* etiam terreat artemque scenicam magnopere premat; nam maior populi pars alios ludos quaerit, scenicos contemnit. — *discordet eques*] equites enim doctiores esse solebant. cf. Sat. I, 10, 76 sq. A. P. 113. 248. — *ursum*] cf. Liv. XLIV, 18. — *gaudet*] Sic antiquiss. Bland. cum tribus aliis Cruquii, plurimi Pottierii, Montepessul. alique Orellii; alii in iisque tres Blandinii

Verum equitis quoque iam migravit ab aure voluptas
 Omnis ad incertos oculos et gaudia vana.
 Quattuor aut plures aulaea premuntur in horas,
 190 Dum fugiunt equitum turmae peditumque catervae;
 Mox trahitur manibus regum fortuna retortis,
 Esseda festinant, pilenta, petorrita, naves,
 Captivum portatur ebur, captiva Corinthus.
 Si foret in terris, rideret Democritus, seu
 195 Diversum confusa genus panthera camelo
 Sive elephas albus vulgi converteret ora;
 Spectaret populum ludis attentius ipsis
 Ut sibi praebentem mimo spectacula plura,
 Scriptores autem narrare putaret asello
 200 Fabellam surdo. Nam quae pervincere voces
 Evaluere sonum, referunt quem nostra theatra?
 Garganum mugire putes nemus aut mare Tuscum,
 Tanto cum strepitu ludi spectantur et artes
 Divitiaeque peregrinae, quibus oblitus actor
 205 Cum stetit in scena, concurrit dextera laevae.
 Dixit adhuc aliquid? Nil sane. Quid placet ergo?
 Lana Tarentino violas imitata veneno.

plaudet, alii *plaudit*, quod olim cum *Orellio* praeferendum mihi videbatur, nunc posthabui codd. auctoritati. — *incertos oculos*] qui cum diversis splendidisque rebus capiantur, ab altera re ad alteram errant in nullaque consistunt nullaque diu delectantur. — *premuntur*] Aulaea ante proscenium demittebantur ex alto humique iacebant quamdiu in scena agebatur; finita fabula in altum trahebantur. A. P. 154. Queritur igitur Horatius, quod quattuor longas horas populus potuit delectari magnificis pompis, splendida pugnarum in theatris imitatione, omnibusque iis rebus quae veram artem perdunt oculosque falsa oblectatione deleniunt. — *trahitur*] triumphus agitur in scena. — *ebur*] Liv. XXXVII, 59. Possis tamen etiam eburneas statuas intelligere, nam *captiva Corinthus* significat vasa ex aere Corinthio confecta. — *Democritus*] vide ad Epist. I, 12, 12.

— *panthera*] Significat camelopardalin (Giraffe), quae Caesaris dictatoris ludis Circensibus Romae primum visa est. *Genus* appositio est. — *elephas albus*] quia hi rariores. — *ludis ipsis*] quam ipsos ludos. cf. ad Carm. IV, 14, 13. — *mimo*] pro quovis histrione. — *asello surdo*] Ex proverbio (tauben Ohren predigen). Compara Graecum: „Ὅρα τις ἔλεγε μῦθον· ὁ δὲ τὰ ὦτα ἐκίλει.“ Et cum hoc coniunxit alterum *surdo narrare fabulam* Terent. Heautont. II, 1, 10. — *theatra*] pro hominibus, qui in theatris sunt; ut Cic. orat. III, 50, 196: „In his si paulum modo offensum est, ut aut contractione brevius fieret aut productione longius, *theatra* tota reclamant.“ — *Garganum*] Carm. II, 9, 6 sq. — *ludi*] pompae. — *artes*] vide ad Carm. IV, 8, 5. — *Divitiae*] splendidae vestes. A. P. 215. V. 208. *ac ne*] iam ne quis credat ipsum propterea artem scenicam Ro-

- Ac ne forte putes me quae facere ipse recusem,
 Cum recte tractent alii, laudare maligne;
 210 Ille per extentum funem mihi posse videtur
 Ire poëta, meum qui pectus inaniter angit,
 Irritat, mulcet, falsis terroribus implet,
 Ut magus, et modo me Thebis modo ponit Athenis.
 Verum age et his, qui se lectori credere malunt
 215 Quam spectatoris fastidia ferre superbi,
 Curam redde brevem, si munus Apolline dignum
 Vis complere libris et vatibus addere calcar,
 Ut studio maiore petant Helicon virentem.
 Multa quidem nobis facimus mala saepe poëtae,
 220 Ut vineta egomet caedam mea, cum tibi librum
 Sollicito damus aut fesso; cum laedimur, unum
 Si quis amicorum est ausus reprehendere versum;
 Cum loca iam recitata revolvimus irrevocati;
 Cum lamentamur non apparere labores
 225 Nostros et tenui deducta poëmata filo;
 Cum speramus eo rem venturam, ut simul atque
 Carmina rescieris nos fingere, commodus ultro
 Arcessas et egere vetes et scribere cogas.
 Sed tamen est operae pretium cognoscere, quales

manorum vituperare, quod in ea neque elaboraverit unquam neque possit elaborare, quanti eam recte cultam aestimet ostendit. — *maligne*] parce, parum. — *per extentum funem*] „rem difficillimam facere.“ *Porphy.* *Arrian.* *Epict.* 3, 12: „Δύσκολόν ἐστι καὶ τὸ ἐπὶ σχοινίου περιπατεῖν καὶ οὐ μόνον δύσκολον ἀλλὰ καὶ ἐπικίνδυνον.“ Describit deinde quid scenicus poeta in animos audientium valeat. — *inaniter*] quia ficta res; id quod poetae scenico difficultates augeat. — *Thebis, Athenis*] nam ex his urbibus longe plurima pars fabularum, quae a poetis tractabantur, petebatur. — *verum age*] Descripta mala condicione, qua scenici poetae Romae utantur, ad reliquos poetas transit non maiore favore populi gaudentes eosque Augusti benevolentiae commendat. — *munus Apol-*

line dignum] vide ad *Carm.* I, 31. *Epist.* I, 3, 17. *Dio Cass.* LIII, 1: „τὸ Ἀπολλωνίων τό τε ἐν τῷ Παλατίῳ καὶ τὸ τεμένισμα τὸ περὶ αὐτὸ τὰς τε ἀποθήκας τῶν βιβλίων ἐξεπόνησε καὶ καθιέρωσε.“ — *multa quidem*] *Excusat* Augustum, quod interdum minorem curam quam exspectari debebat impendisset, et culpam confert in ipsorum poetarum vanitatem et invidiam. — *ut vineta*] „Proverbium in eos dicitur qui sibi volentes nocent.“ *Comm. Crug.* Similiter *Tibull.* I, 2, 98: „quid messes uris, acerba, tuas?“ — *sollicito*] cf. *Epist.* I, 13, 3 sq. cf. *Sat.* II, 1, 18. — *irrevocati*] ab histrionibus hoc sumptum. *Cic.* pro *Sext.* 56, 120: „Revocabatur ab universis (Roscius).“ — *non apparere*] non intelligi ab audientibus neque recte aestimari. — *deducta*] vide ad *Sat.* II, 1, 4. — *operae*

- 230 Aedituos habeat belli spectata domique
 Virtus indigno non committenda poëtae.
 Gratus Alexandro regi magno fuit ille
 Choerilus, incultis qui versibus et male natis
 Rettulit acceptos, regale nomisma, Philippos.
- 235 Sed veluti tractata notam labemque remittunt
 Atramenta, fere scriptores carmine foedo
 Splendida facta linunt. Idem rex ille, poëma
 Qui tam ridiculum tam care prodigus emit,
 Edicto vetuit, ne quis se praeter Apellem
- 240 Pingeret aut alius Lysippo duceret aera
 Fortis Alexandri vultum simulantia. Quodsi
 Iudicium subtile videndis artibus illud
 Ad libros et ad haec Musarum dona vocares,
 Boeotum in crasso iurares aëre natum.
- 245 At neque dedecorant tua de se iudicia atque
 Munera, quae multa dantis cum laude tulerunt
 Dilecti tibi Virgilius Variusque poëtae;

pretium] vide ad Sat. I, 2, 37. Docet Augustum recte dissimilem esse Alexandri magni, qui malum poetam regie remuneratus sit: scilicet non omnes dignos esse qui magnas res domi militiaeque gestas describebant. — *aedituos*] sacrae aedis tutores, ἱεροφύλακες, νεωχόροι; qui curant aedes sacras; h. l. sunt laudum custodes et enarratores. — *virtus*] Augusti. *Comment. Cruq.*: „dignum est ut cognoscamus, quis poetarum dignus sit scribere tua facta.“ — *Choerilus*] A. P. 357. Non Samius, sed Iasensis, Alexandri magni comes et laudator. Auson. Epist. 16, 3 ad Probum: „Cumque ego imitatus sim vesaniam Choerili, tu ignoscas magnanimitate Alexandri.“ — *Philippos*] „nummos qui Philippi vultu essent signati.“ *Acro.* — *tractata*] „contractata, contactu maculant et polluant.“ *Comm. Cruq.* — *linunt*] cf. Ep. I, 19, 30. — *Apellem*] Appelles Cous. Cic. de off. III, 2 extr. *Lysippus* Sicyonius. De ablativo vide ad Epist. I, 16, 20. — *duceret aera*] Poetice dictum pro eo quod est apud Plinium H. N. VII, 37: „Idem hic im-

perator edixit, ne quis ipsum alius quam Apelles pingeret, quam Pyrgoteles sculperet, quam Lysippus *ex aere duceret*.“ — *simulantia*] accurate exprimentia, ut A. P. 20.

V. 242. *videndis artibus*] diiudicandis. Artes et libri (poemata, ut A. P. 345, Musarum dona) inter se opponuntur. — *Boeotum*] Cic. de Fat. c. 4: „Athenis tenue coelum, ex quo acutiores etiam putantur Attici; crassum Thebis, itaque pingues Thebani.“ cf. Corn. Nep. Alcib. 11, 3. Epam. 5, 2. *Boeotum* genitivus est pluralis numeri, non accus. sing., quod alii voluerunt. — *At neque*] Rectius iudicat Augustus quam Alexander; ii enim, in quos ille beneficus fuit et largus, digni erant beneficiis et muneribus. — *multa cum laude*] ita ut tibi danti multa inde evadat laus. — *Virgilius Variusque*] Uterque iam mortuus erat; beneficia in mortuos bene laudantur; de vivis hoc dicere pudor vetuisset. Ceterum *Comm. Cruq.* scribit: „Quia iam his singulis donaverat Augustus decies sestertium.“ Tota autem Aeneis illustravit laudem Iuliae gentis, imprimis clarissimus lo-

- Nec magis expressi vultus per aënea signa,
 Quam per vatis opus mores animique virorum
 250 Clarorum apparent. Nec sermones ego mallem
 Repentes per humum quam res componere gestas,
 Terrarumque situs et flumina dicere et arces
 Montibus impositas et barbara regna tuisque
 Auspiciis totum confecta duella per orbem,
 255 Claustraque custodem pacis cohibentia Ianum,
 Et formidatam Parthis te principe Romam,
 Si, quantum cuperem, possem quoque: sed neque parvum
 Carmen maiestas recipit tua nec meus audet
 Rem tentare pudor, quam vires ferre recusent.
 260 Sedulitas autem, stulte quem diligit, urget,
 Praecipue cum se numeris commendat et arte:
 Discit enim citius meminitque libentius illud
 Quod quis deridet, quam quod probat et veneratur.
 Nil moror officium quod me gravat, ac neque ficto
 265 In peius vultu proponi cereus usquam
 Nec prave factis decorari versibus opto,
 Ne rubeam pingui donatus munere et una
 Cum scriptore meo capsula porrectus aperta

cus Aen. VI, 883 sqq. Varius panegyricum in Augustum scripsit. — *nec magis*] cf. Carm. IV, 8, 13 sqq. Cic. pro Arch. 12, 30. — *sermones*] vide supra p. 303. Similis est excusatio, cur absteineat a laudandis magnis rebus gestis Augusti, Carm. I, 6. IV, 15. — *montibus impositas*] cf. Carm. IV, 14, 12. — *tuis auspiciis*] cf. Carm. IV, 14, 33. Sueton. Octav. 21: „Domuit partim ductu partim auspiciis suis Cantabriam, Aquitaniam, Pannoniam, Dalmatiam cum Illyrico omni, item Raetiam et Vindelicos et Salassos.“ — *Ianum*] vide ad Carm. IV, 15. p. 253. — *Parthis*] cf. Carm. III, 5, 2 sqq. Carm. Saec. 54. Sat. II, 5, 62. Epist. I, 12, 27. — *neque parvum*] cf. Sat. II, 1, 12. Carm. III, 3, 72. 25, 17. IV, 2, 27 sqq. — *urget*] idem quod *gravat* v. 264. — *discit enim*] „Imperitus laudator, dum nimium studiose laudat, magis vulnerat et atterit amici

gloriam, si malis versibus id agat, quam commendat; citius enim quis memoria complectitur quod ridiculum est quam quod est admiratione dignum.“ *Comm. Cruq.* — *nil moror*] „Ego, inquit Horatius, nolim decorari turpibus versibus, ne pingui i. e. stolide composito munere donatus rubeam et cum meo scriptore h. e. laudatore deferar in vicum vendentem thus cet.; multo porro minus tu, o Auguste, id voles.“ *Glareanus.* — *in peius*] Plin. Ep. V, 10: „Ut pictores pulchram absolutamque formam raro nisi *in peius effingunt*.“ — *cereus*] cf. Sat. II, 3, 183. „Probabile est Horatii temporibus cereas imagines virorum illustrium, dum, oratorum, poetarum, philosophorum, venales fuisse per tabernas, quae ab emtoribus in bibliothecis maxime proponerentur.“ *Orellius.* — *porrectus*] „quasi mortuus in feretro deferar in vicum thurarium.“ *Acro.* — *aperta*]

Deferar in vicum vendentem thus et odores
270 Et piper et quidquid chartis amicitur ineptis.

EPISTOLA II.

Flore, bono claroque fidelis amice Neroni,
Si quis forte velit puerum tibi vendere natum
Tibure vel Gabiis et tecum sic agat: Hic et
Candidus et talos a vertice pulcher ad imos

tanquam cadaver ignobile, quod ne tegitur quidem. In multis et bonis libris ex frequenti confusione *operta*, quod quibus placet, iis videndum est male laceratum ac foedatum cadaver, quod ne oculos praetereuntium laedat iniectis stragulis tegitur. Altera tamen lectio magis ad libros accommodata est, qui si boni essent caute contegebantur, si viles, aperti iacebant. — *vicum*] vide ad Epist. I, 10, 20. Sat. II, 3, 227. — *odores*] res odoriferas, unguenta. — *quidquid*] Martial. VI, 60. „Quam multi tineas pascunt blattasque diserti! Et redimunt soli carmina docta coqui.“

Epistola II.

Julius Florus Tiberio Neroni ut in Armeniam proficiscenti (Epist. I, 3) ita expeditionem in Dalmatas et Pannonios a. 743 facienti comes fuisse videtur. Nimirum diversum huius epistolae tempus est a tempore tertiae libri primi; nam aliter cur poeta egregiam hanc epistolam non primo statim libro addiderit quis rectam causam possit invenire? Conquestus igitur erat Florus, quod ab Horatio neque epistolam ullam neque carmina diu iam desiderata accepisset. Cui quidem excusaturus se poeta ita hac epistola animum aperit, ut nulla alia quidquid de suis rebus, de vitae suae rationibus, de poetica facultate, de philosophia sentiret liberius aut plenius videatur exprompsisse. Ac primum quidem quod nihil ad Florum scripserit litterarum, lepido mangonis exemplo (v. 22), quod nihil miserit carminum, proposita de Luculliano milite narratione excusat (v. 40); dein addit quasi quandam tabulam vitae suae ac poeticorum studiorum, ostenditque quibus causis olim

ut poesim amplecteretur perductus sit quibusque nunc ut eam relinquat permotum se sentiat. Excusat enim suam aetatem, fastidia lectorum, quorum alius alia exspectet ac probet, turbulentam vitam inter strepitum molestaque negotia Romana (v. 86), taedium, quod misera et insulsa versificatorum quibus tum Roma abundabat mutua laudatio et adulatio debeat excitare (v. 109), ingentes difficultates, quae superandae sint homini tolerabilia nedum perfecta et absoluta carmina emittere cupienti, ut beatus prope habendum sit illud genus poetarum, quod mentis acie captum neque sua pervideat vitia et sibi placeat (v. 140); studium denique sapientiae, cui quidquid sibi vitae relictum sit tradere iam constituerit. Sic exit epistola in aurea quaedam praecepta recte vivendi, saepius iam in epistolis proposita sed ingeniose descripta et semper vera. Scripta videtur viris doctis anno 743.

V. 1. De primi versus negligentiore forma cf. ad Epist. I, 9, 4. De Tiberio iuvene vide ad eandem epistolam. — *Tibure*] Noli quaerere cur Tibure vel Gabiis natum puerum maluerit proponere quam alium; est enim puer peregrinus et incognitus; sed poetis certa imagine opus est. Ceterum admirare artem Horatii in describendis ac tuendis mangonum et mercatorum merces suas laudantium moribus conspicuam. cf. Cic. de off. III, 17, 71. — *candidus*] non ad animum referendum sed ad corpus. Nudi autem venales ab empturientibus spectabantur. Senec. epist. 80, 9: „Mangones quidquid est quod displiceat aliquo lenocinio abscondunt; itaque ementibus ornamenta ipsa suspecta sunt: sive crus alligatum sive brachium aspiceres, nudari inheres et

- 5 Fiet eritque tuus nummorum milibus octo,
 Verna ministeriis ad nutus aptus heriles,
 Litterulis Graecis imbutus, idoneus arti
 Cuilibet; argilla quidvis imitaberis uda;
 Quin etiam canet indoctum sed dulce bibenti.
- 10 Multa fidem promissa levant, ubi plenius aequo
 Laudat venales, qui vult extrudere, merces.
 Res urget me nulla: meo sum pauper in aere.
 Nemo hoc mangonum faceret tibi; non temere a me
 Quivis ferret idem. Semel hic cessavit et, ut fit,
- 15 In scalis latuit metuens pendentis habenae:
 Des nummos, excepta nihil te si fuga laedit;
 Ille ferat pretium poenae securus opinor.
 Prudens emisti vitiosum, dicta tibi est lex:
 Insequeris tamen hunc et lite moraris iniqua?
- 20 Dixi me pigrum proficiscenti tibi, dixi
 Talibus officiis prope mancū, ne mea saevus

ipsum tibi corpus ostendi.“ — *milibus octo*] 763 flor. Rhen. — *litterulis*] Cautus est mango in laudanda pueri cognitione litterarum graecarum; inde deminutiva forma et voc. *imbutus*. cf. Sueton. de gramm. 4: „Apud maiores, ait Orbilius, cum familia alicius venalis produceretur, non temere quem *litteratum*, sed *litteratorem* inscribi solitum esse, quasi non *perfectum* litteris, sed *imbutum*.“ Cic. ad Att. VII, 2: „Chrysippum (servum) propter *litterularum* nescio quid libenter vidi, in honore habui.“ — *imitaberis*] „Quidam *imitabitur* legunt, quod est a puero alienum; melius ergo legimus *imitaberis*, ut est in veteribus exemplaribus, ut sententia sit: puer talis est ingenii, ut flectas eum quo velis tanquam argillam udam.“ *Comm. Cruq.* Sic habent omnes Blandinii et tres alii codd. *Cruq.*, Montepess. a prima manu, alii boni codd. — *levant*] „minuunt, leviorē faciunt.“ *Idem.* — *meo in aere*] ut nulli quidquam debeam. Cic. Verr. II, 4, 6: „Video hominem non modo in aere alieno nullo, sed in *suis nummis* multis esse.“ — *non temere*] vide ad Sat. II, 2, 116. Epist. II, 1, 120. — *ferret idem*] sc. ut tam vili pretio

tam egregium puerum venderem: ex vulgari mercatorum more. — *cessavit*] cf. Sat. II, 7, 100. cf. A. P. 357. — *in scalis latuit*] ut primae heri iracundiae se subtraheret. De scalis, solita latebra cf. Cic. Mil. 15. Philipp. II, 9: „(Clodius) se in scalas tabernae librariae coniecit.“ — *habenae*] „habena s. scutica flagellabantur servi, et media domo a gradibus ad timorem illis incutendum habenae pendeabant.“ *Comm. Cruq.* — *des*] Est ἀπόδοσις. vv. 2. 3. Horatii sunt, non mangonis. Etenim a mangone aliena sunt vv. *excepta fuga*, quoniam servum ipse cessatorem vel erronem, non *fugitivum* appellare potuit. — *excepta*] Sat. II, 3, 286. Et cf. Cic. de off. III, 17. — *laedit*] Indicativum nunc praetuli cum Bentleio et Hauptio ex antiquissimo Bland. et uno cod. Bentleii. Alii *laedat*; cod. Einsiedl. *ledet* (laedet). — *poenae securus*] non metuens poenam ex actione redhibitoria, quoniam fugam excepit. — *lex*] condicio, formula venditi pueri, ut ipse possis iudicare qualem emeris. — *insequeris*] vide ad Sat. II, 3, 285. — *rediret*] Sic optimi codices, alii *veniret*. Sed agitur de responso frustra expectato:

- Iurgares ad te quod epistola nulla rediret.
 Quid tum profeci, mecum facientia iura
 Si tamen attentas? Quereris super hoc etiam, quod
 25 Exspectata tibi non mittam carmina mendax.
 Luculli miles collecta viatica multis
 Aerumnis, lassus dum noctu stertit, ad assem
 Perdiderat; post hoc vehemens lupus et sibi et hosti
 Iratus pariter, ieiunis dentibus acer,
 30 Praesidium regale loco deiecit, ut aiunt,
 Summe munito et multarum divite rerum.
 Clarus ob id factum donis ornatur honestis,
 Accipit et bis dena super sestertia nummum.
 Forte sub hoc tempus castellum evertere praetor
 35 Nescio quod cupiens hortari coepit eundem
 Verbis, quae timido quoque possent addere mentem:
 I, bone, quo virtus tua te vocat, i pede fausto,
 Grandia laturus meritorum praemia. Quid stas?
 Post haec ille catus quantumvis rusticus: Ibit,
 40 Ibit eo quo vis qui zonam perdidit, inquit.
 Romae nutriri mihi contigit atque doceri,
 Iratus Graiis quantum nocuisset Achilles.
 Adiecere bonae paulo plus artis Athenae,

Eadem scripturae variatio est Carm. IV, 5, 31. — *mendax*] cf. Epist. I, 7, 2.

V. 26 *Luculli miles*] Porphyrio militem nominat *Valerianum Servilianum*, quod nomen Luculli certe aetate Romanum non fuit. Corruptum igitur videtur. L. Licinius Lucullus bellum gessit contra Mithridatem et Tigranem annis a. u. c. 680—688. — *aerumnis*] Cic. Tusc. IV, 8, 18. — *ad assem*] i. e. ad ultimum assem, tota (bis auf den Pfennig). — *loco deiecit*] loco munito depulit. Cic. Philipp. VIII, 6: „deieci praesidium.“ Liv. IV, 53: „deiectis qui in praesidio erant.“ — *divite*] De genitivo cf. Carm. IV, 8, 5. — *honestis*] honorificis. Ceterum Bland. antiquissimus habet *opimis*. — *bis dena*] 1909 Flor. Rhen. — *mentem*] animum, fortitudinem, ut Virg. Aen. XII, 609. Bland. antiquissimus habet *mentis* i. e.

mentes. — *bone*] vide ad Sat. II, 2, 1.

— *laturus*] vide ad Carm. IV, 8, 5.

— *zonam*] *βαλάντιον*, Geldkatze. Lamprid. Alex. Sev. 52: „Miles non timet nisi vestitus, armatus, calceatus et satur et habens aliquid in *zona*.“ — *Romae*] Idem, inquit, de me quoque iudicandum, nam cet. — *iratus Graiis*] Significantur Homerica carmina, de quarum in scholis lectione locus est Plinii Epist. II, 14, 2: „Sic in foro pueros a centumviralibus causis auspicari, ut ab Homero in scholis.“

Quintil. I, 8, 5: „Optime institutum est, ut ab Homero atque Virgilio lectio inciperet.“ Et cfr. id. I, 1, 12: „A Graeco sermone puerum incipere malo, quia Latinum, qui pluribus in usu est, vel nobis nolentibus perbibet, simul quia disciplinis quoque Graecis prius instituendus est, unde et nostrae

- Scilicet ut possem curvo dignoscere rectum
 45 Atque inter silvas Academi quaerere verum.
 Dura sed emovere loco me tempora grato,
 Civilisque rudem belli tulit aestus in arma
 Caesaris Augusti non responsura lacertis.
 Unde simul primum me dimisere Philippi,
 50 Decisis humilem pennis inopemque paterni
 Et laris et fundi paupertas impulit audax,
 Ut versus facerem; sed quod non desit habentem
 Quae poterunt unquam satis expurgare cicutae,
 Ni melius dormire putem quam scribere versus?
 55 Singula de nobis anni praedantur euntes:
 Eripuere iocos, venerem, convivia, ludum;
 Tendunt extorquere poëmata: quid faciam vis?
 Denique non omnes eadem mirantur amantque:
 Carmine tu gaudes, hic delectatur iambis,
 60 Ille Bioneis sermonibus et sale nigro.

fluxerunt.“ — *Athenae*] vide supra p. 3. *Bonae* appellantur Athenae propter gratam memoriam eius temporis, quo erat poeta Athenis. — *possem*] Orellius ex bonis codd. scripsit *vellem*, quod sic interpretatur: „ut arderem studio veri reperiendi proprio animi instinctu.“ At quod plurima pars codicum (etiam Cruquiani, ut videtur) habet *possem*, non antiquum glossema, sed vera lectio est; nam ut studio veri reperiendi arderet Horatius, id patris diligentissimi cura et disciplina iam effecerat; contra ut *posset* dignoscere quid esset rectum quid pravum, id addidit postea doctrina philosophorum. — *Academī*] Academia ab heroe aliquo Academo dicta locus erat nemorosus M. P. ab Athenis distans; ibi docebat Plato ab eaque dictae sunt Academiae philosophiae scholae. — *emovere*] Sic optimi codd., omnes Cruquiani; alii *amovere*. — *tulit aestus*] cf. Carm. II, 7, 15. Ceterum construe *civilis aestus* in arma tulit *rudem belli*, alii minus recte *aestus belli civilis me rudem belli*. cf. Carm IV, 15, 18. III, 8, 17. — *decisis pennis*] cf. Epist. I, 20, 21. De toto loco vide supra p. 5 sq. *Estraeus* (prosopogr. Hor. p. 282) di-

stinxit post *impulit*, ut sit: paupertas causa fuit, ut audax versus facerem, securus reprehensionum, conviciorum etc. Non bene. — *cicutae*] Plin. H. N. XXV, 12: „Cicutae semini et foliis refrigeratoria vis. Fit ex eo ad refrigerandum stomachum malagma. Folia tumorem omnem doloremque sedant.“ Est autem *expurgare* sanare, h. l. aestum febrilem refrigerare. cf. Sat. II, 3, 27. — *euntes*] vide ad Carm. II, 14, 5. Ceterum compara Epist. I, 1, 4. 7 sqq. I, 7, 25 sqq. — *quid faciam vis*] sc. ut ab annorum rapacitate me defendam. — *carmine*] lyrico cf. v. 91. — *Iambis*] Epist. I, 19, 23. — *Bioneis*] „lividis iocis i. e. satira. Sunt autem disputationes Bionis philosophi, quibus stultitiam arguit vulgi, cui paene consentiunt carmina Luciliana. Hic autem Bion, qui sophistes cognominatus est, in libro quem edidit mordacissimis salibus ea quae apud poetas sunt ita laceravit, ut ne Homero quidem parceret.“ *Acro*. Floruit autem Bion Borysthenites, discipulus Theophrasti (cf. Cic. Tusc. III, 26, 62) Olymp. 120, Cyrenaicae, postea Cynicae sectae addictus. — *sale nigro*] Sat. I, 10, 3. II, 4, 74. —

Tres mihi convivae prope dissentire videntur,
 Poscentes vario multum diversa palato.
 Quid dem? quid non dem? renuis tu quod iubet alter;
 Quod petis, id sane est invisum acidumque duobus.

65 Praeter cetera, me Romaene poëmata censes
 Scribere posse inter tot curas totque labores?
 Hic sponsum vocat, hic auditum scripta relictis
 Omnibus officiis; cubat hic in colle Quirini,
 Hic extremo in Aventino, visendus uterque:

70 Intervalla vides humane commoda. Verum
 Purae sunt plateae, nihil ut meditantibus obstat.
 Festinat calidus mulis gerulisque redemptor,
 Torquet nunc lapidem nunc ingens machina tignum,
 Tristia robustis luctantur funera plaustris,

75 Hac rabiosa fugit canis, hæc lutulenta ruit sus:
 I nunc et versus tecum meditare canoros.
 Scriptorum chorus omnis amat nemus et fugit urbes,
 Rite cliens Bacchi somno gaudentis et umbra:
 Tu me inter strepitus nocturnos atque diurnos

80 Vis canere et contacta sequi vestigia vatum?

multum diversa] vide ad Carm. I, 25, 5.

V. 65. *Romaene*] Nonnulli codices et vetustae editiones male *Romae mene*. Sed *Romae* voc. omnem sibi vindicat vim. cf. Sat. II, 6, 33. 60 sqq. Epist. I, 14, 8 sq. 17. — *labores*] cf. Plin. Epist. I, 9: „Si quem interrogas: hodie quid egisti? respondeat: „Officio togae virilis interfui; sponsalia aut nuptias frequentavi; ille me ad signandum testamentum, ille in advocacyem, ille in consilium rogavit.“ — *sponsum*] Sat. II, 6, 23. Epist. I, 16, 43. — *auditum scripta*] Epist. I, 19, 39. infra 105. — *cubat*] vide ad Sat. I, 9, 18. — *humane*] cum quadam *ἐὺρω-velq*, ut nos *hübsch*, Graeci *ἐπιεικῶς*. Eodem animo quae insequuntur ipse sibi obicit. — *purae*] vacuae obstaculis. Forum enim Romanum, templum Iovis Feretrii, Palatium, Capitolum, loca inter hos montes (Quirinalem et Aventinum) media erant frequentissima. Ceterum pro *verum* in duobus codd.

Cruquii est *rerum*, et pro *purae* unus tantum habet *plures*; praeterea Cruquius ex duobus codd. suis *obsit* pro *obstat* praetulit. Particula autem *verum* carere non possumus, quia Horatius haec sibi ipse *ἐὺρωνικῶς* obicit. — *meditantibus*] Carm. III, 25, 5. Sat. I, 9, 2. — *redemptor*] vide ad Carm. III, 1, 35. Quo calidior est redemptor; eo magis cavendum est ne a mulis et gerulis quos secum habet offendaris. — *funera*] cf. Sat. I, 6, 43. — *i nunc*] Epist. I, 6, 17. — *canoros*] A. P. 322. Certant versus canori cum rudi plaustrorum, funerum, machinarum strepitu redemptorisque clamore. — *rite cliens*] merito, ut eum decet, cliens. cf. Carm. III, 25, 1. — *contacta*] Sic ex Cruquianis tres Blandinii codd. et quinque alii, tres Orellii, plerique Pottierii, quattuor Schmidii, plures Pulmanni, Montepess., quibus accedit trium scholiastarum auctoritas. Explicandum puto: *Vis me vestigia vatum contingere et sequi*, non usque

- Ingenium, sibi quod vacuas desumpsit Athenas
 Et studiis annos septem dedit insenuitque
 Libris et curis, statua taciturnius exit
 Plerumque et risu populum quatit: hic ego rerum
 85 Fluctibus in mediis et tempestatibus urbis
 Verba lyrae motura sonum connectere digner?
 Frater erat Romae consulti rhetor, ut alter
 Alterius sermone meros audiret honores,
 Gracchus ut hic illi, foret huic ut Mucius ille.
 90 Qui minus argutos vexat furor iste poëtas?
 Carmina compono, hic elegos. Mirabile visu
 Caelatumque novem Musis opus! Adspice primum,
 Quanto cum fastu, quanto molimine circum-
 Spectemus vacuum Romanis vatibus aedem;
 95 Mox etiam, si forte vacas, sequere et procul audi,
 Quid ferat et quare sibi nectat uterque coronam.

sequi donec contigerim. Nimirum tum demum poeta vestigia vatum sequi potest, cum meditando et animum sublime quasi agendo et ab hoc strepitu removendo illa contigerit. cf. Cic. Tusc. I, 19, 43. Cod. Bland. antiquiss. habet *cantata* cum glossa: „ab aliis prius dicta;“ unus Cruquii *cunctata*, unus Bentleii *cinctuta*, unus Pottierii *contracta*, plures Orellii *contracta*, Bentleius ex coniectura *non tacta*. Qui *contracta* praetulerunt, interpretati sunt de arta via, qua ad Musas poetis eundum sit, ut ipsi *vestigia* quasi *contrahere* cogantur, ac nituntur illi quidem in Propertii loco III, 1, 15: „Non datur ad Musas currere lata via.“ — *Ingenium*] Nam ii etiam, inquit, quibus per longum tempus in loco ab omni strepitu vacuo, ut sunt Athenae, litteris et libris operam dare licuit, eo raro perveniunt, ut spem de se motam expleant, contra mira taciturnitate absorpti in publicum prodeunt et risum excitant populo. — *vacuas*] quietas, ut Epp. I, 7, 45. — *annos septem*] Recte Orellius docuit, in hoc numero inesse festivam aliquam hyperbolam, nec proprie esse accipiendum, quasi Horatius hic significaret semet ipsum Athenis septem annos studiis dedisse. — *curis*] meditatione, Cic. Tusc. V, 24, 69.

— *statua*] cfr. Lucian. Imagg. 1: „ἀχανῆ σε καὶ τῶν ἀνδριάντων ἀννητότερον ἀποφανεῖ.“

V. 87. *Frater erat*] Iam transit ad molestas hominum doctorum mutuas laudationes, quae tantum abest ut alligant, ut deterreant a scribendo eum, qui recte scribere malit quam laudem sibi colligere aliorum. Suo autem more subito ad eam rem transit exemplo duorum fratrum proposito Romanis haud dubie satis cognito. — *meros honores*] nihil nisi honores, laudes (Complimente). — *Gracchus*] Noli quaerere, utrum Caium significaverit Gracchum an Tiberium; uterque magnus orator. Non magis est quaerendum, quem Mucium videre debeamus. Mucii enim plures iuris scientia fuere insignes. — *qui minus*] quomodo minus; Sat. II, 3, 311. 7, 96. — *argutos*] Carm. IV, 6, 25. — *mirabile visu*] Ubi primum convenimus, hac inter nos laude praedicamus superbiq[ue] incedimus circumspectamusq[ue] aedem Apollinis et quae ibi est bibliothecam, sperantes utique nostros libros nostraque simulacra olim illuc delatum iri. — *circumspectemus*] vide ad Sat. I, 2, 62. — *vacuam*] iam patentem et eos quasi exspectantem. — *caedimur*] mutuis laudibus certamus ut gladiatorum (*Samnitium*. Liv.

- Caedimur et totidem plagis consumimus hostem
 Lento Samnites ad lumina prima duello.
 Discedo Alcaeus puncto illius; ille meo quis?
 100 Quis nisi Callimachus? si plus apposcere visus,
 Fit Mimnermus et optivo cognomine crescit.
 Multa fero, ut placem genus irritabile vatum,
 Cum scribo et supplex populi suffragia capto;
 Idem finitis studiis et mente recepta
 105 Obturem patulas impune legentibus aures.
 Ridentur mala qui componunt carmina; verum
 Gaudent scribentes et se venerantur et ultro,
 Si taceas, laudant quidquid scripsere beati.
 At qui legitimum cupiet fecisse poëma,
 110 Cum tabulis animum censoris sumet honesti;
 Audebit, quaecunque parum splendoris habebunt
 Et sine pondere erunt et honore indigna ferentur,
 Verba movere loco, quamvis invita recedant

IX, 40, 17) par in epulis divitum hominum. — *ad lumina prima*] usque ad vesperam, cum prima fax incenditur. — *puncto*] A. P. 343. Cic. Tusc. II, 26, 62. Antequam suffragia tabulis dabantur in comitiis, punctis candidatorum nominibus additis cives cui honorem demandare vellent indicabant. — *Callimachus*] Alexandriae vixit Ptolemaeo Philadelpho et Euergete regnantibus. Quintil. X, 1, 58: „Tunc et *elegiam* vacabit in manus sumere, cuius princeps habetur Callimachus.“ Inde Propertius se Romanum Callimachum appellavit IV, 1, 64. Praeterea hymnos, epigrammata, epica carmina composuit. De Mimnermo vide ad Epist. I, 6, 65. Audacissima sane est opinio nonnullorum interpretum vellicari hoc ioco ipsum Propertium, quem sane mirum est neque commemorare Horatium usquam neque ab Horatio commemorari. — *cum scribo*] quamdiu ipse carmina compono. — *impune legentibus*] Sic coniunge; nulla enim ab Horatio iis instat poena, cum nihil iam ipse recitaturus sit. Iocose hoc dictum, quoniam ipse nunquam iis recitationibus interfuit. cf. Epist. I, 19, 39. — *ultro*] vide ad Sat. II, 1, 39.

V. 109. *legitimum*] „Legitimum est poema et inventionem et compositionem et toto genere dicendi artis regulis consentaneum.“ *Orellius*, cfr. A. P. 274. — *censoris*] Scriptorem dicit eodem animo, eadem severitate tabulas suas cereas sumere debere, qua honestus, probus censor tabulas censorias. Totus autem locus ad censoris munus accommodatus est; inde v. *splendoris*, qui est equitum Romanorum (*splendidi* equites), quibus indignis censor equum adimebat; inde *verba movere loco*, nam censor senatorem senatu, civem tribu movere potuit; inde *invita recedant, obscurata eruet*. — *audebit*] Ab animo impetrabit; ut epp. I, 2, 40. Sic Graeci *τολμᾶν* usurpant. Plat. Menex. p. 245. C. — *sine pondere*] A. P. 320. Sine gravitate, inania. — *ferentur*] Verbum sumptum est a flumine; cfr. Sat. I, 4, 11. 7, 28. Sed cum *ferri* dicatur oratio non propter vitia sed propter virtutes (Quintil. IX, 4, 112: „oratio quae ferri debet ac fluere“.), *Horkelius* blande coniecit scribendum esse *fruentur*, quod ab altera lectione, quae est in bonis codicibus, *feruntur*, nihil diversum est nisi transposita una littera *e*. — *movere loco*]

- Et versentur adhuc intra penetralia Vestae;
 115 Obscurata diu populo bonus eruet atque
 Proferet in lucem speciosa vocabula rerum,
 Quae priscis memorata Catonibus atque Cethegis
 Nunc situs informis premit et deserta vetustas;
 Adsciscet nova, quae genitor produxerit usus.
 120 Vehemens et liquidus puroque simillimus amni
 Fundet opes Latiumque beabit divite lingua;
 Luxuriantia compescet, nimis aspera sano
 Levabit cultu, virtute carentia tollet,
 Ludentis speciem dabit et torquebitur, ut qui
 125 Nunc Satyrum, nunc agrestem Cyclopa movetur.
 Praetulerim scriptor delirus inersque videri,
 Dum mea delectent mala me vel denique fallant,
 Quam sapere et ringi. Fuit haud ignobilis Argis,
 Qui se credebat miros audire tragoedos
 130 In vacuo laetus sessor plausorque theatro;
 Cetera qui vitae servaret munia recto
 More, bonus sane vicinus, amabilis hospes,

ut censor, qui indignos senatu vel tribu movet. cf. Sat. I, 6, 20. — *penetralia Vestae*] Haec amplificationem habent eorum, quae proxime praecedunt: „quamvis invita recedant et quasi in intima parte aedium adhuc versentur nec eiici se facile patiantur.“ *Penetralia* aedium recte dicuntur *Vestae*; ibi enim Vestae sacra fiebant. — *speciosa*] gravia et significantia. Cfr. A. P. 319. — *priscis*] vide ad Sat. II, 1, 34. cf. A. P. 50. 56. — *situs*] Tibull. I, 10, 50: „Militis in tenebris occupat arma situs.“ Senec. epist. 58: „ex hoc exemplo intelligas, quantum apud Ennium et Accium verborum situs occupaverit.“ cfr. A. P. 61. — *usus*] A. P. 71 sq. Usus est qui verbis quasi vitam dat; inde *genitor* est. — *vehemens*] per synizesim in spondeum coalescit. Imago a flumine petita, cf. Carm. IV, 2, 5. Quod vehemens est flumen, solet esse lutulentum, non liquidum; quod ne fiat in oratione cavendum est. Cic. Brut. 79: „ita pura erat (oratio), ut nihil liquidius, ita li-

bere fluebat, ut nusquam adhaeresceret.“ — *luxuriantia*] proprie de arboribus et vitibus. cf. A. P. 447 sq. — *levabit*] expoliet. — *virtute carentia*] Non solum codd. aliquot Torrentii et Feae, ut Orellius adnotavit, habent *calentia*, sed quattuor etiam Blandinii; mire quidem: sed ita legit etiam Comment. Cruq., qui interpretatur *in usu posita*. Etiam *Bothius* hanc lectionem probavit et *tollere* interpretatus est de patribus infantes natos tollentibus et educantibus. — *tollet*] Intelliges sententiam ex Ciceronis loco Tusc. V, 13, 37 et videbis in eadem metaphora constitisse Horatium. — *ludentis*] Facilitati ita consulit, ut, quantumvis summos labores in scribendo consumpserit, ludere tamen videatur. — *Cyclopa*] vide ad Sat. I, 5, 63. — *ringi*] proprie de canibus rictum diducantibus et dentes ostendentibus. Est igitur „stomachari, cum norim quidem artis praecepta, satisfacere tamen iis non possum.“ — *haud ignobilis*] „Hic Lycas dictus est.“ *Comm. Cruq.* — *posset*

- Comis in uxorem, posset qui ignoscere servis
 Et signo laeso non insanire lagenae,
 135 Posset qui rupem et puteum vitare patentem.
 Hic ubi cognatorum opibus curisque refectus
 Expulit helleboro morbum bilemque meraco
 Et redit ad sese: Pol me occidistis, amici,
 Non servastis, ait, cui sic extorta voluptas
 140 Et demptus per vim mentis gratissimus error.
 Nimirum sapere est abiectis utile nugis
 Et tempestivum pueris concedere ludum,
 Ac non verba sequi fidibus modulanda Latinis,
 Sed verae numerosque modosque ediscere vitae.
 145 Quocirca mecum loquor haec tacitusque recordeo:
 Si tibi nulla sitim finiret copia lymphae,
 Narrares medicis: quod quanto plura parasti,
 Tanto plura cupis, nulline faterier audes?
 Si vulnus tibi monstrata radice vel herba
 150 Non fieret levius, fugeres radice vel herba
 Proficiente nihil curarier. Audieras, cui
 Rem di donarent, illi decedere pravam
 Stultitiam; et cum sis nihilo sapientior, ex quo

ignoscere] i. e. facile ab animo im-
 petaret cet. — *signo laeso*] cf. Martial.
 IX, 88, 7: „Nunc signat meus anu-
 lus lagenas.“ — *rupem*] cf. Sat. II,
 3, 59. A. P. 457 sqq. — *opibus*] au-
 xilio, ope; ut Epp. I, 10, 36. —
helleboro] Sat. II, 3, 82. — *bilemque*]
 De part. *que* vide ad Carm. I, 15, 34.
 — *meraco*] puro. Pers. IV, 16: „An-
 ticyras melior sorbere meracas.“ —
occidistis] Sic Terent. Phorm. IV, 3,
 67: „Geta, occidisti me tuis fal-
 laciis.“

V. 141. *sapere*] ad sapientiae prae-
 cepta vitam componere. Epist. I, 2, 40.
 — *nugis*] ludicris. Epist. I, 1, 10. —
tempestivum] Dativum *pueris* refer et
 ad *temp.* et ad *concedere*. cf. Cic. Tusc.
 I, 45, 109. Ovid. Met. V, 500. ac
 praeterea Hor. Epp. I, 14, 36. — *ac*
non] „Ubi alicui notioni alia quae ne-
 gatur definitionis causa adiungenda
 ideoque in aequo ponenda est, eam

Latini non per *nec* sed per *ac non* tum
 nectunt, cum inter utramque intercedit
 oppositio recta, in qua etiam copulam
 omittere licet.“ *Hand. Turs. T. I. p.*
 473. cf. Sat. II, 3, 135. Epist. I, 10, 46.
 — *verba sequi*] Carmini componendo
 operam dare; cfr. A. P. 240. — *re-*
cordeo] prima significatione; in mente
 agitare, reputare. — *lymphae*] cf. Carm.
 II, 2, 13 sqq. Diogenes ap. Stob. X,
 46. p. 131: „Διογένης ὁμοίον τοὺς
 φιλαργύρους τοὺς ὑδρωπικοῖς ἐκεί-
 νους μὲν γὰρ πλήρεις ὄντας ἀργυ-
 ρίου ἐπιθυμεῖν πλείονος, τοὺτους
 δ' ὕδατος, ἀμφοτέρους δὲ πρὸς κα-
 τοῦ.“ — *fugeres curarier*] vide ad
 Carm. I, 1, 8. — *donarent*] In paucis
 codd. ex mendo *donarunt* vel *donar-*
ant; inde Bentleius fecit *donarint*
 eumque multi sunt secuti. Non bene;
 obstat *audieras*. cf. Virg. Aen. I, 20.
 — *ex quo*] *Hand. Turs. II. p. 648*:
 „Cicero non dixisse videtur *ex quo*

- Plenior es, tamen uteris monitoribus isdem?
- 155 At si divitiae prudentem reddere possent,
 Si cupidum timidumque minus te, nempe ruberes,
 Viveret in terris te si quis avarior uno.
 Si proprium est quod quis libra mercatus et aere est,
 Quaedam, si credis consultis, mancipat usus;
- 160 Qui te pascit ager, tuus est, et vilicus Orbi,
 Cum segetes occat tibi mox frumenta daturas,
 Te dominum sentit. Das nummos, accipis uvam,
 Pullos, ova, cadum temeti: nempe modo isto
 Paulatim mercaris agrum, fortasse trecentis
- 165 Aut etiam supra nummorum milibus emptum.
 Quid refert, vivas numerato nuper an olim?
 Emptor Aricini quondam Veientis et arvi
 Emptum coenat olus, quamvis aliter putat; emptis
 Sub noctem gelidam lignis calefactat aënum;
- 170 Sed vocat usque suum, qua populus assita certis

hac quidem temporis significatione, sed *ex quo tempore*. Apud Livium nihil frequentius. — *plenior*] Carm. II, 12, 24. IV, 12, 24. — *monitoribus*] „iisdem hominibus de trivio, quibus opulentiae laudatoribus iam semel credendo deceptus es.“ *Porphyr.* — *cupidum timidumque*] Epist. I, 2, 51. Carm. II, 16, 15 sq. — *mercatus*] Recepti nunc cum Cruquio, Benteleio et Hauptio lectionem cod. Bland. antiquissimi, quamquam reliqui tres Bland. habent *mercamur et aere*, ceteri Cruquiani sequuntur vulgatam *mercatur et aere*. Comprobatur autem nostra lectio aliis etiam non malis codd. — *mancipat*] mancipio dat. „Nec solum per mancipationem sed etiam per usucapionem proprietatis acquiritur.“ *Comm. Cruq.* — *vilicus Orbi*] Orbis ignotus latifundiorum possessor. De re *Comm. Cruq.*: „ager qui te pascit, quamvis alterius sit proprietas, tamen tuus est quia eo uteris et fructus percipis.“ Nam accepto a te pretio vilicus tibi fruges vendit; tu igitur vere dominus es, ille videtur esse, eo insuper discriimine ut tu, hodie cum uvas, cras pullos, deinde frumenta et vina emas, paulatim merceris totum agrum quem

possessor trecentis milibus simul solutis sibi emit. — *daturas*] Sic habent quattuor Bland., duo alii Cruquiani, quattuor optimi Benteleii, alii. In multis aliis codd. est *daturus*. — *modo isto*] Lachm. ad Lucr. p. 197: „neque Horatius dixit *nempe modo isto* sed *modo isto*. Sic in Aen. VI, 389 Mediceus prima manu *iam stinc*, in M. Tullii Accus. I, 47, 123 Vaticanus *quem ammodum ste* . . . Maior pars poetarum post vocabula iambica nullis aliis locum concessit nisi quae aut monosyllaba essent et gravia aut hyperdisyllaba post primam syllabam acuta.“ — *emptor*] Coniunge *emptor quondam*. Vide ad Carm. III, 17, 9. Neque, inquit, qui agrum emit et suum dicit, minus emptis rebus vescitur et fruitur quam tu, qui, quae quotidie necessaria sunt, quotidie coëmere soles. Memorabilis tamen multorum et antiquissimorum codicum lectio *quoniam*, a Cruquio recepta neque omnino spernenda, dummodo commate posito post v. 166 interrogationis signum collocetur in fine versus 169. — *Veientis*] Veii hodie est *Isola Farnese*. De *Aricia* vide ad Sat. I, 5, 1. — *usque, qua*] „usque ad eum locum, ubi populus terminos agri

- Limitibus vicina refugit iurgia: tanquam
 Sit proprium quidquam, puncto quod mobilis horae
 Nunc prece nunc pretio nunc vi nunc morte suprema
 Permutet dominos et cedat in altera iura.
- 175 Sic quia perpetuus nulli datur usus et heres
 Heredem alterius velut unda supervenit undam,
 Quid vici prosunt aut horrea? quidve Calabris
 Saltibus adiecti Lucani, si metit Orcus
 Grandia cum parvis, non exorabilis auro?
- 180 Gemmas, marmor, ebur, Tyrrhena sigilla, tabellas,
 Argentum, vestes Gaetulo murice tinctas
 Sunt qui non habeant, est qui non curat habere.
 Cur alter fratrum cessare et ludere et ungi
 Praeferat Herodis palmetis pinguibus, alter
- 185 Dives et importunus ad umbram lucis ab ortu
 Silvestrem flammis et ferro mitiget agrum,
 Scit Genius, natale comes qui temperat astrum,
 Naturae deus humanae, mortalis in unum-
 Quodque caput, vultu mutabilis, albus et ater.
- 190 Utar et ex modico quantum res poscet acervo
 Tollam, nec metuam quid de me iudicet heres,

signat. "Comm. Cruq. — *populus assita*] *Aegrotius* p. 2274 Putsch: „*Assita* arbor est cui incolumi aliud quod sustineat adiungitur. Horatius: *qua populus assita surgit*, quippe quae viti-
 bus maritaretur.“ Rectius tu coniunge *assita certis limitibus* i. e. ad limites plantata, ita ut iam dubitari nequeat ubi limites sint. Cfr. Virg. Eclog. 9, 7. Varr. R. R. I, 15: „Praeterea sine septis fines praedii sationis notis arborum tutiores fiunt, ne familiae rixentur cum vicinis ac limites ex litibus iudicem quaerant. Serunt alii circum pinus, alii cupressos, alii ulmos cet.“ — *refugit*] ἀποφύγας. Vide ad Carm. I, 1, 4. *Horkelius* ne habeamus arborem, ita pacis amantem, ut malit radicibus aliorum transmigrare, quam vicinorum iurgiis interesse, coniecit scribendum esse *refringit*.

V. 177. *vici*] rustici, i. e. villae. Cic. ad Att. I, 3: „Quod si assequor,

Crassum divitiis supero atque omnium vicos et prata contemno.“ — *Calabris*] cf. Epod. I, 27. — *metit*] Carm. IV, 14, 31. — *Tyrrhena sigilla*] signa Tuscanica aerea, parva deorum simulacra, ob antiquitatem ut videtur quae-
 sita. — *Gaetulo*] Afro. cf. Carm. II, 16, 35. — *sunt qui*] vide ad Carm. I, 1, 3. — *curat*] Sic recte scribitur ex communi prope auctoritate codicum; pauci coniunctivum *curet* praebent. — *cessare*] otari et iucunde vivere. Epist. I, 7, 57. — *Herodis*] Magni, mortui a. u. 750; cui magna pecunia rediit ex palmetis ad Hiericuntem („palmis consitam, fontibus irriguam.“ Plin. H. N. V, 14). — *Genius*] vide ad Epist. II, 1, 144. Dicit igitur Horatius eam ingeniorum diversitatem positam esse in naturae humanae quodam arcano, quod intellectum hominum fugiat. — *natale astrum*] vide ad Carm. II, 17, 17. — *ex modico*] cf. Carm. I, 31,

- Quod non plura datis invenerit; et tamen idem
 Scire volam, quantum simplex hilarisque nepoti
 Discrepet et quantum discordet parcus avaro.
- 195 Distat enim, spargas tua prodigus an neque sumptum
 Invitus facias neque plura parare labores,
 Ac potius, puer ut festis Quinquatribus olim,
 Exiguo gratoque fruaris tempore raptim.
 Pauperies immunda domus procul absit: ego, utrum
- 200 Nave ferar magna an parva, ferar unus et idem.
 Non agimur tumidis velis Aquilone secundo:
 Non tamen adversis aetatem ducimus Austris;
 Viribus, ingenio, specie, virtute, loco, re
 Extremi primorum, extremis usque priores.
- 205 Non es avarus: abi. Quid? cetera iam simul isto
 Cum vitio fugere? caret tibi pectus inani
 Ambitione? caret mortis formidine et ira?
 Somnia, terrores magicos, miracula, sagas,
 Nocturnos lemures portentaque Thessala rides?

17. III, 16, 37. III, 29, 55. Sat. II, 6, 1. cf. etiam Sat. I, 1, 51. — *da-tis*] relictis a me. — *scire volam*] tamen, inquit, cavebo ne in contrarium vitium incidam. — *plura parare*] vide ad Sat. I, 1, 92. — *Quinquatribus*] Quinquatrus dies erant festi in honorem Minervae a. d. XIV. Kal. April.; quos pueri etiam otiosi ludis et iocis dicabant; nam ludi litterarii clausi erant. — *pauperies immunda domus*] Sic plerique codices; alii habent *procul domus*, alii *domus procul*, *domo procul*, *procul procul*, aliquot etiam *immunda procul* manco versu. In qua varietate codicum complures critici satis probabiliter suspicati sunt, excidisse in vetustissimis codicibus Horatianum vocabulum lacunamque varie expletam esse a grammaticis. Nam *immunda pauperies* satis definita est (cf. Carm. III, 16, 37. III, 29, 57 sq.), ut languidus videatur, si accedat, genitivus *domus*; neque quidquam ponderis addit ablativus *domo procul*, quoniam misso eo nihil plane desideratur. Gesner *modo* scribendum ratus immemor fuit Horatianae consuetudinis, qua

modo duas efficere solet syllabas breves. cf. Sat. I, 1, 16. 17. I, 2, 16. 74. I, 3, 7. 12. etc. Quare *Ieep* scribere maluit *modo ut*, *Duentzer* coniecit *mihi procul*, *Bentleius* proposuit *procul, precor*. Simile exemplum corruptionis est Carm. IV, 6, 17. — *tumidis velis*] Carm. II, 10, 23. cf. Epist. I, 1, 92 sq. Ex particula *tamen* vides qua ratione haec vivide prolata sententia coniungenda sit cum insequenti apodosi. — *aetatem ducimus*] cf. Epod. 17, 63. Cfr. Anthol. Pal. II, p. 310: „Μήτε με χειμάτι πόντος ἄγοι θρασὺς οὐδὲ γαλήνης Ἀργῆς ἡσπασάμην τὴν παλινῃνεμένην . . . κακὰς ἐχθαίρε Θυέλλας· Εἰσὶ τινες πρηεῖς καὶ βιότον Ζέφυροι. — *Non es avarus*] Praecipit sapientem non esse eum qui liber sit ab avaritia et augendorum bonorum cupiditate, sed veram sapientiam cernendam esse in animo ab omnibus cupiditatibus libero perpetuaque tranquillitate gaudente. — *cum vitio fugere*] In multis et antiquissimis codicibus ex corruptione scriptum est *fuge*. *Rite caret*. Corruptio orta videtur ex perfecti non intellecta

210 Natales grate numeras? ignoscis amicis?

Lenior et melior fis accedente senecta?

Quid te exempta levat spinis de pluribus una?

Vivere si recte nescis, decede peritis.

Lusisti satis, edisti satis atque bibisti;

215 Tempus abire tibi est, ne potum largius aequo

Rideat et pulset lasciva decentius aetas.

forma *fugere*; et rectius *quid?* interrogans pronomen altera interrogatione excipitur. — *lemures*] animae mortuorum propter desiderium aliquod in terris non expletum ad vivos redeuntes eosque noctu terrentes. — *Thessala*] vide ad Carm. I, 27, 21. — *grate numeras*] „quod non faciunt nimium timidi senectutis et mortis, quia ex natalibus multis mortem iam proximam perhorrescunt.“ *Porph.* — *levat*] Sic codd. Bland. Quod plurimi habent *iuvat* ex interpretatione natum videtur.

De verbo levandi compara Sat. II, 3, 292. Epod. 11, 17. 17, 26. Carm. Saec. 63. Epp. I, 8, 8. — *decede peritis*] „Quoniam recte vivere nescis, qui vivas omnino indignus es; quocirca moriendo da locum sapientioribus, quibus tua pravitate ac desidia obstas.“ *Orellius.* Est autem locus communis, quo Florus nequē tangebatur neque offendebatur. — *lusisti*] de amore; sic graece *παίγειν*. — *lasciva decentius*] quam magis decet lascivire ac ludere quam senectutem.

De arte poetica liber.

PRAEFATIO.

De hoc libro Horatii, qui Goethio nostrati, summo poetae eidemque acutissimo critico difficillimus visus est ad explicandum itaque comparatus, ut alium aliter et decimo quoque anno eundem aliter de eo iudicaturum affirmaret, tam multi adhuc scripserunt viri docti, ut Mureto prope satisfactum iam videatur, hanc epistolam brevi interpretes plures quam versus habituram olim vaticinanti. Quare cum ne praecipuas quidem aliorum opiniones nunc liceat enumerare, missis ambagibus quam mihi fecerim sententiam statim expromam. Atque cum iis faciendum mihi esse vidi, quibus non perfectam de carminibus faciendis artem sed epistolam ad Pisones conscribere voluisse Horatium persuasum est, in qua quidem epistola et ea praecepta de poësi coniungeret, quae sua quidem aetate experto sibi maxime necessaria viderentur suosque cives, qui temporum malis rationibus ad falsissimam de rebus poeticis, praecipue scenicis opinionem delapsi pravis delectarentur, vera fastidirent, ad veros sensus pulchritudinis leniter possent revocare. Iam duplici ratione peccatum est; scilicet quae alienissima sunt in eadem re saepe proxima praeter spem coniunguntur. Etenim alii fuerunt qui absolutam artem de universa re poëtica poëtae nolenti extorquerent, alii qui vulgaris epistolae naturam pertinaciter prementes, ut nos cum ad amicos scribamus quaecunque in calamum prima quasi incidant nullo consilio aut ordine ex arbitrio coniungamus, ita poetam

ad Pisones scribentem omnia alia miscuisse affirmarent. Mihi quidem hoc carmen ab Horatio quasi quoddam testamentum relictum videtur, quo cives suos, imprimis poetas, ab iis vitiis quibus eos videret laborare deterreret coniungeretque quae sibi per suam vitam usu et experientia edoctus sana fecisset praecepta, olim iam magnam partem, cum ferret occasio, proposita per satirasque et epistolas dispersa; quod quidem ita fecit, ut non consilium fixum praeviaque meditatione repertum rhetorum modo sequeretur, sed ingenii praestantia ductus ab una re ad alteram, cognatam eam quidem et ultro apparentem, quasi per planam viam transiret. Sic cui mecum persuasum erit, ei iam non videbitur mirum, cur per maiorem partem carminis de dramatica poesi poeta disputaverit plurimaque et exempla et praecepta ad illam applicaverit; de ea enim falsissime tum iudicatum est et a populo universo et a poetis, qui popularem laudem captantes ad populi iudicium fabulas diligenter accommodarent.

Ad Pisones scriptam esse epistolam docent hi loci: v. 5. 6. 24. (153). 235. 268. 272. 292. 366. (385. 426.) 436. De Pisonibus haec tradiderunt scholiastae: „Hunc librum qui inscribitur de arte poetica ad L. Pisonem, qui postea urbis custos fuit, eiusque liberos misit. Nam et ipse Piso poeta fuit et studiorum liberalium antistes.“ Et Tacitus Ann. VI, 10: „Per idem tempus (a. u. c. 785.) L. Piso pontifex, rarum in tanta claritudine, fato obiit, nullius servilis sententiae sponte auctor et, quoties necessitas ingrueret, sapienter moderans. Patrem ei censorium fuisse memoravi: aetas ad octogesimum annum processit; decus triumphale in Thracia meruerat. Sed praecipua ex eo gloria, quod praefectus Urbi recens continuam potestatem et insolentia parendi graviolem mire temperavit.“ Velleius Paterc. II, 98: „Atrox in Thracia bellum ortum L. Pisonis, quem hodieque diligentissimum atque eundem lenissimum securitatis urbanae custodem habemus, virtus compressit. De quo viro hoc omnibus sentiendum ac praedicandum est, esse mores eius vigore ac lenitate temperatissimos et vix

quemquam reperiri posse, qui aut otium valdius diligat aut facilius sufficiat negotio et magis quae agenda sunt curet sine ulla ostentatione agendi.“ Is igitur natus erat a. 705, consul a. u. 739; quare si vicanarius uxorem duxit, annis 743—746 filium habere potuit 17—20 annos natum. Nam hoc mihi quoque certum videtur, emissam esse hanc epistolam extremis vitae annis Horatii; quamquam in hac quoque re viri docti in alia omnia discesserunt. Alii enim Satirae I, 4 versum 63 arripuerunt et comparata cum extremis primi libri primisque secundi satiris epistolae natura hunc librum compositum iudicarunt vigente etiam Horatii aetate et ante perfectum alterum satirarum librum; in qua re ideo magnopere errarunt, quod dispositionem epistolae incertam sibi finxerunt et vagam. *) Iam vero ita comparata tota est, ut senescentem iam videamus poetam, a faciendis carminibus iam abstinenter, prorsus eundem quem alter epistolarum liber de simili re docentem ostendit. Alii extremis Horatii annis librum confectum quidem mortuo demum poeta curante Augusto emissum esse credunt, sed firmis praesidiis omnino destituti. Neque ii satis considerarunt epistolas scriptas non solere in scriniis cohiberi sed mitti ad eos quibus essent scriptae. Quare sicut epistolarum ad Augustum et ad Florum exempla Augusto et Floro missa sunt, ita etiam huius epistolae Pisonibus certe et aliis amicis exemplum datum est. Illud autem, utrum epistolae ad Augustum et Florum cum hac coniunctae et Sosis divendendae traditae sint necne, ego vero neque affirmare ausim neque negare. Nam ne inde quidem quidquam certum aut veri simile effici potest, quod in codicibus incerta huic epistolae sedes

*) Estræus prosoprogr. Hor. p. 206: „Recte Reenenius disp. de epist. ad Pis. p. 58 ostendit, artem poeticam fuisse scriptam ante a. 735, quo mortuus est Virgilius; hic enim cum Vario v. 53 sq. inter vivos commemoratur, tum quoque propter vs. 438 sq., post obitum Quinctilii a. 730.“ Id. p. 289: „Pisonem, cui Horatius filiisque artem poeticam inscripsit, ad Bruti socios cum Reenenio (disp. de epist.

ad Pis. Amstelod. 1806) referre non dubito. Hic enim invictis argumentis Pisonem diversum non esse probavit ab illo, quem significat Tacit. Ann. III, 16, qui bello civili resurgentes in Africa Pompeii partes acerrimo ministerio adversus Caesarem adiuvit, mox Brutum Cassiumque secutus, concesso reditu, petitione honorum abstinuit, donec ultro delatum sibi ab Augusto consulatum acceperit, quem gessit a. 731.“

est. *) Quod quidem factum videtur propter indicem, quo grammatici parvo post Horatium mortuum tempore eam exornare solebant. Etenim a Quintiliano ea iam nominatur *liber de arte poetica*; similiter postea Symmachus, Sidonius Apollinaris, Priscianus; *epistolam ad Pisones* eam appellat unus Charisius. At vero veteres id saepe quaerebant, ut singulos libros vel singula carmina uno verbo ac nomine coartarent eorumque res et argumentum indicarent; deinde recte illi grammatici intellexerunt hanc epistolam non Pisonibus solis sed omnibus Romanis et poetis et poeticae artis fautoribus scriptam esse magnamque ibi reperiri elegantissimorum praeceptorum copiam; quapropter eam et frequenter lectitarunt et peculiari commentario aequalibus explicare mature coeperunt. Inde factum est ut seorsum saepe ea epistola scriberetur, deinde in coniunctis Horatii operibus modo hunc modo illum locum occuparet. Nobis autem titulum quo liber inscriberetur quaerentibus rectius visum est cum grammaticis *Artem poeticam* scribere quam verba (*Epistola ad Pisones*) praeponere, quibus neque quidquam de argumento enunciatum neque Horatius in hac epistola magis usus est quam in reliquis.

*) De qua re mire nuper Walckenaerius (histoire de la vie et des poésies d'Horace. T. II. p. 549 sq.): „Après la mort d'Horace on réunit en un seul livre sous le nom d'épodes les odes inédites qu'il avait laissées et les odes publiées séparément dans sa jeunesse, mais qu'il n'avait point admises dans ses quatre livres d'odes. L'épître aux Pisons entra nécessairement dans ce recueil posthume des poésies d'Horace et fut placée en tête. Comme on ne pouvait mettre ces épo-

des ou ces odes inédites qu'après le recueil entier des odes, il s'ensuivit que quand on réunissait les deux recueils pour en former un seul, contenant toutes les poésies d'Horace, l'épître aux Pisons se trouvait placée immédiatement après les odes et avant les épodes. C'est ainsi que sont toujours rangées les poésies d'Horace dans les plus anciens manuscrits, c'est ainsi qu'elles furent publiées primitivement.“ De Epodis vide supra.

Q. HORATII FLACCI

DE ARTE POETICA LIBER.

Humano capiti cervicem pictor equinam
 Iungere si velit et varias inducere plumas
 Undique collatis membris, ut turpiter atrum
 Desinat in piscem mulier formosa superne,
 5 Spectatum admissi risum teneatis, amici?
 Credite, Pisones, isti tabulae fore librum
 Persimilem, cuius velut aegri somnia vanae
 Fingentur species, ut nec pes nec caput uni
 Reddatur formae. Pictoribus atque poëtis
 10 Quidlibet audendi semper fuit aequa potestas.

De arte poetica liber.

V. 1. *In fronte carminis describit poeta imaginem aliquam monstruosae bestiae ex diversissimis partibus compositae, qua summa in quavis arte lex de simplicitate et unitate legentibus inculcetur. Eam in poesi quoque plurimum valere dicit (v. 23), neque si qui poeta eam laedere audeat, excusationem eum habiturum in libertate poetis concessa aut in furore, cui nimium saepe poetae tribuere non dubitent, neque compensari vitia ex violata illa lege exorta singulis splendidis locis ac luminibus (v. 1—37). cf. Plat. Phaedr. p. 264. C.: „Δεῖν πάντα λόγον ὥσπερ ζῶον συνεστάναι σῶμά τι ἔχοντα αὐτὸν αὐτοῦ, ὥστε μήτε ἀκέφαλον εἶναι μήτε ἄπουν ἀλλὰ μέσα τε ἔχειν καὶ ἄκρα πρόποντα ἀλλήλοις καὶ τῷ ὅλῳ γεγραμμένα.“ — humano] Chiasmi ordo humano capiti cervicem equinam discrepantiam earum partium clarius illustrat. — va-*

rias] omnium colorum. — inducere] „penicillo adungere.“ *Comm. Cruq. — turpiter atrum]* Piscis ater est ad in-
 cutiendum hominum adspicientium men-
 tibus terrorem. Similiter Schiller no-
 stras in egregio carmine de dracone
 (der Kampf mit dem Drachen): „Und
 Alles bild' ich ganz genau Und kleid'
 es in ein scheuslich Grau“ et in alio
 (der Taucher): „Des Hammers gräu-
 liche Ungestalt.“ De monstro cf. Virg.
 Aen. III, 426 sqq. De pictorum per-
 versa licentia Vitruv. VII, 5: „Nunc
 pinguntur tectoriis monstra potius quam
 ex rebus finitis imagines. . . . velut
 ex coliculis flores dimidiata habentes
 ex se exeuntia sigilla, alia bestiarum
 capitibus similia: haec autem nec sunt
 nec fieri possunt ac fuerunt (Arabes-
 ken).“ — aegri] febrientis. — picto-
 ribus] Sic possit aliquis obiiicere. —
 aequa] iure permissa. Diphilus apud
 Athen. 6, 1: „(τοῖς τραγῳδοῖς) ἔξου-
 σία Ἔστιν λέγειν ἅπαντα καὶ ποιεῖν
 μόνοις.“ Lucian. pro imagg. 18: „Πα-

Scimus et hanc veniam petimusque damusque vicissim,
Sed non ut placidis coëant immitia, non ut
Serpentes avibus gementur, tigribus agni.

Inceptis gravibus plerumque et magna professis

15 Purpureus, late qui splendeat, unus et alter

Assuitur pannus, cum lucus et ara Dianae

Et properantis aquae per amoenos ambitus agros

Aut flumen Rhenum aut pluvius describitur arcus.

Sed nunc non erat his locus. Et fortasse cupressum

20 Scis simulare; quid hoc, si fractis enatat expses

Navibus, aere dato qui pingitur? Amphora coepit

Institui: currente rota cur urceus exit?

Denique sit quidvis simplex duntaxat et unum.

Maxima pars vatum, pater et iuvenes patre digni,

25 Decipimur specie recti: brevis esse laboro,

Obscurus fio; sectantem levia nervi

Deficiunt animique; professus grandia turget;

Serpit humi tutus nimium timidusque procellae;

Qui variare cupit rem prodigialiter unam,

30 Delphinum silvis appingit, fluctibus aprum.

λαϊὸς οὗτος ὁ λόγος, ἀνευθύνους εἶ-
ναι καὶ ποιητὰς καὶ γραφέας.“ —
coëant] cf. Epist. I, 5, 25. — gemen-
tuntur] cf. Epod. 16, 30. — inceptis
gravibus] In illud saepe incidunt vi-
tium poetae splendoris studio, quo
magnae expectationi quam magnificis
exordiis excitare audent, satisfacere
sibi videntur. Inde fit, ut in digres-
siones non raro deducantur vilique
quasi vestimento purpureos quosdam
pannos assuant totumque perdant. Eius-
modi pannorum exempla quaedam sta-
tim proferuntur, fortasse ex aequalium
poetarum carminibus petita; nam *flu-
men Rhenum* ad Furium Bibaculum re-
ferendum esse non est improbabile. cf.
Sat. I, 10, 37. — *flumen Rhenum*] vide
ad Carm. IV, 4, 38. — *Et fortasse*]
„Irrisio pictoris inepti, qui vix aliud
noverat quam depingere cupressum.
A quo cum naufragus quidam peteret,
ut vultum suum et naufragium expri-
meret, interrogavit num ex cupresso
vellet aliquid appingi.“ *Comm. Cruq.*

Tenendum est et pictoribus et poetis,
suum cuique rei esse locum. De nau-
fragis vide ad Carm. I, 5, 13. — *si-
mulare*] μιμεῖσθαι, ut Epist. II, 1, 241.
Ovid. Met. VI, 80. — *coepit institui*]
„constructione a Cicerone nunquam
usurpata pro *coepta est institui*.“ *Orel-
lius*. — *decipimur*] Alia causa; nam
quibus pulchri et veri sensus arte et
studio non est excultus, ii dum vitia
vitare student, nescientes in contraria
ruunt. — *brevis*] Quintil. VIII, 3, 83:
„βραχυλογία male imitantes sequitur
obscuritas.“ — *levia*] levigata, expo-
lita, splendentia. Sic antiqui libri MSS.
et scholiastae. Alii male ex frequen-
tissima verborum confusione *lenia*, mol-
lia. Monet poeta ne nimio levitatis
(*λειότητος*) studio vis ac vigor ora-
tionis perdatur. — *turget*] Quintil. X,
2, 16: „fiunt (scriptores) pro grandibus
tumidi.“ — *timidus procellae*] De
genitivo vide ad Epist. I, 15, 33. —
prodigialiter] ita variare, ut omnes qui
legant ingenium suum admirentur, stu-

In vitium ducit culpa fuga, si caret arte.
 Aemilium circa ludum faber imus et unguēs
 Exprimet et molles imitabitur aere capillos,
 Infelix operis summa, quia ponere totum
 35 Nesciet. Hunc ego me, si quid componere curem,
 Non magis esse velim, quam naso vivere pravo
 Spectandum nigris oculis nigroque capillo.
 Sumite materiam vestris qui scribitis aequam
 Viribus et versate diu quid ferre recusent,
 40 Quid valeant humeri. Cui lecta potenter erit res,
 Nec facundia deseret hunc nec lucidus ordo.
 Ordinis haec virtus erit et venus, aut ego fallor,
 Ut iam nunc dicat iam nunc debentia dici,

peant. — *Aemilium ludum*.] Est ludus gladiatorius ab Aemilio Lepido exstructus non procul a Circo. — *faber imus*] Sic plurimi et antiquissimi codices. Recte, opinor. Altera enim lectio *unus*, quam alii interpretantur *praeter ceteros*, melius quam reliqui omnes, alii *aliquis*, ex coniectura orta videtur. Vereor enim ne Horatius non velit dicere hunc fabrum melius quam reliquos omnes aere imitari unguēs et crines; satis enim magna laus erit, si bene ille id facere posse dicatur, id quod solo verbo *imitabitur* perspicue exprimitur. Deinde ut sit *unus* idem quod *aliquis*, id quod locis etiam probari non nego, Horatius neque dicere potuit, *aliquem* ex fabris circa ludum Aemilium egregie exprimere unguēs et capillos, quoniam certa ea laudatio ad incertum hominem, ad primum quemque fabrorum referri non poterit, neque suum ipsius morem ita relinquet, ut cum semper certam certorum hominum imaginem proponere soleat, nunc vagam dubiamque inferat descriptionem. Quod quidem bene senserunt ii qui *Imum* nomen proprium esse putarent apud Acronem, quamquam a vero aberrarunt. Recte *Porphyrio* et *Comment. Cruquianus* imum eum esse, qui tunc ad imam partem ludi tabernam habuerit, affirmant. Sic certa enunciatum et laudatio et vituperatio certi hominis, omnibus aequalibus noti. Deinde nihil difficultatis inest in coniunctis vocabulis *imus* et *circa*; nam quamquam *circa*

et *circum* locum indeterminatum significant, *imus* vero certissimum in parte ludi extrema, quid fuit quod poetam impediret, quominus ex iis qui ibi tabernas haberent unum, qui *imū* eius regionis locum occupavisset, *circa ludum Aemilium imum* appellaret? Ceterum *imus* et *unus* saepius a librariis mutata sunt, veluti Sat. I, 4, 87, ubi pro *unus* Feae codd. et tres Pottierii *imus* praebent, et infra v. 152, ubi antiquus Bernensis non *imū* habet, sed *unum*. *Horkelius* scribendum esse coniecit *faber inritus*, ut Virg. Aen. V, 442. — *ponere*] Carm. IV, 8, 8. — *nigris oculis*] vide ad Carm. I, 32, 11.

V. 38. *Simplicitati et unitati ut recte consulatur, materies sumenda est, cui recte tractandae vires sufficiunt. Quod si factum erit, non deerit neque facundia neque lucidus ordo. Iam primum agitur de lucido ordine* (v. 43—45), *tum de facundia* (v. 46—72), *quae cernitur in eligendis recte verbis, praeceptis recipiendis, novis apte faciendis, tum in coniungendorum inter se verborum nova et eleganti ratione*. — *potenter*] pro suis viribus. Supervacanea est Marklandi coniectura *puđenter* i. e. modeste, ut v. 51. cf. Epist. I, 17, 44. II, 1, 259. — *venus*] cfr. v. 320. Quintil. VI, 3, 18: „Venustum esse quod cum gratia quadam et venere dicatur apparet.“ — *nunc debentia*] Cavendum esse praecipit, ne alia dicantur atque ea quae quovis loco necessaria sint, ne in scribendo scriptor

- Pleraque differat et praesens in tempus omittat;
 45 Hoc amet, hoc spernat promissi carminis auctor.
 In verbis etiam tenuis cautusque serendis,
 Dixeris egregie, notum si callida verbum
 Reddiderit iunctura novum. Si forte necesse est
 Indiciis monstrare recentibus abdita rerum,
 50 Fingere cinctutis non exaudita Cethegis
 Continget dabiturque licentia sumpta pudenter.
 Et nova fictaque nuper habebunt verba fidem, si
 Graeco fonte cadent parce detorta. Quid autem
 Caecilio Plautoque dabit Romanus ademptum
 55 Virgilio Varioque? Ego cur, acquirere pauca
 Si possum, invideor, cum lingua Catonis et Enni
 Sermonem patrium ditaverit et nova rerum
 Nomina protulerit? Licuit semperque licebit
 Signatum praesente nota producere nomen.

animo indulgeat; suo quodque loco ponendum esse, ut intelligatur cur scriptor hoc posuerit, illud spreverit. — *in verbis*] Cic. de Orat. III, 37: „Est quidam ornatus orationis qui ex singulis verbis est, alius qui ex continuatis coniunctisque constat. Ergo utemur verbis aut iis quae propria sunt et certa quasi vocabula rerum, paene una nata cum rebus ipsis, aut iis quae transferuntur et quasi alieno in loco collocantur, aut iis quae novamus et facimus ipsi.“ Dionys. Halic. de Comp. 3: „Ὅν ἐν τῷ ᾗλλει τῶν ὀνομάτων ἡ περὶ τῆς ἐρμηνείας ἐστὶν ἄλλ’ ἐν συζυγίᾳ.“ — *tenuis*] de subtilitate iudicii in eligendis verbis. Quint. VIII, 3, 87: „et sunt quaedam velut e *tenui* diligentia circa proprietatem significationemque munditiae.“ — *indiciis*] „*Indicia* verba appellavit; philosophi enim dicunt *indicandarum* rerum causa inventas esse voces.“ *Porphy.* — *abdita rerum*] notiones novas. — *cinctutis Cethegis*] cf. Epist. II, 2, 115 sqq. *Cinctuti* sunt cinctu induti; cinctus autem vestis fuit infra pectus corpus ambiens et ad pedes pertingens. A priscis Romanis gestabatur cinctus loco tunicae, ut expeditiores essent ad agendum; habebant enim soluta brachia et ad exserendum habiliora. *Cinctutus*

voc. praeter h. l. non videtur legi nisi apud Ovidium Fast. V, 101: „coleris cinctutis, Faune, Lupercis“ i. e. prope nudis et cinctu pudenda velatis. — *pudenter*] Quintil. I, 5, 71: „Usitatus utimur; nova non sine quodam periculo fingimus.“ — *Graeco fonte*] Facienda verba sunt ad analogiam graecae linguae sed ex ingenio et natura latinae, ut apud Horatium *centimanus, tauriformis, beluosus*, alia. Quintil. XII, 10, 33: „Tanto est sermo Graecus Latino iucundior, ut nostri poetae, quoties dulce carmen esse voverint, illorum id nominibus exorant.“ — *cadent*] Sic ex Cruquianis codd. omnes Bland., duo alii; *cadunt* in duobus, *cadant* in uno Cruq. In reliquis codd. eadem est varietas, ita tamen ut futurum tempus summam habeat auctoritatem. — *Caecilio*] Epist. II, 1, 59. — *Virgilio Varioque*] Noli colligere ex hoc loco, vixisse etiam tunc Virgilium et Varium; sed hi eius aetatis egregii poetae contra priscos Caecilium et Plautum ponuntur; utrisque idem novandorum verborum ius vindicatur. — *invideor*] cf. Epist. I, 5, 21 *imperor.* — *Catonis*] M. Porcii Catonis, qui Censorinus dicitur. cf. Cic. de Fin. III, 4: „Si Zenoni licuit, cum rem aliquam invenisset inusitatam, inauditum

- 60 Ut silvae foliis pronos mutantur in annos,
 Prima cadunt; ita verborum vetus interit aetas,
 Et iuvenum ritu florent modo nata vigentque.
 Debemur morti nos nostraque: sive receptus
 Terra Neptunus classes Aquilonibus arceat,
- 65 Régis opus, sterilisve diu palus aptaque remis
 Vicinas urbes alit et græve sentit aratrum,
 Seu cursum mutavit iniquum frugibus amnis,
 Doctus iter melius; mortalia facta peribunt,
 Nedum sermonum stet honos et gratia vivax.
- 70 Multa renascentur quae iam cecidere, cadentque
 Quae nunc sunt in honore vocabula, si volet usus,
 Quem penes arbitrium est et ius et norma loquendi.
 Res gestae regumque ducumque et tristia bella

quoque ei rei nomen imponere, cur non liceat Catoni? — *producere nomen*] Sic antiquissimi codices. Qui scripserunt *procudere*, nimio continuandae imaginis studio non viderunt idem bis dici; nam quid aliud est *signare*? Sed in *producere* quoque metaphorā a nummis desumpta continuatur; est enim nummos recens factos „in notitiam hominum deducere“, ut dicunt scholiastae, hanc lectionem tuentes. cf. Quintil. I, 6, 18: „Utendum plane sermone velut nummo, cui publica forma est.“ — *pronos annos*] ad finem vergentes. Carm. III, 27, 18. Ceterum cf. Hom. II, VI, 146. Mimerm. eleg. 2: „*Ἡμεῖς δ' οἷά τε φύλλα φνέει πολυανθέος ὦρον Ἑάρως, ὅτ' ἄψ ἀνγῆ ἀύξεται ἡελίου, τοῖς ἐνελοι πῆγνιον ἐπὶ χρόνον ἀνθεσιν ἡβης Τερόμεθα, πρὸς θεῶν εἰδότες οὐτ' ἀκαθόν Οὐτ' ἀγαθόν.*“ — *prima*] quae prius germinarunt, ea prius decidunt. — *debemur*] cf. Carm. II, 3, 25. 14, 21 sqq. — *Neptunus*] A. u. c. 717 Octavianus Agrippae consilio lacum Lucrinum cum lacu Averno coniunxit magnamque ibi fecit portum tutissimum ab impetu et hostium et maris. Portus olim *Iulius* vocatus nunc arundinetum palustre est, *Mar* morto. — *Aquilonibus*] Virg. Aen. IV, 310. De casu cf. Epist. I, 8, 10. — *palus*] Ex licentia quādam poetica ultima syllaba correpta est. Fuerunt tamen qui

hiatum praeferrent et scribendum esse putarent *palus diu aptaque*; alii coniecturis locum tentarunt, *palus prius, palus dudum, palus pulsataque*. Explicant scholiastae locum de exsiccatis ab Augusto Pomptinis paludibus; sed a nemine docemur Augustum perfecisse quod Iulius Caesar ante erat meditaturs. Sueton. Caes. 44: „Iulius Caesar siccare Pomptinas paludes meditabatur.“ Neque magis sumus certi de correcto ab Augusto Tiberis cursu; quae res a poeta significata est v. 67. — *sermonum*] loquendi consuetudinis. Quintil. I, 6, 43: „Et sane quid est aliud *vetus sermo* quam *vetus loquendi consuetudo*?“ — *usus*] cf. Epist. II, 2, 119.

V. 73. *A singulis vocabulis Horatius transit ad ipsam orationem: quare praecipit in quoque carminum genere rectos numeros rectumque dicendi genus observandum esse ac tenendum* (v. 86 sqq.), *ita ut congruat ea cum ipsa re et cum sensibus et natura eorum hominum qui describantur. Exempla eius rei sumuntur ex tragoedia et comoedia, quarum versus iambici non debent eiusdem esse animi motuum ipsorum qui loquuntur hominum* (v. 111). *Praeterea sermo accommodandus est ad condicionem,*

Quo scribi possent numero, monstravit Homerus.

- 75 Versibus impariter iunctis querimonia primum,
Post etiam inclusa est voti sententia compos;
Quis tamen exiguos elegos emiseric auctor,
Grammatici certant et adhuc sub iudice lis est.
Archilochum proprio rabies armavit iambo;
80 Hunc socci cepere pedem grandesque cothurni,
Alternis aptum sermonibus et populares
Vincentem strepitus et natum rebus agendis.
Musa dedit fidibus divos puerosque deorum,
Et pugilem victorem et equum certamine primum
85 Et iuvenum curas et libera vina referre.
Descriptas servare vices operumque colores
Cur ego si nequeo ignoroque poëta salutor?
Cur nescire pudens prave quam discere malo?

aetatem, patriam hominum. His igitur diligenter consulendum est, sive persona describitur ab aliis iam facta et tradita, ut Achilles, Medea, aliae personae (v. 124) sive novae inveniuntur a scribentibus ipsis. Novas autem fingere periculosum est, traditas describere facilius et gratius, in qua tamen re cavendum est ne scriptio omnino coerceatur imitatione; sed in traditis etiam personis necessaria est describendi novitas ac proprietas (v. 73—135). — *impariter*] Hoc adverbium non videtur legi nisi hoc uno loco. Significantur hexameter versus et pentameter. — *querimonia*] lugubris elegia de amicis vel civibus egregiis morte ereptis. „Primum metro elegiaco res tristes et lugubres, post etiam laetae et prosperae coeperunt describi.“ *Comm. Cruq.* „Lugendi formula est ἔ ἐ λέγε· ex eaque et origo carminis elegiaci et appellatio explicari potest. Vix enim dubitandum videtur, quin antiquissimi illius lugubris carminis ea ratio fuerit, ut pentametrorum posterior pars haec esset: ἔ ἐ λέγ' ἔ ἐ λέγε. Illi igitur versus recte dicti sunt ἔλεγχοι.“ *Hermann.* — *exiguos elegos*] tenues et humiles, si comparantur cum epici carminis gravitate. *Orion* p. 58: „Εὐρετην δὲ τοῦ ἔλεγγου φασὶν οἱ μὲν τὸν Ἀρχιλόχον, οἱ δὲ Μίμνεμον, οἱ δὲ Καλ-

λῖνον παλαιότερον· οὕτω Δίδυμος (Horatii aequalis) ἐν τῷ περὶ ποιητῶν.“ Omnium quae ad nos pervenerunt antiquissima elegia est Callini (730 vel 635 a. Chr.). — *Archilochum*] *Epod.* 6, 13. *Epist.* I, 19, 25. — *socci*] *Epist.* II, 1, 174. Ut cothurnus tragoediam ita soccus comoediam indicat. — *alternis*] *Aristot.* *Poet.* 4: Μάλιστα λεπτὸν τῶν μέτρων τὸ ἱαμβεῖον ἐστίν· σημεῖον δὲ τούτου· πλεῖστα γὰρ ἱαμβεῖα λέγομεν ἐν τῇ διαλέκτῳ τῇ πρὸς ἁλλήλους, ἐξάμετρα δὲ ὀλίγανς.“ *Cic. orat.* 57, 191: „pes iambicus orationi simillimus; quae de causa fieri, ut is potissimum propter similitudinem veritatis adhibeatur in fabulis.“ — *strepitus*] clamores „populi, id est, clarius resonantem in scena quam tumultus popularis resonet: tales strepitus excitat iste pes.“ *Comm. Cruq.* *Quintil.* IX, 4, 136: „Aspera iambis maxime concitantur, non solum quod sunt e duabus modo syllabis eoque frequentiore quasi pulsum habent, quae res lenitati contraria est, sed etiam quod omnibus pedibus insurgunt, et a brevibus in longas nituntur et crescunt.“ — *divos puerosque*] Inducantur varia lyricae poesis genera. cf. *Carm.* IV, 2, 10 sqq. — *libera vina*] *Sat.* I, 4, 89. II, 8, 37. — *descriptas*] certis legibus divisas, ut suum cuique generi

- Versibus exponi tragicis res comica non vult;
 90 Indignatur item privatis ac prope socco
 Dignis carminibus narrari coena Thyestae.
 Singula quaeque locum teneant sortita decenter.
 Interdum tamen et vocem comoedia tollit,
 Iratusque Chremes tumido delitigat ore;
 95 Et tragicus plerumque dolet sermone pedestri
 Telephus et Peleus, cum pauper et exul uterque
 Proiicit ampullas et sesquipedalia verba,
 Si curat cor spectantis tetigisse querela.
 Non satis est pulchra esse poëmata; dulcia sunt
 100 Et quocunque volent animum auditoris agunto.
 Ut ridentibus arrident, ita flentibus adsunt
 Humani vultus; si vis me flere, dolendum est
 Primum ipsi tibi; tunc tua me infortunia laedent,
 Telephe vel Peleu: male si mandata loqueris,
 105 Aut dormitabo aut ridebo. Tristia moestum
 Vultum verba decent, iratum plena minarum,
 Ludentem lasciva, severum seria dictu.

metrum constitutum sit. — *colores*] cf. v. 236. — *privatis*] sermone ex quotidiana ac vulgari vita sumpto. — *Thyestae*] vide ad Carm. I, 6, 8. — *Chremes*] persona Terentiana ex Heautontim. V, 4, ubi Chremes castigat prodigum filium Clitiphonem. — *Telephus et Peleus*] tragicæ personæ. Telephus Hercules filius fuit ex Auge, Alei filia, Mysiae regis. „Hi ambo reges fuerunt, qui amissis regnis ad tantam inopiam devenerunt, ut exsules facti mendicando sibi undecunque victum conquirerent, omissis verbis grandibus et regiis.“ *Comm. Cruq.* — *proiicit*] respuit, non utitur. Ceterum *Peerkampius*: „verum, inquit, igitur censet: *Telephus et Peleus, cum pauper et exsul, uterque Proiicit ampullas et sesquipedalia verba.* Atque melius distinguens ita, ut *uterque proiicit* coniungatur, quam *pauper et exsul uterque*. Praeterquam enim quod *uterque proiicit* rectius sese habet, quam *Telephus et Peleus proiicit*, adiectiva probe discernenda videntur, et *pauper* referendum est ad Telephum, *exsul* ad Pe-

lea. Telephus in fragmentis fabulae Euripideae saepe *pauper* appellatur, nunquam *exsul*.“ — *ampullas*] cf. Epist. I, 3, 14; de oratione nimis ornata. Graece *ληνοθήζειν*. — *sesquipedalia*] Crates ap. Meinek. fr. Com. II, 1. p. 241: „Ἐπὶ τριπλήρῃ Θεταλικῶς τετραμμένα.“ — *curat tetigisse*] *Horatius* l. l. p. 139: „Observasse mihi videor, Horatium perfecti temporis infinitivos cum iis potissimum verbis coniungere, quorum ea vis est, ut tota ad *futurum* tempus spectent. Ex eo genere haec sunt: Sat. II, 3, 187. I, 2, 28. Epist. I, 17, 5. A. P. 168. 435. 455.“ — *dulcia sunt*] Accedit interpretatio huius vocabuli insequentibus versibus; nam *dulcis* voc. cognatum videtur cum graeco *δύλγειν*. — *arrident*] *Aristot.* Rhetor. III, 7: „συνμοιοπαθεῖ ἑστὶ ὁ ἀκούων τῷ παθητικῶς λέγοντι.“ — *severum* voc. Severi dicuntur fere semper homines, seriae res. De re cf. Cic. de orat. III, 57, 216: „Omnis motus animi suum quandam a natura habet vultum et sonum et gestum; corpusque totum hominis et eius omnis

- Format enim natura prius nos intus ad omnem
 Fortunarum habitum; iuvat aut impellit ad iram
 110 Aut ad humum moerore gravi deducit et angit;
 Post effert animi motus interprete lingua.
 Si dicentis erunt fortunis absona dicta,
 Romani tollent equites peditesque cachinnum.
 Intererit multum divusne loquatur an heros,
 115 Maturusne senex an adhuc florente iuventa
 Fervidus, et matrona potens an sedula nutrix,
 Mercatorne vagus cultorne virentis agelli,
 Colchus an Assyrius, Thebis nutritus an Argis.
 Aut famam sequere aut sibi convenientia finge.
 120 Scriptor honoratum si forte reponis Achillem,
 Impiger, iracundus, inexorabilis, acer
 Iura neget sibi nata, nihil non arroget armis.
 Sit Medea ferox invictaque, flebilis Ino,
 Perfidus Ixion, Io vaga, tristis Orestes.
 125 Si quid inexpertum scenae committis et audes
 Personam formare novam, servetur ad imum,

vultus omnesque voces, ut nervi in fidi-
 bus, ita sonant, ut a motu animi quo-
 que sunt pulsae."

V. 113. *equites peditesque*] univer-
 sus populus, ut apud Livium I, 44.
 — *divusne*] Sic antiquissimi codices et
 Comm. Cruq., alii *Davus*, propter quem
 postea *heros* mutatus est in *herum*.
 Et recte quidem iam *Iason de Neres*:
 „Gradatim Horatius personarum divi-
 sionem in fabulis introducendarum enu-
 merat, quae ex substantia aut divinae
 sunt aut humanae. Humanae rursus
 differunt aut aetate, ut senex a iuvene,
 aut fortuna, ut a Colcho Assyrius, aut
 patria ut a Thebano Argivus.“ Deinde
Davus comicus alienus est inter reli-
 quas tragicas personas, neque facilius
 lectio facile transisset in difficiliorem.
 Et differt etiam in Graecis deorum ser-
 mo a sermone heroum; de qua re
Orellius: „Quippe illi, inquit, prae se
 ferunt nescio quid sublimioris spiritus,
 plus quam humani, vere coelestis, quip-
 pe qui summa tranquillitate atque ae-
 terna beatitudine perfruantur, dum vel
 aestuant vel mortalium aegrimoniis ma-

lisque conflictantur heroes.“ — *matrona
 potens*] ponitur contra nutricem matrona,
 quae domesticum quasi imperium te-
 net. Nec intelligendae sunt reginae,
 ut Iocasta, Phaedra, aliae. — *Thebis*]
 Contra barbaros ponuntur Graeci, ut
 Eteocles, Creon, alii Thebani et qui eo-
 rum hostes fuerunt Argivi. — *famam
 sequere*] *μῦθον* ab antiquis traditum
 neque mutabilem. — *reponis*] cf. v.
 190: iterum in scenam reducis. De
 Achille cf. Hom. II. IX, 636 sqq. XX,
 467 sqq. — *Ino*] uxor Athamantis et
 mater Learchi et Melicertae. Athamas
 ira deorum in furorem actus uxori al-
 terum filium eripuit discerpisitque; tum
 Ino cum altero in mare se praecipita-
 vit. Ovid. Met. IV, 416 sqq. — *Ixion*]
 Schol. in Apollon. III, 62: „*Ἰξίων
 γαμήσας Διὰν τὴν Ἥιονέως θυγατέ-
 ρα πολλὰ ὑπέσχετο δώσειν ἔδνα.
 Ἐλθόντος δὲ ἐπὶ ταῦτα Ἥιονέως βέ-
 ρεθρον ποιήσας καὶ πυρακτώσας σκε-
 πάζει αὐτὸ λεπτοῖς ξύλοις καὶ νόνει
 λεπτῇ· ἐμπεσὼν δὲ ὁ Ἥιονεύς ἀπόλ-
 λυται· λύσσα δὲ τῷ Ἰξίονι ἐνέπεσε
 διὰ τοῦτο.*“ — *Io*] Ovid. Met. I, 588

- Qualis ab incepto processerit, et sibi constet.
 Difficile est proprie communia dicere; tuque
 Rectius Iliacum carmen deducis in actus,
 130 Quam si proferres ignota indictaque primus.
 Publica materies privati iuris erit, si
 Non circa vilem patulumque moraberis orbem,
 Nec verbo verbum curabis reddere fidus
 Interpres, nec desilies imitator in artum,
 135 Unde pedem proferre pudor vetet aut operis lex.
 Nec sic incipies, ut scriptor cyclicus olim:
 Fortunam Priami cantabo et nobile bellum.
 Quid dignum tanto feret hic promissor hiatu?
 Parturient montes, nascetur ridiculus mus.
 140 Quanto rectius hic, qui nil molitur inepte:

sqq. — *proprie communia*] „*Proprie dicere* est ita undique describere ac finire, ut iam non commune quiddam aut generale (*Abstractes*) videatur sed individuum, in quo omnia sunt determinata.“ *Gesner*. — *deducis*] Male alii *diducis*. Vide ad Sat. II, 1, 4. — *publica materies*] Cave hanc confundas cum *communibus* v. 128; immo vero publica est materies iam saepius tractata et ita quasi publici iuris facta. In qua re curandum est poetae, ne meros locos communes proferat omnibusque aequè paratos, neve nimis premat vestigia suorum exemplorum. — *in artum*] Contrarium hoc patulo orbi. Qui vincula ita sibi iniicit, ut superiorem anxie imitetur, is neque audet (*pudor vetet*) quidquam mutare, cum suis viribus nihil ipse confidat, neque potest (*operis lex*) quidquam mutare, cum maiorem partem alieni operis susceperit, quam ut reliquam possit libere relinquere.

V. 136. *Horatius postquam de externa carminum forma disputavit, leniter declinat ad ipsam rei tractationem ac primum loquitur de exordio recte praeposendo; in qua re hoc videndum esse docet, ne maiora promittantur quam quae deinde praebentur* (v. 143), deinde ut qui legant in medias statim res rapiantur. Exemplum proponitur *Homeri*; unde vides non scenicam solum poesim spectari sed totam. Documenta

autem plurima ex illa parte ideo potissimum sumuntur, vel quia Piso huic erat deditus, vel quia haec una pars reliquis magis exulta maioriq̃ honore digna habita est, ut quae inde sumpta essent documenta et exempla efficacissima viderentur ac proxime ad omnium civium intelligentiam accedentia. Atque ibi latere videtur causa cur postea v. 153 ad scenicam poesim uberius illustrandam poeta transiverit. vv. 136—152. — *scriptor cyclicus*] Poetarum cyclicorum nomine complectebantur Alexandrini eos poetas, qui aliquot saeculis post Homerica carmina aut ea epicis carminibus descripserant quae Iliadem praecedunt, aut sua carmina ibi inceperant ubi finem habent Homerica. Ex quibus omnibus grammatici *κύκλον* confecerant, cui Homerica quoque carmina recto ordine et loco addiderant. Intelligenda igitur sunt carmina ut Aetini *Αἰθιονίης*, qua Troicum bellum describebatur usque ad certamen de Achillis armis, Stasini *Κύπρια*, quae complectebantur quaecunque acta erant a rapta Helena usque ad iram Achillis, *Ἰλιάς μικρά*, quam Lesches scripsisse dicitur, qua pugna continuabatur usque ad equum ligneum in Troiam urbem receptum, alia. — *Fortunam Priami*] Incertum est cuius carminis initium significetur. — *parturient*] Ex graeco proverbio: „*ᾠδὴν ὄρος εἶτα μὴν ἀπέτεκεν*.“ — qui

- Dic mihi, Musa, virum, captae post tempora Troiae
 Qui mores hominum multorum vidit et urbes.
 Non fumum ex fulgore, sed ex fumo dare lucem
 Cogitat, ut speciosa dehinc miracula promat,
 145 Antiphaten Scyllamque et cum Cyclope Charybdin;
 Nec reditum Diomedis ab interitu Meleagri,
 Nec gemino bellum Troianum orditur ab ovo;
 Semper ad eventum festinat et in medias res
 Non secus ac notas auditorem rapit, et quae
 150 Desperat tractata nitescere posse relinquit,
 Atque ita mentitur, sic veris falsa remiscet,
 Primo ne medium, medio ne discrepet imum.
 Tu quid ego et populus mecum desideret audi.
 Si plausoris eges aulaea manentis et usque
 155 Sessuri, donec cantor „Vos plaudite“ dicat;
 Aetatis cuiusque notandi sunt tibi mores,
 Mobilibusque decor naturis dandus et annis.

mores] Epist. I, 2, 19. — *Antiphaten*] Hom. Od. X, 100 sqq.; de Scylla et Charybdi Od. XII, 85 sqq., de Cyclope Od. IX, 187 sqq. — *Meleagri*] Dicunt scholiastae Antimachum notari, Platonis aequalem, Thebaidis poetam; et suspicantur viri docti, Antimachum finem totius actionis, i. e. reditum Diomedis in Aetoliam post Epigonorum victoriam cepisse ab interitu Meleagri. Fuit autem Meleager Oenei Calydoniae regis filius ex Althaea coniuge. Filio recens nato Althaea Parcas igni assidentes videre sibi visa est manumque stipitem tenentes aequalemque puero cum stipite vitam assignantes: quo facto mater extinctum stipitem diligenter asservavit, postea autem, cum Meleager avunculos suos occidisset, in furorem versa fatalem stipitem in ignem coniecit. Tum Meleager exustis intus intestinis consumptus est. — *gemino ovo*] „Duo ova peperisse dicitur Leda, alterum ex Iove sub specie cynci, ex quo nati sunt Pollux et Helena, alterum ex Tyndaro, ex quo Castor et Clytaemnestra.“ *Comm. Crug.* — *in medias res*] Schol. Ven. ad Iliad. I, 8: „*Ἀέρονσι δὲ καὶ ἀρετὴν ποιητικὴν εἶναι τὸ τῶν τελευταίων ἐπιλαμβάνεσθαι καὶ περὶ τῶν*

λοιπῶν ἀνέκαθεν διηγείσθαι.“ — *mentitur*] Aristot. Poet. 24: „*Ἀεδίδας δὲ μάλιστα Ὅμηρος καὶ τοὺς ἄλλους ψευδῇ λέγειν ὥς δει.*“ — *ita mentitur, sic*] „Hic *ita* et *sic* idem significant referunturque ad antecedentia, non ad *ne* quod sequitur.“ Hand. Tursell. III. p. 468. Rectius tamen utramque particulam *ita* et *sic* cum *ne* coniungas, ut apud Terent. Heaut. IV, 5, 35: „*ita* tu istaec tua misceto, *ne* me admisceas.“ — *ne medium*] vide ad Epist. I, 1, 47.

V. 152. *In scenica poesi primum agit de recte describendis ac tenendis moribus diversarum aetatum, ne veritas poetica laedatur. Diversus utique hic locus est a v. 115 sqq.; ibi de sermonis natura, hic de actionibus agitur deque diligenter describendo toto homine.* vv. 153—178. — *tu*] omnes alloquitur, quicumque poemata facere cupiunt. — *aulaea*] vide ad Epist. II, 1, 189. — *cantor*] histrio, nam ad cantum tibiarum pronunciabat. Sueton. Calig. 54: „Canendi ac saltandi voluptate *ita* efferebatur, ut ne publicis quidem spectaculis temperaret, quominus et tragoedo pronuncianti concineret.“ Quae postremo loquebatur persona, populo accla-

- Reddere qui voces iam scit puer et pede certo
 Signat humum, gestit paribus colludere et iram
 160 Colligit ac ponit temere et mutatur in horas.
 Imberbus iuvenis tandem custode remoto
 Gaudet equis canibusque et aprici gramine campi,
 Cereus in vitium flecti, monitoribus asper,
 Utilium tardus provisor, prodigus aeris,
 165 Sublimis cupidusque et amata relinquere pernix.
 Conversis studiis aetas animusque virilis
 Quaerit opes et amicitias, inservit honori,
 Commisisse cavet quod mox mutare laboret.
 Multa senem circumveniunt incommoda, vel quod
 170 Quaerit et inventis miser abstinet ac timet uti,
 Vel quod res omnes timide gelideque ministrat,
 Dilator, spe longus, iners, avidusque futuri,
 Difficilis, querulus, laudator temporis acti
 Se puero, castigator censorque minorum.
 175 Multa ferunt anni venientes commoda secum,
 Multa recedentes adimunt. Ne forte seniles
 Mandentur iuveni partes pueroque viriles;
 Semper in adiunctis aevoque morabimur aptis.

mare solebat *plaudite*. — *mobilibus naturis*] Recte Orellius: „Naturae humanae mutabiles sunt pro singulorum hominum aetate progrediente; hae igitur mutationes sensim factae et notandae et decore imitandae sunt poetae.“ Cic. ad Fam. III, 8, 8: „etsi de tua proluxa beneficaque *natura* limavit aliquid posterior annus.“ Supervacanea est Bentleyi coniectura *maturis*, tribus quidem codicibus sustentata; etenim quam quaesivit ille *ἀντιθέσιν mobilium* i. e. iuniorum et *maturorum* i. e. seniorum annorum, ea ab hoc loco qui generalem praemittit sententiam alienissima est. — *in horas*] vide ad Sat. II, 7, 10. — *imberbus*] De hac forma vide ad Epist. II, 1, 85. Cavendum est, ne cum Orellio iudicium de hac re solis auribus tribuatur; is enim propter sonum h. l. scripsit *imberbus*, altero loco *imberbes*. — *campi*] Martii, ubi corpora exercebant iuvenes. — *sublimis*] *μεγαλόψυχος*, hochfahrend. —

pernix] Arist. Rhet. II, 12 de adolescentibus: „Σφόδρα μὲν ἐπιθυμοῦσι, ταχέως δὲ παύονται.“ — *commisisse*] *ἀορίστως*. — *gelide*] Aristot. l. l.: „Κατεψυγμένοι γὰρ εἰσιν (οἱ προσβύτεροι), οἱ δὲ νέοι θερμοὶ ὥστε προωδοποίηκε τὸ γῆρας τῇ δειλίᾳ· καὶ γὰρ ὁ φόβος κατὰ ψυχὴν τις ἐστίν.“ — *spe longus*] tardus et difficilis ad sperandum. Aristot. l. l.: „οἱ προσβύτεροι δυσέλπιδες διὰ τὴν ἐμπειρίαν.“ — *avidus futuri*] Sophocles fr. 64. Dind.: „τοῦ ξῆν γὰρ οὐδεὶς ὡς ὁ γηράσκων ἐσθ’.“ Bentleyi coniectura *pavidus* facile caremus, quamquam *Peerlcampius* eam accipiendam putat. — *anni venientes*] „Anni *venire* dicuntur ad quadragimum sextum usque annum, inde *abire* iam accedente senectute.“ *Comm. Cruq.* — *seniles*] De homoeoteleuto *seniles*, *viriles* compara Eustath. ad Hom. II. XXII, 383: „ἔχει δὲ κάλλος καὶ τὰ ἐν τέλει στίχων δύο páρισσά, τὸ τοῦδε πεσόντος καὶ Ἐντο-

Aut agitur res in scenis aut acta refertur.

180 Segnius irritant animos demissa per aurem,
Quam quae sunt oculis subiecta fidelibus et quae
Ipse sibi tradit spectator: non tamen intus
Digna geri promes in scenam multaue tolles
Ex oculis, quae mox narret facundia praesens:

185 Ne pueros coram populo Medea trucidet
Aut humana palam coquat exta nefarius Atreus
Aut in avem Procne vertatur, Cadmus in anguem.
Quodcunque ostendis mihi sic, incredulus odi.
Neve minor neu sit quinto productior actu
190 Fabula, quae posci vult et spectata reponi;
Nec deus intersit, nisi dignus vindice nodus
Inciderit; nec quarta loqui persona laboret.
Actoris partes chorus officiumque virile
Defendat, neu quid medios intercinat actus,

ρος οὐκέτ' ἐόντος.“ — *morabitur*] Boni codices et Comm. Cruq. male *morabitur*. „Ordo est: semper in adiunctis et aptis aevo morabitur, ita ut puero adiuncta sit levitas, adolescenti fervor, seni maturitas.“ *Comm. Cruq.* De part. *que* vide ad Sat. II, 3, 130.

V. 179. *Verum*, inquit, *non sufficit mores et aetates recte descripsisse; accedat oportet recta scientia earum rerum, quas fabulae in scena actio postulat, ne quid coram populo agatur quod rectius amovetur ab oculis hominum* (v. 188), *ne iusto maior minorve sit fabula* (v. 190), *ne res ipsae male inter se implicentur et explicentur neve personae addantur vel supervacaneae vel etiam spectatorum animos dividentes* (v. 192), *ne chorus prave adhibeatur* (v. 201), *denique ne quid male de re musica sentiatur*. vv. 179—219. — *segnius*] cf. Herod. I, 8: „ὅτα γὰρ τυγχάνει ἀνθρώποισι ἐόντα ἀπιστότερα ὀφθαλμῶν.“ Senec. epist. 6, 4: „homines amplius oculis quam auribus credunt.“ — *intus digna geri*] Intelliguntur omnia foeda et atrocia, quae horrore afficiunt spectatores, et omnia incredibilia, quae cum oculis conspiciuntur risum movent, veluti transformationes hominum in bestias aliasque naturas. Utriusque rei exempla addun-

tur. — *quinto actu*] „In quinos actus post grammaticos Alexandrinos Romani dividebant fabulas; contra veteres Graeci in *πρόλογον*, *ἐπεισόδια* (*τρία*) et *ἐξοδον*, ita ut reapse divisio ad idem rediret.“ *Orellius*. — *nec deus*] Plat. Cratyl. p. 425. E.: „Ὡς περ οἱ τραγωδοποιοὶ ἐπειδὴν τι ἀπορῶσιν, ἐπὶ τὰς μηχανὰς ἀποφενύγουσι θεὸν αἰρωντες.“ Cic. Nat. D. I, 20: „ut tragici poetae, cum explicare argumenti exitum non potestis, confugitis ad deum.“ Inde proverbium illud: *deus ex machina*. — *quarta persona*] „Quarta personae cum inducitur, debet aut omnino non loqui vel admodum pauca: inducitur enim aut ut annuat aut ut aliquid ei imperetur.“ *Comm. Cruq.* Polux 2, 110: „Εἰ δὲ τέταρτος ὑποκριτὴς τι παρεφθέγγετο, τοῦτο παραχορήγημα ἐκαλεῖτο.“ — *chorus*] *Lambinus*: „chorus tutetur et agat partes actoris, i. e. chorus habeatur unius actoris loco, unius munere fungatur et officium virile obeat i. e. unius personae locum obtineat.“ Aristot. Poet. 18: „Καὶ τὸν χορὸν δὲ ἓνα δεῖ ὑπολαβεῖν τῶν ὑποκριτῶν καὶ μῦθον εἶναι τοῦ ὅλου.“ Ceterum in omnibus codd. Cruquii legebatur *actoris*, non *auctoris*, quod non pauci alii codd. praebent. — *defendat*] ut Sat. I, 10,

- 195 Quod non proposito conducat et haereat apte.
 Ille bonis faveatque et consilietur amice,
 Et regat iratos et amet peccare timentes;
 Ille dapes laudet mensae brevis, ille salubrem
 Iustitiam legesque et apertis otia portis;
 200 Ille tegat commissa deosque precetur et oret,
 Ut redeat miseris, abeat fortuna superbis.
 Tibia non, ut nunc, orichalco vincta tubaeque
 Aemula sed tenuis simplexque foramine paucō
 Adspirare et adesse choris erat utilis atque
 205 Nondum spissa nimis complere sedilia flatu;
 Quo sane populus numerabilis utpote parvus
 Et frugi castusque verecundusque coibat.
 Postquam coepit agros extendere victor et urbes
 Latior amplecti murus vinoque diurno
 210 Placari Genius festis impune diebus,
 Accessit numerisque modisque licentia maior.
 Indoctus quid enim saperet liberque laborum

12. — *consilietur*] consilium det; aliter Carm. III, 3, 17. — *peccare timentes*] Sic omnes prope codices, Acro, Comm. Cruq., qui interpretantur *innocentes*; et recte, nam qui *timent peccare*, nolunt peccare amore virtutis, ii boni sunt et innocentes. Quare non est cur cum Bentleio ex vestigiis trium codicum scribamus *pacare tumentes*, quod idem prope est quod *iratos regere*. — *apertis portis*] Carm. III, 5, 23. — *tibia*] „Tibia enim ante non erat ita ornata neque tam multis foraminibus tubae aemula. Modo vero et ornata est et tam multa habet foramina, ut sonet quemadmodum tuba. Ostendit luxuriam recentem et ambitionem natam esse, antiquitatem vero severam fuisse; nam prius tibia non erat ambitiosa nec multis distincta foraminibus. Varro ait ad Marcellum de lingua latina, quattuor foraminum fuisse tibias apud antiquos, et se ipsum in templo Marsyae vidisse tibias quattuor foraminum. Quare quaterna foramina antiquae tibiae habuerunt. Alii dicunt non plus quam tria.“ Acro. Plutarch. de music. 30: „ἀλλὰ γὰρ καὶ ἀύλη-

τικὴ ἀπὸ ἀπλουστέρας εἰς ποικιλωτέραν μεταβέβηκε μουσικὴν.“ — *vincta*] Sic optimi codd., in iisque Blandinius antiquissimus alique Cruquii; quattuor tamen Cruquii habent *iuncta*, quos secutus est Bentleius. — *spissa sedilia*] cf. epist. I, 19, 41. infra 381. *numerabilis*] „Apud neminem ante Horatium hoc vocabulum nunc reperitur. Post Horatium Ovidius Met. V, 588.“ Orellius. — *urbes*] Sic prope omnes, ut videtur, MSS.; unus Pottierii habet *urbem*, quod olim receperam. „Horatius in tota hac disputatione magis cogitat Graecos quam Romanos.“ Peerlkamp. — *vino diurno*] convivii tempestivis. — *placari*] vide ad Carm. I, 36, 2. — *indoctus quid enim*] „Hos versus neque eiciendos (cum Paldamo) neque transponendos (post v. 224 cum Eugelio) esse facile perspicitur, dummodo ad ea quorum causam indicant referantur. Sunt igitur cum decem qui praecedunt versibus coniungendi; ostendunt enim cur musica scenica non prius a prisca illa simplicitate desciverit quam quo tempore populus, quippe magnis victoriis potens, mollis et

- Rusticus urbano confusus, turpis honesto?
 Sic praeae motumque et luxuriam addidit arti
 215 Tibicen traxitque vagus per pulpita vestem;
 Sic etiam fidibus voces crevere severis
 Et tulit eloquium insolitum facundia praeceps,
 Utiliumque sagax rerum et divina futuri
 Sortilegis non discrepuit sententia Delphis.
 220 Carmine qui tragico vilem certavit ob hircum,
 Mox etiam agrestes Satyros nudavit et asper
 Incolumi gravitate iocum tentavit eo, quod
 Illecebris erat et grata novitate morandus
 Spectator functusque sacris et potus et exlex.
 225 Verum ita risores, ita commendare dicaces
 Conveniet Satyros, ita vertere seria ludo,
 Ne quicumque deus, quicumque adhibebitur heros,
 Regali conspectus in auro nuper et ostro,

luxuriosus factus, dies noctesque convivii et computationibus benigne se tractare coepisset.“ *Hilgers* de Q. H. F. epist. ad Pis. p. 39. — *liber laborum*] cf. Carm. III, 17, 16. Sat. II, 2, 119. Epist. II, 1, 140. De genitivo compara Lucan. VI, 300: „libera legum Roma.“ Sil. Ital. V, 212: „erecto metuendi libera (iuventus) coelo.“ — *turpis honesto*] infimae sortis homines cum nobilioribus. cfr. Carm. II, 4, 17. 20. Sat. I, 6, 69. Epist. II, 1, 149. — *vestem*] Epist. II, 1, 205; syrna tragicum. — *fidibus*] „Sic, eadem necessitate, *fidibus* prius *severis* et habentibus gravem sonum *crevere* voces propter gravitatem, quia semitonium est inventum, ut acutae voces gravibus consonarent.“ *Schol. cod. Monac.* De voc. *severis* cf. Carm. II, 1, 9. — *eloquium*] „Pari modo fidicen quoque praeae severitate relicta severos lyrae sonos auxit atque poeta, ut liberiores musicae numeros sequeretur, chori orationem, quae antea simplex et modesta fuit, tantopere immutavit, ut iam praecipiti, inflato et obscuro dicendi genere usus sapientes et fatidicas proferret sententias, quae ab obscuris Apollinis Delphici oraculis non multum differebant.“ *Hilgers* l. 1.

V. 220. *Cum Romani poetae nihil*
 Horatius ed. Dillenburger ed. III.

intentatum relinquerent (cf. v. 285), probabile est non defuisse tunc qui satyricum quoque drama Romam transferre conarentur, quamquam Orellii opinio paulo audacior videtur „hoc ipsum genus fuisse, in quo elaborare sibi proposuerit maior Pisonum, eum se fore sperans, qui patrias litteras ditaret novaeque gloria afficeret.“ In satyrico autem dramate id maxime curandum esse docet, ut rectum illud ordinem et locum obtineat inter tragoediam et comoediam, h. e. cavendum, ne oratio rerumque descriptio ad altiorem tragoediam adscendat aut ad demissionem comoediam depri-matur. Praeterea artificis esse in hoc quoque genere notissimas res singulari eximiaque ratione tractare. vv. 220—250. — *ob hircum*] graece τράγος, unde τραγῳδία. — *nudavit*] nudos induxit in scenam, i. e. invenit. — *incolumi gravitate*] deorum et heroum, qui una cum Satyris inducebantur. — *spectator*] „qui spectator veniebat post sacrificia, iam pransus, iam potatus.“ *Acro.* — *dicaces*] Quintil. VI, 3, 21: „Dicacitas sine dubio a dicendo, quod est omni generi commune, ducta est: proprie tamen significat sermonem cum risu aliquos incessentem.“ — *seria ludo*] tragoediae immiscere satyricum genus i. e. μῦθους tragicis affines.

- Migret in obscuras humili sermone tabernas,
 230 Aut, dum vitat humum, nubes et inania captet.
 Effutire leves indigna tragoedia versus,
 Ut festis matrona moveri iussa diebus,
 Intererit Satyris paulum pudibunda protervis.
 Non ego inornata et dominantia nomina solum
 235 Verbaque, Pisones, Satyrorum scriptor amabo,
 Nec sic enitar tragico differre colori,
 Ut nihil intersit, Davusne loquatur et audax
 Pythias emuncto lucrata Simone talentum,
 An custos famulusque dei Silenus alumni.
 240 Ex noto fictum carmen sequar, ut sibi quivis
 Speret idem, sudet multum frustraue laboret
 Ausus idem: tantum series iuncturaque pollet,
 Tantum de medio sumptis accedit honoris.
 Silvius deducti caveant me iudice Fauni,
 245 Ne velut innati triviis ac paene forenses

— *nuper*] „pro notione h. v. interpretandum est: iidem dii atque heroës, qui in tragoediis saepe conspecti, notissimi nobis sunt.“ *Orellius*. — *leves versus*] quales comoediam decēt. — *matrona*] „Sunt enim quaedam sacra, in quibus saltant matronae, sicut in sacris matris deorum.“ *Acro*. — *dominantia*] „nomina quae propriis vocabulis nuncupantur, ut *libri*, *capsa*, *pagina*.“ *Porph*. Sunt *νότια*, eigentliche Benennungen. *Cic*. de orat. III, 37, 149: „propria sunt et certa quasi vocabula rerum paene una nata cum rebus ipsis.“ — *Pythias*] „persona comica in comoedia Lucilii (*Orellius* coniecit: *Caecili*), quae inducitur per astutias accipere argentum a Simone domino suo in dotem suae filiae.“ *Comm. Cruq*. — *et audax* legebatur in antiquissimo cod. Blandinio et altero Crnquii, non *an audax*, quae permul-torum codicum lectio est. — *emuncto*] Terent. Phorm. IV, 4, 1: „Emunxi argento senes;“ *ἀπομόσσειν*, de quo vide Passow. lex. s. v. — *custos*] *Diod. Sic.* IV, 4: *οἱ δὲ καὶ παιδαγωγὸν καὶ τροφίαν συνέπεισθαι κατὰ τὰς στρατείας Διονύσω Σειληνόν*. — *ex noto*] Sententia est: tam noto

ac solito dicendi genere utar, ut quivis idem se posse speret, verumtamen, si periculum faciat, multum laborem frustra impendat: tantum valet series et iunctura (cf. v. 48) verborum, quae vulgaris etiam sermonis potestas et honor magnopere augeri potest. Et bene *Wielandius*: „Diese Stelle ist sehr merkwürdig. Sie enthält eins von den grossen Mysterien der Kunst, welche Horatius ganz zuversichtlich ausschwatzen durfte, ohne Furcht, dass er den *ἀμνηστόις* etwas verrathen habe.“ — *ausus idem*] Consulto haec verba in initio versus posita sunt, ut quasi certent cum primis verbis praecedentis versus. — *deducti*] in scenam. Fauni h. l. iidem sunt qui Satyri. — *innati triviis*] Fauni, inquit, silvestres sunt, quare non licet iis urbanum sermonem imitari et sibi arrogare, ne aut cum elegantibus iuvenibus nimiam affectent teneritatem ac molliem quandam dicendi aut cum corruptis hominibus immunda crepent. *Innati triviis* sunt urbani homines, sed cum aliquo contemptu dictum est; neque vero omnes qui sunt in urbe nati forenses sunt, nam *forenses* sunt qui in foro versari et causas agere consueverunt

- Aut nimium teneris iuvenentur versibus unquam
 Aut immunda crepent ignominiosaque dicta:
 Offenduntur enim quibus est equus et pater et res,
 Nec si quid fricti ciceris probat et nucis emptor,
 250 Aequis accipiunt animis donantve corona.
 Syllaba longa brevi subiecta vocatur iambus,
 Pes citus; unde etiam trimetris accrescere iussit
 Nomen iambeis, cum senos redderet ictus,
 Primus ad extremum similis sibi: non ita pridem,
 255 Tardior ut paulo graviorque veniret ad aures,
 Spondeos stabiles in iura paterna recepit
 Commodus et patiens, non ut de sede secunda
 Cederet aut quarta socialiter. Hic et in Atti
 Nobilibus trimetris apparet rarus et Enni
 260 In scenam missos cum magno pondere versus
 Aut operae celeris nimium curaque carentis
 Aut ignoratae premit artis crimine turpi.

ideoque urbanam rationem dicendi diligenter observarunt. — *iuvenentur*] *ἄπαξ λεγόμενον* formatum ad Graecum *νεανιεύεσθαι*. — *equus*] Inducantur equites, ingenui, locupletes, omnes omnino qui aliquid sentiunt in hac re. — *ciceris*] *δῆμος κναμπεύω* apud Aristoph. Equit. 41. cf. Sat. II, 3, 182. Ceterum omnes codd. Cruq. habebant *fricti*, non *fracti*, quod, etiamsi in optimis Orellii codd. est, ferri nequit. —

V. 250. *In fabulis scribendis magna cura navanda est etiam rei metricae; quare agit poeta de trimetro, dum leges eius ostendit negligentiamque veterum poetarum latinorum notat. Tum commendat graeca exemplaria, Graeciaeque omnem laudem inventi dramatici generis vindicat, simul tamen confitetur latinos poetas laudanda aemulatione nihil intentatum reliquisse ac praecipue eam rem bene instituisse, quod res ex patria historia petitas poetica sua facultate exornarent.* vv. 250—288. — *accrescere iussit*] „Iambus citus voluit versum sex pedibus trimetrum vocari; non enim unus pes iambus metrum fecit ut alii pedes, sed duo propter volubilitatem.“ *Comm. Cruq.* — *iambeis*] graeca forma pro

latina *iambicis* versui minus commoda. Nunc vocabulum est *ἄπαξ λεγόμενον*. cf. Carm. II, 6, 5. *Argeo.* — *non ita pridem*] de infinito aliquo tempore ut *nuper*. cf. Sat. II, 2, 46. Cic. Brut. 10 med.: „Themistocles fuit regnante iam Graecia, nostra autem civitate *non ita pridem* dominatu regio liberata.“ — *socialiter*] *ἄπαξ λεγόμενον*. Est idem quod *commode*, ut socii faciunt, qui alter alteri interdum aliquid de suo iure remittunt. — *Hic*] non est adverbium, quo Roma contra Graeciam poneretur, sed est subiectum verbi *apparet*: hic iambus raro reperitur in versibus Attii et Ennii ne in secunda quidem et quarta sede; illi enim satis fecisse sibi videbantur, si sexta sedes iambum haberet. — *missos*] „Nota huius versus quinque spondeos, quibus egregie imitatur Ennii senarios propter huius ipsius pedis frequentiam nimis graves ac tardos.“ *Orellius.* — *premit crimine*] Pergit poeta in *πρὸς ὠποποιίᾳ*, nam *iambus* e suis sedibus eiectus quasi accusator surgit turpique crimine nimiae festinationis aut inscitiae versus premit i. e. accusat. cf. Liv. III, 13, 1: „*Premebat* reum praeter vulgatam invidiam *crimen*

- Non quivis videt immodulata poëmata iudex,
 Et data Romanis venia est indigna poëtis.
- 265 Idcircone vager scribamque licenter? an omnes
 Visuiros peccata putem mea tutus et intra
 Spem veniae cautus? vitavi denique culpam,
 Non laudem merui. Vos exemplaria Graeca
 Nocturna versate manu, versate diurna.
- 270 At vestri proavi Plautinos et numeros et
 Laudavere sales, nimium patienter utrumque,
 Ne dicam stulte, mirati, si modo ego et vos
 Scimus inurbanum lepido seponere dicto
 Legitimumque sonum digitis callemus et aure.
- 275 Ignotum tragicae genus invenisse Camenae
 Dicitur et plaustris vexisse poëmata Thespis,
 Quae canerent agerentque peruncti faecibus ora.
 Post hunc personae pallaeque repertor honestae
 Aeschylus et modicis instravit pulpita tignis,
- 280 Et docuit magnumque loqui nitique cothurno.

unum. — *videt*] vide ad Sat. II, 1, 15. — *idcircone*] Num inscitia populi et licentia poetis apud nos concessa fretus nullaque lege obstrictus malos versus faciam? an meliore iudicio usus, omnes cum putem mea vitia visuiros, id efficere studeam, ut tutus sim a crimine et ea tantum admittam quae veniam habitura videantur? Hoc alterum rectius quidem est, sed altius enitendum est poetis, scilicet ut imitentur exemplaria graeca, quae his quoque rebus summam curam navarunt. Nam qui crimen vitat, is culpam solum vitavit; contra qui perfectissima quaerit et invenit, is laudem meruit. — *At vestri*] Sic omnes codd. paucis exceptis, in quibus est *nostri*, quod ex imprudenti correctura ortum est. Alloquitur autem Horatius non Pisones solum sed omnes etiam Romanos, quos sperabat haec lecturos esse. — *Plautinos*] cf. Epist. II, 1, 170. — *digitis*] Terentian. 2253: „moram, Quam pollicis sonore vel plausu pedis Discriminare, qui docent artem, solent.“ Quintilian. IX, 4, 51: „tempora etiam animo metiuntur, et pedum et digitorum ictu intervalla signant.“ — *The-*

spis] vide ad Epist. II, 1, 163. Sed de hoc loco: „in his omnibus, inquit *Orellius*, videtur sequi grammatici vel historici alicuius Graeci opinionem, nisi ipse tragoediae et comoediae primordia confudit; “ et de plaustris: „error hic ortus videtur ex confusione cum iis quae τὰ ἐκ τῶν ἀμαξῶν vocabant. Suidas: τὰ ἐκ τῶν ἀμαξῶν ἐπὶ τῶν ἀπαρκαλύπτως σκωπτόντων. Ἀθήνησι γὰρ ἐν τῇ τῶν Χοῶν ἑορτῇ οἱ κωμάζοντες ἐπὶ τῶν ἀμαξῶν τοὺς ἀπαντῶντας ἐσκωπτόν τε καὶ ἐλοιδοροῦν. τὸ δ’ αὐτὸ καὶ τοῖς Ἀθηναίοις ὕστερον ἐποιοῦν. Certe antiquissimum scenae genus erat non plaustrum, sed ἑλεός, τραπέζα ἀρχαία, ἐφ’ ἣν πρὸ Θεσπιδος εἰς τις ἀναβὰς τοῖς χορευταῖς ἀπεκρίνατο. Pollux. IV, 123.“ — *faecibus*] „ne cognoscerentur; nondum enim usus erat personarum.“ Schol. Fortasse fiebat etiam ioci causa, nam plaustra et ora faecibus uncta non tragoediae sunt, sed comoediae. — *personae*] Alii personam a Thespide inventam tradiderunt. — *honestae*] Coniungendum hoc adiectivum est cum *pallae* non cum *personae*; haec enim

Successit vetus his comoedia non sine multa
Laude, sed in vitium libertas excidit et vim
Dignam lege regi: lex est accepta chorusque
Turpiter obticuit sublato iure nocendi.

285 Nil intentatum nostri liquere poëtae,

Nec minimum meruere decus, vestigia Graeca
Ausi deserere et celebrare domestica facta,
Vel qui praetextas vel qui docuere togatas.
Nec virtute foret clarisve potentius armis

290 Quam lingua Latium, si non offenderet unum-

Quemque poëtarum limae labor et mora. Vos, o
Pompilius sanguis, carmen reprehendite, quod non
Multa dies et multa litura coërcuit atque
Perfectum decies non castigavit ad unguem.

295 Ingenium misera quia fortunatius arte

Credit et excludit sanos Helicone poëtas

Democritus, bona pars non unguis ponere curat,

inhonesta non fuerat. — *vetus comoedia*] vide ad Sat. I, 4, 1. — *in vitium*] libertas, παρρησία, decedit in licentiam et petulantiam. — *lex*] Suidas v. Ἀντίμαχος: Ἐδόκει οὗτος ψήφισμα πεποιημέναι, μὴ δεῖν κωμωδεῖν ἐξ ὀνόματος. Eiusmodi ψηφίσματα lata dicuntur intra annos 417—404; et iam inter Olymp. 85, 1—4 Cratini fabula Ὀδυσσεὺς sine choro et παραβάσειν edita fertur. — *praetextas*] tragoedias Romanas et Romani argumenti, dictas a praetexta toga, qua induti nobiles viri in iis agebant; opponuntur *crepidatis*, graeci argumenti. Solito tamen nomine illae solebant nominari *praetextatae*. — *togatas*] comoedias Romani argumenti; opponuntur palliatis, graeci argumenti.

V. 289. *Sed deerat Latinis emendatio et expolitio (lima) et elaborationis constantia; quare in arte poetica Latium superatum est a Graecia. Verum expolitioe ulique opus est, cum ingenii virtus arte relicta summa praestare non possit. De qua re cum quae vulgo creduntur falsissima sint, Horatius contempta dehinc poetica laude colem se futurum pollicetur, quae ferunt acuat ad secundum, ipsa non se-*

cet, h. e. docturum se esse quibus rebus maxime opus sit poetis latinis. vv. 289—308. — *unum-quemque*] vide ad Sat. I, 2, 62. — *Pompilius sanguis*] cf. Sat. II, 2, 107. Pers. 1, 61: „Vos, o patricius sanguis.“ Hermann. ad Eurip. Androm. p. XV: „Mihique nominativus, quem pro vocativo positum volunt, non vocantis, sed declarantis esse videtur.“ Plutarch. Num. 21 *Pomponios* dicit, *Pinarios, Calpurnios, Mamercios* ortos esse a quattuor filiis Numae, quorum nomina fuerint Pompo, Pinus, Calpus, Mamercus. — *castigavit*] Metaphora sumpta est ab arboribus, quarum rami supervacanei amputantur. Similiter Graeci κολάζειν. — *perfectum*] ita ut perfectum sit. — *ad unguem*] vide ad Sat. I, 5, 32. — *Democritus*] vide ad Epist. I, 12, 12. Cicero de divin. I, 37: „Negat enim sine furore Democritus quemquam poetam magnum esse posse; quod idem dicit Plato.“ Id. de Orat. II, 46, 194: „Saepe audiui poetam bonum neminem — id quod a Democrito et Platone in scriptis relictum esse dicunt — sine inflammatione animorum existere posse et sine quodam afflatu quasi furoris.“ Scripsit Democritus περὶ ποιη-

- Non barbam, secreta petit loca, balnea vitat.
 Nanciscetur enim pretium nomenque poëtae,
 300 Si tribus Anticyris caput insanabile nunquam
 Tonsori Licino commiserit. O ego laevus,
 Qui purgor pilem sub verni temporis horam!
 Non alius faceret meliora poëmata: verum
 Nil tanti est. Ergo fungar vice cotis, acutum
 305 Reddere quae ferrum valet exsors ipsa secandi;
 Munus et officium nil scribens ipse docebo,
 Unde parentur opes, quid alat formetque poëtam,
 Quid deceat, quid non, quo virtus, quo ferat error.
 Scribendi recte sapere est et principium et fons:
 310 Rem tibi Socraticae poterunt ostendere chartae,
 Verbaque provisam rem non invita sequentur.
 Qui didicit patriae quid debeat et quid amicis,
 Quo sit amore parens, quo frater amandus et hospes,
 Quod sit conscripti, quod iudicis officium, quae
 315 Partes in bellum missi ducis, ille profecto
 Reddere personae scit convenientia cuique.
 Respicere exemplar vitae morumque iubebo
 Doctum imitatorem et vivas hinc ducere voces.

σεως et περί Ομήρου. — bona pars] Carm. IV, 2; 46. Sat. I, 1, 61. — Anticyris] vide ad Sat. II, 3, 83. — Licino] „Nomen tonsoris famati, qui postea dicitur factus senator a Caesare, quod odisset Pompeium; de quo hoc scriptum est epitaphium: *Marmoreo tumulo Licinus iacet, at Cato nullo Pompeius parvo: quis putet esse deos?* Comm. Crug. Sed recte iudicarunt, qui Licinum hunc Horatianum diversum putant ab eo, qui Augusti gratia fruebatur. Huic enim ita illudere non poterat Horatius. — laevus] Virg. Aen. II, 54. — purgor pilem] In bile quae rebant causam μελαγχολίας, insaniae. Veratrum autem ad sanandam insaniam Celso auctore optime vere, non hieme neque aestate, datur. — nil tanti] „Nihil tanti aestimo, nulla prorsus mihi causa est, cur magnus poeta ad illorum scilicet modulum fieri cupiam. Ergo quoniam hoc mihi ne-

gatum est, criticum saltem agam.“ Orellius.

V. 309. *Tantum abest ut insaniam et furor efficiat bonum poetam, ut ad recte inveniendas res maxime necessaria sit sapientia. Exploranda poetae est tota vita humana, cognoscendi sunt mores, ne versus componat verbis canoros, sententiis inanes. Inde nata Graecis est poesis, inde negata est Romanis, quorum pueritia non ad sapientiam sed ad avaritiam et lucri cupiditatem instituitur.* vv. 309—332. — *Socraticae chartae*] libri Socraticorum, Platonis, Xenophonis, Aeschinis. „Strenue autem Horatius ipse hoc suum exsequabatur praeceptum. Cfr. Sat. II, 3, 11.“ Orellius. — *sequentur*] Cic. de orat. III, 50: „tantum Antipatri Sidonii valuit exercitatio, ut, cum se mente ac voluntate coniecisset in versum, verba sequerentur.“ — *conscripti*] „senatoris; ex formula *patres conscripti* uno fortasse

- Interdum speciosa locis morataque recte
 320 Fabula nullius veneris, sine pondere et arte,
 Valdius oblectat populum meliusque moratur,
 Quam versus inopes rerum nugaeque canorae.
 Graiis ingenium, Graiis dedit ore rotundo
 Musa loqui, praeter laudem nullius avaris.
- 325 Romani pueri longis rationibus assem
 Dicunt in partes centum diducere. Dicat
 Filius Albini: Si de quincunce remota est
 Uncia, quid superat? Poteras dixisse. Triens. Eu!
 Rem poteris servare tuam. Redit uncia, quid fit?
- 330 Semis. At haec animos aerugo et cura peculi
 Cum semel imbuerit, speramus carmina fingi
 Posse linenda cedro et levi servanda cupresso?
 Aut prodesse volunt aut delectare poëtae,
 Aut simul et iucunda et idonea dicere vitae.
- 335 Quidquid praecipies, esto brevis, ut cito dicta
 Percipiant animi dociles teneantque fideles:

hoc loco reperitur. "*Orellius*. — *vivas voces*] ex natura hominum sumptas ad vitamque accommodatas. — *speciosa locis*] sententiis gravibus moribusque recte descriptis eximia. — *nullius veneris*] ceterum destituta lepore ac venustate. — *nugaeque canorae*] cf. Cic. de Orat. I, 12: „Quid vel autem tam furiosum quam verborum vel optimorum atque ornatissimorum sonitus inanis nulla subiecta sententia?“ ibid. II, 17: „sententiarum gravitate, *ponderibus* verborum est utendum.“ cf. Epist. II, 2, 76. — *Graiis*] cf. Epist. II, 1, 93 sqq. — *ore rotundo*] „turgido, tumido, ornato, polito, erudito, perfecto.“ *Comm. Crug.* vide Passow. lex. gr. s. v. *στρογγύλος*. Cic. Brut. 78, 272: „erat verborum et delectus elegans et apta et quasi *rotunda* constructio.“ — *praeter laudem*] Xenoph. Mem. III, 3, 13: „*Ἀλλὰ μὲν οὐτὲ ἐν-φωνία τοσοῦτον διαφέρουσιν Ἀθηναῖοι τῶν ἄλλων οὐτὲ σώματων με-γέθει καὶ ῥώμῃ ὅσον φιλοτιμία, ἢ περ μάλις παροξύνει πρὸς τὰ καλὰ καὶ ἔντιμα*.“ — *Albini*] nomen feneratoris cuiusdam avari, cuius sane

filius maxime aptus est qui a magistro — nam in ludum litterarium h. l. ducimur — de re nummaria interrogatur. — *poteras dixisse*] Magistri sunt puerum non reprehendentis sed leniter excitantis et ipsa laude ad cogitandum stimulantis. Sic melius quam quod aliis placuit ex MSS. *poterat*. *Horkelius* ex coniectura *poteris*, *Schneidevinus*: *properat*. — *redit*] Si ad quincuncem additur uncia, fit semis, i. e. dimidia pars assis sive sex unciae. — *peculi*] de pecunia, quam sua sibi quis cura et parsimonia paravit. cf. Virg. Buc. 1, 32, ubi proprie positum est vocabulum de servo. — *cedro*] oleo cedrino, de quo *Porphyrus*: „libri qui aut cedro illinuntur aut arca cupressi inclusi sunt, a tineis non vexantur.“

V. 333—346. *Alterum ex iis praeceptis quae propositurum se versu 307 sq. indicavit, hoc est: poetam qui omnibus velit probari docere simul debere et delectare legentes, miscendam esse utilitatem carminum cum dulcedine.* — *esto brevis*] Summa haec virtus eorum carminum, quibus prodesse volunt poetae. — *cito*] coniungere cum *perci-*

- Omne supervacuum pleno de pectore manat.
 Ficta voluptatis causa sint proxima veris,
 Nec quodcunque volet, poscat sibi fabula credi,
 340 Neu pransae Lamiae vivum puerum extrahat alvo.
 Centuriae seniorum agitant expertia frugis,
 Celsi praetereunt austera poëmata Ramnes:
 Omne tulit punctum, qui miscuit utile dulci
 Lectorem delectando pariterque monendo.
 345 Hic meret aera liber Sosiis, hic et mare transit,
 Et longum noto scriptori prorogat aevum.
 Sunt delicta tamen, quibus ignovisse velimus:
 Nam neque chorda sonum reddit quem vult manus et mens,
 Poscentique gravem persaepe remittit acutum;
 350 Nec semper feriet quodcunque minabitur arcus.
 Verum ubi plura nitent in carmine, non ego paucis
 Offendar maculis, quas aut incuria fudit
 Aut humana parum cavit natura. Quid ergo est?
 Ut scriptor si peccat idem librarius usque,
 355 Quamvis est monitus, venia caret; ut citharoedus
 Ridetur, chorda qui semper oberrat eadem:
 Sic mihi, qui multum cessat, fit Choerilus ille,

piant. — *supervacuum*] quodcunque nimis amplum ac latum est, animo non recipitur, sed elabitur. — *ficta*] Haec alteri poetarum parti dicuntur, qui delectare volunt. — *pransae Lamiae*] „Lamia est monstrum superne habens speciem mulieris, inferne vero desinit in pedes asininos.“ *Comm. Cruq.* Dicebantur hae pueros devorare vel eorum sanguinem exsugere. — *Ramnes*] „Sensus est: senes gravitate carminis et dictionis pondere delectantur, iuvenes austera et gravia non amant.“ *Acro.* *Celsi Ramnes* iuniores sunt equites, superbi, nobilitate generis elati, fastidiosi. *cf.* Liv. VII, 6: „*celsi* et spe haud dubia feroces in proelium vadunt.“ Cic. de orat. I, 40, 184: „iura suae civitatis ignorantem erectum et *celsum* alacri et prompto ore atque vultu huc atque illuc intuentem vagari . . . toto foro . . . nonne imprimis flagitiosum putandum est.“

Compāra Liv. I, 13. — *punctum*] vide ad Epist. II, 2, 99.

V. 347. *In tali igitur carmine parvis vitiis venia danda est, dummodo poeta caveat a nimia eorum frequentia. Mediocria enim carmina non feruntur, quia necessaria non sunt hominesque eas res, quibus sine detrimento carere possunt, non amant nisi quam perfectissimas;* vv. 347 — 384. — *Sosiis*] *cf.* Epist. I, 20, 2. — *mare transit*] vide ad Epist. I, 20, 13. — *nam neque*] Duo adduntur exempla vitiorum, quae cum non committantur pravitate consilii, veniam debeant impetrare. — *fudit*] accommodatum verbum ad maculas, ut continuetur metaphora. *cf.* Sat. I, 6, 66 sqq. — *scriptor librarius*] servus qui libros describit. — *peccat idem*] Cic. N. D. I, 12: „Xenophon eadem fere peccat;“ vulgo: in eodem peccat. — *cessat*] *cf.* Epist. II, 2, 14. — *Choerilus*] vide ad Epist. II, 1, 232.

Quem bis terve bonum cum risu miror: et idem
Indignor quandoque bonus dormitat Homerus.

360 Verum operi longo fas est obrepere somnum.

Ut pictura, poësis: erit quae, si propius stes,
Te capiat magis, et quaedam, si longius abstes:
Haec amat obscurum; volet haec sub luce videri,
Iudicis argutum quae non formidat acumen;

365 Haec placuit semel, haec decies repetita placebit.

O maior iuvenum, quamvis et voce paterna
Fingeris ad rectum et per te sapis, hoc tibi dictum
Tolle memor: certis medium et tolerabile rebus
Recte concedi. Consultus iuris et actor

370 Causarum mediocris abest virtute disertis

Messallae, nec scit quantum Cascellius Aulus;
Sed tamen in pretio est. Mediocribus esse poëtis
Non homines, non di, non concessere columnae.
Ut gratas inter mensas symphonia discors

375 Et crassum unguentum et Sardo cum melle papaver

Offendunt, poterat duci quia coena sine istis;
Sic animis natum inventumque poëma iuvandis,
Si paulum summo decessit, vergit ad imum.

— *dormitat Homerus*] Quaesiverunt interpretes, quodnam Homeri vitium Horatius reprehendere videatur. Tu autem noli quaerere, sed vide mecum Homerum propositum tanquam exemplar perfecti poetae, qui merito veniam accipiat, si interdum somno aliquo obripiatur. Quintil. X, 1, 24: „Neque id statim legenti persuasum sit, omnia quae magni auctores dixerint, utique esse perfecta. Nam et labuntur aliquando et oneri cedunt et indulgent ingeniorum suorum voluptati; nec semper intendunt animum et nonnunquam fatigantur, cum Ciceroni *dormitare* interim Demosthenes, Horatio vero etiam Homerus ipse videatur.“ — *pictura*] cf. Cic. Tusc. V, 39, 114. Plutarch. de glor. Athen. p. 346. F.: „Ο Σιμωνίδης τὴν μὲν ζωγραφίαν ποιήσιν σιωπῶσαν προσηγόρευεν, τὴν δὲ ποιήσιν ζωγραφίαν λαλοῦσαν; quamquam recte notatum est, in eo simili-

busque locis internam quasi naturam carminum et tabularum spectari, Horatium vero de externa utriusque artis similitudine loqui et docere, diversa utriusque artis opera diverso etiam modo diiudicari oportere. — *abstes*] ἀπαξ λεγόμενον: inde corruptelae *adstes*, *absis*, *aptēs*. — *tolle*] mente recipe. cf. Virg. Aen. VI, 377 et compara Sat. II, 6, 42. — *consultus iuris*] Mediocres toleramus eas tantum artes quibus aegre caremus; sic in minoris momenti litibus etiam mediocris patronus voluntati nostrae satisfacit; longe aliter sese habet ars poetica. — *Messallae*] M. Valerius Messalla Corvinus, homo disertissimus. *Cascellius Aulus*, vir iuris civilis scientia et facetiis clarus, infestissimus triumvir a. u. c. 712. — *columnae*] vide ad Sat. I, 4, 71. — *Sardo melle*] „Corsicum et Sardum mel pessimi saporis est.“ *Porph.* Plinius tradit candidi papaveris semina

- Ludere qui nescit, campestribus abstinet armis,
 380 Indoctusque pilae discive trochive quiescit,
 Ne spissae risum tollant impune coronae;
 Qui nescit versus tamen audet fingere. Quidni?
 Liber et ingenuus, praesertim census equestrem
 Summam nummorum vitioque remotus ab omni.
 385 Tu nihil invita dices faciesve Minerva;
 Id tibi iudicium est, ea mens; si quid tamen olim
 Scripseris, in Maeci descendat iudicis aures
 Et patris et nostras, nonumque prematur in annum
 Membranis intus positis; delere licebit
 390 Quod non edideris; nescit vox missa reverti.
 Silvestres homines sacer interpresque deorum
 Caedibus et victu foedo deterruit Orpheus,
 Dictus ob hoc lenire tigres rabidosque leones.
 Dictus et Amphion, Thebanæ conditor urbis,

tosta in secunda mensa cum melle apud antiquos inferri solita esse. — *Ludere qui*] Quod cum sit verissimum neque reliquas artes quisquam profiteri audeat nisi qui earum sit peritus, tamen omnes sibi iure videntur versus facere. — *qui nescit*] Alii distinguunt *qui nescit, versus*, alii contra *qui nescit versus, tamen*. Rectius omni interductu abstinere, quoniam sententia est: qui nescit versus fingere, tamen audet versus fingere.

V. 385. *Illorum tu exemplum noli imitari, sed primum excute te ipsum, num tibi natura dederit ingenium poeticum; deinde quaecunque scripseris ea subice iudicio et amicorum, quos in ea arte multum valere scis, et tuo ipsius, ne studio tuo indulgens emittas poemata quae rectius contineantur in scriniis. Nam non omnia digna sunt quae in publicum edantur; scilicet poeticae arti summum propositum est munus* (vv. 391—407); *quo qui recte vult fungi, in eo oportet coniunctum esse ingenium poeticum cum arte et constantia* (v. 411); *neque quidquam est quod magis noceat poetae quam aut animus facile sibi indulgens suae facultate contentus aut mala laudatio hominum, quorum iudicium vel amicitia vel lucri cupiditate corruptum est. Quare quaerendi sunt*

iudices integri ac sinceri. vv. 385—452 — *invita Minerva*] cf. Cic. de Off. I, 31. — *id tibi*] quod tuum iudicium, quae tua mens est, ut probe scio. — *olim*] vide ad Carm. II, 10, 17. — *Maeci*] vide ad Sat. I, 10, 38. — *nonum in annum*] More veterum numerus annorum indefinite ponitur ad indicandum longum temporis spatium. Ceterum hoc praeceptum non omnes omnino tenere videtur scriptores et poetas sed praecipue adolescentes qui procliviores esse solent ad praecipitandam poematum suorum editionem. Quintil. X, 4, 2: „Nec dubium est, optimum esse emendandi genus, si scripta in aliquod tempus reponuntur, ut ad ea post intervallum velut nova atque aliena redeamus, ne nobis scripta nostra tantum recentes fetus blandiantur.“ — *silvestres*] Cic. de invent. 1, 2: „Fuit quondam tempus, cum in agris homines passim bestiarum more vagabantur et sibi victu ferino vitam propagabant.“ Sat. I, 3, 99. — *sacer*] Virg. Aen. VI, 645. Aristoph. Ran. 1032. „Ὅρκατος μὲν γὰρ τελετάς θ' ἡμῖν κατέδειξε φόνων τ' ἀπέχεσθαι.“ — *victu foedo*] „instar ferarum.“ Comm. Cruq. — *Amphion*] Carm. III, 11, 2. Epist. I, 8, 41. — *urbis*] Sic ex auctoritate antiquissimorum codicum. Al-

- 395 Saxa movere sono testudinis et prece blanda
 Ducere quo vellet. Fuit haec sapientia quondam,
 Publica privatis secernere, sacra profanis,
 Concubitu prohibere vago, dare iura maritis,
 Oppida moliri, leges incidere ligno:
 400 Sic honor et nomen divinis vatibus atque
 Carminibus venit. Post hos insignis Homerus,
 Tyrtaeusque mares animos in Martia bella
 Versibus exacuit; dictae per carmina sortes,
 Et vitae monstrata via est, et gratia regum
 405 Pieriis tentata modis, ludusque repertus
 Et longorum operum finis: ne forte pudori
 Sit tibi Musa lyrae sollers et cantor Apollo.
 Natura fieret laudabile carmen an arte
 Quaesitum est; ego nec studium sine divite vena,
 410 Nec rude quid possit video ingenium: alterius sic
 Altera poscit opem res et coniurat amice.
 Qui studet optatam cursu contingere metam,
 Multa tulit fecitque puer, sudavit et alsit,
 Abstinuit venere et vino; qui Pythia cantat
 415 Tibicen, didicit prius extimuitque magistrum.
 Nunc satis est dixisse: Ego mira poemata pango;
 Occupet extremum scabies; mihi turpe relinqui est

tera lectio *arcis* ex interpretatione eorum orta videtur, qui Horatianum vocabulum accuratius vellent definire. — *blanda*] Carm. I, 24, 13. — *ligno*] „Aereis enim tabulis antiqui non sunt usi, sed roboreis has incidebant leges, unde adhuc Athenis legum tabulae ἄξωες vocantur.“ *Porphyr.* — *Tyrtaeus*] Atheniensis, qui Spartanis in secundo bello Messenio dux missus „carmina exercitui pro concione recitavit; in quibus hortamenta virtutis, damnum solatia, belli consilia conscripserat.“ *Iustin.* III, 5. — *sortes*] oracula Delphica. *Cic.* de divin. II, 56: „Nam cum *sors* illa edita est opulentissimo regi Asiae: Croesus Halym penetrans magnam pervertet opum vim cet.“ — *vitae via*] in carminibus didascalis Solonis, Theognidis, aliorum.

— *gratia regum*] Hieronis, Theronis, aliorum principum quaesita lyricis carminibus Pindari, Simonidis, Bacchylidis. — *ludus*] per scenicam poesim. — *nec studium*] cf. *Cic. Arch.* 7, 15. — *coniurat*] poetice de rebus inanimatis. *Coniurare* autem idem est quod *conspirare* et indicat intimam coniunctionem et consensionem. — *metam*] Carm. I, 1, 4. Exemplo *palaestrae* et artis musicae ad ostendendam necessitatem laboris et exercitationis. — *nunc satis est*] „Satis est nostris poetis ut dicant.“ *Comm. Cruq.*, quem vides legisse in suo exemplo *nunc*, non *nec*; neque aliter *Acro*: „in hac copia imperitorum sufficit alicui sese iactare.“ Comprobat codicum auctoritas et totius loci acerbitas. — *scabies*] „Est imprecatio tracta a ludo puerili; qui

Et quod non didici sane nescire fateri.

Ut praeco, ad merces turbam qui cogit emendas,

420 Assentatores iubet ad lucrum ire poëta

Dives agris, dives positis in fenore nummis.

Si vero est, unctum qui recte ponere possit,

Et spondere levi pro paupere et eripere atris

Litibus implicitum; mirabor si sciet inter-

425 Noscere mendacem verumque beatus amicum.

Tu seu donaris seu quid donare voles cui,

Nolito ad versus tibi factos ducere plenum

Laetitiae: clamabit enim Pulchre! Bene! Recte!

Pallescet super his, etiam stillabit amicis

430 Ex oculis rorent, saliet, tundet pede terram.

Ut qui conducti plorant in funere, dicunt

Et faciunt prope plura dolentibus ex animo, sic

Derisor vero plus laudatore movetur.

Reges dicuntur multis urgere culullis

435 Et torquere mero, quem perspexisse laborant,

An sit amicitia dignus: si carmina condes,

Nunquam te fallant animi sub vulpe latentes.

Quintilio si quid recitares, Corrige sodes

Hoc, aiebat, et hoc. Melius te posse negares

440 Bis terque expertum frustra; delere iubebat

Et male tornatos incudi reddere versus:

enim praeest currentibus ad metam pueris dicere solet: qui primus ad metam venerit, is vicerit eumque in ulnas meas accipiam; qui vero erit ultimus, occupet eum scabies, eum respiciam ut scabiosum." *Comm. Cruq.* — *sane*] concessivam hoc quoque loco habet sententiam. cf. Cicer. ad Att. XIV, 20: „Nemo unquam neque poeta neque orator fuit, qui quemquam meliorem quam se arbitraretur. Hoc etiam malis contingit." id. Tuscul. V, 22: „In hoc enim genere nescio quo pacto magis quam in aliis suum cuique pulchrum est. Adhuc neminem cognovi poetam, qui sibi non optimus videretur."

V. 420. *assentatores*] cf. Epist. I, 19, 37 sqq. — *dives agris*] versus repetitus ex Sat. I, 2, 13. — *unctum*]

lautum convivium. cf. Epist. I, 15, 44.

— *levi*] vili et humili, cui sine sponsore fides deest. — *internoscere*] vide ad Sat. I, 2, 62. — *pallescet*] „palidus fiet cum admiratione." *Comm. Cruq.* Tragoediae recitatae locis terrore se impletum simulabit. — *rorem*] Ovid. Met. XIV, 708. — *conducti*] vide ad Carm. II, 20, 22 sq. — *derisor*] falsus laudator. Epist. I, 18, 11. — *reges*] vide ad Carm. I, 4, 14. — *torquere*] cf. Epist. I, 18, 38. — *culullis*] vide ad Carm. I, 31, 11. — *an*] vide Zumpt. gr. lat. §. 353. — *Quintilio*] Hunc verum criticum assentatori opponit. Vide ad Carm. I, 24. Noli concludere ex hac laude, Quintilium, cum de arte poetica liber scriberetur, etiam vixisse. — *negares*] In protasi est

- Si defendere delictum quam vertere malles,
 Nullum ultra verbum aut operam insumebat inanem,
 Quin sine rivali teque et tua solus amares.
- 445 Vir bonus et prudens versus reprehendet inertes,
 Culpabit duos, incompitis allinet atrum
 Transverso calamo signum, ambitiosa recidet
 Ornamenta, parum claris lucem dare coget,
 Arguet ambigue dictum, mutanda notabit,
- 450 Fiet Aristarchus, nec dicet: Cur ego amicum
 Offendam in nugis? Hae nugae seria ducent
 In mala derisum semel exceptumque sinistre.
 Ut mala quem scabies aut morbus regius urget
 Aut fanaticus error et iracunda Diana,
- 455 Vesantum tetigisse timent fugiuntque poëtam
 Qui sapiunt, agitant pueri incautique sequuntur.
 Hic dum sublimis versus ructatur et errat,
 Si veluti merulis intentus decedit auceps
 In puteum foveamve, licet Succurrite longum
- 460 Clamet Io cives! non sit qui tollere curet.

omissa particula *si*. — *tornatos*] „Si minus recte opus suum perfecisset artifex in metalli ornamentis torno elaborandis, consentaneum erat ut in inde marculi ictibus omnia tollerentur, ut cum rotundatum esset metallum de novo torno includeretur.“ *Orellius*. De metaphora Propert. II, 34, 43: „Incipe iam angusto versus includere torno.“ — *quin amares*] Pendet part. *quin* ex notione prohibendi quam sentis inesse in verbis *operam insumere*. — *inertes*] sine gravitate factos, inanes. — *atrum signum*] Pers. IV, 13: „Et potis es nigrum vitio praefigere theta.“ Mart. VII, 37, 1: „Nosti mortiferum quaestoris, Castrice, signum? Est operae pretium discere theta novum.“ Obelo appposito versum delendum esse indicator; *atrum* autem signum dicitur festiva dilogia. — *ambitiosa*] supervacanea ideoque nocentia. Significationem intelliges ex Plinii loco H. N. V, 15, 15: „Iordanes amnis amoenus, et quatenus locorum situs patitur, ambitiosus.“ cf. Epist. II, 2, 122. — *Aristarchus*] Samothracius, circa a.

154 a. Chr. n. Alexandriae vixit. Qui cum severe de Homeri versibus, quos alienos haberet, iudicasset, exemplum factus est severi iudicis. Cic. Pis. 30: „Quoniam te non Aristarchum, sed Phalarin grammaticum habemus, qui non notam apponas ad malum versum, sed poetam armis persequare.“ id. Att. I, 14: „Orationes meae, quarum tu Aristarchus es.“

V. 453. *Tam severum de carminibus iudicium necessarium est, ne poetae caeco sui amore capti et in insania sua vim divinam cernentes iratis diis poemata faciant hominibusque molestias creent.* vv. 452—476. Respondet exitus initio, imago insani poetae imaginis monstruosae figurae. — *morbis regius*] morbus arquatus, Gelbsucht. — *Diana*] Significantur lunatici, *σεληνιακοί*. — *sublimis*] elato capite, ut non videat quid pedibus suis obstet. Graece *μετέωρος*. — *ructatur*] Usitatio activa forma huius verbi est. — *puteum*] cf. Epist. II, 2, 135. — *non sit*] imperative, ut Sat. II, 5, 91. — *scis an*] vide ad Carm. IV, 7, 17. —

Si curet quis opem ferre et demittere funem,
 Qui scis an prudens huc se proiecerit atque
 Servari nolit? dicam Siculique poëtae
 Narrabo interitum. Deus immortalis haberi

465 Dum cupit Empedocles, ardentem frigidus Aetnam
 Insiluit. Sit ius liceatque perire poëtis;
 Invitum qui servat, idem facit occidenti.
 Nec semel hoc fecit, nec si retractus erit, iam
 Fiet homo et ponet famosae mortis amorem.

470 Nec satis apparet cur versus facit, utrum
 Minxerit in patrios cineres an triste bidental
 Moverit incestus: certe furit ac velut ursus
 Obiectos caveae valuit si frangere clathros,
 Indoctum doctumque fugat recitator acerbus;

475 Quem vero arripuit, tenet occiditque legendo,
 Non missura cutem nisi plena cruoris hirudo.

Siculique poetae] „Ad coercendam superbi-
 am stultorum poetarum de Empedocle, Siciliensi poeta, dat exemplum, qui carmine conscripsit physica; et credens se immortalem fore dignitate carminis, volensque suam immortalitatem probare deiecit se in flammam Aetnae montis: sed eius crepidae, quas flamma eructavit (erant enim aereae) prodiderunt eum. Erat autem Empedocles Agrigentius, Pythagoricus.“ *Comm. Crug.* Vixit circ. a. 442 a. Chr. n. — *idem occidenti*] vide Zumpt. gr. lat. §. 704. — *Nec satis*] Ac fortasse nefas est eum a versibus faciendis prohibere; etenim ea potest esse poena criminis alicuius ab isto homine olim commissi. — *bidental*] „Id quod Iovis fulmine percussus est bidental appellatur; hoc expiari non potest. Sunt autem qui putant ab agna (*bidens*) dictum biden-

tal.“ *Porphyr.* Fest. p. 27: „Bidental dicebant quoddam templum, quod in eo bidentibus hostiis sacrificaretur.“ — *minxerit*] cfr. Pers. 1, 113: „pueri, sacer est locus, extra Meite.“ — *moverit*] violaverit. *Epod.* 17, 3. — *clathros*] „Clathri sunt robusti postes et rotundi, repagula, quibus obfirmatur cavea.“ *Comm. Crug.* Graece κλῆθρα. De imagine compara Auct. ad Herenn. IV, 39: „Quodsi istum, iudices, vestris sententiis liberaveritis, statim, sicut e cavea leo missus aut aliqua terribilissima belua soluta e catenis, volitabit et vagabitur in foro, acuens dentes multos in cuiusque fortunas, in omnes amicos atque inimicos, notos atque ignotos incursans.“ — *arripuit*] „Cum dixerat *arripuit* et *tenet*, iam cogitat hirudinem. Nam haec propria sunt naturae animalculi vocabula.“ *Peertkamp.*

INDEX NOMINUM PROPRIORUM

MAXIME MEMORABILIMUM.

- Academus*, Epist. II, 2, 45.
Achaemenes, Carm. II, 12, 21. III, 1, 44. Epod. 13, 8.
Acheron, Carm. I, 3, 36. III, 3, 16.
Acherontia, Carm. III, 4, 146.
Acrisius, Carm. III, 16, 5.
Aeacus, Carm. II, 13, 22. III, 19, 3. IV, 8, 25.
Aelius Lamia, Carm. I, 26, 8. I, 36, 7. III, 17. Epist. I, 14, 6.
Aemilius ludus, A. P. 32.
Aeolius, Carm. II, 13, 24. III, 30, 13. IV, 3, 12. IV, 9, 12.
Aeschylus, Epist. II, 1, 163. A. P. 279.
Aesopus, tragoediarum actor, Sat. II, 3, 239. Epist. II, 1, 82.
Aesula, Carm. III, 29, 6.
Afranius, Epist. II, 1, 57.
Africanus, Carm. I, 3, 12. I, 14, 5. I, 1, 15. III, 23, 5. III, 29, 57. Epod. 16, 22.
Agave, Sat. II, 3, 303.
Agrippa, Carm. I, 6. Sat. II, 3, 185. Epist. I, 12, 1. 26. I, 6, 26.
Aggyieus, Carm. IV, 6, 28.
Albanus lacus, Carm. IV, 1, 19.
Albinovanus, Epist. I, 8.
Albinus, A. P. 327.
Albius Tibullus, Carm. I, 33. Epist. I, 4.
Albunea, Carm. I, 7, 12.
Alcaeus, Carm. II, 13, 27. IV, 9, 7. Epist. I, 19, 29. II, 2, 99.
Alexandrea, Carm. IV, 14, 35.
Algidus, Carm. I, 21, 6. III, 23, 9. IV, 4, 58. C. S. 69.
Allifanus, Sat. II, 8, 39.
Allobrox, Epod. 16, 6.
Alvattes, Carm. III, 16, 41.
Amphiaraus, Carm. III, 16, 11.
Amphion, Carm. III, 11, 2. Epist. I, 18, 41. 44. A. P. 394.
Anacreon, Carm. IV, 9, 9. Epod. 14, 10.
Andromeda, Carm. III, 29, 17.
Anticyra, Sat. II, 3, 83. 166. A. P. 300.
Antiochus, Carm. II, 9, 14.
Antiochus, rex Syriae, Carm. III, 6, 36.
Antiphates, A. P. 145.
Antium, Carm. I, 35, 1.
Antonius, triumvir, Sat. I, 5, 33. Eius filius, Carm. IV, 2.
Antonius Musa, Epist. I, 15, 3.
Anaxur, Sat. I, 5, 26.
Apella, Sat. I, 5, 100.
Apelles, Epist. II, 1, 239.
Appia, Epod. 4, 14. Sat. I, 5, 6.
Appius Claudius Caecus, Sat. I, 6, 21. Epist. I, 6, 26. I, 18, 20.
Apulia, Carm. III, 4, 10.
Aquarius, Sat. I, 1, 36.
Aquilo, Carm. I, 3, 13. II, 9, 6. III, 10, 4. III, 30, 3. Epod. 10, 7. 13, 3. A. P. 64.
Arabes, Carm. I, 29, 1. I, 35, 40. II, 12, 24. Epist. I, 6, 6. I, 7, 36.
Archilochus, Sat. II, 3, 12. Epist. I, 19, 25. 28. A. P. 79.
Archytas, Carm. I, 28, 2.
Arcturus, Carm. III, 1, 27.
Argos, Carm. I, 7, 9. *Argi*, Sat. II, 3, 132. Epist. II, 2, 128. A. P. 118.
Aricia, Sat. I, 5, 1. Epist. II, 2, 167.
Aristarchus, A. P. 450.
Aristippus, Sat. II, 3, 100. Epist. I, 1, 18. I, 17, 14. 23.
Aristius, Carm. I, 22. Sat. I, 9, 61. I, 10, 83. Epist. I, 10.
Atabulus, Sat. I, 5, 78.
Atreus, A. P. 186.
Atta, Epist. II, 1, 79.
Attalus, Carm. II, 18, 5. I, 1, 12. Epist. I, 11, 5.
Attius, Sat. I, 10, 53. Epist. II, 1, 56. A. P. 258.

- Aufidus*, Carm. III, 30, 10. IV, 9, 2. IV, 14, 25. Sat. I, 1, 58.
Augustus, Carm. I, 2. I, 12. II, 9, 19. III, 3, 11. III, 5, 3. IV, 2, 33. IV, 4, 24. IV, 5. IV, 14. IV, 15. Epist. I, 3, 7. I, 16, 29. II, 1.
Aulon, Carm. II, 6, 18.
Auster, Carm. II, 14, 16. III, 3, 4. III, 27, 22. IV, 14, 21. Epod. 10, 4. Sat. I, 1, 6. II, 2, 41. II, 6, 18. II, 8, 6. Epist. I, 11, 15.
Aventinus, C. S. 69. Epist. II, 2, 69.
Babylonius, Carm. I, 11, 2.
Bacchae, Carm. III, 25, 15.
Baiae, Carm. II, 18, 20. III, 4, 24. Epist. I, 1, 83. I, 15, 2. 12. cf. Sat. II, 4, 32.
Bandusia, Carm. III, 13, 1.
Bantinus saltus, Carm. III, 4, 15.
Barium, Sat. I, 5, 97.
Bassareus, Carm. I, 18, 11.
Bellerophon, Carm. III, 7, 15. III, 12, 8. IV, 11, 28.
Berecynthius, Carm. I, 18, 13. III, 19, 18. IV, 1, 22.
Bionii sermones, Epist. II, 2, 60.
Bistonides, Carm. II, 19, 20.
Boeoti, Epist. II, 1, 244.
Boreas, Carm. III, 24, 38.
Bosporus, Carm. II, 13, 14. II, 20, 14. III, 4, 30.
Breuni, Carm. IV, 14, 11.
Britannus, Carm. I, 21, 15. I, 35, 30. III, 4, 33. III, 5, 3. IV, 14, 48.
Brutus, Carm. II, 7, 2. Sat. I, 7, 18. 24. 33.
Cadmus, A. P. 187.
Caecilius, Epist. II, 1, 59. A. P. 54.
Calabria, Carm. I, 31, 5. cf. Carm. I, 33, 16. III, 16, 33. IV, 8, 20. Epod. I, 27. Epist. I, 7, 14.
Cales, Carm. IV, 12, 14.
Callimachus, Epist. II, 2, 100.
Calvus, Sat. I, 10, 19.
Camillus, Carm. I, 12, 42. Epist. I, 1, 64.
Campanus, Sat. I, 5, 45. 62. I, 6, 118. II, 3, 144. II, 8, 56.
Canicula, Carm. I, 17, 17. III, 13, 9.
Canidia, Epod. 3, 8. Epod. 5 et 17. Sat. I, 8, 24. 48. Sat. II, 1, 48. II, 8, 95.
Cantabri, Carm. II, 6, 2. II, 11, 1. III, 8, 22. IV, 14, 41. Epist. I, 12, 26. cf. Epist. I, 18, 55.
Canusium, Sat. I, 5, 91. II, 3, 168. I, 10, 30.
Capito, Fonteius, Sat. I, 5, 32.
Carinae, Epist. I, 7, 48.
Carpathium mare, Carm. I, 35, 8. IV, 5, 10.
Cassius Etruscus, Sat. I, 10, 62.
Cassius Parmensis, Epist. I, 4, 3.
Catulus, Carm. I, 18, 2.
Cato Censorius, Carm. II, 15, 11. III, 21, 11. Sat. I, 2, 32. Epist. II, 2, 117. A. P. 56.
Cato Uticensis, Carm. I, 12, 35. II, 1, 24. Epist. I, 19, 13.
Catullus, Sat. I, 10, 19.
Celsus Albinovanus, Epist. I, 3, 15.
Cerberus, Carm. II, 19, 29. III, 11, 17.
Cethegus, Epist. II, 2, 117. A. P. 50.
Charybdis, Carm. I, 27, 19. A. P. 145.
Chimaera, Carm. I, 27, 24. II, 17, 13. IV, 2, 16.
Choerilus, Epist. II, 1, 233. A. P. 357.
Chrysippus, Sat. I, 3, 127. II, 3, 44. 287. Epist. I, 2, 4.
Circe, Carm. I, 17, 20. Epod. 17, 17. Epist. I, 2, 23. cf. Epod. 1, 30.
Claudius, (Tiberius Claudius Nero), Carm. IV, 14, 29. Epist. I, 3, 2. I, 9, 1. I, 12, 26. cf. Carm. IV, 4, 73.
Cleopatra, Carm. I, 37, 7.
Clusini fontes, Epist. I, 15, 9.
Concanus, Carm. III, 4, 34.
Corinthus, Carm. I, 7, 2. Epist. I, 17, 36. II, 1, 193.
Corybantes, Carm. I, 16, 8.
Cragus, Carm. I, 21, 8.
Crantor, Epist. I, 2, 4.
Craterus, Sat. II, 3, 161.
Cratinus, Sat. I, 4, 1. Epist. I, 19, 1.
Creta, Carm. III, 27, 34. Epod. 9, 29. cf. Carm. I, 26, 2.
Crispinus, Sat. I, 1, 120. I, 3, 139. I, 4, 14. II, 7, 45.
Curius, Carm. I, 12, 41. Epist. I, 1, 64.
Cyclops, Carm. I, 4, 7. Sat. I, 5, 63. Epist. II, 2, 125. A. P. 145.
Cydonius arcus, Carm. IV, 9, 17.
Cyprius, trabs, Carm. I, 1, 13 merces, Carm. III, 29, 60.
Cyprus, Carm. I, 3, 1. I, 19, 10. I, 30, 2. III, 26, 9.
Cythereus, Carm. I, 4, 5. III, 12, 4.
Dacus, Carm. I, 35, 9. II, 20, 18. III, 6, 14. Sat. II, 6, 53.
Daedalus, Carm. I, 3, 34. II, 20, 13. Carm. IV, 2, 2.
Dama, Sat. I, 6, 38. II, 5, 18. 101. II, 7, 54.

- Damasippus*, Sat. II, 3, 16. 64. 65. 324.
Danae, Carm. III, 16, 1.
Danaides, Carm. II, 14, 18. III, 11, 22.
Dardanus, adiect. Carm. IV, 6, 7.
Damius, Carm. III, 30, 11. IV, 14, 26. cf. Carm. I, 22, 14. II, 1, 34. IV, 6, 27.
Davus, Sat. I, 10, 40. II, 5, 91. II, 7, 2. 100. A. P. 237.
December, Carm. III, 18, 10. Epod. 11, 5. Sat. II, 7, 4.
Dellius, Carm. II, 3.
Delos, Carm. I, 21, 10. cf. Carm. III, 4, 64. IV, 3, 6. IV, 6, 33.
Delphi, Carm. I, 7, 3. A. P. 219. cf. Carm. III, 30, 15.
Demetrius, Sat. I, 10, 79. 90.
Democritus, Epist. I, 12, 12. II, 1, 194. A. P. 297.
Diespiter, Carm. I, 34, 5. III, 2, 29.
Digentia, Epist. I, 18, 104.
Dindymene, Carm. I, 16, 5.
Dossennus, Epist. II, 1, 173.
Drusus, Carm. IV, 4, 18. IV, 14, 10.
Edoni, Carm. II, 7, 27.
Empedocles, Epist. I, 12, 20. A. P. 465.
Enceladus, Carm. III, 4, 56.
Ennius, vide ad Carm. IV, 8, 20. Sat. I, 10, 54. Epist. I, 19, 7. A. P. 56. 259.
Epicharmus, Epist. II, 1, 58.
Epicurus, Epist. I, 4, 16.
Erycina, Carm. I, 2, 33.
Erymanthus, Carm. I, 21, 7.
Esquiliae, Sat. I, 8, 14. II, 6, 33. cf. Epod. 5, 100. 17, 58.
Eupolis, Sat. I, 4, 1. II, 3, 12.
Europe, Carm. III, 27, 25. 57.
Eurus, Carm. I, 28, 25. II, 16, 23. III, 17, 11. IV, 4, 43. IV, 6, 10.
Euias, Carm. III, 25, 9.
Euius, Carm. I, 18, 9. II, 11, 17.
Fabius, Sat. I, 1, 14. I, 2, 134.
Fabricius pons, Sat. II, 3, 36.
Fannius Quadratus, Sat. I, 4, 21. I, 80.
Favonius, Carm. I, 4, 1. III, 7, 2.
Ferentinum, Epist. I, 17, 8.
Feronia, Sat. I, 5, 24.
Fescenninus, Epist. II, 1, 145.
Fidenae, Epist. I, 11, 8.
Flavius, Sat. I, 6, 72.
Florus, Epist. I, 3. II, 2.
Forentum, Carm. III, 4, 16.
Formiae, Carm. III, 17, 6. cf. I, 20, 11.
Fundanius, Sat. I, 10, 42. II, 8, 19.
Fundi, Sat. I, 5, 34.
Furnius, Sat. I, 10, 86.
Gabii, Epist. I, 11, 7. I, 15, 9. II, 1, 25. II, 2, 3.
Gades, Carm. II, 2, 11. II, 6, 1.
Gaetulus, Carm. I, 23, 10. II, 20, 15. III, 20, 2. Epist. II, 2, 181.
Galaesus, Carm. II, 6, 10.
Ganymedes, Carm. IV, 4, 4. cf. III, 20, 16.
Garganus, Carm. II, 9, 7.
Geloni, Carm. II, 9, 23. II, 20, 19. III, 4, 35.
Genauri, Carm. IV, 14, 10.
Geryon, Carm. II, 14, 8.
Getae, Carm. III, 24, 11. IV, 15, 22.
Gratiae, Carm. I, 4, 6. I, 30, 6. III, 19, 16. III, 21, 22. IV, 7, 5.
Gyas, Carm. II, 17, 14. III, 4, 69.
Hadria, Carm. I, 3, 15. I, 33, 15. II, 11, 2. III, 3, 5. III, 27, 19. III, 9, 23. Epist. I, 18, 63. cf. Carm. I, 16, 4.
Haemus, Carm. I, 12, 6.
Hannibal, Carm. II, 12, 2. III, 6, 36. IV, 8, 16. IV, 4, 49.
Hasdrubal, Carm. IV, 4, 38. 72.
Hebrus, Carm. I, 25, 20. III, 25, 10. Epist. I, 3, 3. I, 16, 13.
Hecate, Sat. I, 8, 33.
Helicon, Carm. I, 12, 5. Epist. II, 1, 218. A. P. 296.
Hermogenes, Sat. I, 3, 129. I, 9, 25. I, 10, 18. 80. I, 4, 72.
Hesperia, vide ad Carm. II, 1, 32.
Hiber, Carm. II, 20, 20.
Hiberia, Carm. IV, 5, 28. IV, 14, 50. Epod. 5, 21. cf. Epod. 4, 3.
Hippolytus, Carm. IV, 7, 26.
Hirpinus, Carm. II, 11. Epist. I, 16.
Hyades, Carm. I, 3, 14.
Hydaspes, Carm. I, 22, 8.
Hylaeus, Carm. II, 12, 6.
Hymettus, Carm. II, 6, 14. II, 18, 3. Sat. II, 2, 15.
Ianus, Sat. II, 6, 20. Epist. I, 16, 59. Carm. IV, 15, 9. Epist. I, 20, 1. II, 1, 255. Sat. II, 3, 18. Epist. I, 1, 54.
Iapetus, Carm. I, 3, 27.
Iapyx, Carm. I, 3, 4. III, 27, 20.
Icarus, Carm. II, 20, 13. III, 7, 21.
Iccius, Carm. I, 29. Epist. I, 12.
Ilia, Carm. I, 2, 17. III, 9, 8. IV, 8, 22. Sat. I, 2, 126.
Ilios, Ilium, vide ad Carm. I, 10, 14.
Ilithyia, C. S. 14.
Indus, Carm. I, 12, 56. IV, 14, 42. Epist. I, 6, 6.

- Ino*, A. P. 123.
Io, A. P. 124.
Itys, Carm. IV, 12, 5.
Iudaei, Sat. I, 4, 143. I, 5, 100. I, 9, 70.
Ixion, Carm. III, 11, 21. A. P. 124.
Karthago, Carm. III, 5, 39. IV, 4, 69. IV, 8, 17. Epod. 9, 25. Sat. II, 1, 66.
Laberius, Sat. I, 10, 6.
Laestrygonas, Carm. III, 16, 34.
Lamia, vide *Aelius*.
Lapithae, Carm. I, 18, 8. II, 12, 5.
Laverna, Epist. I, 16, 60.
Lebedus, Epist. I, 11, 6.
Libitina, Carm. III, 30, 7. Sat. II, 6, 19. Epist. II, 1, 49.
Licinius, Carm. II, 10.
Licymnia, Carm. II, 12, 13. 23.
Liris, Carm. I, 31, 7. III, 17, 8.
Livius Andronicus, Epist. II, 1, 62. 69.
Lollius, Carm. IV, 9. Epist. I, 20, 28. I, 2. I, 18.
Lucilius, vide p. 302.
Lucina, C. S. 15. Epod. 5, 6.
Lucretilis, Carm. I, 17, 1.
Lucullus, Epist. I, 6, 40.
Lycambes, Epod. 6, 13. Epist. I, 19, 25.
Lycurgus, Thrax, Carm. II, 19, 16.
Lynceus, Sat. I, 2, 90. Epist. I, 1, 28.
Lysippus, Epist. II, 1, 240.
Maecenas, vide p. 7 sq. 27.
Maecius Tarpia, Sat. I, 10, 38. A. P. 387.
Maenius, Sat. I, 1, 101. I, 3, 21. 23. Epist. I, 15, 26.
Maevius, Epod. 10.
Mandela, Epist. I, 18, 105.
Marcellus, Carm. I, 12, 46.
Marica, Carm. III, 17, 7.
Marsyas, Sat. I, 6, 120.
Matinus, Carm. I, 28, 3. IV, 2, 27. Epod. 16, 28.
Medi, Carm. I, 2, 51. I, 27, 5. I, 29, 4. II, 16, 6. II, 9, 21. III, 3, 44. III, 5, 9. III, 8, 19. IV, 14, 42.
Meleager, A. P. 146.
Menander, Sat. II, 3, 11. Epist. II, 1, 57. vide p. 326.
Messalla, Sat. I, 6, 42. I, 10, 85. A. P. 371.
Mimas, Carm. III, 4, 53.
Minnermus, Epist. I, 6, 65. II, 2, 101.
Minos, Carm. I, 28, 9. IV, 7, 21.
Minturnae, Epist. I, 5, 5.
Minucius (via) Epist. I, 18, 20.
Molossus, Epod. 6, 5. Sat. II, 6, 114.
Monaeses, Carm. III, 6, 9.
Munatius Plancus, Carm. I, 7. III, 14, 28. cf. Epist. I, 3, 31.
Murena, Carm. III, 19, 11. Sat. I, 5, 38.
Mygdon, Carm. II, 12, 22. III, 16, 41.
Myrtoum mare, Carm. I, 1, 14.
Mytilene, Carm. I, 7, 1. Epist. I, 11, 17.
Naevius, Epist. II, 1, 53.
Nero, Claudius Tiberius, Carm. IV, 4, 28. 37. IV, 14, 14. Epist. I, 8, 2. I, 9, 4. I, 12, 26. II, 2, 1.
Nessus, Epod. 17, 32.
Niphates, Carm. II, 9, 20.
Nireus, Carm. III, 20, 15. Epod. 15, 22.
Nomentanus, Sat. I, 8, 11. II, 1, 22. II, 3, 175. 224. II, 8, 23. 25. 60.
Noricus, ensis, Carm. I, 16, 9. Epod. 17, 71.
Notus, Carm. I, 3, 14. IV, 5, 9.
Numa, Carm. I, 12, 34. Epist. I, 6, 27. II, 1, 86.
Olympia, Epist. I, 1, 50.
Orbilus, Epist. II, 1, 71.
Oricus v. *Oricum*, Carm. III, 7, 5.
Orion, Carm. II, 13, 39. III, 4, 71. I, 28, 21. III, 27, 18. Epod. 10, 10. 15, 7.
Orpheus, Carm. I, 12, 8. I, 24, 13. A. P. 392.
Osiris, Epist. I, 17, 60.
Otho, L. Roscius, Epod. 4, 16.
Pacorus, Carm. III, 6, 9.
Pactolus, Epod. 15, 20.
Pacuvius, Epist. II, 1, 56.
Palinurus, Carm. III, 4, 28.
Panaetius, Carm. I, 29, 14.
Panthoides, Carm. I, 28, 10.
Pantolabus, Sat. I, 8, 11. II, 1, 22.
Parcae, Carm. II, 6, 9. II, 16, 39. II, 17, 16. C. S. 25.
Parrhasius, Carm. IV, 8, 6.
Parthi, Carm. I, 12, 53. I, 19, 12. II, 13, 18. III, 2, 3. IV, 5, 25. IV, 15, 7. Epod. 7, 9. Sat. II, 1, 15. II, 5, 62. Epist. I, 18, 56. II, 1, 112. 256.
Paulus, Maximus, Carm. IV, 1, 10. Sat. I, 6, 41. — Aemilius, Carm. I, 12, 38.
Pausias, vide ad Sat. II, 7, 95.
Pegasus, Carm. I, 27, 24. IV, 11, 27.
Peleus, Carm. III, 7, 17. A. P. 96. 104.
Pelops, Carm. I, 6, 8. I, 28, 7. II, 13, 37. Epod. 17, 65.
Pentheus, Carm. II, 19, 14. Epist. I, 16, 73.
Persae, Carm. I, 2, 22. I, 21, 15. III, 5, 4. III, 9, 4. IV, 15, 23.
Petrinus, Epist. I, 5, 5.
Phaëthon, Carm. IV, 11, 25.
Phalantus, Carm. II, 6, 12.
Philippi, urbs, Carm. II, 7, 9. III, 4, 26. Epist. II, 2, 49.

- Philodemus*, Sat. I, 2, 121.
Phraates, Carm. II, 2, 17. Epist. I, 12, 27.
Phrygius, lapis, Carm. III, 1, 41.
Picena, poma, Sat. II, 3, 272. II, 4, 70.
Pieris, Carm. IV, 3, 18. IV, 8, 20.
Pierius, Carm. III, 4, 40. III, 10, 15. A. P. 405.
Pimpleis, Carm. I, 26, 9.
Pindarus, Carm. IV, 2, 1. 8. cf. Carm. IV, 9, 6. Epist. I, 3, 10.
Pindus, Carm. I, 12, 6.
Prithous, Carm. III, 4, 80. IV, 7, 28.
Plato, Sat. II, 3, 11. II, 4, 3.
Plautus, Epist. II, 1, 58. A. P. 54. 270.
Pleiades, Carm. IV, 14, 21.
Plotius, Sat. I, 5, 40. I, 10, 81.
Poenus, Carm. I, 12, 38. II, 2, 11. II, 13, 15. III, 5, 34. IV, 4, 47. cf. Carm. II, 12, 3.
Polemon, Sat. II, 3, 254.
Pollio, C. Asinius, Carm. II, 1, 14. Sat. I, 10, 42. 85.
Pollux, Carm. III, 3, 9. III, 29, 64. Epist. II, 1, 5.
Pompeius Grosphus, Carm. II, 16, 7. Epist. I, 12, 22.
Pompeius Varus, Carm. II, 7, 5.
Porphyron, Carm. III, 4, 54.
Porsena, Epod. 16, 4.
Praeneste, Carm. III, 4, 23. Epist. I, 2, 2.
Priapus, Epod. 2, 21. Sat. I, 8, 2.
Procne, A. P. 187.
Proculeius, Carm. II, 2, 5.
Procyon, Carm. III, 29, 18.
Proetus, Carm. III, 7, 13.
Prometheus, Carm. I, 16, 13. II, 13, 37. II, 18, 35. Epod. 17, 67.
Proteus, Carm. I, 2, 7. Sat. II, 3, 71. Epist. I, 1, 90.
Pyrrha, Carm. I, 2, 6.
Pyrrhus, Carm. III, 6, 35.
Pythagoras, Sat. II, 4, 3. II, 6, 63. Epod. 15, 21. Epist. II, 1, 52.
Quintilius, Carm. I, 24, 5. 12. A. P. 438.
Quintius, vide Hirpinus.
Raeti, Carm. IV, 4, 17. IV, 14, 15.
Ramnes, A. P. 342.
Regulus, Carm. I, 12, 37. III, 5, 13.
Remus, Epod. 7, 19.
Rhenus, Sat. I, 10, 37. A. P. 18.
Rhodope, Carm. III, 25, 12.
Rhoetus, Carm. II, 19, 23. III, 4, 55.
Romulus, Carm. I, 12, 33. II, 15, 10. IV, 8, 24. Epist. II, 1, 5. cf. Carm. IV, 5, 1. C. S. 47.
Roscus, Sat. II, 6, 35. Epist. II, 1, 82. cf. Epist. I, 1, 62.
Rubi, Sat. I, 5, 94.
Sabaea, Carm. I, 29, 3.
Sabellus, Carm. III, 6, 38. Epod. 17, 28. Sat. I, 9, 29. II, 1, 36. Epist. I, 16, 49.
Sabinus, Carm. I, 9, 7. I, 22, 9. I, 20, 1. II, 18, 14. III, 1, 47. III, 4, 22. Epod. 2, 41. Sat. II, 7, 118. Epist. I, 7, 77.
Salamis, Carm. I, 7, 21. 29.
Salernum, Epist. I, 15, 1.
Salus, Carm. I, 36, 12. IV, 1, 28. cf. Carm. I, 37, 2. Epist. II, 1, 86.
Salustius, Carm. II, 2. Sat. I, 2, 48.
Samnites, Epist. II, 2, 98.
Sappho, Carm. II, 13, 25. Epist. I, 19, 28.
Sardinia, Carm. I, 31, 4.
Sardis, Epist. I, 11, 2.
Satureianus, Sat. I, 6, 59.
Saturnalia, Sat. II, 3, 5. vide p. 415.
Saturnius numerus, Epist. II, 1, 158.
Satyri, Carm. I, 1, 31. II, 19, 4. Epist. I, 19, 4. II, 2, 125. A. P. 226. 233. 235.
Scamander, Epod. 13, 14.
Scaurus, Carm. I, 12, 37.
Scipiadus, Sat. II, 1, 17. 72.
Scopas, Carm. IV, 8, 6.
Scylla, A. P. 145.
Scythae, Carm. I, 35, 9. II, 11, 1. III, 8, 23. III, 24, 9. IV, 14, 42. C. S. 55.
Scythicus amnis, Carm. III, 4, 36.
Semele, Carm. I, 19, 2. cf. I, 17, 22.
Septimius, Carm. II, 6. Epist. I, 9, 1.
Seres, Carm. I, 12, 56. III, 29, 27. IV, 15, 23. cf. Carm. I, 29, 9.
Sicanus, Epod. 17, 32.
Siculus, Carm. II, 12, 2. II, 16, 33. III, 1, 18. III, 4, 28. IV, 4, 44. Epist. I, 2, 58. I, 12, 1. II, 1, 58. A. P. 463.
Sidonius, Epod. 16, 61. Epist. I, 10, 26.
Silenus, A. P. 239.
Silvanus, Carm. III, 29, 23. Epod. 2, 22. Epist. II, 1, 143.
Simois, Epod. 13, 14.
Simonides, vide ad Carm. II, 1, 38. IV, 9, 7.
Sinuessa, Sat. I, 5, 40. cf. Epist. I, 5, 5.
Siren, Sat. II, 3, 14. Epist. I, 2, 23.
Sisyphus, Carm. II, 14, 20. Epod. 17, 68. Sat. II, 3, 21.
Sithonii, Carm. I, 18, 9. cf. III, 26, 10.
Socraticus, Carm. I, 29, 14. III, 21, 9. A. P. 310.
Sophocles, Epist. II, 1, 163.

- Soracte*, Carm. I, 9, 2.
Sosii, Epist. I, 20, 2. A. P. 345.
Spartacus, Carm. III, 14, 19. Epod. 16, 5.
Stertinius, Sat. II, 3, 33. 296. Epist. I, 12, 20.
Stesichorus, Carm. IV, 9, 8.
Sthenelus, Carm. I, 15, 24. IV, 9, 20.
Subura, vide ad Epod. 5, 58.
Sugambri, Carm. IV, 2, 36. IV, 14, 51.
Surrentum, Epist. I, 17, 52. cf. Sat. II, 4, 55.
Syrtes, Carm. I, 22, 5. II, 6, 3. II, 20, 15. Epod. 9, 31.
Taenarius, Carm. I, 34, 10.
Tanais, Carm. III, 10, 1. III, 29, 28. IV, 15, 24.
Tantalus, Carm. II, 18, 37. Epod. 17, 66. Sat. I, 1, 68.
Tarentum, Carm. I, 28, 29. III, 5, 56. Sat. I, 6, 105. Epist. I, 7, 45. I, 16, 11.
Tarquinius, Carm. I, 12, 35. Sat. I, 6, 13.
Tecmessa, Carm. II, 4, 6.
Telegonus, Carm. III, 29, 8.
Telephus, Epod. 17, 8. A. P. 96. 104.
Tempe, Carm. I, 7, 4. I, 21, 9. III, 1, 24.
Terentius, Sat. I, 2, 20. Epist. II, 1, 59.
Teridates, Carm. I, 26, 5.
Terminus, C. S. 27. cf. Epod. 2, 59.
Teucer, Carm. I, 7, 21. 27. I, 15, 24. IV, 9, 17. Sat. II, 3, 204.
Thebae, Carm. I, 7, 3. IV, 4, 64. Sat. II, 5, 84. Epist. I, 16, 74. II, 1, 213. A. P. 219.
Theon, vide ad Epist. I, 18, 82.
Theseus, Carm. IV, 7, 27.
Thespis, Epist. II, 1, 163. A. P. 276.
Threx et Thraex, vide ad Sat. II, 6, 44.
Threicius, Carm. I, 24, 13. Epod. 13, 3.
Thyestes, Carm. I, 16, 17. A. P. 91. Vide ad Carm. I, 6, 1. cf. Epod. 5, 86.
Thyas, Carm. II, 19, 9. III, 15, 10.
Thyni et Bithyni, Carm. III, 7, 3.
Thyoneus, Carm. I, 17, 23.
Tiberius, vide *Nero*.
Tibullus, vide *Albius*.
Tibur, Carm. I, 7, 21. I, 18, 2. II, 6, 5. III, 4, 23. III, 29, 6. IV, 2, 31. IV, 3, 10. Epist. I, 7, 45.
Tiburinus, Carm. I, 7, 13.
Tigellius, Sat. I, 3, 4. I, 2, 3. I, 10, 90.
Tiresias, Sat. II, 5, 1.
Titanes, Carm. III, 4, 43.
Tithonus, Carm. I, 28, 8. II, 16, 30.
Tityos, Carm. II, 14, 8. III, 4, 77. IV, 6, 2.
Torquatus, Carm. IV, 7. Epod. 13, 6. Epist. I, 5.
Trebatius, Sat. II, 1.
Tullius, Sat. I, 6, 9.
Tullus, Carm. IV, 7, 15.
Tusculum, Epod. 1, 29.
Typhoeus, Carm. III, 4, 53.
Tyrtaeus, A. P. 402.
Ulubrae, Epist. I, 11, 30.
Ustica, Carm. I, 17, 11.
Vacuna, Epist. I, 10, 49.
Valgius, Carm. II, 9. Sat. I, 10, 82.
Varia, Epist. I, 14, 3.
Varius, Carm. I, 6, 1. Sat. I, 5, 40. I, 6, 55. I, 9, 23. I, 10, 44. 81. II, 8, 21. 63. Epist. II, 1, 247. A. P. 55.
Varro, Atacinus, Sat. I, 10, 46.
Varus, Carm. I, 18.
Velabrum, Sat. II, 3, 229.
Velia, Epist. I, 15, 1.
Venafrum, vide ad Carm. III, 5, 55. Sat. II, 4, 69. II, 8, 45.
Vertumnus, Sat. II, 7, 14. Epist. I, 20, 1.
Vindelici, Carm. IV, 4, 18. IV, 14, 8.
Vinius, Epist. I, 13.
Virgilius, Carm. I, 3, 6. IV, 12. Sat. I, 10, 81. I, 5, 40. 48. Epist. II, 1, 247. A. P. 55.
Viscus, Sat. I, 9, 22. I, 10, 83. Sat. II, 8, 20.
Vultur, Carm. III, 4, 9.
Xanthus, Carm. IV, 6, 26.
Zephyri, Carm. III, 1, 24. IV, 7, 9. Epist. I, 7, 13.
Zethus, Epist. I, 18, 42.

INDEX RERUM ET VERBORUM.

- ablativi* post comparativum latior usus, Carm. I, 8, 9. IV, 14, 13; ablat. sine particula *a* apud verba passiva, Carm. I, 6, 2. ablat. in *i* et *e* Ep. I, 17, 30.
- abolla*, Sat. I, 3, 133. Epist. I, 17, 25.
- abominatus*, passive, Epod. 16, 8.
- abradere* et *adradere*, Epist. I, 7, 50.
- abstare*, A. P. 362.
- ac* et *atque* post comparativos, Epod. 15, 5.
- ac non*, Epist. II, 2, 143.
- acer*, Carm. I, 4, 1.
- addicere*, Epist. I, 1, 14.
- addocere*, Epist. I, 5, 18.
- adjectiva* participiorum instar usurpata, Carm. I, 6, 19. I, 32, 6. I, 37, 26. III, 16, 25; adi. cum infinitivo, Carm. I, 1, 18; cum duobus substantivis coniungenda, Carm. I, 2, 1; adjectiva pro adverbis, Carm. I, 2, 45.
- adorea*, Carm. IV, 4, 41.
- ἀδύνατον*, figura, Carm. I, 33, 7.
- adverbia* cum substantivis coniuncta, Carm. III, 17, 9. IV, 6, 3. Epist. II, 2, 167.
- adverbia* qualitatis cum adiectivis coniuncta, Epist. I, 3, 22.
- aedes*, sing., Carm. I, 30, 4.
- aedificare*, Sat. II, 3, 308.
- aemulari* et *imitari*, Carm. IV, 2, 1.
- aeque ut*, Carm. I, 16, 7.
- aequus*, Carm. II, 3, 1.
- aeternare*, Carm. IV, 14, 5.
- aevum*, Carm. II, 2, 5.
- afflare* cum dativo, Sat. II, 8, 95.
- agere* (hoc age), Sat. II, 3, 152.
- agmen*, Carm. III, 2, 9.
- alius* cum ablat. Sat. II, 3, 208. Epist. I, 16, 20.
- almus*, Carm. IV, 4, 41.
- amare*, i. q. solere, Carm. II, 3, 10.
- ambitiosus*, A. P. 447.
- amnis*, Carm. IV, 2, 5.
- amphorae*, Carm. I, 20, 3.
- amplificatio*, Carm. I, 7, 16. I, 29, 12. II, 2, 11. III, 15, 6.
- ampullari*, Epist. I, 3, 14. A. P. 97.
- amystis*, Carm. I, 36, 14.
- an*, Carm. IV, 7, 17. A. P. 436. 462.
- anacolutia*, Carm. III, 17, 5. IV, 4, 22. Sat. I, 1, 23.
- anadiplosis*, Carm. I, 35, 15. II, 14, 1. II, 19, 6. III, 3, 18. Epod. 17, 7.
- anaphora*, Carm. I, 22, 21. 23.
- anastrophe*, Carm. I, 2, 34. I, 15, 9. III, 3, 11. Epod. 16, 40.
- angiportus*, Carm. I, 25, 10.
- anima*, Carm. III, 9, 12.
- animus*, Carm. IV, 7, 20.
- antithesis*, Carm. III, 20, 3.
- anulorum usus*, Sat. II, 7, 9.
- apotheca*, Carm. III, 8, 11.
- apotheosis*, Carm. III, 3, 12.
- apparatus*, Carm. I, 38, 1.
- appositionis* liberius genus, Carm. III, 20, 7. Sat. I, 4, 110.
- ardere*, Carm. III, 9, 6. IV, 9, 13.
- argutus*, Carm. III, 14, 21.
- arrogare*, Carm. IV, 14, 30.
- ars*, Carm. III, 3, 9. IV, 8, 5. Epist. I, 6, 17.
- ars memoriae*, Sat. II, 4, 7.
- arx*, Carm. II, 6, 22.
- asyndeton*, Carm. II, 7, 22.
- at*, Epod. 5, 1.
- atque*, Carm. III, 11, 18. Epod. 17, 4.
- atrium*, Carm. III, 1, 46.
- attractio*, Carm. I, 31, 17. Epod. 2, 37. Sat. I, 4, 39. I, 6, 15. I, 10, 16.
- auctoramentum*, Sat. II, 7, 58. Epist. I, 1, 6.
- auctumnus*, Carm. II, 5, 11.
- audere*, Epist. I, 2, 40.
- aulaea*, Carm. III, 29, 15. Epist. II, 1, 189.
- auspicium*, Carm. I, 7, 27. II, 15, 12.
- aul*, Carm. III, 24, 24.

- avis*, i. q. omen, Carm. I, 15, 5.
avus, Sat. I, 6, 3.
bacchari, Carm. I, 25, 11.
balnea publica, Sat. I, 3, 137.
barba philosophorum, Sat. I, 3, 133.
barbitos, Carm. I, 32, 4.
barrus, Epod. 12, 1.
beare, Carm. II, 3, 7. III, 16, 32.
benigne, Epist. I, 7, 16.
bibere fluvium, Carm. II, 20, 20.
bidens, Carm. III, 23, 14.
bidental, A. P. 471.
bis terque et bis terve, Epod. 5, 33.
 A. P. 358. 440.
bonus, Carm. IV, 1, 3. Sat. I, 1, 61.
 II, 2, 1. Epist. II, 2, 37. A. P. 297.
calcei senatorum, Sat. I, 6, 27.
calix, Epist. I, 5, 19.
campestre, Epist. I, 11, 18.
campus Martius, Carm. III, 1, 11.
candidus, Epist. I, 4, 1.
canere, Carm. I, 15, 4.
canus, Carm. I, 4, 4.
capillus, Carm. I, 32, 5.
capitis deminutio, Carm. III, 5, 42.
catus, Carm. I, 10, 3.
caudam trahere, Sat. II, 3, 53.
censere cum coni, Epist. I, 14, 44.
certare aliquid, Sat. II, 5, 27.
ceu, Carm. IV, 4, 43.
charta, Carm. IV, 8, 21. Sat. I, 10, 4.
cheragra et chiragra, Sat. II, 7, 15.
chiasmus, Carm. I, 2, 9. I, 3, 11.
 A. P. 1.
chorus, Carm. IV, 6, 31. C. S. 6;
 fabularum, A. P. 193.
ciborium, Carm. II, 7, 22.
cicuta, Epist. II, 2, 53.
cinctus, A. P. 50.
ciniflones, Sat. I, 2, 98.
cippus, Sat. I, 8, 12.
circumlocutio nominum propriorum,
 Sat. I, 5, 87.
circus, Sat. I, 6, 113.
citrus, Carm. IV, 1, 20.
clarare, Carm. IV, 3, 4.
clathri, A. P. 473.
clavus trabalis, Carm. I, 35, 18.
clivus sacer, Carm. IV, 2, 35.
coena dubia, Sat. II, 2, 77.
coepti cum infinit., A. P. 21.
cognitor, Sat. II, 5, 38.
cohibere, Carm. I, 28, 2.
cohors, Epist. I, 3, 6.
colonus, Carm. I, 35, 6.
commotus, Sat. II, 3, 209.
comoedia graeca, Sat. I, 4, 1.
comparatur facultas rei cum altera
 ipsa re, Carm. II, 6, 14.
compensare, Sat. I, 3, 70.
compes, Epod. 4, 4.
compono, Carm. III, 29, 33. Sat. I,
 9, 28. II, 3, 77.
condere diem, similia, Carm. IV, 5,
 29.
conficere, Sat. I, 9, 29.
coniunctivus potentialis, Sat. I, 4, 70.
 II, 6, 30.
conopium, Epod. 9, 16.
conscriptus, i. e. senator, A. P. 314.
consors, Carm. III, 24, 60.
constructio ἀπὸ κοινού, Carm. I, 3,
 6. I, 14, 16. I, 16, 6. I, 31, 9.
 II, 11, 11. III, 8, 19. Epod. 16,
 19. Sat. I, 1, 88. I, 3, 2. I, 4,
 106. Epist. II, 1, 13.
contemplari, Carm. III, 29, 7.
contremisco, Carm. II, 12, 8.
cor, Sat. II, 3, 213.
cornu copiae, Carm. I, 17, 16.
creari cum ablat., Carm. IV, 4, 29.
crepare, Carm. I, 18, 5.
crux, Sat. II, 7, 47.
cubare, Sat. I, 9, 18.
culullus, Carm. I, 31, 11.
cum semel i. q. simulac, Epod. 5, 39.
cum pro et, Carm. I, 1, 31.
cumera, Sat. I, 1, 53.
cumulatio, Sat. I, 8, 43.
cunque, Carm. I, 32, 15.
cupido, Carm. II, 16, 15.
cur, Carm. I, 33, 3. Epist. I, 8, 10.
cyathus, Sat. I, 1, 55.
cyclici poetae, A. P. 136.
damnare cum genitivo, Carm. II,
 14, 19.
daps, Carm. IV, 4, 12.
dare, Sat. I, 10, 5.
dativus nominum quintae declinationis
 Carm. III, 7, 4. Sat. I, 3, 95; *dat.*
 pro ablat. et praepos. Carm. I, 3,
 13. cf. II, 2, 18.
de praepos. in verbis compos. Carm.
 II, 1, 35. II, 7, 24. III, 7, 28.
 Epist. I, 3, 14.
decipere c. genit. Carm. II, 13, 38.
dedicare deum, Carm. I, 31, 1.
demovere et dinovere, Carm. I, 1, 13.
dens invidiae, Carm. IV, 3, 16.
densere et densare, Carm. I, 28, 19.
dentium cura, Carm. II, 8, 3.
designare, Epist. I, 5, 16.
designator, Epist. I, 7, 6.
desinere c. genit. Carm. II, 9, 18.
detestatus, passive, Carm. I, 1, 25.
detinere et distinere, Epist. I, 2, 5.
dicax, A. P. 225.
dictare feneratorum, Sat. II, 3, 76.
didactrum, Sat. I, 6, 75.
diffingere, Carm. I, 35, 26.

- dignus* cum praep. *pro*, Epist. I, 7, 24.
dirus, Carm. I, 2, 1.
disconvenire, Epist. I, 1, 99.
dissidet vestis, Epist. I, 1, 96.
dives cum genit. Carm. IV, 8, 5. Epist. II, 2, 31.
doctus, Carm. I, 1, 29.
domo pro domui, Epist. I, 10, 13.
ducere murum, similia, Carm. IV, 6, 23.
duellum, Carm. III, 5, 38.
dulcis, Carm. I, 16, 23.
dum, Epist. I, 2, 2.
durus et *dirus*, Carm. II, 12, 2.
eburnus et *eburneus*, Carm. III, 27, 41.
eiulatio et *eiulatus*, Epod. 10, 17.
elatrare, Ep. I, 18, 18.
elisis longarum syllabarum, Sat. I, 9, 30.
emancipare, Epod. 9, 12.
enallage adiectivi, Carm. I, 37, 7. III, 15, 16. I, 3, 40.
ἐν δὴ δὸν, Carm. III, 24, 13. 22. 46.
Epitheta ad rei naturam accommodata, Carm. III, 17, 10. I, 3, 34.
equestris dignitas Horatii, Sat. II, 7, 53.
equus ferus, Sat. I, 5, 56.
ergo, Carm. I, 24, 5.
erro, Sat. II, 7, 113.
esse cum dativo, Carm. I, 21, 1; cum adverbio, Sat. II, 2, 106; omisum, Carm. I, 20, 3. Sat. II, 8, 2.
est ut, Carm. III, 1, 9.
et cum vi consecutiva, Carm. II, 2, 11; *et-que* in rebus tripartitis, Carm. II, 10, 10, in fine versus, Carm. I, 7, 6; encliticarum more postpositum, Carm. I, 2, 9; generali notioni specialem addit, Carm. I, 3, 19.
etenim postpositum, Carm. IV, 5, 17.
ex praep. in vocabulis compositis, Carm. III, 25, 9. IV, 5, 22.
excipere, Carm. III, 12, 12.
exempla terna ponuntur, Carm. III, 23, 3. IV, 4, 30. IV, 6, 1. Epod. 16, 3.
fabula, de hominibus, Epod. 11, 8; fabularum actus, A. P. 189; fabula praetexta, togata, palliata, crepidata, A. P. 288.
facere, generale verbum alterius loco positum, Sat. I, 1, 64.
facetus, Sat. I, 10, 44.
fallere, Carm. III, 16, 32.
far pium, Carm. III, 23, 10.
fenestras, Carm. I, 25, 1.
feriae puerorum, Sat. I, 6, 74; latinae, Epist. I, 7, 76.
ferre i. q. accipere, Carm. IV, 8, 5.
ficulum lignum, Sat. I, 8, 1.
finis, Carm. II, 18, 30. Epod. 17, 36.
flores in conviviis, Carm. II, 3, 14.
fluvii tauriformes, Carm. IV, 14, 25.
foenum in cornibus boum, Sat. I, 4, 34.
fomenta, Epist. I, 2, 52. I, 3, 26.
formidolosus, Epod. 5, 55.
forsit, Sat. I, 6, 49.
fortuitus, Carm. II, 15, 17.
frons, Carm. I, 33, 5. Epist. I, 7, 26. I, 9, 11.
fructus et *fruges*, Epist. I, 12, 1.
furcifer, Sat. II, 7, 22.
gausape, Sat. II, 8, 11.
generalis sententia - post exempla, Carm. I, 28, 16.
genitivus qualitatis, Carm. I, 36, 13. III, 9, 7; causae, Carm. II, 2, 6; gen. nominum quintae declinationis, Carm. III, 7, 4; genit. pluralis forma, Carm. III, 21, 14; genit. nominum in *ius* et *ium* exeuntium, Carm. I, 2, 26.
genius, Carm. III, 17, 14. Epist. II, 1, 144.
gentilicia adiectiva pro possessivis, Carm. I, 1, 28.
genua hominum robur habent, Epod. 13, 4.
genus i. q. filius, Carm. I, 3, 27.
glomus, Epist. I, 13, 14.
graeca adiectivorum forma, Carm. I, 22, 14. I, 31, 18. II, 6, 5. II, 20, 13. A. P. 253.
Gratus, Carm. II, 4, 12.
haerere, Carm. I, 32, 10. III, 24, 55.
harmoniae varia genera, Epod. 9, 5.
haud, Sat. I, 4, 77. I, 6, 99. II, 6, 115.
helleborus, Sat. II, 3, 82.
here et *heri*, Sat. II, 8, 2.
hiatus, Carm. II, 20, 13. III, 14, 11. Epod. 13, 3. Sat. I, 1, 108. I, 9, 38. II, 2, 28.
hic, Carm. III, 10, 19. Sat. I, 9, 47. Epist. I, 6, 3.
hinc et *hinc*, similia, Epod. 2, 31.
hoc i. q. *ideo*, Sat. I, 6, 87.
homoeoteleuton, Carm. I, 22, 10.
honores mortuorum, Carm. II, 20, 24.
horae Romanae, Sat. I, 5, 23. I, 9, 35.
hostis, Epist. I, 15, 29.
hyperbaton, Sat. I, 8, 34.
iam, Carm. I, 4, 16. II, 20, 9.
ianitor, Carm. III, 14, 23.

- idus*, Carm. IV, 11, 15.
ignis, plur., Carm. III, 7, 11.
imagines, p. 143.
immolare, Carm. I, 4, 12.
impotens, Carm. III, 30, 3.
improbis, Carm. III, 9, 22.
in diem, Carm. III, 29, 42; *in loco*, Carm. IV, 12, 28. cf. Epist. I, 7, 57.
inanimatae res vitam quasi et animum accipiunt, Carm. II, 6, 20. II, 9, 7. II, 10, 15. III, 4, 30. A. P. 411.
incogitare, Epist. II, 1, 122.
ineptus, Sat. I, 3, 49.
infinitivi passivi forma in *ier*, Carm. IV, 11, 8; *infinit.* in interrogatione, Epod. 8, 1; *infin.* apud alia verba, Carm. I, 1, 8; apud adiectiva, Carm. I, 1, 18.
inquit, Sat. I, 4, 79.
instila, Sat. I, 2, 29.
institor, Carm. III, 6, 30.
insuescere, Sat. I, 4, 105.
inter — et inter, Sat. I, 7, 11. Epist. I, 2, 12.
interrogationes duae coniunctae, Carm. III, 27, 37.
intestabilis, Sat. II, 3, 181.
invidere, Sat. II, 6, 84.
ire de tempore, Carm. II, 14, 5. Epist. II, 2, 55. cf. A. P. 175; *i nunc*, Epist. I, 6, 17.
is cum emphasi, Carm. III, 11, 18.
ita in votis, Sat. II, 2, 124; in colloquiis, Sat. II, 7, 2.
itaque, Epist. I, 1, 10.
iubere, Carm. III, 3, 2.
iuvenari, A. P. 246.
iuvēnta, Carm. III, 14, 27.
lacerna, Sat. II, 7, 55.
laevus, Carm. III, 26, 5. III, 27, 15.
lamia, monstrum, A. P. 340.
laqueata tecta (lacunar), Carm. II, 16, 11.
Larium simulacra, Carm. III, 23, 15.
lasanum, Sat. I, 6, 109.
latro, Sat. I, 3, 138.
latus tegere, Sat. II, 5, 18.
laurus, Carm. II, 7, 19.
lavere, Carm. II, 3, 18.
lecti tricliniarii, Sat. II, 4, 84. II, 8, 20.
lemures, Epist. II, 2, 209.
lepus, Sat. II, 4, 44.
lex Roscia, Epod. 4, 16; de mandandis ordinibus, C. S. 18; Laetoria, Sat. I, 2, 16; de vendendis servis, Sat. II, 3, 285.
libri pontificum, Epist. II, 1, 26; vaticini, *ibid.*
libum, Epist. I, 10, 10.
liburnae, Carm. I, 37, 30. Epod. 1, 1.
licet, Epod. 15, 19.
lippitudo, Sat. I, 7, 3.
litotes, Carm. I, 1, 19. III, 26, 2. IV, 9, 51.
loculi, Sat. I, 6, 74.
lucerna, Carm. III, 21, 23.
lusciniā, Sat. II, 3, 245.
lutum, Epod. 10, 16.
lympha, Carm. III, 13, 16.
lymphatus, Carm. I, 37, 14.
male, Carm. I, 17, 25. IV, 12, 7. Sat. I, 9, 65.
malva, Carm. I, 31, 14.
manare, Epist. I, 19, 44.
manipare, Epist. II, 2, 159.
mannus, Carm. III, 27, 7.
mantelia, Sat. II, 8, 11.
mappa, Sat. II, 8, 63.
maritare vites, Epod. 2, 10.
marmora, Carm. II, 18, 3.
mazonomus, Sat. II, 8, 86.
mediastinus, Epist. I, 14, 14.
meditari, Carm. III, 25, 5.
metuere, Carm. II, 2, 7.
militare, Epod. 1, 23.
mille cum genit. Sat. II, 3, 197.
minari, Epist. I, 8, 3.
modi, Carm. II, 1, 40. II, 9, 9. III, 30, 14.
modulatus passive, Carm. I, 32, 5.
momenta, Epist. I, 6, 4.
morbus Campanus, Sat. I, 5, 62; regius, A. P. 453.
mordere, Carm. I, 31, 8. IV, 3, 16.
mulsum, Sat. II, 4, 26.
multus, Carm. I, 25, 5. I, 7, 8.
munire ab aliqua re, Carm. III, 16, 3.
nurteta, Epist. I, 15, 5.
mutare, Carm. I, 17, 2.
nam, potspositum, Carm. I, 18, 3; *παρηνθετικῶς*, Carm. III, 11, 1.
nardus, Carm. IV, 12, 17. Epod. 13, 9.
natare de animo, Sat. II, 7, 7.
ne, Carm. II, 7, 25. Epist. I, 1, 47. Sat. II, 3, 262.
nec et neque, Carm. I, 11, 2. I, 13, 6. I, 8, 6. I, 4, 3. I, 3, 38. III, 29, 6.
νεκρομαντεία, Sat. I, 8, 29.
nemus in tectis positum, Carm. III, 10, 6.
nenia, Carm. II, 1, 38.
νευρόσπαστα, Sat. II, 7, 82.
neutra adiectivorum pro adverbis, Carm. II, 12, 14.
nigri oculi, capilli, Carm. I, 32, 11.
nilum, Sat. II, 3, 54.

- nomen*, de re pecuniaria, Sat. I, 2, 16.
nomenclator, Epist. I, 6, 50.
nomina propria inverso ordine collocata, Carm. II, 11, 2. Sat. I, 7, 1.
nominativus cum infinitivo, Carm. I, 37, 31. C. S. 15.
non pro nonne, Epist. II, 1, 53.
nota in cadis vini, Carm. II, 3, 8.
num-num, Sat. I, 10, 57.
numerus, Epist. I, 2, 27.
o finale in verbis, Sat. I, 3, 140.
obligare, Carm. II, 7, 17.
occupare, Carm. II, 12, 28.
olim, Carm. II, 10, 17.
operari, Carm. III, 14, 6.
opinor, Sat. I, 3, 53.
ordo verborum, Carm. I, 9, 21. III, 11, 26. IV, 5, 36. C. S. 31. Sat. II, 6, 80. Epist. I, 19, 6.
oscines et praepetes, Carm. III, 27, 11.
otium, Carm. II, 16, 1.
ovum, in coenis, Sat. I, 3, 6. II, 4, 12.
oaxymoron, Carm. I, 2, 9. I, 6, 18. I, 27, 11. I, 33, 2. I, 34, 2. III, 4, 5. III, 20, 3. III, 21, 13. III, 27, 57. Epod. 16, 34. Epist. I, 11, 28. I, 12, 19.
paenula, Epist. I, 11, 18.
palus, correpta ultima syllaba, A. P. 65.
parochus, Sat. I, 5, 46.
patruus, Sat. II, 2, 97.
pavere, Carm. IV, 5, 25.
pavimentum, Epist. I, 10, 19.
peccare aliquid, A. P. 354.
peculium, A. P. 330.
pecunia in fenus dabatur, quando. Epod. 2, 69.
peius i. q. magis, Carm. IV, 9, 50.
perfectum ἀορίστως, Carm. I, 1, 3. A. P. 98.
petasus, Sat. II, 7, 55.
philyra, Carm. I, 38, 2.
phimus, Sat. II, 7, 17.
placare deos, Carm. I, 36, 2.
planus, Epist. I, 17, 59.
plectrum, Carm. II, 1, 40.
pluralis numerus, Carm. I, 14, 7. II, 1, 5. IV, 7, 1. IV, 9, 34. IV, 12, 8. Epod. 13, 14. Epist. I, 4, 12. I, 10, 1.
plus nimio, similia, Carm. I, 33, 1.
plusquamperfectum tempus, Sat. I, 9, 48.
poeta et vates, Carm. II, 6, 24.
pollicem premere, vertere, Epist. I, 1, 6. I, 18, 66.
polypus, Sat. I, 3, 40.
populare, Carm. III, 5, 24.
praefluere, Carm. IV, 3, 10.
praepositio, Carm. III, 25, 2.
praesens, Carm. I, 35, 2.
prandere, Sat. II, 3, 245. Epist. I, 17, 13.
privus, Sat. II, 5, 11.
pronomina, Carm. I, 9, 16. III, 27, 51.
prope, Carm. IV, 14, 20. Epist. I, 6, 1.
proprius, Carm. II, 2, 22.
pueri, Carm. III, 14, 10. Sat. I, 1, 85. C. S. 71.
pumex, Epist. I, 20, 2.
purpura, Carm. II, 16, 36. Epist. I, 10, 27.
purpureus, Carm. IV, 1, 10.
quamvis, Carm. I, 28, 13.
quando, Carm. III, 17, 2. Sat. II, 6, 93.
quandoque, Carm. IV, 1, 17.
quantus, Carm. I, 27, 6. Sat. II, 4, 81.
quatenus, Sat. I, 1, 64.
que, Carm. II, 7, 25. Sat. II, 3, 130. Carm. II, 12, 9. III, 2, 5. Sat. I, 3, 141.
quid enim, Sat. I, 1, 7.
quid si, Carm. I, 24, 13. Epist. I, 16, 8.
quindecimviri, C. S. 70.
quinqvatus, Epist. II, 2, 197.
quinqueviri, Sat. II, 5, 56.
quod, Epist. I, 7, 94.
quo ne, Sat. II, 1, 37.
quondam, Carm. II, 10, 18.
rarus, opp. densus, Epod. 2, 33.
ravus color, Carm. III, 27, 3.
recitationes, Sat. I, 4, 75. cf. p. 98.
recoquere, Sat. II, 5, 55.
refert cum dativo, Sat. I, 1, 49.
refigere, Carm. I, 28, 11. Epist. I, 18, 56.
regius et regalis, Carm. II, 15, 1. vide *morbus*.
regnare, Carm. II, 6, 11. III, 30, 12.
regnum vini, Carm. I, 4, 18.
relativum pronomen pro *at* cum demonstr., Sat. I, 1, 36. 43.
relegere viam, Carm. I, 34, 5.
religare, Carm. I, 32, 7.
reparare, Carm. I, 31, 12. I, 37, 24.
reponere, fabulam, A. P. 120.
rerum, Sat. I, 9, 49.
resignare, Carm. III, 29, 54.
rex, Carm. I, 4, 14. Epist. I, 7, 37.
ridere, Carm. II, 6, 14. Sat. II, 3, 72.
ringi, Epist. II, 2, 128.
rite, Carm. III, 24, 10.
ruere, Sat. II, 5, 22.
s littera sibilans, Carm. IV, 15, 15.
sagax, Carm. IV, 4, 75.

- sal*, de mente hominis, Sat. I, 10, 3.
salutare cum accus., Sat. I, 5, 63.
salutandi mos, Sat. I, 6, 101. Epist. I, 7, 75.
scalpere et sculperere, Carm. III, 11, 52.
scito supplendum, Sat. II, 1, 81.
se omissum, Carm. I, 35, 32.
secare viam, mare, Carm. I, 1, 14.
sed, postpositum, Carm. IV, 4, 33. Epist. II, 1, 89.
sedere i. q. cessare, Ep. I, 17, 37.
sedet vestis, Epist. I, 1, 96.
seges, Carm. I, 31, 4.
semel, Carm. I, 24, 16. IV, 3, 1.
senecta, Carm. I, 31, 19.
sepulcreta, Sat. I, 8, 8.
servorum cibus, Sat. I, 5, 68; cellae, Sat. I, 8, 8; pretium, Sat. II, 7, 43. Epist. II, 2, 5. manumissio, Sat. II, 7, 76.
sextarius, Sat. I, 1, 74.
si, Carm. I, 32, 1. C. S. 37. Sat. II, 6, 6; omissum, Carm. I, 3, 16. Epod. 16, 15. Sat. II, 6, 48. Epist. I, 1, 28.
sic, Carm. I, 3, 1. II, 11, 14.
sigilla, Epist. II, 2, 180.
silva, trisyllab., Carm. I, 23, 4.
simplex verbum pro composito, Carm. III, 9, 3.
simul i. q. simulac, Carm. I, 4, 17.
sin, Epist. I, 5, 6.
singularis verbi, Carm. I, 24, 8; nominis, Carm. I, 5, 1. I, 24, 14. III, 3, 15.
sive, Carm. I, 2, 33. Carm. III, 24, 57.
socialiter, A. P. 258.
soleae, Sat. II, 8, 77. Epist. I, 13, 15.
solvere cum genit., Carm. III, 17, 16.
sonnia, Carm. III, 27, 41. Sat. I, 10, 33.
sorites, Epist. II, 1, 47.
spatia, Epist. I, 14, 9.
species pro genere, Carm. I, 1, 10.
stare, Carm. I, 35, 14. III, 28, 6. I, 9, 1. Sat. I, 10, 17.
strabo, Sat. I, 3, 44.
strigilis, Sat. II, 7, 110.
studiosus, Epist. I, 3, 6.
sub, Epod. 5, 83.
substringere, Sat. II, 5, 95.
subucula, Epist. I, 1, 95.
suffragia punctis data, Epist. II, 2, 99.
summus, opp. primus, Carm. III, 28, 13. Epist. I, 1, 1.
super, Carm. I, 18, 8. Sat. II, 6, 3.
sunt qui, Carm. I, 1, 3.
supermus, Epod. 1, 29.
supervacuus, Carm. II, 20, 24.
suscitare, Sat. I, 1, 83.
synaloephe, Carm. II, 7, 5. Sat. II, 3, 91. II, 6, 67. Epist. I, 2, 70.
syncope, Carm. II, 2, 2. Sat. I, 5, 79. I, 9, 48.
synecdoche, Carm. I, 28, 6. II, 1, 34.
synecphonesis, Carm. III, 4, 41. Sat. II, 8, 1.
synesis, Sat. I, 1, 100.
tabula votiva, Carm. I, 5, 13.
tantum quantum pro tam quam, Sat. I, 8, 17. cf. Sat. II, 3, 317. II, 5, 80.
temere, Epist. II, 2, 13.
tempus, Carm. II, 7, 1.
terminalia, Epod. 2, 59.
ternarius numerus, Carm. I, 28, 36. III, 3, 65. III, 22, 3. C. S. 23. Sat. II, 1, 7.
tibiae, Carm. IV, 15, 30. A. P. 202.
timidus cum genit., Epist. I, 15, 33.
tnesis, Carm. I, 6, 3. Sat. I, 1, 86. II, 6, 95.
toga, Carm. I, 36, 9. Epod. 4, 8.
tollere liberos, Sat. II, 5, 46.
toralia, Sat. II, 4, 84.
trepidare, Carm. II, 3, 12. II, 11, 4.
tribulis, Epist. I, 13, 15.
trigon, Sat. I, 6, 126. p. 347.
triumphare, Carm. IV, 2, 49.
triumviri capitales, Epod. 4, 11.
trochus, Carm. III, 24, 57.
tu, omissum, Sat. II, 7, 66.
tunica, Sat. I, 2, 25. II, 7, 10. Epist. I, 7, 65.
turpiter, A. P. 3.
umbilicus, Epod. 14, 8.
umbrae, Sat. II, 8, 22.
unde, Carm. II, 12, 7. Sat. I, 6, 12. II, 6, 21.
unguis, proverbial inde sumpta, Carm. III, 6, 24. Sat. I, 5, 32.
unicus, Carm. III, 14, 5.
unio, Sat. II, 3, 239.
unus, Epod. 12, 4. Epist. I, 6, 1.
urbanus, Epist. I, 9, 11.
urgere, Carm. II, 9, 9.
urna, Sat. I, 1, 54.
ut, Carm. I, 9, 1. I, 14, 3. III, 4, 17. cf. Epod. 16, 53. Carm. III, 4, 42. III, 25, 12. IV, 4, 42. Epist. I, 19, 3. Sat. I, 3, 120. II, 3, 246.
utcumque i. q. simulac, Carm. IV, 4, 35.
uterque et utrique, Sat. I, 8, 25.
valere cum infinit., Carm. I, 34, 12.
vaporare, Epist. I, 16, 7.
vates et poeta, Carm. II, 6, 24.
ve, Carm. II, 7, 25. Sat. I, 2, 63.

vectigal, Carm. III, 16, 40.

vel, Epod. 2, 17.

venus, iactus, Carm. II, 7, 25.

verbena, Carm. I, 19, 14.

verber, Carm. III, 27, 24.

verborum collocatio in versibus, Carm.

I, 7, 15. I, 22, 17. I, 29, 13. II,

8, 1. II, 10, 6. II, 20, 11 sq. III,

11, 26. — *verbum* semel positum,

bis intelligendum, Epod. 5, 87. —

verba cum vi repetita, Carm. I, 7,

27. I, 13, 1; inter duos versus di-

visa, Sat. I, 2, 62.

versus hypermeter, Sat. I, 4, 96;

versuum apud Horatium repetitio,

Epist. I, 1, 56; versus negligenter

facti, Epist. I, 9, 4.

vestes Coae, Carm. IV, 13, 13. Sat.

I, 2, 101.

via sacra, Epod. 7, 8.

vicarius, Sat. II, 7, 79.

vicus, Epist. II, 2, 177.

videor i. q. *videor mihi*, Carm. III,

4, 6.

vin tu et vis tu, Sat. II, 6, 92.

vin conservandi ratio, Carm. II, 3,

8; *vina* graeca, Carm. I, 17, 21.

III, 19, 5. Sat. II, 8, 15; *leniun-*

tur, Sat. II, 4, 55; *liquantur*, Carm.

I, 11, 6; *vinorum* genera, Sat. II,

8, 15.

vitta, Carm. III, 14, 8.

vocabula media, Carm. I, 18, 16.

Epist. I, 6, 13; *nova*, Carm. I, 5, 8.

vocativus, Carm. II, 20, 8. Sat. II,

6, 20.

volens, Carm. III, 30, 16.

votum, Sat. II, 6, 1.

zeugma, Carm. III, 10, 5 sqq. Sat. I,

1, 3.

zona, Epist. II, 2, 40.



2
D

415224


L.C.D


6703-50


Fitts,

LIPSIAE, TYPIS B. G. TEUBNERI.

Heine







LIBRARY OF CONGRESS



0 003 094 797 6